


# Gandja na Mbia



Mayogo: Gandja na Mbia (New Testament)

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022  
6b4904fb-f8ce-5931-8218-7cee8914232c

## Contents

Matié . . . . .	1
Maloko . . . . .	57
Luka . . . . .	91
Djaa . . . . .	148
Kulu . . . . .	188
Loma . . . . .	242
1 Kolito . . . . .	269
2 Kolito . . . . .	295
Galate . . . . .	312
Efeso . . . . .	321
Filipoi . . . . .	329
Kolosai . . . . .	336
1 Tesalonike . . . . .	342
2 Tesalonike . . . . .	347
1 Timoté . . . . .	350
2 Timoté . . . . .	358
Tito . . . . .	363
Filemo . . . . .	367
OmaEbele . . . . .	369
Djaki . . . . .	387
1 Piele . . . . .	393
2 Piele . . . . .	401
1 Djaa . . . . .	406
2 Djaa . . . . .	413
3 Djaa . . . . .	415
Djude . . . . .	417
Apokalipisi . . . . .	419

**Bádha Ngali**  
**gba Yesu Kilisito maka li**  
**Matié**  
**aye lie ko**  
**Eli na kalanu**

Bádha Ngali inde li Matié aye e ngakpokpo me Yesu ne Məkobho inde li Ebhe abhú nani e-o. A ko kpála inde li Ebhe amene li pápá gba e ongu inde ani apa nani bhú Gandja na Didili-e me ni améne e pi okpála gba ni-o. Bádha Ngali ango-o bha bini pi opiga gba omaYuda ade inde u azu Yesu bhú e di ne bhe ani abhele bhú e-o. Engú bini, a la di pi ndu okpála na píla doto hana.

Bádha Ngali ango-o ngasuno Yesu maka 'ngbé mäsuno inde ne angu nambamba 'ta líli gba Ebhe, inde la di ngasuno pindji Nau gba Ebhe-o . Ongú na ngbengbengbe inde bhú nasuno gba ani-e a bhuluvue: (1) Nasuno a pí 'ta (alo 5-7). (2) Olíli pi oməkpatá ndjikpa ne ká bhisi (alo 10). (3) Ogbitaku pindji Nau na abhúlá (alo 13). (4) Nadu məkpatá gba Yesu (alo 18). (5) Ekpí na soso (oalo 24-25).

**Ongbengbe ongu inde bhú bhuku inde-e ngae inde:**

Onguo ogbi Yesu Kilisito di ne nazu lie ka ani 1:1 - 2:23

Kulu gba Djaa bhulu nabatisa okpála 3:1-12

Batisimo di ne nale inde li Djabulu ale Yesu ne e-o 3:13 - 4:11

Kulu inde li Yesu amene e bhú ká okpála na Galilaya 4:12 - 8:34

Dhuku gba Yesu nayie bhú Galilaya ngú nanu abhú Yelusalema 9 - 20:34

Oekpi na soso gba Yesu abhú Yelusalema 21:1 - 27:66

Nakpi ne nazuku gba Yesu di ne nakoto ka ani li okpála 28:1-20

*Onguo ogbi Yesu Kilisito*  
*(Tsia bhú Luk. 3:23-38.)*

<sup>1</sup> A inde-e 'li onguo ogbi Yesu Kilisito , inde u azu e bhú piga gba 'ngbé ngámá Davidi, di ne bhú piga gba Abalahama-o.

<sup>2</sup> Abalahama azu Isaka, Isaka azu Yakobho, Yakobho azu Yuda di ne ondaise e,

<sup>3</sup> Yuda azu Peledje ne Djala li Tamala,

Peledje azu Esilome, Esilome azu Lama,

<sup>4</sup> Lama azu Aminadaba, Aminadaba azu Nasone,

Nasone azu Salimona,

<sup>5</sup> Salimona azu Boadja li Laaba,

Boadja azu Obede li Luta,

Obede azu Yese,

<sup>6</sup> Yese azu 'ngbé ngámá Davidi.

Davidi azu Salomo li ele gba Ulia,

<sup>7</sup> Salomo azu Loboama,

Loboama azu Abia,

Abia azu Asa,

<sup>8</sup> Asa azu Djodjafata,

Djodjafata azu Djolama,

Djolama azu Odjiasi,

<sup>9</sup> Odjiasi azu Djoatama,

Djoatama azu Akadji,

Akadji azu Edjekia,

<sup>10</sup> Edjekia azu Manasi,

Manasi azu Amosi,

Amosi azu Djodjiasi,

<sup>11</sup> Djodjiasi azu Djekonia di ne ondaise e. Abhomu-o, u atsia abha omafsalaele bhú bali abhú kuti na Babilona.†

<sup>12</sup> Pita nabha uo bhú bali bhú Babilona-a,

Djekonia azu Salatiele,

Salatiele azu Djolobabele,

<sup>13</sup> Djolobabele azu Abiuda,

Abiuda azu Eliakime,

Eliakime azu Adjole,

<sup>14</sup> Adjole azu Sadoka,

Sadoka azu Akime,

Akime azu Eliude,

<sup>15</sup> Eliude azu Eleadjali,

Eleadjali azu Matana,

Matana azu Yakobho,

<sup>16</sup> Yakobho atsia azu Djodjefu 'ko Malia inde azu Yesu, u a'i e me Masiya-o .

† 1:11 1:11 Tsia bhú 2 Ong. 24:12-16.

<sup>17</sup> Nako ndu opiga bhomu-o hana-a, nayie li Abalahama nakolo li Davidi-e, a ko opiga ndjikpa ne ká badha, nayie li Davidi nakolo li namba omafsalaele bhú bali na Babilona-a, a ko opiga ndjikpa ne ká badha, nayie li nanu bhú bali abhú Babilona-a nakolo li nazu Masiya-a, a ko di opiga ndjikpa ne ká badha.

*Malia azu Yesu  
(Tsia bhú Luk. 2:1-7.)*

<sup>18</sup> A inde-e lele maka u azu Yesu Kilisito lie ko. Malia, 'hi ani-e adu adjeke kuva gba o ne Djodjefu-o. Engú bini, kala me u mbila lio na elo ne bhoko-o, ani abi ebhi bhú angu gba Bu Bhobua. <sup>19</sup> Abhomu-o, 'ko ani Djodjefu inde adu nani kpála namanga Ebhe-e, du akunda naha nana pi ani bhú ká djila okpála de. Ani atsia au ndjindji me ni tse ani bhú pepe. <sup>20</sup> Nedhinga ani adu abhundja lie mo-o, andjelu bini gba Ngámá akoto li ani bhú loto. Ani atsia apa pi ani me: «Djodjefu, ndili gba Davidi, mo okpé naha wala mu Malia de, anga ebhi inde ani nde ne e ayie ka Bu Bhobua. <sup>21</sup> Ani azú ndili na bhobhoko inde mo ogísila 'li e me Yesu,\* anga ani akóbho omaha e bhú osisiti 'ngú gba o-o.» <sup>22</sup> Ndu 'ngú bhomu-o hana amene lie ngubula me engú li Ebhe Ngámá apa nani e bhú 'li polofeta mene lie. Engú inde ani apa nani e me:

<sup>23</sup> «Tsia nga, elo inde i mbila nga 'ngú na bhoko de-e abí 'bhi, ani tsia zú ndili na bhobhoko inde u agísila 'li e me Imanueli.†»

(A akunda napa me: Ebhe bhú dabili bini ne ní.) <sup>24</sup> Li Djodjefu azuku lie, ani amene maka li andjelu gba Ngámá apa pi ani lie-o. Ani atsia aha Malia maka wala e. <sup>25</sup> Engú bini, u si ne ani pí polo bini maka elo ne bhoko de nakolo li 'kpí li Malia azu ndili na bhobhoko inde li Djodjefu agísila 'li e me Yesu-o lie-o.

\* **1:21** 1:21 Yesu: 'Hi inde me Yesu-o, a akunda napa me Ebhe ne makobho gba okpála. † **1:23** 1:23 Tsia bhú Isa. 7:14. \* **2:1** 2:1 Beteleme: A ko kuti inde u azu nani 'ngbé ngámá Davidi bhú e-o. † **2:1** 2:1 Tsia bhú Mik. 5:1. † **2:6** 2:6 Tsia bhú Mik. 5:1.

## 2

*Obhulu imbilangu ago ngú nadhögö Yesu*

*(Tsia bhú Luk. 2:8-20.)*

<sup>1</sup> U azu nani Yesu bhú Beteleme.\* Kutu bini na ndu doto na Yudaya, bhú nedhinga gba 'ngbé ngámá Elode† me-e, obhulu imbilangu ayie ne andjongu, u akolo bhú Yelusalema. <sup>2</sup> U atsia ayi me: «'Ngbé ngámá gba omaYuda inde u azu e mbia inde-e su? Padhá de, anga ya au ikupala inde asuno me u azu ani-e akoto ne andjongu, abhomu-o, ya atsia ago ngú nadhögö ani.»

<sup>3</sup> Li Elode adje lie mo-o, mabhundja gba ani di ne bhe gba ndu okpála na Yelusalema hana angbingi. <sup>4</sup> Abhomu-o, ani apo bhula ongbengbe odimandö gba Ebhe, di ne omusuno na líli gba Moidje-o. Ani atsia ayi uo me: «Bili inde a ayo me u zu Masiya li e ngae dho?» <sup>5</sup> U agie pi ani me: «Abhú Beteleme, bhú ndu doto na Yudaya, anga polofeta aye nani me:

<sup>6</sup> «Ngamu, Beteleme inde bhú ndu doto na Yudaya, mu mbomboye ane okuti koko na Yudaya mane ade. Padhá de, anga ngámá inde alila okpála gba ma na Isalaele, akoto bhú mu.†»

<sup>7</sup> Abhomu-o, Elode a'i obhulu imbilangu-o bhú pepe. Ani ayi uo li kukulu nedhinga inde li ikupala ang-o akoto lie-o. <sup>8</sup> U agie 'ngú lie pi ani tété-e, ani atsia atima uo bhú Beteleme ne napa pi uo me: «Yi nana, yi gili 'ngú pindji ndili-e na paká paká. Li yi u ani-e, yi de go pa mu, amba ngama di-e, ma nu dhögö ani.»

<sup>9</sup> Pita u adje engú li 'ngbé ngámá Elode apa e lie, u atsia aholo 'nú. Me-e, ikupala u au e andjongu-o adu adholo kala uo, a atsia anu alu pi bili

inde li ndili-e adu li e-o. <sup>10</sup> U au matá ikupala-a lie me-e, u abedhe ne djali bedhe. <sup>11</sup> U ali abhú 'ti-o, u atsia au ndili-e ne 'hi e Malia . Abhomu-o, u akikita lipuku o kuto, u atsia adhogo ani. U abhulu okili gba o-o. U atsia aha apepe pi ani li olo, ne mungotsi, la di ne mungotsi koko na mase naali inde 'li e me mila . <sup>12</sup> Pipita-a, Ebhe atsia apa pi uo bhú loto me u agie matá lio agba Elode de. Abhomu-o, u atsia agie lio agba o li kpadji koko.

### *Malia ne Djodjefu akpe kpata bhú Edjipeto*

<sup>13</sup> Pita li obhulu imbilangu-o agbida lie, andjelu bini gba Ngamá-a akoto li Djodjefu bhú loto, ani atsia apa pi ani me: «Yie bhúlá, ha ndili-e ne 'hi e, amba mu kpe ne uo bhú Edjipeto. Du oo akólo li nedhinga inde ma agáma 'ngú pi mu lie-o. Padhá de, anga Elode agili ndili-e ngú nabhele ani.» <sup>14</sup> Sukpe-e, Djodjefu ayie bhúlá, ani aha ndili-e ne 'hi e, ani atsia akpe ne uo bhú Edjipeto. <sup>15</sup> Ani adu oo akolo li 'kpí li Elode akpi lie, ngubula me engú inde li Ebhe Ngámá apa nani e pi polofeta-a, amene lie. Ngámá apa nani pi opolofeta me: «Ma a'i ndili gba ma me ani koto bhú Edjipeto kokoto.»

### *Elode abhili ongisi na djedjedje*

<sup>16</sup> Li Elode au lie me obhulu imbilangu-o apite ni-e, ani abi 'gú naali. Abhomu-o, ani atsia aha líli me u nu bhú Beteleme di ne bhú ndu doto gba ni-e hana, amba u bhili ndu ongisi na djedjedje hana nayie bhú kalanga bhisi akø ne kuto. Ani aha líli bhomu-o nakpata lele kalanga inde li obhulu imbilangu-o aha e pi ani-o. <sup>17</sup> Abhomu-o, engú inde li polofeta Djelemi apa nani e, atsia amene lie. Djelemi apa nani me:

<sup>18</sup> «U adje eli bini bhú kuti na Lama, oegbá di ne omulopolo.

A ngaku 'gbá ongisi gba e bhomu-o Lasele.

Ani kunda de me u yoko ni-e de, anga ndu ongisi gba ani-e hana amu.†»

### *Djodjefu, ne Malia di ne Yesu agie lio bhú Nadjaleta*

*(Tsia bhú Luk. 2:39-40.)*

<sup>19</sup> Pita li Elode akpi lie-e, andjelu bini gba Ebhe Ngámá-a akoto li Djodjefu bhú loto bhú Edjipeto. <sup>20</sup> Ani atsia apa pi ani me: «Yie bhúlá, ha ndili-e ne 'hi e, yi holo kpadji, amba yi gie liyi ne uo bhú doto na Isalaele. Padhá de, anga okpála inde adu nako nakunda nabhele ndili-e amu.» <sup>21</sup> Djodjefu ayie bhúlá, ani aha ndili-e ne 'hi e, ani atsia agie lie bhú doto na Isalaele. <sup>22</sup> Engú bini, ani adje la lie me Alikilausi ne 'ngbé ngámá bhú ndu doto na Yudaya bhú da 'dyi e Elode-e, ani atsia adje tsulu ngú nanu oo. Ebhe agbele matá 'dje ani bhú loto, ani atsia agie lie bhú ndu doto na Galilaya. <sup>23</sup> Ani anu asi kuti bhú gudhu na Nadjaleta, ngubula me engú inde li opolofeta apa nani e, amene lie. Opolofeta apa nani me: «U adú a'i ani me Kpála na Nadjaleta.»

## 3

### *Djaa bhulu nabatisa okpála apa pi okpála me u dji bua o*

*(Tsia bhú Mlk. 1:2-6; ne bhú Luk. 3:1-6; di ne bhú Dja. 1:19-23.)*

<sup>1</sup> Bhú oekpi bhomu-o, Djaa bhulu nabatisa okpála akoto nani abhú mili bili na ndu doto na Yudaya. Ani adu atotobhila me: <sup>2</sup> «Yi dji bua yi, anga Nau na abhúlá akolo masikpe!» <sup>3</sup> Djaa nani ne kpála inde li polofeta Isaya akpokpo 'ngú gba e me:

«Kpála bini ngatotobhila bhú mili bili me:

<Yi leke kpadji gba Ngámá-o.

† 2:15 2:15 Tsia bhú Oz. 11:1. † 2:18 2:18 Tsia bhú Djlm. 31:15. † 3:3 3:3 Tsia bhú Isa. 40:3.

Yi leke bua yi ngú nago ka ani-o.†»  
 4 Djaa adu adyi bongo inde u adu e li su enu, ani adu agbite ekpu na kó 'nu ludu e. Ani atsia adu azu omakindolo di ne nadha eu.  
 5 Abhomu-o, okpála na Yelusalema di ne okpála na Yudaya libhomu ne obhende na ndu doto inde lingo ngade 'ngu na Djuludani libhomu adu ago naje engú inde ani adu akpokpo e-o. 6 U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani.

7 Bhati omuFalisai di ne oSadukai adu ago ngú nasia batisimo. Li Djaa au lie mo-o, ani atsia ayi uo me: «Ngayi opiga kpulu inde-e, a asuno pi yi da me yi kpe egú gba Ebhe inde ngago-o? 8 La-a, yi suno bhú okulu gba yi-e me yi adji bua yi adji, 9 amba yi 'o nabhundja li bhobua yi makpe me: «Engú li ya ade anga Abalahama ne ogbi ya.» Padhá de, anga ma ngapa pi yi me, Ebhe ti da nagbe ongisi pi Abalahama bhú ká oteme yi ngau e inde-e mada yi. 10 'E-e! Mbia inde-e, ngbakpa a'o lie bhú li 'dhu ondula-a ngubula nadodolo. Ndu ndula hana inde i li líli na babadha de-e, u adé, u tsia bhíke bhú djua. 11 Ngama-a, ma ngabatisa yi bhú engu ngú nasuno me yi adji bua yi adji. Engú bini, kpála bhende i ngago pita ma-a, ane ma ne angu. Ma la ne mangua tetele kpála dho me ma gbe maleko bhú 'dhu ani-e! Ngaani-e, ani abátisa yi ne Bu Bhobua di ne djua. 12 Ani aholo kakpa gba e sa 'kpa e ngú nape fufukudha bhú nguwa gba e amba ni bu nguwa bhú ngbokopi. Engú bini, fufukudha-a, ani atsúlu bhú djua inde na duduma ne duduma.»

*Yesu asia batisimo  
 (Tsia bhú Mlk. 1:9-11; ne bhú Luk. 3:21-22; di ne bhú Dja. 1:29-34.)*

† 4:4 4:4 Tsia bhú Det. 8:3. † 4:6 4:6 Tsia bhú Ets. 91:11-12.

13 Abhomu-o, Yesu ayie bhú Galilaya, ani anu abhaka Djaa bhú ngade 'ngu na Djuludani ngú nasia batisimo ka ani. 14 Djaa di me yala. Ani atsia adu apa me: «Ma sia mangbo batisimo ka mu ngama. Mu ngago matá abhaka ma ngamu!»  
 15 Engú bini, Yesu atsia agie pi ani me: «Ziba me amene lie moko mbia inde. Padhá de, anga a ayo me ni mene ndu 'ngú hana inde li Ebhe ayo e ka ní-o.» Abhomu-o, Djaa atsia aziba me amene lie moko. 16 Li Yesu asia batisimo lie, ani atsia akoto bhú 'ngu-o. Me-e, kokpi abhulu lie. Ani atsia au Bu Bhobua gba Ebhe-e ngako maka pidjo, a nde ngago pi ani. 17 Abhomu-o, eli bini atsia ayie abhúla ne napa me: «A inde-e ndili gba ma na mukunda-o. A ko kpákrú na bua ma.»

## 4

*Djabulu ale Yesu  
 (Tsia bhú Mlk. 1:12-13; di ne bhú Luk. 4:1-13.)*

1 Abhomu-o, Bu Bhobua atsia amba bhúla Yesu abhú mili bili ngubula me djabulu le ani. 2 Pita namene ngbikpi ndjikpa badha ne sukpe ndjikpa badha mandí nazu 'he-e, ani adje gumu. 3 Djabulu, kpála inde adji ale ani-e atuto lie de ani. Ani atsia apa pi ani me: «I du me mu nde ne Ndili gba Ebhe-e, ha líli pi oteme inde-e me akolo mapa.»  
 4 Engú bini, Yesu agie me: «U aye bhú Bhuku me:

«Kpála kóbho bha bini ka ezu de,  
 engú bini, ani akóbho ka ndu oeli hana inde  
 i ngakoto bhú 'bhe Ebhe-o.†»

5 Abhomu-o, Djabulu aha ani, anu ne ani bhú Yelusalema, gudhu na bubu-o. Ani atsia a'o ani pi tulundji 'ngbé 'ti Ebhe gba omaYuda-o. 6 Do ani pi Yesu de me: «I du me mu nde ne ndili gba Ebhe-e, 'ulu mu ko kuto! Padhá de, anga u aye bhú Bhuku me: «Ebhe ahá líli pi oandjelu gba e ngú mu.»

U tsia bí mụ sa 'kpa o  
ngubula me mo otú 'dhụ mụ li  
teme bini de.†»

7 Yesu apa pì anì me: «U aye di  
bhú Bhuku gba Ebhe-e me: «Mo  
olé Ebhe, Ngámá gba mụ-o de.†»»

8 Djabulụ anụ a'o matá anì pì 'ndjá  
eta na ndjándjá nane mane. Anì  
atsia apana pì anì ndụ naụ na doto  
hana bhú dabilì bini ne sangu gba  
o-o. 9 Anì atsia apa pì anì me: «Ndụ  
'he inde-e hana, ma ahá pì mụ i  
dụ me mụ nde akikita lipukụ mụ  
kuto kala ma ngú nadhөгө ma-o.»

10 Abhomụ-o, Yesu atsia apa pì anì  
me: «Yie oo ko, Satana ! Padhá de,  
anga u aye bhú Bhuku me:

«Dhөгө Ebhe 'ngbé Ngámá gba mụ-  
o,  
amba mụ yo la bhadi anì kpi e  
kpi.†»»

11 Abhomụ-o, Djabulụ a'o ka anì.  
Me-e, oandjelu ago de anì, u atsia  
aholo nateteke anì.

*Yesu asuno bhú Galilaya*  
(*Tsia bhú Mlk. 1:14-15; ne bhú*  
*Luk. 4:14-15; di ne bhú Dja. 4:1-3,*  
*43-46.)*

12 Li Yesu adje lie me u aholo  
Djaa-a,\* anì atsia agbe lie ne abhú  
ndu doto na Galilaya. 13 La-a,  
anì nụ bhú kùtì na Nadjaleta de,  
anì anụ mangbo bhú Kapalanauma,  
dengo ekpө na Galilaya, bhú kùtì  
gba okpála na Djabulona ne Nefitali.

14 Anì amene mo-o ngubula me engú  
nani li polofeta Isaya apa e amene  
lie. Engú nani anì apa e me:

15 «Ngayi okpála na doto na Djabu-  
lona ne Nefitali,  
ne yi okpála na kpadji na ekpө,  
ne yi okpála na kùtì inde ayi 'ngu na  
Djuludani,  
inde akolo mbia inde-e okpála  
na Galilaya  
inde li ogandji okpála ngadulụ bhú  
e-e,  
yi dje nga engú inde!

16 Ngayi okpála inde adúdu bhú bitì  
má ndundulundu-o,  
yi aú zì 'kpí na ngbéngbé na kuo  
kuo.

A akúnda napa me zì 'kpí ango-o  
akóto pì yi

okpála inde abedhe ndụ 'kpí  
hana ne tsulụ kuo-o.†»

17 Nayie li nedhinga bhomụ-o,  
Yesu aholo akpokpo mbámhá me:  
«Yi dji bua yi. Padhá de, anga Naụ  
na abhúlá akolo masikpe.»

*Yesu a'i omakpata na gigina*  
(*Tsia bhú Mlk. 1:16-20; ne bhú*  
*Luk. 5:1-11; di ne bhú Dja. 1:35-51.)*

18 Li Yesu adụ adhukụ lie lingo  
ekpө na Galilaya-a, anì au obhosi  
bhisi me u nde ngagbe sungu. A adụ  
ondaise. A adụ Simo inde u agisila  
'li e me Piele ne ndai e Andilì. 19 Anì  
atsia apa pì uo me: «Yi go kpata ma,  
amba ma mene me yi dụ ibilì nagilì  
okpála pì Ebhe maka yi agbegbe  
osungu lie-o.» 20 Ma gala kolo me-e,  
u abala 'kpa li onado gba o-o, u atsia  
anụ ne uo. 21 Yesu adyudyo matá lie  
ne kalanụ, anì au obhosi koko bhisi,  
a adụ Djaki ne uo ne ndai e Djaa ,  
ongisì gba Djebedayo-o. U adụ bhú  
zabụ gba o bhú dabilì bini ne 'dyì  
o me u nde ngaleke onado gba o-o.  
Anì a'i uo me u go kpata nì. 22 Ma  
gala me-e, u a'o ka 'dyì o ne zabụ  
gba o-o. U atsia anụ ne uo.

*Yesu asuno pì okpála, anì atsia*  
*akobho di obhulụ kuo*  
(*Tsia bhú Mlk. 1:39; di ne bhú*  
*Luk. 4:44, 6:17-18.)*

23 Abhomụ-o, Yesu adhukụ bhú  
Galilaya libhomu. Anì adụ asuno  
bhú oeti nadje lílì gba Moidje inde  
na ndu doto bhomụ-o. Anì adụ  
di akpokpo Bádha Ngali Naụ na  
abhúlá-o. Anì atsia adụ di akobho  
ndụ okuo hana di ne ndụ eze hana  
li okpála adụ ne e-o. 24 Abhomụ-  
o, ngali gba anì ayangba bhú ndu  
doto na Silia libhomu. U atsia ago  
pì anì ne okpála inde adụ ne okuo

† 4:7 4:7 Tsia bhú Det. 6:16. † 4:10 4:10 Tsia bhú Det. 6:13. \* 4:12 4:12 Dja: A ko Djaa  
bhende Bhulụ nabatisa okpála-o. † 4:16 4:15-16 Tsia bhú Isa. 8:23 - 9:1.



ngangá-a hana: obhende li osisiti bua adu ato mbolo li o, obhende li kuo nagbulu magbulu adu amene o, ne obhende na eze. Ani atsia akobho uo. <sup>25</sup> Abhomu-o, okpála bhelé inde ayie bhú Galilaya, ne bhú ogudhu Ndjikpa, ne bhú Yelusalema, ne bhú Yudaya la di ne ayi 'ngu na Djuludani atsia akpata ani.

## 5

### *Djali na kukulu*

(*Tsia bhú Mlk. 3:13; di ne bhú Luk. 6:12-13, 20-23.*)

<sup>1</sup> Li Yesu au bhiti okpála lie-e, ani a'u apí 'ta. Ani adu kuto, omukpata gba ani-e atsia adyudyo lio de ani.

<sup>2</sup> Abhomu-o, ani aholo nasuno pi uo me:

<sup>3</sup> «A ko djali pi okpála inde ngau lio padhá kala Ebhe, anga ngauo-o, Nau na abhúla-a pi uo.

<sup>4</sup> A ko djali pi obhende ngaku 'gbá, anga ngauo-o, Ebhe akúo ngula sala uo ngae.

<sup>5</sup> A ko djali pi obhende na bhuku bua, anga ngauo-o, u agbógbo bhusu o li doto inde li Ebhe apana e pi uo-o.

<sup>6</sup> A ko djali pi obhende akunda bha ndju namene ngbili 'ngú, anga ngauo-o, Ebhe améne me u du bedhe ngú namemene.

<sup>7</sup> A ko djali pi obhende ngadje ndjinga okpála koko, anga ngauo-o, Ebhe adjé ndjinga uo.

<sup>8</sup> A ko djali pi obhende bubu li bua o, anga ngauo-o, u aú Ebhe.

<sup>9</sup> A ko djali pi obhende ngato guo 'ngú sunda okpála, anga ngauo-o, u a'í uo me ongisi gba Ebhe.

<sup>10</sup> A ko djali pi obhende u ngato mbolo li o ka anga u ngamene ngbili 'ngú,

anga ngauo-o, Nau na abhúla-a pi uo.

<sup>11</sup> A ko djali pi yi i du me okpála nde ngasobho yi, u nde ngato mbolo li yi, u nde di ngapa ndu sisiti 'ngú li yi hana ne eu ka yi abhuka ma lie-o. <sup>12</sup> Yi mbila me, u ato bhadi nani mbolo li opolofeta na kalanu-o moko. Kaka-a, yi du bhú djali, amba yi du di bhú ndjili, anga makalá gba yi inde abhúla-a adu ngbéngbé.»

*Yi ne ngutu di ne zi 'ke na píla doto*

(*Tsia bhú Mlk. 9:50; di ne bhú Luk. 14:34-35.*)

<sup>13</sup> «Ngayi-e, yi ne ngutu na píla doto. I du la me ngutu nde andapa-a, a akólo matá déde lele pi? A matá li kulu ade. A ayo bha ibili nababala kilidjo, li okpála tsia dédele ne 'dhu o.

<sup>14</sup> Ngayi-e, yi ne zi 'ke na píla doto. Gudhu inde ayiki lie pí eta-a, a awó lie belegu de bini. <sup>15</sup> U dhedhe eke-e, a ko ngú na'o'o asa lusa de. Engú bini, a ko ngú na'o'o apí misa ngubula me aziga ndu okpála inde abhú 'ti-e hana. <sup>16</sup> A bhadi pi yi moko. A ayo me zi yi suno lie bhú djila ndu okpála hana ngubula me u u babadha kulu gba yi-e, u de dhego 'Dyi yi inde abhúla-o.»

*Yesu go ngú nabhelo líli gba Moidje-e de*

<sup>17</sup> «Yi abhúndja de me ma ago ngú nabhelo líli gba Moidje di ne me ma ago nabhelo nasuno gba opolofeta-a\* de. Ma go ngú nabhelo de. Engú bini, ma ago mangbo ngubula nambamba tata hana. <sup>18</sup> Ma apa pi yi na paká me: abana li kokpi ne doto bhue bha pi-ie, ndu 'ngú hana inde bhú líli gba Moidje-e, améne lie. U búlu belegu mboye 'dhu balua, i du di-e mboye 'kpi balua bini bhúbhú de, nakolo bha li sokpi. <sup>19</sup> Kaka-a, kpála bhende i gumu mboye 'ngú bhú ká olíli gba Moidje-e, ani suno la di pi okpála

\* 5:17 5:17 Líli gba Moidje di ne ongú inde li opolofeta aye e, a ko Gandja na Didili-e libhomu.

koko namene mo-o, ani adú kpála na yeye bhú Nau na abhúlá. Engú bini, kpála bhende i lila-a, ani nde di ngasusuno pi okpála koko-o, ani adú kpála na ngbéngbé bhú Nau na abhúlá. <sup>20</sup> Ma pa pi yi mo-o padhá de, anga li ngbili 'ngú gba yi-e dū ngbéngbé nane bhende gba omusuno na líli gba Moidje ne omuFalisai-e mane de-e, yi ti da nali bhú Nau na abhúlá-a de.»

*Yesu asuno pindji nake 'ngú lio*  
(*Tsia bhú Mlk. 11:25; di ne bhú Luk. 12:57-59.*)

<sup>21</sup> «Yi adje me u apa nani pi onguo ogbi yi me: <Mo obhélø kpála de. Kpála bhende i bhøø kpála bhú gandji-e, a ayo me u gbe ani kala Libi okpála natsia 'kpí li 'ngú gba omaYuda .>† <sup>22</sup> Engú bini, ngama-a, ma ngapa pi yi me: kpála bhende i bi 'gú ne ndai e, a ayo me u gbe ani bhú tilibinale. Kpála bhende i pa pi ndai e me: <Mu ne ngingi>, a ayo nagbe ani kala Libi okpála natsia 'kpí li 'ngú gba omaYuda-o. Kpála bhende i sobho ndai e me: <Mu ne bhulu pele>, a ayo me u bhike ani bhú dé djua na dūduma-o. <sup>23</sup> I dū me mu nde adji naha makiso pi Ebhe li bili natsulu enu pi ani-e, i dū la me mu nde abhundja me ni amene siti 'ngú li pabili gba ndai ni-e, <sup>24</sup> mu de 'o ka makiso gba mu-o kala bili natsulu enu-o oo, amba mu gie ngaiza limu nato guo 'ngú sūnda yi ne ndai mu. Pipita la-a, mu go ha makiso gba mu-o pi Ebhe.

<sup>25</sup> I dū di me kpála nde akūnda nagbe mu kala odjudji-e, yi de dje kolo liyi ne ani me yi nde nga bha li kpadji, ngubula nalila me kpála yi nde ne e bhú 'ngú-o agbe mu bhú tilibinale de, amba djudji a'í polisi de me ani to mu bhú tikpu-o de. <sup>26</sup> Ma apa pi mu na paká me, mu ti da nakoto oo padhá de i dū me mu nde di mangimbo bhomu-o nakolo li senge na soso-o de ko.»

*Nasuno pindji nakūnda bhoko, i dū di-e øø koko*

(*Tsia bhú Mat. 18:8-9; di ne bhú Mlk. 9:43, 47-48.*)

<sup>27</sup> «Yi adje me u apa nani me: <Mo okūnda bhoko, i dū di-e øø koko de.>† <sup>28</sup> Engú bini, ngama-a, ma apa pi yi me: kpála bhende i tsia øø koko ne gumu ani-e, kpála ango-o akūnda øø ango-o li bhobua e akūnda.

<sup>29</sup> I dū me lí djila mu na kokpa nde ngato mu bhú siti 'ngú-o, mu de gbe, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dūduma.

<sup>30</sup> I dū la di me 'kpa mu na kokpa nde ngato mu bhú siti 'ngú-o, mu de kodho, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na dūduma.»

*Nasuno pindji nagbo bhusu o bhú kva*

(*Tsia bhú Mat. 19:7-9; ne bhú Mlk. 10:4-5; di ne bhú Luk. 16:18.*)

<sup>31</sup> «U apa di nani me: <I dū me kpála bini nde agie wala e-e, a ayo me ani ye balua inde li ongámási adéle 'kpa o bhú e pi ani. Balua ango-o asúno ngae me ani atse ani atse.>† <sup>32</sup> Engú bini, ngama-a, ma apa pi yi me, kpála bhende i 'e wala e me ani nde holo ani ne bhoko koko de-e, ani ngakata ani bhú nakūnda bhoko koko. A akūnda napa me, kpála bhende i ha øø inde li bhoko koko agie e, ani akūnda bhomu-o øø gba kpála koko.»

*Nasuno pindji natu silika*

<sup>33</sup> «Yi adje matá nani me u apa pi onguo ogbi ní me: <Mo ogúlu silika mo otu e de. Engú bini, mene engú mo otu silika li e kala Ngámá-o.>

<sup>34</sup> La ngama-a, ma apa pi yi me, yi atu silika belegu de bini: yi atu silika ne 'li kokpi de, anga a bhomu-o bili li Ebhe ngadu li e-o. <sup>35</sup> Yi atu silika

† 5:21 5:21 Tsia bhú Eki. 20:13; di ne bhú Det. 5:17. † 5:27 5:27 Tsia bhú Eki. 20:14; di ne bhú Det. 5:18. † 5:31 5:31 Tsia bhú Det. 24:1.

ne 'li doto de, anga a ko bili inde ani nga'o 'dhu e li e ko. Yi atú silika ne 'li Yelusalema de, anga a ko gudhu gba Ebhe, 'Ngbé Ngámá. <sup>36</sup> Mo otú la di silika ne 'li 'ndji mu de, anga mu ti da nadji lí sundjo mu bini de me akolo bubu, i du di-e bibili-e de. <sup>37</sup> I du me yi nde ngagama 'ngú-o, yi de pa bha me: <A moko>, di ne me <A mo-o ade.> Padhá de, anga ndu ongu bhe pépé-e hana ayie ka Djabulu.»

*Nasuno pindji nagie siti pi siti  
(Tsia bhú Luk. 6:29-30.)*

<sup>38</sup> «Yi adje nani me u apa me: <Li kpála du djila mu-o, mu de du di djila ani>, u apa di me: <Li kpála gumu 'te mu-o, mu de gumu di 'te ani.>† <sup>39</sup> La ngama-a, ma apa pi yi me, i du me kpála nde amene siti 'ngú li yi-e, yi agísila de. Engú bini, i du me kpála bini nde asu pabhø mu na kokpa-a, mu de dji di pabhø mu na gali-e pi ani, amba ani su di. <sup>40</sup> I du me kpála bini nde akunda nagbe mu bhú ngbanga ngubula simisi gba mu-o, mu de 'o di ká koti gba mu-o pi ani. <sup>41</sup> I du me kpála nde aholo mu ne kpéke me mu bi 'he gba ni-e ngubula kilometele bini-e, mu de bi bha ibili pi ani ngú kilometele bhisi. <sup>42</sup> I du me kpála nde ayo 'he ka mu-o, mu de ha pi ani. I du me kpála nde ayo bopulu ka mu-o, mu de ha pi ani. Mo oyála naha bopulu pi kpála inde akunda nayoyo ka mu-o de.»

*Nasuno pindji nakunda bhulu yala gba o*

*(Tsia bhú Luk. 6:27-28, 32-36.)*

<sup>43</sup> «Yi adje me u apa nani me: <Kunda kilí mu, amba mu yala bhulu yala gba mu-o.>† <sup>44</sup> Engú bini, ngama-a, ma apa pi yi me, yi kunda obhulu yala gba yi ko. Yi yo Ebhe pi obhende ngato mbolo li yi-o. <sup>45</sup> Yi mene mo-o, yi dú ne kukulu ongisi gba 'Dyi yi inde abhúla-o. Padhá de, anga ani ngagbe zindjila gba e pí osisiti okpála di ne pí obabadha

okpála. Ani ngatuko ebha pí okpála na ngbingbili di ne pí obhende na ngbingbili ade ko. <sup>46</sup> Ma pa mo-o padhá de, anga i du me yi nde ngakunda bha obhende ngakunda yi-e, yi asia tété mangua makalá dho? Ondombi na mandjandja bhadi ngamemene moko! <sup>47</sup> I du la di me yi nde ngayi bha bini ondaise yi-e, yi ngamene bhomu-o mangua ngamba 'ngú dho? Omupagano bhadi ngamemene moko. <sup>48</sup> La ngayi-e, yi du ngbingbili bhú ndu 'ngú hana maka li 'Dyi yi inde abhúla-a nde lie ngbingbili ko.»

## 6

*Nasuno pindji napu 'he pi obhulu ndibhili*

<sup>1</sup> «Yi lila liyi me yi améne bádha 'ngú gba yi-e kala okpála de me u u yi mau-o de. I du mo-o de-e, yi sía makalá ka 'Dyi yi inde abhúla-a de. <sup>2</sup> Nedhinga inde mu ngapu 'he lie pi bhulu ndibhili-e, mo oméne de me ni bhi tété makpø maka li obhulu kali amemene lie bhú oti nadje líli gba Moidje di ne li ohi kpadji-e de. U memene mo-o ngubula me okpála dhøø o. Ma apa pi yi na paká me u asia makalá gba o asia. <sup>3</sup> La pi mu-o, nedhinga mu ngapu 'he lie pi bhulu ndibhili-e, a ayo de me 'kpa mu na gali-e mbila ehe inde li 'kpa mu na kokpa ngamene e de. <sup>4</sup> A moko, a ayo me napu 'he gba mu-o tigala bhú pepe, amba 'Dyi mu inde ngau 'kpí bhú pepe-e gie pi mu ngae.»

*Nasuno pindji nayo Ebhe*

*(Tsia bhú Luk. 11:2-4.)*

<sup>5</sup> «Nedhinga yi ngayo Ebhe lie, yi adú maka obhulu kali de. Padhá de, anga u kukunda nayo Ebhe me u nde alu malu bhú oti nadje líli gba Moidje di ne li odi-kpadji, amba okpála du au o mau. Ma apa pi yi na paká me u asia makalá gba o asia. <sup>6</sup> La pi mu-o, nedhinga mu ngayo Ebhe lie, a ayo me li bhú tina 'ti

† 5:38 5:38 Tsia bhú Eki. 21:24; ne bhú Lev. 24:20; di ne bhú Det. 19:21. † 5:43 5:43 Tsia bhú Lev. 19:18.

gba m̄-o. Dho bhøbhø nganda m̄ madho, amba m̄ yo 'Dyi m̄ inde li bili na pepe bhom̄-o. Abhom̄-o, 'Dyi m̄ inde a uu 'kpí bhú pepe hana-a, tsia há makalá p̄i m̄ ngae. <sup>7</sup> Nedhinga yi ngayo Ebhe lie, yi agie liyi p̄i oeli bini bhutsibhutsi maka om̄apagano de. Padhá de, anga u ngabhundja me Ebhe adjé o i d̄u me o nde ngakpokpo kamb̄i oeli. <sup>8</sup> Yi améne maka uo de, anga 'Dyi yi mbila ehe yi nde ne gum̄u e hana kala me yi yo ka ani-o. <sup>9</sup> Ngayi-e, yi yoyo Ebhe me:

<'Dyi ya inde abhúlá,

a ayo me kpála ne kpála mbila me,

m̄ ne Ebhe inde bubu.

<sup>10</sup> A ayo me m̄ go ɥ ngámá p̄ila doto.

A ayo me kpála ne kpála p̄ila doto mene mukunda

gba m̄-o maka i ngamene lie lie abhúlá ko.

<sup>11</sup> Ha ez̄u inde ati ne ya li 'kpí na naki-e p̄i ya.

<sup>12</sup> 'E siti 'ngú gba ya inde ya amene e li pab̄ili gba m̄-o.

Padhá de, anga ngaya makpe ya ngambu di li obhende ngamene osisiti 'ngú li pab̄ili gba ya-o.

<sup>13</sup> I d̄u me ya nde ali bhú nale-e, mo o'ó de me ya mene siti 'ngú-o de.

Engú bini, lila ya sakpa Djabul̄u malila.

[Padhá de, anga Nāu ne angu la di ne sangu ,

a ko naam̄u 'he, d̄ud̄uma ne d̄ud̄uma. A ad̄u moko.]>

<sup>14</sup> I d̄u me yi nde ngambu li osisiti 'ngú gba okpála-a, 'Dyi yi inde abhúlá-a a'é bhadi osisiti 'ngú gba yi-e moko. <sup>15</sup> Engú bini, i d̄u me yi nde mbu li osisiti 'ngú gba okpála de-e, 'Dyi yi 'é di osisiti 'ngú gba yi-e de.»

*Nasuno p̄indji natse 'z̄u ngú nayo Ebhe*

<sup>16</sup> «Nedhinga yi ngatse 'z̄u lie ngú nayo Ebhe-e, yi aná bhúla yi maka obhul̄u kali amemene lie de. U memene mo-o ngú nasuno p̄i okpála me o ngatse 'z̄u ngú nayo Ebhe. Ma apa p̄i yi na paká me u asia makalá gba o asia. <sup>17</sup> La p̄i m̄-o, nedhinga m̄ ngatse 'z̄u lie ngú nayo Ebhe-e, vul̄u bhúla m̄, amba m̄ pulu ne em̄u ndjindji, <sup>18</sup> amba okpála amb̄ila de me m̄ ngatse 'z̄u-o de. 'Dyi m̄ inde ne nd̄u bili hana, abana bhú bili na pepe-e, mbila bha ngae kpi e kpi. Abhom̄-o, 'Dyi m̄ inde a uu 'kpí bhú pepe hana-a, tsia há makalá p̄i m̄ ngae.»

*Yesu apa me yi po bhúla tia gba yi-e abhúlá*

*(Tsia bhú Luk. 12:33-34.)*

<sup>19</sup> «Yi apó bhúla tia p̄i yi p̄ila doto inde-e de. Padhá de, anga yi po bhúla tia p̄i yi ei-e, opálanga ne mbelende síti, li obhul̄u 'zi d̄ud̄u pabu 'ti-e, u tsia zí. <sup>20</sup> Engú bini, yi po mangbo bhúla tia p̄i yi abhúlá. Padhá de, anga oo, opálanga ne mbelende ngú nasisiti ade, obhul̄u 'zi di ngú nad̄ud̄u pabu 'ti-e me u zi-e ade. <sup>21</sup> Padhá de, anga bili inde li tia gba m̄ nde lie, bua m̄ d̄ú bhadi oko.»

*Djila kpála ne zi 'ké na k̄ute ani*

*(Tsia bhú Luk. 11:34-36.)*

<sup>22</sup> «Djila kpála ne zi 'ké na k̄ute ani. I d̄u me djila m̄ nde ndjindji-e, k̄ute m̄ libhomu d̄ú li zi 'kpí. <sup>23</sup> Engú bini, i d̄u li djila m̄ ne kuo-o, k̄ute m̄ libhomu d̄ú bhú biti. I d̄u me zi 'kpí inde m̄ ngabhundja me a bhú ni-e nde biti-e, biti ango-o né la matá dada mane.»

*Yi 'o bha nabhuka gba yi-e bhú Ebhe, yi a'ó bhú tia de*

*(Tsia bhú Luk. 16:13.)*

<sup>24</sup> «Kpála bini ti da namene kulu p̄i ongámási bhisi de. A akunda napa me, ani ú bhe bini-e padhá, ani tsia tsé ani, ani kúnda bhe koko-o,

\* 6:24 6:24 Tia: Bhú eli na Giliki-e, u aye me «Mamo», a akunda napa me na'o tia maka ebhe.

ani tsia dhika li ani. Yi ti da nadu bali pi Ebhe ne pi tia\* bhú nedhinga bini de.

<sup>25</sup> Kaka-a, ma apa pi yi me, yi a'ó bua yi abhúla ngubula mukobho gba yi-e de. Yi adú akina liyi de me ya azú si ni, di ne me ya andji si ni-ie de. Mukobho gba kpála ane ezú mane adi? Yi akina di liyi de me ya adyí si ni-ie de. Kute kpála ane bongo mane adi? <sup>26</sup> Yi tsia nga maka li odhu nde lie abhúla: u lulu 'dyi de, u gbegbe di nguwa abhiye de, u 'o'o la di 'he bhú ngbokopi de. Engú bini, 'Dyi yi inde abhúla-a ngaku uo! La ngayi-e, yi ane uo ne tata. <sup>27</sup> A ko da bhú ka yi ka nakina lie i ti da na'o mbo ekpi koko pi mukobho gba e?

<sup>28</sup> Ka ni la yi ngabhelo bua yi lie li 'ngú na bongo-o? Yi tsia nga maka li ofelele ngabhele lie abhiye: u memene kulu de, u dudu di bongo de. <sup>29</sup> Ma apa la pi yi me, abana 'ngbé ngamá Salomo bhú ká tia gba e hana-a, ani dyi belegu nani bongo maka saka uo de. <sup>30</sup> I du me Ebhe nde ngato bongo li ulu inde abhiye mo-o, ulu inde naki oo-o, inde u abhike la mambi e bhú djua-a, ani mene pi yi ane mane di? Nabhuka gba yi-e yeye mo-o ka ni? <sup>31</sup> Ka 'ngú ango-o, yi akina liyi de me: <Ya azú ni? Ya andji ni? Ya adyí li ya mangua bongo dho?> <sup>32</sup> Ndu ongu bhomu-o hana, omupagano ngagigili ngao. U gili ne ndala de. La-a, 'Dyi yi inde abhúla-a, mbila ndjindji me yi ne gamu ndu 'he bhomu-o hana. <sup>33</sup> Yi gili ngaiza Nau gba Ebhe-e bhú dabili bini ne namene ngbili 'ngú inde ani akunda e-o. Pipita-a, li Ebhe tsia há di ndu ohe koko bhomu-o hana pi yi. <sup>34</sup> Kaka-a, bua yi angamba li 'ngú na mambi de. Mambi abhúndja 'ngú gba e ngae. A li ekpi bini ne bini ne likabhu inde ati ne e.»

## 7

*Yi akódho 'ngú gba okpála koko*

*de*

*(Tsia bhú Luk. 6:37-38, 41-42.)*

<sup>1</sup> «Yi akódho 'ngú gba okpála koko de, amba Ebhe akódho di engú gba yi-e de. <sup>2</sup> Padhá de, anga lele maka yi ngakodho 'ngú gba okpála koko lie, Ebhe akódho bhadi engú gba yi-e moko. La di-e, ani améne bhadi pi yi maka yi ngamemene lie pi okpála koko-o. <sup>3</sup> Ka ni mu ngau mboye ku musoli inde bhú djila ndai mu-o lie, mu nde u la pála ndula inde bhú djila mu-o de? <sup>4</sup> Lele pi mu ti da napa pi ndai mu lie me: <Djedjeke, ma go gbe ku musoli inde bhú djila mu bhomu-o>, me a nde bhú djila mu ne pála ndula-a? <sup>5</sup> Bhulu kali, gbe ngaiza pála ndula inde bhú djila mu-o, amba pipita-a, mu tsia u la 'kpi ndjindji ngú nagbe mboye ku musoli inde bhú djila ndai mu ko.

<sup>6</sup> Yi ahá ehe na bubu gba Ebhe-e pi obulu de, anga i du mo-o de-e, u gó sisidha yi má tsue tsue! Yi abála omayaka gba yi na tia bhelé-e pi opame de, ngú nakpe me u anú adedele ne 'dhu o de.»

*Nazi 'ndji o bhú mayo*

*(Tsia bhú Luk. 11:9-13.)*

<sup>7</sup> «Yi yo 'he, amba u ha pi yi. Yi gili 'he, amba yi sia. Yi bhi bhoti, amba u 'u pi yi. <sup>8</sup> Padhá de, anga kpála bhende ngayo 'he ngasisia. Kpála bhende ngagili 'he ngauu. Kpála bhende ngabhi bhoti-e, u nga'u'u pi ani. <sup>9</sup> Bhú ká yi-e, a ko da inde i du me ndili gba ani-e nde ayo mapa ka ani-e, ani tsia há pi ani teme? <sup>10</sup> I du di-e me ndili nde ayo sungu ka 'dyi e, ani tsia há pi ani kpulu? <sup>11</sup> I du la me, ngayi okpála-kuti inde sisiti-e, yi nde ambila naha ohe na babadha pi ongisi gba yi-e, lele pi li 'Dyi yi inde abhúla-a há ohe na babadha lie pi obhende ngayoyo ka ani-e de-e?»

*Lili na kukulu*

*(Tsia bhú Luk. 13:24.)*

<sup>12</sup> «Ndu 'ngú hana inde yi ngakunda me okpála mene e pi yi-e, yi mene di engú ango-o pi uo. A

bhomu-o engú inde li líli gba Moidje apa e, la di ne ongu inde li opolofeta aye e-o.»

*Nasuno pindji okpadji bhisí kpi kpi*

*(Tsia bhú Luk. 13:25-27.)*

13-14 «Yi li li bhoti bhende na mbomboye ko! Padhá de, anga a ngato kpála bhú mukobho ngae. La-a, kpadji ang-o dada kpekpeke. Kaka-a, okpála ngali li kpadji ang-o bhelé ade. Yi alí li bhoti bhende na ngbéngbé-e de. Padhá de, anga a ngato kpála bhú ngita ngae. La-a, dada kpekpeke ade. Kaka-a, okpála bhelé ngagbida li kpadji ang-o.»

*Opolofeta na eu*

*(Tsia bhú Luk. 6:43-44.)*

15 «Yi lila liyi ka opolofeta na eu-o malila. Padhá de, anga u ngago agba yi me u nde adyi kó kandelø, engú bini, abhú uo-o, a ko onute. 16 Yi ambíla uo li okulu gba o-o. U koko manga li ondula na eti de. U koko la di malibhombi li kobe de. 17 A moko, ndula na babadha ngali bhadi olíli na babadha. Engú bini, ndula na sisiti ngali bhadi olíli na sisiti. 18 Ndula na babadha ti da nali olíli na sisiti de, la di-e, ndula na sisiti ti da nali olíli na babadha de. 19 Ndú ndula hana inde i li líli na babadha de-e, u adé, u tsia bhíke bhú djua. 20 A moko, yi ambíla opolofeta na eu li okulu gba o-o.»

*Omukpata na kukulú*

*(Tsia bhú Luk. 13:25-27.)*

21 «A ko de me okpála bhende ngapa muma me <Ngámá, Ngámá-a!> alí ndú o hana bhú Nau na abhúlá-a de. Engú bini, a alí bha bini ne obhende ngamene engú inde li 'Dyi ma inde abhúlá-a ngakunda e ko. 22 Li 'kpí nakodho 'ngú-o, okpála bhelé apá muma me: <Ngámá, Ngámá, ya mene nani kulu na polofeta ne 'li mu di? Ya pandja nani osisiti bua bhú okpála ne 'li mu di? Ya mene nani ongamba 'ngú

bhelé ne 'li mu di?> 23 La-a, ma tsia gíe pi uo me: <Ngayi obhulú namene siti 'ngú inde-e, ma mbíla nani yi belegu de bini. Yi gbe liyi de ma tsutsu!>»

*Oeti bhisí*

*(Tsia bhú Luk. 6:47-49.)*

24 «A moko, ndú kpála hana inde adje eli inde ma apa e, ani atsia amene maka li eli ang-o apa lie, ani maka kpála na imbilangu inde a'o 'dhu 'ti gba e pí teme. 25 Ebha adhi, engu asi, anvi ago ne engu-o, a atsia atu lie li kute eti-o. La-a, eti-e ti de, anga odhudhu adu me a nde pí teme. 26 Engú bini, ndú kpála hana inde adje eli inde ma apa e, ani tsia mene maka li eli ang-o apa lie de-e, ani maka kpála bini na ngingi inde ayiki eti gba e pí sike. 27 Ebha adhi, engu asi, anvi ago ne engu-o, a atu lie li kute eti bhomu-o. Eti ang-o atuko kuto, a atsia atsambala hana!»

28 Li Yesu andjia nakpo ongu bhomu-o lie, ndú okpála hana atsia angamba li nasuno gba ani-e naali. 29 Padhá de, anga ani du nasuno pi uo maka omusuno na líli gba uo-o de. Engú bini, ani adu asuno pi uo maka ngámá.

## 8

*Yesu akobho bhulu kaba bini*

*(Tsia bhú Mlk. 1:40-45; di ne bhú Luk. 5:12-16.)*

1 Li Yesu akø eta-a lie, okpála bhelé atsia akpata ani. 2 Abhomu-o, bhulu kaba bini adyudyo lie, ani atutu lipuku e kuto kala ani. Ani atsia apa me: «Ngámá, i du me mu nde akunda-a, mu ti da nakobho ma.» 3 Yesu ato 'kpa e, ani 'o li kute ani ne napa me: «Ma akunda moko, kokobho!» Ma 'li ma me-e, kaba agulu bha kolo li ani hana. 4 Abhomu-o, Yesu atsia apa pi ani me: «Gbo dje mu, mo opá 'ngú inde-e pi kpála bini de. Engú bini, nu suno bha limu pi dimande gba Ebhe

\* 8:4 8:4 Nasuno pi okpála me mo okobho: A ko nasuno me ni akpata líli gba Moidje ndjindji. Tsia bhú Lev. 14:2-32.

, amba mụ ha makiso maka li líli gba Moidje apa lie ngụbula nasuno pi okpála me mo okobho.\*»

*Yesu akobho kpála na kulu gba ngámá gba osudha na Loma (Tsia bhú Luk. 7:1-10; di ne bhú Dja. 4:43-54.)*

<sup>5</sup> Abhomụ-o, Yesu ali bhú kuti na Kapalanauma. Aní adụ ali lie oo, ngámá bini gba osudha na Loma† adyudyo lie de aní. Aní atsia akikili lie pi aní <sup>6</sup> me: «Ngámá, kpála na kulu gba ma-a asi kuto abhú 'ti. Aní agugumụ kuto, aní ngadje likabhu na kuo kuo.» <sup>7</sup> Yesu apa pi aní me: «Ngama-a, ma adjí akobho aní.» <sup>8</sup> Engú bini, ngámá gba osudha-a atsia agie me: «Ngámá, ma ne tetele kpála‡ ade, ngubula me mụ li bhú 'ti gba ma-o. La-a, mụ pa bha koli eli bini-e, li kpála na kulu gba ma-a kóbho. <sup>9</sup> Padhá de, anga ngama makpe-e, ma sa líli gba ngámá, ma la di ngaha líli pi osudha. Ma pa pi bhe bini-e me: <Nunụ!> Aní nń. Ma pa pi bhe koko-o me: <Gogo!> Aní gó. Ma pa pi bali gba ma-a me: <Mene 'he inde!> Aní méne.»

<sup>10</sup> Li Yesu adje engú bhomụ-o lie, aní angamba naali. Aní atsia apa pi okpála inde adụ akpata aní-e me: «Ma apa pi yi na paká me, ma bhaka nga ngua nabhuka inde-e bhú kpála bini bhú ká omaɪsalaee de! <sup>11</sup> Ma atsia apa la di pi yi me: okpála bhelé ayíe ne andjongu di ne akati, u tsía dúlụ pí dabilí na anokomia bhú dabilí bini ne Abalahama, ne ɪsaka, la di ne Yakobho bhú Nau na abhúlá ko. <sup>12</sup> Engú la bini, obhende ayo nani me u sia dabilí bhomụ-o, u abála uo bhú bití akilidjo. Oo, u adụ naku 'gbá di ne nazụ tate o.» <sup>13</sup> Abhomụ-o, Yesu atsia apa pi ngámá gba osudha-a me: «Gie limụ agba mụ! Maka mo obhuka lie, a ayo me amene lie pi mụ moko.» Kpála

na kulu-o atsia akobho bha bini li nedhinga ango-o ko.

*Yesu akobho 'hi wala Piele (Tsia bhú Mlk. 1:29-34; di ne bhú Luk. 4:38-41.)*

<sup>14</sup> Pipita-a, Yesu ali bhú 'ti gba Piele. Aní abhaka me 'hi wala aní nde asi kuto, kute aní nde kpákpá. <sup>15</sup> Yesu a'o 'kpa e li 'kpa aní, kute aní atsia aguo. Aní ayie bhúlá, aní atsia aholo nalụ 'zụ pi aní.

*Yesu akobho okpála bhelé*

<sup>16</sup> A akolo lie tagolo-o, u ago pi Yesu ne okpála bhelé inde li osisiti bua adụ nadụ bhú o-o. Aní apandja osisiti bua ango-o ne 'li e, aní atsia akobho di ndụ okpála na kuo hana. <sup>17</sup> Aní amene mo-o ngubula me eli inde li polofeta ɪsaya apa nani e amene lie. Engú inde aní apa nani e me:

«Aní abha ndụ olikabhu gba ya hana, aní atsia abi ndụ okuo gba ya hana li kute e.†»

*Líli pi okpála inde akunda nakpata Yesu*

*(Tsia bhú Luk. 9:57-62.)*

<sup>18</sup> Li Yesu au kambí okpála lie lingo e, aní atsia aha líli pi omụkpata gba e me o kodho 'kpí ne ayi ekpẹ na Galilaya. <sup>19</sup> Abhomụ-o, mụsuno bini na líli gba Moidje adyudyo lie, aní atsia apa pi Yesu me: «Mụsuno, ma akpáta mụ li ndụ bilí mo onú li e hana.» <sup>20</sup> Yesu apa pi aní me: «A ka onekpẹ ne gudho u asisi bhú e, a di ka odhu ne 'ti o. Engú la bini, ngama Ndíli gba kpála-a, dabilí ka ma ngú nasi tété ngú nague ade.» <sup>21</sup> Kpála koko inde adụ di suka omụkpata gba aní-e apa pi aní me: «Ngámá, ha kpadji mụma, amba ma nụ zí ngaiza 'dyi ma.» <sup>22</sup> Engú bini, Yesu apa pi

† 8:5 8:5 Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adụ nani maYuda de. ‡ 8:8 8:8 Ngámá bhomụ-o ambila nani ndjindji me líli gba omaYuda ziba de me maYuda bini li bhú 'ti gba kpála inde ne maYuda ade-e de. † 8:17 8:17 Tsia bhú ɪsa. 53:4.

ani me: «'O okpála koko u zi ani ngao. § La ngamu-o, go kpata ma.»

*Yesu ayoko anvi na kpekpeke*  
(*Tsia bhú Mlk. 4:35-41; di ne bhú Luk. 8:22-25.*)

<sup>23</sup> Pipita-a, Yesu a'ụ bhú zabụ, omụkpata gba ani-e atsia a'ụ'ụ nganda ani. <sup>24</sup> Ma gala kolo me-e, anvi bini na kpekpeke aholo nape pí ekpø-o masikpe de me zabụ-o linda ka ngbo 'ngu-o. La ngaani Yesu-o, ani adu tila. <sup>25</sup> Abhomu-o, omụkpata-a adyudyo lio de ani masikpe, u atsia azuku ani ne napa me: «Yaka! Ngámá, kobho ní, ní adjí amú!» <sup>26</sup> Yesu atsia agie pi uo me: «Yi ne tsulu mo-o ka ni? Nabhuka gba yi-e nga bha yeye!» Aní ayie bhúlá, aní ambe bhú 'ndji anvi di ne engu-o. Abhomu-o, ndundu hana atsia akolo guguo! <sup>27</sup> Okpála angamba, u atsia adu apa me: «Kpála inde-e, a ko mangua kpála dho ngubula me belegu anvi di ne engu du namanga ani-e!»

*Yesu akobho okpála bhisi li osisiti bua adu nadu bhú o-o*  
(*Tsia bhú Mlk. 5:1-20; di ne bhú Luk. 8:26-39.*)

<sup>28</sup> Li Yesu akolo lie ayi 'ngu, bhú doto gba okpála na Gadala-a,\* okpála bhisi ayie bhú ká olata, u atsia ago abhaka ani. A adu bhú okpála ango-o ne osisiti bua, u atsia adu azi 'gú naali. Kaka-a, okpála du apu li kpadji li pápá bhomu-o de. <sup>29</sup> Abhomu-o, u aholo nasusula me: «Mo okunda namene ngú ya pi, Ndili gba Ebhe? Mo ogo ei ngú nato mbolo li ya kalanu me nedhinga nakodho 'ngú-o nde kolo nga di?» <sup>30</sup> A abhaka me de bili ango-o, 'ngbé piga opame† nde oo, u nde ngazu 'he. <sup>31</sup> Osisiti bua adu nakikiliki lio pi Yesu me: «I du me mu nde akunda napandja ya-a, mba ya bhú

piga opame inde.» <sup>32</sup> Aní apa pi uo me: «Yi nunu.» U aze bhú okpála bhomu, u atsia anu alili bhú opame-o. Me-e, ndu opame ango-o hana akø eta ne holo, u anu atuko bhú 'ngu má dhululu, ne namu ka o.

<sup>33</sup> Omulila gba uo atsi ne holo, u agbida bhú gudhu, u atsia akpokpo ndu 'ngú hana di ne engú inde akodho 'kpí li okpála bhisi inde adu ne osisiti bua bhú o-o. <sup>34</sup> Me-e, ndu okpála hana na gudhu ango-o anu ngú nabhaka Yesu. U au aní lie, u atsia akikiliki lio pi aní me aní yie bhú kuti gba o mayie.

## 9

*Yesu akobho kpála inde agugumu kuto*

(*Tsia bhú Mlk. 2:1-12; di ne bhú Luk. 5:17-26.*)

<sup>1</sup> Pipita-a, Yesu a'ụ bhú zabụ, ani agulu matá ekpø-o, ani atsia akolo bhú Kapalanauma, gudhu ani adu nadu bhú e-o. <sup>2</sup> Me-e, okpála ago pi ani ne bhoko bini inde agugumu kuto. U ago ne ani pí kalagba. Li Yesu au nabhuka gba uo lie, ani atsia apa pi kpála inde gugumu e bhomu-o me: «Atou, ndika ma, u a'e osisiti 'ngú gba mu-o a'e.» <sup>3</sup> Abhomu-o, omusuno koko na líli gba Moidje atsia apa li bua o me: «Kpála inde-e ngasobho Ebhe!»

<sup>4</sup> Li Yesu ambila mabhundja gba uo lie, ani atsia apa pi uo me: «Ka ni yi ngabhundja lie li bua yi sisiti mo-o? <sup>5</sup> Padhá de, anga ane ne bhuku ne bhedho? Ne napa me: <U a'e osisiti 'ngú gba mu a'e>, ne napa me: <yie bhúlá, dhudhuku?> <sup>6</sup> Ngú nasuno me ngama, Ndili gba kpála, ma ne angu píla doto ngú na'e osisiti 'ngú-o, a ayo me ma kobho bhoko inde.» Abhomu-o, ani atsia apa pi kpála inde agugumu-o me: «Yie bhúlá,

§ 8:22 8:22 'O okpála koko u zi ani ngao: Bhú eli inde u aye nani Gandja na Mbia bhú e-e (eli gba oGiliki), u aye me: «'O okpála bhende amu-o, u zi okuo gba o-o.» A akunda napa me: «'O okpála bhende i bhuka nga de-e me u zi okpála bhende amu-o.» \* 8:28 8:28 Gadala: A ko nani gudhu ka omaYuda de. † 8:30 8:30 Opame: Pi omaYuda-a, pame nani ne enu na sisiti. Kaka-a, u 'o nani uo de. A du bha nani na'o opame ne okpála inde naao ne omaYuda ade ko. Tsia bhú Mlk. 5:11.



ha kalagba gba mü, amba mü gie limü agba mü!»<sup>7</sup> Kpála ang-o ayie bhúlá, ani atsia atapa agba e.<sup>8</sup> Li okpála au 'ngú ang-o lie, a'o tsulü li uo naali, u adhөгө Ebhe inde aha ngua angu bhomu-o pi okpála-kuti-o.

*Yesu a'i Matié  
(Tsia bhú Mlk. 2:13-17; di ne bhú  
Luk. 5:27-32.)*

<sup>9</sup> Pipita-a, Yesu ayie oo. Ani adu akodho 'kpí lie, ani au kpála bini, a adu 'li ani me Matié. Ani adu me ani nde adu kuto bhú bilo inde u adu akala mandjandja bhú e-o. Ani apa pi ani me: «Kpata ma!» Matié ayie bhúlá, ani atsia akpata ani.<sup>10</sup> Pipita-a, Yesu anu nazu 'he abhú 'ti gba ani. Abhomu-o, bhiti ondombi na mandjandja di ne okpála koko na sisiti ago adulu nazu 'he bhú dabili bini ne Yesu di ne omukpata gba e-o.<sup>11</sup> Li omuFalisai au lie mo-o, u atsia ayi omukpata gba ani-e me: «Ka ni li musuno gba yi-e ngazu 'he lie bhú dabili bini ne ondombi na mandjandja di ne okpála na sisiti-e?»<sup>12</sup> La-a, Yesu adje engú ang-o, ani atsia apa me: «Okpála bhende ne kuo ade-e, u ne gumu mutia ade. Engú bini, okpála bhende ne kuo mangbo ne gumu mutia ngao.<sup>13</sup> Kaka-a, yi nu gili ta 'ngú inde li Bhuku gba Ebhe-e apa e me: «Engú inde anga li ma naali-e, a ko nadjе ndjinga okpála koko, a ko naha makiso de.» Padhá de, anga ma go na'i okpála bhende apa me o ngbingbili-e de. Engú bini, ma ago mangbo na'i okpála bhende au lio me o ne osisiti okpála-o.†»

*Yesu apa me u amáta nasuno gba ni-e ne nasuno koko de  
(Tsia bhú Mlk. 2:18-22; di ne bhú  
Luk. 5:33-39.)*

<sup>14</sup> Ekpí bini, omukpata gba Djaa bhulu nabatisa okpála adyudyo lio de Yesu, u atsia ayi ani me: «Ka ni li ngaya ne omuFalisai, ya ngatse

'zu lie gөmө ngú nayo Ebhe-e, la-a, omukpata gba mü-o ngamemene mo-o ade-e?»<sup>15</sup> Yesu atsia agie pi uo me: «Okpála bhende u a'i o bhú anokomia na kuva ti da nayala nazu 'he uu me 'ko elө-o nde ngabha bhú dabili bini ne uo-o? Engú bini, oekpí akólo makolo, ekpí inde u a'é 'ko elө-o lie bhú ká uo-o, li oekpí bhomu-o, u tsia tsé 'zu.

<sup>16</sup> Kpála bini ti da nadu pála bongo na mbia li bhe na didili de. Padhá de, anga pápála bhende u a'o e pépé-e sídha bongo-o, li kaka-a tsia dú la matá sisiti naali.

<sup>17</sup> U 'o'o pandi na mbia bhú odidili dhudhu na kó 'nu de. I du mo-o, li odhudhu-o úpa, li pandi-e túko, li odhudhu-o tsia síti di. U 'o'o mangbo pandi na mbia bhú odhudhu na mbia. Abhomu-o, ndundu hana tsia lila lie ndjindji.»

*Yesu akobho elө bini, ani atsia azuku di ndili na elө gba Yailo*

*(Tsia bhú Mlk. 5:21-43; di ne bhú Luk. 8:40-56.)*

<sup>18</sup> Li Yesu adu agie 'ngú pi omukpata gba Djaa lie, ngámá bini adyudyo lie de ani masikpe, ani atutu lipuku e kuto kala ani. Ani atsia apa pi ani me: «Ndili gba ma na elө-o andjili mbia inde. Engú bini, go 'o 'kpa mü pí ani, amba ani zuku.»<sup>19</sup> Abhomu-o Yesu ayie bhúlá, ani atsia akpata ani bhú dabili bini ne omukpata gba e-o.

<sup>20</sup> Bha li nedhinga bhomu-o, elө bini inde li ngute adu natuko lie ngubula kalanga ndjikpa ne ká bhisi-e ago de Yesu ne akele ani, ani atsia abu 'kpa e li 'so bongo gba ani-o.<sup>21</sup> Padhá de, anga ani adu apa li bua e me: «I du bha me ma nde abu 'kpa ma li bongo gba ani-e, ma kóbho.»<sup>22</sup> Engú bini, Yesu adji lie, ani au ani, ani atsia apa me: «Atou, ndika ma! Nabhuka gba mü-o akobho mü akobho.» Bha li nedhinga bhomu-o, elө ang-o atsia akobho.

† 9:13 9:13 Tsia bhú Oz. 6:6.

23 Yesu akolo agba ngámá-o. Aní abhaka me okpála nde má dja dja dja ngú nanu azi kuo-o, omavulu mbálá-a nde nga'u mbálá. 24 Abhomu-o, aní atsia apa me: «Yi gbe liyi ne sidi, anga ndili na eole inde-e kpi de, engú bini, aní ngala.» Abhomu-o, u aholo namu aní. 25 Li u apandja ndu okpála hana lie kilidjo-o, Yesu ali abhú 'ti. Aní aha 'kpa ndili-o. Abhomu-o, ndili-e atsia ayie bhúlá. 26 Ngali na engú ango-o atsia ayangba bhú ndu doto bhomu-o libhому.

*Yesu akobho okpála bhisi inde i u 'kpí de*

27 Li Yesu aholo 'nú lie, okpála bhisi inde i u 'kpí de-e, aholo akpata aní ne nasusula me: «Ndili gba Davidi, dje ndjinga ya!» 28 Aní ali lie abhú 'ti-e, okpála bhisi inde i u 'kpí de bhomu-o adyudyo lio de aní. Yesu atsia ayi uo me: «Yi abhuka me ma ti da nateteke yi?» U agie pi aní me: «Hení, Ngámá.» 29 Abhomu-o, aní abu 'kpa e li djila uo ne napa me: «A ayo me amene lie pi yi maka nabhuka gba yi-e nde lie ko.» 30 Abhomu-o, djila uo abhulu, Yesu atsia agbele 'dje uo kpekpeke me: «Yi gbo 'dje yi! A ayo de me kpála bini mbila engú inde-e de!» 31 Engú bini, bha naze ka uo me-e, u apandjala ngali gba aní-e bhú ndu doto ango-o libhому.

*Yesu akobho kpála bini inde i bhú 'ngú de*

32 Nedhinga li okpála bhisi inde li Yesu akobho o bhomu-o adu nanu lie, bha li nedhinga bhomu-o, okpála ago pi Yesu ne kpála bini inde i bhú 'ngú de ka siti bua inde adu nadu bhú aní-o. 33 Li Yesu agbe siti bua ango-o lie bhú aní-e, kpála ango-o atsia aholo nagama 'ngú. Abhomu-o, kambí okpála angamba, u atsia adu napa me: «Nguá 'ngú inde-e u nga lie bhú ká omafalaele belegu de bini!» 34 La-a, omuFalisai adu napa me: «Ngámá gba osisiti bua

ngaha angu pi aní ngú napandja osisiti bua ngae bha-a!»

*Yesu adje ndjinga kambí okpála*

35 Abhomu-o, Yesu adu adholo bhú ndu ogudhu di ne bhú ndu okuti hana. Aní adu nasuno bhú oeti nadje líli gba Moidje . Aní adu akpokpo Bádha Ngali Nau gba Ebhe , aní atsia adu nakobho ndu kuo hana di ne ndu oeze hana. 36 Li aní au kambí okpála lie, aní adje ndjinga uo naali, anga u adu me u nde andala, angu uo nde la di andjia maka piga okandele inde li mulila nde ka o ade. 37 Abhomu-o, aní atsia apa pi omukpata gba e me: «Nguwa abhiye-e bhelé, engú la bini, okpála na kulu-o bhelé ade. 38 Yi yo ka bhulu 'dyi-e me aní tima okpála na kulu bhú edyi gba e ngú na'e nguwa-o.»

## 10

*Yesu atima omukpata ndjikpa ne ká bhisi gba e-o*

*(Tsia bhú Mlk. 3:13-19; di ne bhú Luk. 6:12-16.)*

1 Pipita-a, Yesu a'i omukpata ndjikpa ne ká bhisi gba e-o. Aní aha angu pi uo ngú napandja osisiti bua bhú okpála, di ne nakobho ndu okuo hana, la di ne ndu oeze hana. 2 A inde-e 'li obhulu titima ndjikpa ne ká bhisi-o: kpála na kalanu-o, a ko Simo inde li Yesu agisila 'li e me Piele, ne uo ne ndai e Andili, a la di-e ongisi bhisi gba Djebedayo-o. A adu nani Djaki ne uo ne ndai e Djaa , 3 a la di-e Filipo ne uo ne Batelemi; a la di-e Tuma ne uo ne Matié, ndombi na mandjandja-o; a la di-e Tade ne uo ne Djaki, ndili gba Alafayo-o; 4 a la di-e Simo kpála na Kanana ngauo ne Yuda Isikaliote. Simo nani ne saka omaYuda inde adu agili ne kpeke me o ze bhú bali sa kpa okpála na Loma zeze-o. Yuda Isikaliote nani ne kpála inde apu ngbángá Yesu pi obhulu yala-o.

5 Abhomu-o, Yesu atima obhulu titima ndjikpa ne ká bhisi bhomu-o. Aní atsia aha olili inde-e pi uo

me: «Yi adjì-e, yi anú agba okpála inde ne omaYuda ade-e de. Yi alí di bhú ogudhù gba okpála na Samalia de. <sup>6</sup> Engú bini, yi nù mangbo agba omafalaale. Padhá de, anga uo maka okandələ inde angita. <sup>7</sup> Li kpadji-e, yi kpokpo Bádha Ngali gba Ebhe-o. Yi pa pì okpála me: «Nau na abhúlá akolo masikpe!» <sup>8</sup> Yi kobho okpála na kuo, yi zuku okpála inde amu, yi kobho obhulù kába, yi pandja osisiti bua bhú okpála. Yi asia padhá, yi ha bhadi pì okpála koko padhá.\* <sup>9</sup> Yi ahá belegù kù li falanga de bini. <sup>10</sup> Yi ahá gonia ngú enú-o de. Yi ahá bongo na mbulu bhisi de, yi nù bha ne koli maləkə inde bhú 'dhù yi ko, yi ahá ndula de. Padhá de, anga okpála inde yi adjì amene kulu bhú ká o-o abí mukobho gba yi-e ngao.

<sup>11</sup> Yi li bhú gùdhù bini, i dū di-e bhú kutì bini-e, yi de gili kpála inde bedhe ngú nasia yi, amba yi dū gba kpála ang-o akólo bhú nayie ka yi ko. <sup>12</sup> Yi li bhú eti bini-e, yi de yi okpála inde bhú 'tì ang-o mayi. <sup>13</sup> I dū me okpála na eti ang-o nde asia yi-e, guo 'ngú yi adhukù ne e de dū ne uo. Engú bini, i dū la me okpála ang-o nde sia yi de-e, guo 'ngú gba yi-e de gie lie pì yi. <sup>14</sup> I dū me u nde sia yi de-e, u dje la di 'li yi de-e, nedhinga inde yi ngakoto lie bhú 'tì ang-o, i dū di-e bhú gùdhù ang-o, yi de dyiki ndju doto na 'dhù yi ngú nasuno pì uo me yi atse uo atse. <sup>15</sup> Ma apa pì yi na paká me, li 'kpí nakodho 'ngú-o, okpála na gùdhù ang-o asía likabhu kpekpeke ané okpála na Sodomù ne Gomolo mane.»

*Okpekpeke da 'ngú inde akólo li omukpata gba Yesu*

*(Tsia bhú Mlk. 13:9-13; di ne bhú Luk. 21:12-17.)*

<sup>16</sup> «Yi gbo nga 'dje yi! Ngama-a, ma ngatima yi maka okandələ

bhú ká onute. 'E-e! Yi alá-a de, amba yi dū di ne bhukù bua maka opidjo. <sup>17</sup> Yi lila liyi ka okpála ndjindji. Padhá de, anga u ambá yi bhú otilibinali, u tsia bhí yi ne fimbo bhú otì gba o nadjè líli gba Moidje-o. <sup>18</sup> U anú ne yi kala ongámási na ndu doto di ne kala ongbengbe ongámási anga yi abhuka ma. A améne lie mo-o ngubula me yi kpokpo 'ngú gba ma-a kala uo di ne kala okpála inde ne omaYuda ade-o. <sup>19</sup> Nedhinga u anú ne yi lie kala okpála ang-o, yi akína liyi li 'ngú inde yi apá e de, di ne lele maka yi ayípa 'ngú li 'ngú ang-o lie de. Ongú inde a ayo me yi pa e, a ahá bha lie pì yi li nedhinga ang-o. <sup>20</sup> Padhá de, anga engú inde yi agáma e yíe ka yi de. Engú bini, Bua gba 'Dyi yi-e agáma 'ngú bhú yi ngae.

<sup>21</sup> Okpála apú ondaise o me u bhili uo. 'Dyi ndili apú ndili gba e me u bhələ anì. Ongisi akólo ne kpekpeke 'ndji pì okpála inde azu o, u tsia pú okpála azu o me u bhili uo. <sup>22</sup> Ndù okpála hana ayála yi ka 'li ma. Engú bini, kpála bhende akíbila nakolo bha bini makolo alì soso-o, anì tsia kóbho. <sup>23</sup> U mene yi sisiti bhú gùdhù bini-e, yi de kpe bhú gùdhù koko. Ma apa la pì yi na paká me yi ndjia nadhukù bhú ogudhù na fàlalaale hana de me Ndili gba kpála nde go de-e de.

<sup>24</sup> Yi mbila ndjindji me mukpata ne musuno gba e ne engbé de, kpála na kulu ne di ngámá na kulu gba e ne engbé de. <sup>25</sup> A ayo me mukpata kolo maka musuno gba e-o. A ayo di me kpála na kulu kolo maka ngámá na kulu gba e-o. I dū me u nde nga'i bhulù eti-e me Baladjebula-a,† u a'í la ibili okpála na eti gba anì-e pì!

<sup>26-27</sup> Kaka-a, yi akpé okpála inde améne yi sisiti-e de! Engú inde ma apa e pì yi bhú bitì-e, yi pa ibili ne ngbikpì. Engú inde u apa e pì yi

\* **10:8** 10:8 Li bili inde-e, Yesu ngakpokpo 'ngú bhomù-o pindji angu inde anì aha e pì obhulù titima gba e ngubula nateteke okpála-o. † **10:25** 10:25 Baladjebula: A bhomù-o sùka 'lì gba Djabulù.

bhú tūpele-e, yi totobhila ibili ne di apí ongbūti. Padhá de, anga ndū 'he inde awo lie mawo-o hana akóto bhú mbasū, la di-e, ndū 'he inde na pepe hana ambíla lie mambíla. <sup>28</sup> Yi akpé obhende ngabhələ kute yi, inde i ti da nabhələ bua yi de-e de. Yi kpe mangbo Ebhe inde i ti da nabhələ bua yi, la di ne kute yi libhomu bhú djua na dūduma ko. <sup>29</sup> Li mū tsindji oindjilindjili bhisi-e, mo osía tété mangua tetele tia dho? La-a, sūka uo bini kpí padhá de me 'Dyi yi Ebhe nde ziba de-e de. <sup>30</sup> La pi yi-e, Ebhe atanga belegū osundjo yi hana. <sup>31</sup> Kaka-a, yi akpé ehe bini de. Ngayi-e, abana u po bha bhúla oindjilindjili bhelé-e, yi ane uo ne tata.

<sup>32</sup> Li kpála bini pa bhú ká djila okpála me ni ne kpála ka ma-a, ngama-a, ma apá bhadi bhú djila 'Dyi ma inde abhúlá-a me a ko naama kpála. <sup>33</sup> Engú bini, li kpála bini pa bhú ká djila okpála me ni ne kpála ka ma ade-e, ngama-a, ma apá bhadi bhú djila 'Dyi ma inde abhúlá me a ko naama kpála de.»

*Yesu ago nato egú sūnda okpála*  
(*Tsia bhú Luk. 12:51-53, 14:26-27.*)

<sup>34</sup> «Yi abhúndja de me ma ago ngú na'o guo 'ngú píla doto de. Ma go ngú na'o guo 'ngú de, engú bini, ma ago mangbo ngú nagbogbo bhūsu okpála. <sup>35</sup> A moko, ma ago nagbogbo bhūsu kpála ne 'dyi e.

Ma ago nagbogbo bhūsu ndili na   le ne 'hi e.

Ma ago nagbogbo bhūsu  le gba ndili-e ne ogbi e na   le.

<sup>36</sup> Kaka-a, obhulū yala gba kpála adú bha okpála na abhú 'ti gba ani ko.†

<sup>37</sup> Kpála bhende ngakunda 'dyi e, i dū di-e 'hi e ane ma mane-e, kpála ango-o ti ne ma de. La di-e, kpála bhende ngakunda ndili na bhobhoko gba e, i dū di-e ndili na

  le gba e ane ma mane-e, kpála ango-o ti ne ma de. <sup>38</sup> Kpála bhende i bi kulusi gba e‡ de, i tsia kpata ma de-e, kpála ango-o ti ne ma de. <sup>39</sup> Kpála bhende alíla mukobho gba e-e, ani kpí. Engú bini, kpála bhende atsé la mukobho gba e ngubula ma-a, ani sía mukobho na k k l .»

*Makalá gba kpála inde asía om kpata gba Yesu*

(*Tsia bhú Mlk. 9:41.*)

<sup>40</sup> «Kpála bhende asia yi-e, ani asia bhom -o ma. La di-e, kpála bhende asia ma-a, ani asia bhom -o kpála bhende atima ma ko. <sup>41</sup> Kpála bhende asia polofeta anga a ko polofeta-a, ani asía makalá inde ati ne opolofeta. La di-e, kpála bhende asia kpála na ngbingbili anga a ko kpála na ngbingbili-e, ani asía makalá inde ati ne okpála na ngbingbili-o. <sup>42</sup> Ma apa pi yi na paká me kpála bhende ahá ngabha k po kpina 'ngu bini pi s ka okpála inde li okpála ngau o padhá inde-e anga a ko mukpata gba ma-a, kpála ango-o asía makalá gba e masia.»

## 11

<sup>1</sup> Li Yesu andjia naha olíli bhom -o lie pi om kpata gba e ndjikpa ne ká bhisi-e, ani ayie oo. Ani atsia an  ngú nasuno di ne nakpokpo eli gba Ebhe-e bhú ogudh  na ndu doto na Galilaya.

*Djaa bhul  nabatisa okpála atima okpála nayi 'ngú pindji Yesu*

<sup>2</sup> Li Djaa bhul  nabatisa okpála ad  lie bhú tikp -o, ani adje ngali okulu li Kilisito ad  amene e-o. Abhom -o, ani atsia atima om kpata gba e <sup>3</sup> me u n  yi ani me: «M  ne Masiya inde ayo me Ebhe tima e? Ne me ayo me ya adjeke kpála koko?»

<sup>4</sup> Yesu agie pi uo me: «Yi n  kpokpo engú inde yi ngadje e ne bhende yi ngau e pi Djaa: <sup>5</sup> okpála i u 'kpí

† 10:36 10:35-36 Tsia bhú Mik. 7:6. ‡ 10:38 10:38 Nabi kulusi gba e: A ko nazíba naz  likabhu di ne nakpi kabula Yesu.

de-e ngau 'kpí, obhende ne eze li 'dhu o-o ngadhuku ndjindji, obhulu kába ngakobho, obhende i dje 'kpí de-e, la di ngadje 'kpí, obhende amu-o ngazuku, okpála bhende ngau lio padhá kala Ebhe-e la di ngadje Bádha Ngali . <sup>6</sup> A ko djali pi kpála inde li engú gba ma-a bhéle nabhuka gba e mabhéle de ko.»

*Yesu akpokpo 'ngú pindji Djaa bhulu nabatisa okpála (Tsia bhú Luk. 7:18-35.)*

<sup>7</sup> Li omukpata gba Djaa aholo 'nú lie, Yesu atsia aholo nakpokpo 'ngú li 'ngú gba Djaa pi kambi okpála inde adu oo me: «Yi anu igini natsia abhú mili bili-e ni? Yi anu igini natsia mbamba inde li anvi ngadyiki e? A mo-o ade. <sup>8</sup> I du mo-o de-e, yi anu nga igini natsia ni? Yi anu igini natsia kpála inde adyi babadha bongo-o ? La-a, okpála bhende adyidi obabadha bongo-o, u dudu bhú oeti gba ongbengbe ongámási. <sup>9</sup> Yi anu nga la igini natsia ni? Yi anu igini natsia polofeta ? A moko. Ma apa pi yi me, yi anu igini natsia kpála inde ane belegu polofeta mane. <sup>10</sup> Padhá de, anga a ko kpála inde li Bhuku gba Ebhe-e apa nani li 'ngú gba e me:

«Ebhe apa me, ma ngatima bhulu titima gba ma-a pi mu kalanu ngú naleke kpadji pi mu.»†

<sup>11</sup> Ngama-a, ma apa pi yi na paká me, bhú ká okpála-kuti-e, kpála bini inde akoto, inde ngebéngbé ane Djaa bhulu nabatisa okpála belegu ade bini. La-a, ndu okpála hana inde aziba Nau na abhúla-a , abana ani du bha mbomboyé pi-ie, ani ane Djaa ne engbé.

<sup>12-14</sup> Padhá de, anga ndu opolofeta hana di ne líli gba Moidje akpokpo ngali Nau na abhúla nakolo makolo li nedhinga gba Djaa-o. I du me yi nde akunda naziba engú ma apa e, Djaa ne Eliya inde a ayo nani me ani

go-o ngae. Nayie bhú nedhinga gba Djaa bhulu nabatisa okpála akolo pi mbia inde-e, Nau na abhúla bhú gbene. La di-e, omangopu ngamene ne kpéke hana me o siti masiti. <sup>15</sup> A ayo me kpála inde li e ne djedje ngú nadje 'kpí-e djedje!

<sup>16</sup> Ma tí da nasuno okpála na naki inde-e li da? Uo maka ongisi inde adulu bhú mbadhasu.

<sup>17</sup> Okoko nga'u mbála na ebi pi obi o, engú bini, obhe u a'u mbála ango-o pi o ayala nadho 'bi!

U ali matá etsi na da kuo pi uo, engú bini, u ayala naku 'gbá!

<sup>18</sup> Yi maka ongisi inde ayala nadho 'bi di ne naku 'gbá bhomu. Padhá de, anga a maka li Djaa ago nani lie-o. Ani ago maka kpála inde bhú dá kuo. Ani zu 'he de, ani ndji di vino de, yi atsia apa me: «A bhú ani ne siti bua !» <sup>19</sup> Ndili gba kpála ago di. Ani ago maka kpála inde bhú dá 'bi. Ani azu 'he, ani andji di vino, do yi de me: «Yi tsia nga kpála inde. Ani bha bini ngabhundja nazu 'he ne nandji vino! A ko olia ondombi na mandjandja, di ne okpála na sisiti!» Engú bini, bhú natsia nganda okulu gba Ebhe-e, a ngasuno pi yi me imbilangu gba ani-e ngbingbili.»

*Okpála na ogudhu gba omaYuda inde ayala nadji bua o (Tsia bhú Luk. 10:13-15.)*

<sup>20</sup> Abhomu-o, Yesu aholo nagama 'ngú ne ndje djila pi okpála na ogudhu inde ani amene nani ongamba 'ngú gba e bhelé bhú e-o. Padhá de, anga okpála ango-o dji nani bua o de. <sup>21</sup> Ani adu apa me: «A ko likabhu pi yi, okpála na gudhu na Koladjina! A ko likabhu pi yi, okpála na gudhu na Betesaida! Padhá de, anga ma amene ongamba 'ngú bhelé bhú ogudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o

† 11:10 11:10 Tsia bhú Mal. 3:1. \* 11:21 11:21 Tile ne Sidona nani ne ogudhu ka omaYuda ade. Tsia bhú Isa. 23, ne bhú Edj. 26-28, di ne bhú Ams. 1:9-19.

bhú ogudhu na Tile ne Sidona-a,\* okpála na ogudhu ango-o de adyi nani gonia, u túko embi bhú 'ndji o didili naali, u tsia dji bua o. <sup>22</sup> A moko. Ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane.

<sup>23</sup> Ne yi di, okpála na gudhu na Kapalanauma, yi abhundja naayi me u a'é'e yi akolo abhúlá-a? A mo-o ade. U aké yi ne kuto, akólo bha bini li bíli gba okpála inde amu. Padhá de, anga ma amene ongamba 'ngú bhelé bhú gudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú gudhu na Sodomu-o, gudhu ango-o de nga bha bhúka, nakolo pi naki. <sup>24</sup> Kaka-a, ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Sodomu mane.»

*Ako djali pi okpála inde ngau lio padhá kala Ebhe*

*(Tsia bhú Luk. 10:21-22.)*

<sup>25</sup> Bhú nedhinga bhomu-o, Yesu atsia apa me: «Ma ngadhøge mu, 'Dyi ma, Ngámá na abhúlá ne Ngámá na doto. Padhá de, anga engú inde mo owo e pi okpála inde ngabhundja me a bhú 'ndji o ne imbilangu-o, mo ombamba tata pi obhende ngau lio me o ne okpála na padhá kala mu! <sup>26</sup> A moko, 'Dyi ma, anga bhú bádha bhú 'bu gba mu-o, mo okúnda bha nani me a adu moko.

<sup>27</sup> Yi mbila ndjindji me 'Dyi ma asuno ndu 'ngú hana muma. Kpála bini mbila Ndili-e de, bha bini 'Dyi Ndili-o. Kpála bini mbila la di 'Dyi Ndili-e de, bha bini Ndili gba ani-o, a la di-e kpála bhende li Ndili-e akúnda nasuno ani pi e ko.

<sup>28</sup> Yi andala ka okpekpeke líli di ne okpekpeke da 'ngú inde u ngabu e pí yi-o. Mbía inde-e, yi go bhaka ma, ma 'e pí yi ma'e, amba ma ha

naguo pi yi. <sup>29</sup> Yi mene olíli gba ma-o, amba yi 'o me ma suno engú pi yi. Padhá de, anga ma suno pi yi ne bhuku bua di ne na'o lima ne kuto. Yi mene mo-o, yi tsia sía naguo pi yi makpe. <sup>30</sup> A moko, da namene ongú inde ma akúnda e di ne olíli gba ma-a kpekpeke ade.»

## 12

*Yesu ne ngámá pí 'ndji ekpí naguo gba omaYuda*

*(Tsia bhú Mlk. 2:23-28; di ne bhú Luk. 6:1-5.)*

<sup>1</sup> Bhú oekpí bhomu-o, Yesu ne omukpata gba e adu akodho 'kpí bhú ngu 'zu inde u a'i e me ngano. A adu ekpí naguo gba omaYuda-o . Omukpata gba ani adu ne gumu. Abhomu-o, u aholo nakodho 'ndji 'ndji, u atsia adu nazuzu. <sup>2</sup> Li omuFalisai au lie mo-o, u atsia apa pi Yesu me: «Ka ni li omukpata gba mu-o ngamene kulu lie bhú 'kpí naguo me líli gba ní-e nde ziba mo-o de-e?» <sup>3</sup> Yesu agie pi uo me: «Yi tanga nga engú inde li Davidi amene nani e di, nedhinga inde li ngaani makpe ne okpála gba e, u adu lie ne gumu-o? <sup>4</sup> Ani ali nani bhú 'ti Ebhe, ngaani ne okpála gba e, u atsia azu mapa inde u aha e pi Ebhe-o. A ayo la nani pi suka uo bini nazuzu de. Engú bini, a ayo bha nani me azu mapa ango-o ne odimandø gba Ebhe

<sup>5</sup> Ne me engú inde bhú líli gba Moidje-e , yi tanga nga di? Líli gba Moidje apa me, li 'kpí naguo gba omaYuda-a, odimandø inde ngamene kulu bhú 'ngbé 'ti Ebhe-e ngagumu bhomu-o líli na ekpí naguo-o. La-a, u 'ó 'ngú pí uo kaka de! <sup>6</sup> Engú bini, ma apa la pi yi me kpála bini bhú ká yi si, ani ane 'ngbé 'ti Ebhe mane. <sup>7</sup> I dú me yi mbíla engú inde li Bhuku gba Ebhe-e apa e uu-o, yi de 'ó engú pí okpála bhomu-o de. Padhá de, anga Bhuku gba Ebhe apa me: «Engú inde a nga li ma

† 12:7 12:7 Tsia bhú Oz. 6:6.

naali-e, a ko nadje ndjinga okpála koko, a ko naha makiso de.†»<sup>8</sup> Yesu atsia abu tata-a me: «Ngama, Ndili gba kpála-a, ma ne ngámá pí 'ndji ekpí naguo.»

<sup>9</sup> Pipita-a, Yesu ayie oo, ani atsia anu ali bhú eti gba uo nadje líli gba Moidje-o. <sup>10</sup> Bhú 'ti oo, kpála bini inde li 'kpa e andia adu oo. Omufalisai adu akunda na'o 'ngú pí Yesu. Kaka-a, u ayi ani me: «Líli gba ní-e aziba me u kobho kpála bhú 'kpí naguo uu?» <sup>11</sup> Yesu agie pí uo me: «A ko da bhú ká yi inde i du ka e ne koli kandøø bini-e, li kandøø angoo ti bhú 'dú li 'kpí naguo, ani nú nagbe ani de-e? <sup>12</sup> La-a, kpála-kuti ane kandøø bhutsibhutsi! Kaka-a, líli aziba namene bádha 'ngú bhú 'kpí naguo.» <sup>13</sup> Abhomu-o, ani atsia apa pí kpála angoo me: «Gbele 'kpa mu.» Kpála angoo agbele 'kpa e, 'kpa ani atsia akolo ndjindji maka 'kpa ani bhe koko-o. <sup>14</sup> Pipita-a, omufalisai aze kilidjo. U apo bhúla o ngú nagili kpadji me o bhøø Yesu.

*Yesu ne kpála inde li Ebhe abhu e ngú kulu gba e-o*

<sup>15</sup> Li Yesu ambila lie me omufalisai ngagili nabhøø ní-e, ani ayie li bili angoo. Bhiti okpála akpata ani, ani atsia akobho ndu obhende adu ne kuo hana. <sup>16</sup> Engú bini, ani agbele 'dje uo kpekpeke me u apá pí kpála bini de me ní ne da-ie de, <sup>17</sup> ngubula me engú inde li polofeta Isaya apa nani e amene lie. Polofeta Isaya apa nani me:

<sup>18</sup> «Ebhe apa me:

<Tsia nga bali gba ma inde ma abhu nani e-o,  
ma kunda ani naali, engú gba ani-e nga li ma naali.

Ma a'ó Bu Bhobua gba ma-a pí ani, ani tsia kpókpo ngbili 'ngú pí ndu opiga hana.

<sup>19</sup> Ani bí bhaiki ne kpála bini de, ani gáma kpéke 'ngú de.

U djé 'li ani li okpadji de.

<sup>20</sup> Ani bú dú mbamba inde agumu-o de,  
ani búlu dhegu eke inde ngatsi-e de.

Ani améne mo-o akólo li 'kpí inde ani a'ó lie me ngbili 'ngú kolo angu e píla doto ko.

<sup>21</sup> Abhomu-o, li ndu opiga hana tsia 'ó nabhuka gba o-o bhú ani.†»

*Omufalisai apa me Yesu ngamene kulu ne angu*

*gba Baladjebula*

*(Tsia bhú Mlk. 3:22-30; di ne bhú Luk. 11:14-23.)*

<sup>22</sup> Abhomu-o, u ago pí Yesu ne kpála bini inde i u 'kpí de, i bhú di 'ngú de, anga adu bhú kpála angoo ne siti bua. Yesu akobho kpála angoo, ani atsia aholo nagama 'ngú di ne nau 'kpí. <sup>23</sup> Bhiti okpála hana angamba, u atsia aholo napa me: «A inde-e Ndili gba Davidi-e di?»

<sup>24</sup> Li omufalisai adje engú bhomu-o lie, u atsia apa me: «Kpála bhomu-o ngapandja osisiti bua padhá ade, Baladjebula, ngámá gba osisiti bua, ngaha angu pí ani ngae!»

<sup>25</sup> Engú bini, Yesu adu ambila mabhundja gba uo hana. Abhomu-o, ani atsia apa pí uo me: «Ndu kuti hana, i du me okpála kpála nde dje lío de-e, kuti angoo pílo me a nde akpødhøø. Okpála na gudhu bini, i du di-e piga bini, i du me u nde dje lío de-e, gudhu angoo, i du di-e piga angoo lú-u de. <sup>26</sup> I du me Satana nde ngabhike Satana-a, amba ani agbogbo bhomu-o bhusu e ngae makpe. I du la mo-o, kuti gba ani-e lú lele pí? <sup>27</sup> I du me ngama-a, ma nde ngapandja osisiti bua ka angu gba Beledjebula-a, omukpata gba yi-e ngapandja naao uo ka angu gba da? Kaka-a, omukpata gba yi-e akódho galikpe 'ngú gba yi-e ngao makpe. <sup>28</sup> Engú bini, i du la me ma nde ngapandja osisiti bua ka angu gba Bua gba Ebhe-e, bhobhomu-o asuno me Nau gba Ebhe-e akolo li yi akolo.

† 12:21 12:18-21 Tsia bhú Isa. 42:1-4.

<sup>29</sup> Kpála bini ti da nali bhú 'ti gba kpéke kpála, aní tsia bhá ohe gba aní-e de. Aní kúnda nali bhú 'ti gba aní ngú nabha ohe gba aní-e hana-a, aní gbíte ngaíza aní kalanu. Pipíta-a, aní tsia lí bhú 'ti gba aní ngú nabha ohe gba aní-o. <sup>30</sup> Kpála bhende ne ma bhú dabilí bini ade-e, a ko bhulú yala gba ma. Kpála bhende ngapo la di bhúla okpála bhú dabilí bini ne ma ade-e, aní ngatsambala uo matsambala.

<sup>31</sup> Kaka-a, ma apa pí yi me, okpála asía mambu lí ndu osisiti 'ngú di ne lí ndu osobho inde lí okpála ngasobho Ebhe ne e hana. Engú la bini, lí kpála sobho Bu Bhobua-a, aní sía mambu de. <sup>32</sup> Í du me kpála nde apa siti 'ngú lí kúte ma, ngama Ndili gba kpála-a, Ebhe mbu lí aní tété. Engú la bini, í du me kpála nde asobho Bu Bhobua-a, Ebhe mbú lí aní tété bhú nedhinga na naki inde-e de, aní mbú di lí aní tété bhú nedhinga inde ngago-o de.»

*U mbimbila ndula lí lí e  
(Tsia bhú Luk. 6:43-45.)*

<sup>33</sup> «Í du me ndula nde ndjindji-e, lílí-e dú bhadi ndjindji. Í du me a nde bhú ndula ne kuo-o, lílí-e dú sisiti. U mbimbila ndula lí lí e.

<sup>34</sup> Ngayi opiga mbama inde-e, yi ti da napa ongu na babadha lele pí, me yi nde ne okpála na sisiti-e? Padhá de, anga ebhe ngapa engú inde abedhe lí bhobua mabedhe ko. <sup>35</sup> Kpála na babadha-a, ka bádha 'ngú inde lí bhobua aní-e, aní apá bhadi bádha 'ngú. Engú bini, kpála na sisiti-e, ka siti 'ngú inde lí bhobua aní-e, aní apá bhadi engú na sisiti.

<sup>36</sup> Kaka-a, ma apa pí yi me, bhú nedhinga nakodho 'ngú gba okpála-a, okpála apá ta oeli na padhá padhá inde lí u apa e hana. <sup>37</sup> Padhá de, anga Ebhe akódho 'ngú gba mu-o lí nakpata 'li mu. Í du me mu nde apa oeli na babadha-a, aní 'ó mangimbo pí mu de, í du me mu nde apa oeli na sisiti-e, aní 'ó mangimbo pí mu.»

*Omusunu na líli gba Moidje ne omufalaisai ayo ngamba 'ngú ka Yesu  
(Tsia bhú Mlk. 8:11-12; di ne bhú Luk. 11:29-32.)*

<sup>38</sup> Abhomu-o, omusunu koko na líli gba Moidje di ne omufalaisai koko apa pí Yesu me: «Musunu, ya akúnda me mene ehe bini pí ya inde asuno me mo oyie bha ndju agba Ebhe.» <sup>39</sup> Do aní pí uo me: «Okpála na naki inde-e sisiti, u bhuka la di Ebhe ne bua o bini de, u ngayo ngamba 'ngú. Engú bini, Ebhe méne ngamba 'ngú pí uo bini de, bha bini bhende aní amene nani e lí polofeta Djonasi ko. <sup>40</sup> Padhá de, anga maka lí Djonasi asi nani lie ekpí bata, di ne sukpe bata bhú 'bu 'ngbé sungu-o, ngama Ndili gba kpála-a, ma así bhadi bhú lata ekpí bata di ne sukpe bata moko. <sup>41</sup> Lí 'kpí lí Ebhe akódho 'ngú gba okpála lie, okpála na Ninive akóto kala Ebhe bhú dabilí bini ne okpála na naki inde, lí okpála na Ninive tsia 'ó 'ngú pí okpála na naki-o. Padhá de, anga u adjí nani bua o lí nedhinga u adje ngali gba Ebhe inde lí Djonasi adu akpokpo e-o. Yi mbila la ndjindji me, kpála bini sí, aní ngbéngbé ane Djonasi mane!

<sup>42</sup> Matá di-e, lí 'kpí lí Ebhe akódho 'ngú gba okpála lie, 'ngbé ngámá na eole inde adu nani atsia 'kpí lí ndu doto na Saba-a, akóto kala Ebhe bhú dabilí bini ne okpála na naki inde. Aní tsia 'ó 'ngú pí uo, anga aní ayie nani tsutsu ngú nanu nadjé eli na imbilangu gba Salomo-o. Yi mbila la ndjindji me, kpála bini sí, aní ngbéngbé ane Salomo mane! Engú bini, ngayi-e, yi dje aní de.»

*Gbitaku pindji nagie matá lie ka siti bua bhú kpála*

*(Tsia bhú Luk. 11:24-26.)*

<sup>43</sup> Abhomu-o, Yesu atsia apa matá gbitaku pí kambí okpála me: «Adu nani bhú kpála bini ne siti bua. Nedhinga lí siti bua akoto lie bhú aní-e, siti bua ango-o anu ne djakadha abhú obili inde lí engu nde



li e ade\* ngú nagili bili naguo ka e tété. Engú bini, ani u de. <sup>44</sup> Ani atsia apa li bua e me: «Ma gie nga lima bhú 'ti gba ma inde ma akoto nako bhú e-o.» Ani akolo oo, ani abhaka me a nde padhá, u nde apo mapo, u nde aleke ndjindji. <sup>45</sup> Abhomu-o, ani anu, ani abha osisiti bua koko mananika inde ane ani ne siti. U agie lio, u ali bhú 'ti-o, u atsia dudu oo. Mukobho gba kpála ango-o atsia akolo la matá pipita-a sisiti naali ane bhende na kalanu-o mane. A adú bhadi pi osisiti okpála na naki inde-e moko.»

*'Hi Yesu ne ondaise Yesu ngao dho?*

*(Tsia bhú Mlk. 3:31; di ne bhú Luk. 8:19-21.)*

<sup>46</sup> Yesu adu ngabha nagama 'ngú pi kambi okpála-o. Me-e, 'hi ani di ne ondaise ani akolo. U alulu akilidjo, u adu agili me o gama 'ngú ne ani. [ <sup>47</sup> † ] <sup>48</sup> Yesu agie pi kpála inde apa 'ngú pi ani-e me: «'Hi ma ngae dho, ondaise ma la di ngao dho?» <sup>49</sup> Pipita-a, ani a'e 'kpa e, ani asuno omukpata gba e-o. Ani atsia apa me: «Yi tsitsia, 'hi ma ne ondaise ma ngao inde. <sup>50</sup> Padhá de, anga kpála inde ngamene engú li 'Dyi ma inde abhúla-a ngakunda e, kpála ango-o, a ko ndai ma na bhobhoko, a ko ndai ma na øleø, a ko la di 'hi ma-a ngae.»

## 13

*Gbitaku gba kpála nalu nguwa*

*(Tsia bhú Mlk. 4:1-9; di ne bhú Luk. 8:4-8.)*

<sup>1</sup> Bha li 'kpí ango-o, Yesu akoto kilidjo. Ani atsia anu adu kuto lingo ekpe. <sup>2</sup> Abhomu-o, bhiti okpála na bhibhiti ago apo bhúla o de ani. Kaka-a, ani anu a'u bhú zabu bini, ani atsia adu bhúbhú ngú nasuno pi

uo. Bhiti okpála bhomu-o atsia alulu naao lingo 'ngu-o.

<sup>3</sup> Ani atsia aholo nakpokpo 'ngú pi uo bhelé bhú ogbitaku. Ani adu apa pi uo me: «Ekpí bini, kpála bini nalu nguwa anu abhiye gba e ngú nabala nguwa. <sup>4</sup> Nedhinga ani adu ababala lie, té nguwa koko abala lingo 'hi kpadji. Odhu ago, u atsia ahopo nguwa ango-o hana má kpekøbhø! <sup>5</sup> Olí nguwa koko abala li bili na teme, inde li doto du li e bhelé de. † nde lie me doto du sasa bhelé de-e, ezø-o akø má gala ka li doto akpa sasa lie-o. <sup>6</sup> Li ela akolo la lie kpekpeke-e, a atsulu ezø-o, ezø atsia a'ulu ka ndibhili sisie-o. <sup>7</sup> Olí nguwa koko abala li bili li lí oulu na eti adu lie. Oeti abhele, a atsia anguvo bhobhomu-o hana. <sup>8</sup> Olí nguwa koko abala bhú doto na dobho, a atsia ali lílí: bhe bini-e ali lílí kámá bini, koko-o ali lílí ndjikpa madhia, koko-o ali lílí ndjikpa bata.» <sup>9</sup> Yesu atsia apa matá me: «Yi dje ndjindji, i du me a nde li yi ne djedje ko!»

*Yesu adu akpo 'ngú pi okpála bhú ogbitaku ka ni?*

*(Tsia bhú Mlk. 4:10-12; di ne bhú Luk. 8:9-10.)*

<sup>10</sup> Abhomu-o, omukpata gba Yesu adyudyo lio de ani, u atsia ayi ani me: «Mu ngakpokpo 'ngú pi okpála bhú ogbitaku ka ni?» <sup>11</sup> Do ani de-e: «Ma ngakpo 'ngú pi uo bhú ogbitaku anga Ebhe ha nambila ngbadhu 'ngú na Nau na abhúla-a pi uo de. Ani aha mangbo pi yi. <sup>12</sup> Padhá de, anga kpála inde ani aha ngbadhu 'ngú ango-o pi e-e, ani a'ó matá koko pi ani pépé. Kpála ango-o tsia dú ne di bhelé. Engú bini, kpála bhende ani ha pi e de-e, ani adhépe belegu dhegu bhende ka ani-o. <sup>13</sup> Ka 'ngú ango-o, ma ngakpo 'ngú pi uo bhú ogbitaku.

\* **12:43** 12:43 Bili li engu nde lie ade-e, a ko bili inde li kpála ti da nasi kuti li e de ka ndibhili engu. La pi omaYuda-a, a ko bili inde li osisiti bua ngadulu li e ko. † **12:47** 12:47 Lukuluku inde-e, a bhú obhuku koko na didili u aye e bhú eli na giliki ade. [Kpála bini apa pi ani me: «Tsia nga 'hi mu ne ondaise mu alulu akilidjo aoo. U ngagili nagama 'ngú ne mu.»]

Padhá de, anga u ngatsia 'kpí, u u la 'kpí de,

u ngagbo 'dje o, u dje la 'kpí de, u kə la di mboli 'ngú bini de.

<sup>14</sup> Abhomu-o, engú inde li polofeta Isaya apa e, a atsia amene lie pi uo, engú inde me:

<Ebhe apa me: Yi adú adje 'kpí, yi ké la mboli engú ango-o de.

Yi adú atsia 'kpí, yi ú la 'kpí de.>

<sup>15</sup> <Padhá de, anga Ebhe apa me: okpála inde-e agbite bua o, ngubula me o ké matá mboli 'ngú de.

U anini djila o,

amba o ou matá 'kpí de,

u anini 'dje o,

amba o odjé matá 'kpí de.

U kunda nani nadji bua o de,

abhomu-o, ma tsia ti nani da nakobho uo de.†>

<sup>16</sup> La pi yi-e, a ko djali pi yi anga djila yi ngau 'kpí, 'dje yi la di ngadje 'kpí. <sup>17</sup> Ma apa pi yi na paká me opolofeta bhelé, di ne okpála na ngbingbili bhelé adu nani ne gumu nau ongu yi ngau e inde, la-a, u tsia u de. U adu nani ne gumu nadje ongu yi ngadje e inde, la-a, u tsia dje de.»

*Yesu ambamba ta gbitaku gba kpála nalu nguwa*

(Tsia bhú Mlk. 4:13-20; di ne bhú Luk. 8:11-15.)

<sup>18</sup> Abhomu-o, Yesu atsia apa matá pi omukpata gba e me: «Ngayi-e, yi dje nga la ta gbitaku gba kpála nalu nguwa-o. <sup>19</sup> Obhende ngadje ngali na Nau gba Ebhe-e, i kə mbolimboli de-e, uo maka ngo 'hi kpadji inde li nguwa ati li e-o. Djabulu ngago, ani tsia dhépe 'li Ebhe inde u asia e li bua o-o. <sup>20</sup> Okpála koko maka bili na teme inde li nguwa ati li e-o. U ngadje eli-o, u tsia sía kolo ne djali. <sup>21</sup> Engú bini, u 'o de me eli-e toto sie e abhú o-o de. U ngaha lio ngánga bha ngubula nedhinga bedi. Abhomu-o, i du me likabhu, i du di-e mbolo nde ago kabula eli gba Ebhe-e, u ngabala 'kpa li nabhuka má gala!

<sup>22</sup> Okpála koko maka bili li lí oulu na eti adu lie-o. U adje eli-o, engú bini, gumu 'he na doto inde bhú dabili bini ne eu li tia na doto inde-e ngapite uo ne e, nganguvo eli gba Ebhe-e bhú uo. Kaka-a, a tsia lí lí belegu de bini. <sup>23</sup> Engú bini, okpála koko maka doto na dobho. U ngadje eli-o, u la di ngake mbolimboli. Kaka-a, kulu gba uo ngazu nguwa. Kulu gba okpála koko ngazu nguwa kámá bini, bhe gba okoko ndjikpa madhia, bhe gba okoko ndjikpa bata.»

*Gbitaku pindji siti ulu*

<sup>24</sup> Yesu atsia apa matá gbitaku koko pi okpála adu adje ani-e me: «Nau na abhúla-a mana lie ne engú inde: bhoko bini alu nani bádha nguwa abhiye gba e. <sup>25</sup> Sukpe bini, nedhinga li ndu okpála hana adu lie tila-a, bhulu yala gba ani-e ago. Ani atsia alu siti ulu bhú ká nguwa-o, ani atsia atapa. <sup>26</sup> Ezu-o akə, abhele, atsia aba lílí. Abhomu-o, siti ulu-o atsia akoto di. <sup>27</sup> Okpála na kulu gba bhulu edyi-e ago ayi ani me: <Ngámá, siti ulu inde-e ayie bhú bádha nguwa mo olu nako e bhú 'dyi gba mu-o su?> <sup>28</sup> Do ani pi uo me: <Bhulu yala amene engú bhomu-o ngae.> Abhomu-o, okpála na kulu-o atsia ayi ani me: <Mo okunda me ya nu luko siti ulu ango-o?> <sup>29</sup> Ani agie pi uo me: <Yi alúko de, anga yi luko-o, yi nú lúko siti ulu bhomu-o ne ezu-o bhú dabili bini. <sup>30</sup> Yi 'o me ndundu bhisi hana bhele bhú dabili bini akólo nedhinga na'e nguwa abhiye-o. Nedhinga na'e nguwa abhiye-e, ma apa pi okpála na'e nguwa-a me u 'e ngaiza siti ulu-o. U gbigbite 'i'i ngubula natsutsulu, amba pipita-a, u 'o nguwa-a bhú ngbokopi gba ma-o.»

*Gbitaku pindji lí mutadi*

(Tsia bhú Mlk. 4:30-32; di ne bhú Luk. 13:18-19.)

<sup>31</sup> Yesu akpokpo matá gbitaku koko pi okpála adu adje ani-e pindji

† 13:15 13:14-15 Tsia bhú Isa. 6:9-10.

lí ndula inde u a'i e me mutadi.\* Aní pi uo me: «Nau na abhúlá-a mana lie ne lí mutadi. Kpála bini aha, aní atsia alu abhiye gba e. <sup>32</sup> A ko lí ndula na yeye ane mane bhú ká olí nguwa hana. Engú la bini, i du me a nde akò-o, i né ndu ezú inde abhú 'dyi-e hana ne endjá, i kólo 'ngbé ndula da napa me odhu na abhúlá go nayiki 'ti o bhú oyáyá-o.»

*Gbitaku pindji levile*

(Tsia bhú Luk. 13:20-21.)

<sup>33</sup> Yesu akpokpo matá gbitaku koko pi okpála adu adje aní-e me: «Nau na abhúlá mana lie ne levile inde li elò aha e, aní atsia akpòdhele ne bhiti fufú. Abhomu-o, fufú-o hana atsia afuka.»

*Yesu adu akpo 'ngú bhú ogbitaku ka ni?*

(Tsia bhú Mlk. 4:33-34.)

<sup>34</sup> Yesu adu akpokpo ndu 'ngú bhomu-o hana pi bhiti okpála bhú ogbitaku. Aní kpo 'ngú pi uo mandí gbitaku belegu de bini. <sup>35</sup> Aní adu amene mo-o ngubula me engú inde nani lí polofeta akpokpo e-e amene lie, engú inde me:

«Ma akpókpo 'ngú bhú ogbitaku.

Ma akpókpo 'ngú inde awo lie nayie maka u abho nani doto lie-o.†»

*Yesu ambamba ta gbitaku pindji siti ulu*

<sup>36</sup> Abhomu-o, Yesu a'o ká bhiti okpála inde aní adu akpo 'ngú pi o-o, aní atsia agie lie li bili aní adu nadu li e-o. Omukpata gba aní-e adyudyo lio de aní. U atsia apa pi aní me: «Kpokpo nga ta gbitaku pindji siti ulu inde abhiye-e pi ya.»

<sup>37</sup> Yesu atsia agie pi uo me: «Kpála bhende i ngalu bádha nguwa-a, a ko ma Ndili gba kpála-o. <sup>38</sup> Edyi-e, a ko doto. Bádha nguwa-a, a ko okpála inde i ngaziba nadu sa líli na Nau na abhúlá-o. Siti ulu-o, a ko okpála bhende ngaziba nadu sa líli gba Djabulu-o. <sup>39</sup> Bhulu yala inde alu

siti ulu-o, a ko Djabulu. Nedhinga na'e nguwa abhiye-e, a ko ekpí na soso-o. Obhulu na'e nguwa abhiye-e, a ko oandjelu. <sup>40</sup> Maka u akukuo siti ulu lie ngú nabubu bhú djua-a, a adú bhadi lí sokpí-e moko. <sup>41</sup> Ndili gba kpála atíma oandjelu gba e, u tsia kúo ndu obhulu nato okpála bhú nale ne ndu obhulu namene siti 'ngú hana-a ngú napandja uo bhú ká omaha e mapandja. <sup>42</sup> Pipita-a, u tsia bála uo bhú dé djua. Oo, u adú aku 'gbá, u tsia dú di nazu tate o. <sup>43</sup> Abhomu-o, okpála bhe na ngbingbili-e adú nasu má ngbi ngbi ngbi maka ela bhú Nau gba 'Dyi o-o. Yi dje ndjindji, i du me a nde lí yi ne djedje-o!»

*Gbitaku pindji tia awo lie di ne pindji léké*

<sup>44</sup> «Nau na abhúlá-a mana lie ne tia inde lí kpála awo e abhú 'dyi. Kpála bini akoto tété, aní atsia awo ne toto. Lí djali abhele la aní lie má kusu-o, aní anu atsindji ndu 'he gba e hana, aní atsia ago akala edyi bhomu-o.

<sup>45</sup> Nau na abhúlá-a mana di matá lie ne kpála natsindji 'he inde ngagili nakala babadha léké. <sup>46</sup> Nedhinga aní au léké bini na kpéke mase lie, aní anu atsindji ndu 'he adu ka e hana. Aní atsia ago akala léké na kpéke mase-o.»

*Gbitaku pindji nado*

<sup>47</sup> «Nau na abhúlá-a mana matá lie ne nado inde u abhike e bhú 'ngu, inde i ngadhe ndu djua osungu hana. <sup>48</sup> Nedhinga abedhe lie, obhulu nagbe sungu-o gbéle lingo 'gò. Pipita-a, u dúlu, u bhá osungu na babadha-a bhú kili, u tsia bála obhende azi-o. <sup>49</sup> A adú bhadi lí sokpí-e moko: oandjelu agó, u tsia gbógbo bhusu okpála na ngbingbili-e ne obhende na sisiti-o. <sup>50</sup> U tsia bála okpála na sisiti-e bhú dé djua. Oo, u adú aku 'gbá, u tsia dú di nazu tate o.»

\* 13:31 13:31 Lí mutadi: A ko mboye lí ndula maka lí kundja. † 13:35 13:35 Tsia bhú Ets. 78:2.

<sup>51</sup> Yesu atsia ayi omukpata gba e me: «Yi ake mboli ndu ongu bhomu-o hana ake?» U agie me: «Hení.»  
<sup>52</sup> Abhomu-o, ani atsia apa pi uo me: «A moko, yi maka ndu omusuno na líli gba Moidje hana inde aziba engu pindji Nau na abhulá-o. Yi maka obhulu 'ti. Yi ngalo bhú ká oehe inde bhú 'ti gba yi-e obhe na mbia, yi tsia ló di obhe na didili.»

*Okpála na Nadjaleta ziba Yesu de (Tsia bhú Mlk. 6:1-6; di ne bhú Luk. 4:16-30.)*

<sup>53</sup> Lí Yesu andjia nakpokpo og-bitaku bhomu-o lie, ani ayie oo.  
<sup>54</sup> Ani atsia anu bhú Nadjaleta, kuti inde ani abhele bhú e-o. Ani aholo nasuno bhú 'ti nadje líli gba Moidje na kuti bhomu. Nasuno gba ani-e atsia adu nangamba okpála naali. Kaka-a, u atsia adu ayi lio me: «Ani asia ngua imbilangu inde-e su? A aha angu pi ani ngu namene ongamba 'ngu inde-e da? <sup>55</sup> A inde-e ndili gba salapaté-e di? A 'li 'hi ani me Malia adi? Djaki, ne Djodjefu, ne Simo la di ne Djude ne ondaise ani ngao adi? <sup>56</sup> Ondaise ani na olisilisi-e, ndu uo hana gba ní sii adi? Ani ayie la ne ndu 'ngu bhomu-o hana su?» <sup>57</sup> Ka u ambila du ani lie ndjindji-e, u tsia kunda nabhuka ani de. Abhomu-o, Yesu atsia apa pi uo me: «U mamanga polofeta ne ndu bili hana, naneke bha bini bhú kuti u azu ani bhú e di ne bhú piga gba ani.» <sup>58</sup> Yesu atsia amene bha mbo oo ongamba 'ngu bedi ka u bhuka ani lie de-o.

## 14

*Elode aha líli me u bhøle Djaa bhulu nabatisa okpála*

*(Tsia bhú Mlk. 6:14-29; di ne bhú Luk. 9:7-9.)*

<sup>1</sup> Lí nedhinga bhomu-o, Elode Atipasi inde adu ngamá na ndu doto na Galilaya adje engu gba Yesu-o.  
<sup>2</sup> Ani atsia apa pi omaha e me: «Kpála u ngakpo 'ngu gba e bhomu-o, a ko Djaa bhulu nabatisa okpála!

Ani azuku bhú ká okpála amu-o bhomu ngae. Kaka-a, angu namene ongamba 'ngu bhú ani.» <sup>3</sup> Elode pa mo-o padhá de. Ani apa mo-o, anga ani aha nani líli me u holo Djaa, u gbigbite ani, amba u bhike ani bhú tikpu lí 'ngu gba Elodiade, wala Filipino, ndai ani-o. <sup>4</sup> Ani aholo nani Djaa, anga Djaa adu apa pi ani me: «A ayo de me mu ha Elodiade maka wala mu-o de.» <sup>5</sup> Elode adu akunda nabhøle Djaa na paká. Engu bini, ani adu akpe okpála makpe. Padhá de, anga u adu au Djaa maka polofeta .

<sup>6</sup> La-a, lí ekpi nakina nazu Elode-e, ndili na øle gba Elodiade adho 'bi kala okpála u a'i o bhú 'bi-o. Ebi ango-oatsia anga lí Elode naali.  
<sup>7</sup> Kaka-a, ani atsia atu silika me ní ahá pi ndili na øle bhomu-o ndu 'he hana inde ani ayó e-o. <sup>8</sup> 'Hi ani atsia ato pi ani me ani yo 'ndji Djaa bhulu nabatisa okpála. Abhomu-o, ndili-e atsia anu apa pi ngamá Elode me: «Ha 'ndji Djaa, Bhulu nabatisa okpála muma mbia inde-e bhú tsakpa saani!» <sup>9</sup> Ngamá adje likabhu lí bua e naali. La ka silika ani atu e di ne nakpe djila okpála ani a'i o bhú 'bi-e, ani atsia aha líli me u ha 'ndji Djaa pi ani haha.  
<sup>10</sup> Abhomu-o, ani atsia atima kpála bini me ani nu kodho ngulu Djaa bhú tikpu. <sup>11</sup> Kpála ango-o, anu. Ani akodho ngulu Djaa, ani atsia ago ne di bhú tsakpa saani. Ani atsia aha pi ndili na øle bhomu-o. Abhomu-o, ndili na øle ango-o atsia anu ne di pi 'hi e. <sup>12</sup> Omukpata gba Djaa anu aha kuo ani, u anu azi. U atsia anu akpokpo engu akodho 'kpi bhomu-o pi Yesu.

*Yesu aha 'zu pi okpála kutu bhuluvue*

*(Tsia bhú Mlk. 6:30-44; ne bhú Luk. 9:10-17; di ne bhú Dja. 6:1-14.)*

<sup>13</sup> Lí Yesu adje engu lí omukpata gba Djaa akpokpo e pi ani-e lie, ani agbe lie lí bili bhomu. Ani a'u ne omukpata gba e bhú zabu, u atsia

anụ adulu kpi o kpi li bili li kpála nde li e ade. Li okpála ambila lie, u aloko ne ogudhu ngangá, u aha 'nú ne 'dhu o lingo 'ngu-o ngú nanụ nakpata ani. <sup>14</sup> Li Yesu akẹ lie bhú zabu-o, ani au bhiti okpála-o. Ani adje ndjinga uo, ani atsia akobho okpála na kuo inde adu bhú ká uo-o.

<sup>15</sup> A akolo lie tagolo-o, omukpata adyudyo lio de ani. U atsia apa pi ani me: «Ngámá, ekpí-e asegele, bili inde-e la di mimili, gie bhiti okpála inde-e, amba u nụ kala ehe nazụ mazụ pi o bhú okuti.» <sup>16</sup> Engú bini, Yesu agie pi uo me: «Tata li nagie lie ka uo ade. Yi ha ezụ pi uo ngayi makpe.» <sup>17</sup> Abhomu-o, omukpata apa pi ani me: «A bha ka ya si ne koli mapa bhuluvue ne osungu bhisi má kpikili!» <sup>18</sup> Yesu agie pi uo me: «Yi go muma ne di ei.» <sup>19</sup> Pipita-a, ani aha líli pi bhiti okpála bhomu-o me u dalu kuto pí ulu-o. Ani atsia aha mapa bhuluvue ne osungu bhisi-o. Ani a'e djila e ne abhúlá, ani agie heni pi Ebhe. Pipita-a, ani agugumu mapa-o, ani aha pi omukpata, omukpata-a atsia agapa li bhiti okpála me u zuzu. <sup>20</sup> U azu ndu o hana, u atsia a'u'u. U alo dudu bhe atigala-o, a atsia abebedhe okili ndjikpa ne ká bhisi. <sup>21</sup> Okpála hana inde azu-o, u adu masikpe de okpála kutu bhuluvue mandi natanga olisi ne ongisi.

*Yesu adholo pí 'ngu  
(Tsia bhú Mlk. 6:45-52; di ne bhú  
Dja. 6:15-21.)*

<sup>22</sup> Pipita kolo me-e, Yesu akata omukpata gba e me u 'u'u bhú zabu, amba u gulu 'ngu pi ni kalanu bhú nedhinga ni nde nga lie ngaha kpadji pi bhiti okpála-o. <sup>23</sup> Pita ani aha kpadji pi bhiti okpála lie, ani a'u apí 'ta ngú nayo Ebhe. Ekpí abi li ani kpi e kpi me ani nde nga bha oo. <sup>24</sup> Li zabu li omukpata-a adu bhú e akolo lie mbo ne atu 'ngu-o, anvi aholo nape pí 'ngu-o, atsia adu nandi uo ne sídi. Zabu-o atsia adu adimba ka ngbo 'ngu-o.

<sup>25</sup> Bhú 'gbá 'ngu na bini-e, Yesu aholo nago ne li pápá ne apí uo me ani nde ngadholo pí 'ngu. <sup>26</sup> Li omukpata au ani lie ngadhuku pí 'ngu-o, tsulu aholo uo naali. U adu apa me: «A ko igbadyibhe!» U atsia aholo atu 'ue ka tsulu-o. <sup>27</sup> Engú bini, Yesu atsia apa kolo pi uo me: «A ko ma, yi adjé tsulu de. Yi gbite bua yi.»

<sup>28</sup> Abhomu-o, Piele atsia apa pi ani me: «Ngámá, i du me a nde mu na paká-a, ha líli me ma go bhaka mu me ma nde ngadhuku pí 'ngu.» <sup>29</sup> Do Yesu de-e: «Gogo.» Abhomu-o, Piele akẹ bhú zabu-o, ani aholo 'nú nabhaka Yesu me ani nde ngadholo pí 'ngu. <sup>30</sup> Engú bini, ani au lie me anvi-e ngape kpekpeke-e, ani adje tsulu. Abhomu-o, ani aholo nalinda bhú 'ngu. Ani atsia asula me: «Ngámá, kobho ma!» <sup>31</sup> Ma 'li ma me-e, Yesu ato 'kpa e, ani atsia aholo ani ne napa pi ani me: «Ngamu, kpála li nabhuka gba e nde yeye, mo osia bua na bhisi bhisi ka ni?» <sup>32</sup> Pipita-a, u a'u'u ndu o bhisi hana bhú zabu-o. Anvi atsia aguo. <sup>33</sup> Abhomu-o, omukpata bhe adu igini bhú zabu-o akikita lipuku o kuto kala Yesu. U atsia apa pi ani me: «A na paká me mu ne Ndili gba Ebhe!»

*Yesu akobho okpála na kuo bhú  
ndu doto na Genedjaleta  
(Tsia bhú Mlk. 6:53-56.)*

<sup>34</sup> Pita li Yesu ne omukpata gba e agulu 'ngu-o lie, u akolo bhú ndu doto na Genedjaleta. <sup>35</sup> Okpála na kuti ango-o ambila lie me a ko Yesu-o, u agapa ngali nago ka ani-e bhú ndu doto ango-o libhomu. Okpála atsia ago pi ani ne ndu obhulu kuo hana. <sup>36</sup> U atsia adu akikiliki lio pi ani me ani 'o o me o bu nga bha mbo 'kpa o li 'so bongo gba ani-o. Abhomu-o, ndu obhende hana adu abu 'kpa o tété-e adu akobho.

## 15

*Kpekebhe pindji dasundu gba omuFalisai*

*(Tsia bhú Mlk. 7:1-13, 14-23.)*

1 Abhomu-o, omuFalisai di ne omusuno na líli gba Moidje inde ayie bhú Yelusalema anu abhaka Yesu. U atsia ayi ani me: 2 «Omukpata gba mu-o ngagumu líli li onguo ogbi ya a'o nani e ka ni? Padhá de, anga u ngavulu 'kpa o kala nazu 'he maka lele li líli-e apa lie ade.» 3 Ani atsia agie pi uo me: «Ala yi-e, yi ngagumu líli gba Ebhe-e ne 'li dasundu gba yi-e ka ni? 4 Padhá de, anga Ebhe apa me: <Manga 'dyi mu ne 'hi mu mamanga.> Ani apa di matá me: <Kpála inde agbó nganda 'dyi e, i du di-e 'hi e, a ayo me u bhele ani mabhelo.>† 5 Engú bini ngayi-e, yi ngapa me: <† du me kpála bini nde apa pi okpála inde azu ani-e me, tia inde a ayo igini me ni teteke uo ne e, ni a'o pi Ebhe-e, 6 kpála ango-o matá ne engú namene mamene pi uo ade.> Yi ngagumu líli gba Ebhe-e li ongua okpadji bhomu ngu nakpata lele odasundu gba yi-o. 7 Yi ne obhulu kali! Polofeta Isaya pa nani li 'ngú gba yi-e tala me Ebhe apa me:

8 <Opiga inde-e ngadhogo bha ma ne 'bhe-o,  
engú bini, bua uo de ma tsutsu.

9 Mayo u ngayo ma lie, tata tété ade.  
Padhá de, anga nasuno inde u ngasuno e,  
a ko bha ndu olili li okpála ngagbe e ngao.†>»

10 Pipita-a, Yesu a'i bhiti okpála inde adu oo me u dyudyo lio de ni masikpe, ani atsia apa pi uo me: «Yi djedje nga, amba yi ke di mboli engú inde ma adjí apa e inde: 11 A ko de me oehe inde ngali bhú 'bhe kpála ngamene ngae me ani adú bubu kala Ebhe de-e de. Oehe bhe ngakoto bhú 'bhe kpála mangbo ngamene ngae me ani adú bubu kala Ebhe de.»

12 Abhomu-o, omukpata-a adyudyo lio de ani, u atsia apa pi ani me: «Musuno, mu mbila uu me engú mo opa e ake li bua omuFalisai make-e?» 13 Ani agie pi uo me: «Ndu 'he hana inde li 'Dyi ma inde abhúla-a lu e ngae de-e, u alúko maluko. 14 Yi 'o uo: a ko okpála i u 'kpí de inde aholo 'kpa obi o ngu nasuno kpadji pi uo. La-a, i du me kpála i u 'kpí de e nde aholo 'kpa kilí e ngu nasuno kpadji pi ani-e, ndu uo bhisi hana bála bhú 'dú!»

15 Piele atsia apa pi ani me: «Kpokpo nga ta gbitaku bhomu-o pi ya.» 16 Do Yesu de-e: «Ngayi di-e, imbilangu nga bhú yi adi? 17 Yi mbila de me ndu 'he hana inde ngali bhú 'bhe kpála ngakodho 'kpí abhú 'bu, u tsia bhíke bhú pedu-o di? 18 Engú bini, ndu 'he hana inde ngakoto bhú 'bhe kpála ngayie li bua ani. A la bhomu-o bhende i ngamene me ani adú bubu kala Ebhe de-o. 19 Padhá de, anga bua kpála ngamene ngae me ani du ne mabundja na sisiti, ani bhele kpála bhú gandji, ani kunda ole, i du di-e bhoko koko, ani kunda olisi, i du di-e obhosi ngangá, ani zi 'he, ani pa 'ngú li obi e ne eu, ani sobho la di kpála. 20 A bhomu-o ndu ongú inde ngamene me kpála adú bubu kala Ebhe de-o. A ko de me nazu 'he mandi navulu 'kpa o ngamene me kpála adú bubu kala Ebhe de-e de.»

*Yesu akobho ndili na oele gba igba Kanana*

*(Tsia bhú Mlk. 7:24-30.)*

21 Pipita-a, Yesu ne omukpata gba e ayie li bili bhomu, u atsia anu li pápá na ndu doto li ogudhu na Tile ne Sidona adu bhú e-o. 22 Ole bini du nani nandu bhú ndu doto ango-o. A adu nani igba maYuda de, a ko nani naae igba Kanana. Me-e, ani ago abhaka Yesu ne nasusula me: «Ngámá, ndili gba Davidi, dje nga bha-a mbo ndjinga ma! Siti bua

† 15:4 15:4 Tsia bhú Det. 5:16; ne bhú Eki. 20:12, 21:17; di ne bhú Lev. 20:9. † 15:9 15:8-9 Tsia bhú Isa. 29:13.

ngato mbolo li ndili na øøle gba ma-naali.» <sup>23</sup> Engú bini, Yesu gie engú pi ani belegu de bini. Omukpata gba ani adyudyo lio de ani, u atsia apa pi ani me: «Musunu, mu ti da namene engú ani ngayo e ka mu-o pi ani di, amba ani 'o nakpata ní ne tolo gba e bhomu-o?»

<sup>24</sup> Yesu agie pi uo me: «Ebhe atima bha ma ngú nagili okpála na Isalaele inde maka okandøle inde angita-o.» <sup>25</sup> Engú bini, øle angoo ago atutu lipuku e kuto kala ani ne napa me: «Ngámá, go teteke nga bha mbo ma!» <sup>26</sup> Yesu agie pi ani bhú gbitaku me: «A ndjindji ade me u ha ezú gba ongisi-e, u bhike pi obulu-o de.» <sup>27</sup> Øle angoo agie me: «A ko paká Ngámá, la-a, obulu ngazu okulu 'zu inde ngabala sa misa gba omakulasi o-o.» <sup>28</sup> Abhomu-o, Yesu agie pi ani me: «'Hi ma-a, nabhuka gba mu-o ngebéngbé! A ayo me Ebhe ha ehe inde mo okunda e pi mu.» Abhomu-o, ndili gba ani-e atsia akobho bha li nedhinga bhomu.

*Yesu aha 'zu pi obhosi kutu badha (Tsia bhú Mlk. 8:1-10.)*

<sup>29</sup> Abhomu-o, Yesu ayie oo, ani atapa lingo ekpe na Galilaya. Ani a'u apí 'ta, ani atsia adu kuto. <sup>30</sup> Okpála bhelé ago abhaka ani. U ago ne okpála adu ne eze li 'dhu o, ne okpála li djila o adudu, ne okpála li yá o apu, ne obhe i bhú 'ngú de, la di ne okpála koko bhelé inde adu li o ne kuo. U abu uo bhú li 'dhu Yesu, ani atsia akobho uo. <sup>31</sup> Okpála atsia adu angamba naali nedhinga u adu au okpála i bhú 'ngú de-e lie ngagama 'ngú-o, obhe li yá o apu adu lie akólo ne angu-o, nedhinga di li obhe adu ne eze li 'dhu o adu adholo lie ndjindji-o, ne nedhinga li obhe i u 'kpi de-e adu lie au 'kpi-o. U atsia aholo nadhøø Ebhe gba omafsalaele-o.

<sup>32</sup> Abhomu-o, Yesu a'i omukpata gba e-o. Ani atsia apa pi uo me: «Ma ngadje ndjinga bhiti okpála inde,

anga akolo mbia inde-e 'kpi bata u bha ngadu de ma si, ehe nazu mazú la matá di ka uo ade. Ma kunda nagie uo gumu de, anga angu uo ti da nandjia li kpadji.» <sup>33</sup> Omukpata atsia ayi ani me: «Ní ti da nasia mapa na tetele bhú mili bili inde-esu, inde i ti da nale ne bhiti okpála inde-e?» <sup>34</sup> Yesu atsia ayi uo me: «A ka yi ne mapa madho?» U agie pi ani me: «A ka ya ne mapa mananika ne mbo odjedje sungu.» <sup>35</sup> Abhomu-o, Yesu apa pi bhiti okpála me, u dudu kuto. <sup>36</sup> Ani atsia aha mapa mananika ne osungu-o. Pita nagie heni pi Ebhe-e, ani agugumu, ani aha pi omukpata-o, u atsia agapa li bhiti okpála me u zuzu. <sup>37</sup> U azu ndu o hana, u atsia a'u'u. Omukpata apo bhúla dudu-o, atsia abebedhe okili mananika. <sup>38</sup> Okpála hana inde azu-o, adu obhosi kutu badha mandí nako olisi ne ongisi. <sup>39</sup> Pita li Yesu aha kpadji pi bhiti okpála lie, ani a'u bhú zabu, ani atsia atapa bhú ndu doto li gudhu na Magadana adu bhú e-o.

## 16

*Omufalilai ne osadukai ayo ngamba 'ngú ka Yesu*

*(Tsia bhú Mlk. 8:11-13; di ne bhú Luk. 12:54-56.)*

<sup>1</sup> Abhomu-o, omufalilai ne osadukai ago abhaka Yesu. U adu akunda nale ani. Kaka-a, u atsia ayo ka ani me ani mene nga bha ngamba 'ngú bini pi o inde asúno me Ebhe atima ani ngae. <sup>2</sup> Ani agie pi uo me: «I kolo tagolo-o, yi pá me: <Ekpi-e adu babadha, anga bhúla 'kpi-e akodho má ngbí, oikupala aze la di bhelé.> <sup>3</sup> I du di-e kòkpi-e, yi pá me: <Naki-e, ekpi-e adu sisiti, anga bhúla 'kpi-e mbembe, a la di ne biti.> Yi mbila hana me bhúla 'kpi-e du me-e, a akunda napa pi-ie. La-a, ongu inde ngakodho 'kpi bhú onedhinga inde-e, yi mbila de me akunda napa pi-ie de! <sup>4</sup> Okpála na naki inde-e sisiti, u bhuka la di Ebhe ne bua o bini de!

U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende ani amene nani e li polofeta Djonasi ko.» Pipita-a, Yesu a'o ka uo oo, ani atsia atapa.

*Yesu agbele 'dje omukpata gba e li 'ngú gba omuFalisai ne oSadukai (Tsia bhú Mlk. 8:14-21.)*

<sup>5</sup> Li Yesu ne omukpata gba e agulu ekpø na Galilaya lie, omukpata-a a'ili 'to o li naha mapa. <sup>6</sup> Yesu atsia apa pi uo me: «'E-e! Yi lila liyi ka levile gba omuFalisai ne oSadukai-e malila!» <sup>7</sup> Abhomu-o, omukpata aholo napa sunda o me: «Ani ngapa mo-o, anga ní go ne mapa de.» <sup>8</sup> Engú bini, Yesu ambila engú angoo, ani atsia apa pi uo me: «Nabhuka gba yi-e yeye. Ka ni yi ngapa lie sunda yi me, yi go ne mapa di-e? <sup>9</sup> Yi kə nga mboli engú bini di? Yi a'ili 'to yi li mapa bhuluvue inde ma agapa nako e li okpála kutu bhuluvue a'ili? Yi atsia a'ili la di 'to yi me o obebedhe nako okíli madhoie ne dudu-o?

<sup>10</sup> La di-e, yi a'ili 'to yi li mapa mananika inde ma agapa nako e li okpála kutu badha a'ili? Yi atsia a'ili la di 'to yi me o obebedhe nako okíli madhoie ne dudu-o? <sup>11</sup> Ma apa igini lie pi yi me yi lila liyi ka levile gba omuFalisai ne oSadukai malila-a, ma pa igini bhomu-o engú na mapa de. Yi kə mbolimboli de ka ni?» <sup>12</sup> Abhomu-o, omukpata-a atsia akə la mboli 'ngú angoo me ani pa engú nalila lie ka levile na mapa de, engú bini, a ko nalila lie ka nasuno gba omuFalisai di ne oSadukai ko.

*Piele apa me Yesu ne da-ie (Tsia bhú Mlk. 8:27-30; di ne bhú Luk. 9:18-21.)*

<sup>13</sup> Li Yesu ne omukpata gba e akolo lie bhú ndu doto li gudhu na Sedjale gba Filipino adu bhú e-e, ani ayi uo me: «Okpála ngapa me ngama Ndili gba kpála-a, ma ne da?» <sup>14</sup> U agie

pi ani me: «Pi okpála koko-o, mu ne Djaa bhulu nabatisa okpála. Pi okoko-o, mu ne Eliya. Pi okoko matá-a, mu ne Djelemi, i du di-e saka opolofeta koko.» <sup>15</sup> Ani apa pi uo me: «A la yi-e, yi ngapa naayi me ma ne da?» <sup>16</sup> Simo Piele atsia agie pi ani me: «Mu ne Masiya, Ndili gba Ebhe inde uu-o.»

<sup>17</sup> Abhomu-o, Yesu atsia apa pi ani me: «A ko djali pi mu, Simo, ndili gba Djaa, anga ambamba ta engú na kukulu inde-e pi mu ne kpála de, engú bini, ambamba tata pi mu ne 'Dyi ma inde abhúla ko. <sup>18</sup> Kaka-a, ma apa pi mu me a 'li mu me Piele, mu maka teme. Piga gba ma-a alú pí teme angoo.\* Angu kuo kólo tété de. <sup>19</sup> Ma ahá olifungula na Nau na abhúla-a pi mu. Ne angu inde ma aha e pi mu bhomu-o, ndu 'he hana inde mo ogbite e píla doto-o, agbite bhadi lie abhúla moko. Ndu 'he hana inde mo obhulu e píla doto-o, abhulu bhadi lie abhúla moko.» <sup>20</sup> Abhomu-o, Yesu atsia aha líli pi omukpata-a me u apa belegu pi kpála bini de me ni ne Masiya-a de.

*Yesu akpo 'ngú pindji nakpi ne nazuku ka e (Tsia bhú Mlk. 8:31, 9:1; di ne bhú Luk. 9:22-27.)*

<sup>21</sup> Nayie bhú nedhinga bhomu-o, Yesu aholo nasuno pi omukpata gba e mbámá me: «A ayo me ma nu bhú Yelusalema. Oo, ma djé likabhu naali sakpa obhelesi okpála, sakpa ongbengbe odimandø gba Ebhe, di ne sakpa omusuno na líli gba Moidje-o. U abhéle ma. La-a, bhú 'kpí na bata-a, ma tsia zuku.»

<sup>22</sup> Abhomu-o, Piele agbele ani ne li ngongo, ani aholo naboyo ani ne napa pi ani me: «Ngámá, a ayo me Ebhe lila mu! A mo-o ade, engú bhomu-o kólo li mu de!» <sup>23</sup> Engú bini, Yesu adjí lie, ani atsia apa pi

\* **16:18** 16:18 Piga gba ma-a alú pí teme bhomu: A akunda napa me Piga gba Ebhe-e alu pí 'li Piele inde ani apa e me Yesu ne Masiya, Ndili gba Ebhe inde uu-o. Tsia bhú Mat. 16:16, di ne bhú Efe. 2:20.



Piele me: «Yie oo ko, Satana ! Mũ ne ndjukudu li kpadji gba ma-o. Padhá de, anga omabhundja gba mũ-o, a ko bhende gba Ebhe-e de, engú bini, a ko bhende gba okpála.»

*A ayo namene ni ngú nakpata Yesu-o?*

<sup>24</sup> Abhomũ-o, Yesu atsia apa pi omũkpata gba e me: «I dũ me kpála bini nde akũnda bha nakpata ma na paká-a, a ayo me ani 'o nabhundja 'ngú gba e makpe. A ayo me ani bi kulusi gba† e-o, amba ani kpata ma. <sup>25</sup> Padhá de, anga i dũ me kpála nde akũnda nalila mukobho gba e, ani kpi. I dũ la me kpála nde atse 'kpa li mukobho gba e ngubula ma, ani sía mukobho na kukulũ. <sup>26</sup> La di-e, i dũ me kpála nde asia ndũ 'he hana na doto, engú la bini, ngaani makpe ani kpi-e, ani asía bhúbhú mangua 'he dho? Kpála ti da nakala mukobho gba e ka Ebhe ne mangua 'he dho? <sup>27</sup> Padhá de, anga Ndili gba kpála agó ne oandjelu gba e bhú sangu gba 'Dyi e-o. Abhomũ-o, kpála ne kpála tsia sía mbini kulu gba e sakpa ani nakpata lele kulu inde ani amene e-o. <sup>28</sup> Ma apa pi yi na paká me, okpála koko bhú ká obhende inde si-e, mú padhá de, u aú ngaiza nago gba Ndili gba kpála maka 'ngbé ngámá kalanũ.»

## 17

*Zi Ebhe asa Yesu ngbalina*

*(Tsia bhú Mlk. 9:2-13; di ne bhú Luk. 9:28-36.)*

<sup>1</sup> Pita ekpí madhia, Yesu aha Piele, ne Djaki ne ndai e Djaa . Ani anũ ne uo titi o apí 'ndjá 'ta. <sup>2</sup> Bha si me-e, ani adji lie kala uo kpi. Bhúla ani aholo nasũ má ngbi ngbi ngbi maka zi 'ndji 'la! Obongo li kute ani-e, akolo bububu maka zi 'kpí. <sup>3</sup> Kolo me-e, Moidje ne Eliya aze li uo, u atsia aholo agama 'ngú ne ani. <sup>4</sup> Abhomũ-o, Piele atsia apa pi Yesu me: «Ngámá, a ndjindji me ní dulũ

si. I dũ me mũ nde akũnda-a, ma yíki 'ti ngbangbali bata: bini pi mũ, bini pi Moidje, bini pi Eliya.»

<sup>5</sup> Nedhinga ani adũ nga bha lie nagama 'ngú-o, ndindi inde adũ li e ne zizi-e ago abuku uo hana. Me-e, eli akoto bhú ndindi ango-o atsia apa pi uo me: «Kpála inde-e ne Ndili gba ma na mukũnda. Engú gba ani-e nga li ma naali. Yi dje ani!» <sup>6</sup> Li omũkpata adje lie mo-o, u adje tsulũ naali. Kaka-a, u atuko kuto, u atsia atutũ bhúla o bhú doto. <sup>7</sup> Abhomũ-o Yesu adyudyo lie de uo, ani a'o 'kpa e li kute uo, ani atsia apa me: «Yi yie bhúlá! Yi adjé tsulũ de!» <sup>8</sup> Na'e djila o ka uo me-e, u u kpála bini de, u au bha Yesu kpi e kpi. <sup>9</sup> Nedhinga u adũ nakø eta-a lie, Yesu atsia aha líli inde-e pi uo me: «Yi apá engú inde yi au e pi kpála bini de, nakolo bha li nedhinga li ngama Ndili gba kpála ma azúku lie ko.»

<sup>10</sup> Abhomũ-o, omũkpata ayi ani me: «Ka ni li omũsuno na líli gba Moidje ngapa lie me, a ayo me Eliya go ngaiza kala me Masiya go-o?»

<sup>11</sup> Ani agie me: «A moko, Eliya agó mago, ani tsia léke ndũ 'ngú hana ndjindji. <sup>12</sup> Engú la bini, ma apa pi yi me Eliya ago nani ago. Okpála mbila ani de, engú bini, u amene ndũ 'ngú hana li kute ani maka u akũnda lie. A ayo me ngama Ndili gba kpála ma dje bhadi likabhu ka uo moko.» <sup>13</sup> A la bhomũ-o, nambila ka omũkpata-a me ani adũ akpo 'ngú pi o pindji Djaa bhulũ nabatisa okpála.

*Yesu akobho ndili bini na bhobhoko li siti bua adũ nadũ bhú e*

*(Tsia bhú Mlk. 9:14-29; di ne bhú Luk. 9:37-43a.)*

<sup>14</sup> Yesu ne omũkpata gba e bata ake eta-o. U akolo lie de kambí okpála-a, kpála bini adyudyo lie de Yesu. Ani atutũ lipũkũ e kuto kala ani, <sup>15</sup> ani atsia apa pi ani me: «Ngámá, dje nga mbo ndjinga ndili gba ma na bhobhoko-o. A li ani ne kuo na gbulũ magbulũ. A ngagbo 'i

† 16:24 16:24 Nabi kulusi gba e: A ko naziba nazũ likabhu di ne nakpi kabula Yesu.

ani bhú djua, i dɔ di-e bhú 'ngu piko. Ani ngadje likabhu naali. <sup>16</sup> Ma anu ne ani pi omukpata gba mu-o, la-a, u ti da nakobho ani de.» <sup>17</sup> Do Yesu de-e: «Ngayi-e, nabhuka gba yi-e su? Yi ne okpála na sisiti. Ma adú bhú dabili bini ne yi akólo bhú mangua nedhinga dho? Ma akíbila yi akólo bhú mangua nedhinga dho? Yi go ne ani muma ei.» <sup>18</sup> U ago pi ani ne ndili-o. Yesu ambe bhú 'ndji siti bua-o, siti bua ango-o atsia akoto bhú ndili-o. Nayie bha li nedhinga bhomu-o, ndili ango-o atsia akobho.

<sup>19</sup> Abhomu-o, omukpata-a adyudyo lio de Yesu, u atsia ayi ani me u nde ne uo kpi o kpi me: «Musunu, ka ni ngaya makpe ya ti igini da nagbe siti bua bhomu-o lie di-e?» <sup>20</sup> Yesu agie pi uo me: «A ko anga nabhuka gba yi-e mbomboye. Padhá de, anga ma apa pi yi na paká me, i dú me li nabhuka gba yi-e dú nga bha bhú 'ngbé lie maka lí kundju-o, yi de pá pi eta inde-e me: <Yie si, nu aoo>, i tsia nú oo. Kpéke da 'ngú de dú pi yi de. [ <sup>21</sup> La di-e, ngua siti bua bhomu-o tí da nakoto bha ka mayo bhú dabili bini ne natse 'za ngú nayo Ebhe. »]

*Yesu akpo 'ngú pindji nakpi ne nazuku ka e bhutsibhutsi na bhisi*  
(Tsia bhú Mlk. 9:30-32; di ne bhú Luk. 9:43b-45.)

<sup>22</sup> Ekpí bini, Yesu ne omukpata gba e anu apo bhúla o ndu o hana abhú ndu doto na Galilaya. Ani atsia apa pi uo me: «A ayo me u pu ma Ndili gba kpála pi okpála na doto, <sup>23</sup> amba u bhøle ma, engú bini, bhú ekpí na bata-a, ma tsia zúku.» Abhomu-o, bua omukpata atsia asia likabhu naali.

*Yesu akala mandjandja na 'ngbé 'ti Ebhe gba omaYuda-o*

<sup>24</sup> Yesu ne omukpata gba e akolo bhú Kapalanauma. Li u akolo lie oo-o, okpála atsitsindji mandjandja na 'ngbé 'ti Ebhe gba omaYuda-a adyudyo lio de Piele, u atsia ayi ani me: «Musunu gba yi-e kakala naae

mandjandja na 'ngbé 'ti Ebhe-e di?» <sup>25</sup> Piele agie me: «A mo ade, ani kala makala.» Li Piele ali la lie abhú 'ti-e, Yesu akpo nagama 'ngú ngae. Ani ayi Piele me: «Simo, mo obhundja pi? A kakala mandjandja, i dɔ di-e otakisi gba ongbengbe ongámási na doto da, ne me a ko ongisi gba uo, ne me a ko okpála koko?» <sup>26</sup> Piele agie me: «A kakala ne okpála koko.» Abhomu-o, Yesu atsia apa pi ani me: «I dɔ mo-o, ongisi gba ongámási kála naao de, anga uo bhú ngu o. <sup>27</sup> La-a, ngú napa me bua okpála inde-e asíti de-e, nu abhú ekpe. Bhike engbe bhú 'ngu. Sungu na kalanu inde mo ogbé e, bhulu 'bhe ani. Mo obháka oo lí falanga bini. Haha, amba mu ha pi uo, ngubula ní ne mu.»

## 18

*A ngbéngbé bhú Nau na abhúla-a da?*

(Tsia bhú Mlk. 9:33-37; di ne bhú Luk. 9:46-48.)

<sup>1</sup> Bhú nedhinga bhomu-o, omukpata adyudyo lio de Yesu, u atsia ayi ani me: «A nga ngbéngbé bhú Nau na abhúla-a da?» <sup>2</sup> Yesu a'i mboye ndili bini, ani a'o ani tu uo, <sup>3</sup> ani atsia apa me: «Ma apa pi yi na paká me, i dɔ me yi nde li bua yi de, yi ké liyi ne kuto ngú nakolo maka ongisi na djedjedje de-e, yi lí belegu bhú Nau na abhúla-a de. <sup>4</sup> Padhá de, anga gagala 'ngú bhú ndili ade. Kaka-a, kpála bhende i ngakø lie ne kuto maka mboye ndili inde-e, kpála ango-o ngbéngbé bhú Nau na abhúla-a ngae.»

*Yi ató okpála koko bhú siti 'ngú de*

(Tsia bhú Mlk. 9:42-48; di ne bhú Luk. 17:1-2.)

<sup>5</sup> Yesu atsia apa matá pi omukpata gba e me: «Kpála bhende asia nga bha belegu kpála bhende ngakø lie ne kuto maka mboye ndili inde-e ka 'li ma-a, kpála ango-o ngasia bhomu-o ma makpe. <sup>6</sup> Engú bini, li kpála bini to saka ongisi bini inde abhuka

ma-a bhú siti 'ngú-o, a ndjindji pi ani me u gbite ngingi tangulu ani, amba u bhike ani bhú 'ngbé 'ngu. <sup>7</sup> A ko likabhu pi okpála na doto, anga a ne ongú bhelé inde ngato uo bhú siti 'ngú! A moko, engú na sisiti néke galikpe 'kpí bini de, engú la bini, a ko likabhu pi kpála inde i ngayie ka e ko!

<sup>8</sup> I dɔ me 'kpa mɔ, i dɔ di-e 'dhu mɔ nde ngato mɔ bhú siti 'ngú-o, mɔ de kodho, amba mɔ bhike de mɔ tsutsu. Padhá de, anga a ndjindji pi mɔ nali bhú mukobho na kukulu ne ekpa bini, i dɔ di-e edhu bini. Bhobhomɔ-o ane ne bádha me u bhike mɔ ne 'kpa mɔ bhisi, i dɔ di-e ne 'dhu mɔ bhisi hana bhú djua na dɔduma! <sup>9</sup> I dɔ di me lí djila mɔ bini nde ngato mɔ bhú siti 'ngú-o, mɔ de gbe, amba mɔ bhike de mɔ tsutsu. Padhá de, anga a ndjindji pi mɔ nali ne djila mɔ bini bhú mukobho na kukulu. Bhobhomɔ-o ane ne bádha me u bhike mɔ ne djila mɔ bhisi hana bhú djua na dɔduma!»

*Gbitaku gba kandələ inde angita (Tsia bhú Luk. 15:3-7.)*

<sup>10</sup> Yesu atsia apa matá pi omukpata gba e me: «'E-e! Yi aú sùka okpála inde ngakə lio ne kuto maka ongisi inde-e padhá de, anga ma apa pi yi me abhúlá-a, oandjelu gba uo ngalɔ ndɔ nedhinga hana kala 'Dyi ma. [ <sup>11</sup> Padhá de, anga ngama Ndili gba kpála ma ago nani ngú nakobho kpála bhende angita ko.]

<sup>12</sup> Yi ngabhundja pi? Li kpála bini dɔ ne okandələ kámá bini-e, li sùka uo bini ngita-a, ani 'ó ká obhende ndjikpa odukpabini ne ká odukpabini-e apí 'ta di, ani tsia nú nagili bhende angita-a di? <sup>13</sup> I dɔ la me ani nde au ani au-o, ma apa pi yi na paká me, ani bédhe ne djali bedhe ane djali inde ani nde ne e ngú obhende ndjikpa odukpabini ne ká odukpabini inde i ngita naao de

ko. <sup>14</sup> A moko, 'Dyi yi inde abhúlá-a kunda de me sùka okpála inde ngakə lio ne kuto maka ongisi inde-e ngita belegɔ de bini.»

*Naleke 'ngú sɔnda o ne ondaise o*

<sup>15</sup> Yesu apa matá pi omukpata gba e me: «Li ndai mɔ mene mɔ sisiti-e, mɔ de nɔ bhaka ani, amba mɔ suno siti 'ngú gba ani-e pi ani me yi nde bhisi ka yi ne ani. Ani dje mɔ-o, amba mo osia ndai mɔ asia. <sup>16</sup> Ani dje mɔ de-e, mɔ de nɔ, mɔ ha kpála bini, i dɔ di-e okpála bhisi, amba <engú ang-o lu li 'li okpála bhisi, i dɔ di-e okpála bata†> maka li Bhuku gba Ebhe apa lie ko. <sup>17</sup> Ani dje uo de-e, mɔ de pa engú ang-o bhú Piga gba Ebhe. I dɔ la me ani nde ayala nadjɔ belegɔ okpála na Piga gba Ebhe-e, a ayo me ani kolo pi mɔ maka mɔpagano, la di maka ndɔmbi na mandjandja.

<sup>18</sup> Ma apa pi yi na paká me, ndɔ 'he hana inde yi agbíte e pála doto-o, a agbíte bhadi lie abhúlá moko. Ndɔ 'he hana la di yi abhúlu e pála doto-o, a abhúlu bhadi lie abhúlá moko.»

*Nayo bhú dabili bini*

<sup>19</sup> Do Yesu pi omukpata gba e de-e: «Ma apa matá pi yi me, i dɔ me pála doto, okpála bhisi bhú ká yi nde adje lio ngú nayo 'he, abana i dɔ bha mangua 'he dho-ie, 'Dyi ma inde abhúlá-a há ehe ang-o pi uo. <sup>20</sup> Padhá de, anga bili inde li okpála bhisi, i dɔ di-e okpála bata apo bhúla o lie ne 'li ma-a, ma bhú ká uo oo.»

*Yi mbu li ondaise yi*

<sup>21</sup> Abhomɔ-o, Piele adyudyo lie de Yesu, do ani pi ani me: «Ngámá, li ndai ma mene siti 'ngú li pabili gba ma-a, ma de mbu li ani bhutsibhutsi madho? A apise li bhutsibhutsi mananika?» <sup>22</sup> Yesu agie pi ani me: «Ma pa pi mɔ de me a apise li bhutsibhutsi mananika-a de, engú bini, a apise li bhutsibhutsi ndjikpa mananika bhutsibhutsi mananika.

† 18:16 18:16 Tsia bhú Det. 19:15.

<sup>23</sup> A bhadi moko, Nau na abhúlá-a, a maka tsingü gba 'ngbé ngámá bini inde akúnda nani naleke 'ngú na tia gba e ne okpála na kulu gba e-o. <sup>24</sup> Kalanü-o, u ago pi ani ne bhe bini inde adü ne tia gba ani-e bhelé na kuo kuo. <sup>25</sup> Li tia dü la lie ka ani ngú nagigie de-e, ngámá-a atsia aha líli me u tsindji ani, ne wala ani, ne ongisi gba ani, la di ne ndü 'he gba ani-e hana, amba ni sia tia gba ni-e bhúbhú. <sup>26</sup> Abhomü-o, kpála na kulu-o ati bhú 'li 'dhü ani, ani atu 'ndji e ne kuto, ani atsia akikiliki lie pi ani me: <Dü nga mbo ne 'ndjá bua li pabili gba ma, ma agié ndü tia gba mü-o hana.> <sup>27</sup> Ngámá adje ndjinga ani, ani ambu li ndü bopulu gba ani-e hana. Ani atsia a'o ani me ani nünü.

<sup>28</sup> Li kpála na kulu ango-o akoto lie, ani aké lie ne saka kilí e na kulu-o bini. Kpála ango-o adü ne bopulu gba ani na lí falanga kámá bini má kpikili! Ani ati li ngulü kpála na bopulu gba e bhomü-o má gbu! Ani aholo nafөлө ngulü ani me ni ngabhөлө ani ne napa pi ani me: <Gie falanga gba ma inde ka mü ko.>

<sup>29</sup> Kilí ani ango-o ati bhú li 'dhü ani, ani aholo nakikiliki lie pi ani me: <Dü nga mbo ne 'ndjá bua li pabili gba ma, ma agié pi mü magie.>

<sup>30</sup> Engú bini, bhe koko ayala. La matá pépé-e, ani aha ani, ani anü ne ani me u to ani bhú tikpü akólo bha bini li ani agié bopulu gba e lie-o.

<sup>31</sup> Li obi ani koko au lie mo-o, u adje likabhu li bua o naali. Kaka-a, u anü akpokpo ndü 'ngú bhomü-o hana maka a akodho 'kpí lie pi ngámá gba o-o.

<sup>32</sup> Abhomü-o, ngámá gba ani-e atsia apa me u 'i ani. Do ngámá-a pi ani de-e: <Mü ne siti kpála na kulu! Ma ambu li ndü bopulu gba mü inde-e hana, anga mo okikiliki limü muma. <sup>33</sup> Ngamü di-e, a ayo igini de me mü dje di ndjinga kilí mü maka ngama makpe ma adje

ndjinga mü lie di?> <sup>34</sup> Bua ngámá-a ake naali. Ani aha ani, ani anü ne ani pi okpekpeke obhosi me u mene ani kpekpeke, ngú nakolo bha bini li 'kpí inde ani agié ndü bopulu gba e lie hana ko.

<sup>35</sup> 'Dyi ma inde abhúlá améne bhadi pi yi moko, i dü me kpála ne kpála nde mbu li ndai e ne bua e hana de ko.»

## 19

*Yesu asuno pindji nagbo bhüsu o bhú kva*  
(*Tsia bhú Mlk. 10:1-12.*)

<sup>1</sup> Nedhinga li Yesu andjia nagama ongú bhomü-o lie, u ayie ne omukpata gba e bhú ndu doto na Galilaya. U atsia anü bhú ndu doto na Yudaya inde lingo ngade 'ngu na Djuludani-o. <sup>2</sup> Bhiti okpála akpata ani oo. Abhomü-o, ani atsia akobho okpála na kuo inde adü bhú ká uo-o.

<sup>3</sup> OmüFalisai koko adyudyo lio de ani. U atsia ayi ani ngú nale ani me: «Líli gba ní-e aziba pi bhoko uu me ani gie wala e abana i dü bha mangua 'ngú dho-ie?» <sup>4</sup> Ani agie me: «Yi tanga nga engú li Bhuku gba Ebhe-e apa e de me nani li lilita-a, Ebhe abho uo ölө ne bhoko-o di?†

<sup>5</sup> Bhuku ango-o atsia apa matá me: ka 'ngú ango-o, bhoko a'ó ká 'dyi e ne 'hi e, ani tsia dhédhe li wala e. Ndü uo bhisi hana tsia kólo koli kpála bini.† <sup>6</sup> Kaka-a, ma apa pi yi me, uo matá bhisi ade. Engú bini, u akolo koli kpála bini. A ayo de me kpála gbo bhüsu 'he inde li Ebhe agbite e de!» <sup>7</sup> Abhomü-o, omüFalisai ayi ani me: «Ka ni la li Moidje aha nani líli lie me bhoko ha balua nagbo bhüsu e pi wala e nedhinga ani agie ani lie?» <sup>8</sup> Yesu agie me: «Moidje aha nani kpadji pi yi ngú nagie olisi gba yi-e ka kpéke 'ndji gba yi-o. Engú la bini, a li lilita-a, adü nani mo-o de. <sup>9</sup> Ma apa pi yi me: i dü me kpála nde agie wala e, a nde de me ölө ango-o akúnda gala

† 19:4 19:4 Tsia bhú Dje. 1:27, 5:2. † 19:5 19:5 Tsia bhú Dje. 2:24.

bhoko de-e, i dũ me kpála ango-o nu ha ɔlɔ koko-o, kpála ango-o akũnda bhomu-o ɔlɔ koko.»

<sup>10</sup> Omũkpata-a apa pi ani me: «Ɔ dũ me lílí gba bhoko lí pabíli gba wala e nde mo-o, tata lí naha lío ade.» <sup>11</sup> Aní agíe pí uo me: «Ndũ okpála hana kɔ mboli engú bhomu-o de, bha bini obhende lí Ebhe aka kpadji pí o tété-o. <sup>12</sup> A ne engú bhelé bhelé inde nga'o me kpála dũdũ bhú lingbangi. Pí okpála koko-o, u azu uo me angu na ɔlɔ nde bhú uo ade. Pí okoko, okpála asiti uo ngao. A la di ne okoko i ha olisi de, ngabula na'o lío kpi ngabula Nau na abhúlá . A ayo me kpála inde ati da nakɔ mboli nasuno inde-e, ani kɔ mbolimboli kɔkɔ.»

*Yesu atuko bisagu pí ongisi*  
(*Tsia bhú Mlk. 10:13-16; di ne bhú Luk. 18:15-17.*)

<sup>13</sup> Abhomũ-o, okpála ago pí Yesu ne ongisi ngabula me ani 'o 'kpa e pí 'ndji uo, amba ani yo Ebhe pí uo. Engú bini, omũkpata aholo nayoko okpála ango-o. <sup>14</sup> Yesu atsia apa pí omũkpata-a me: «Yi 'o ongisi bhomu, u go bhaka ma, yi ayóko uo de, anga Nau na abhúlá pí okpála bhende lí bua o nde maka ongisi ko.» <sup>15</sup> Aní a'o 'kpa e pí 'ndji uo, pípíta-a, ani atsia ayíe lí bíli bhomu-o.

*Bhulũ tia bini ayi 'ngú pĩndji mukobho na dũdũma*  
(*Tsia bhú Mlk. 10:17-31; di ne bhú Luk. 18:18-30.*)

<sup>16</sup> Abhomũ-o, makombi bini adyudyo lie de Yesu. Aní atsia ayí ani me: «Mũsuno, a ayo me ma mene mangua bádha 'ngú dho ngú nasia mukobho na dũdũma-a?» <sup>17</sup> Yesu agíe pí ani me: «Mũ ngayi ma pĩndji bádha 'ngú ka ní? Koli bádha kpála bha bini. Ɔ dũ me mũ nde akũnda nali bhú mukobho na dũdũma-a, lila olíli-e malíla.» <sup>18</sup> Makombi ango-o ayí Yesu me: «Olíli bhedho?» Yesu agíe pí ani me: «Mo obhéle kpála de, mo okũnda

ɔlɔ, i dũ di-e bhoko koko de, mo ozí 'he de, mo opá 'ngú lí kilí mũ bhú djila okpála ne eu de. <sup>19</sup> Manga 'dyi mũ ne 'hi mũ mamanga. Kũnda kilí mũ maka mo okũnda límũ lie ngamũ makpe-o.†» <sup>20</sup> Makombi-e apa pí ani me: «Ndũ 'he bhomu-o hana, ma amene. A aneke matá ma ne bhedho?» <sup>21</sup> Yesu apa pí ani me: «Ɔ dũ me mũ nde akũnda nadũ ngbingbili-e , nũ tsĩndji ndũ 'he inde ka mũ-o hana, amba mũ ha tia ango-o pí obhulũ ndibhíli. Abhomũ-o, mũ tsia sía tia abhúlá. Pípíta-a go kpata ma!» <sup>22</sup> Lí makombi bhomu-o adje 'ngú bhomu-o lie, ani agíe lie ne líkabhu naali, anga tia adũ nani ka ani na mũgwe mũgwe.

<sup>23</sup> Abhomũ-o, Yesu atsia apa pí omũkpata gba e me: «Ma apa pí yi na paká me, da nali ka bhulũ tia bhú Nau na abhúlá-a kpekpeke. <sup>24</sup> Ma amata apa pí yi ne toto me da nali ka enũ maka eya lí gudho mũsana kpekpeke. La-a, da nali ka bhulũ tia bhú Nau gba Ebhe-e ane la matá ne kpéke.» <sup>25</sup> Lí omũkpata adje eli bhomu-o lie, u angamba na kuo kuo. U adũ apa me: «Ɔ dũ mo-o, a ati la íbílí da nakobho da?» <sup>26</sup> Yesu atsia uo, ani atsia apa pí uo me: «Pí okpála-a, a tí da namene lie de, engú bini, pí Ebhe-e, a tí da namene lie.»

<sup>27</sup> Abhomũ-o, Piele atsia ayí ani me: «Mũsuno, djedje nga. Ngaya-a, ya a'o ká ndũ 'he hana ngú nakpata mũ. Engú bhe gba ya-a adú lele e pí?» <sup>28</sup> Yesu agíe pí omũkpata-a me: «Ma apa pí yi na paká me, nedhĩnga lí doto adjí lie lie na mbíia-a, Ndíli gba kpála adú pí kiti na asasaua gba e-o. Ngayi obhe akpata ma-a, yi tsía dú di pí okiti na ngámá ndjikpa ne ká bhisi ngú nakodho 'ngú gba opiga ndjikpa ne ká bhisi gba omafísalaele ko. <sup>29</sup> La di-e, kpála ne kpála inde a'o ká oeti gba e, i dũ di-e ondaise e na obhosíbhosi ne obhe na olísílísí, i dũ di-e 'dyi e ne 'hi e, i dũ di-e ongisi gba e, i dũ di-e edyi gba e

† 19:19 19:18-19 Tsia bhú Eki. 20:12-16; ne bhú Det. 5:16-20; di ne bhú Lev. 19:18.

ngubula 'li ma-a, ani asia matá koko bhelé. Ani tsia sía di mukobho na duduma. <sup>30</sup> Yi mbila ndjindji me, bhelé na obhende mbia inde-e ne okpála na kalanu-o, akólo okpála na asidi, li obhende mbia inde asidi-e, tsia kólo okpála na kalanu.»

## 20

*Gbitaku gba bhulu 'dyi vino ne okpála na kulu gba e*

<sup>1</sup> Abhomu-o, Yesu atsia apa matá me: «Yi gbo nga 'dje yi. Na u na abhulá mana lie ne tsingu gba bhulu 'dyi bini. Bhulu 'dyi ango-o akoto agba e kekpi má bhé ngubula naha okpála ngu kulu na edyi na vino gba e-o. <sup>2</sup> Ani au uo lie, u adje lio ne uo me ni ahá kuo 'kpa pi uo li lele kulu na ekpi bini. Ani atsia atima uo ngu nanu amene kulu abhiye na vino gba e-o. <sup>3</sup> Ani akoto matá bhú saa na odukupabini na kekpi. Ani au okpála inde alulu li bili bini bhomu-o mandí kulu. <sup>4</sup> Ani pi uo me: «Ngayi di-e, yi nu abhiye gba ma-o. Kuo 'kpa ma ahá e pi yi-e, adú li lelele.» <sup>5</sup> Abhomu-o, u atsia agbida oo. Bhulu 'dyi-e akoto matá tulukpe. Pipita-a, ani akoto matá bhú saa na bata pita tulukpe. Ndu nedhinga ani adu akoto lie hana, ani adu abhaka okpála koko alulu li bili bini bhomu. U adje lio ne uo, ani atsia apa pi uo me u nu abhiye gba ni ko.

<sup>6</sup> Nakolo matá bhú saa na bhulu-vue pita tulukpe-e, ani akoto. Ani abhaka okpála koko alulu oo. Ani atsia ayi uo me: «Yi alulu si ngbolo 'kpi libhomu mandí kulu ka ni?» <sup>7</sup> Do uo pi ani de-e: «A ko anga kpála bini ha ya bhú kulu de.» Ani pi uo me: «Ngayi di-e, yi nu mene kulu abhiye na vino gba ma-o.»

<sup>8</sup> Li ekpi akolo lie tagolo-o, bhulu 'dyi-e apa pi kapita gba e me: «'I okpála na kulu-o, amba mu ha kuo 'kpa gba kpála ne kpála pi e, nayie li obhe ago sidi ngu nabu soso li obhe ago igini kalanu-o.» <sup>9</sup> Obhe akpo igini lita kulu bhú saa na bhuluvue

pita tulukpe-e ago. Kpála ne kpála atsia asia kuo 'kpa maka u adje igini lio ne uo lie-o. <sup>10</sup> Li obhe ago igini kalanu-o ago lie, u abhundja naao me o osia tia bhelé nane obhe ago igini sidi-o. Engu bini, ngauo di-e, kpála ne kpála asia kuo 'kpa aviti bini ne obhe ago igini sidi-o. <sup>11</sup> U adu asisia lie, u aholo adi mutokono li bhulu 'dyi-o. <sup>12</sup> U adu apa me: «Okpála inde-e ago sidi. U amene kulu bha koli saa bini má kpikili, la-a, mu ngaha uo aviti bini ne ya, ngaya okpála inde andala ne kulu ngbolo 'kpi libhomu bhú ke ku 'la!»

<sup>13</sup> Engu bini, bhulu 'dyi-e agie pi saka uo me: «Olia ma, mu ti da nadi mutokono de. Ma aha tia gba mu-o pi mu maka ní adje igini liní ne mu lie-o. <sup>14</sup> Ha tia gba mu-o, tatapa. Ma tí da naha pi obhende ago sidi-e bha maka ma aha pi mu lie-o. <sup>15</sup> Mu mbila de me ma ti da namene ne tia gba ma-a maka ma akunda lie di? Ne me mu ngatsia ma ne ndje djila ka ma amene okpála bhe ago sidi-e lie ndjindji-e!» <sup>16</sup> Yesu atsia abu tata-a me: «Okpála inde asidi-e akólo okpála na akalanu, li okpála na kalanu-o tsia kólo okpála na asidi.»

*Yesu apa matá bhutsibhutsi na bata engu nakpi*

*ne nazuku ka e*

*(Tsia bhú Mlk. 10:32-34; di ne bhú Luk. 18:31-34.)*

<sup>17</sup> Li Yesu adu lie nanu bhú Yelusalema-a, ani a'i omakpata gba e de e titi o. Ani atsia apa pi uo me: <sup>18</sup> «Yi djedje nga! Ní adji bhú Yelusalema, bili inde u apu ma Ndili gba kpála lie pi ongbengbe odimandé di ne omasuno na líli gba Moidje-o. U akódho 'ngu gba ma-a me ma kpi bha makpi. <sup>19</sup> U apu ma pi okpála inde ne omaYuda ade ngubula me u mu ma. U abhi ma ne fimbo, u tsia gi ma li kulusi. La-a, ekpi na bata-a, ma tsia zuku.»

*Mayo gba wala Djebedayo*  
*(Tsia bhú Mlk. 10:35-45.)*

20 Abhomu-o, wala Djebedayo adyudyo lie de Yesu bhú dabili bini ne ongisi gba e bhisi na obhosibhosi, Djaki ne uo ne Djaa , inde adu nani omukpata gba Yesu-o. Ani atu 'ndji e ne kuto kala Yesu ngu nayo 'he ka ani. 21 Yesu ayi ani me: «Mo okunda me ma mene pi mu ni?» Ani agie pi Yesu me: «Tsia nga ongisi gba ma bhisi inde. Ha lili me u dudu bhú Nau gba mu-o: bhe bini li pa 'kpa mu na kokpa, bhe koko li pa 'kpa mu na gali.» 22 Do Yesu de-e: «Yi mbila ehe inde yi ngayo e de. Yi ti da nazu likabhu inde ma azu e uu?» U agie me: «Ya ti da nazuzu.» 23 Yesu atsia apa pi uo me: «A moko, likabhu ma azu e, yi azu mazu. La-a, ngu nadu ka yi li pa 'kpa ma na kokpa ne bhe na gali-e, a ko 'ngu ka ma nakodho 'ngu tete de. Obili bhomu-o pi okpala inde li 'Dyi ma aleke pi o ko.»

24 Li omukpata bhe ndjikpa adje 'ngu bhomu-o lie, u ake 'ngu lio pi omukpata bhe bhisi bhomu-o. 25 Abhomu-o, Yesu a'i ndu omukpata hana me u go de ni. Ani atsia apa pi uo me: «Yi mbila ndjindji me ongamasu na doto a'o omaha o pi o ma'o, ongbengbe okpala adele omaha o sa 'dhu o. 26 A ayo de me a du bhú ka yi mo-o de. A ayo mangbo me i du me kpala nde akunda nadu 'ngbe kpala bhú ka yi-e, ani de du kpala na kulu gba yi. 27 La di-e, li kpala bini kunda nadu kpala na bini bhú ka yi-e, ani de du bali gba yi-o. 28 A bhadi moko, ngama Ndili gba kpala ma go ngu napa de me okpala mene kulu lio pi ma-a de. Engu bini, ma ago mangbo ngubula namene kulu lima pi okpala, amba ma ha di mukobho gba ma-a maka tia ngu nagbegbe okpala bhele bhú siti 'ngu gba o-o.»

*Yesu akobho okpala bhisi inde i u 'kpi de*  
(Tsia bhú Mlk. 10:46-52; di ne bhú Luk. 18:35-43.)

29 Nedhinga li Yesu ne omukpata gba e adu akoto lie bhú gudhu na Djeliko-o, bhiti okpala atsia akpata ani. 30 Abhaka me okpala bhisi inde i u 'kpi de-e nde adudu lingo kpadji oo. U adje me Yesu ngakodho 'kpi bhomu-o ngae. Abhomu-o, u aholo nasusula me: «Ngama, ndili gba Davidi, dje ndjinga ya!» 31 Bhiti okpala bhomu-o adu ambembe bhú 'ndji uo ngubula me u ndjili ma bulu! Engu bini, u aholo mata nasusula kpekpeke me: «Ngama, ndili gba Davidi, dje ndjinga ya!» 32 Abhomu-o, Yesu alu. Ani a'i uo. Ani atsia ayi uo me: «Yi akunda me ma mene pi yi mangua 'ngu dho?» 33 Do uo pi ani de-e: «Ngama, mene me djila ya u 'kpi.» 34 Yesu adje ndjinga uo, ani abu 'kpa e li djila uo. Ma gala kolo me-e, u aholo nau 'kpi. Abhomu-o, u atsia akpata ani.

## 21

*Yesu ali bhú Yelusalema*  
(Tsia bhú Mlk. 11:1-11; ne bhú Luk. 19:28-40; di ne bhú Dja. 12:12-19.)

1 Yesu ne omukpata gba e akolo masikpe de Yelusalema. U adu ibili de kuti na Betefadje, li ngba 'ta na ondula na Olive. Abhomu-o, Yesu atsia atima omukpata bhisi bhú ka omukpata gba e-o. 2 Ani apa pi uo me: «Yi nu bhú kuti inde kala yi aoo. Yi akolo lie oo, yi abhaka kolo me u nde agbite punda na eole bini, la di ne ndili punda bini bhú dabili bini ne ani. Yi bhulu uo, amba yi go ne uo muma. 3 Li kpala bini yi yi me yi adji ne uo su-oie, yi de gie me: «Ngama ne gumu uo.» Abhomu-o, ani 'o bha kolo me yi nu ne uo nunu.» 4 Engu bhomu-o amene lie mo-o ngubula me engu inde li polofeta apa nani e, amene lie. Polofeta apa nani me:

5 «Yi pa pi okpala na Siona me:  
«Yi tsitsia nga, 'ngbe ngama gba yi-e ngago agba yi.  
Ani ako lie ne kuto.

Kaka-a, ani adu pí 'ngbũ ndili punda.†»

<sup>6</sup> Omukpata-a anũ, u atsia amene maka li Yesu apa pi uo lie-o. <sup>7</sup> U ago ne ndili punda ne 'hi e. U aha okoti gba o-o, u abu pí 'ngbũ uo. Abhomũ-o, Yesu atsia adu pí 'ngbũ ndili punda-o. <sup>8</sup> Bhiti okpála na bhighbiti apa okoti gba o kuto li kpadji. Okoko adu atsolo 'kpá ngulu, u atsia adu napapa li kpadji. <sup>9</sup> Bhiti okpála inde adu adholo kala ani di ne obhende adu nakpata ani-e adu asusula me:

«Odjana\* pi ndili gba Davidi!

A ayo me bisagu du pí kpála inde ngago ne 'li Ngámá-o!

Odjana pi Ebhe inde abhúlá-o!†»

<sup>10</sup> Li Yesu ali lie bhú Yelusalema-a, gudhu-o adimba madimba. Okpála adu ayi me: «A ko da?» <sup>11</sup> Bhiti okpála atsia adu agie me: «A ko polofeta Yesu, kpála na Nadjaleta bhú ndu doto na Galilaya.»

*Yesu apandja okpála natsindji 'he bhú*

*'ngbé 'ti Ebhe gba omaYuda*

*(Tsia bhú Mlk. 11:15-19; ne bhú Luk. 19:45-48; di ne bhú Dja. 2:13-22.)*

<sup>12</sup> Pipita-a, Yesu ali bhú 'ngbé 'ti Ebhe gba omaYuda-o. Ani apandja ndu okpála hana inde adu natsindji onu di ne odhu inde u adu aha o pi Ebhe, a la di-e obhende adu akakala kilidjo. Ani abala omisa gba okpála nayipa falanga, di ne odabili gba okpála natsindji opidjo-o kuto.

<sup>13</sup> Abhomũ-o, ani atsia apa pi uo me: «U aye bhú Bhuku gba Ebhe-e me, Ebhe apa me, <u a'í eti gba ma-a me a ko eti na mayo.> La ngayi-e, yi adjí, a tsia akolo bili gba obhulu 'zi!†»

<sup>14</sup> Abhomũ-o, okpála inde i u 'kpí de ne obhende na eze-e adyudyo lio de ani bhú 'ngbé 'ti Ebhe gba omaYuda, ani atsia akobho uo. <sup>15</sup> Li ongbengbe odimandẽ gba Ebhe , di

ne omusuno na líli gba Moidje au ongamba 'ngú inde ani amene e lie, la di ne ongisi inde adu asusula bhú 'ngbé 'ti Ebhe gba omaYuda me: «Odjana pi ndili gba Davidi-e», u asia siti bua . <sup>16</sup> Abhomũ-o, u atsia ayi Yesu me: «Mũ ngadje engú inde li ongisi bhomũ-o ngapa e uu?» Yesu atsia agie pi uo me: «Heni, ma ngadjedje hana. Yi tanga nga engú inde li Davidi apa nani e bhú Bhuku gba Ebhe-e belegu de bini? Davidi apa nani me, Ebhe amene me belegu ongisi na djedjedje ne obhende ngandji 'ka toko ni.†» <sup>17</sup> Pipita-a, ani a'o ká ongbengbe odimandẽ di ne omusuno na líli gba Moidje-e bhú gudhu oo. Ani atapa bhú kuti na Betania, ani atsia asi oo ko.

*Yesu atu pedje li 'lá figi inde i li líli de*

*(Tsia bhú Mlk. 11:12-14, 20-24.)*

<sup>18</sup> Kõkpí li ekpí aseke lie, li Yesu aholo nagie matá lie lie abhú gudhu-o, ani aholo nadje gumu.

<sup>19</sup> Abhomũ-o, ani au 'lá figi dengo 'hi-kpadji. Ani adyudyo lie dede masikpe, engú bini, ani bhaka 'he bhúbhú belegu de bini, bha bini ndu mbulu kpákpá padhá. Ani atsia apa pi ndula na figi-e me: «Mũ lí matá líli belegu de bini!» Kolo me-e, 'lá figi a'ulu hana má kekele! <sup>20</sup> Li omukpata au lie mo-o, u angamba naali, u atsia ayi Yesu me: «Lele pi li 'lá figi-e a'ulu bha lie ma 'li mũ-o?»

<sup>21</sup> Do Yesu pi uo me: «Ma apa pi yi na paká me, i du me yi nde ne nabhuka , yi du ne bua na bhisi bhisi de-e, yi méne bha bini engú inde ma amene e li kute 'lá figi-e de. Engú bini, yi ti da napa belegu pi eta inde-e me: <Yie oo, amba mũ nu ti bhú ngade 'ngu>, i tsia méne lie moko. <sup>22</sup> I du me yi nde ne nabhuka-a, ndu 'he hana inde yi ayó e bhú mayo-o, yi asia masia.»

† 21:5 21:5 Tsia bhú Djkl. 9:9. \* 21:9 21:9 Odjana: A akunda napa bhú eli gba oebele me «Sangu .» Tsia bhú Ets. 118:25-26. † 21:9 21:9 Tsia bhú Ets. 118:25-26. † 21:13 21:13 Tsia bhú Isa. 56:7; di ne bhú Djlm. 7:11. † 21:16 21:16 Tsia bhú Ets. 8:3.



*A ngaha angu pi Yesu da?*  
(*Tsia bhú Mlk. 11:27-33; di ne bhú Luk. 20:1-8.*)

<sup>23</sup> Yesu akolo lie bhú gúdhú-o, ani ali matá bhú 'ngbé 'ti Ebhe gba omaYuda-o. Ani atsia aholo nasuno pi okpála. Abhomú-o, ongbengbe odimandé gba Ebhe, ne obhelesi okpála adyudyo lio de ani. U atsia ayi ani me: «A aha kpadji pi mụ ngú namene ongu inde-e da? A aha la di angu ango-o pi mụ ngánga da?»  
<sup>24</sup> Yesu agie pi uo me: «Ngama di-e, ma ayi yi li koli engú bini. I du me yi nde agie 'ngú mụma tété-e, ma tsia pá di pi yi me ma ngamene ehe inde-e ne mangua angu dho-ie.

<sup>25</sup> Ma ngayi yi me: «A aha nani kpadji pi Djaa ngú nabatisa okpála da? Ne me aha nani kpadji pi ani ne okpála, ne me aha kpadji pi ani ne Ebhe?» U atsia aholo natoto bua o sunda o me: «I du me ní nde apa me: «A aha kpadji pi ani ne Ebhe-e», ani yi ní me: «Ka ni la yi bhuka nani ani lie de-e?»  
<sup>26</sup> I du la di me ní nde apa me: «A aha kpadji pi ani ne okpála-a», ní de tsia 'kpí liní ka okpála-a ndjindji, anga ndú okpála hana du nani nau Djaa me a ko polofeta.»  
<sup>27</sup> Abhomú-o, u atsia agie pi Yesu me: «Ya mbila de me aha nani kpadji pi ani da-ie de.» Ngaani di-e, ani atsia apa pi uo me: «Ngama-a, ma pá di pi yi de me aha angu mụma ngú namene ongu inde-e da-ie de.»

*Gbitaku pindji ongisi bhisi*

<sup>28</sup> Yesu atsia ayi matá me: «Yi apa nga naayi li 'ngú inde-e pi? Kpála bini adu nani ne ongisi gba e bhisi. Ani anu abhaka bhe na kalanu-o, ani atsia apa pi ani me: «Ndika ma, naki-e, nu mene kulu abhiye na vino.»  
<sup>29</sup> Ndili agie me: «Ma nu de.» Pipita-a, ani adjí bua e, ani atsia anu abhiye-o.  
<sup>30</sup> 'Dyi uo anu apa di pi bhe na bhisi-e me ani nu abhiye na vino-o. Bhobhomú-o agie pi ani me: «Ma adjí, 'dyi ma.» La-a, ani tsia nu de.  
<sup>31</sup> Bhú ká ongisi bhisi bhomu-o, a amene engú inde li 'dyi

uo adu akunda e da?» U agie me: «Bhende na kalanu-o.» Yesu atsia apa pi uo me: «Ma apa pi yi na paká me, ondombi na mandjandja, di ne obambakuya ali pi yi kalanu bhú Nau gba Ebhe-o .  
<sup>32</sup> Padhá de, anga Djaa ago agba yi ne nasuno pi yi kpadji na ngbili 'ngú , yi tsia bhuka ani de. Engú bini, ondombi na mandjandja di ne obambakuya atsia abhuka ani. Abana yi au ndu 'ngú bhomu-o hana lie ne djila yi-e, ngayi-e, yi bhuka ani de.»

*Gbitaku pindji osisiti okpála na kulu*

(*Tsia bhú Mlk. 12:1-12; di ne bhú Luk. 20:9-19.*)

<sup>33</sup> Yesu atsia apa matá me: «Yi dje nga matá gbitaku koko inde. Bhuu bili bini alu nani ngu vino, ani asa ngongo-o hana ne aga. Ani adjí edú ngú napi olíí-e bhúbhú, ani atsia ayiki 'ndjá 'ti abhúla bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomú-o, ani atsia atapa dhuku.  
<sup>34</sup> A akolo lie li nedhinga nako lílí-e, ani atima okpála na kulu gba e agba okpála inde ngamene kulu bhú 'dyi vino me u ha nguwa bhe gba ni-e pi ni haha.

<sup>35</sup> Engú bini, okpála namene kulu bhú 'dyi vino azumu bha okpála ango-o hana. Bhe bini-e, u abhi ani má kpu! Bhe koko-o, u abhele ani, bhe na bata-a, u atutulú ani ne teme.  
<sup>36</sup> Abhomú-o, bhuu 'dyi-e atima matá okpála na kulu koko bhelé nane obhende na kalanu-o mane. U amene bhadi uo moko.  
<sup>37</sup> Ali soso-o, ani atima ndili gba e agba okpála ango-o ne nabhundja me: «U amánga ndili gba ma-a mamanga.»  
<sup>38</sup> Engú bini, li okpála namene kulu bhú 'dyi vino au ndili-e lie, u apa sunda o me: «Kukulu kpála inde atígala la ndju ne edyi-e ngae inde. Yi gógo, ní bhele ani, amba ní tigala ibili ne edyi-e ngani!»  
<sup>39</sup> Abhomú-o, u ati pi ani má kii! U

aha ani, u agbe ani bhú 'dyi na vino-o, u atsia abhelo ani.

<sup>40</sup> Mbia inde-e, nedhinga li bhulu 'dyi vino agó lie, ani améne ngú okpála na kulu bhomu-o pi?»

<sup>41</sup> U agie pi ani me: «Ani abhili omabhèbhèlo kpála bhomu-o hana, ani djé ndjinga uo de. Pipita-a, ani há 'dyi vino pi okpála koko ngú namene kulu bhúbhú, obhende ahá nguwa pi ani bhú nedhinga u adje lio ne uo li e-o.»

<sup>42</sup> Yesu atsia apa pi uo me yi ngagama 'ngú mugito me yi tanga nga engú inde li Bhuku gba Ebhe-e apa e belegu de bini. Bhuku gba Ebhe-e apa li 'ngú gba Masiya me:

«Teme inde li okpála nayiki eti-e au me a ne tata ade-e,

a akolo teme inde abi eti-e libhomu-o ngae.

Ebhe Ngámá amene mo-o ngae.

Bhú djila ní-e, a ko 'ngú na ngangamba!†»

<sup>43-44</sup> Kpála bhende atí pí teme ang-o, ani gúgumu. Kpála bhende la di li teme ang-o atí pí e, teme ang-o bá mbu ani má mbu! Ka yi au teme li Bhuku gba Ebhe-e apa 'ngú e lie padhá-a, ma apa pi yi me, ngayi-e, Ebhe aní 'bhè bhoti na Nau gba e pi yi mani, ani tsia bhulu pi okpála bhende ngamene engú inde ani akunda e-o.

<sup>45</sup> Li ongbengbe odimandè di ne omuFalisaí adje gbitaku ang-o lie, u atsia akè mbolimboli me ani de ngagama 'ngú bhomu-o pindji o.

<sup>46</sup> U aholo agili kpadji ngú naholo ani, engú bini, u adu ne tsulu ka okpála, anga okpála adu au me a ko polofeta.

## 22

*Gbitaku pindji 'ngbé anokomia na kava*

(Tsia bhú Luk. 14:15-24.)

<sup>1</sup> Abhomu-o, Yesu apa matá gbitaku pi okpála ani adu akpo 'ngú pi o-o me: <sup>2</sup> «Yi tsia nga engú inde

li Nau na abhúla akpo 'ndji e ne e-o: A maka tsingu gba 'ngbé ngámá bini inde amene anokomia na kava pi ndili gba e na bhobhoko. Ani atsia a'i okpála bhú anokomia ang-o. <sup>3</sup> Ekpí na anokomia ale lie, ani atima okpála na kulu gba e na'i okpála inde ani a'i o me u go bhú anokomia ang-o. Engú bini, u ziba nago li e'i ang-o de.

<sup>4</sup> Ani atima matá okpála na kulu koko. Ani aha líli pi uo me u nu pa pi okpála ani a'i o-o me: «Mbia inde-e, ma alu ezu gba ma-a alu. Ma abhili obagala gba ma ne onu na tsikpa abhili, ndundu hana ibili bedhe. Yi go bhú anokomia ang-o gogo!» <sup>5</sup> Engú bini, ngauo-o, u adje bha ne 'dje o. U atsia agbida bhú ongu gba o. Bhe bini aholo ne enú abhú 'dyi gba e, koko bhú natsindji mase gba e. <sup>6</sup> Okoko aholo okpála na kulu inde u atima o-o, u amene uo kpekpeke, u atsia abhili uo. <sup>7</sup> Li 'ngbé ngámá-a adje lie, ani abi 'gú naali. Abhomu-o, ani atsia atima osudha gba e me u bhili omabhèbhèlo kpála bhomu, amba u to di djua li gudhu gba uo-o.

<sup>8</sup> Pipita-a, ani atsia apa pi okpála na kulu gba e me: «Anokomia na kava-a bedhe. Engú bini, okpála ma a'i o-o ti matá da nago bhúbhú de. <sup>9</sup> Kaka-a, yi nu li odi kpadji, yi 'i ndu okpála inde yi abhaka o hana, amba u go zu 'he-o.» <sup>10</sup> Okpála na kulu bhomu-o aze li okpadji. U atsia apo bhúla okpála bhende u adu abhaka o-o hana, obabadha okpála di ne osisiti okpála. U anu ne uo bhú 'ti na anokomia-o. Abhomu-o, tina 'ti na anokomia atsia abedhe ne uo bedhe.

<sup>11</sup> Abhomu-o, 'ngbé ngámá-a ali bhú 'ti na anokomia ngubula natsia okpála inde ani a'i o-o. Ani au kpála bini inde i dyi bongo na anokomia de. <sup>12</sup> Ani ayi kpála ang-o me: «Wai, mo oli ei lele pi me mu nde dyi bongo na anokomia di-e?»

† 21:42 21:42 Tsia bhú Ets. 118:22-23.

Kpála ang-o andjili bha má bulu!  
<sup>13</sup> Abhomu-o, 'ngbé ngámá-a apa pi okpála na kulu-o me: <Yi gbigbite 'kpa ani ne 'dhu ani, amba yi bhike ani bhú bití akilidjo. Oo-o, ani adú aku 'gbá ne nazú tate e.>>

<sup>14</sup> Yesu atsia abu tata-a me: «A moko, Ebhe a'i okpála bhelé, engú la bini, obhende ani alo o-o, uo bhelé ade.»

*Omufalisai ato Yesu pindji nakala mandjandja gba 'ngbé ngámá Kaisala*

*(Tsia bhú Mlk. 12:13-17; di ne bhú Luk. 20:20-26.)*

<sup>15</sup> Abhomu-o, omufalisai anu nadi bula ngubula nagili kpadji ngú nateke Yesu li 'li e. <sup>16</sup> U atsia atima té omukpata gba o bhú dabili bini ne okpála gba Elode ngubula napa pi Yesu me: «Musuno, ya mbila ndjindji me mu ngapa ngbili 'ngú. Mu ngasuno bhadi kpadji gba Ebhe-e ngbingbili. Tsulu kpála belegu li mu ade bini, anga mu tsia di engbé gba kpála de. <sup>17</sup> Mu ngabhundja naamu pi? A ayo me ya kala mandjandja gba 'ngbé ngámá Kaisala ne me ya kala de. Pa nga pi ya.» <sup>18</sup> Engú bini, li Yesu ambila siti kali gba uo-o lie, ani atsia apa pi uo me: «Obhulu kali inde-e, ka ni yi ngato ma lie? <sup>19</sup> Yi suno nga falanga inde u akakala mandjandja ne e muma.» U atsia ago pi ani ne lí falanga bini. <sup>20</sup> Yesu atsia ayi uo me: «Kulu kpála, ne balua inde pí lí falanga inde-e, a ko naa da?» <sup>21</sup> U atsia agie pi ani me: «A ko naa Kaisala.» Abhomu-o, ani atsia apa pi uo me: «Yi ha oehe bhende li Kaisala ngayo e pi Kaisala, amba oehe bhende li Ebhe ngayo e, yi ha pi Ebhe.» <sup>22</sup> U adje lie mo-o, u angamba naali. U a'o ká ani, u atsia agbida.

*OSadukai ayi 'ngú pindji nazuku ka okpála*

*(Tsia bhú Mlk. 12:18-27; di ne bhú Luk. 20:27-40.)*

<sup>23</sup> Bha li 'kpí bhomu-o, oSadukai ago abhaka Yesu. (Ngauo-o, u ngapa naao me okpála inde amu-o zúku de.) U atsia ayi Yesu me: <sup>24</sup> «Musuno, Moidje apa nani me: <Í du me bhoko bini kpi me ani nde zu ongisi de-e, ndai ani na bhobhoko-o bhe aké pita ani-e de ha eké ani ngubula nazu ongisi pi ndai e inde akpi-o.> <sup>25</sup> Gbo nga la 'dje mu. Obhosi mananika adu nani agba ya. A adu nani ondaise. Bhebhele-e aha elé, ani atsia akpi me ani nde zu de. Bhende aké pita ani-e atsia aha eké ani-o. <sup>26</sup> Bhende na bhisi bhomu-o akpi bhadi moko, ani nde zu de. A aké li bhende na bata, nakolo makolo li bhende na mananika-o. Ndu uo hana amu me u nde zu de. <sup>27</sup> Pita namu ka ndu uo hana-a, elé-o atsia akpi di. <sup>28</sup> Li 'kpí li okpála inde amu-o azúku lie, bhú ká obhosi mananika bhomu-o, elé bhomu-o adú naa da? Padhá de, anga ndu uo hana aha nani ani.»

<sup>29</sup> Yesu atsia agie pi uo me: «Yi angita, anga yi ké mboli engú li Bhuku gba Ebhe-e ngapa e de. Yi mbila di angu gba Ebhe-e de. <sup>30</sup> Padhá de, anga li okpála inde amu-o azúku lie, olisi ne obhosi há lío de. Engú bini, u adú ibili maka oandjelu abhúlá. <sup>31</sup> Pindji 'ngú bhende atsia nazuku ka okpála inde amu-o, yi tanga nga eli gba Ebhe-e di? Ebhe apa nani pi yi me: <sup>32</sup> <Ngama-a, ma ne Ebhe inde li onguo ogbi yi Abalahama, Isaka, ne Yakobho ngamene kulu lío pi e ko.> Ebhe-e, a ko Ebhe gba okpála bhende amu-o ade. Engú bini, a ko Ebhe gba okpála inde uu ko.»† <sup>33</sup> Ndu okpála hana inde adje engú bhomu-o angamba naali li nasuno gba ani-o.

*Nasuno pindji líli inde ane ne engbé*

*(Tsia bhú Mlk. 12:28-34; di ne bhú Luk. 10:25-28.)*

<sup>34</sup> Abhomu-o, Yesu atsia agbite 'bhé oSadukai ne engú ani agie e pi

† 22:32 22:32 Tsia bhú Eki. 3:6.

uo-o. Li omuFalisai adje lie mo-o, u anu apo bhúla o de ani. <sup>35</sup> Suka uo adu musuno na líli gba Moidje . Aní adu akunda nato Yesu. Kaka-a, aní atsia ayi aní me: <sup>36</sup> «Musuno, bhú ká olíli-e, bhende ane ne engbé-e ngae dho?» <sup>37</sup> Yesu atsia agie pí aní me: «A ayo me kunda Ebhe, Ngámá gba mu-o ne bua mu hana, ne mukobho gba mu-o hana, di ne mabhundja gba mu-o hana.†» <sup>38</sup> A bhomu-o líli inde ane ne engbé, inde di líli na kalanu-o, <sup>39</sup> Bhende pipita, inde bhadi ngbéngbé maka bhe na kalanu-o ngae inde: «A ayo me kunda kilí mu maka mo okunda limu lie ngamu makpe-o.†» <sup>40</sup> Engú li u aye e bhú líli gba Moidje ne bhende li opolofeta aye e hana alu pí olíli bhisi bhomu.»

*Masiya ne Ngámá gba Davidi*  
(Tsia bhú Mlk. 12:35-37; di ne bhú Luk. 20:41-44.)

<sup>41</sup> OmuFalisai adu nga bha nagama 'ngú ne Yesu. Aní atsia ayi uo me: <sup>42</sup> «Yi ngabhundja pindji Masiya pí? A ko ndili ka da?» U atsia agie pí aní me: «A ko ndili ka Davidi.» <sup>43</sup> Yesu atsia ayi uo me: «I du mo-o, lele pí li Davidi, bhú angu gba Bu Bhobua-a nga'i Masiya lie me Ngámá gba ni-e? Padhá de, anga Davidi apa nani me:

<sup>44</sup> «Ebhe Ngámá apa pí Ngámá gba ma-a me:  
go du li pá 'kpa ma na kokpa,  
amba ma mene me mu ha angu  
obhulu yala gba mu-o.†»

<sup>45</sup> I du la me Davidi nde nga'i Masiya me «Ngámá gba ni-e», lele pí li Masiya ti da nadu lie ndili ka anie?» <sup>46</sup> Abhomu-o, kpála bini tsia du ne eli nagigie pí aní li 'ngú aní ayi e de. Nayie li 'kpí bhomu-o, kpála bini tsia le matá nayi aní li 'ngú belegu de bini.

## 23

*Yesu apa me yi améne 'ngú maka omusuno na líli gba Moidje di ne omuFalisai-e de*

(Tsia bhú Mlk. 12:38-39; di ne bhú Luk. 11:43, 46, 20:45-46.)

<sup>1</sup> Abhomu-o, Yesu apa pí bhiti okpála di ne omukpata gba e me: <sup>2</sup> «Kulu gba omusuno na líli gba Moidje di ne omuFalisai-e , a ko nambamba ta olíli gba Moidje pí okpála. <sup>3</sup> Kaka-a, yi mene ndu 'ngú hana inde u apá e pí yi-o, amba yi tsia lila di ndjindji. Engú la bini, yi akpáta kulu gba uo-o de, anga engú u ngapa e, u mene maka u ngapapa lie de. <sup>4</sup> U ngagbite titili 'he na titili, u nga'o'o de-ngulu okpála. La-a, ngauo makpe, u ngayala na'o nga bha tété ndjili 'kpa o ngú nateteke okpála li tili 'he inde u a'o e dengulu uo-o. <sup>5</sup> Ndu 'ngú gba uo hana, u ngamemene me okpála u o mau. Kaka-a, u ngaye 'li Ebhe ne baba djila balua, u ngagbigbite pidi o ne li 'kpa o. U la di ngadu 'so kandju gba o ndjandjandja ane mane. <sup>6</sup> U ngakunda nadulu bhú dá oanokomia li bili gba ongbengbe okpála, u kunda di nadulu bhú oti nadjé líli gba Moidje li bili inde li okpála adú au o lie mau. <sup>7</sup> U kukunda me u du nayi o bhú odaposo, di ne me okpála du a'i o me <Musuno.>

<sup>8</sup> Pí yi-e, yi améne de me okpála du a'i yi me <Musuno-o> de. Padhá de, anga yi bha ne koli Musuno bini, yi la bhadi ndu yi hana ne ondaise . <sup>9</sup> Yi a'i kpála bini píla doto de me <'Dyi yi-e> de, anga koli 'dyi yi bha bini ngae inde abhúla ko. <sup>10</sup> Yi améne di de me okpála du a'i yi me <Ngámá-a> de, anga koli Ngámá gba yi-e bha bini ne Kilisito . <sup>11</sup> A ayo me kpála inde ane ne engbé bhú ká yi-e du kpála na kulu gba yi ko. <sup>12</sup> Kpála bhende a'ó lie ngae makpe ne abhúla-a, u aké aní ne akuto.

† 22:37 22:37 Tsia bhú Det. 6:5. † 22:39 22:39 Tsia bhú Lev. 19:18. † 22:44 22:44 Tsia bhú Ets. 110:1.

Kpála bhende a'ó la lie ngae makpe ne akuto-o, u a'é'e ani ne abhúlá.»

*Yesu ambamba ta kali gba om̄suno na líli gba Moidje di ne om̄Falisai-o*

*(Tsia bhú Mlk. 12:40; di ne bhú Luk. 11:39-52, 20:45-47.)*

<sup>13</sup> Yesu apa matá me: «A ko líkabhu pí yi, om̄suno na líli, di ne om̄Falisai. Yi ne obhul̄u kali! Padhá de, anga yi ngani 'bhø bhoti na Nau gba Ebhe-e pí okpála. La ngayi-e, yi lí oo de, yi ka la di kpadji pí obhende akunda nali-e de. [ <sup>14</sup> \* ]

<sup>15</sup> A ko líkabhu pí yi, om̄suno na líli di ne om̄Falisai. Yi ne obhul̄u kali! Padhá de, anga yi ngadhólo ne ndu bíli hana píla doto ne pí 'ngbé 'ngu ngubula me gandji kpála bini bhuka líli gba Moidje-o. † du la me ani nde abhuka-a, yi ngamene me ani kolo kpála na djua na duduma nane yi bh̄tsibh̄tsi bhisi.

<sup>16</sup> A ko líkabhu pí yi, djila yi adudu. Yi la ngale me yi suno kpadji pí okpála! Yi ngapa me: † du me kpála nde atu silika ne 'lí 'ngbé 'ti Ebhe gba omaYuda-a, engú tété ade. Engú la bini, † du me kpála nde atu silika ne 'lí olo na 'ngbé 'ti Ebhe gba omaYuda-a, a ayo me kpála ango-o mene engú inde ani atu silika ngú e-o. » <sup>17</sup> Ngayi-e, yi ne ongingi, djila yi adudu! A ane ne engbé ne bhedho? Ne me a ko olo, ne me a ko 'ngbé 'ti Ebhe inde ngamene me olo-o kolo bubu kala Ebhe-e? <sup>18</sup> Yi ngapa matá me: † du me kpála nde atu silika ne 'lí bíli natsulu enu pí Ebhe-e, engú tété ade. Engú la bini, † du me kpála nde atu silika ne 'lí enu inde u ngatsulu e pépé-e, a ayo me kpála ango-o mene engú inde ani atu silika ngú e-o. » <sup>19</sup> Ngayi-e, djila yi adudu! A ane ne engbé ne bhedho? Ne me a ko enu inde u ngatsulu e pí Ebhe,

ne me a ko bíli inde ngamene me enu ango-o kolo bubu kala Ebhe-e? Ndundu hana viti bini.

<sup>20</sup> Kaka-a, kpála bhende ngatu silika ne 'lí bíli natsulu enu-o, ani bhomu-o ngatutu ne 'lí bíli natsulu enu, la di ne 'lí ndu 'he hana inde pépé-o. <sup>21</sup> La di-e, kpála bhende ngatu silika ne 'lí 'ngbé 'ti Ebhe, ani bhomu-o ngatutu ne 'lí 'ngbé 'ti Ebhe, di ne 'lí Ebhe inde ngadu bhúbhú ko. <sup>22</sup> Kpála bhende ngatu la di silika ne 'lí kokpí-e, ani bhomu-o ngatutu ne 'lí kiti na ngámá gba Ebhe, la di ne 'lí Ebhe inde ngadu pépé-o.

<sup>23</sup> A ko líkabhu pí yi om̄suno na líli di ne om̄Falisai. Yi ne obhul̄u kali! Padhá de, anga yi ngaha belegu bini bhú ká ndjikpa na oulu na babadha sese. La-a, ongbengbe 'ngú inde lí líli-e ngasuno e píndji nakodho 'ngú lí lelele bhú dabíli bini ne bua na ndjinga, a la di-e namene engú inde lí Ebhe akunda e, yi ngauu padhá. A la bhomu-o engú inde a ayo me yi de amene e, me yi nde 'lí di 'to yi lí okoko de ko. <sup>24</sup> Ngayi-e, djila yi adudu, Yi la ngale me o suno kpadji pí okpála! Yi ngapandja ondjindji bhú 'he nandji mandji gba yi-o. La-a, yi ngabhi enu maka eya libhomu bhú 'bu yi má ngbi!

<sup>25</sup> A ko líkabhu pí yi om̄suno na líli di ne om̄Falisai. Yi ne obhul̄u kali! Padhá de, anga yi ngavulu kute okópo ne osani gba yi-e má ngbi, la-a, ohe inde yi nga'o e bhúbhú-o, a ko ohe inde yi asia e lí kpadji na ezi bhú dabíli bini ne kundu 'he inde bhú yi-o. <sup>26</sup> Ngayi om̄Falisai-e, yi u 'kpí de! Yi vulu ngaiza bhú kópo-o ngubula me kakute kolo di babadha.

<sup>27</sup> A ko líkabhu pí yi om̄suno na líli di ne om̄Falisai. Yi ne obhul̄u kali! Padhá de, anga yi maka olata inde u apulu embú pí e, inde í

\* **23:14** 23:14 Lukuluku inde-e, a bhú obhuku koko na didili u aye e bhú eli na giliki ade. [A ko líkabhu pí yi, om̄suno na líli di ne om̄Falisai. Yi ne obhul̄u kali! Padhá de, anga yi ngabha ndu 'he inde ka oekosi-e hana. Yi la di ngayo Ebhe ngengele bhú djila okpála, amba u u me yi ne obabadha okpála. Kaka-a, u akódho 'ngú gba yi-e kpekpeke naali!] Tsia bhú Mlk. 12:40.

ngau lie akilidjo babadha. Engú bini, abhúbhú abedhe ne tsagala biki okpála bhende amu di ne ondu 'he na sisiti hana. <sup>28</sup> A bhadi pí yi moko. Bhú djila okpála-a, yi ngau liyi me yi ne okpála na ngbingbili. La abhú yi-e, yi abedhe ne kali di ne ongu na sisiti bedhe.

<sup>29</sup> A ko likabhu pí yi omusuno na líli di ne omuFalisai. Yi ne obhulu kali! Padhá de, anga yi ngaleke olata opolofeta ndjindji, yi di ngaye obabadha tele li olata okpála na ngbingbili-o. <sup>30</sup> Yi la ngapa me: <Ya dú nani bhú 'kpí odyi ya u-o, ya de kpɔtɔ 'kpa ya ne uo ngu nabhili opolofeta de.> <sup>31</sup> Kaka-a, yi ngakpokpo bhomu-o engú gba yi makpe, me yi ne ongisi gba okpála inde abhili opolofeta-o! <sup>32</sup> Atoú! Yi bedhe 'bhø engú li odyi yi akpo nani lita e bebedhe! <sup>33</sup> Yi ne okpulu, yi ne piga ombama! Yi aneke mangimbo nanu bhú djua na duduma lele pí?

<sup>34</sup> Kaka-a, yi djedje nga: ma ngatima opolofeta ne obhulu imbilangu, la di ne okukulu omusuno na líli pí yi. Yi abhili okoko bhú ká uo, yi gí okoko li kulusi. Yi abhí okoko ne fimbo bhú oeti nadge líli gba yi-o, yi tsia nú ne nato mbolo li okoko bhú gudhu bini ne bini. <sup>35</sup> Yi améne mo-o ngubula me ngute ndu okpála na ngbingbili hana inde yi abhili nani o píla doto libhomu-o tuko pí 'ndji yi. Padhá de, anga yi abhili nani okpála na ngbingbili bhelé, nayie li Abele, nakolo li Djakalia, ndili gba Balasi-o. Yi abhøle nani Djakalia bhú mbadhasu na 'ngbé 'ti Ebhe, sunda bili natsulu enu pí Ebhe ne titina na bubu-o. <sup>36</sup> A moko, ma apa pí yi me ndu 'ngú bhomu-o hana atúko pí 'ndji okpála na naki inde.»

*Yesu aku 'gbá ngu okpála na Yelusalema*  
(Tsia bhú Luk. 13:34-35.)

<sup>37</sup> Yesu apa matá me: «Ngayi okpála na Yelusalema, ngayi okpála na Yelusalema, ngayi-e, yi ngabhili

opolofeta, yi la di ngabhili okpála inde li Ebhe atima o pí yi-e ne teme! A ko bhatsibhatsi madho, ma akunda napo bhúla ongisi gba yi-e lie maka li 'hi 'ngu apopo bhúla ongisi gba e lie sa mbudha e? La-a, yi tsia kunda de! <sup>38</sup> Kaka-a, kuti gba yi-e atígala padhá. <sup>39</sup> Padhá de, anga ma apa pí yi me nayie pí mbia inde-e, yi ú matá ma belegu de bini akólo li 'kpí inde yi apá lie me: <A ayo me Ebhe tuko bisagu pí kpála inde ngago ne 'li ani-o!†>»

## 24

*Yesu apa me u agúgumu 'ngbé 'ti Ebhe*  
*gba omaYuda-a kuto*

(Tsia bhú Mlk. 13:1-2; di ne bhú Luk. 21:5-6.)

<sup>1</sup> Abhomu-o, Yesu akoto bhú 'ngbé 'ti Ebhe gba omaYuda-o. Li ani aholo ne 'nú lie, omukpata gba ani atsia adyudyo lio de ani ngu napanu pí ani maka li 'ngbé 'ti Ebhe gba omaYuda-a ayiki lie lie-o. <sup>2</sup> Yesu atsia apa pí uo me: «Yi ngau ndu 'he bhomu-o hana? Ma apa pí yi na paká me, ekpí bini akólo makolo, u agúgumu 'ngbé 'ti Ebhe-e hana kuto. Teme bini tígala pí kili e de.»

*Engú inde akólo kala sokpí-o*  
(Tsia bhú Mlk. 13:3-13; di ne bhú Luk. 21:7-19.)

<sup>3</sup> Abhomu-o, Yesu anu adu kuto pí 'ta na ondula na Olive. Omukpata gba ani-e adyudyo lio de ani, u atsia ayi ani me u nde ne uo kpi o kpi me: «Musuno, pa nga pí ya, engú mu de ngapa e bhomu-o améne lie nadho? Ehe inde asúno nago ka mu-o ne ni? Ehe inde asúno la di me sokpí-e akolo ne ni?» <sup>4</sup> Yesu agie pí uo me: «'E-e! Yi lila liyi me kpála bini apíte yi de. <sup>5</sup> Padhá de, anga okpála bhelé agó ne 'li ma. U adú abhi 'kpa o pí mbulu o me o ne Masiya, u tsia píte okpála bhelé naali. <sup>6</sup> Yi adjé tolo egú ne ngali 'ngú na egú.

† 23:39 23:39 Tsia bhú Ets. 118:26.

'E-e! Yi adjé tsulɔ de, anga a ayo me ndu 'ngú bhomu-o hana mene lie. Engú bini, a nga bhomu-o sokpí-e de. <sup>7</sup> Padhá de, anga okpála na kuti bini ahá 'gú pi okpála na kuti koko, li ngámá na kuti bini há 'gú pi ngámá na kuti koko. Adyindi adú li obili ngangá, li adjigidjo dyíki doto li obili ngangá. <sup>8</sup> Ndu 'ngú bhomu-o adú maka likabhu inde adúdu kala nazu ka ɔlɔ.

<sup>9</sup> Abhomu-o, ndu okpála hana ayála yi ka 'li ma, u apú yi me u mene yi sisiti. U tsia bhili yi. <sup>10</sup> Li okpála bhelé bhú ká yi 'ó ká nabhuka gba o. U apú ngbángá o sunda o, u tsia yála di lio sunda o. <sup>11</sup> Opolofeta na eu azé bhibhiti naali, u tsia píte di okpála bhelé. <sup>12</sup> Siti 'ngú abé ndu e naali, li mukunda gba okpála bhelé tsia bí zini. <sup>13</sup> La-a, kpála bhende alú kpekpeke bhú nabhuka nakolo makolo ali soso-o, kpála ang-o tsia kóbho. <sup>14</sup> U akpokpo Bádha NgaliNaɔ na abhúla inde-e píla doto libhomu, amba ndu opiga hana mbila 'ngú tété ndjindji. Pipita-a, li sokpí-e tsia kólo.»

*Okpála azú likabhu naali kala sokpí-o*

*(Tsia bhú Mlk. 13:14-23; di ne bhú Luk. 21:20-24.)*

<sup>15</sup> Yesu atsia apa matá pi omukpata gba e me: «Yi aú kpála u a'i e me <'Ngbé Siti bhulɔ nabhɔlɔ kuti>, inde li polofeta Danyelee apa nani engú gba e adu bhú tina 'ti na bubu inde bhú 'ngbé 'ti Ebhe gba omaYuda-o. A ayo me kpála inde atánga engú nani li Danyelee aye e bhomu-o kɔ mbolimboli ndjindji!† <sup>16</sup> Abhomu-o, obhende abháka o abhú Yudaya-a, a ayo me u kpe apí oeta. <sup>17</sup> Kpála bhende abháka e kilidjo-o, a ayo de me ani djidji matá lie ngú nanu nabha oehe inde abhú 'ti gba e de. <sup>18</sup> Kpála bhende abháka e abhiye-e, a ayo de me ani gie matá lie asidi ngú naha koti gba e

de. <sup>19</sup> A ko la mangua likabhu dho pi olisi inde adú ne ebhi di ne obhende adú a'o 'ka bhú 'bhe ongisi li 'kpí ang-o!

<sup>20</sup> Yi yo Ebhe me ekpí nakpe ka yi-e adú bhú nedhinga na zini di ne li 'kpí naguo gba omaYuda-a de. <sup>21</sup> Padhá de, anga a adú 'ngbé likabhu na ngbéngbé, inde li okpála u nga e de, nayie maka li Ebhe abho nani kokpí ne doto lie, nakolo pi mbia inde. Okpála ú la matá di galikpe ngua likabhu ang-o belegu de bini. <sup>22</sup> Ebhe amene me oekpí ang-o adú ngengele de. I dú me Ebhe gbételɔ oekpí ang-o de-e, kpála bini de kóbho de. La-a, ani agbételɔ oekpí ang-o kabula okpála bhende ani alo o-o. <sup>23</sup> Li nedhinga bhomu-o, li kpála bini pa pi yi me: <Yi tsitsia nga, Masiya si-i>, i du di-e me: <Ani abhe-e>, yi abhúka ani de. <sup>24</sup> Padhá de, anga omasiya na eu di ne opolofeta na eu azé bhelé. U améne ongú na ngbengbengbe di ongú na ngangamba ngubula napite okpála. Li angu uo kólo makolo-o, u de píte belegu okpála inde li Ebhe alo o ko. <sup>25</sup> Kaka-a, ma apa engú ang-o pi yi kalanu.

<sup>26</sup> A moko, i du me u nde apa pi yi me: <Yi tsitsia nga, Masiya abhú mili bili-e>, yi anú oo de. U pa di pi yi-e me: <Yi tsitsia, ani awo lie ki>, yi abhúka de. <sup>27</sup> Padhá de, anga maka li ekpí andjendjengene lie nayie andjongu nakolo akati-e, nago ka ma Ndili gba kpála-a adú bhadi moko. Ndu okpála hana au ne djila o. <sup>28</sup> A viti bini maka bili li kuo 'he nde lie me okpála nde mbila de-e, okpála ambila ka odhu inde azuzu kuo apékɔbhe bhadi bhúla o lie dede-o.»

*Yesu akpokpo lele nago ka e-o*  
*(Tsia bhú Mlk. 13:24-27; di ne bhú Luk. 21:25-28.)*

† 24:15 24:15 Tsia bhú Dan. 9:27, 11:31, 12:11.

29 Yesu atsia apa matá me: «Pita likabhu na oekpí bhomu-o, ma 'li ma me-e, bití abúku bhúla ela libhomu, epe sú matá-a de, oikupala abála kuto, lí oangu na abhúlá tsia dyíki má djigi djigi!†

30 Abhomu-o, ehe bini inde asúno me ngama Ndili gba kpála ma ngago-o akóto abhúlá. Ndu okpála hana píla doto libhomu adú bhú 'gbá. U tsia ú ma, ngama Ndili gba kpála me ma nde ngago pí ndindi abhúlá, ma nde abedhe ne angu la di ne sangu bedhe. 31 U adjé gili toti na kpekpeke nga. Ngama, Ndili gba kpála-a, ma tsia tíma oandjelu gba ma me u nu po bhúla okpála bhende lí Ebhe alo o ne ndu 'dje doto badha hana, nayie lí pápá bini, akólo makolo lí pápá koko.»

*Kpála bini mbíla nedhinga nago ka Ndili gba kpála-a de (Tsia bhú Mlk. 13:28-31; di ne bhú Luk. 21:29-33.)*

32 Yesu akpokpo matá gbitaku koko me: «Nago ka ma, Ndili gba kpála-a, adú maka engú inde asuno lie pí yí lí ndula na figi-o . Yí kə mbolimboli ndjindji. Padhá de, anga nedhinga lí 'ndji 'ndji aholo asú lie, lí okpákpá holo nakə-o, yí mbíla me gbokokpí akolo masikpe. 33 Kaka-a, nedhinga yí aú ndu ongú inde ma akpokpo e pí yí bhomu-o lie hana-a, yí mbíla ndjindji me nago ka ma, Ndili gba kpála akolo masikpe, me ma bha íbílí lí obhə bhotí gba yí-o. 34 Ma apa pí yí na paká me, ndu 'ngú inde ma akpokpo e pí yí píndji nago ka ma, Ndili gba kpála-a akódho 'kpí me okpála na naki inde-e nde mu nga ndu o hana de. 35 Kokpí ne doto akódho 'kpí makodho, engú bini, 'lí ma kódho 'kpí belegu de bini.

36 La-a, kpála bini mbíla ekpí di ne nedhinga nago ka ma Ndili gba kpála-a de, abana bha oandjelu inde

abhúlá, u mbíla de, abana bha ma Ndili-o, ma mbíla de. Kpála bini mbíla de, ambíla bha bini ne 'Dyi ma kpi e kpi. 37 Maka engú inde akodho nani 'kpí bhú nedhinga gba Nua-a, nago ka ma Ndili gba kpála adú bhadi moko. 38 Padhá de, anga bhú nedhinga bhomu-o, kala me engu-o si na eu eu-o, okpála adu mágito me engú ade. U adu nazu 'he, u atsia adu di nandji pandi. Obhosi ne olisi adu naha lío, u atsia adu di amba ongisi gba o na olisilisi bhú kava, akolo lí 'kpí inde lí Nua alí lie bhú 'ngbé zabu-o. 39 'To uo du 'to 'ngú bini de, akolo lí nedhinga inde lí engu asi lie, a atsia abha ndu uo hana má kpekəbhə! Nago ka ma, Ndili gba kpála-a adú bhadi moko.

40 Abhomu-o, í bhaka okpála bhisi abhiye-e, oandjelu gba Ebhe-e ahá bini, u tsia 'ó ká bhe koko-o. 41 Í bhaka olisi bhisi ngatu mapunga-a, oandjelu gba Ebhe-e ahá bini, u tsia 'ó ká bhe koko-o. 42 Yí lila líyi ndjindji, anga yí mbíla ekpí inde lí Ngámá gba yí-e agó lie de. 43 A ayo me yí mbíla ndjindji me, í dú me bhulu 'tí-e mbíla nedhinga inde lí bhulu 'zì agó lie sukpe uu-o, ani de dú bha bini lí zuku. Ani de 'ó de me bhulu 'zì gumu eti gba ní-e de. 44 Kaka-a, ngayi di-e, yí du bedhe, anga nedhinga yí nde lie bhú 'lì 'to-o, a la bhomu-o nedhinga inde lí ngama Ndili gba kpála ma agó lie-o.»

*Kpála na kulu inde ngbingbili inde di na imbilangu*

*(Tsia bhú Luk. 12:41-48.)*

45 Yesu atsia apa matá me: «Kpála na kulu inde ngbingbili inde di na imbilangu-o ngae dho? Yí tsitsia nga, a ko ngua kpála na kulu inde lí ngámá gba e a'o e pí 'ndji okpála na eti gba e me ani du naha ezú pí uo lí nedhinga ayo lie-o. 46 A ko djali pí kpála na kulu bhomu í du me ngámá gba ani-e nde ago, ani

† 24:29 24:29 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10.



bhaka me ani nde ngamemene mo-o. <sup>47</sup> Ma apa pi yi na paká me, ngámá a'ó ani pí 'ndji ndu 'he gba e hana. <sup>48</sup> Engú bini, i du me a nde kpála na kulu na sisiti-e, ani pá li bua e me: <Ha-a, ngámá gba ma nga bha ngabhue.> <sup>49</sup> Abhomu-o, ani hólo nabhi obi e koko na kulu-o, ani hólo nazu 'he, ani hólo nandji pandi ne omulangba. <sup>50</sup> Li ngámá gba kpála na kulu ango-o go li 'kpí ani djeke ani lie de, di li nedhinga inde ani mbila e de-e, <sup>51</sup> ani 'é ani bhú kulu, ani tsia méne ani kpekpeke maka li Ebhe améne galikpe obhulu kali lie li bili ani abú uo lie-o. Oo-o, u adú aku 'gbá, u tsia dú di nazu tate e-o.>

## 25

### *Gbitaku pindji otsalisi ndjikpa na kava*

<sup>1</sup> Abhomu-o, Yesu apa matá me: «Ekpí li ngama Ndili gba kpála ma agó lie, engú inde akódho 'kpí bhú Nau na abhúlá adú maka gbitaku inde: a adu nani otsalisi ndjikpa inde aha otala gba o ngú nanu nake lio ne bhoko inde adu akunda naha ele. <sup>2</sup> Bhú ká uo, obhe bhuluvue adu ongingi, obhe bhuluvue koko adu obhulu imbilangu. <sup>3</sup> Otsalisi bhe na ngingi-e aha otala gba o-o, la-a, 'to uo a'ili li naha otsupa 'mu koko dede. <sup>4</sup> Engú bini, obhe na imbilangu-o aha otala gba o bhú dabili bini ne otsupa 'mu koko dede. <sup>5</sup> Li bhoko-o go lie má gala de-e, ela aholo ndu uo hana, u atsia atuko ne ela.

<sup>6</sup> Tutu sukpe-e, tolo 'ue akoto: <Bhoko-o ki-e! Yi ze ngú nake liyi ne uo.> <sup>7</sup> Abhomu-o, ndu otsalisi-e hana azuku. U atsia aholo naleke otala gba o-o. <sup>8</sup> Otsalisi bhe na ngingi-e apa pi obhende na imbilangu-o me: <Yi ha mbo té emu gba yi-e pi ya, anga otala gba ya-a ngabulu.> <sup>9</sup> Obhe na imbilangu-o agie pi uo me: <A mo-o ade, anga bhe ka ya-a bhelé da nale li lele ní ne yi ade. Yi nu bhaka mangbo okpála i ngatsitsindji, amba yi kala pi yi ka

uo.> <sup>10</sup> Obhe na ngingi-e anu nakala emu-o. Engú bini, nedhinga u adu anu lie nakakala-a, bhoko-o akolo. Otsalisi bhuluvue inde adu bedhe ali ne ani bhú 'ti na anokomia-o. U atsia adula bhoti-o. <sup>11</sup> A abhue bedi, otsalisi bhe koko akolo. U atsia aholo nasusula me: <Ngámá, ngámá, bhulu bhoti-e pi ya!> <sup>12</sup> Engú bini, bhoko-o agie pi uo me: <Ma apa pi yi na paká me, ma mbila yi de.>»

<sup>13</sup> Yesu atsia abu tata-a me: «Yi lila liyi, anga yi mbila ekpí li ngama Ndili gba kpála ma agó lie de, yi mbila la di nedhinga ango-o de.»

### *Gbitaku pindji okpála na kulu bata*

*(Tsia bhú Luk. 19:11-27.)*

<sup>14</sup> Yesu apa matá me: «Ekpí li ngama Ndili gba kpála ma agó lie, engú inde akódho 'kpí bhú Nau na abhúlá adú maka gbitaku inde: a adu nani bhoko bini inde adu akunda nanu dhuku. Kala nanu ka ani-e, ani a'i okpála na kulu gba e-o. Ani atsia a'o tia gba e sakpa uo. <sup>15</sup> Ani aha pi bhe bini-e lí falanga kámá bhuluvue. Ani aha pi bhe koko lí falanga kámá bhisí. Ani atsia aha pi bhe koko lí falanga kámá bini. Ani aha pi kpála ne kpála li lele angu gba e. Pipita-a, ani atsia atapa. <sup>16</sup> Kpála na kulu bhe asia kámá bhuluvue-e, anu kolo nabe ndundu. Ani atsia asia di lí falanga koko pépé kámá bhuluvue. <sup>17</sup> Bhende asia kámá bhisí-e amene bhadi moko. Ani atsia asia di lí falanga koko pépé kámá bhisí. <sup>18</sup> Engú bini, bhende asia kámá bini-e anu bha naae nadji edú bhú doto. Ani atsia awo tia gba ngámá gba e bhúbhú.

<sup>19</sup> Pipita abhue naali, ngámá na kulu gba okpála bhomu-o ago. Ani atsia aholo nagama 'ngú ne uo pindji lele maka u amene kulu ne tia gba ni-e lie-o. <sup>20</sup> Bhe asia nako lí falanga kámá bhuluvue adyudyo lie. Ani agbe lí falanga kámá bhuluvue koko-o ne napa me: <Ngámá, mo oha nako muma lí falanga kámá bhuluvue. A inde-e lí falanga kámá

bhuluvue koko inde ma asia e pépé ko.> <sup>21</sup> Do ngámá gba ani pi ani me: <So! M̄ ne bádha kpála na kulu, m̄ la di ngbingbili. Mo omene nako ngbili 'ngú bhú ongú inde djedjedje, ma a'ó ibili m̄ me m̄ d̄ atsia 'kpí li ongú na ngbengbengbe. Go kpi djali bhú dabili bini ne ma.>

<sup>22</sup> Kpála na kulu bhende asia nako lí falanga kámá bhisi-e adyudyo di lie. Ani pi ngámá-a me: <Ngámá, mo oha nako m̄ma lí falanga kámá bhisi. A inde-e lí falanga kámá bhisi koko inde ma asia e pépé ko.> <sup>23</sup> Do ngámá gba ani pi ani me: <So! M̄ ne bádha kpála na kulu. M̄ la di ngbingbili. Mo omene nako ngbili 'ngú bhú ongú inde djedjedje, ma a'ó ibili m̄ me m̄ d̄ atsia 'kpí li ongú na ngbengbengbe. Go kpi djali bhú dabili bini ne ma.>

<sup>24</sup> Lí soso-o, kpála bhende asia nako lí falanga kámá bini-e ago di. Ani pi ngámá-a me: <Ngámá, ma ad̄ nako ambila ndjindji me m̄ ne kpála na gúgú. M̄ ngaha 'z̄u li bili inde m̄ lu 'z̄u li e de. M̄ ngaz̄u 'he li kulu inde li okpála koko andala lie ngao. <sup>25</sup> Ma adje tsul̄u m̄. Ma atsia an̄ awo tia gba m̄-o bhú doto. A la bhadi ii. Tia gba m̄-o ki.> <sup>26</sup> Engú bini, ngámá gba ani agie pi ani me: <M̄ ne siti kpála na kulu! M̄ di ne bhul̄u ipio! Ka ni mo od̄u nako ambila lie ndjindji me ma ngaha 'z̄u li bili inde ma alu 'z̄u lie de, me ma ngaz̄u 'he li kulu inde li okpála koko andala lie ngao, <sup>27</sup> m̄ tsia 'o nako tia gba ma-a bhú baki de ka ni, amba ma agó lie, ma de bhaka me a nde abe nd̄u e abe-e?>

<sup>28</sup> Yaka! Yí gb̄ul̄u lí falanga kámá bini bhom̄-o ka ani, amba yi ha pi kpála inde ka e kutu bini ko.>

<sup>29</sup> Ngámá bhom̄-o apa mo-o, anga kpála inde ka e ne ehe, u ahá matá koko pi ani pépé. Ani tsia dú bhú m̄ndeyi. Engú bini, kpála li ehe nde ka e beleḡu ade bini-e, u agb̄ul̄u beleḡu dheḡu bhende i ti da nad̄u ka ani-o. <sup>30</sup> Ngámá-a atsia abu 'so

'ngú gba siti kpála na kulu bhom̄-o ne napa me, u bhike ani bhú biti akilidjo li bili inde li okpála nde lie bhú 'gbá di ne naz̄u tate o-o.>

*Yesu akpokpo lele maka ani akódho 'ngú gba okpála lie-o*

<sup>31</sup> Yesu atsia apa matá me: «Ekpí li ngama Ndili gba kpála ma agó lie bhú sangu gba ma bhú dabili bini ne oandjelu hana-a, ma adú pí kiti na ngámá gba ma na sangu-o. <sup>32</sup> Nd̄u okpála na píla doto hana apó bhúla o kala ma. Ma tsia gbógbo bh̄us̄u uo maka li m̄lila agbogbo bh̄us̄u okand̄el̄e lie ne omeme-o. <sup>33</sup> Ma a'ó okand̄el̄e li pá 'kpa ma na kokpa, ma tsia ó omeme-e li pá 'kpa ma na gali.

<sup>34</sup> Abhom̄-o, ma tsia pá pi obhende adú li pá 'kpa ma na kokpa-a me: <Yi gógo, ngayi okpála asia bisagu ka 'Dȳi ma-o. Yi go sia ngámá inde li ani aleke nani e pi yi nayie li nedhinga ani abho kokpí ne doto lie ko. <sup>35</sup> Padhá de, anga ma adje gum̄u, yi atsia aha ez̄u m̄ma. Ma ad̄u adje gum̄u 'ngu, yi atsia aha engu nandji mandji m̄ma. Ma ad̄u ne gomago, yi atsia asia ma agba yi. <sup>36</sup> Ma ad̄u ndumbu, yi atsia ato bongo li ma. A ad̄u li ma ne kuo, yi atsia ateteke ma. Ma ad̄u bhú tikp̄u, yi atsia ago natsia ma.>

<sup>37</sup> Abhom̄-o, obhende amene muk̄unda gba Ebhe-e tsia yí ma me: <Ngámá, ya au m̄ ne gum̄u nadho, ya atsia aha 'z̄u pi m̄-o? Ya au m̄ ne gum̄u 'ngu nadho, ya atsia aha engu nandji mandji pi m̄-o?>

<sup>38</sup> Ya au m̄ me m̄ nde ne gomago nadho, ya atsia asia m̄ agba ya-a? Ya au m̄ ndumbu nadho, ya atsia ato bongo li m̄-o? <sup>39</sup> Ya au m̄ ne kuo, i d̄u di-e me m̄ nde bhú tikp̄u nadho, ya atsia an̄ ateteke m̄-o?>

<sup>40</sup> Ma tsia gíe pi uo me: <Ma apa pi yi na paká me, nd̄u nedhinga hana inde yi amene bádha 'ngú lie pi s̄uka ondaise ma inde li okpála ngau o padhá inde-e, yi amene bhom̄-o m̄ma.>

<sup>41</sup> Abhomu-o, ma tsia pá di pí obhende adú li pá 'kpa ma na gali-e me: <Yi yie sí yiyie, yi gbida de ma tsutsu, ngayi okpála li Ebhe atụ pøjə lio-o! Yi nū bhú djua na dūduma inde li Ebhe aleke nani e pí djabulu ne omaha e-o! <sup>42</sup> Padhá de, anga ma adu adje gumu, yi tsia ha 'zu muma de. Ma adu adje gumu 'ngu, yi tsia ha engu nandji mandji muma de. <sup>43</sup> Ma adu ne gomago, yi tsia sia ma agba yi de. Ma adu ndumbu, yi tsia to bongo li ma de. Ma adu ne kuo di ne bhú tikpu, yi tsia go nateteke ma de.>

<sup>44</sup> Abhomu-o, u tsia yí di ma me: <Ngámá, ya au mu nadho me mu nde ne gumu, i du di-e gumu 'ngu-o? Ya au mu nadho me mu nde ne gomago, mu nde ndumbu, i du di-e me mu nde ne kuo, i du di-e me mu nde bhú tikpu-o, ya tsia nu teteke mu di-e?> <sup>45</sup> Ma tsia gie pí uo me: <Ma apa pí yi na paká me, ndu nedhinga hana yi mene bádha 'ngú lie pí suka ondaise ma inde li okpála ngau o padhá inde-e de-e, yi mbila me yi aneke di namemene bhomu-o muma.> <sup>46</sup> Abhomu-o, obhende i mene mukunda gba Ebhe-e de-e, gbida nazu likabhu na dūduma. Engú bini, obhende amene mukunda gba Ebhe-e, tsia gbida naao bhú mukobho na dūduma.>

## 26

*Ongámási gba omaYuda agili kpadji ngú nabhəle Yesu*

*(Tsia bhú Mlk. 14:1-2; ne bhú Luk. 22:1-2; di ne bhú Dja. 11:45-53.)*

<sup>1</sup> Li Yesu andjia nakpo ongu bhomu-o lie hana-a, ani atsia apa pí omukpata gba e me: <sup>2</sup> «Yi mbila hana me pita 'kpí bhisi-e, adú anokomia na Pasika . Li 'kpí angoo, u apú ma Ndili gba kpála ngubula me u gi ma li kulusi.»

<sup>3</sup> Yesu adu akpo 'ngú bhomu-o pí omukpata gba e lie, abhaka me ongbengbe odimandə ne obhelesi

okpála gba omaYuda nde apo bhúla o agba bhele kpála gba odimandə , u a'i e me Kaifa. <sup>4</sup> U atsia aziba lio ngubula naholo Yesu bhú pepe, amba o bhələ ani. <sup>5</sup> Engú bini, u adu apa me: «A ayo de me ní holo ani bhú nedhinga na anokomia de, anga li okpála gbe tolo.»

*Əle bini atuko mungotsi pí 'ndji Yesu*

*(Tsia bhú Mlk. 14:3-9; di ne bhú Dja. 12:1-8.)*

<sup>6</sup> Ekpí bini, Yesu ne omukpata gba e adu bhú kuti na Betania, abhú 'ti gba Simo nani li kába amene e-o. <sup>7</sup> Nedhinga u adu azu 'he lie, əle bini ago de ani ne gili inde u abho e li alabatele.\* Gili angoo adu me a nde abedhe ne mungotsi na kpéke mase bedhe. Ani atsia atuko mungotsi angoo pí 'ndji Yesu. <sup>8</sup> Li omukpata gba ani-e au lie mo-o, u ake 'ngú lio, u atsia apa me: «Ta nasiti mungotsi inde-e padhá me-e ne ni? <sup>9</sup> U ti igini da natsitsindji bhú kpéke mase, u tsia há tia angoo pí obhulu ndibhili.» <sup>10</sup> Li Yesu ambila engú u adu apa e lie, ani atsia apa pí uo me: «Yi ngato mbolo li əle inde-e ka ni? Engú inde ani amene e li pabili gba ma-a, a ko bádha 'ngú. <sup>11</sup> Padhá de, anga obhulu ndibhili-e, yi adú ne uo ndu nedhinga hana. Engú bini, ngama-a, ní dú ne yi ndu 'kpí hana de. <sup>12</sup> Ani atuko mungotsi inde li kute ma, ngubula naleleke ngú ekpí inde u azí ma lie ko. <sup>13</sup> Ma apa pí yi na paká me, píla doto libhomu, ndu bili hana inde u akpókpo Bádha Ngali gba Ebhe-e lie, u akpókpo di engú inde li əle inde-e amene e ngú nabhundja ani.»

*Yuda adje lie ne ongámási gba omaYuda ngú napu*

*Yesu pí uo*

*(Tsia bhú Mlk. 14:10-11; di ne bhú Luk. 22:3-6.)*

<sup>14</sup> Abhomu-o, suka omukpata ndjikpa ne ká bhisi anu nabhaka

\* **26:7** 26:7 Alabatele: A ko teme na mase naali inde u abhobho oehe maka gili lie ko.

ongbengbe odimandø. A adu 'li mukpata ango-o me Yuda Isikaliote. <sup>15</sup> Aní atsia apa pi uo me: «Yi akunda naha muma ni, amba ma pu Yesu pi yi-e?» Abhomu-o, u adje lio ne uo li mase-o. Ongbengbe odimandø atanga lí falanga ndjikpa bata,<sup>†</sup> u atsia aha pi ani. <sup>16</sup> Nayie bhú nedhinga bhomu-o, Yuda adu nagili nedhinga na ndjindji ngubula napu Yesu pi uo me u bhølo ani.

*Yesu atima omukpata gba e naleke da anokomia na Pasika*  
(Tsia bhú Mlk. 14:12-21; ne bhú Luk. 22:7-14, 21-23; di ne bhú Dja. 13:21-30.)

<sup>17</sup> Lí 'kpí na kalanu na anokomia nazu mapa inde li levile nde bhú e ade-e, omukpata gba Yesu ago nayi ani me: «Mo okunda me ya leke dá Pasika pi mu su?» <sup>18</sup> Yesu agie pi uo me: «Yi nu abhu gudhu, agba kpála bini me, amba yi pa pi ani me: «Musuno apa me, nedhinga gba ni-e akolo masikpe. Ngani ne omukpata gba ni-e, o ozú anokomia agba mu.»» <sup>19</sup> Omukpata amene maka Yesu apa lie pi uo-o. Abhomu-o, u atsia anu aleke da anokomia-o.

*Yesu apa me suka omukpata gba ni bini apu ni*

<sup>20</sup> Lí akolo lie tagolo-o, Yesu ne omukpata gba e ndjikpa ne ká bhisi-e aholo nazu 'he. <sup>21</sup> Nedhinga uo adu azu 'he lie, do Yesu de-e: «Ma apa pi yi na paká me, suka yi bini apu ma.» <sup>22</sup> Omukpata-a asia likabhu naali. Abhomu-o, kpála ne kpála aholo nayi ani me: «Ngamá, a adu bha ndju ma?» <sup>23</sup> Aní agie pi uo me: «Kpála inde ya ngato 'kpa ya ne e bhú saani bini-e, kpála ango-o apu ma ngae. <sup>24</sup> Ngama Ndili gba kpála, ma adji akpi maka u aye 'ngú gba ma lie-o. Engú bini, a ko likabhu pi kpála inde ngapu ma-o! A nani pi kpála ango-o ndjindji me u azú ani de!» <sup>25</sup> Abhomu-o, Yuda, kpála inde

apu ani atsia ayi me: «Musuno, a adu bha ndju ma?» Yesu atsia agie pi ani me: «Mo opa ngamu!»

*Yesu agapa mapa ne vino li omukpata gba e ndjikpa ne ká bhisi-o*

(Tsia bhú Mlk. 14:22-26; ne bhú Luk. 22:14-20; di ne bhú 1 Kol. 11:23-25.)

<sup>26</sup> Nedhinga u adu azu 'he lie, Yesu aha mapa-o. Aní agie heni pi Ebhe, ani agumu bhusu bhusu, ani atsia aha pi omukpata gba e ne napa me: «Yi zuzu, a inde-e kute ma.» <sup>27</sup> Pipita-a, ani aha kopo na vino-o, ani agie heni pi Ebhe, ani atsia aha pi uo ne napa me: «Yi ndji ndu yi hana, <sup>28</sup> anga a inde-e ngute ma. A ko ngute inde ngasuno me Ebhe akodho gandja ne okpála-o. Ngute ango-o atuko ngu na'e osisiti 'ngu gba okpála bhelé. <sup>29</sup> Ma apa pi yi me: Nayie pi mbia inde-e, ma ndji mata vino belegu de bini, akolo li 'kpi inde ma andji lie ne toto bhú dabili bini ne yi bhú Nau gba 'Dyi ma-o.» <sup>30</sup> Pipita-a, u ali etsi na anokomia-o. U aze, u atsia agbida api eta na ondula na Olive.

*Yesu apa me Piele apa me ni mbila ni de*

(Tsia bhú Mlk. 14:27-31; ne bhú Luk. 22:31-34; di ne bhú Dja. 13:36-38.)

<sup>31</sup> Abhomu-o, Yesu atsia apa pi omukpata gba e me: «Sukpe na naki inde-e, ndu yi hana a'ó ká ma. Padhá de, anga Ebhe apa bhú Bhuku gba e me:

«Ma abhelø mulila gba okandølo-o, li okandølo-o tsambala ne bili ngangá.»<sup>†</sup>

<sup>32</sup> Engú bini, ngama-a, ekpi ma azuku lie, ma anu adjeke yi abhu Galilaya.» <sup>33</sup> Piele atsia apa pi ani me: «Abana li ndu okpála hana 'o ká mu-o, ngama-a, ma 'ó ká mu belegu de bini.» <sup>34</sup> Abhomu-o, Yesu atsia agie pi ani me: «Ma apa pi mu

<sup>†</sup> 26:15 26:15 Lí falanga ndjikpa bata: A ko nani tia bhelé de, ati di nani da nakala bali bini de. Tsia bhú Eki. 21:32, di ne bhú Djkl. 11:12. <sup>†</sup> 26:31 26:31 Tsia bhú Djkl. 13:7.

na paká me, sukpe na naki inde-e, kala me engu ku 'gbá-a, mo opá bhùtsibhùtsi bata me ni mbila ma de.»<sup>35</sup> Piele atsia apa matá pi ani me: «Abana i du bha me a nde ayo me ní kpi bhú dabili bini ne mu-o, ma 'ó ká mu de.» Abhomu-o, ndu omukpata koko hana atsia apa bhadi moko.

*Yesu ayo Ebhe bhú Getesemani*  
(*Tsia bhú Mlk. 14:32-42; di ne bhú Luk. 22:39-46.*)

<sup>36</sup> Abhomu-o, Yesu akolo ne omukpata gba e li bili bini inde u a'i e me Getesemani. Ani atsia apa pi uo me: «Yi dula si nedhinga ma adjí lie nayo Ebhe aoo ko.»<sup>37</sup> Ani aha Piele ne ongisi bhisi gba Djebedayo-o. Ani anu ne uo bhú dabili bini. Tsulu aholo ani, likabhu atsia abedhe di li bua ani bedhe.<sup>38</sup> Abhomu-o, ani atsia apa pi uo me: «Bua ma abedhe ne likabhu bedhe ka ma adjí akpi lie-o. Yi dula si, yi du la di ne ma li zuku bhú dabili bini.»

<sup>39</sup> Pipita-a, ani adyudyo mbo lie tsutsu bedi. Ani atutu lipuku e kuto, ani atu bhula e pi doto, ani atsia ayo Ebhe me: «'Dyi ma, i du ndjindji-e, mu de dyudyo likabhu inde-e de ma tsutsu! Engu la bini, mo omene maka ma akunda lie de, mene mangbo maka mo okunda lie ko!»<sup>40</sup> Ani agie lie li bili li omukpata bata adu lie-o. Ani abhaka me u nde atuko ne 'la má dhululu! Do ani pi Piele de-e: «Yi ti igini da nadu li zuku ngabha ne ma ngubula saa bini di?»<sup>41</sup> Yi du li zuku, yi yo Ebhe, amba yi alí bhú nale de. Bua kpála bedhe ndu 'kpi hana ngu namene badha 'ngu, engu bini, kute ani bhubhuku.»

<sup>42</sup> Matá bhùtsibhùtsi na bhisi-e, ani adyudyo lie de omukpata bata-a tsutsu. Ani atsia ayo Ebhe me: «'Dyi ma, i du me likabhu inde-e nde ti da naneke ma de-e, a nde ayo bha me a kolo li ma-a, a ayo me engu mo okunda e mene lie ngae!»

<sup>43</sup> Abhomu-o, Yesu agie matá lie li bili li omukpata-a adu lie-o. Ani

abhaka me u nde tila. Padhá de, anga djila uo adu me a nde ne ela má yikpokpo!<sup>44</sup> Ani a'o ká uo, ani adyudyo matá lie de uo tsutsu. Ani atsia ayo Ebhe bhùtsibhùtsi na bata ne napa bha oeli bini bhomu-o.

<sup>45</sup> Abhomu-o, ani ago abhaka omukpata gba e bata-o, ani atsia apa pi uo me: «A ndjindji! Yi la nga lala, amba yi guo! La-a, nedhinga akolo, nedhinga inde u apu ma, Ndili gba kpála lie pi osisiti okpála-o.»<sup>46</sup> Yi tsitsia nga, kpála inde apu ma akolo. Yi yie bhulá, ní nu bhaka uo!»

*U aholo Yesu*  
(*Tsia bhú Mlk. 14:43-50; ne bhú Luk. 22:47-53; di ne bhú Dja. 18:3-12.*)

<sup>47</sup> Bha li nedhinga li Yesu adu agama 'ngu lie, me-e, Yuda, saka omukpata ndjikpa ne ká bhisi-e akolo. Ani ago nani ne bhiti okpála inde adu sa 'kpa o ne ombotia di ne ondula. A atima nani uo ne ongbengbe odimandø di ne obhelesi okpála gba omaYuda.<sup>48</sup> Yuda adje nani lie ne uo kalanu me: «Kpála inde ma akáma e, a ko ani. Yi holo ani!»<sup>49</sup> Me-e, ani adyudyo lie de Yesu, ani atsia ayi ani me: «Musuno, mu oo!» Ani atsia akama ani.<sup>50</sup> Yesu atsia apa pi ani me: «Olia ma, engu inde mo ogo namene e, memene!» Abhomu-o, okpála koko inde ago bhú dabili bini ne Yuda-a, adyudyo lio de Yesu, u abu 'kpa o li ani, u atsia aholo ani.

<sup>51</sup> Kolo me-e, saka okpála inde adu bhú dabili bini ne Yesu-o agbe mbotia gba e, ani asu kpála na kulu gba bhele kpála gba odimandø-o ne nakodho 'dje ani má tse!<sup>52</sup> Yesu atsia apa pi ani me: «Gie mbotia gba mu-o bhú 'ti e. Padhá de, anga ndu okpála hana inde ngagu 'gu ne mbotia-a, amú bhadi li mbotia.»<sup>53</sup> Mu mbila de me ma ti igini da nayo ka 'Dyi ma me ani go teteke ma-a di? Ma yo ka ani-e, ani kolo tíma libi oandjelu muma nane ndjikpa ne ká bhisi mane.<sup>54</sup> I du la

mo-o, engú inde u aye e bhú Bhuku gba Ebhe-e améne lie lele pi? Padhá de, anga Bhuku gba Ebhe-e apa me, a ayo me engú inde ngamene lie inde-e, amene lie moko.»

<sup>55</sup> Abhomu-o, Yesu atsia apa pi kambi okpála bhomu-o me: «Ndu 'kpí hana ma adu nako nadu bhú 'ngbé 'ti Ebhe gba omaYuda ngu nasuno. La-a, yi holo nako ma de. Ka ni yi ngago lie ngu ma ne ombotia di ne ondula sa 'kpa yi mugito me ma ne siti bhulu 'zi-e? <sup>56</sup> Engú bini, ndu 'ngú bhomu-o hana amene lie ngubula me engú inde li opolofeta aye e amene lie.» Abhomu-o, ndu omakpata hana atsambala de ani má mæ, u atsia agbida!

*U anu ne Yesu kala Libi okpála natsia 'kpí li 'ngú gba omaYuda*

*(Tsia bhú Mlk. 14:53-65; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>57</sup> Abhomu-o, okpála inde u atima nani o ngu naholo Yesu-o anu ne ani kala Kaifa, bhele kpála gba odimandø-o, li bili inde li omusuno na líli gba Moidje ne obhelesi okpála apøkøbhø bhúla o lie-o. <sup>58</sup> Piele atsia adu naae nakpata Yesu mbo tsutsu, nakolo makolo bhú mbadhasu gba bhele kpála gba odimandø-o. Ani ali bhú mbadhasu-o, ani atsia adu kuto bhú ká okpála na kulu ngubula natsia me engú ango-o abú 'ta e lele pi-ie.

<sup>59</sup> Abhomu-o, ongbengbe odimandø bhú dabili bini ne ndu okpála koko na Libi okpála natsia 'kpí li 'ngú gba omaYuda libhomu adu agili kpála inde agó napa 'ngú li Yesu sisiti, abana i du eu, amba o kodho 'ngú gba ani-e me ani kpi bha makpi. <sup>60</sup> Engú bini, belegu li bhiti okpála adu apa 'ngú li Yesu lie ne eu-o, u u kpála bini de inde apa engú inde u ti da nabhele ani ka e. Li soso-o, okpála bhisi adyudyo

lio masakpe. <sup>61</sup> U atsia apa me: «Bhoko inde-e apa nako me, <ni ti da nabhele 'ngbé 'ti Ebhe gba omaYuda-o, ni tsia yíki matá ne toto sunda ekpi bata.»»

<sup>62</sup> Abhomu-o, 'ngbé dimandø-o ayie bhúla, ani atsia ayi Yesu me: «Mu gie 'ngú li 'ngú inde li okpála inde-e ngapa e li kute mu-o belegu de bini?» <sup>63</sup> Engú bini, Yesu andjili bha má bulu! Abhomu-o, bhele kpála gba odimandø-o atsia ayi matá ani me: «Ma ngayi mu ne 'li Ebhe inde uu-o me pa nga pi ya: ngamu-o, mu ne Masiya, Ndili gba Ebhe-e?» <sup>64</sup> Yesu agie pi ani me: «Mo opa ngamu. Mbila la me, nayie pi mbia inde-e, yi aú Ndili gba kpála adu li pápá na kokpa gba Angbamili me ani nde ngago pi ndindi na abhúla.†»

<sup>65</sup> Engú bhomu-o ake li bua bhele kpála gba odimandø-o naali. Abhomu-o, ani asidha bongo li e má tsue! Ani atsia apa me: «Ani asobho Ebhe, anga kpála-kuti ti da nakpo 'ndji e ne Ebhe de! Ní matá ne gumu okpála koko ngu nakpokpo 'ngú gba ani-e ade! Yi adje sobho ani asobho Ebhe ne e ne 'dje yi makpe. <sup>66</sup> Yi abhundja naayi me ní mene ngu ani pi?» U agie me: «A ayo me u bhøle ani mabhøle.» <sup>67</sup> Abhomu-o, u aholo akuku ngusu bhúla ani, u adu asu ani, u atsia adu di abhi bhúla ani. <sup>68</sup> U atsia adu apa pi ani me: «I du me mu nde bha ndju ne Masiya na paká-a, pa nga pi ya me asu mu da?»

*Piele apa me ni mbila Yesu de*

*(Tsia bhú Mlk. 14:66-72; ne bhú Luk. 22:56-62; di ne bhú Dja. 18:15-18, 25-27.)*

<sup>69</sup> Nedhinga u adu ato mbolo li Yesu lie, abhaka me Piele nde adu kilidjo tu mbadhasu gba bhele kpála gba odimandø-o. Kpála bini na kulu na øle adyudyo lie de ani. Ani atsia apa pi ani me: «Ngamu di-e, mo odu nako bhú dabili bini ne Yesu, kpála na Galilaya-o.» <sup>70</sup> Engú

† 26:64 26:64 Tsia bhú Ets. 110:1; di ne bhú Dan. 7:13.

bini, Piele ayala kala ndu okpála hana me: «Ma mbila engú inde mu ngakunda napa e de.» <sup>71</sup> Abhomu-o, Piele adyudyo lie de 'bhø aga-o. Kpála na kulu koko bini na øøø au ani. Ani atsia apa pi okpála inde adu oo me: «Kpála inde-e adu nako bhú dabili bini ne Yesu, kpála na Nadjaleta-o.» <sup>72</sup> Piele ayala matá, ani atsia apa me: «Ne 'li Ebhe, ma mbila kpála inde yi ngapa 'ngú gba e bhomu-o de!»

<sup>73</sup> Pipita kolo me-e, okpála inde adu oo adyudyo lio, u atsia apa pi Piele me: «A ko kukulu 'ngú. Ngamu di-e, mu bha ne saka uo, anga nagama 'ngú gba mu-o ngambamba ta mu ngae.» <sup>74</sup> Abhomu-o, Piele aholo natu silika ne nasima me: «Ne 'li Ebhe, ma mbila kpála bhomu-o de!» Bha li nedhinga bhomu-o, engu atsia aku 'gbá. <sup>75</sup> Abhomu-o, Piele abhundja eli inde li Yesu apa igini e pi ani me: «Kala me engu ku 'gbá-a, mo opa bhutsibhutsi bata me ni mbila ma de.» Ani akoto kilidjo, ani atsia abhøø kuo e ne egbá má kusu!

## 27

*U anu ne Yesu kala Pilatø  
(Tsia bhú Mlk. 15:1; ne bhú Luk. 23:1-2; di ne bhú Dja. 18:28-32.)*

<sup>1</sup> Køkpí má bhø, ndu ongbengbe odimandø hana di ne obhelesi okpála gba omaYuda adje lio me o méne lele pi me o bhøø Yesu-o. <sup>2</sup> U agbigbite ani, u anu ne ani, u atsia aha ani pi guvelenele Pilatø.

*Yuda agi ngulu e  
(Tsia bhú Kul. 1:18-19.)*

<sup>3</sup> Abhomu-o, Yuda, kpála inde apu Yesu-o au lie me u akodho 'ngú gba ani-e me ani kpi bha makpi-e, ani adje likabhu li bua e naali. Ani atsia anu nagie lí falanga ndjikpa bata-a pi ongbengbe odimandø di ne obhelesi okpála. <sup>4</sup> Do ani pi uo de-e: «Ma amene siti 'ngú, anga ma apu kpála inde i tu 'ngú de-e pi yi me u bhøø ani!» Engú bini, u agie

pi ani me: «Naaya bhúbhú ne ni? A ko naamu 'ngú!» <sup>5</sup> Abhomu-o, Yuda abala lí falanga kuto bhú 'ngbé 'ti Ebhe gba omaYuda ne nakoto bini. Ani atsia anu nagi ngulu e. <sup>6</sup> Ongbengbe odimandø-o aha tia-o. U atsia apa me: «Lili gba ní-e ziba de me ní 'o tia inde-e bhú ká tia na 'ngbé 'ti Ebhe gba omaYuda-a de, anga a ko tia inde u asia e li ngute kpála.» <sup>7</sup> Pita u adje lio lie, u atsia akala ne tia bhomu-o edyi gba kpála bini inde apopo lusa ngubula me u du azi ogomago bhúbhú. <sup>8</sup> Kaka-a, u nga'i 'li edyi ango-o nakolo pi naki me: «Edyi inde u akala e ne tia na ngute kpála.» <sup>9</sup> Abhomu-o, engú nani li polofeta Djelemi apa e atsia amene lie. Ani apa nani me: «U aha lí falanga ndjikpa bata-o.

A bhomu-o mase inde li omafsalaele ato e li ani-o. † <sup>10</sup> U atsia akala ne di edyi gba bhulu napo lusa.

A bhomu-o engú inde li Ebhe Ngámá aha nani lili mu ma me ma pa e pi uo-o.»

*U akodho 'ngú gba Yesu-o me ani kpi bha makpi*

*(Tsia bhú Mlk. 15:2-5; ne bhú Luk. 23:3-5; di ne bhú Dja. 18:33-38.)*

<sup>11</sup> Nedhinga u akolo ne Yesu lie kala guvelenele Pilatø-o, ani ayi ani me: «Ngamu-o, mu ne 'ngbé ngámá gba omaYuda-a?» Yesu agie me: «Mo opa ngamu.» <sup>12</sup> Abhomu-o, ongbengbe odimandø di ne obhelesi okpála gba omaYuda adu apa 'ngú li ani sisiti. La-a, ani gie 'ngú tété de. <sup>13</sup> Pilatø atsia ayi ani me: «Mu dje engú inde u ngapa e li kute mu bhomu-o di?» <sup>14</sup> Engú bini, Yesu gie engú bini pi ani tété de. Abhomu-o, Pilatø atsia angamba naali.

<sup>15</sup> Bhú ndu Pasika hana, guvelenele du nani natse 'kpa li bhulu 'kpú bini, bhende li bhiti okpála adu akunda me ani tse 'kpa lie-o. <sup>16</sup> A abhaka me 'ngbé bhulu 'kpú bini inde adu 'li e me Balabasi nde bhú

† 27:9 27:9 Tsia bhú Djkl. 11:12-13.

tikpɔ. <sup>17</sup> Pilatɔ atsia ayi bhiti okpála inde apo bhúla o me: «Yi akúnda me ma tse 'kpa li da pi yi-e? Ne me ma tse 'kpa li Yesu Balabasi, ne me ma tse 'kpa li Yesu inde u a'i e me Masiya-a?» <sup>18</sup> Pilatɔ yi mo-o padhá de. Aní ayi mo-o, anga aní adu ambila ndjindji me u apu Yesu pi ni anga u adu adje siti bua li aní.

<sup>19</sup> Nedhinga li Pilatɔ adu lie pí kiti nakodho 'ngú-o, wala aní atima kpála bini pi aní ne tobhila me: «Mo olí bhú 'ngú gba ngbili kpála bhomu-o de, anga sukpe na naki inde-e, ma aloto siti loto li 'ngú gba aní-o.»

<sup>20</sup> Ongbengbe odimandɔ, di ne obhelesi okpála gba omaYuda ato bhú 'ndji bhiti okpála me u yo ka Pilatɔ me aní tse 'kpa li Balabasi, amba aní ka kpadji me u bhɔlɔ Yesu. Okpála atsia amene bhadi moko. <sup>21</sup> Pilatɔ atsia apa pi uo me: «Ma atsé 'kpa li bhulu 'kpú bini pi yi matse. Bhú ká Yesu ne Balabasi-e, yi akúnda me ma tse 'kpa li da pi yi-e?» U agie me: «Balabasi!» <sup>22</sup> Pilatɔ ayi uo me: «Ma mene la ngú Yesu inde u a'i e me Masiya pi?» Do uo de: «Gi aní li kulusi!» <sup>23</sup> Pilatɔ atsia ayi uo me: «Aní amene la mangua siti 'ngú dho?» Engú bini, u atsia adu asusula matá kpekpeke me: «Gi aní li kulusi!» <sup>24</sup> Li Pilatɔ au lie me angu ni kolo de-e, di ne me tolo ngakolo kpekpeke-e, aní aha engu, aní atsia avulu 'kpa e kala bhiti okpála ne napa me: «Ngama-a, ma bhú ta nakpi gba kpála inde-e ade! A ko naayi 'ngú.» <sup>25</sup> Ndu okpála hana agie me: «A ayo me ngute aní tuko pí 'ndji ya ne ongisi gba ya-o!» <sup>26</sup> Abhomu-o, aní atse 'kpa li Balabasi pi uo. Aní aha líli me u bhi Yesu ne fimbo. Aní atsia aha aní pi uo me u gi aní li kulusi.

*Osudha amu Yesu  
(Tsia bhú Mlk. 15:16-20; di ne bhú  
Dja. 19:2-3.)*

† 27:35 27:35 Tsia bhú Ets. 22:19.

<sup>27</sup> Abhomu-o, osudha gba guvelenele anu ne Yesu bhú mbadhasu gba o dengo 'ti gba guvelenele-o. Ndu osudha hana atsia apo bhúla o de aní. <sup>28</sup> U agbe bongo li aní, u atsia ato koti na mbembe li aní mugito me a ko ngámá. <sup>29</sup> U agala 'he na kilikili li kute yá ndula na eti, u atsia ato bhú 'ndji aní. U ato mbamba sa 'kpa aní na kokpa, u atsia atutu lipaku o kuto kala aní. U adu amu aní ne napa me: «'Ngbé ngámá gba omaYuda, mu oo!» <sup>30</sup> U adu aku ngusu li aní, u aha mbamba-a, u atsia adu asu 'ndji aní ne di. <sup>31</sup> U andjia namu aní lie, u agbe koti u de ato e li aní-o, u atsia ato matá bongo gba aní-e li aní. Pipita-a, u atsia anu ne aní ngú nagi aní li kulusi.

*Osudha agi Yesu li kulusi  
(Tsia bhú Mlk. 15:21-32; ne bhú  
Luk. 23:26-43; di ne bhú Dja. 19:17-  
27.)*

<sup>32</sup> Osudha akoto ne Yesu bhú gudhu-o. U adu akoto lie, u akɔ lío ne kpála bini na kuti na Silene, adu 'li aní me Simo. Osudha aholo aní ne kpéke me aní bi kulusi gba Yesu-o. <sup>33</sup> Li u akolo lie li bili inde u a'i e me Gologota-a, inde akúnda napa me «Bili na pelege 'ndji-e», <sup>34</sup> osudha aha vino inde u amata e ne 'he na susu-o pi aní. Aní ale lie, aní tsia kunda nandjindji de.

<sup>35</sup> Osudha-a agi Yesu li kulusi. Pita u agi aní lie li kulusi-e, u agu gbanda ngú obongo gba aní-o. U atsia agbogbo bhusu o tété.† <sup>36</sup> Pipita-a, u atsia adulu kuto oo ngú nalila aní. <sup>37</sup> U a'o nani abhúlá pí 'ndji aní balua inde asuno ta nagi aní li kulusi-o. U aye nani balua ango-o me: «A INDE-E YESU, 'NGBÉ NGÁMÁ GBA OMAYUDA-O.» <sup>38</sup> U atsia agi osisiti obhulu 'zi bhisi li okulusi de aní: bini li kulusi gba e li pá 'kpa aní na kokpa, koko li kulusi gba e li pá 'kpa aní na gali.

<sup>39</sup> Okpála inde adu akodho 'kpí-e, adu asobho Yesu ne nako 'ndji o.

<sup>40</sup> U adu apa pi aní me: «Ngamu,



bhulɔ nagugumɔ 'ngbé 'ti Ebhe gba omaYuda ne nayiyiki bhú 'kpí bata-a, kobho limɔ ngamɔ makpe! I dɔ me mɔ nde ne ndili gba Ebhe-e, kɔ li kulusi-e kuto.»

<sup>41</sup> Ongbengbe odimandɔ, omɔsuno na líli gba Moidje bhú dabilí bini ne obhelesi okpála, adɔ bhadi amɔ aní moko. U adɔ apa me: <sup>42</sup> «Aní akobho okpála koko. Ka ní aní tí da nakobho lie lie ngae makpe di-e, ngaani inde 'ngbé ngámá gba omaɓsala-e-e? Aní kɔ nga kuto li kulusi mbia inde, amba ya bhuka aní! <sup>43</sup> Aní a'o nabhuka gba e bhú Ebhe. A ayo me Ebhe kobho aní mbia inde, i dɔ me Ebhe nde akúnda aní na paká-o, anga aní apa me ní ne Ndili gba Ebhe!» <sup>44</sup> Abana osisiti obhulɔ 'zi inde u agí o li kulusi língo Yesu-o, u adɔ bhadi asobho aní moko.

*Yesu andala 'kpa li bua e*  
(*Tsia bhú Mlk. 15:33-41; ne bhú Luk. 23:44-49; di ne bhú Dja. 19:28-30.*)

<sup>45</sup> Abhomɔ-o, nayie tulukpe akolo bhú saa na bata píta tulukpe-e, bití agba píla doto libhomu. <sup>46</sup> Bhú saa na bata píta tulukpe-e, Yesu asúla kpekpeke me: «Eli, Eli, lema sabakatani?» A akúnda napa me: «Ebhe gba ma, Ebhe gba ma, mo o'o ka ma ka ní?»† <sup>47</sup> Bini bini bhú ká okpála inde adɔ oo adje aní lie, u atsia adɔ apa me: «Aní nga'i Eliya!» <sup>48</sup> Ma 'li ma-e, sùka osudha-a agu holo. Aní anɔ aha epondje, aní ato bhú kpongadha pandi. Aní atsia ato li 'ndjì mbamba, aní aha pí Yesu me aní ndjìndjì. <sup>49</sup> Engú bini, okoko apa pí aní me: «Djedjeke, ní u nga ne me Eliya ngago nakobho aní!»

<sup>50</sup> Yesu atsia asúla matá kpekpeke, aní atsia andala 'kpa li bua e. <sup>51</sup> Me-e, 'ngbé 'kpá bongo inde adɔ abuku 'bhɔ tina 'ti na bubu bhú 'ngbé 'ti Ebhe gba omaYuda-a asidha bhɔsɔ e bhisi má tsue nayie abhúlá, akolo akuto. Doto adyiki, ongbengbe teme

atsia aɔɔpa. <sup>52</sup> Abhomɔ-o, olata-a ada bhɔsɔ o, bhiti omabhuka inde amu nani-e atsia azuku. <sup>53</sup> U aze bhú olata gba o-o. Píta lí Yesu azuku lie, u atsia agbida bhú Yelusalema, gúdhɔ na bubu-o. Okpála bhelé atsia au uo.

<sup>54</sup> Ngámá gba osudha na Loma bhú dabilí ne osudha gba e inde adɔ alila Yesu nedhinga aní adɔ lie lí kulusi-e au engú inde akodho 'kpí ne nadyiki ka doto-o. Abhomɔ-o, u adje tsulɔ naali. U atsia apa me: «Kpála inde-e bha ndjɔ nako ne Ndili gba Ebhe na paká!» <sup>55</sup> Olisi bhelé adɔ lí bilí bhomɔ-o. U adɔ atsia 'ngú bhomɔ-o mbo tsutsu. Olisi ango-o ayie nani ne Yesu bhú Galilaya, nakolo makolo bhú Yelusalema ngú nateteke aní. <sup>56</sup> Bhú ká uo, a adɔ nani Malia, kpála na gúdhɔ na Magadala, Malia 'hi Djaki ne Djodjefɔ, a la di-e 'hi ongisí gba Djebedayo-o.

*Djodjefɔ azi Yesu*  
(*Tsia bhú Mlk. 15:42-47; ne bhú Luk. 23:50-56; di ne bhú Dja. 19:38-42.*)

<sup>57</sup> A akolo lie tagolo-o, bhulɔ tia bini ago. A adɔ kpála na gúdhɔ na Alimatayo. A adɔ 'lí aní me Djodjefɔ. Kpála ango-o dɔ di nani mukpata gba Yesu. <sup>58</sup> Aní anɔ abhaka guvelenele Pílatɔ, aní atsia ayo kuo Yesu ka aní. Pílatɔ atsia aha líli me u ha pí aní haha. <sup>59</sup> Abhomɔ-o, Djodjefɔ aha kuo Yesu, aní agagala ne daladeli na mbia inde aní akala e bhú kpéke mase. <sup>60</sup> Aní anɔ ato bhú lata na mbia inde aní aleke nani e pí e makpe bhú teme-o. Pípíta-a, aní awawala 'ngbé teme bini lí bhɔbhɔ ngú nanini, aní atsia atapa. <sup>61</sup> Nedhinga bhomɔ-o, Malia, kpála na gúdhɔ na Magadala ne Malia bhe koko adɔ kuto bhúla lata-o.

*U abu osudha ngú nalila lata Yesu*

<sup>62</sup> Lí ekpí aseke lie, a akúnda napa me bhú ekpí nago gba omaYuda-a, ongbengbe odimandɔ di ne omɔFalisai anɔ bhú dabilí bini agba Pílatɔ. <sup>63</sup> U atsia apa pí aní me:

† 27:46 27:46 Tsia bhú Ets. 22:2.

«Ngámá, 'ndji ya ago mbia inde-e li engú li bhulú eu bhomu-o apa nako e nedhinga ani adu lie uu-o me pita 'kpí bata ni zúku-o. <sup>64</sup> Kaka-a, a ayo me ha líli me u lila lata ani nakolo bhú 'kpí na bata. Padhá de, anga i du mo-o de, omukpata gba ani-e ti da nago nazi kuo ani. U tsia pá pi okpála me ani azuku. Li okpála dje la ibili mo-o, eu bhende-e né la ibili da bhende ani apa nako e kalanu-o mane.» <sup>65</sup> Pilatø atsia apa pi uo me: «Yi ha osudha-a haha. Yi nu ne uo, amba u lila lata-a maka yi au lie ndjindji-o.» <sup>66</sup> U atsia anu naleke lele nalila lata-o. U ayele bhøbhø ne teme, u atsia a'o osudha ngú nalilila.

## 28

*Yesu azuku*  
(*Tsia bhú Mlk. 16:1-10; ne bhú Luk. 24:1-12; di ne bhú Dja. 20:1-10.*)

<sup>1</sup> Pita ekpí nagueo gba omaYuda-a , bhú 'kpí yinga kèkpí má bhé-o, Malia , kpála na gudhu na Magadala ne Malia koko-o, agbida ngú natsia lata-o. <sup>2</sup> Me-e, doto adyiki ne adjigidjo na ngbéngbé, anga andjelu bini gba Ngámá-a ayie abhúlá, ani ago awawala teme inde adu li 'bhø lata-o, ani atsia adu pépé. <sup>3</sup> Kute ani adu asu má ngbí ngbí ngbí! La di-e, bongo gba ani-e avu má tuu! <sup>4</sup> Li osudha inde adu alila lata-a au lie mo-o, u aholo naguku ka tsulú má kpi kpi kpi, u atsia abala kuto mugito me a ko okpála inde amu.

<sup>5</sup> Engú bini, andjelu-o apa pi olisi-e me: «Yi akpé-e de, anga ma ambila me yi ngagili Yesu inde u agi nako e li kulusi-o. <sup>6</sup> Ani sii ade. Ani azuku maka ani apa nako lie-o. Yi go tsia bili inde u aseke nako ani lie-o. <sup>7</sup> Yi nu pa kolo pi omukpata gba ani-e má gala me, ani azuku. Ani adji kala yi bhú Galilaya bhomu. Yi aú ani oo. A bhomu-o ngali ma de ago napa e pi yi-o.» <sup>8</sup> Abhomu-o, olisi-e ayie bha kolo bhú lata-a má gala me u nde abedhe ne tsulú di ne djali bedhe. U anu ne holo, u atsia anu ngú napa

ngali ango-o pi omukpata gba Yesu-o. <sup>9</sup> Ma 'li ma me-e, Yesu ago akø lie ne olisi ango-o. Ani atsia ayi uo me: «Yi oo!» Abhomu-o, u adyudyo lio de ani, u atuko kuto bhú li 'dhu ani, u atsia adhøø ani. <sup>10</sup> Pipita-a, Yesu atsia apa pi uo me: «Yi akpé-e de. Yi nu pa pi ondaise ma me u nu abhú Galilaya, u aú ma oo ko.»

*Ongámási gba omaYuda ato kali me u bubuku engú nazuku gba Yesu-o*

<sup>11</sup> Li olisi-e adu nga bha lie li kpadji-e, okpála koko bhú ká osudha inde adu nalila lata-a anu abhú gudhu. U atsia akpokpo ndu 'ngú hana inde akodho 'kpí abhú lata-a pi ongbengbe odimandø gba Ebhe-o . <sup>12</sup> Abhomu-o, ongbengbe odimandø apo bhúla o ne obhelesi okpála gba omaYuda-o, u atsia adje lio me o méne pi-ie. Pita nadjø lie ka uo-o, u aha tia bhelé pi osudha-a me u apa kukulu 'ngú inde akodho 'kpí-e de. <sup>13</sup> U atsia apa pi uo me: «I du me kpála bini nde ayi yi-e, yi de pa me: <Nedhinga ya adu lie tila-a, omukpata gba ani-e ago, u atsia azi kuo ani li ya.> <sup>14</sup> La di-e, i du me guvelenele nde adje-e, ya ambila lele ya akpókpo pi ani lie ngaya, amba yi asia mangimbo de.» <sup>15</sup> Osudha abha tia-o, u atsia amene bha maka u apa lie pi uo-o. Abhomu-o, ngali ango-o ayangba bha sunda omaYuda moko nakolo pi naki.

*Eli na soso gba Yesu pi omukpata gba e-o*

(*Tsia bhú Mlk. 16:14-18; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.*)

<sup>16</sup> Abhomu-o, omukpata ndjikpa ne ká bini-e anu bhú Galilaya, pí eta inde li Yesu apana nani e pi uo me ni akø lini ne uo pí e-o. <sup>17</sup> U akolo lie oo, Yesu akoto li uo. U au ani lie, u atuko kuto bhú li 'dhu ani, u atsia adhøø ani. Engú bini, okoko bhú ká uo adu ne bua na bhisi bhisi. <sup>18</sup> Abhomu-o, Yesu adyudyo lie de uo, ani atsia apa pi uo me: «Ebhe

aha ndu angu na abhúlá ne bhe na pílá doto hana muma. <sup>19</sup> Kaka-a, yi nua bhú ndu opiga hana. Yi mene me u kolo omukpata gba ma. Yi batisa uo ne 'li 'Dyi ní, ne 'li Ndili, la di ne 'li Bu Bhobua . <sup>20</sup> Yi suno pi uo me u lila ndu líli inde ma aha e pi yi-e hana. Yi mbila la me ngama-a, ní ne yi bhú dabili bini ndu 'kpí hana akólo bha bini makolo ali sokpí.»

**Bádha Ngali  
gba Yesu Kilisito maka li  
Maloko  
aye lie ko  
Eli na kalanu**

Bádha Ngali maka li Maloko aye lie-e, akpo lita e ne naziba me Bádha Ngali ango-o a ko na Yesu Kilisito , Ndili gba Ebhe. Aní asuno Yesu maka kpála na kulu di na angu. Angu gba aní ngau lie bhú nasuno gba aní, ne bhú angu gba aní pi si siti bua di ne bhú nambu li osisiti 'ngú gba okpála. Yesu ngakpokpo 'ngú gba e makpe maka Ndili gba kpála inde ago ngú naha mukobho gba e ngubula nagbegbe okpála bhú sisiti 'ngú gba o-o.

Maloko akpokpo 'ngú gba Yesu-o mbámhá, aní agama 'ngú naali píndji kulu li Yesu amene e ane bhende li Yesu akpokpo e di ne bhende aní asuno e-o. La-a, li omakpata gba Yesu adu la lie abhue ne aní bhú dabili bini-e, u atsia ambila aní ndjindji. Engú bini, obhulu yala gba aní adu matá akolo pi aní ne siti bua naali.

Olukuluku (9-20) inde u a aye e sunda oehe bhisi me-e, ngau lie me aye ne kpála koko. Maloko ye ngae de.

**Ongbengbe ongú inde bhú bhuku inde-e ngae inde:**

Lita Bádha Ngali-o 1:1-13

Kulu li Yesu amene e bhú ká okpála abhú Galilaya 1:14 - 9:50

Dhuku gba Yesu nayie bhú Galilaya ngú nanu abhú Yelusalema 10:1-52

Oekpi nasoso gba Yesu abhú Yelusalema 11:1 - 15:47

Nazuku gba Yesu 16:1-8

Nakoto ka Yesu li okpála, ne na'ua ka aní abhúlá 16:9-20

*Djaa bhulu nabatisa okpála aleke kpadji pi Ngámá Yesu*

*(Tsia bhú Mat. 3:1-12; ne bhú Luk. 3:1-18; di ne bhú Dja. 1:19-28.)*

<sup>1</sup> A inde-e lita Bádha Ngali gba Yesu Kilisito , Ndili gba Ebhe-o.

<sup>2</sup> Maka li polofeta Isaya aye lie bhú bhuku gba e me:

«Ebhe apa me: Djedje nga! Ma atíma bhulu titima gba ma-a pi mu kalanu

ngubula naleke kpadji pi mu.

<sup>3</sup> Kpála ango-o ngatotobhila abhú mili bili me:

«Yi leke kpadji pi Ngámá!

Yi lili odjedje kpadji pi aní má ngbuu ngbuu!†»

<sup>4</sup> Kaka-a, Djaa bhulu nabatisa okpála akoto nani abhú mili bili.

Aní adu a'i okpála me u go sia batisimo ngú nasuno me u adji bua o adji, amba Ebhe 'e siti 'ngú gba uo-o.

<sup>5</sup> Abhomu-o, ndu okpála hana na ndu doto na Yudaya, di ne ndu okpála hana na gudhu na Yelusalema adu ago abhaka aní. U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani.

<sup>6</sup> Djaa adu adyi bongo inde u adu e li su enu u a'i e me «samo.» Aní adu agbite ludu e ne ekpu na kó 'nu.

Aní adu azu omakindolo di ne nadha 'mu eu.

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

<sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

<sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpu na maloké gba aní-o.

† 1:3 1:2-3 Tsia bhú Mal. 3:1; di ne bhú Isa. 40:3.

10 Nedhinga li Yesu adu akoto lie bhú 'ngu-o, ani au kokpí ngada bhusu e. Ani atsia au di Bu Bhobua ngakè pí e maka bəbhə. 11 Abhomu-o, eli bini akoto abhúlá, atsia apa me: «Mú ne Ndili gba ma inde ma kunda e naali, mú ne kpákpá na bua ma.»

*Satana ale Yesu*  
(Tsia bhú Mat. 4:11; di ne bhú Luk. 4:1-13.)

12 Pipita kolo me-e, Bu Bhobua atsia amba bhúla Yesu abhú mili bili. 13 Ani adu oo ngubula ekpí ndjikpa badha me Satana nde ngale ani. Yesu adu nadu li bili li onu na bili adudu li e-o. Oandjelu atsia adu nateteke ani.

*Yesu a'i omukpata na gigina*  
(Tsia bhú Mat. 4:12-22; di ne bhú Luk. 4:14-15, 5:1-11.)

14 Ekpí bini, pita li Elode Atipasi aholo Djaa lie, ani atsia ato ani bhú tikpu-o, Yesu anu bhú ndu doto na Galilaya. Ani adu akpokpo Bádha Ngali gba Ebhe-e\* pi okpála. Ani adu apa me: 15 «Nedhinga nani li Ebhe a'o e akolo. Nau gba ani-e akolo di masikpe. Yi dji bua yi, yi bhuka Bádha Ngali gba Ebhe-o.»

16 Li ani adu akpangba ngo 'kpə na Galilaya lie, ani au Simo ne ndai e Andili me u nde ngabhike nado bhúbhú. Padhá de, anga u du nani obhulu nagbe sungu. 17 Yesu atsia apa pi uo me: «Yi kpata ma, ma adjí ibili yi obhulu nagili okpála pi Ebhe.» 18 Kolo me-e, u a'o ka onado gba o-o, u atsia akpata ani.

19 Pipita-a, Yesu adyudyo mbo lie ne kalanu masudha, ani au ongisi gba Djebedayo: Djaki ne ndai e Djaa . U adu me u nde bhú zabu gba o, u nde ngaleke onado gba o-o. 20 Abhomu-o, ani a'i uo. Má gala kolo me-e, u a'o ka 'dyi o, Djebedayo bhú zabu bhú dabili bini ne okpála na kulu-o. U atsia akpata ani.

\* 1:14 1:14 Bhú obhuku koko-o mo obháka me u nde aye me «Bádha Ngali Nau gba Ebhe .» Tsia bhú Mlk. 6:17.

*Yesu akobho kpála bini inde li siti bua adu nadu bhú e*  
(Tsia bhú Luk. 4:31-37.)

21 Abhomu-o, Yesu ne omukpata gba e akolo bhú kuti na Kapalanauma. A akolo lie bhú 'kpí nago gba omaYuda-a , Yesu ali bhú 'ti nadjé líli gba Moidje , ani atsia aholo nasuno. 22 Okpála inde adu nadjé ani-e, adu nangamba naali li nasuno gba ani-o. Padhá de, anga ani du asuno maka omusuno na líli gba Moidje de. Engú bini, ani adu asuno ne angu. 23 A abhaka me bhú 'ti nadjé líli oo, kpála bini inde li siti bua adu bhú e nde oo. Abhomu-o, kpála ang-o asula me: 24 «Yesu, kpála na Nadjaleta, mo okunda namene ngú ya pi? Mo ogo ngú nandjia angu ya? Ma mbila hana me mú ne da-ie. Mú ne Kpála na Bubu inde li Ebhe atima e ko!»

25 Engú bini, Yesu ambe bhú 'ndji siti bua ang-o me: «Gbite 'bhe mú, amba mú koto la di bhú kpála ang-o makoto!» 26 Abhomu-o, siti bua adyiki kpála bhomu-o má djigi djigi! Ani atu 'ue, ani atsia akoto bhú ani. 27 Ndu okpála hana angamba naali. Kaka-a, u aholo nayi lio sunda o me: «A inde-e mangua 'ngú dho? Nasuno na mbia inde-e abedhe ne angu! Kpála inde-e ngaha belegu líli pi osisiti bua, u la bhadi ngamemene!» 28 Abhomu-o, ngali gba Yesu-o ayangba bha kolo bhú ndu doto na Galilaya libhому.

*Yesu akobho okpála bhelé na kuo*  
(Tsia bhú Mat. 8:14-17; di ne bhú Luk. 4:38-41.)

29 Yesu akoto lie bhú 'ti nadjé líli e me-e, u atsia anu ne Djaki di ne Djaa bhú 'ti gba Simo ne Andili. 30 A abhaka me 'hi wala Simo nde asi kuto, ka anga adu li ani ne kuo, kute ani adu kpákpá. Abhomu-o, u atsia apa kolo engú gba ani-e pi Yesu. 31 Ani dyudyo lie de ani. Ani aha 'kpa ani, ani a'e ani bhúlá. Kuo ayie li ani, ani atsia aholo nalú 'zú pi uo.

<sup>32</sup> A akolo lie tagolo pita nati ka ela-a, okpála aholo nago ne obhulú kuo di ne obhende adu ne osisiti bua bhú o pi Yesu. <sup>33</sup> Okpála na gudhu libhomu adu apo bhúla o li 'bhø bhoti-o. <sup>34</sup> Abhomu-o, Yesu akobho okpála bhelé inde adu ne okuo ngangá. Ani atsia apandja di obua na sisiti bhelé inde adu nadu bhú okpála-o. Ani ha la di nedhinga pi osisiti bua ango-o ngú nagama 'ngú belegu de bini. Padhá de, anga a adu me u nde ngambila ani hana.

*Yesu akpokpo Ngali gba Ebhe-bhú Galilaya*

*(Tsia bhú Luk. 4:42-44.)*

<sup>35</sup> Bhú sikikpi-e, me biti nde ani nga bha má gbu-o, Yesu ayie bhúlá, ani akoto. Ani atsia atapa abhú mili bili. Oo, ani aholo nayo Ebhe. <sup>36</sup> Abhomu-o, Simo ne okpála bhende u adu ne o-o, aholo nagili ani. <sup>37</sup> U au ani lie, do uo pi ani me: «Ndu okpála hana ngagili mu.» <sup>38</sup> Abhomu-o, Yesu atsia apa pi uo me: «Ní nu li obili koko, bhú okuti na ngongo, amba ma kpokpo di Ngali gba Ebhe-e oo. Padhá de, anga a bhomu-o engú inde ma ago ngú e ko.» <sup>39</sup> Abhomu-o, Yesu adholo nani bhú ndu doto na Galilaya libhomu. Ani atsia adu akpokpo Ngali gba Ebhe-e bhú oti nadje líli na kuti gba uo-o. Ani adu di napandja osisiti bua inde adu nadu bhú okpála-o.

*Yesu akobho bhulu kába bini*  
*(Tsia bhú Mat. 8:1-4; di ne bhú Luk. 5:12-16.)*

<sup>40</sup> Bhú oekpi bhomu-o, bhulu kába bini adyudyo lie de Yesu. Ani atutu lipuku e kuto kala ani, ani atsia akikiliki lie pi ani me: «Í du me mu nde akunda-a, mu ti da nakobho ma.» <sup>41</sup> Yesu adje ndjinga ani, ani a'o 'kpa e li kute ani. Ani atsia apa pi bhulu kába ango-o me: «Ako, ma akunda. Kokobho!» <sup>42</sup> Ma 'li ma me-e, kába agulu li ani hana má da! Ani atsia akobho. <sup>43</sup> Kolo me-e, Yesu agie ani sidi ne nagbele 'dje ani kpekpeke. <sup>44</sup> Ani atsia apa pi ani me:

«Djedje! Mo osú 'kpá li 'ngú inde-e de kpála bini belegu de má kpo! Engú bini, nu suno limu pi dimandø gba Ebhe, amba mu ha makiso gba mu-o maka li Moidje aye nani lie-o. Bhobhomu-o asúno pi okpála me mo okobho.» <sup>45</sup> La-a, li kpála ango-o ayie lie oo, ani aholo bha ne kpokpo 'ngú bhomu-o pi ndu okpála hana li ndu bili hana inde ani adu apu li e-o. Kaka-a, Yesu ti matá nani da nasuno lie mbámbá bhú gudhu de. Engú bini, ani adu bha ibili nadu ne alingo gudhu, bhú omili bili. Okpála adu ayie ne ndu bili hana, u atsia adu ago nabhaka ani.

## 2

*Yesu akobho dukuto*  
*(Tsia bhú Mat. 9:1-8; di ne bhú Luk. 5:17-26.)*

<sup>1</sup> Pita 'kpi masudha-a, Yesu agie lie bhú Kapalanauma. Okpála atsia adje me ani akuti. <sup>2</sup> Abhomu-o, kambi okpála ago apo bhúla o oo. Kaka-a, bili na padhá tsia du de, belegu de ali 'bhø bhoti. Ani atsia adu akpokpo eli gba Ebhe-e pi uo. <sup>3</sup> Bhú nedhinga bhomu-o, obhosi badha ago pi ani ne dukuto bini me u nde abi ani mabi. <sup>4</sup> Engú bini, li okpála adu la lie bhelé-e, u tsia ti nani da nakolo ne ani li Yesu de. Abhomu-o, u atsia a'u ne ani api 'ngbu 'ti. U adu gudho li 'ngbu 'ti-e li lele bili inde Yesu adu lie-o. U atsia ake dukuto-o pi kalagba gba e tété. <sup>5</sup> Li Yesu au nabhuka gba uo lie, ani atsia apa pi dukuto-o me: «Ndika ma, osisiti 'ngú gba mu-o a'e lie a'e.»

<sup>6</sup> Omusuno na líli koko gba Moidje adu me u nde adulu kuto oo. U atsia adu nabhundja li bua o me: <sup>7</sup> «Kpála inde-e ngagama 'ngú mo-o ka ni? Ani ngasobho Ebhe. A ti da na'e siti 'ngú gba kpála da, bha bini Ebhe kpi e kpi di?» <sup>8</sup> Yesu atsia ambila bha kolo me u ngabhundja li bua o mo-o. Abhomu-o, ani atsia apa pi uo me: «Yi ngabhundja li bua yi mo-o ka ni?» <sup>9</sup> A ane ne bhuku ne bhedho: ne napa pi dukuto-o me «Osisiti

'ngú gba m̄-o a'e lie a'e», ne napa me «Yie bhúlá, ha kalagba gba m̄-o, amba m̄ dhuku?» <sup>10</sup> Engú bini, ma adji asuno pí yí me «Ndili gba kpála ne angu na'e osisiti 'ngú gba okpála na píla doto.» Abhom̄-o, ani atsia apa pí dukuto-o me: <sup>11</sup> «Ma apa pí m̄ me yie bhúlá, ha kalagba gba m̄-o, amba m̄ gie lim̄ agba m̄!» <sup>12</sup> Kolo me-e, bhoko ango-o ayie bhúlá, ani aha kalagba gba e-o, ani akoto bhú ká djila nd̄ okpála hana, ani atsia atapa. Nd̄ okpála hana ad̄ angamba. U ad̄ adhögö Ebhe. U atsia ad̄ apa me: «Ya u nga ngua engú inde-e belegu de bini!»

*Yesu a'i Levi*  
(*Tsia bhú Mat. 9:9-13; di ne bhú Luk. 5:27-32.*)

<sup>13</sup> Pipita-a, Yesu an̄ matá lingo ekpö na Galilaya. Bhiti okpála ad̄ ago abhaka ani, ani atsia ad̄ asuno pí uo. <sup>14</sup> Ani ad̄ akodho 'kpí lie, ani au Levi, ndili gba Alafayo me ani nde ad̄ bhú 'ti inde u ad̄ akala mandjandja bhú e-o. Yesu apa pí ani me: «Kpata ma.» Levi ayie bhúlá, ani atsia akpata ani. <sup>15</sup> Pipita-a, Yesu atsia an̄ naz̄ 'he bhú 'ti gba ani. Ondombi na mandjandja di ne okpála namene siti 'ngú bhelé ad̄ de Yesu ne om̄kpata gba e-o. Padhá de, anga ongua okpála bhom̄-o bhelé ad̄ akpata ani. <sup>16</sup> Li om̄suno na líli inde ad̄ bhú ká om̄Falisai au lie me Yesu ngaz̄ 'he ne ongua okpála bhom̄-o, u atsia ayi om̄kpata gba ani-e me: «Ani ngaz̄ 'he bhú dabili bini ne ondombi na mandjandja di ne okpála namene siti 'ngú ngú ní?» <sup>17</sup> Yesu adje uo napa engú bhom̄-o lie, ani atsia apa pí uo me: «Okpála inde ne kuo ade-e ne gum̄ mutia ade. Engú bini, okpála na kuo mangbo ne gum̄ ani ngao. Ma go ngú na'i okpála bhende apa me o ngbingbili-e de. Engú bini, ma ago mangbo ngú na'i obhende ngau lío me o ne osisiti okpála ko.»

*Yesu akpo 'ngú pindji natse 'z̄ ngú nayo Ebhe*

(*Tsia bhú Mat. 9:14-17; di ne bhú Luk. 5:33-39.*)

<sup>18</sup> Ekpí bini, om̄kpata gba Djaa bhul̄ nabatisa okpála di ne om̄Falisai ad̄ atse 'z̄ ngú nayo Ebhe. Abhom̄-o, okpála ago ayi Yesu me: «Ka ní lí om̄kpata gba m̄-o tsetse ez̄ lie ngú nayo Ebhe de-e, obhende gba Djaa bhul̄ nabatisa okpála di ne obhende gba om̄Falisai-e nde la ngatsetse-e?» <sup>19</sup> Yesu agie pí uo me: «Yi abhundja naayi me okpála inde ago bhú da anokomia na k̄va tí da natse naz̄ 'he me 'ko òl̄-o nde bhú dabili bini ne uo? 'Kpí bini de! Nedhinga inde lí 'ko òl̄-o nde nga bha lie bhú dabili bini ne uo-o, u tí da natse naz̄ 'he de. <sup>20</sup> Engú bini, ekpí akólo makolo nedhinga inde lí u a'é 'ko òl̄-o lie bhú ká uo-o, ekpí ango-o, u tsia tsé naz̄ 'he. <sup>21</sup> Kpála bini tí da naleke bongo na didili ne pála bongo na mbia de. Í d̄ mo-o de-e, pála bongo bhe na mbia sídha té bhe na didili-o, lí eka ango-o kólo ngbéngbé ane bhe na kalan̄-o mane. <sup>22</sup> La di-e, kpála bini túko pandi na mbia bhú odidili dhudhu na kó 'n̄ de. Í d̄ mo-o de-e, pandi-e úpa bh̄s̄ odhudhu-o. Ani tsia néke pandi-e ne odhudhu-o hana. Engú bini, pandi na mbia ayo bha ne odhúdhú na mbia.»

*Yesu ne Ngámá pí 'ndji ekpí naguo gba omaYuda*

(*Tsia bhú Mat. 12:1-8; di ne bhú Luk. 6:1-5.*)

<sup>23</sup> Ekpí bini naguo gba omaYuda-a , Yesu ne om̄kpata gba e ad̄ akodho 'kpí bhú ngu 'z̄ inde u a'i e me ngano. Om̄kpata gba ani-e aholo akodho 'ndji 'ndji, u atsia ad̄ naz̄z̄. <sup>24</sup> Om̄Falisai apa pí Yesu me: «Tsia nga engú u ngamene e lí 'kpí naguo-o. Líli gba ní-e ziba namene kulu bhú 'kpí naguo de.» <sup>25</sup> Ani atsia gie pí uo me: «Yi tanga nga engú inde lí Davidi amene nani

e di? Ekpí bini, ngaani ne okpála inde adu adhuku bhú dabili bini ne ani-e adje gumu. <sup>26</sup> Abhomu-o, ani ali bhú 'ti Ebhe, ani atsia azu mapa inde u a'o e pi Ebhe-o (a adu me Abiatali nde ne bhele kpála gba odimandø li nedhinga bhomu-o ngae). La-a, líli gba ní aziba me odimandø zuzu bha ngao kpi o kpi. Engú bini, Davidi azu, ani atsia aha di pi okpála inde adu adhuku bhú dabili bini ne ani-o.» <sup>27</sup> Yesu atsia apa matá pi uo me: «U a'o ekpí naguo pi kpála-kuti. Engú la bini, u bho kpála-kuti pi ekpí naguo de. <sup>28</sup> Kaka-a, Ndili gba kpála di ne Ngámá pí 'ndji ekpí naguo.»

### 3

*Yesu akobho bhoko bini li 'kpí naguo gba omaYuda*

*(Tsia bhú Mat. 12:9-14; di ne bhú Luk. 6:6-11.)*

<sup>1</sup> Ekpí koko, Yesu ali matá bhú 'ti nadjè líli gba Moidje-o . Bhú 'ti oo, kpála bini inde li 'kpa e andia adu oo. <sup>2</sup> Omufalisai adu akunda na'o 'ngú pí Yesu. Kaka-a, u aholo atsia ani ne kpéke djila, atigala ani kóbho kpála inde adu me 'kpa e nde andia-a li 'kpí naguo . <sup>3</sup> Abhomu-o, Yesu atsia apa pi kpála angoo me: «Yie bhúlá, amba mu lu si bhú ká djila ndu okpála hana.» <sup>4</sup> Pipita-a, Yesu atsia ayi okpála inde adu oo me: «Li 'kpí naguo gba omaYuda-a, líli gba ní-e aziba bhedho: U mene bádha 'ngú ne me u mene siti 'ngú? U kobho kpála ne me u bhele kpála?» Engú bini, u tsia du ne engú na gigie de! <sup>5</sup> Ani aholo atsia ndu uo hana bini ne bini na gúgú. Bua ani ake, ka kpéke 'ndji gba uo-o. Abhomu-o, ani atsia apa pi kpála li 'kpa e andia me: «Gbele 'kpa mu.» Kpála angoo agbele 'kpa e, 'kpa ani atsia akolo matá ndjindji. <sup>6</sup> Li omufalisai aze lie oo, u atsia apo kolo bhúla o ne omaha Elode . \* U atsia adje lio me ogili kpadji nabhele Yesu.

### *Kambi okpála akpata Yesu*

<sup>7</sup> Pipita-a, Yesu ne omukpata gba e agbida lingo ekpo na Galilaya. Kambi okpála atsia akpata ani. Okpála angoo ayie nani bhú ndu doto na Galilaya ne Yudaya, <sup>8</sup> bhú gudhu na Yelusalema, bhú ndu doto na Idumé, bhú ndu doto inde ayi 'ngu na Djuludani, bhú odoto na Tile ne Sidona. Kambi okpála angoo adje nani ngali na ongú li Yesu adu amene e lie, u atsia ago abhaka ani. <sup>9</sup> Yesu atsia aha líli pi omukpata gba e me u 'o zabu pi ni bini masikpe, amba i du me okpála bhomu-o nde asulu ni má wakaka-a, ni de 'u bhúbhú. <sup>10</sup> Padhá de, anga ani akobho nani okpála bhelé. Kaka-a, okpála na kuo adu agbene lio me o bu 'kpa o li ani amba o kobho. <sup>11</sup> Li okpála inde li osisiti bua adu ato mbolo li o adu au ani lie, u adu ago atuko ne 'ue bhú li 'dhu ani me: «Mu ne Ndili gba Ebhe.» <sup>12</sup> Engú bini, Yesu adu apa pi uo na gúgú me u ambamba ta ni pi okpála koko de.

### *Yesu alo obhulu titima ndjikpa ne ká bhisí*

*(Tsia bhú Mat. 10:1-4; di ne bhú Luk. 6:12-16.)*

<sup>13</sup> Pipita-a, Yesu a'u apí 'ta. Ani atsia a'i obhende ani adu akunda o-o. U atsia ago abhaka ani. <sup>14</sup> Abhomu-o, bhú ká okpála angoo, ani alo okpála ndjikpa ne ká bhisí. Ani agisila 'li uo me obhulu titima . Ani a'o uo ngubula me ni du adu ne uo bhú dabili bini, la di ngubula me ni tima uo ngú nakpokpo Ngali gba Ebhe-o. <sup>15</sup> Ani aha di pi uo angu ngú napandja osisiti bua bhú okpála. <sup>16</sup> A inde-e obhe ndjikpa ne ká bhisí inde ani alo nani o-o: Simo (inde li Yesu agisila nani 'li e me «Piele»), <sup>17</sup> Djaki ne ndai e Djaa (ongisi gba Djebedayo inde li Yesu aha nani 'ili koko pi o me «Boaneledjesi», a akunda napa me

\* **3:6** 3:6 Okpála gba Elode: A ko okpála inde adu bhú dabili bini ne Elode. Tsia bhú Mat 22:16.



«ongisi gba mɔgbálá»), <sup>18</sup> a la die, Andili, Filipino, Batelemi, Matié, Tuma, Djaki (ndala Alafayo), Tade, Simo (kpála nakunda doto gba e naali), <sup>19</sup> di ne Yuda Isikaliote, kpála inde apú Yesu-o.

*Okpála na piga gba Yesu abhundja me ani ati pele*

<sup>20</sup> Abhomu-o, Yesu agie matá lie li bili ani adu nadu li e-o, bhiti okpála atsia ago apo matá bhúla o de ani. Kaka-a, Yesu ne omukpata gba e sia belegu nedhinga ngú nazu 'he de. <sup>21</sup> Li okpála na piga gba ani adje ngali ango-o lie, u akè kpadji ngú nanu aholo ani. Padhá de, anga u adu apa me: «Yesu akolo bhulu pele!»

*Yesu agie 'ngú pi omusuno na líli gba Moidje*

*(Tsia bhú Mat. 12:22-32; di ne bhú Luk. 11:14-23, 12:10.)*

<sup>22</sup> Abhomu-o, omusuno na líli gba Moidje inde ayie nani bhú Yelusalema adu apa me: «A bhú kpála bhomu-o ne Beledjebula!» U adu di apa matá me: «A ngaha angu nato holo bhú 'dhu osisiti bua pi ani ne ngámá gba osisiti bua.» <sup>23</sup> Abhomu-o, Yesu atsia a'i omusuno bhomu-o. Ani atsia apa pi uo bhú gbitaku me: «Lele pi Satana ti da nato holo lie bhú 'dhu Satana-a? <sup>24</sup> I du me okpála gba ngámá bini nde ngagu gbele sunda o, kuti ango-o lú-u de. <sup>25</sup> I du me okpála na piga bini nde ngagu gbele sunda o, piga ango-o lú-u de. <sup>26</sup> I du me Satana nde ngagu lie ngae makpe, nau gba ani e gbógbo bhusu e. Ani ti da nabhue de, li 'ngú gba ani-e ndjía.

<sup>27</sup> Kpála ti da nali bhú 'ti gba kpéke bhoko bini de, ani tsia bhá ndu 'he gba ani-e me ani nde gbigbite ngaiza kpéke bhoko bhomu-o kalanu de-e de. Engú bini, ani de agbigbite ani agbigbite-e, ani tsia bhá ndu 'he gba ani-o. <sup>28</sup> Ma apa pi yi na paká me, u tí da nambu li osisiti 'ngú gba okpála di ne osobho

inde u ngasobho Ebhe ne e hana. <sup>29</sup> Engú la bini, li kpála sobho Bu Bhobua-a, Ebhe 'é siti 'ngú gba kpála ango-o de. Padhá de, anga ani amene bhomu-o siti 'ngú na duduma. <sup>30</sup> Yesu adu apa nani pi uo mo-o, anga u adu apa me: «A bhú ani ne siti bua.»»

*'Hi Yesu ne ondaise Yesu ngao dho (Tsia bhú Mat. 12:46-50; di ne bhú Luk. 8:19-21.)*

<sup>31</sup> Pipita-a, 'hi Yesu ne ondaise ani akolo li bili ani adu asuno li e-o. U alulu akilidjo, u atsia atima kpála bini ngú na'i ani. <sup>32</sup> Kambi okpála adulu nani de ani. U atsia apa pi ani me: «Tsia nga, 'hi mu di ne ondaise mu alulu akilidjo, u ngagili mu.» <sup>33</sup> Ani atsia gie pi uo me: «'Hi ma ne ondaise ma ngao dho?» <sup>34</sup> Abhomu-o, ani atsia bhiti okpála asa deno ani ngbalina-o. Ani atsia apa me: «Yi tsitsia nga, 'hi ma ne ondaise ma ngao inde! <sup>35</sup> Ndu kpála hana inde ngamene engú li Ebhe akunda e, kpála ango-o, a ko ndai ma na bhobhoko, a ko ndai ma na eole, a ko la di 'hi ma.»

## 4

*Gbitaku gba bhulu nalu nguwa (Tsia bhú Mat. 13:1-9; di ne bhú Luk. 8:4-8.)*

<sup>1</sup> Li Yesu akolo lie lingo ekpe na Galilaya-a, ani aholo matá nasuno. Abhomu-o, bhiti okpála na bhibhiti ago apo bhúla o de ani. Kaka-a, ani atsia a'u bhú zabu bini, ani anu adu bhúbhú apí 'ngu. Bhiti okpála-a atsia adu naao apigo deno 'nguo. <sup>2</sup> Yesu atsia adu asuno ongu pi uo bhelé bhú ogbitaku. Ani adu apa bhú nasuno gba e me: <sup>3</sup> «Yi djedje nga! Ekpi bini, kpála bini anu abhiye gba e ngú nalu 'zu. <sup>4</sup> Nedhinga ani adu alulu lie, tété abala lingo kpadji. Odhu ago, u atsia azu hana má kpəkəbhə!

<sup>5</sup> Koko atsia abala li bili na teme, doto du li bili ango-o bhelé de. Kaka-a, a atsia akè má gala, anga doto

dụ sasa bhelé de. <sup>6</sup> Engú bini, li ela akolo lie kpekpeke-e, ezụ ango- o atsia atsulu ka ndibhili sisie-o. Abhomu-o, a atsia a'ulu. <sup>7</sup> Té koko abala li bili na oeti, oeti atsia abhele, a anguvo ezụ-o. Kaka-a, a atsia li lílí de. <sup>8</sup> Lí nguwa koko atsia abala li bili na dobho, a akè, a abhele a atsia ali lílí. Lí nguwa bini ali lílí ndjikpa bata. Koko ali lílí ndjikpa madhia. Koko ali lílí kámá bini.» <sup>9</sup> Yesu atsia abu tata me: «Í dụ me a nde li kpála ne djedje ngú nadjé 'kpí-e, aní de dje!»

*Yesu ngakpo 'ngú bhú ogbitaku ká ní?*

*(Tsia bhú Mat. 13:10-17; di ne bhú Luk. 8:9-10.)*

<sup>10</sup> Pipita-a, li Yesu atigala bha lie ne omukpata ndjikpa ne ká bhisi di ne okpála inde adụ nadụ de aní titi o-o, u aholo nayi aní pindji ogbitaku-o. <sup>11</sup> Aní atsia agie pi uo me: «Ngayi-e, Naụ gba Ebhe ambamba ta e pi yi ambamba. La-a, pi okpála bhende kilidjo-o, ma bha ngapapa pi uo bhú ogbitaku. <sup>12</sup> A ko ngubula me engú inde bhú Bhuku gba Ebhe-e mene lie. Engú inde me:

«Abana u dụ atsia 'kpí-e, u ú 'kpí de,  
abana u dụ adje 'kpí-e, u kó  
mbolimboli de.  
Kaka-a, u dji bua o de,  
Ebhe 'é di siti 'ngú gba uo-o  
de.†»

*Yesu ambamba ta gbitaku gba bhulụ nalu nguwa*

*(Tsia bhú Mat. 13:18-23; di ne bhú Luk. 8:11-15.)*

<sup>13</sup> Pipita-a, Yesu atsia apa pi uo me: «Yi kè mboli gbitaku bhomu-o de! La mbia inde-e, yi aké mboli ndụ ogbitaku koko hana lele pi?

<sup>14</sup> Bhulụ nalu nguwa inde ma de apa 'ngú e ngalu eli gba Ebhe .

<sup>15</sup> Okpála koko maka ngo 'hi kpadji li bili inde li eli gba Ebhe-e alu lie li e-o. Nedhinga u adje eli-e lie, kolo ma 'li ma me-e, Satana gó, aní tsia 'é eli inde alu lie bhú uo-o. <sup>16</sup> Okpála koko

ngasia eli-e bhú doto na ká teme. Nedhinga u ngadje eli-e lie, a bhúe de u ngasisia ne djali hana. <sup>17</sup> Engú bini, u 'o de me eli bhomu-o si kuti e ali bua o-o de. U nga'o 'to o tété bha mbo ngú nedhinga bedi. Kaka-a, nedhinga li okpekpeke da 'ngú ngago lie, i dụ di-e mbolo ka 'li Ebhe-e, u nga'o ká nabhuka gba o kolo má gala! <sup>18</sup> Matá-a, okoko ngasia eli-e bhú ká oeti. A bhomu-o, obhende i di me ziba eli inde u ngadje e-o. <sup>19</sup> Engú bini, u ngabhundja naali pindji ongú na doto inde. Tiatia ngapipite uo. La di-e, ndụ ogumụ 'ngú ngangá ngali bhú uo, i tsia ngúvo eli-o. Kaka-a, eli-e zú nguwa de. <sup>20</sup> Ngú nabu tata-a, okoko ngasia eli-e bhú doto na dobho. U ngadje eli-o, u ngasisia, u la di ngali lílí. Bhú okoko-o, lílí bini ngali lílí ndjikpa bata, bhú okoko ndjikpa madhia, bhú okoko kámá bini.»

*Yesu akpokpo gbitaku na eke*

*(Tsia bhú Luk. 8:16-18.)*

<sup>21</sup> Pipita-a, Yesu atsia apa pi uo me: «U dhedhedhe eke ngubula na'o'o asa lusa i dụ di-e asa mako uu? U dhedhedhe mangbo ngubula na'o'o pí misa. <sup>22</sup> Padhá de, anga ehe bini ade inde adụdụ bhú pepe, inde i kóto bhú mbasụ de-e ade. La di-e, ndụ 'he hana inde awo lie mawo inde li kpála u e de-e ade. <sup>23</sup> Í dụ me a nde li kpála ne djedje ngú nadjé 'kpí-e, aní de dje!»

<sup>24</sup> Yesu atsia apa pi uo me: «Yi 'o 'to yi li 'ngú ma ngapa e ndjindji, anga yi dje ndjindji-e, yi kó bhadi mboli engú bhelé. <sup>25</sup> Padhá de, anga kpála inde ngakè mboli engú ndjindji-e, Ebhe ambamba bhadi ta engú bhelé pi aní. Engú bini, kpála inde i kè mboli engú ndjindji de-e, u a'é belegụ mboye bhende ka ani-o.»

*Naụ gba Ebhe-e maka ní?*

<sup>26</sup> Yesu atsia apa matá pi uo me: «Yi tsia nga ehe inde li Naụ gba Ebhe-e nde maka e ko. A maka kpála

† 4:12 4:12 Tsia bhú Isa. 6:9-10.

inde adji abhiye ngú nalu nguwa. <sup>27</sup> Ngbikpi ne sukpe, abana ani dɔ bha tila, ne me ani dɔ li zuku, lí nguwa dɔ bha me a nde ngaze, a nde la di ngabhele. Ani mbila la de me a ngamene lie lele pi-ie de. <sup>28</sup> Doto ne titi e ngakɔ ngaiza musana. Pipita-a, i bí 'bhi. Li soso-o, i bá lílɪ inde ato na paká paká. <sup>29</sup> Li lílɪ mbe-e, kpála alu-o tsia kodho anga a ko nedhinga na'e nguwa abhiye.»

<sup>30</sup> Yesu atsia apa matá me: «Ní ti da nakpo 'ndji Nau gba Ebhe-e ne ni, ne me ní ti da nasusuno li mangua gbitaku dho? <sup>31</sup> A maka lí 'lá u a'i e me mutadi. Li u lu ani bhú doto-o, a ko lí nguwa bhe na yeye ane mane bhú ká oli nguwa hana na píla doto. <sup>32</sup> Engú bini, nedhinga u alu ani lie, a ngabhele, i tsia kólo ngbéngbé ane ondula koko hana. Li oyáyá-a kólo ngbengbengbe da napa me odhu ti da nayiki oti gba o bhú bhiti kpákpá-o.»

<sup>33</sup> Abhomu-o, Yesu adu asuno bhú ogbitaku bhelé maka obhende bhomu. Ani adu akpokpo 'li Ebhe pi uo li lele bhende li okpála adu adje ani-e, ti da nakɔ mbolimboli lie ko. <sup>34</sup> Ani dɔ nani agama 'ngú pi uo padhá de mandɪ gbitaku. Engú bini, nedhinga ani adu nadu lie ne omukpata gba e titi o, ani atsia adu ambamba tata-a pi uo hana.

*Yesu ayoko kpéke anvi pí 'ngu*  
(*Tsia bhú Mat. 8:23-27; di ne bhú Luk. 8:22-25.*)

<sup>35</sup> Bha tagolo bhú ekpí bhomu-o, Yesu atsia apa pi omukpata gba e me: «Ní gulu 'ngu ayi 'ngu.» <sup>36</sup> Abhomu-o, u a'o ká bhiti okpála-o, u anu ne Yesu bhú zabu ani adu bhú e-o. Ozabu koko adu di bhú dabili bini ne uo. <sup>37</sup> Kolo me-e, kpéke anvi na gipi aholo ape. Ongbo 'ngu-o adu atuko bhú zabu masakpe de me zabu-o bedhe ne engu. <sup>38</sup> La ngaani, Yesu-o, ani adu me ani nde ala atabhu zabu-o. Ani a'o 'ndji e pí kuse. Omukpata gba ani anu azuku ani ne napa pi ani me: «Musuno, ní

adji amú. A zi 'ngú bhú djila mu di?» <sup>39</sup> Ani azuku lie, ani ambe bhú 'ndji anvi-o. Ani atsia apa pi ngbo 'ngu-o me: «Gba 'bhɔ mu! Ndjili má bulu!» Anvi a'o nape, engu atsia akolo guguo má bi! <sup>40</sup> Yesu atsia apa pi omukpata gba e me: «Yi ne tsulu mo-o ka ni? Nabhuka nga bhú yi adi?» <sup>41</sup> Engú bini, u adu adje tsulu naali. U atsia adu apa sunda o me: «Ae mangua kpála dho i ngadje belegu e ne anvi di ne engu-o?»

## 5

*Yesu akobho kpála bini inde li siti*  
*bua adu nadu bhú e*  
(*Tsia bhú Mat. 8:28-34; di ne bhú Luk. 8:26-39.*)

<sup>1</sup> Pipita-a, Yesu ne omukpata gba e akolo ayi 'ngu, bhú ndu doto gba okpála na Gelasa. <sup>2</sup> Li Yesu akoto lie bhú zabu-o, kolo me-e, kpála bini akoto li bili na olata, ani atsia ago abhaka ani. Kpála ango-o, siti bua adu nadu bhú ani. <sup>3</sup> Kpála ango-o adu nadu bhú ká olata. Kpála bini ti nani da nagbite ani de, belegu de ne gbindjili. <sup>4</sup> Padhá de, anga bhutsibhutsi, u adu agbite 'dhu ani di ne 'kpa ani ne ogbindjili. Engú bini, ani adu akokodho ogbindjili bhomu-o má dhu dhu dhu! Kpála bini ko nani angu e pí ani de. <sup>5</sup> Ndu 'kpí hana sukpe ne ngbikpi ani adu bha nasusula bhú ká olata di ne bhú ká oeta. Ani atsia adu natsotsolo eka li kute e ngae makpe ne oteme.

<sup>6</sup> Ani au Yesu lie me ani nde nga bha tsutsu-o, ani ago ne holo, ani atutu lipaku e kuto kala ani. <sup>7</sup> Ani atsia asula kpekpeke me: «Yesu, Ndili gba Ebhe Apí 'Kpí, mo okunda namene ngú ma pi? Ma akikiliki lima pi mu! Ne 'li Ebhe, mo otó mbolo li ma de.» <sup>8</sup> (Ani asula mo-o, anga Yesu apa nani pi siti bua ango-o me ani koto bhú kpála bhomu-o makoto!) <sup>9</sup> Abhomu-o, Yesu ayi ani me: «A 'li mu pi?» Ani agie pi ani me: «A 'li ma me Bhelé, anga ya

bhibhiti.» <sup>10</sup> Abhomu-o, osisiti bua-  
a akikiliki lio pi Yesu naali me ani  
agbe o bhú ndu doto bhomu-o de.

<sup>11</sup> A abhaka me 'ngbé piga opame  
nde ngazu 'he li pabu 'ta oo.

<sup>12</sup> Osisiti bua atsia akikiliki lio  
pi Yesu me: «Tima ya bhú ká  
opame inde, amba ya li bhú uo.»

<sup>13</sup> Abhomu-o, Yesu atsia aziba pi uo.  
U aze bhú kpála ango-o, u atsia ali  
bhú opame-o. Piga opame bhomu-  
o libhomu akè eta ne holo, u anu  
atuko bhú ekpe-o, u atsia amu ndu o  
hana. U adu masakpe de kutu bhisi.

<sup>14</sup> Abhomu-o, omulila gba opame  
atsi naao ne holo. U anu akpokpo  
'ngú ango-o pi okpála abhú gudhu  
ne bhú okuti na ngongo. Okpála  
atsia ago ngú nau engú inde akodho  
'kpí-o.

<sup>15</sup> U ago de Yesu, u au  
kpála inde li bhiti osisiti bua adu  
nadu bhú e-o: ani adu me ani nde  
adu kuto, ani nde ato bongo li e,  
ani nde ngabundja 'ngú ndjindji.  
Abhomu-o, u atsia adje tsulu naali.

<sup>16</sup> Okpála bhende au engú ango-o,  
atsia akpokpo engú inde akolo li  
kpála bhomu-o, di ne li opame-e pi  
uo.

<sup>17</sup> Abhomu-o, u atsia aholo nakik-  
iliki lio pi Yesu me ani yie bhú ndu  
doto gba o yiyie. <sup>18</sup> Li Yesu adu a'u  
lie bhú zabu-o, kpála li siti bua adu  
igini bhú e, adu akikiliki lie pi ani  
me ni du bha ibili ne ani bhú dabili  
bini. <sup>19</sup> Yesu tsia ziba pi ani mo-o  
de. Engú bini, ani apa pi ani me:  
«Gie limu agba mu, bhú ká okpála  
na piga gba mu-o, amba mu kpokpo  
ndu 'ngú hana li Ngámá amene e  
pi mu-o maka ani adje ndjinga mu  
lie pi uo.» <sup>20</sup> Abhomu-o, kpála ango-  
o atapa. Ani atsia aholo nakpokpo  
ndu 'ngú hana li Yesu amene e  
pi ani-e bhú ndu doto na Ogudhu  
Ndjikpa. Okpála inde adu adje ani-e,  
ndu uo hana adu angamba naali.

*Yesu akobho ndili na ølø gba  
Yailo di ne ølø bini*

*(Tsia bhú Mat. 9:18-26; di ne bhú  
Luk. 8:40-56.)*

<sup>21</sup> Li Yesu agie matá lie lie ayi  
ekpe-o, kambi okpála abedhe de ani  
bedhe lingo ekpe-o. <sup>22</sup> Abhomu-o,  
suka ongámási na eti nadjé lílí gba  
Moidje ago. A du li ani me Yailo.

Ani au Yesu lie, ani ati bhú li 'dhu  
ani. <sup>23</sup> Ani atsia akikiliki lie pi ani ne  
kekele ne napa me: «Ndili na ølø  
gba ma-a masakpe de nakpi. Gogo,  
nu 'o 'kpa mu pí 'ndji ani ngubula  
me ani kobho, amba ani akpí-i de.»

<sup>24</sup> Abhomu-o, Yesu anu ne ani bhú  
dabili bini. Bhiti okpála na bhibhiti  
naali adu akpata ani. U aholo nasulu  
ani.

<sup>25</sup> Abhomu-o, ølø bini inde asi ne  
kuo naze ka ngute kalanga ndjikpa  
ne ká bhisi-e adu oo. <sup>26</sup> Bhiti  
omutia inde atia nani ani-e, aha  
nani likabhu pi ani naali. Padhá  
de, anga ani andjia nani tia nganda  
e hana má kpekøbhø, ani kobho  
de! Engú bini, kuo gba ani-e adu  
mangbo nakolo sisiti naali. <sup>27</sup> Ani  
adje ngali gba Yesu-o lie, abhomu-o,  
ani ago bhú ká bhiti okpála ne akele  
ani, ani atsia abu 'kpa e li bongo gba  
ani-o. <sup>28</sup> Padhá de, anga ani adu apa  
li bua e me: «I du me ma nde abu  
nga bha bini 'kpa ma li bongo gba  
ani-e, ma kóbho.» <sup>29</sup> Abhomu-o, kolo  
ma 'li ma me-e, ngute-e akodho má  
ká! Ani atsia ambila bhú e me Yesu  
akobho ni ne kuo gba ni-e akobho.

<sup>30</sup> Bha li nedhinga bhomu-o, Yesu  
ambila bhú e makpe me angu  
nakobho kpála akoto bhú ni. Ab-  
homu-o, ani atsia tsia 'kpí ne lingo e  
hana, ani atsia ayi me: «A abu 'kpa e  
li bongo gba ma-a da?» <sup>31</sup> Abhomu-  
o, omukpata gba ani-e agie pi ani  
me: «Mu ngau hana me bhiti okpála  
asulu mu má wakaka! Lele pi mu  
ti da nayi lie me: «Abu 'kpa e li  
ma da-ie?»» <sup>32</sup> Engú bini, Yesu adu  
bha natsitsia 'kpí lingo e ngú nau  
kpála inde amene engú bhomu-o.  
<sup>33</sup> Ølø ango-o adu adje tsulu, ani  
aholo naguku. Padhá de, anga ani  
ambila nani engú inde akolo li ani-  
e ndjindji. Ani ago ati bhú li 'dhu  
Yesu, ani atsia apa ndu 'ngú hana

na kukulɔ pi ani. <sup>34</sup> Abhomɔ-o, Yesu atsia apa pi ani me: «Ndi ɛlɛ-e, nabhuka gba mɔ-o akobho mɔ akobho, nɔ ne guo 'ngú. Mo okobho ne kuo gba mɔ-o akobho.»

<sup>35</sup> Yesu ndjia nga nagama 'ngú de, okpála inde ayie agba Yailo akolo. U atsia apa pi ani me: «Ndili gba mɔ-o akpi. Mo ondála matá Mɔsuno de.»

<sup>36</sup> Engú bini, Yesu 'o 'to e li 'ngú u adu apa e de. Ani apa bha pi Yailo me: «Mo odjé tsulɔ de, du bha ne nabhuka.»

<sup>37</sup> Yesu tsia ziba pi kpála koko nanɔ ne o de. U anɔ bha bhú dabili bini ne Piele ne Djaki, a la di-e Dja ndai Djaki-o. <sup>38</sup> U akolo akuti gba Yailo. Yesu au me okpála má dja dja dja! U adu aku 'gbá naali, u atsia adu di atu 'ue. <sup>39</sup> Abhomɔ-o, ani ali abhú 'ti, ani atsia apa pi uo me: «Yi má dja dja dja di ne naku 'gbá naali me-e ka ni? Ndili-e kpi de, engú bini, ani tila.» <sup>40</sup> Abhomɔ-o, u aholo amɔ ani.

Engú bini, ngaani-e, ani apandja ndu okpála hana kilidjo. Ani aha bha bini 'dyi ndili-e ne 'hi ndili-o, la di ne omɔkpata gba e bata-o. Abhomɔ-o, u atsia ali ne uo abhú tina 'ti inde li ndili-e adu bhú e-o. <sup>41</sup> Ani aha 'kpa ndili-o, ani atsia apa pi ani me: «Talita kumi!» (Tata-a me: «Ndi ɛlɛ-e, ma apa pi mɔ me yie bhúlá!») <sup>42</sup> Ndi ɛlɛ-ango-o (inde adu nani ne kalanga ndjikpa ne ká bhisi ayie kolo bhúlá má gala! Ani atsia aholo nadhuku). Bhú nedhinga bhomɔ-o, bhú 'bhɛ okpála akpina má di! <sup>43</sup> Abhomɔ-o, Yesu agbele 'dje uo kpekpeke me u apá engú ango-o pi kpála belegu de bini. Pipita-a, ani atsia apa pi uo me u ha ezɔ pi ani.

## 6

*Okpála na Nadjaleta ayala Yesu (Tsia bhú Mat. 13:53-58; di ne bhú Luk. 4:16-30.)*

<sup>1</sup> Yesu ayie li bili bhomɔ-o, ani atsia gie lie bhú Nadjaleta, kuti inde ani abhele bhú e-o. Omɔkpata gba ani-e atsia anɔ di bhú dabili bini ne ani. <sup>2</sup> A akolo lie bhú 'kpi nagu gba

omaYuda-a, ani aholo nasuno bhú 'ti nadje líli gba Moidje-o. Abhomɔ-o, bhiti okpála inde adu nadje ani-e, adu angamba naali. U adu apa me: «A asuno ongú inde-e pi ani da? Ani ayie ne imbilangu di ne angu namene ongua ongamba 'ngú inde-e su? <sup>3</sup> A inde-e kpála nagolo ndula-a di? A ko ndili gba Malia di? A ko ndai Djaki ne Djodje, ne Djude, la di ne Simo-o di? Ondaise ani na olisilisi la bhadi bhú dabili bini ne ní sii adi?» Kaka-a, u atsia ayala nabhuka ani.

<sup>4</sup> Abhomɔ-o, Yesu atsia apa pi uo me: «U mamanga polofeta ne ndu bili hana. La-a, u mamanga ani de-e bha bhú kuti inde u azu ani bhú e-o, ne bhú ká omaha ani, ne la di bhú ká okpála na bhú 'bu 'ti gba ani-o.» <sup>5</sup> Ka ndi nabhuka gba uo-o, ani ti nani da namene ongamba 'ngú oo bhelé de. Ani akobho bha obhulɔ kuo bedi me ani nde nga'o 'kpa e pí uo. <sup>6</sup> Abhomɔ-o, ani atsia adu angamba naali ka ndi nabhuka gba uo-o.

*Yesu atima omɔkpata gba e ndjikpa ne ká bhisi bhú kulu*

*(Tsia bhú Mat. 10:5-15; di ne bhú Luk. 9:1-6.)*

Pipita-a, Yesu adholo bhú ndu okuti na ngongo hana me ani nde ngasuno pi okpála. <sup>7</sup> Abhomɔ-o, ani a'i omɔkpata ndjikpa ne ká bhisi gba e-e ngú natima uo bhisi bhisi. Kala natima uo-o, ani aha angu pi uo ngú napandja osisiti bua bhú okpála. <sup>8</sup> Ani atsia aha líli inde-e pi uo me: «Yi ahá ehe bini ngú enú-o de, yi ha bha ndula bini. Yi abí ezɔ de, yi ahá gonia de, yi ató falanga li yi bhú 'ti bongo de. <sup>9</sup> Yi dyi malɛkɛ bhú 'dhɔ yi, engú bini, yi adyí bongo na mbulu bhisi de. <sup>10</sup> Nedhinga yi li lie bhú gudhu bini-e, yi de du bha nasi gba koli kpála bini akólo li 'kpi yi akóto bhú gudhu ango-o lie ko.

<sup>11</sup> I du me okpála na kuti bini nde sia yi de-e, i du la di me u nde dje yi de-e, yi de yie oo, amba yi

pulu ndju doto na kúti bhomu-o li 'dhu yi hana. Bbobhomu-o asúno ngae me yi abala uo ne ndu 'ngú gba o hana abala.» <sup>12</sup> Abhomu-o, omukpata ndjikpa ne ká bhisie agbida. U atsia adu akpokpo ngali gba Ebhe-e pi okpála ne napa pi uo me a ayo me u dji bua o. <sup>13</sup> U adu apandja osisiti bua bhelé bhú okpála. U atsia adu akobho okpála na kuo bhelé ne napulu 'mu pí 'ndji uo.

*Elode Atipasi aha líli me u bhelo Djaa bhulu nabatisa okpála*

*(Tsia bhú Mat. 14:1-12; di ne bhú Luk. 9:7-9.)*

<sup>14</sup> Abhomu-o, 'ngbé ngámá Elode Atipasi adje engú gba Yesu-o, anga 'li ani ayangba nani ne ndu bili hana. Okpála adu apa me: «Djaa bhulu nabatisa okpála azuku! Kaka-a, a bhú ani ne angu namene ongamba 'ngú.» <sup>15</sup> Okpála koko adu apa naao me: «A ko polofeta Eliya.» Do okoko me: «A ko polofeta koko maka suka obhende na kalanu-o.» <sup>16</sup> Li Elode adje engú gba Yesu lie-e, ani atsia apa me: «A ko Djaa bhulu nabatisa okpála! Ma ha nani líli ngama makpe me u kodho ngulu ani. La-a, ani azuku bhomu-o ngae!»

<sup>17</sup> A na paká me Elode atima nani osudha me u nu holo Djaa bhulu nabatisa okpála, amba u to ani bhú tikpu ngubula Elodiade. Elodiade nani ne elo gba ndai ani Filipino. Engú bini, Elode atsia aha nani ani maka elo ka e. <sup>18</sup> Abhomu-o, Djaa adu apa pi Elode me: «Líli ziba pi mu ngú naha elo gba ndai mu-o de.» <sup>19</sup> Kaka-a, Elodiade adu nayala Djaa, ani atsia adu akunda me u bhele ani. Engú bini, ani ti nani da naha líli de me u bhelo ani mandi napa me Elode ziba. <sup>20</sup> La pi Elode, ani ambila nani lie me Djaa ne kpála na ngbingbili di na bubu-o, ani adu namanga ani naali, ani atsia adu di nalila ani. Nedhinga li Elode adu adje 'li Djaa lie, mabhundja gba

Elode adu angbingi naali. Engú bini, ani adu ne djali naali ngú naje ani.

<sup>21</sup> Abhomu-o, li ekpi u azu Elode akolo lie, a adu ekpi na babadha pi Elodiade. Elode amene anokomia pi olubasa gba e, pi ongamási na sudha, di ne pi ongamási na ndu doto na Galilaya hana. <sup>22</sup> Ndili elo gba Elodiade ango-o ago. Ani atsia ali bhú 'ti na anokomia-o. Ani adho ebi, a atsia anga li Elode di ne okpála inde ani a'i o bhú anokomia-o. Abhomu-o, Elode atsia apa pi ndili elo ango-o me: «Yo 'he inde mu nde ne gumu e ka ma, amba ma ha pi mu.» <sup>23</sup> Ani atsia atu silika pi ani me: «Ehe inde mo oyó e ka ma-a, ma há bha pi mu e, abana i du bha nagbo bhusu nau gba ma ko.» <sup>24</sup> Abhomu-o, ndili ango-o akoto, ani anu ayi 'hi e me: «Mo okunda me ma yo ka ngámá ni?» 'Hi ani atsia agie pi ani me: «Yo 'ndji Djaa bhulu nabatisa okpála ko.»

<sup>25</sup> Ani agie lie ne holo agba ngámá. Ani atsia apa pi ani me: «Ma akunda me ha muma mbia inde-e, bhú tsakpa saani, 'ndji Djaa bhulu nabatisa okpála!» <sup>26</sup> Abhomu-o, Elode asia likabhu li bua e naali. Engú bini, ani ti nani da nayayala de ka silika inde ani atu e kala okpála inde ani a'i o bhú anokomia-o. <sup>27</sup> Abhomu-o, Elode atima kolo suka omulila gba e me ani nu, amba ani go ne 'ndji Djaa bhulu nabatisa okpála-o. Mulila ango-o anu, ani atsia akodho ngulu Djaa bhulu nabatisa okpála bhú tikpu-o má tse! <sup>28</sup> Pipita-a, ani aha 'ndji Djaa-a, ani ago ne di bhú tsakpa saani, ani aha pi ndili elo ango-o. Abhomu-o, ndili elo ango-o atsia anu aha pi 'hi e. <sup>29</sup> Li omukpata gba Djaa adje engú ango-o lie, u ago aha kuo ani, u atsia azi.

*Yesu aha ezu pi obhosi kutu bhuluvue*

*(Tsia bhú Mat. 14:13-21; ne bhú Luk. 9:10-17; di ne bhú Dja. 6:1-14.)*

<sup>30</sup> Pita nagie lie ka obhulu titima ndjikpa ne ká bhisie bhú kulu-o,

u apo bhúla o de Yesu. U atsia akpokpo ndu 'ngú inde u amene e di ne bhende u asuno e hana pi ani. <sup>31</sup> Do ani pi uo me: «Yi gógo, ní nu li bili inde li kpála nde lie ade, amba yi guo nga mbo masudha.» Padhá de, anga okpála inde adu nago, di ne obhende adu agie lio-o, u adu bhibhiti naali. Kaka-a, Yesu ne omukpata gba e sia belegu nedhinga ngú nazu 'he de. <sup>32</sup> Abhomu-o, u a'u'u bhú zabu-o, u atsia atapa bha ngao kpi o kpi li bili li kpála nde li e ade ko. <sup>33</sup> Engú bini, okpála bhelé au maka u adu anu lie hana. U atsia ambila me a ko uo. Abhomu-o, okpála ayie ne ndu ogudhu bhelé, u agu holo ne 'dhu o, u atsia akolo li bili ango-o pi Yesu ne omukpata gba e kalanu. <sup>34</sup> Li Yesu akoto lie bhú zabu-o, ani au bhiti okpála-o. Ani adje ndjinga uo, anga u adu maka okandole inde li mulila nde ka o ade ko. Abhomu-o, ani atsia aholo nasuno engú bhelé pi uo.

<sup>35</sup> A akolo lie masikpe de nabi ka ekpi-e, omukpata gba ani-e adyudyo lio de ani. U atsia apa pi ani me: «Ekpi-e ngabi, a la di-e mili bili. <sup>36</sup> Ha kpadji pi okpála inde, amba u nu kala ezu nazu mazu pi o li ongangba di ne bhú okuti na ngongo si.» <sup>37</sup> Engú bini, Yesu agie pi uo me: «Yi ha ezu pi uo ngayi makpe!» Abhomu-o, u atsia ayi ani me: «Ya ayie ne bhiti tia ngú nakala ezu nazu mazu pi bhiti okpála inde-e su?» <sup>38</sup> Abhomu-o, ani ayi uo me: «Mapa ka yi madho? Yi nu tsitsia!» U atsia lie, u atsia apa me: «A ka ya ne mapa bhuluvue, la di ne sungu bhisi.»

<sup>39</sup> Abhomu-o, Yesu atsia aha líli pi uo me: «Yi pa pi ndu okpála hana me u popo bhúla o, amba u dudu kuto pi ulu-o.» <sup>40</sup> U apopo bhúla o, u adulu kuto: okoko kámá kámá, okoko ndjikpa bhuluvue ndjikpa bhuluvue. <sup>41</sup> Abhomu-o, Yesu aha mapa bhuluvue ne sungu bhisi-o. Ani atsia 'kpi ne abhúla, ani atsia agie heni pi Ebhe nganga. Pipita-a, ani atsia agugumu mapa ango-

o, ani aha pi omukpata gba e-o, amba u gapa li okpála. Ani atsia agapa di sungu bhisi-e pi ndu okpála hana. <sup>42</sup> Ndu uo hana azu 'he, u atsia a'u'u má kpe-e kpe-e! <sup>43</sup> Pipita-a, omukpata alo dú mapa ne sungu inde atigala-o, a atsia abebedhe okili ndjikpa ne ká bhisi. <sup>44</sup> Bhú ká obhende azu 'he ango-o, obhosi nani kutu bhuluvue. (Mandi natanga olisi ne ongisi.)

*Yesu adholo pi 'ngu*

*(Tsia bhú Mat. 14:22-33; di ne bhú Dja. 6:15-21.)*

<sup>45</sup> Pipita kolo me-e, Yesu apa pi omukpata gba e me: «Yi 'u'u bhú zabu. Yi kodho 'kpi muma kalanu ayi 'ngu li pápá na gudhu na Betsaida li nedhinga ma nde nga lie naha kpadji pi okpála ko.» <sup>46</sup> Pita nagbo bhusu e ne uo-o, ani anu a'u apí 'ta ngú nayo Ebhe. <sup>47</sup> Li ekpi abi lie, omukpata adu ne zabu atu 'ngu, Yesu atsia atigala apí 'go kpi e kpi. <sup>48</sup> Ani au me omukpata gba ni-e ale nadjele zabu pima anga anvi adu amene uo kpekpeke. Abhomu-o, akolo lie bhú 'gbá 'ngu na bini-e, ani aholo nadholo pi 'ngu, ani atsia akolo masikpe de uo. Ani di me ne uo mane. <sup>49</sup> Engú bini ngauo-o, u au ani lie ngadholo pi 'ngu-o, u abhundja naao me a ko igbadyibhe. Kaka-a, u aholo natu 'ue. <sup>50</sup> Padhá de, anga u adu au ani ndu o hana. Kaka-a, u atsia abedhe ne tsulu na kuo kuo. La-a, ani atsia apa bha kolo pi uo me: «Yi sia kpeke bua! A ko ma, yi adjé tsulu de!»

<sup>51</sup> Abhomu-o, ani a'u nganda uo bhú zabu-o, anvi-e a'o nape. U atsia adu ne nangamba na kuo kuo. <sup>52</sup> Padhá de, anga ngamba 'ngú inde ani amene e li mapa-a, u mbila nga nani de ka ndi nabhuka gba o-o.

*Yesu akobho kpála na kuo bhú ndu doto na Genedjaleta*

*(Tsia bhú Mat. 14:34-36.)*

<sup>53</sup> Pita u agulu ekpe na Galilaya lie, u atsia akolo bhú ndu doto

na Genedjaleta. Abhomu-o, u atsia agbite zabu lingo 'kpø-o. <sup>54</sup> U aze lie bhú zabu-o me-e, okpála ambila bha kolo me Yesu ngae inde. <sup>55</sup> Abhomu-o, okpála adji ndu doto ango-o libhomu ne holo. U aholo nabi obhulu kuo pí okalagba, ne nanu ne uo li bili inde u adu adje lie me Yesu li e-o. <sup>56</sup> Ndu bili hana inde li ani adu anu li e, li ongangba, bhú ogudhu, i du di-e bhú okuti, okpála adu nabu obhulu kuo bhú odaposo. Obhulu kuo ango-o adu akikiliki lio pí ani me ani ha kpadji me o bu nga bha 'kpa o li 'so bongo li ani-o. A na paká me ndu okpála hana inde adu nabu 'kpa o li ani-e, adu nakobho.

## 7

*Ongú inde ngayie li bua kpála nga'o kpála sisiti kala Ebhe ngae (Tsia bhú Mat. 15:1-9.)*

<sup>1</sup> Abhomu-o, omuFalisai di ne omusuno koko na líli gba Moidje inde ayie nani bhú Yelusalema-a, ago apo bhúla o de Yesu. <sup>2</sup> U au me okoko bhú ká omukpata gba Yesu-o ngazu 'he mandi navulu 'kpa o kalanu. Kaka-a, omuFalisai adu abhundja me omukpata bhomu-o bubu kala Ebhe ade. <sup>3</sup> (Padhá de, anga omuFalisai ne ndu omaYuda hana ngalila odasundu gba onguo ogbi o-o. Kaka-a, kala nazu 'he-e, u vuvulu ngaiza 'kpa o i lí mali. <sup>4</sup> † du me u nde kolo bhú daposoo, u vuvulu 'kpa o ndu 'kpí hana kala nazu 'he. U ngalila di olíli koko u asia e ka onguo ogbi o naali maka: navulu okópo, obhende maka zulubho di ne obhende maka zikio.) <sup>5</sup> Abhomu-o, omuFalisai di ne omusuno na líli-e ayi Yesu me: «Omukpata gba mu-o ngakpata 'ngú maka li dasundu gba onguo ogbi ní apa lie ade. U ngazu 'he me u nde vulu 'kpa o de. U ngamene la mo-o ka ní?» <sup>6</sup> Yesu agie pí uo me:

«Polofeta Isaya pa nani tala li 'ngú gba yi-e me, yi ne obhulu kali. Ani aye nani bhú bhuku gba e me:

<Okpála inde-e ngamanga ma bha ne 'bhø o padhá.

La-a, bua uo de ma tsutsu.

<sup>7</sup> Nadhøge gba uo zi bhú djila ma de.

Padhá de, anga ongu inde u ngasuno e

a ko bha bhende i ngayie ka okpála.†>

<sup>8</sup> Yi nga'o ká olíli gba Ebhe-e ngú nazi 'ndji yi bhú olíli gba onguo ogbi yi.»

<sup>9</sup> Ani atsia apa matá pí uo me:

«Yi nga'o olíli gba Ebhe-e li ngongo ngubula nalila odasundu gba onguo ogbi yi-o. <sup>10</sup> Padhá de, anga Moidje

apa nani me: <Manga 'dyi mu ne 'hi mu mamanga.> Ani atsia apa matá

di me: <Kpála bhende i sobho 'dyi e, i du di-e 'hi e, a ayo me u bhøle

ani mabhøle.>† <sup>11</sup> Engú bini, ngayie, yi ngasuno pí okpála me, kpála

bini ti da napa pí 'dyi e, i du di-e 'hi e me: <Mbu li ma, anga ehe

inde ayo igini me ma ha e pí mu-o, a ko makiso inde ma adji naha

e pí Ebhe.> <sup>12</sup> Ngayi omuFalisai-e, yi ngaziba bhomu-o pí okpála me u

améne 'he pí odyi o di ne pí ohi o belegu de bini. <sup>13</sup> Kaka-a, yi bhomu-

o ngalila odasundu gba onguo ogbi yi-e ane eli gba Ebhe-e mane. Yi la

di ngamene ndu ngua ongu bhomu-o bhelé.»

<sup>14</sup> Pipita-a, Yesu a'i matá bhiti okpála-o. Abhomu-o, ani atsia apa

pí uo me: «Yi dje ma ndu yi hana, amba yi kø la di mboli engú inde:

<sup>15</sup> Ehe bini ade inde yi zu e, i 'ó yi sisiti-o. La-a, engú inde ngakoto li

bua yi-e, maka oeli di ne okulu-o, a bhomu-o ongu inde nga'o yi sisiti-o.»

[ <sup>16</sup> \*]

<sup>17</sup> Li Yesu ayie lie bhú ká bhiti okpála bhomu-o, ani atsia ali abhú

'ti-e, omukpata gba ani atsia ayi ani

† **7:7** 7:6-7 Tsia bhú Isa. 29:13. † **7:10** 7:10 Tsia bhú Eki. 20:12; ne bhú Det. 5:16; ne bhú Eki. 21:17; di ne bhú Lev. 20:9. \* **7:16** 7:16 Lukuluku inde-e, a bhú obhuku koko na didili u aye e bhú eli na giliki ade. [La bhú okoko-o, u aye me: «Kpála inde ne djedje ngú nadje 'kpí-e, ani de dje.»]



li ta gbitaku bhomu-o. <sup>18</sup> Abhomu-o, Yesu atsia apa pi uo me: «Ngayi di-e, yi mbila 'ngú inde-e di? Yi mbila de me ndu 'he hana li kpála ngazu e ti da na'o ani siti kpála de-e di? <sup>19</sup> Padhá de, anga ezú angoo ngali li bhobua ani ade. Engú bini, a ngali bhú 'bu ani. Pipita-a, i tsia kóto.» (Yesu adu apa bhomu-o me ndu 'zu hana ndjindji ngú nazuzu.) <sup>20</sup> Abhomu-o, Yesu atsia abu tata-a me: «Engú inde ayie li bua kpála, a bhomu-o bhende i nga'o kpála sisitio. <sup>21</sup> Padhá de, anga osisiti 'ngú inde ngayie li bhobua kpála ngae inde: omabhundja na sisiti, zabhe, ezi, nabhili okpála, <sup>22</sup> nakunda olisi, i du di-e obhosi gba okpála koko, kundutia, gumu namene osisiti 'ngú, kali, bambakuya, gumu 'he gba okpála koko, osobho, 'ngbé 'ndji di ne pulu 'ngú. <sup>23</sup> Ndu osisiti 'ngú bhomu-o hana ngakoto li bhobua kpála, i tsia 'o kpála angoo sisiti bhú djila Ebhe.»

*Gandji ele bini abhuka Yesu  
(Tsia bhú Mat. 15:21-28.)*

<sup>24</sup> Pipita-a, Yesu ayie oo, ani atsia atapa bhú doto inde lingo gudhu na Tile. Ani ali bhú 'ti bini, ani tsia kunda de me u mbila de me ni oo de. Engú bini, ngali nago ka ani-e adje lie ne ndu bili hana. <sup>25-26</sup> Ma 'li ma me-e, gandji ele bini adje 'ngú gba Yesu-o. Ele angoo du nani maYuda de. Du ani ayie nani bhú ndu doto na Fenisia, bhú doto na Silia. Ndili gba ani na ele adu me siti bua nde bhú ani. Abhomu-o, ele bhomu-o ago ati bhú li 'dhu Yesu, ani atsia ayo ka Yesu me ani gbe siti bua bhú ndili ele gba ni-o. <sup>27</sup> Yesu atsia apa pi ani me: «'O nga ongisi me u zu 'he gba o, amba u 'u'u. Padhá de, anga a ndjindji ade me u ha mapa gba ongisi ngú nabhibhike pi ongisi bulu-o de.» <sup>28</sup> Ele angoo atsia agie pi Yesu me: «Ngámá, belegu ongisi bulu ngazu okulu 'zu bhende i ngabala asa misa-o.» <sup>29</sup> Yesu apa pi ani me: «Bha bini ka 'li mu bhomu-o,

nunu, siti bua-a akoto bhú ndili gba mu na ele-o akoto.» <sup>30</sup> Abhomu-o, ele angoo agie lie agba e, ani atsia abhaka ndili-e me ani nde asi pi mako me siti bua nde akoto bhú ani akoto.

*Yesu akobho bhoko inde i bhú 'ngú de, i dje di 'kpí de*

<sup>31</sup> Pipita-a, Yesu ayie bhú ndu doto na gudhu na Tile. Ani apu bhú Sidona. Ani anu li pápá na ekpe na Galilaya, ani atsia akolo bhú ndu doto na Ogudhu Ndjikpa. <sup>32</sup> U atsia ago pi ani ne bhoko bini inde i dje 'kpí de. Bhoko angoo da nagama 'ngú ka ani adu kpekpeke. U atsia akikiliki lio pi Yesu me ani 'o 'kpa e pí bhoko angoo, amba ani kobho.

<sup>33</sup> Abhomu-o, Yesu atsia aha ani, ani anu ne ani li ngongo masudha de bhiti okpála-o. Ani atsia 'o likpa e bhú 'dje ani. Ani aku ngusu li likpa e, ani atsia 'o pí 'mi bhoko angoo ko. <sup>34</sup> Pipita-a, Yesu atsia 'kpí ne abhúla, ani awo má fe, ani atsia apa pi bhoko angoo me: «Efata!» (A akunda napa me: «A ayo me bhulu limu!») <sup>35</sup> Ma 'li ma me-e, 'dje ani abhulu lie, 'mi ani ayaka, ani aholo agama 'ngú ndjindji. <sup>36</sup> Yesu atsia aha líli pi okpála me u avé 'ngú angoo pi kpála belegu de bini. Engú bini, ani adu ayoko uo lie, engú angoo tsia dje yoko de. <sup>37</sup> U adu angamba na kuo kuo. Kaka-a, u atsia adu apa me: «Ani ngamene ndu 'ngú hana ndjindji. Ani ngaha pi obhende i dje 'kpí de-e naje 'kpí. Ani ngaha pi obhende i bhú 'ngú de-e nabhu 'ngú.»

## 8

*Yesu aha 'zu pi okpála kutu badha  
(Tsia bhú Mat. 15:32-39.)*

<sup>1</sup> Bhú oekpi bhomu-o, bhiti okpála apo matá bhúla o de Yesu. Abhomu-o, li ehe nazu mazu du la lie ka uo de-e, Yesu atsia a'i omukpata gba e, ani atsia apa pi uo me: <sup>2</sup> «Ma ngadje ndjinga bhiti okpála inde, anga akolo mbia inde-e 'kpí bata u

bha ngadu de ma si, ehe nazu mazu la matá di ka uo ade. <sup>3</sup> I du me ma nde agie uo agba o ne gumu mo-o, angu uo ndjia li kpadji, anga a di bhú ká uo ne okpála bhende ayie tsutsutsu.» <sup>4</sup> Omukpata gba ani agie pi ani me: «Ní aú ezú bhú mili bili si-e ngubula nazuzu ka uo su?» <sup>5</sup> Abhomu-o, Yesu atsia ayi uo me: «A ka yi ne mapa madho?» U agie me: «Mananika.»

<sup>6</sup> Abhomu-o, ani apa pi bhiti okpála me u dudu kuto. Ani aha mapa mananika-o, ani agie heni pi Ebhe. Ani agugumu mapa-o, ani atsia aha pi omukpata gba e me u gapa li okpála. U atsia agapa li uo. <sup>7</sup> U adu di nani ne djedje osungu. Ani agie di heni pi Ebhe ngu osungu-o, ani atsia apa me u gapa di osungu-o li uo. <sup>8</sup> Okpála azu 'he, u a'u'u. Pipita-a, omukpata apo bhula dudu inde atigala, atsia abebedhe okili mananika. <sup>9</sup> Okpála inde adu oo, u adu masikpe de kutu badha. Pipita-a, Yesu atsia aha kpadji pi uo. <sup>10</sup> Kolo má gala me-e, ani a'u ne omukpata gba e bhú zabu, u atsia atapa bhú ndu doto na Dalamanutu.

*Omufalisai ayo ngamba 'ngú bini ka Yesu*

*(Tsia bhú Mat. 16:1-4.)*

<sup>11</sup> Abhomu-o, omufalisai ago, u aholo namene kpekebhe ne Yesu. U adu akunda nale ani. Kaka-a, u ayo ka ani me ani mene nga bha pi o ngamba 'ngú bini inde asuno me Ebhe atima ani ngae. <sup>12</sup> Li Yesu adje lie mo-o, ani atsia apa me: «Okpála na naki inde-e ngayo ngamba 'ngú ngubula ni? Ma apa pi yi na paká me, ma méne ngamba 'ngú bini pi uo de!» <sup>13</sup> Ani a'o ka uo oo, ani a'u matá bhú zabu, ani atsia akodho 'kpí ayi 'ngu.

*Yi lila liyi ka levile gba omufalisai di ne bhe gba Elode malila*

*(Tsia bhú Mat. 16:5-12.)*

<sup>14</sup> Li omukpata a'u lie bhú zabu-o, u a'ili 'to o li naha mapa. Kokoli adu bha ka uo bini bhú zabu-o.

<sup>15</sup> Abhomu-o, Yesu atsia agbele dje uo me: «'E-e! Yi lila liyi ka levile gba omufalisai di ne bhende gba Elode malila.» <sup>16</sup> Omukpata aholo namene kpekebhe sunda o me: «Ani ngapa mo-o, anga ní go ne mapa de.»

<sup>17</sup> Li Yesu ambila engú inde u adu apa e sunda o lie, ani atsia ayi uo me: «Yi ngamene kpekebhe sunda yi li 'ngú na mapa li 'to yi a'ili li e ka ni? Yi ke nga mbolimboli di? Yi mbila la di di? Yi ne nabhuka adi? <sup>18</sup> Ali yi ne djidjila, yi ngau 'kpí adi ka ni? Ali yi ne djedje, yi ngadje 'kpí adi ka ni? 'To yi a'ili li ndu ongamba 'ngú inde ma amene e hana? <sup>19</sup> Nedhinga ma aku nako obhosi kutu bhuluvue lie ne mapa bhuluvue, dudu inde atigala-a, yi abebedhe nako okili ne di madho?» U agie pi ani me: «Ndjikpa ne ká bhisi.» <sup>20</sup> Abhomu-o, Yesu atsia ayi matá uo me: «La di-e, mapa mananika inde ma aku nako okpála kutu badha ne e, dudu inde atigala-a, yi abebedhe nako okili ne di madho?» U agie me: «Mananika.» <sup>21</sup> Abhomu-o, Yesu atsia apa pi uo me: «Yi ke nga mbolimboli sii di?»

*Yesu akobho kpála bini inde i u 'kpí de*

<sup>22</sup> Pipita-a, Yesu ne omukpata gba e akolo bhú gudhu na Betesaida. Oo, okpála ago ne kpála bini inde i u 'kpí de-e pi Yesu. U atsia akikiliki lio pi ani me, ani 'o 'kpa e li ani amba ani kobho. <sup>23</sup> Yesu aholo 'kpa kpála inde i u 'kpí de-o. Ani agbe ani bhú gudhu-o. Ani aku ngusu e bhú djila ani, ani abu 'kpa e li ani, ani atsia ayi ani me: «Mu ngau mbo-o 'he uu?» <sup>24</sup> Kpála ango-o atsia 'kpí li ngo e, ani atsia apa me: «Ma ngau okpála, u mana ndula inde ngadhuku.» <sup>25</sup> Pipita-a, Yesu abu matá 'kpa e li djila ani. Kpála ango-o atsia 'kpí má suu, ani atsia adu au 'kpí ndjindji. Ani atsia akobho. <sup>26</sup> Abhomu-o, Yesu agie ani agba e, ani atsia apa pi ani me: «Mo onú abhú gudhu de.»

*Piele apa me Yesu ne Kilisito*  
(*Tsia bhú Mat. 16:13-20; di ne bhú Luk. 9:18-21.*)

<sup>27</sup> Pipita-a, Yesu ne omukpata gba e anu bhú okuti inde li ngo gudhu na Sedjale gba Filipino-o. Li kpadji-e, ani ayi uo me: «Okpála ngapa li ma me ma ne da?» <sup>28</sup> U agie pi ani me: «Okoko ngapa me mu ne Djaa bhulu nabatisa okpála, okoko me mu ne Eliya, okoko matá me mu ne suka opolofeta .» <sup>29</sup> Yesu atsia ayi uo me: «A la yi-e, yi ngapa naayi me ma ne da?» Piele atsia agie pi ani me: «Mu ne Kilisito .» <sup>30</sup> Abhomu-o, Yesu atsia aha líli pi uo kpekpeke me u apa 'ngú gba ni-e pi kpála bini de.

*Yesu akpo 'ngú pindji nakpi ne nazuku ka e*  
(*Tsia bhú Mat. 16:21-28; di ne bhú Luk. 9:22-27.*)

<sup>31</sup> Pipita-a, Yesu aholo nasuno pi omukpata gba e me: «A ayo me ngama Ndili gba kpála-a, ma dje likabhu naali. Obhelesi okpála, ong-bengbe odimandø gba Ebhe di ne omusuno na líli gba Moidje ayála ma. U tsia bhélø ma. La-a, pita ekpi bata-a, ma tsia zuku.» <sup>32</sup> Ani du apa 'ngú ango-o lie ne tsulu de-e, Piele atsia agbele ani li ngongo. Do ani pi Yesu de-e: «Mo opá mo-o de.» <sup>33</sup> Engú bini, Yesu adji lie, ani atsia omukpata gba e-o, ani ambe bhú 'ndji Piele me: «Yie de ma mayie, ngamu Satana ! Padhá de, anga mabhundja gba mu-o, a ko bhende gba Ebhe-e de. Engú bini, a ko bhende gba okpála.»

*A ayo namene ni ngú nakpata Yesu-o?*

<sup>34</sup> Pipita-a, Yesu apo bhula bhiti okpála di ne omukpata gba e de e. Ani atsia apa pi uo me: «I du me kpála nde akunda nakpata ma-a, a ayo me ani 'o nabhundja engú gba e makpe, ani bi la di kulusi gba e, amba ani kpata ma. <sup>35</sup> Padhá de, anga kpála bhende ngalila mukobho gba e pi e makpe, akpi makpi. La-a, kpála bhende ngaha mukobho gba e

libhomu ngubula ma di ne ngubula Bádha Ngali gba Ebhe-e, ani akóbho makobho. <sup>36</sup> I du me kpála nde asia ndu tia na doto hana, tata-a pi ani ne ni i du me ani nde akpi na duduma-a? <sup>37</sup> Ehe bini ade inde li kpála-kuti ti da na'o e bhú da mukobho gba e. <sup>38</sup> I du me kpála bini nde adje numu li ma di ne li oeli gba ma kala obhulu namene sisiti 'ngú na naki inde-e, inde i bhuka di Ebhe ne bua o bini de-e, ngama Ndili gba kpála ma adjé bhadi numu li ani nedhinga ma agó lie bhú sangu gba 'Dyi ma bhú dabili bini ne oandjelu na bububu ko.»

## 9

<sup>1</sup> Yesu atsia apa matá pi uo me: «Ma apa pi yi na paká me, okpála koko bhú ká obhende si-e, mú padhá de, u aú ngaiza Nau gba Ebhe-e me, a nde ngago ne angu kalanu.»

*Kute Yesu ayipa ka sangu gba Ebhe*

(*Tsia bhú Mat. 17:1-13; di ne bhú Luk. 9:28-36.*)

<sup>2</sup> Pita ekpi madhia, Yesu aha Piele ne Djaki, di ne Djaa , ani anu ne uo titi o api 'ndjá 'ta. Bha si me-e, ani adji lie kala uo kpi, <sup>3</sup> bongo gba ani avu má tuu! Píla doto libhomu-o, kpála bini ti da navulu bongo, i tsia vú mo-o de. <sup>4</sup> Kolo me-e, Eliya ne Moidje aze li uo, u atsia aholo agama 'ngú ne Yesu. <sup>5</sup> Piele atsia apa pi Yesu me: «Musuno, a ndjindji maka ní nde lie si. Ziba pi ya me ya yiki oti ngbangbali bata: bini pi mu, bini pi Moidje, bini pi Eliya.» <sup>6</sup> Engú bini, Piele du ambila de me ni apa pi-ie de, anga ngaani makpe ne omukpata bhisi inde adu bhú dabili ne ani-e, adu me u nde abedhe ne tsulu na kuo kuo. <sup>7</sup> Abhomu-o, ndindi ago abuku uo má kagbu! Eli atsia akoto bhú ndindi ango-o me: «Kpála inde-e, a ko Ndili gba ma inde ma akunda e naali-o. Yi dje ani!» <sup>8</sup> Ma gala kolo me-e, li omukpata atsia 'kpi lie lingo o-o, u

u matá kpála bini de, bha Yesu kpi e kpi bhú dabili bini ne uo.

*Omukpata ayi 'ngú pindji polofeta Eliya*

<sup>9</sup> Li Yesu ne omukpata gba e adu akè eta-a lie, ani atsia apa pi uo me: «Yi apá engú yi au e inde e pi kpála belegu de bini, akólo li nedhinga inde ngama Ndili gba kpála ma azúku lie bhú ká okpála inde amu ko.» <sup>10</sup> Abhomu-o, u awo eli bhomu-o li bua o, u atsia adu ayi lio sunda o pépé me: «Nazuku bhú ká okpála inde amu-o, ani akunda igini napa bhomu-o pi?»

<sup>11</sup> Pipita-a, u ayi Yesu me: «Ka ni li omusuno na líli gba Moidje ngapa lie me kala nago ka Masiya-a , a ayo me Eliya go ngaiza kalanu-o?» <sup>12</sup> Yesu atsia agie pi uo me: «A na paká me Eliya ngago ngaiza kalanu, naleke ndu 'ngú hana. Engú bini, ka ni u aye nani lie bhú Bhuku gba Ebhe-e me, Ndili gba kpála adjé likabhu naali, la di-e li okpála tsia yála ani-e? <sup>13</sup> La-a, ma apa pi yi me, Eliya ago nani ago, okpála atsia ato mbolo li ani má gbekpe maka u a aye lie bhú Bhuku gba Ebhe ko.»

*Yesu akobho ndili na bhobhoko li siti bua adu nadu bhú e (Tsia bhú Mat. 17:14-21; di ne bhú Luk. 9:37-43a.)*

<sup>14</sup> Li Yesu ne omukpata bata akè eta-a lie, u anu abhaka omukpata koko-o. A abhaka me bhiti okpála nde asa uo ngbalina. La di-e, omusuno na líli nde ngamene kpekebhe ne omukpata ango-o. <sup>15</sup> Li bhiti okpála-a au Yesu lie, ndu uo hana angamba, u atsia agu holo ngú nago ayi ani. <sup>16</sup> Yesu ayi omukpata gba e me: «Yi ngamene kpekebhe ne uo pindji ni?»

<sup>17</sup> Kpála bini bhú ká bhiti okpála bhomu-o, atsia agie pi ani me: «Musuno, ma ago ne ndili gba ma-a pi mu me kobho ani, anga a bhú ani ne siti bua inde ngagbite 'bhe ani me ani agáma 'ngú de. <sup>18</sup> Ndu nedhinga

hana li siti bua ango-o agbugbulu ani lie, a ngagu 'i ani kuto, li efu holo naze bhú 'bhe ani, ani holo nazu tate e, kute ani kpekpeke má ki ki ki! Ma ayo ka omukpata gba mu-o me u gbe siti bua ango-o, engú bini, u ale pima.»

<sup>19</sup> Yesu atsia apa pi uo me: «Ngayi okpála na naki-e, nabhuka bhú yi ade! Ma adú matá ne yi ngubula nedhinga madho? Ma akibila matá yi ngubula nedhinga madho? Yi go ne ndili-e mu ma ei.» <sup>20</sup> Abhomu-o, u ago ne ani pi Yesu. Li ndili-e au Yesu lie, siti bua adyiki ani má djigi djigi, ani agu 'i ani kuto! Ndili-e aholo nawawala kuto me efu nde ngaze bhú 'bhe ani. <sup>21</sup> Yesu atsia ayi 'dyi ndili-e me: «Kuo inde e amene ani me-e ngubula kalanga madho?» Ani agie me: «Nayie bhú ndili li ani. <sup>22</sup> La di-e, siti bua ango-o ngagu 'i ani bhú djua di ne bhú 'ngu bhutsibhutsi ngú nabhele ani. Engú bini, i du me mu nde ti da namene 'he-e, mu de dje mbo ndjinga ya, teteke ya!»

<sup>23</sup> Yesu agie pi ani me: «Mu ngapa me: <I du me mu nde ti da namene 'he.> La-a, ndu 'ngú hana ti da namene lie pi kpála inde ngabhuka ko.» <sup>24</sup> Má gala kolo me-e, 'dyi ndili-e asula me: «Ma abhuka. La-a, go teteke ma, amba nabhuka gba ma-a kolo kpekpeke!» <sup>25</sup> Li Yesu au bhiti okpála ngago ne holo li papá gba o lie, ani atsia ambe bhú 'ndji siti bua me: «Ngamu siti bua inde ngagbite 'bhe ndili inde-e ne nanini 'dje ani, ma aha líli pi mu me: <Koto bhú ndili inde, la di-e, mo ogie matá limu bhú ani belegu de bini!>» <sup>26</sup> Abhomu-o, siti bua atu 'ue, ani adyiki ndili-e má djigi djigi, pipita-a, ani atsia akoto bhú ani! Ndili na bhobhoko ango-o, akolo maka kpála inde akpi. Okpála bhelé adu apa me: «Ani akpi.» <sup>27</sup> Engú bini, Yesu aholo 'kpa ani, ani a'e ani bhúlá, ndili-e atsia alu malu.

<sup>28</sup> Pipita-a, Yesu ne omukpata gba e agie lio li bili u adu nadu li e-o.

Nedhinga u adu lie ne uo titi o-o, u atsia ayi ani me: «Ka ni ya ti igini lie da nagbe siti bua bhomu-o bhú ndili inde-e lie de-e?»<sup>29</sup> Yesu atsia agie pi uo me: «U ti da nagbe ngua bua bhomu-o bha bini ne mayo.»

*Yesu akpo matá 'ngú pindji nakpi ne nazuku ka e*  
(*Tsia bhú Mat. 17:22-23; di ne bhú Luk. 9:43b-45.*)

<sup>30</sup> Li Yesu ne omukpata gba e ayie lie oo, u agulu ndu doto na Galilaya. Yesu du akunda de me okpála mbila bili inde ni adu li e de, <sup>31</sup> anga ani adu asuno pi omukpata gba e-o. Ani adu apa pi uo me: «U apú ngbángá Ndili gba kpála pi okpála, li okpála ango-o tsia bhélø ani. La-a, pita 'kpi bata-a, ani tsia zúku.»<sup>32</sup> Engú bini, omukpata du ambila nani ta engú bhomu-o de. U adu la di ne tsulu ngú nayi ani.

*A ngebéngbé da?*  
(*Tsia bhú Mat. 18:1-5; di ne bhú Luk. 9:46-48.*)

<sup>33</sup> Abhomu-o, Yesu ne omukpata gba e anu bhú gudhu na Kapalanauma. Pipita-a, u ali lie bhú 'ti bini me-e, Yesu atsia ayi omukpata gba e me: «Yi de igini ngamene kpekebhe sunda yi li kpadji-e pindji mangua 'ngú dho?»<sup>34</sup> Engú bini, u andjili má bulu, anga li kpadji-e, u amene kpekebhe sunda o me a ngebéngbé bhú ká o da-ie.<sup>35</sup> Abhomu-o, Yesu adu kuto. Ani apo bhúla omukpata ndjikpa ne ká bhisi-e de e masikpe. Ani atsia apa pi uo me: «I du me kpála bini nde akunda nadu kpála na kalanu-o, a ayo me ani du pita ndu okpála hana, ani du di bali gba ndu okpála koko hana.»

<sup>36</sup> Pipita-a, ani aha mboye ndili, ani a'o ani bhú ká uo, ani abi ani sa 'kpa e, ani atsia apa pi uo me: <sup>37</sup> «Kpála inde ngasia mboye

ndili maka bhende-e ka 'li ma-a, ani ngasia bhomu-o ma makpe. La di-e, kpála inde ngasia ma-a, ani sia bha bini ma kpi ma kpi de, engú bini, ani ngasia di bhomu-o 'Dyi ma inde atima ma ko.»

*Kpála inde i gu ní de-e, a ko naaní kpála*

(*Tsia bhú Luk. 9:49-50.*)

<sup>38</sup> Abhomu-o, Djaa apa pi Yesu me: «Musuno, ya au kpála bini ngapandja osisiti bua ne 'li mu. Ya atsia ayoko ani, anga a ko suka ní de.»<sup>39</sup> Engú bini, Yesu agie pi uo me: «Yi ayoko ani de, anga kpála inde amene ngamba 'ngú ne 'li ma-a, ti da napa kolo siti 'ngú li ma pipita-a de.<sup>40</sup> Padhá de, anga kpála inde i gu ní de-e, a ko naaní kpála.<sup>41</sup> Ma apa pi yi na paká me, kpála inde ngaha kópo na engu pi yi bini kabula me yi ne okpála gba Kilisito-o, ani asia makalá gba e masia.»

*Ongú inde ngato kpála bhú siti 'ngú-o*

(*Tsia bhú Mat. 18:6-9; di ne bhú Luk. 17:1-2.*)

<sup>42</sup> Yesu atsia apa matá pi omukpata gba e me: «Kpála inde ngato suka odjedje ongisi inde ngabhuka ma inde-e bhú siti 'ngú-o, a pi ani ndjindji me u gi ngingi tangulu ani, amba u bhike ani bhú 'ngbé 'ngu.<sup>43</sup> I du me 'kpa mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne koli 'kpa mu bini, ane mane nanu ka mu bhú djua na duduma ne duduma ne 'kpa mu bhisi hana. [ <sup>44</sup> \*]

<sup>45</sup> I du di me 'dhu mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne koli 'dhu mu bini, ane mane me u bhike mu bhú djua na duduma ne duduma

\* **9:44** 9:44 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngazu kate kpála mumu de, djua babulu la di-i de.] † **9:46** 9:46 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngazu kate kpála mumu de, djua babulu la di-i de.]

ne 'dhu mu bhisi hana. [ 46 †] 47 †  
 du me li djila mu nde ngato mu  
 bhú siti 'ngú ngae-e, mu de gbe. A  
 ndjindji pi mu nali bhú Nau gba  
 Ebhe-e ne koli li djila mu bini, ane  
 mane me u bhike mu bhú djua na  
 duduuma ne duduuma ne djila mu  
 bhisi hana. 48 Oo, <okoké maka  
 bangili inde ngazu kute kpála mumu  
 de, djua bubulu la di-i de.†> 49 Padhá  
 de, anga Ebhe alé nabhuka gba ndu  
 okpála hana bhú djua, amba a kolo  
 kpekpeke.

50 Ngutu ne bádha 'he. Engú  
 bini, i du me a nde abolo, u ti da  
 nagie matá kpokpo bhúbhú ne ni?  
 Nabhuka gba yi du maka ngutu inde  
 i bolo de, yi du la di ne guo 'ngú  
 sunda yi.»

## 10

*Nasuno pindji nagbo bhusu o ne  
 ele*

*(Tsia bhú Mat. 19:1-12; di ne bhú  
 Luk. 16:18.)*

1 Li Yesu ayie lie oo, ani anu bhú  
 ndu doto na Yudaya, ayi 'ngu na  
 Djuludani. Bhiti okpála ago matá  
 de ani. Ani aholo nasuno pi uo  
 maka ani amemene lie-o. 2 Abhomu-  
 o, omufalisai koko adyudyo lio de  
 Yesu, ngú naholo ani li 'li e. Kaka-  
 a, u atsia ayi ani me: «Lili gba ní-e  
 aziba uu me bhoko gbo bhusu e ne  
 ele gba e?» 3 Yesu atsia agie pi uo  
 me: «Moidje aha nani pi yi li 'ngú  
 bhomu-o mangua líli dho?» 4 U atsia  
 apa me: «Moidje aha nani pi bhoko  
 kpadji me ani ye balua ngú nagbo  
 bhusu o ne wala e, amba ani gie ani  
 agba o.»

5 Engú bini, Yesu agie pi uo me:  
 «Moidje aye nani líli bhomu-o pi yi  
 ka kpéke 'ndji gba yi-o. 6 La li lilita-  
 a, nedhinga li Ebhe abho ndu 'he  
 lie hana-a <ani abho uo bhoko ne  
 ele.†> 7 <Kaka-a, bhoko a'li ka 'dyi  
 e ne 'hi e, ani tsia dhédhe li wala e,  
 8 ndu uo bhisi hana kólo koli kpála  
 bini.†> Abhomu-o, uo matá okpála

bhisi ade. Engú bini, u akolo koli  
 kpála bini. 9 Kaka-a, a ayo de me  
 kpála-kuti gbo bhusu uo de, anga  
 Ebhe akpètse uo ngae.»

10 Li Yesu ne omukpata gba e agie  
 lio lie li bili u adu nadu li e, u atsia  
 ayi ani li 'ngú ango-o. 11 Yesu apa pi  
 uo me: «† du me bhoko bini nde a'e  
 wala e ngú naha ele koko-o, ani a'o  
 bhomu-o ká wala e na kalanu-o ngú  
 nakunda ele koko. 12 † du la di me  
 ele nde atse 'ko e ngú naha bhoko  
 koko-o, ani a'o bhomu-o ká 'ko e ngú  
 nakunda bhoko koko.»

*Yesu atuko bisagu pí 'ndji ongisi  
 (Tsia bhú Mat. 19:13-15; di ne bhú  
 Luk. 18:15-17.)*

13 Abhomu-o, okpála adu ago ne  
 ongisi gba o me Yesu 'o 'kpa e pí uo,  
 ne natuko bisagu pí uo. Engú bini,  
 omukpata ake 'ngú lio pi okpála  
 ango-o. 14 Yesu au lie mo-o, bua  
 ani ake, ani atsia apa pi omukpata  
 gba e me: «Yi 'o ongisi me, u go li  
 pabili ma nde li e-o, yi ayoko uo de.  
 Padhá de, anga Nau gba Ebhe-e, a pi  
 obhende maka uo ko. 15 Ma apa pi yi  
 na paká me, kpála bhende nabhuka  
 gba e nde maka bhe gba ndili ade-e,  
 kpála ango-o ti da nali bhú Nau gba  
 Ebhe-e belegu de bini.» 16 Abhomu-  
 o, Yesu adu abi ongisi bhomu-o, ani  
 atsia adu atuko bisagu pí uo me ani  
 nde nga 'o 'kpa e pí uo.

*Bhulu tia bini ayi 'ngú pindji  
 mukobho na duduuma*

*(Tsia bhú Mat. 19:16-30; di ne bhú  
 Luk. 18:18-30.)*

17 Li Yesu adu a'e ne enu lie,  
 bhoko bini ago ne holo nabhaka  
 ani, ani akikita lipuku e kuto kala  
 ani. Ani atsia ayi ani me: «Musuno  
 na babadha, a ayo me ma mene pi  
 ngú nasia mukobho na duduuma-a?»

18 Yesu atsia apa pi ani me: «Ka ni  
 mu nga'i ma lie me bádha kpála-a?  
 Bádha kpála belegu ade bini, bha  
 bini Ebhe kpi e kpi. 19 La-a, mu  
 mbila olili-e ndjindji: <Mo obhéle

† 9:48 9:48 Tsia bhú Isa. 66:24. † 10:6 10:6 Tsia bhú Dje. 1:27, 5:2. † 10:8 10:7-8 Tsia bhú Dje. 2:24.

kpála de, mo osí ne ɛlɛ, i dɛ di-e bhoko gba kpála koko de, mo ozí 'he de, mo opá 'ngú li kilí mɛ bhú djila okpála ne eu de, mo ozí kpála bhú nyali de, manga 'dyi mɛ ne 'hi mɛ mamanga.†»

<sup>20</sup> Bhoko ango-o apa pi ani me: «Mɛsuno, nayie bhú ndili li ma-a, ma amene ndɛ olíli bhomɛ-o hana.»

<sup>21</sup> Yesu atsia ani ne mukunda hana. Ani atsia apa pi ani me: «Mo oneke bha koli 'he bini. Nɛnɛ, tsindji ndɛ 'he inde mɛ nde ne e hana, amba mɛ ha tiatia pi obhɛlɛ ndibhili, mo osía tia abhɛlɛ. Pipita-a, go kpata ma.» <sup>22</sup> Engú bini, nedhinga li bhoko ango-o adje lie mo-o, ani atɛ 'ndji e ne kuto, ani atsia agie lie ne babuma naali, anga tia adɛ nani ka ani bhelé.

<sup>23</sup> Abhomɛ-o, Yesu atsia omɛkpata gba e inde adɛ me u nde asa ani ngbalina-o. Ani apa pi uo me: «A ko kpéke da 'ngú pi obhɛlɛ tia ngú nali bhú Nɛnɛ gba Ebhe-o!» <sup>24</sup> Abhomɛ-o, omɛkpata atsia angamba ka eli ango-o. La-a, Yesu apa matá pi uo me: «Odi ma, a ko kpéke da 'ngú ngú nali bhú Nɛnɛ gba Ebhe-o!»

<sup>25</sup> Da nali ka samo\* li gudho mɛsana kpekpeke. A la matá kpekpeke naali pi bhɛlɛ tia nali bhú Nɛnɛ gba Ebhe-o.» <sup>26</sup> Omɛkpata angamba matá bha naali, u atsia adɛ apa sɛnda o me: «I dɛ mo-o, a ti da nakobho da?»

<sup>27</sup> Yesu atsia uo má sɛnɛ, ani atsia apa pi uo me: «Pi okpála-a, a ko kpéke da 'ngú. Engú bini, pi Ebhe-e, a ko kpéke da 'ngú de, anga ani ti da namene ndɛ 'ngú hana.»

<sup>28</sup> Abhomɛ-o, Piele apa pi ani me: «Djedje nga, ya a'o ndɛ 'he hana ngú nakpata mɛ.» <sup>29</sup> Yesu atsia apa pi ani me: «Ma apa pi yi na paká me, kpála inde a'o ka eti gba e, inde a'o ka ondaise e na obhosibhosi, i dɛ di-e obhende na olisilisi, inde a'o ka 'hi e, i dɛ di-e 'dyi e, i dɛ di-e ongisi gba e, i dɛ di-e edyi gba e ngubula ma, la di ne ngubula

Bádha Ngali-e , <sup>30</sup> kpála ango-o asía mbia inde-e bhɛtsibhɛtsi kámá bini: oeti, ondaise na obhosibhosi ne obhende na olisilisi, oehi, ongisi, la di ne oedyi bhú dabili bini ne olikabhɛ. Ani tsia sía di bhú nedhinga inde ngago-o, mukobho na dɛdɛma. <sup>31</sup> Engú bini, bhelé na okpála inde u ngau o maka okpála na akalanɛ mbia inde-e, akólo okpála na asidi, li obhende u ngau o maka okpála na asidi mbia inde-e kólo okpála na akalanɛ.»

*Yesu akpo 'ngú bhɛtsibhɛtsi na bata pindji nakpi ne nazuku ka e*

*(Tsia bhú Mat. 20:17-19; di ne bhú Luk. 18:31-34.)*

<sup>32</sup> Li Yesu ne omɛkpata gba e a'e ibili ne enú lie ngú nanɛ bhú Yelusalema-a, ani akɛ pi uo kalanɛ. Omɛkpata-a adɛ angamba. Obhende adɛ akpata uo-o, adɛ ne tsɛlɛ, Yesu aha matá omɛkpata gba e ndjikpa ne ká bhisi titi o, ngú nagama 'ngú pi uo. Ani atsia aholo akpokpo 'ngú pi uo pindji ongú inde akólo li ani-o. <sup>33</sup> Ani apa pi uo me: «Yi dje nga 'ngú inde. Ní adji bhú Yelusalema. Oo, u apú ngbángá Ndili gba kpála pi ongbengbe odimandɛ gba Ebhe ne omɛsuno na líli-o . U akódho 'ngú gba ani me ani kpi bha makpi. Pipita-a, u tsia pú ani pi omɛpagano. <sup>34</sup> U ató pádha li ani, u akú ngusɛ li ani, u abhí ani ne fimbo, u tsia bhéle ani. Engú bini, pita 'kpí bata-a, ani tsia zúku.»

*Mayo gba Djaki ngauo ne Djaa*

*(Tsia bhú Mat. 20:20-28.)*

<sup>35</sup> Pipita-a, Djaki ngauo ne Djaa , ongisi gba Djebedayo, adyudyo lio de Yesu. U atsia apa pi ani me: «Mɛsuno, ya ngakunda me mene pi ya engú inde ya adji ayo e ka mɛ-o.»

<sup>36</sup> Yesu atsia ayi uo me: «Yi akunda me ma mene pi yi ni?» <sup>37</sup> U agie pi ani me: «Ziba pi ya nadɛlɛ bhú Nɛnɛ gba mɛ na sangu-o , bini li pá 'kpa

† **10:19** 10:19 Tsia bhú Eki. 20:12-16; di ne bhú Det. 5:16-20. \* **10:25** 10:25 Enɛ inde li Yesu abhɛ lie si-e a ko samo. Li pápá gba uo oo enɛ inde adɛ nani ngbéngbé ne samo.

mɔ na kokpa, koko li pá 'kpa mɔ na gali.» <sup>38</sup> Engú bini, Yesu atsia apa pi uo me: «Yi mbila ehe inde yi ngayo e de. Yi ti da nandji kópo na likabhu inde ma andjí e uu? Yi ti da nasia batisimo na likabhu inde ma asía e uu?» <sup>39</sup> U atsia agie pi ani me: «Ya ti da namemene.» Do Yesu pi uo me: «A moko, yi andjí kópo na likabhu inde ma andjí e-o, yi sía di batisimo na likabhu inde ma asía e-o. <sup>40</sup> Engú bini, ma ti da napa ngama de me a adúlɔ li pá 'kpa ma na kokpa ne me a adúlɔ li pá 'kpa ma na gali da-ie de. Obili ango-o, a pi obhende li Ebhe aleke pi o ko.»

<sup>41</sup> Li omɔkpata ndjikpa bhe koko adje engú li Djaki ne Djaa ayo e lie, u atsia ake 'ngú lio pi uo. <sup>42</sup> Abhomɔ-o, Yesu a'i uo de e, ani atsia apa pi uo me: «Yi mbila hana me ongámási na doto inde ngau pí omaha o ne kpéke. La di-e, ongbengbe okpála ngaha okpekpeke líli pi omaha o. <sup>43</sup> Engú bini, a ayo de me adɔ akodho 'kpí sɔnda yi mo-o de. I dɔ me kpála bini nde akɔnda nadɔ 'ngbé kpála bhú ká yi-e, a ayo me ani dɔ kpála na kulu gba yi-o. <sup>44</sup> I dɔ me kpála bini bhú ká yi nde akɔnda nadɔ kpála na kalanɔ-o, a ayo me ani dɔ bali gba ndɔ okpála koko hana. <sup>45</sup> Padhá de, anga ngama Ndili gba kpála ma go nani de me okpála dɔ amene kulu lio pi ma-a de. Engú bini, ma ago mangbo ngú namene kulu lima pi okpála, di ne ngɔbula nagbegbe okpála bhelé bhú bali ne lá ma makpe.»

*Yesu akobho Balatimé, kpála i u 'kpí de*

*(Tsia bhú Mat. 20:29-34; di ne bhú Luk. 18:35-43.)*

<sup>46</sup> Pipita-a, Yesu akolo bhú gudhu na Djeliko. Li Yesu ne omɔkpata gba e, la di ne bhiti okpála adɔ akoto lie oo, u abhaka kpála bini i u 'kpí de me ani nde adɔ dengo 'hi kpadji. A adɔ 'li ani me Balatimé, a adɔ

ndala Timaya. Ani adɔ me ani nde ngayoyo 'he. <sup>47</sup> Nedhinga ani adje lie me a ko Yesu, kpála na Nadjaleta-a, ani aholo asúsula me: «Yesu, Ndili gba Davidi, dje nga mbo ndjinga ma!» <sup>48</sup> Bhiti okpála adɔ ambembe bhú 'ndji ani me: «Gbite 'bhø mɔ!» Engú bini, ani aholo la matá asúsula kpekpeke me: «Ndili gba Davidi, dje nga mbo ndjinga ma!»

<sup>49</sup> Abhomɔ-o, li Yesu adje lie, ani alɔ, ani atsia apa me: «Yi 'i ani ei.» U atsia a'i kpála i u 'kpí de ne napa pi ani me: «Atou! Yie bhúlá. Ani nga'i mɔ.» <sup>50</sup> Abhomɔ-o, ani abala 'kpa li koti gba e-o, ani a'ulu má ngudha, ani atsia ago abhaka Yesu. <sup>51</sup> Abhomɔ-o, Yesu atsia ayi ani me: «Mo okɔnda me ma mene pi mɔ ni?» Kpála i u 'kpí de-e agie pi ani me: «Mɔsuno, ma akɔnda me ma u matá 'kpí.» <sup>52</sup> Yesu atsia agie pi ani me: «Nɔnɔ, nabhuka gba mɔ-o akobho mɔ akobho.» Má gala kolo me-e, ani aholo au 'kpí, ani atsia adɔ akpata Yesu li kpadji-o.

## 11

*Yesu ali bhú Yelusalema  
(Tsia bhú Mat. 20:29-34; di ne bhú Luk. 18:35-43.)*

<sup>1</sup> Li u akolo lie de Yelusalema-a, masikpe de okuti na Betefadje ne Betania-a, u akolo pí eta na ondula na Olive. Yesu atima omɔkpata bhisi bhú ká omɔkpata gba e akalanɔ. <sup>2</sup> Ani atsia apa pi uo me: «Yi nɔ bhú kuti inde kala yi aoo. Yi akólo lie oo me-e, yi abháka me u nde agbite ndili punda\* inde li kpála bini dhɔkɔ nga pí e de. Yi bhulu ani, amba yi go ne ani. <sup>3</sup> I dɔ la me kpála bini nde ayi yi me: «Yi ngabhulu ani ngú ni?» Yi de gie pi ani me: «Ngámá ne gɔmɔ ani. Engú bini, ani agie bha ani si mbia inde.»

<sup>4</sup> Abhomɔ-o, u anɔ, u atsia abhaka ndili punda me u nde agbite ani akilidjo, de 'bhø bhoti bini li 'hi kpadji. U atsia abhulu ani. <sup>5</sup> U

\* **11:2** 11:2 Enɔ inde si-e a ko piga 'nɔ maka punda, uo la ndundundu u bibi di okpála.



adu abhulu ani lie, okpála koko bhú ká obhende adu oo, ayi uo me: «Yi ngamene bhomu-o ni? Yi ngabhulu ndili punda bhomu-o ngú ni?» <sup>6</sup> Omukpata agie pi uo maka li Yesu apa lie pi uo-o. Okpála ango-o atsia a' o uo me u nnu. <sup>7</sup> Abhomu-o, omukpata-a atsia ago ne ndili punda-a pi Yesu, u apa obongo gba o pi 'ngbu ani. Abhomu-o, Yesu atsia adu pépé. <sup>8</sup> Okpála bhelé apa obongo gba o li kpadji, okoko apa okpála inde u akodho e bhú bili-o. <sup>9</sup> Okpála bhende adu adhuku kala Yesu ne obhende adu akpata ani-e, adu asusula me:

«Ebhe heni!

A ayo me Ebhe tuko bisagu pi kpála inde ngago ne 'li Ngámá ko! †

<sup>10</sup> A ayo me Ebhe tuko bisagu pi nau inde ngago, nau gba ogbi ni Davidi ko!

Ebhe Apí 'Kpí heni!»

<sup>11</sup> Abhomu-o, Yesu anu bhú gudhu na Yelusalema, ani atsia ali bhú 'ngbé 'ti Ebhe gba omaYuda-o. Pita natsia 'kpí ka ani lingo e hana, ani atsia anu ne omukpata gba e ndjikpa ne ká bhisi bhú Betania, anga adu me ekpí nde ngabi.

*Yesu atu pedje li ndula na figi  
(Tsia bhú Mat. 21:18-19.)*

<sup>12</sup> Pita ekpí bhomu-o, u adu akoto lie bhú Betania-a, Yesu aholo nadjé gumu. <sup>13</sup> Ani au ndula na figi inde adu bhú e ne kpákpá-a de e tsutsu. Ani atsia anu ngú natsia 'kpí bhú ndula ango-o atigala ni u lílí bhúbhú. Engú bini, ani akolo lie dede-e, ani au bha bhiti kpákpá-o. Padhá de, anga adu nedhinga nali kaka de. <sup>14</sup> Abhomu-o, Yesu atsia atu pedje li ndula na figi-e ne napa me: «Mu lí matá líli inde li kpála ti da nazu e belegu de bini!» Omukpata gba ani adje 'ngú ango-o hana.

*Yesu atsambala obhulu natsindji  
'he bhú*

*'ngbé 'ti Ebhe gba omaYuda*

*(Tsia bhú Mat. 21:12-17; ne bhú Luk. 19:45-48; di ne bhú Dja. 2:13-22.)*

<sup>15</sup> Abhomu-o, u atsia agie matá lio bhú Yelusalema. Li Yesu ali lie bhú 'ngbé 'ti Ebhe gba omaYuda-a, ani aholo natsambala okpála inde adu atsindji 'he, ne obhende adu akala 'he oo-o. Ani atumba omisa gba okpála inde adu ayipa falanga, di ne okiti gba obhende adu atsindji obobho-o kuto. <sup>16</sup> Yesu 'o nani kpála bini akodho 'kpí ne ehe bini na mase bhú 'ngbé 'ti Ebhe de. <sup>17</sup> Pipita-a, ani aholo asuno, ne napa pi uo me: «U aye bhú Bhuku gba Ebhe-e me, Ebhe apa me: <U a'í eti gba ma-a me eti nayo Ebhe pi ndu opiga hana.> Engú bini, ngayi-e, yi adji, a atsia akolo bili gba obhulu 'zi!†» <sup>18</sup> Ongbengbe odimandø di ne omusuno na líli adje engú inde li Yesu amene e-o. U atsia aholo agili kpadji ngú nabhoani. Engú bini, u adu akpe ani, anga ndu okpála hana adu angamba li nasuno gba ani-e mangamba. <sup>19</sup> Akolo lie tagolo-o, Yesu ne omukpata gba e akoto bhú gudhu-o.

*Yesu asuno pindji nadu ne nabhuka na kpekpeke*

*(Tsia bhú Mat. 21:20-22.)*

<sup>20</sup> Kèkpí má bhø-o, Yesu ne omukpata gba e a'e ne enu. U akolo lie li bili li Yesu atu pedje lie li ndula na figi-e, omukpata gba ani au me ndula ango-o a'ulu hana, akolo makolo bha bini li osisie. <sup>21</sup> Abhomu-o, Piele abhundja engú inde li Yesu apa lili e li figi-o, ani atsia apa pi Yesu me: «Musuno, tsitsia nga, ndula na figi inde mo otu pedje lie a'ulu hana!» <sup>22</sup> Yesu atsia apa pi omukpata gba e me: «Yi du ne nabhuka bhú Ebhe! <sup>23</sup> I du me yi nde apa pi eta inde-e me: <Yie sii, amba mu nu gu 'i mu bhú 'ngbé 'ngu-o, Ebhe méne pi yi, i du me yi

† 11:9 11:9 Tsia bhú Ets. 118:25-26. † 11:17 11:17 Tsia bhú Isa. 56:7; di ne bhú Djlm. 7:11.

nde ne bua na bhisi bhisi ade ko. Engú bini, a ayo la me yi bhuka me Ebhe améne mamene.»<sup>24</sup> Kaka-a, ma apa pi yi me: ndu ehe hana yi ayó e bhú mayo-o, yi bhuka me yi asia ehe ango asia. Abhomu-o, ehe ango tsia méne lie pi yi.<sup>25</sup> Engú bini, nedhinga yi nde lie ngayo Ebhe-e, i du me yi nde ne engú pi kpála-a, yi de mbu ngaiza li ani, amba 'Dyi yi inde abhúlá-a 'e di osisiti 'ngú gba yi o. [ <sup>26</sup> † ]»

### *A ngaha angu pi Yesu da?*

*(Tsia bhú Mat. 21:23-27; di ne bhú Luk. 20:1-8.)*

<sup>27</sup> Yesu ne omukpata gba e agie lio bhú Yelusalema. Li Yesu adu adholo lie bhú 'ngbé 'ti Ebhe gba omaYuda-a, ongbengbe odimandø gba Ebhe, ne omusuno na líli, di ne obhelesi okpála ago de ani.<sup>28</sup> U atsia ayi ani me: «A aha kpadji pi mu ngú namene ongu inde-e da? A aha la di angu pi mu ngú namemene da?»<sup>29</sup> Yesu atsia agie pi uo me: «Ma adji ayi yi li koli engú bini, i du me yi nde agie engú muma tété-e, ma atsia pá pi yi me ma ngamemene ne mangua angu dho-ie.<sup>30</sup> Aha kpadji pi Djaa ngú nabatisa okpála da? Ne me a ko Ebhe, ne me a ko okpála? Yi gie engú muma tété.»

<sup>31</sup> U aholo amene kpekebhe sunda o me: «I du me ni nde apa me, aha kpadji pi Djaa ne Ebhe-e, ani yi ní me, i du mo-o, ka ni ní bhuka la nani Djaa lie de-e?»<sup>32</sup> Engú bini, ní ti da nale napa me: «Aha kpadji pi Djaa ne okpála-a?» (U apa nani mo-o anga u adu adje tsulu ka bhiti okpála-o. Padhá de, anga ndu okpála hana adu abhundja me Djaa ne polofeta na kukulu.)<sup>33</sup> Abhomu-o, u agie pi Yesu me: «Ya mbila de.» Yesu atsia agie pi uo me: «A ndjindji, ngama di-e, ma apa pi yi de me a aha angu muma ngú namene ehe inde-e da-ie de.»

## 12

*Gbitaku pindji osisiti okpála namene kulu bhú 'dyi vino*

*(Tsia bhú Mat. 21:33-46; di ne bhú Luk. 20:9-19.)*

<sup>1</sup> Abhomu-o, Yesu aholo nakpokpo 'ngú pi uo bhú ogbitaku me: «Kpála bini alu nani ngu vino, ani asa ngongo-o hana ne aga. Ani adji edú ngú napi olíli-e bhúbhú, ani atsia ayiki 'ndjá 'ti abhúlá bhúbhú ngabula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomu-o, ani atsia atapa dhuku.»

<sup>2</sup> Nedhinga li nguwa abhele lie, ani atima kpála bini na kulu agba okpála ango-o me u ha nguwa bhe gba ni-e pi ni haha.<sup>3</sup> Okpála namene kulu bhú ngu vino aholo kpála ango-o, u abhi ani má kpú! U atsia agie ani ne mbulu 'kpa e padhá.<sup>4</sup> Bhulu 'dyi-e atima matá kpála na kulu koko bini, bhobhomu-o di-e, u abhi ani li 'ndji e, u atsia asosobho ani.<sup>5</sup> Bhulu 'dyi-e atima matá kpála koko bini, u abhele bha ibili bhobhomu-o mabhøle. Pipita-a, bhelé na okpála koko-o, u abhi uo. Okoko-o, u abhili uo.

<sup>6</sup> A atigala nani ibili ka bhulu edyi-e bha ne koli kpála bini ani ti da natima e, bha ndili na bhobhoko gba ani bini na 'kpú bua ani-o. Ali soso hana-a, ani aha ani, ani atsia atima ani agba uo oo-o. Do ani de-e: «U amanga ndili gba ma-a mamanga.»<sup>7</sup> Engú bini, okpála ango-o apa sunda o me: «Yi tsia nga la ndju kpála inde atigala galikpe ne edyi-o. Yi gogo! Ní bhøle ani, amba edyi-e kolo ibili pi ní.»<sup>8</sup> U aholo ani, u abhele ani, u atsia abhike kuo ani alingo 'dyi.»<sup>9</sup> Abhomu-o, Yesu atsia ayi me: «Mbia inde-e, bhulu 'dyi-e améne pi? Ani agó, ani bhili okpála namene kulu bhú 'dyi-e

† **11:26** 11:26 Lukuluku inde-e, a bhú obhuku koko na didili u aye e bhú eli na giliki ade. [Engú bini, i du me yi nde mbu li okpála koko de-e, 'Dyi yi inde abhúlá-a 'é di osisiti 'ngú inde yi amene e de.]

hana. Pipita-a, ani há edyi-e, ani tsia pú pi okpála koko. <sup>10</sup> Yi atanga bha ndjũ Bhuku gba Ebhe-e uu? Li bili inde u aye lie me:

<Teme inde li okpála nayiki eti-e abhike e,  
akolo teme inde abi eti-e lib-homu.

<sup>11</sup> Ebhe Ngámá amene engú bhomu-o ngae.

Bhú djila ní-e, a ko engú na ngbéngbé!†»

<sup>12</sup> Li Yesu apa lie mo-o, obhulũ yala gba ani-e atsia adũ agili naholo ani. Padhá de, anga u adũ ambila ndjindji me ani apa gbitaku bhomu-o pi o. Engú la bini, u adũ adje tsulũ ka bhiti okpála. Abhomu-o, u a'o ká ani, u atsia agbida.

*Engú pindji nakala mandjandja gba 'ngbé ngámá Kaisala*

*(Tsia bhú Mat. 22:15-22; di ne bhú Luk. 20:20-26.)*

<sup>13</sup> Abhomu-o, u atima té omuFalisai di ne okpála gba Elode me u nu agba Yesu, u gama 'ngú ne ani, amba u holo ani li 'li e. <sup>14</sup> U ago, u atsia apa pi ani me: «Mũsuno, ya ngambila ndjindji me mu ngapa kukulu 'ngú. Mu ne tsulũ kpála belegu ade bini. Mu tsia di engbé gba kpála bini de. Engú bini, mu ngasuno engú gba Ebhe-e pi okpála bhú kukulu 'ngú. Líli aziba pi? U kala mandjandja gba Kaisala, 'ngbé ngámá na doto na Loma, ne me u akála de. A ayo me ya kala, ne me ya akála de?» <sup>15</sup> Yesu ambila kali gba uo lie, abhomu-o, ani atsia ayi uo me: «Yi ngale ma ngubula ni? Yi go nga muma ne lí falanga bini, ma tsia!» <sup>16</sup> U ago ne lí falanga bini pi ani. Ani atsia ayi uo me: «Kulu kpála di ne balua inde pépé inde-e, a ko naa da?» U agie pi ani me: «A ko naa Kaisala.» <sup>17</sup> Abhomu-o, Yesu atsia apa pi uo me: «Yi ha ehe bhende gba Kaisala-a pi Kaisala, amba yi ha la di bhende gba Ebhe-e

pi Ebhe.» U atsia adũ nangamba li ani naali.

*Engú pindji nazuku ka okpála (Tsia bhú Mat. 22:23-33; di ne bhú Luk. 20:27-40.)*

<sup>18</sup> Abhomu-o, oSadukai ago de Yesu. (Ngauo-o, u ziba nani naao de me okpála inde amu-o azúku mazuku-o de.) U atsia ayi Yesu me:

<sup>19</sup> «Mũsuno, Moidje aye nani líli pi ní me: <Í dũ me kpála bini nde akpi, ani 'o ká wala e me u nde zu ne ani de-e, a ayo me ndai ani ha ekø angoo, amba ani zu ndili pi ndai e inde akpi ko.> <sup>20</sup> La-a, a adũ nani obhosi mananika bhú piga bini. Bhende na kalanu-o aha ølø, ani akpi padhá me ani nde zu de. <sup>21</sup> Bhende na bhisi aha ølø angoo, ani akpi padhá me ani nde zu de. A akolo bhadi li kũte bhende na bata moko. <sup>22</sup> Ndũ obhosi bhomu-o mananika hana amu me u nde zu de. Pita ndũ uo hana-a, ølø-o atsia akpi di. <sup>23</sup> Li 'kpí li okpála inde amu-o azúku lie, ølø angoo adũ naa da? Padhá de, anga ndũ uo mananika hana aha nani ani!»

<sup>24</sup> Abhomu-o, Yesu atsia agie pi uo me: «Yi angita, anga yi mbila Bhuku gba Ebhe-e de, yi mbila la di angu gba Ebhe-e de. <sup>25</sup> Padhá de, anga li okpála inde amu-o azúku lie, u há lio de. Engú bini, u adũ ibili maka oandjelu abhúla. <sup>26</sup> Li 'ngú bhende atsia nazuku ka okpála-a, yi tanga nga bhuku gba Moidje, li bili inde ani akpo 'ngú lie pindji tsá 'pó inde adũ atsi-e di? Li bili bhomu-o, u aye me Ebhe apa pi ani me: <Ma ne Ebhe gba Abalahama, Ebhe gba Isaka, Ebhe gba Yakobho.> <sup>27</sup> Ebhe ne Ebhe gba okpála inde amu-o ade. Engú bini, ani mangbo ne Ebhe gba okpála inde uu ko. Yi angita bha ndjũ na paká paká.»

*Líli inde ane ne engbé (Tsia bhú Mat. 22:34-40; di ne bhú Luk. 10:25-28.)*

<sup>28</sup> Mũsuno bini na líli gba Moidje adje uo nedhinga u adũ amene

† 12:11 12:10-11 Tsia bhú Ets. 118:22-23.

kpekebhø lie-o. Anì atsia au di maka lì Yesu agie 'ngú lie pì oSadukai ndjindji-o. Abhomu-o, anì adyudyo lie, anì atsia ayi Yesu me: «Lìli inde ane ne engbé-e ngae dho?»<sup>29</sup> Yesu agie pì anì me: «Lìli na bini inde ane ne engbé-e ngae inde: <Isalaele, djedje nga! Ebhe, Ngámá gba ní-e bha ne koli Ngámá kpi e kpi. <sup>30</sup> A ayo me kúnda Ebhe, Ngámá gba mu-o ne bua mu hana, ne mukobho gba mu-o hana, ne mabhundja gba mu-o hana, la di ne angu gba mu-o hana.>† <sup>31</sup> Bhende na bhisi-e ngae inde: <A ayo me kúnda kilí mu maka mo okúnda limu lie makpe ko.†> Lìli bini ade inde ane obhobhomu-o ne engbé.»

<sup>32</sup> Abhomu-o, musuno na líli-e apa pì anì me: «A ndjindji naali, Musuno! Mo opa paká. Anì bha ne koli Ngámá ngae kpi e kpi, Ngámá koko ade, bha bini anì. <sup>33</sup> La di-e, a ayo me kpála kúnda anì ne bua e hana, ne imbilangu gba e hana, ne angu gba e hana, amba anì kúnda la di kilí e maka anì akúnda lie lie makpe ko. Bhobhomu-o ndjindji ane natsulu oenu pì Ebhe di ne obhe u ahaha e pì anì ko.» <sup>34</sup> Lìli Yesu au lie me anì agie 'ngú ne imbilangu-o, anì atsia apa pì anì me: «Mu de Nau gba Ebhe-e tsutsu ade.» Pipita-a, kpála bini le matá nayi Yesu belegu de bini.

*Masiya ne ngámá gba Davidi*  
(Tsia bhú Mat. 22:41-46; di ne bhú Luk. 20:41-44.)

<sup>35</sup> Lìli Yesu adu asuno lie pì okpála bhú 'ngbé 'ti Ebhe gba omaYuda-a, anì atsia adu ayi me: «Lele pì li omusuno na líli gba Moidje ti da napa lie me Masiya ne ndili gba Davidi-e? <sup>36</sup> Padhá de, anga ngaani Davidi makpe-e bhú nateteke gba Bu Bhobua apa nani me:

<Ebhe Ngámá apa pì ngámá gba ma-a me:

Du li pá 'kpa ma na kokpa,

akolo li nedhinga inde ma a'ó obhulu yala gba mu-o lie

sa 'dhu mu ko.>†

<sup>37</sup> Davidi ngae makpe nga'i Masiya me <Ngámá.> Lele pì anì nde la lie ne ndili gba Davidi-e?> Bhiti okpála na bhibhiti adu nadje anì ne djali naali.

*Yi lila liyi ka omusuno na líli gba Moidje malila*

(Tsia bhú Mat. 23:1-36; di ne bhú Luk. 20:45-47.)

<sup>38</sup> Yesu adu apa pì okpála bhú nasuno gba e me: «Yi lila liyi ka omusuno na líli gba Moidje malila. Padhá de, anga ngauo-o, u kúnda bha nadhuku ne ondjandja yambu, di ne me u du nayi o maka ongámási li obili inde li okpála apopokobho bhúla o li e-o. <sup>39</sup> U kúnda bha nadulu pí odabili na akalanu bhú oeti nadje líli gba Moidje , di ne pí odabili na akalanu bhú da oanokomia. <sup>40</sup> U ngabha oehe gba okesi na olisilisi. U ngayo Ebhe ngengele ngubula me okpála u o. Kaka-a, u asia mangimbo ane bhende gba okpála koko mane.»

*Makiso gba oko bini na oelo*

(Tsia bhú Luk. 21:1-4.)

<sup>41</sup> Yesu adu li bili li sanduku na makiso na 'ngbé 'ti Ebhe-e adu nadu li e, ne li pápá na abhubhúla. Yesu adu atsia maka li okpála adu na'o makiso lie bhúbhú-o. Kambi obhulu tia adu na'o tia bhelé. <sup>42</sup> Engú bini, oko bini na oelo, bhulu ndibhili ago. Anì aha bha naae djedje lí falanga bhisi padhá má kpikili! <sup>43</sup> Abhomu-o, Yesu a'i omukpata gba e-o. Anì atsia apa pì uo me: «Ma apa pì yi na paká me, oko na oelo inde naae ne bhulu ndibhili inde-e, aha makiso ane ndu okpála inde a'o makiso bhú sanduku inde-e hana. <sup>44</sup> Padhá de, anga ndu okoko hana, u aha tia bhende u nde ne gumu e ade ko. Engú bini, ngaani, bhú ndibhili gba e, anì aha ndu bhende adu ka e, inde anì adu akobho li e hana-o.»

† 12:30 12:30 Tsia bhú Det. 6:4-5. † 12:31 12:31 Tsia bhú Lev. 19:18. † 12:36 12:36 Tsia bhú Ets. 110:1.

## 13

*Yesu apa me 'ngbé 'ti Ebhe gba omaYuda atúko kuto*  
(*Tsia bhú Mat. 24:1-2; di ne bhú Luk. 21:5-6.*)

<sup>1</sup> Nedhinga li Yesu adu akoto lie bhú 'ngbé 'ti Ebhe gba omaYuda-a, saka omakpata gba ani bini atsia apa pi ani me: «Musunu, tsitsia nga! Ae mangua babadha ka oteme dho! Ae mangua babadha ka oeti dho!»  
<sup>2</sup> Yesu atsia agie pi ani me: «Mo ou ongbengbe 'ti inde ayiki lie inde-e au? Oteme bhomu-o, saka bini tígala pí kilí e de. Ndundu hana atúko kuto.»

*Engú inde akólo kala sokpí-o*  
(*Tsia bhú Mat. 24:3-14; di ne bhú Luk. 21:7-19.*)

<sup>3</sup> Li Yesu adu lie pí eta na ondula na Olive bhúla 'ngbé 'ti Ebhe gba omaYuda-a, Piele, Djaki, Djaa ne Andili adu ne ani titi o. U atsia ayi ani me: <sup>4</sup> «Pa nga pi ya me engú ango-o akólo nadho? Ehe inde asúno la di me ndu 'ngú hana adji andjia adú ni?»

<sup>5</sup> Abhomu-o, Yesu aholo napa pi uo me: «'E-e! Kpála bini apíte yi de! <sup>6</sup> Okpála bhelé agó amene engú ne 'li ma ne napa me: «Ma ne Masiya !» U tsia píte okpála bhelé. <sup>7</sup> Nedhinga yi adjé ngali na oegú di ne dhukudhuku na oegú lie, yi adjé tsulu de, anga a ayo me oengú ango-o kolo. Engú bini, adú nga bhomu-o sokpí-e de. <sup>8</sup> Padhá de, anga okpála na kuti bini atí 'gú li okpála na kuti koko. Ngámá na kuti bini atí 'gú li ngámá na kuti koko. Oadjigidjo na ngbengbengbe adyiki doto li obili ngangá. Ehe nazu mazudú ka okpála belegu de bini. A adú maka li bhú 'bu elo azuzu lie kala nazu ka e-o.

<sup>9</sup> 'E-e! Yi lila liyi malila. Padhá de, anga okpála agbé yi bhú ngbanga kala ongámási, di ne abhú oeti nadjé líli gba Moidje . U abhí yi, u apándja yi kala okpála natsia 'kpí li ndu

doto di ne kala ongbengbe ongámási ngubula ma, amba yi kpokpo 'ngú gba ma kala uo. <sup>10</sup> Padhá de, anga a ayo ngaiza me u kpokpo Bádha Ngali pi ndu opiga hana. <sup>11</sup> Li nedhinga u anú ne yi lie kala ongámási ngú nakodho 'ngú gba yi-e, bua yi agúku de me ni apá pi-ie de. Engú bini, engú inde akóto bhú 'bhø yi li nedhinga bhomu-o, yi de pa bha e. Padhá de, anga engú yi apá e yie ka yi de. Engú bini, ayie ka Bu Bhobua .

<sup>12</sup> Kpála apú ndai e na bhobhoko me u bhølo ani. 'Dyi ndili améne bhadi moko li pabili gba ndili gba e. Li ongisi kólo obhulu yala gba odyi o, u tsia pí uo me u bhili uo. <sup>13</sup> Ndu okpála hana ayála yi kabula 'ngú gba ma. Engú bini, kpála bhende alú kpekpeke akólo li soso-o, akóbho ngae.»

*Likabhu na ngbéngbé inde akólo kala sokpí-o*

(*Tsia bhú Mat. 24:15-28; di ne bhú Luk. 21:20-24.*)

<sup>14</sup> «Yi aú kpála inde u a'i e me <Siti bhulu nabhølo kuti-e†> adu li bili inde i ti de me ani du lie de-o. (A ayo me kpála atánga bhuku inde-e, kø mbolimboli ndjindji!) Abhomu-o, obhende adú abhú Yudaya-a, a ayo me u kpe apí oeta. <sup>15</sup> Kpála inde adú apí 'ngbu 'ti-e, a ayo de me ani kø ngú nanu abhú 'ti gba e naha 'he bini-e de. <sup>16</sup> Kpála bhende adú abhiye-e, a ayo de me ani gie lie naha bongo gba e de. <sup>17</sup> Li 'kpí ango-o, a adú likabhu na ngbéngbé pi olisi na 'bhi di ne obhende li ongisi adu andji 'ka o-o! <sup>18</sup> Yi yo Ebhe ngubula me engú ango-o akólo li nedhinga na zini de.

<sup>19</sup> Padhá de, anga oekpí ango-o adú oekpí na likabhu u u nga ngua e de, nayie maka li Ebhe abho doto lie nakolo pi mbia inde. La di-e, u ú matá ngungua de. <sup>20</sup> I dú me Ngámá gbétele oekpí ango-o de-e, kpála bini de tí da nazu bhú mukobho de.

† 13:14 13:14 Tsia bhú Dan. 9:27, 11:31, 12:11.

Engú bini, aní agbetelè oekpí angoo ka okpála bhende aní alo o ko. <sup>21</sup> † ðu me kpála bini nde apa pí yi me: <Yi tsitsia, Masiya sii!>, í ðu di-e me: <Yi tsitsia, aní abhe!>, yi azíba kpála angoo de. <sup>22</sup> Padhá de, anga omasiya na eu di ne opolofeta na eu agó mago. U améne ongú na ngangamba di ne okiaka 'ngú ngú napite okpála. Li angu uo kolo-o, u apíte belegu okpála li Ebhe alo o-o. <sup>23</sup> La-a, ngayie, yi tsia 'kpí liyi ndjindji, anga ma agbele 'dje yi li ndu 'ngú hana kalanu.»

*Nago gba Ndili gba kpála*  
(Tsia bhú Mat. 24:29-31; di ne bhú Luk. 21:25-28.)

<sup>24</sup> «Engú bini, li oekpí angoo, pita likabhu bhomu-o, li ela kólo biti, epe sú matá-a de, <sup>25</sup> oikupala ahólo nabala kuto, oangu inde abhúlá adyíki má djigi djigi!†

<sup>26</sup> Abhomu-o, u ú Ndili gba kpála nago bhú ndindi, ne ndu angu di ne ndu sangu gba e hana.† <sup>27</sup> Aní atíma oandjelu li odje bili badha hana ngú napo bhúla obhende aní alo o-o, abana u ðu bha su-oie.»

*Gbitaku pindji ndula na figi*  
(Tsia bhú Mat. 24:32-35; di ne bhú Luk. 21:29-33.)

<sup>28</sup> «Yi kò mboli nasuno inde li ndula na figi asuno e-o. † ðu me yi nde au me oyáyá angbøngbølo-o, di me okpákpá-a nde akø-o, yi de mbíla me gbokokpi íbili masakpe. <sup>29</sup> A bhadi moko. Ngayi di-e, nedhinga yi aú engú bhomu-o ngakolo lie, yi mbíla me nago gba Ndili gba kpála akolo masakpe. Aní li obhøbhoti gba yi-o. <sup>30</sup> Ma apa pí yi na paká me, nedhinga na engú angoo akólo makolo, me ndu okpála inde-e nde ndjia nga ndu o hana de. <sup>31</sup> Ekpí ne doto andjia mandjia. Engú bini, oeli gba ma-a adú ðudama ne ðudama.»

*Yi lila liyi*

(Tsia bhú Mat. 24:36-44.)

<sup>32</sup> «Engú bini, ekpí di ne nedhinga li ongú bhomu-o akólo lie, kpála bini mbíla de, belegu de oandjelu abhúlá, belegu de Ndili-o. Ambíla bha ne 'Dyi ma kpi e kpi. <sup>33</sup> 'E-e! Yi alá-a de, anga yi mbíla nedhinga li engú angoo agó lie de! <sup>34</sup> A adú maka kpála bini inde adji enú: aní a'o ká eti gba e pí obhulu kulu gba e me u ðu atsia 'kpí tété. Aní aha kulu namene mamene pí kpála bini ne bini. Aní aha líli pí málila me aní alá-a de. <sup>35</sup> Kaka-a, yi alá-a de, anga yi mbíla nedhinga li bhulu eti-e agíe lie lie de! Nedhinga koko adú tagolo, koko adú tutu sukpe, koko adú bhú 'gbá 'ngu na bini, koko adu køkpi. <sup>36</sup> Aní koto la di-e má gbilikiti-e, a ayo de me aní bhaka yi tila-a de! <sup>37</sup> Engú inde ma ngapa e pí yi-e, ma ngapapa pí ndu okpála hana me: <Yi alá-a de!>»

## 14

*Ongámási gba omaYuda agili nabhølo Yesu*

(Tsia bhú Mat. 26:1-5; ne bhú Luk. 22:1-2; di ne bhú Dja. 11:45-53.)

<sup>1</sup> A adu nani 'kpí bhisi kala anokomia na Pasika, ne kala anokomia nazu mapa inde li levile nde bhú e ade-o. Ongbengbe odimandø di ne omusuno na líli gba Moidje adu agili me o hólo Yesu bhú pepe lele pí, amba o bhølo aní-e. <sup>2</sup> U adu apa me: «A ayo de me ní holo aní bhú nedhinga na anokomia de, anga ní mene mo-o, li okpála gbé tolo.»

*Ølo bini atuko mungotsi pí 'ndji Yesu*

<sup>3</sup> Yesu adu bhú kuti na Betania bhú 'ti gba Simo, bhulu kába-o. Nedhinga u adu lie nazu 'he-e, ølo bini ago ne gili inde u amene e li alabatele.\* A adu bhúbhú ne tiki

† 13:25 13:24-25 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10, 3:4. † 13:26 13:26 Tsia bhú Dan. 7:13. \* 14:3 14:3 Alabatele: A ko teme na mase naali inde u abhobho oehe maka gili li e ko.

mungotsi na nalade.† A adu la di bhú kpéke mase. Ani agumu gili na alabatele-o, ani atsia atuko mungotsi ango-o pí 'ndji Yesu. <sup>4</sup> Okpála koko a adu apa sunda o ne ke bua me: «Mungotsi inde-e ngasiti lie me-e ka ni? <sup>5</sup> U ti nako da natsitsindji ngú lí denalio ane kámá bata mane. U tsia há tia ango-o pí obhulu ndibhili!» U atsia adu ake 'ngú lio pí ebe ango-o.

<sup>6</sup> Engú bini, Yesu apa me: «Yi 'o ani. Yi ngato mbolo li ani ngú ni? Ani amene muma bhomu-o bádha 'ngú. <sup>7</sup> Padhá de, anga ngayi-e, yi ngadu ne obhulu ndibhili ndu 'kpí hana de yi. Nedhinga yi kunda lie, yi ti da namene bádha 'ngú pí uo. Engú bini, ngama-a, ní ne yi ndu 'kpí hana ade. <sup>8</sup> Bhende ani ati nako da namene e, ani amene: ani apulu mungotsi li kute ma kalanu ngú nazi ma ko. <sup>9</sup> Ma apa pí yi na paká me, ndu bili hana inde u akpokpo Bádha Ngali lie píla doto libhому-o, u akpókpo di engú ani amene e, li okpála du di abhundja ani.»

*Yuda Isikaliote agili kpadji napu Yesu*

*(Tsia bhú Mat. 26:6-13; di ne bhú Luk. 12:1-8.)*

<sup>10</sup> Abhomu-o, Yuda Isikaliote, saka omukpata ndjikpa ne ká bhisi-e anu agba ongbengbe odimandø ngú napu Yesu pí uo. <sup>11</sup> U adje engú bhomu-o lie, u akpi ndjili naali. U atsia apa me o há pí ani tia. Abhomu-o, Yuda atsia adu agili bádha nedhinga ngubula napu Yesu pí uo.

*Omukpata gba Yesu anu naleke da anokomia na Pasika*

*(Tsia bhú Mat. 26:17-25; ne bhú Luk. 22:7-14; di ne bhú Dja. 13:21-30.)*

<sup>12</sup> Ekpí na bini na anokomia nazu mapa inde li levile nde bhú e ade-e, ekpí u adu abhøø kandøø lie ngubula Pasika-a, omukpata gba Yesu ayi ani me: «Mo okunda me ya nu leke da nazu Pasika pí mu su?»

<sup>13</sup> Abhomu-o, ani atima omukpata bhisi bhú ká omukpata gba e-o. Ani atsia apa pí uo me: «Yi nu bhú gudhu, yi aké liyi ne bhoko bini inde abi lusa 'ngu, yi kpata ani. <sup>14</sup> Bili inde ani alí li e-e, yi de pa pí bhubhulu-o me: «Musuno apa me: tina 'ti inde mo oleke e muma ne omukpata gba ma ngú nazu Pasika tété-e ngae dho?» <sup>15</sup> Abhomu-o, ani asuno tina 'ti inde abhúla-a pí yi. A ngbéngbé, u aleke ndjindji, ndu 'he hana bhúbhú bedhe. A bhomu-o bili inde yi aléke da anokomia pí ní li e ko.»

<sup>16</sup> Omukpata-a agbida. U anu abhú gudhu. U atsia abhaka ndu 'ngú hana maka li Yesu apa pí uo lie ko. Abhomu-o, u atsia alu ezu na Pasika-o.

*Yesu apa me saka omukpata bini apu ni*

<sup>17</sup> A akolo lie tagolo-o, Yesu ne omukpata gba e ndjikpa ne ká bhisi-e akolo. <sup>18</sup> Nedhinga u adulu lie pí misa me u nde ngazu 'he-e, Yesu atsia apa me: «Ma apa pí yi na paká me, saka yi bini, inde ngazu 'he ne ma-a, apu ma.» <sup>19</sup> Omukpata-a abedhe ne babuma li bua o bedhe. U atsia aholo nayi ani bini ne bini me: «A adu ma?» <sup>20</sup> Ani apa pí uo me: «A ko saka yi omukpata ndjikpa ne ká bhisi-o, bhende i ngato 'kpa e ne ma bhú saani-o. <sup>21</sup> Ndili gba kpála akpí bha na paká maka u aye lie bhú Bhuku gba Ebhe li 'ngú gba ani-o. Engú bini, a ko likabhu pí kpála inde apu Ndili gba kpála-o. A belegu nako pí kpála ango-o ndjindji me u azú ani de!»

*Yesu aha mapa ne vino pí obhulu titima gba e-o*

*(Tsia bhú Mat. 26:26-30; ne bhú Luk. 22:14-20; di ne bhú 1 Kol. 11:23-25.)*

<sup>22</sup> Nedhinga u adu azu 'he lie, Yesu aha mapa-o. Pipita-a, ani agie heni pí Ebhe. Ani atsia agumu bhusu bhusu, ani atsia aha pí uo. Do ani

† 14:3 14:3 Nalade: A ko mungotsi inde u amemene e li 'kpá ulu. Tsia bhú Mat. 26:7.

de-e: «Yi haha, a inde-e kute ma.»  
<sup>23</sup> Pipita-a, ani aha kópo-o, pita ani agie heni lie pi Ebhe-e, ani atsia aha pi uo. U atsia andji ndu o hana.

<sup>24</sup> Ani atsia apa pi uo me: «A inde-e ngute ma, ngute na gandja inde atuko lie pi bhiti okpála-o. <sup>25</sup> Ma apa pi yi na paká me, ma andjí matá galikpe lí ndula na vino belegu de bini, akólo li 'kpí inde ma andjí matá lie ne toto bhú Nau gba Ebhe-o .»

<sup>26</sup> Pita u ali 'tsi‡ lie, u aze ngú nanu pí 'ta na ondula na Olive.

*Yesu apa me Piele ayála ni*  
*(Tsia bhú Mat. 26:31-35; ne bhú Luk. 22:31-34; di ne bhú Dja. 13:36-38.)*

<sup>27</sup> Abhomu-o, Yesu apa pi uo me: «Ndu yi hana, yi a'ó ká ma, anga u aye bhú Bhuku gba Ebhe-e me:

«Ma asú málila gba okandølo-o, li ongisi kandølo-o gbóngbolo ne bili ngangá.†»

<sup>28</sup> Engú bini, ma azúku lie, ma anú adjeke yi abhú Galilaya.» <sup>29</sup> Piele atsia apa pi ani me: «Belegu li ndu okpála hana 'o ká mu-o, ngama de!»

<sup>30</sup> Yesu atsia apa pi ani me: «Ma apa pi mu na paká me, ngamu-o, sukpe na naki inde-e, kala me engu ku 'gbá bhutsibhutsi bhisi-e, mo opá bhutsibhutsi bata me ni mbila ma de.» <sup>31</sup> Engú bini, Piele atsia apa matá ne kekele me: «Abana i yo bha me ma kpi bhú dabili bini ne mu-o, ma atsé mu de!» Abhomu-o, ndu uo hana atsia apa bhadi moko.

*Yesu ayo Ebhe bhú Getesemani*  
*(Tsia bhú Mat. 26:36-46; di ne bhú Luk. 22:39-46.)*

<sup>32</sup> Pipita-a, Yesu ne omukpata gba e akolo li bili inde u a'i e me Getesemani. Ani atsia apa pi uo me: «Yi dalu kuto si, nedhinga inde ma adú lie nayo Ebhe ko.»

<sup>33</sup> Ani anu bhú dabili bini ne Piele, Djaki ne Dja . Abhomu-o, tsulu

aholo ani, ani aholo azu likabhu li bua e. <sup>34</sup> Ani atsia apa pi uo me: «Bua ma abedhe ne likabhu bedhe ka ma adji akpi lie-o. Yi tigala si, yi alá-a de!»

<sup>35</sup> Pipita-a, ani anu mbo tsutsu bedi. Ani atsia agu 'i e bhú doto. Ani atsia adu ayo Ebhe ngubula e me i du me a nde alé male-e, nedhinga bhomu-o de kodho 'kpí de ni tsutsu.

<sup>36</sup> Ani adu apa me: «Aba, 'Dyi ma, kpeke da 'ngú pi mu ade. 'E kópo na likabhu§ inde-e de ma ma'e! Engú bini, mo oméne maka ma akunda lie de, mene mangbo maka mo okunda lie ko!»

<sup>37</sup> Yesu agie lie, ani abhaka omukpata gba e bata me u nde tila. Do ani pi Piele de-e: «Simo, mu ngala-a? Mu sia angu ngú nadu ndila belegu de ngubula saa bini?

<sup>38</sup> Yi alá-a de, yi yo Ebhe, amba yi alí bhú nale de. Bua kpála dudu bedhe ne angu, engú bini, kute ani bhuhuku.»

<sup>39</sup> Pipita-a, Yesu atuto matá lie mbo tsutsu masudha. Ani atsia ayo Ebhe ne oeli bini bhomu.

<sup>40</sup> Abhomu-o, ani ago matá, ani abhaka uo tila, anga djila uo adu me a nde ali tili ne ela má yikpokpo! U tsia du nambila de me o opá pi ani pi-ie de. <sup>41</sup> Bhutsibhutsi na bata, ani ago. Ani apa pi uo me: «Yi nga bha ngala di ne naguo? A andjia, nedhinga akolo. Yi tsitsia nga, u apú Ndili gba kpála mbia inde-e pi obhulu siti 'ngú. <sup>42</sup> Yi yie bhúlá, ní nunu! Yi tsitsia nga, kpála inde i ngapu ma-a, akolo!»

*U aholo Yesu*  
*(Tsia bhú Mat. 26:47-56; ne bhú Luk. 22:47-53; di ne bhú Dja. 18:3-12.)*

<sup>43</sup> Bha li nedhinga li Yesu adu ngabha lie agama 'ngú-o, Yuda, suka obhulu titima ndjikpa ne ká bhisi-e, akoto li uo bhú dabili bini ne

‡ 14:26 14:26 Etsi: Etsi inde si-e, a ko bhende bhú bhuku na Etsi gba omaYuda ko. OmaYuda du nani alili li 'so anokomia na Pasika. Tsia bhú Mat. 26:30. † 14:27 14:27 Tsia bhú Djkl. 13:7.

§ 14:36 14:36 Kópo na likabhu: Bhú eli na giliki-e, u aye bha me kópo.



okpála inde adu sa 'kpa o ne tia 'gú: ombotia ne ondula. U ago me a nde atima uo ne ongbengbe odimandø, ne omusunu na líli gba Moidje di ne obhelesi okpála. <sup>44</sup> Yuda, kpála inde apú Yesu-o, adje lie ne uo me: «Kpála inde ma anvú pabhø e, a ko aní! Yi holo aní, amba yi nu ne aní ne nalila aní ndjindji.» <sup>45</sup> Nedhinga lí aní akolo lie, aní atuto lie de Yesu. Aní atsia apa pí aní me: «Labi!» Aní atsia anvú pabhø aní. <sup>46</sup> Okpála bhe koko abu 'kpa o lí aní, u atsia aholo aní.

<sup>47</sup> Suka okpála inde adu oo agbe mbotia gba e-o. Aní asu kpála na kulu gba bhele kpála gba odimandø-o, aní atsia akodho 'dje aní má tse! <sup>48</sup> Abhomu-o, Yesu atsia apa pí uo me: «Yi ago ngú ma ne ombotia di ne ondula mugo me ma ne bhulu 'zi! <sup>49</sup> Ma du nako ndu 'kpí hana bhú ká yi bhú 'ngbé 'ti Ebhe gba omaYuda ngú nasuno, yi tsia holo ma de. Engú bini, a ko ngabula me engú inde u aye e bhú Bhuku-o mene lie.» <sup>50</sup> Abhomu-o, ndu omukpata hana a'o ká aní. U atsia akpekpe. <sup>51</sup> Makombi bini adu akpata Yesu me aní nde abuku kute e bha ne mbulu daladeli. U aholo aní. <sup>52</sup> Engú bini, ngaani-e, aní abala 'kpa lí daladeli-o, aní atsia ayiki lie ne holo ndumbu.

*U anu ne Yesu kala Libi okpála natsia 'kpí lí 'ngú gba omaYuda*

*(Tsia bhú Mat. 26:57-68; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>53</sup> Abhomu-o, u anu ne Yesu kala bhele kpála gba odimandø-o. U atsia apo bhúla o ndu o hana: ongbengbe odimandø, obhelesi okpála di ne omusunu na líli gba Moidje. <sup>54</sup> Piele adu akpata Yesu mbo tsutsu. Aní atsia akolo bhú mbadhasu gba bhele kpála gba odimandø-o. Aní adu kuto, aní atsia adu atu djua bhú dabili bini ne omulila.

<sup>55</sup> La-a, ongbengbe odimandø bhú dabili bini ne Libi okpála natsia 'kpí lí 'ngú gba omaYuda adu naao agili kpála inde agó apa 'ngú lí kute Yesu sisiti, amba o kodho 'ngú gba aní-e me aní kpi. Engú bini, u u de. <sup>56</sup> Okpála bhelé adu apa 'ngú lí Yesu ne eu. Engú bini, ongu u adu apa e, a go lí kpadji bini de. <sup>57</sup> Okpála bini bini adu ayie bhúla ne napa 'ngú lí aní ne eu me: <sup>58</sup> «Ya adje aní me aní nde ngapa me: «Ngama-a, ma abhólø 'ti Ebhe inde lí okpála amene e inde. Pita 'kpí bata, ma tsia yíki koko inde lí 'kpa kpála mene e de.»» <sup>59</sup> Engú bini, abana u adu apa lie mo-o, u du adje lío bhú nakpokpo 'ngú angoo de.

<sup>60</sup> Abhomu-o, bhele kpála gba odimandø-o ayie bhúla bhú ká okpála-o. Aní atsia ayi Yesu me: «Mu gie 'ngú lí kute engú u ngakpokpo e lí mu-o di?» <sup>61</sup> Engú bini, ngaani-e, aní andjili bha má bulu, aní gie engú bini de! Bhele kpála gba odimandø-o atsia ayi matá aní me: «Mu ne Masiya, Ndili gba Ebhe inde lí okpála ngadhøø e?» <sup>62</sup> Yesu agie me: «A moko, ma ne aní. Yi aú Ndili gba kpála adu lí pápá na kokpa gba Angbamili me aní nde ngago ne ndindi na abhúla.†»

<sup>63</sup> Abhomu-o, bhele kpála gba odimandø-o asidha bongo gba e. Aní atsia apa me: «Ní matá ne gumu okpála koko ngú nakpokpo 'ngú gba ni-e ade! <sup>64</sup> Yi adje maka aní asobho Ebhe lie adje. Yi apa tété pí?» Abhomu-o, ndu uo hana akodho 'ngú gba aní-e me aní atí ne nakpi. <sup>65</sup> Bini bini bhú ká uo aholo aku ngusu lí aní. U atsia adu di abuku bhúla aní, asu aní ne napa pí aní me: «Pa pí ya me asu mu da!» Omulila-a aha aní, u atsia aholo di nasu aní.

*Piele apa me ni mbila Yesu de*  
*(Tsia bhú Mat. 26:69-75; ne bhú Luk. 22:56-62; di ne bhú Dja. 18:15-18, 25-27.)*

† 14:62 14:62 Tsia bhú Ets. 110:1; di ne bhú Dan. 7:13.

<sup>66</sup> Nedhinga li Piele adu nga bha lie tu mbadhasu-o, suka okpala na kulu bini na eole gba bhele kpala gba odimandø ago. <sup>67</sup> Ani au Piele lie ngatu djua-a, ani atsia ani ma suu! Ani atsia apa pi ani me: «Ngamu di-e, mo odu nako bhú dabili bini ne Yesu, kpala na Nadjaleta-o!» <sup>68</sup> Engú bini, Piele ayaya. Ani atsia apa me: «Ma mbila de. Ma kø di mboli engú mu ngakunda napa e de.» Abhomu-o, ani akoto kilidjo bhú mbaladja. [Pipita-a, engu atsia aku 'gbá.]

<sup>69</sup> Engú bini, kpala na kulu na eole ango-o au ani. Ani atsia apa mata bhú djila okpala inde adu oo me: «Kpala inde aoo, a ko di suka uo!» <sup>70</sup> La-a, Piele ayaya mata. Pita nedhinga masudha, okpala inde adulu oo apa mata pi Piele me: «A ko paká, mu ne suka uo, anga ngamu di-e mu ne kpala na Galilaya.» <sup>71</sup> Engú bini ngaani-e, ani aholo natu silika ne nasima me: «Ma mbila kpala inde yi ngapa 'ngú gba e mama bhomu-o de!» <sup>72</sup> Má gala kolo me-e, engu atsia aku 'gbá bhutsibhutsi na bhisi. Abhomu-o, Piele abhundja engú inde li Yesu apa igini e pi ani me: «Kala me engu ku 'gbá bhutsibhutsi bhisi-e, mo opa bhutsibhutsi bata me ni mbila ma de.» Ani atsia akoto ne holo ne naku 'gbá.

## 15

*U anu ne Yesu kala Pilato*  
(*Tsia bhú Mat. 27:1-2, 11-14; ne bhú Luk. 23:1-5; di ne bhú Dja. 18:28-38.*)

<sup>1</sup> Kèkpí má bhø, ongbengbe odimandø gba Ebhe-e apo bhúla o bhú bula. U adu bhú dabili bini ne obhelesi okpala, ne omusunu na líli gba Moidje, la di ne Libi okpala natsia 'kpí li 'ngú gba omaYuda libhому. U agbite Yesu ne ekpu, u anu ne ani, u atsia aha ani pi Pilato. <sup>2</sup> Pilato ayi ani me: «Mu ne 'ngbé ngámá gba omaYuda?» Yesu agie pi ani me: «Mu ngapapa ngamu.» <sup>3</sup> Ongbengbe odimandø adu apa osisiti 'ngú bhelé

li kute ani. <sup>4</sup> Abhomu-o, Pilato atsia ayi mata ani me: «Ndu 'ngú inde u ngapa e li kute mu inde-e, mu gie 'ngú tété bini di?» <sup>5</sup> Engú bini, Yesu gie 'ngú tété belegu de bini. Kaka-a, Pilato angamba naali.

*U akodho 'ngú gba Yesu me ani kpi bha makpi*

(*Tsia bhú Mat. 27:15-26; ne bhú Luk. 23:13-25; di ne bhú Dja. 18:39 - 19:16.*)

<sup>6</sup> Bhú ndu anokomia na Pasika hana, a ayo me Pilato tse 'kpa li kpala bini inde u aholo e bhú tikpu-o pi omaYuda. A ayo me a adu bhende li okpala ayó me Pilato tse 'kpa li e ko. <sup>7</sup> A abhaka me kpala bini inde u a'i e me Balabasi nde bhú tikpu. A adu me u nde aholo ani bhú dabili bini ne okpala na kpekpeke 'ndji me u nde abhøle kpala bini bhú nedhinga u agbe kpéke 'ndji lie-o. <sup>8</sup> Abhomu-o, bhiti okpala anu abhaka Pilato, u atsia aholo nayo me Pilato mene pi o maka ani amemene lie gøme gøme-o.

<sup>9</sup> Pilato agie pi uo me: «Yi akunda me ma tse 'kpa li 'ngbé ngámá gba omaYuda pi yi?» <sup>10</sup> Padhá de, anga ani adu ambila ndjindji me ongbengbe odimandø apu Yesu, anga okpala adu ne mukunda naali pi Yesu. <sup>11</sup> Abhomu-o, ongbengbe odimandø atsia ato bhú okpala bhelé me u yo me Pilato tse mangbo 'kpa li Balabasi. <sup>12</sup> Pilato atsia ayi bha mata uo me: «A ayo la me ma mene ngú kpala bhende yi nga'i e me 'ngbé ngámá gba omaYuda-a pi?» <sup>13</sup> Okpala bhomu-o atsia agie ne nasusula me: «Gi ani li kulusi!» <sup>14</sup> Pilato atsia adu ayi uo me: «Ani amene la mangua siti 'ngú dho?» U asusula mata kpekpeke naali ne na'e'e 'li o ne abhúla me: «Gi ani li kulusi!» <sup>15</sup> Abhomu-o, Pilato atse 'kpa li Balabasi pi uo, amba ni atsøgbolo bua uo de. Ani aha líli me u bhi Yesu ne fimbo, pipita-a, ani atsia aha ani pi uo me u gi ani li kulusi gigi.

*Osudha amu Yesu*  
(*Tsia bhú Mat. 27:27-31; di ne bhú*  
*Dja. 19:2-3.*)

<sup>16</sup> Abhomu-o, osudha aha Yesu, u atsia anu ne ani tu mbadhasu gba Pilato. U a'i ndu osudha koko hana. <sup>17</sup> U ato bongo na zumbe zumbe li kute ani, u atsia agala ehe na eti má kilili, u aha-a, a ato bhú 'ndji ani. <sup>18</sup> U atsia aholo nayi ani me: «'Ngbé ngámá gba omaYuda, atou!» <sup>19</sup> U adu abhi 'ndji ani ne mbamba, u atsia adu aku ngusu li kute ani. U atutu lipuku o kuto, u atsia adu ati kala ani. <sup>20</sup> Pita u amu ani lie má tsiki tsiki-e, u agbe bongo na zumbe zumbe-e li kute ani, u atsia agie obongo gba ani-e pi ani. Pipita-a, u atsia agbe ani kilidjo ngubula nagi ani li kulusi.

*U agi Yesu li kulusi*  
(*Tsia bhú Mat. 27:32-44; ne bhú*  
*Luk. 23:26-43; di ne bhú Dja. 19:17-*  
*27.*)

<sup>21</sup> Abhomu-o, osudha aholo kpála bini ne kpéke me ani bi kulusi gba Yesu-o. A adu 'li kpála ango-o me Simo, a adu 'dyi Alekidjandele ngauo ne Lufusi. A adu kpála na gudhu na Silene. U aholo ani me ani nde ngakodho 'kpí oo nedhinga ani adu agie lie lie abhiye-o. <sup>22</sup> U anu ne Yesu li bili inde u a'i e me Gologota, (a akunda napa me «bili na pelege 'ndji»). <sup>23</sup> U adu akunda naha vino inde u akpetse e ne mila pi ani. Engu bini, Yesu ndji de.

<sup>24</sup> U agi ani li kulusi. U agbogbo bhusu o li obongo gba ani-e me u nde agu ngaiza tété gbanda ngu nambila bhende a ayo me kpála bini ne bini sia e ko. <sup>25</sup> U agi Yesu li kulusi bhú saa na odukpabini kala tulukpe. <sup>26</sup> Balua inde u aye e ngu nasuno ta mangimbo gba ani-e aye nani lie me: «'NGBÉ NGÁMÁ GBA OMAYUDA.» <sup>27</sup> U atsia agi la di bhú dabili bini ne ani-e, obhulu 'zi bhisi inde adu agbulu

'he gba okpála ne kpéke. Bini adu li kulusi gba e li pá 'kpa ani na kokpa. Koko atsia adu li kulusi gba e li pá 'kpa ani na gali. [ <sup>28</sup> Abhomu-o, eli gba Ebhe inde aye lie bhú Bhuku gba ani-e me: «U ato 'li ani bhú ká okpála na sisiti-e†», atsia amene lie.]

<sup>29</sup> Okpála inde adu akodho 'kpí oo adu asosobho ani. U adu ako 'ndji o, u atsia adu apa me: «He-e! Ngamu, kpála inde abhólò 'ngbé 'ti Ebhe gba omaYuda, i tsia yiki sunda 'kpí bata-a, <sup>30</sup> kobho limu ngamu makpe, amba mu yie li kulusi-e kò kuto.»

<sup>31</sup> Ongbengbe odimandò gba Ebhe di ne omusunò na líli gba Moidje adu bhadi namu ani moko. U adu apa sunda o me: «Ani akobho okpála koko, ani ti da nakobho lie ngae makpe di! <sup>32</sup> Mbia inde-e, a ayo me Masiya, 'ngbé ngámá gba omafsalaele yie li kulusi, ya u, amba ya bhuka.» Obhende u agi o ne li okulusi gba o dengo ani-e adu bhadi namu ani moko.

*Yesu akpi*  
(*Tsia bhú Mat. 27:45-56; ne bhú*  
*Luk. 23:44-49; di ne bhú Dja. 19:28-*  
*30.*)

<sup>33</sup> Tulukpe-e, biti akò pí doto libhomu, nakolo pi saa na bata pita tulukpe. <sup>34</sup> Abhomu-o, bhú saa na bata-a, Yesu asula kpekpeke me: «Eloi, Eloi, lama sabakatani?» (A akunda napa me, «Ebhe gba ma, Ebhe gba ma, mo o'o ká ma ka ni?»)† <sup>35</sup> Bini bini bhú ká okpála inde adu oo adje ani lie, u atsia apa me: «Yi djedje, ani nga'i Eliya!» <sup>36</sup> Suka kpála bini agu holo. Ani anu azi epondje bhú kpongadha pandi. Ani agbite li kute mbamba. Ani atsia aha pi ani me ani ndji ne napa pi obi e me: «Ayó nga! Ní tsia nga ne me Eliya agó ngu nakò ani li kulusi-e kuto.» <sup>37</sup> Engu bini, Yesu asula kpekpeke. Ani atsia akpi.

† **15:28** 15:28 Tsia bhú Isa. 53:12. † **15:34** 15:34 Tsia bhú Ets. 22:2. \* **15:38** 15:38 'Ngbé 'kpá bongo inde si-e, adu nani agbo bhusu tina 'ti na bubu-o, ne bhende na bubu naali bhú 'ngbé 'ti Ebhe gba omaYuda ko. Tsia bhú Eki. 26:31-33, ne bhú Luk. 23:45, di ne bhú Ebe. 6:19.

<sup>38</sup> Abhomu-o, lido\* inde adu agbo bhusu 'ngbé 'ti Ebhe-e asidha bhusu e bhisi má tsue nayie abhúlá, akolo akuto! <sup>39</sup> Ngámá gba osudha kámá bini inde adu bhúla ani au lele maka ani akpi lie, ani atsia apa me: «Kpála inde-e bha ndju nako ne ndili gba Ebhe kukulú!»

<sup>40</sup> Olisi bini bini adu di oo. U adu atsia 'ngú bhomu-o mbo tsutsu. Bhú ká uo-o, a adu nani Malia , kpála na gudhu na Magadala, Malia , 'hi Djodje ngauo ne Djaki bhe na makombi makombi-o, a la di-e Salome. <sup>41</sup> Nedhinga li Yesu adu lie bhú Galilaya-a, olisi bhomu-o adu adhuku bhú dabili bini ne ani. U atsia adu di ateteke ani. Olisi koko bhelé inde ayie nani ne ani bhú Yelusalema adu di oo.

#### *Djodjefu azi Yesu*

*(Tsia bhú Mat. 27:57-61; ne bhú Luk. 23:50-56; di ne bhú Dja. 19:38-42.)*

<sup>42</sup> A adu ibili tagolo. A abhaka la lie me a nde ekpi naleke lio ngú anokomia-a, a akunda napa me ekpi kala ekpi naguo gba omaYuda-a , <sup>43</sup> saka okpála na Libi okpála natsia 'kpí li 'ngú gba omaYuda ago. A adu 'li ani me Djodjefu , kpála na gudhu na Alimatayo. A adu kpála nakpe makpe. Ani adu di adjeke Nau gba Ebhe-o . Ani atsia asia kpéke bua ngú nali agba Pilatè ngú nanu ayo kuo Yesu. <sup>44</sup> Pilatè angamba naali nadje me Yesu akpi kolo akpi-o. Abhomu-o, ani a'i ngámá gba osudha-o. Ani atsia ayi ani me ani akpi igini bhutode i-e. <sup>45</sup> Pita nagie 'ngú tété ka ngámá gba osudha-a, Pilatè aziba pi Djodjefu naha kuo Yesu. <sup>46</sup> Abhomu-o, Djodjefu akala daladeli inde u amene e li lene. Ani akè kuo Yesu li kulusi-e kuto. Ani atsia agagala ne daladeli bhomu. Ani anu a'o bhú lata inde adu me u nde adji e bhú teme-o. Ani awawala 'ngbé teme li bhèbhè. <sup>47</sup> Malia, kpála na gudhu na Magadala ngauo

ne Malia, 'hi Djodje adu atsia bili u a'o ani li e-o.

## 16

### *Yesu azuku*

*(Tsia bhú Mat. 28:1-8; ne bhú Luk. 24:1-12; di ne bhú Dja. 20:1-20.)*

<sup>1</sup> Li ekpi naguo gba omaYuda akodho 'kpí lie, Malia , kpála na gudhu na Magadala, ne Malia , 'hi Djaki, bhú dabili bini ne Salome, akala emu inde bhú e ne mungotsi ngú nanu apulu kute kuo Yesu ne di. <sup>2</sup> Abhomu-o, bhú 'kpí yinga kèkpi má bhé-o, nedhinga li ela adu akoto lie, u anu abhú lata. <sup>3</sup> U adu apa sunda o me: «A atumba teme inde li 'bhè lata-a pi ní da?» <sup>4</sup> Engú bini, u atsia 'kpí lie me-e, u au me teme bhomu-o atumba lie atumba. Abana a adu lie ngbéngbé.

<sup>5</sup> U ali lie bhú lata-a, u au makombi bini ato 'ndjá yambu na bubu me ani nde adu li pápá na kokpa. U atsia adje tsulu naali. <sup>6</sup> Engú bini, makombi bhomu-o apa pi uo me: «Yi adjé tsulu de. Yi ngagili Yesu, kpála na Nadjaleta, inde u agi nako e li kulusi-o. Ani azuku. Ani sii ade. Yi tsia nga bili nako u a'o ani li e-o. <sup>7</sup> Yi nu pa mangbo pi omukpata gba ani di ne Piele me: «Ani akodho 'kpí pi yi bhú Galilaya kalanu. Yi aú ani oo maka ani apa nako pi yi lie ko.» <sup>8</sup> Abhomu-o, u aze bhú lata-a ne holo kilidjo, anga mabhundja gba uo angbingi, kute uo atsia adu aguku. U tsia pa pi kpála de, anga u adu ne tsulu.

### *Yesu akoto li Malia, kpála na gudhu na Magadala*

*(Tsia bhú Mat. 28:9-10; di ne bhú Dja. 20:11-18.)*

[ <sup>9</sup> Li Yesu azuku lie bhú 'kpí yinga kèkpi-e, ani akoto ngaiza li Malia, kpála na gudhu na Magadala, inde ani apandja nani osisiti bua mananika bhú e-o.\* <sup>10</sup> Malia anu napapa pi okpála inde adu nani bhú dabili bini ne Yesu-o. U adu ne

\* 16:9 16:9 Ongú nayie si akólo bhú 16:20, a bhú obhuku koko na didili-e ade.

likabhu, u atsia adu di aku 'gbá.  
<sup>11</sup> Engú bini, li okpála bhomu-o adje lie me ani uu, di ne me Malia au anie, u bhuka ani de.

*Yesu akoto li omukpata bhisi  
 (Tsia bhú Luk. 24:13-35.)*

<sup>12</sup> Pipita-a, Yesu asuno matá lie maka kpála koko pi omukpata bhisi inde adu li kpadji ngú nanu akuti-o.

<sup>13</sup> Abhomu-o, obhobhomu-o ago apa pi okoko-o. Engú bini, okoko bhuka uo de.

*Yesu asuno lie pi omukpata ndjikpa ne ká bini*

*(Tsia bhú Mat. 28:16-20; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.)*

<sup>14</sup> Li soso-o, Yesu atsia asuno lie pi obhulu titima gba e ndjikpa ne ká bini-e me u nde ngazu 'he. Abhomu-o, ani atsia agbele 'dje uo ka ndi nabhuka di ne kpéke 'ndji gba uo-o. Padhá de, anga u bhuka nani okpála inde au ani me ani nde azuku-o de. <sup>15</sup> Abhomu-o, ani atsia apa pi uo me: «Yi nu pila doto libhomu nakpokpo Bádha Ngali pi ndu okpála hana. <sup>16</sup> Kpála inde abhúka-a, inde asía la di batisimo-o, ani kóbho. Kpála bhende i bhúka de-e, asía mangimbo. <sup>17</sup> A inde-e ongú inde adhúku bhú dabili bini ne obhende abhúka-o: u apándja osisiti bua bhú okpála ne 'li ma, u agáma 'ngú bhú odikongu na mbia. <sup>18</sup> U ahólo okpulu ne 'kpa o. I du di me u nde andji elá na bhøle kpála-a, a améne 'he bini ngú uo de. U a'ó 'kpa o pí 'ndji okpála na kuo, li okpála na kuo ango-o kóbho.»

<sup>19</sup> Pita napa ongú bhomu-o pi uo-o, Ebhe aha Ngámá Yesu abhúlá. Ani atsia adu kuto li pá 'kpa Ebhe na kokpa. <sup>20</sup> Abhomu-o, omukpata-a atsia anu naao nakpokpo Bádha Ngali ne ndu bili hana. Ngámá adu ateteke uo bhú okulu bhomu-o hana. Ongamba 'ngú inde u adu amene e adu di asuno me nasuno inde u ngasuno e-e, a ko 'ngú na paká.]

**Bádha Ngali  
gba Yesu Kilisito maka li  
Luka  
aye lie ko  
Eli na kalanu**

Bádha Ngali gba Yesu Kilisito maka li Luka aye lie ngasuno Yesu maka Mükobho inde li Ebhe apa nani me ni aha e pi piga gba omafsalaele la di ne pi ndu opiga na pila doto hana. Luka ngakpokpo me Bu Bhobua gba Ngámá-a a'i nani Yesu ngubula nakpokpo Bádha Ngali pi obhulu ndibhili (4:18). La, Bádha Ngali ango-o abedhe ne ndjinga bhú e pi okpála inde bhú o ne omulopolo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali ango-o ane matá mane bhú 'so 'kpí nedhinga na'ú ka Yesu abhúla. A ko bha Luka bini inde akpokpo 'ngú bhú bhuku na Kulu gba obhulu titima gba Yesu pindji nabhele a la di-e nayangba ka nabhuka bhú Kilisito pita na'ú ka Yesu abhúla-o.

Bhú Bádha Ngali inde-e, u ngagama 'ngú naali pindji mayo, ne pindji Bu Bhobua, ne pindji kulu gba olisi bhú kulu gba Yesu, di ne lele maka li Ebhe ngambu li sisiti 'ngú gba okpála lie-o.

**Ongbengbe ongú inde bhú bhuku inde-e ngae inde:**

Eli na kalanu 1:1-4

Nazu lie ne nadu bhú ndili lie gba Djaa bhulu nabatisa okpála di ne Yesu 1:5 - 2:52

Kulu gba Djaa bhulu nabatisa okpála 3:1-20

Batisimo di ne nale inde li Djabulu ale Yesu ne e-o 3:21 - 4:13

Kulu inde li Yesu amene e bhú ká okpála bhú Galilaya 4:14 - 9:50

Dhuku gba Yesu nayie bhú Galilaya ngú nanu abhú Yelusalema 9:51 - 19:27

Oekpi nasoso gba Yesu abhú Yelusalema 19:28 - 23:56

Nazuku gba Yesu, ne nakoto ka ani li okpála, a la di-e na'ú ka ani abhúla-o 24:1-53

*Lita 'ngú-o*

<sup>1</sup> Ndai ma na mukunda Tiofile, Okpála bhelé ale naye todú na ongú inde akodho 'kpí bhú ká ya-o. <sup>2</sup> U aye ongú ango-o maka li okpála inde au nayie li lilita-a, akpokpo pi ya lie ko. A ko okpála inde adu nakpokpo eli gba Ebhe-o. <sup>3</sup> Kaka-a, ngama di-e, pita nagili 'ngú tété má bhotobhoto nayie li dudu-o, ma au ndjindji me, ma kpokpo kúku pi mu li lelele, bhele kpála Tiofile, maka li ongú ango-o akodho 'kpí lie ko. <sup>4</sup> Ma kpokpo kúku pi mu, amba mu mbila kukulu 'ngú na ongú inde u asuno e pi mu ko.

*Andjelu apa me u azú Djaa bhulu nabatisa okpála*

<sup>5</sup> Bhú nedhinga li Elode adu lie 'ngbé ngámá na ndu doto na Yudaya-a, dimandé bini gba Ebhe-e adu oo. A adu 'li ani me Djakalia, ani adu bhú libi odimandé gba Abia. A adu 'li wala ani me Alidjabheti, ani adu bhú piga gba 'ngbé dimandé Alona. <sup>6</sup> Ndu uo bhisi hana adu bhú djila Ebhe ngbingbili. U atsia adu amene ndu líli gba Ngámá Ebhe-e hana. <sup>7</sup> Engú bini, ndili du ka uo de, anga Alidjabheti adu ne izude. La di-e, u adu ndu o bhisi hana me u nde agbegbe.

<sup>8</sup> Ekpí bini, Djakalia adu amene kulu na dimandé gba e kala Ebhe, anga adu ekpi na libi gba uo-o ngú namemene. <sup>9</sup> Maka li odimandé adu amemene lie, Djakalia atsia asia ngasa ngú nanu natsulu mungotsi pi Ebhe abhú 'ngbé 'ti gba Ngámá Ebhe, bhú titina na bubu-o. <sup>10</sup> Nedhinga ani adu atsutsulu lie, ndu okpála hana adu ayo Ebhe akilidjo.

<sup>11</sup> Abhomu-o, kolo má gala me-e, andjelu gba Ngámá Ebhe-e akoto

li ani. Ani alu de bili natsulu mungotsi-e ne li papa na kokpa. <sup>12</sup> Li Djakalia au ani lie me-e, tsulu aholo amene ani, mabhundja gba ani-e atsia angbingi. <sup>13</sup> Engu bini, andjelu-o apa pi ani me: «Djakalia, mo odje tsulu de, anga Ebhe adje nayo gba mu-o adje. Wala mu Alidjabheti azu pi mu ndili na bhobhoko. Mo ogisila 'li ani me Djaa . <sup>14</sup> Mo odu ne djali naali, li okpala bhele tsia kpi di djali ka nazu ani-o. <sup>15</sup> Ani adu 'ngbe kpala bhu djila Ebhe. Ani ndji vino de, ani ndji di pandi na kpekpeke de. Ani abedhe ne Bu Bhobua me ani nde nga bha bhu 'bu 'hi e. <sup>16</sup> Ani agie ongisi na Isalaele bhele li papa gba Ebhe, Ngama gba o-o. <sup>17</sup> Ani adu amene kulu kala Ebhe bhu dabili bini ne bua di ne angu maka Polofeta Eliya. Ani alake engu sunda odyi ongisi ne ongisi gba o-o. Ani adji mabhundja gba okpala na kpekpeke 'ndji, u tsia kolo ngbingbili,† ngubula naleke okpala inde bedhe pi Ebhe Ngama.»

<sup>18</sup> Abhomu-o, Djakalia ayi andjelu-o me: «Ma ambila la lele pi me a ko kukulu 'ngu-o? Padha de, anga ma agbe, wala ma akolo la di ne kalanga bhele.» <sup>19</sup> Andjelu-o atsia agie pi ani me: «Ngama-a, ma ne Gabiele, ndu 'kpi hana ma dudu de Ebhe. Ani atima ma me ma go kpokpo badha ngali inde-e pi mu. <sup>20</sup> Engu bini, li mu bhuka engu ma apa e pi mu-o lie de-e, kaka-a, 'bhe mu ani, mu ti da nagama 'ngu belegu de bini akolo li 'kpi li ongu ango-o amene lie lie ko. Engu inde amene lie na pakali nedhinga li Ebhe a'o e-o.»

<sup>21</sup> Li nedhinga bhomu-o, okpala adu adjeke Djakalia, u adu angamba ka ani adu abhue lie bhu 'ti Ebhe oo naali-o. <sup>22</sup> Ani akoto lie, ani ale nagama 'ngu pi uo pima. Abhomu-o, u atsia ambila me oo, ani au engu na ngangamba gba Ebhe-e au. Ani adu asuno 'ngu pi uo ne 'kpa e, ani

ti da nagagama ne 'bhe e de.

<sup>23</sup> Li nedhinga na kulu gba ani andjia lie, ani atsia agie lie agba e. <sup>24</sup> Pita nedhinga bhomu-o, wala ani Alidjabheti atsia abi 'bhi. Ani awo nga bha lie ngubula epe bhuluvue libhому. Ani adu apa me: <sup>25</sup> «Tsia nga engu inde li Ngama Ebhe amene e mu-mu-o. Ani abhundja ma. Mbia inde-e, ani a'e ehe inde nako adu aha numu mu-mu bhu ka djila okpala a'e.»

*Andjelu akpo 'ngu pindji nazu Yesu*

<sup>26</sup> Li ebhi gba Alidjabheti akolo lie ne epe madhia-a, Ebhe atima andjelu Gabiele bhu kuti bini na ndu doto na Galilaya, inde 'li e me Nadjaleta.\* <sup>27</sup> Ani atima ani gba tsangba bini inde adu adjeke naha lie ne bhoko bini. A adu 'li bhoko ango-o me Djodjefu , ani adu bhu piga gba 'ngbe ngama Davidi. Tsangba ango-o, a adu 'li ani me Malia . <sup>28</sup> Andjelu-o ali agba ani, ani atsia ayi ani me: «Mu oo! Ngamu inde asia badha bhu 'bu gba Ebhe-e , Ngama Ebhe bhu dabili bini ne mu.» <sup>29</sup> Malia angamba ka eli bhomu-o naali. Ani adu ayi bua e me: «Ta nayi inde-e pi?» <sup>30</sup> Abhomu-o, andjelu-o atsia apa pi ani me: «Malia, mo odje tsulu de, anga mo osia badha bhu 'bu gba Ebhe-e asia. <sup>31</sup> Tsia nga, mo obi 'bhi, mu zu ndili na bhobhoko, mu tsia gisila 'li ani me Yesu. <sup>32</sup> Ani adu 'ngbe kpala, u tsia du a'i ani me, Ndili gba Api 'Kpi. Ebhe Ngama a'ó me ani u maka ogbi e Davidi. <sup>33</sup> Ani au duduma ne duduma pi piga gba omatsalaele. Nau gba ani-e ndjia de.»

<sup>34</sup> Malia atsia ayi andjelu-o me: «Engu ango-o amene lie lele pi? Padha de, anga ma kunda nga naama bhoko de!» <sup>35</sup> Andjelu-o agie pi ani me: «Bu Bhobua ago pi mu, li angu gba Ebhe Api 'Kpi buku mu maka kulu zini. Kaka-a, ndili inde

† 1:17 1:17 Tsia bhu Mal. 3:23-24. \* 1:26 1:26 Nadjaleta: Nayie bhu Yelusalema akolo bhu Nadjaleta-a, a ko kilometele kama bini. Tsia bhu Luk. 1:19.

mo ozú e adú bubu, u atsia dũ a'í ani me, Ndili gba Ebhe. <sup>36</sup> Tsia nga okala mũ Alidjabheti di ne ebhi. Ani azú ndili na bhobhoko, abana ani nde lie ne kalanga bhelé. Kpála nako u adũ a'i e me izude-o. Mbia inde-e, ebhi gba ani-e ibili ne epe madhia, <sup>37</sup> anga kpéke da 'ngú pi Ebhe belegũ ade bini.» <sup>38</sup> Abhomũ-o, Malia atsia apa me: «Ma ne bali gba Ngámá. A ayo me ndũ 'ngú mo opa e hana, a mene lie mũma moko.» Pipita-a, andjelu-o atsia atapa.

### *Malia anũ natsia Alidjabheti*

<sup>39</sup> Bha bhú oekpí bhomũ-o, Malia ayie, ani anũ má gala bhú kuti bini na ndu doto na ndũ ká eta na Yudaya. <sup>40</sup> Ani akolo lie oo, ani ali bhú 'ti gba Djakalia, ani atsia ayi Alidjabheti. <sup>41</sup> Li Alidjabheti adje maka li Malia ayi ani lie me-e, ndili-e atsia atili bhú 'bu ani. Abhomũ-o, Alidjabheti atsia abedhe ne Bu Bhobua. <sup>42</sup> Ani atsia asula kpekpeke me: «Ebhe aha bisagu pi mũ ane ndũ olisi hana, bisagu gba ani-e di pí ndili inde mo ozú e-o! <sup>43</sup> Ma ne da me 'hi Ngámá gba ma-a go tsia ma-a? <sup>44</sup> Tsia nga, li nedhinga inde ma adje maka mo oyi ma lie me-e, ndili inde bhú 'bu ma-a atili ne djali hana. <sup>45</sup> A ko djali pi mũ, ngamũ ølø inde abhuka! Padhá de, anga engú inde li Ebhe apa e pi mũ-o, améne lie mamene.»

### *Etsi gba Malia*

<sup>46</sup> Abhomũ-o Malia atsia atoko Ebhe me:  
«Bua ma ngadhøgø Ngámá,  
<sup>47</sup> bua ma abedhe ne djali pi Ebhe Mũkobho gba ma-o,  
<sup>48</sup> anga ani abhundja ma, bali gba e-e ko.  
A moko, nayie pi mbia inde-e, ndũ opiga hana adú a'i ma me, ma ne ølø inde asia bisagu ka Ebhe,  
<sup>49</sup> anga Ebhe na Angu amene ongú na ngbengbengbe mũma.  
A ko Ebhe na bubu,

<sup>50</sup> ndjinga gba ani-e ngadũ dudũma ne dudũma pi okpála inde ngakpe ani ko.

<sup>51</sup> Ani amene ngbengbe 'ngú ne angu gba e-o.

Ani atsambala okpála na 'ngbé bua.

Ani atsia amene me mabhundja gba uo-o kolo padhá.

<sup>52</sup> Ani akø ongbengbe ongámási ne kuto,

ani atsia a'e'e okpála na padhá ne abhúlá.

<sup>53</sup> Ani aha ehe bhelé pi obhende adũ ne gumũ-o,

ani atsia agie obhulũ tia ne 'kpa o padhá.

<sup>54</sup> Ani ateteke omafsalaele, obalise gba e-o.

Ani 'ili 'to e de li nasuno bádha 'ngú gba e ndũ 'kpí hana,

<sup>55</sup> maka nani ani apa lie pi onguo ogbi ní Abalahama ne opiga gba e-o.»

<sup>56</sup> Malia asi ne Alidjabheti masikpe de epe bata. Pipita-a, ani atsia agie lie agba e.

### *Alidjabheti azu Djaa*

<sup>57</sup> Li nedhinga nazu ka Alidjabheti akolo lie, ani atsia azu ndili na bhobhoko. <sup>58</sup> Li okpála inde asili kuti denko ani-e, di ne obhe na piga gba ani-e adje lie me, Ebhe adje bha ndjũ ndjinga ani-e, u atsia adũ akpi djali bhú dabili bini ne ani.

<sup>59</sup> Pita poso bini-e, u ago ngú nato ndili-e bhú gandja. U adũ akũnda nagisila 'li 'dyi ani Djakalia.

<sup>60</sup> Abhomũ-o, 'hi ani atsia apa me: «A mo-o ade, adú 'li ani me Djaa.»

<sup>61</sup> U atsia apa pi ani me: «Bhú piga gba mũ-o, kpála bini inde ne 'ili bhomũ-o ade.» <sup>62</sup> Abhomũ-o, u atsia amene 'kpa o pi 'dyi ani ngú nayi

ani me ani akũnda me u gisila 'li ndili-e pi. <sup>63</sup> Djakalia amene 'kpa e pi uo me u go pi ní ne pála ndula, ani atsia aye pépé me: «A 'li ani me Djaa.» Ndũ uo hana atsia angamba naali. <sup>64</sup> Bha li nedhinga bhomũ-o, 'bhø ani abhulu, ani aholo



nagama 'ngú, di ne nadhøgø Ebhe.  
<sup>65</sup> Abhomu-o, ndu okpála hana inde asili kuti lingo uo-o, aholo adje tsulu. Ngali na engú ang-o atsia aya bhú ndu doto na ndu ká eta na Yudaya libhomu. <sup>66</sup> Ndu okpála hana inde adu adjedje-e, adu abhundja pépé, u atsia adu apa me: «Mbo! Ndili ang-o, adú-e maka da?» Angu gba Ebhe-e adu bha ndju bhú dabili bini ne ani.

*Djakalia akpokpo ngbengbe 'ngú gba Ebhe*

<sup>67</sup> Djakalia, 'dyi ndili-e, abedhe ne Bu Bhobua. Abhomu-o, ani atsia aholo nakpokpo 'ngú maka polofeta me:

<sup>68</sup> «A ayo me, u dhøgø Ebhe,

Ngámá gba omafsalaele-o,

anga ani abhundja okpála gba e,  
 ani atsia agbegbe uo bhú bali.

<sup>69</sup> Ani atima kpála na angu bini  
 bhú piga gba Davidi, bali gba e,  
 ngú nakobho ya.

<sup>70</sup> A bhomu-o engú inde ani apa  
 nani e didili bhú 'li obubu  
 opolofeta gba e-o.

<sup>71</sup> Ani apa nani me, ni akóbho ní sa  
 'kpa ndu obhulu yala gba ní-e  
 hana,  
 di ne obhende ngakunda amene  
 ní sisiti-o.

<sup>72</sup> Ani adje ndjinga onguo ogbi ní,  
 ani atsia abhundja di gandja na  
 bubu gba e-o.

<sup>73</sup> Silika nani inde ani atu e pi ogbi  
 ní Abalahama-a,  
 ani améne pi ní mamene.

<sup>74</sup> Pita nakobho ní sa 'kpa obhulu  
 yala ngubula me ní améne  
 kulu pi ni ne tsulu de,

<sup>75</sup> amba ní dhøgø ni ne bua ní hana.  
 Ní du di bhú djila ni ngbingbili  
 ndu 'kpí hana bhú mukobho  
 gba ní-o.

<sup>76</sup> Pi mu-o, ndika ma, u adú a'i mu  
 me, polofeta gba Apí 'Kpí,  
 anga mo onú kalanu  
 ngú naleke kpadji gba Ebhe-o.

<sup>77</sup> Mo osúno pi okpála gba ani-e me,  
 ani a'é siti 'ngú inde bhú uo-o  
 ma'e,  
 ani tsia kóbho di uo.

<sup>78</sup> A ko anga Ebhe gba ní-e abedhe  
 ne ndjinga bedhe,  
 kaka-a, ani atíma zi 'kpí pí ní  
 maka zi 'ndji 'la na kòkpí.

<sup>79</sup> Ani asúno lie pi obhende bhú biti  
 di ne obhende ne tsulu kuo,  
 ngubula me ní dhuku li kpadji  
 na guo 'ngú .»

<sup>80</sup> Ndili-e adu abhele, ani atsia adu  
 asia kpéke bua. Ani adu nadu bhú  
 omili bili akolo li 'kpí inde ani asuno  
 lie lie mbámá pi omafsalaele ko.

## 2

*Malia azu Yesu  
 (Tsia bhú Mat. 1:18-25.)*

<sup>1</sup> Li nedhinga bhomu-o, Agosite,  
 'ngbé ngámá na Loma , aha líli me u  
 ye 'li okpála hana inde píla doto gba  
 ni-o. <sup>2</sup> Gina naye 'li okpála ang-o  
 amene lie me Kiliniusi nde ne 'ngbé  
 ngámá na Silia. <sup>3</sup> Ndu okpála hana  
 adu anu me u ye 'li o. Abhomu-o,  
 kpála ne kpála atsia anu bhú kuti u  
 azu ani bhú e ko.

<sup>4</sup> Djodjefu ayie bhú kuti na Nad-  
 jaleta, bhú ndu doto na Galilaya, ngú  
 nanu bhú ndu doto na Yudaya, bhú  
 kuti inde u a'i e me Beteleme. A ko  
 bili inde u azu 'ngbé ngámá Davidi  
 lie-o, anga ngaani makpe, ani du  
 nani bhú piga gba Davidi ko. <sup>5</sup> Ani  
 anu oo me u ye 'li ni, bhú dabili bini  
 ne Malia , ølø inde ani adu adjeke  
 naha e ko. Ølø ang-o adu ne ebhi.  
<sup>6</sup> U adu lie abhú Beteleme-e, ekpí  
 nazu ka ani atsia akolo. <sup>7</sup> Ani azu  
 ndili na bhobhoko, gina ndili gba e  
 ko. Ani agagala ani ne bongo , ani  
 atsia aseke ani bhú ehe nazu 'he gba  
 onu, anga dabili du pi uo bhú 'ti gba  
 ogomago-o de.

*Andjelu akpokpo bádha ngali pi  
 omulila gba okandøle*

<sup>8</sup> Bha bhú ndu doto bhomu-o,  
 omulila gba okandøle adu asili abhú  
 'gu ngú nalila onu gba o-o. <sup>9</sup> Andjelu

gba Ebhe-e akoto li uo. Sangu gba Ebhe-e asa uo ngbalina maka zi 'kpí. Abhomu-o, u atsia adje tsulu naali. <sup>10</sup> Engú bini, andjelu-o apa pi uo me: «Yi adjé tsulu de, anga ma ago akpokpo pi yi bádha ngali inde ahá djali naali pi ndu okpála hana. <sup>11</sup> Naki bhú kuti gba Davidi-e, u azu Múkobho pi yi. A ko Kilisito , Ngámá. <sup>12</sup> Yi tsia 'he inde yi ambíla ani ka e ko: yi abháka ndje ndili u agagala e ne bongo, u atsia aseke e bhú ehe nazú 'he gba onu.» <sup>13</sup> Kolo má gala me-e, bhiti oandjelu ayie abhúlá, u ago abhaka andjelu bhomu, u atsia adu adhөгө Ebhe me:

<sup>14</sup> «Sangu pi Ebhe inde abhúlá, guo 'ngú gba ani-e du píla doto pi okpála inde ani akúnda o ko!»

#### *Omúlila anu abhú Beteleme*

<sup>15</sup> Li oandjelu-o agie lio lie abhúlá-a, omúlila atsia apa sunda o me: «Ní nu kolo nga bha abhú Beteleme, amba ní u engú inde akolo oo, engú inde li Ebhe Ngámá asuno e pi ní ko.» <sup>16</sup> U anu bhú holo, u abhaka Malia, Djodjefu ne mboye ndili-e me u nde aseke ani bhú ehe nazú 'he gba onu. <sup>17</sup> U au ani lie, u atsia akpokpo 'ngú inde li andjelu apa e pi uo píndji mboye ndili bhomu-o. <sup>18</sup> Ndu okpála hana inde adje engú li omúlila adu apa e-e, angamba naali. <sup>19</sup> La-a, pi Malia, ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>20</sup> Pipita-a, omúlila aholo nagie lio. U adu aha sangu pi Ebhe, u atsia adu di adhөгө ani ngubula ndu 'ngú inde u adje e ne bhende u au e hana, anga ndundu hana akodho 'kpí maka li andjelu-o akpokpo pi uo lie ko.

#### *U anu ne Yesu bhú 'ngbé 'ti Ebhe gba omaYuda*

<sup>21</sup> Bhú ekpí na madjina pita nazu ani-e, li nedhinga nato ani bhú gandja akolo lie, u atsia agisila 'li ani me Yesu. A bhomu-o 'li inde li andjelu asuno e kala me 'hi ani bi 'bhi ani-o.

<sup>22</sup> Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngú na'o ani sa 'kpa Ngámá. <sup>23</sup> Padhá de, anga u aye bhú líli gba Ngámá-a me: «Ndu ongisi na obhosibhosi na gigena hana, u a'ó uo kpí pi Ngámá.†» <sup>24</sup> U atsia aha di makiso maka li líli gba Ngámá-a apa lie me: «A ayo naha bөbhө bhisi. † du mo-o de-e, mu de ha ongisi bөbhө bhisi.»\*

#### *Simeona agie heni pi Ebhe ngú Yesu*

<sup>25</sup> Bhú nedhinga bhomu-o, kpála bini adu nani bhú Yelusalema, a adu 'li ani me Simeo. A ko nani kpála na ngbingbili , ani adu amanga Ebhe. Ani adu adjeke nedhinga li Ebhe a'é líkabhu gba omafsalaele lie ko. Bu Bhobua adu bhú dabili bini ne ani. <sup>26</sup> Abhomu-o, Bu Bhobua atsia apa nani pi ani me, kala nakpi ka ani-e, ani aú ngaiza Masiya inde li Ngámá atima e-o. <sup>27</sup> Nedhinga li okpála inde azu Yesu ago ne ani lie ngú namene maka li líli apa lie li 'ngú gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda. <sup>28</sup> Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pi Ebhe me:

<sup>29</sup> «Ngámá, mbia inde-e, maka mo opa lie,

mu ti da na'o ma, bali gba mu-o, me ma nu ne guo 'ngú,

<sup>30</sup> anga ma au múkobho gba mu-o ne djila ma au.

<sup>31</sup> Múkobho inde mo otima e kala ndu okpála hana-o.

<sup>32</sup> Ani adu eke pi omupagano.

† 2:23 2:23 Tsia bhú Eki. 13:2, 12. \* 2:24 2:22-24 Bhú líli gba omaYuda-a, i du nani me elө nde azu-o, a ayo me ani nu ngaiza bhú 'ngbé 'ti Ebhe gba omaYuda, ani vulu lie, amba ani kolo bubu kala Ebhe. Tsia bhú Lev. 12:8.

Ani tsia dú sangu gba omaɓsalaele, okpála gba mu-o.»

<sup>33</sup> 'Dyi Yesu ne 'hi Yesu angamba naali ka engú inde u adu apa e li ani-o. <sup>34</sup> Simeo ayo me Ebhe tuko bisagu pí uo, ani atsia apa pi Malia, 'hi Yesu me: «Ebhe abhu ndili inde-e ngubula me okpála bhelé bhú ká omaɓsalaele li bhú mangimbo, amba Ebhe 'e'e matá okoko bhúlá. Ani adú ehe inde li Ebhe ngasuno e, li okpála bhelé tsia yála ani. <sup>35</sup> Kaka-a, ani agbé mabhundja inde awo lie li bua okpála bhelé-e bhú mbasú. La-a, pi mu makpe-e, likabhu adú bua mu maka ngise má puu!»

### *Ana, polofeta na øøle*

<sup>36</sup> Polofeta bini na øøle adu di nani oo. A adu 'li ani me Ana, ndili gba Fanuele bhú piga gba Asela. Ani adu me ani nde agbe má dyuku! U amene nani ne bhoko gba e inde u aha lio ne e bhú ndili-e kalanga mananika. <sup>37</sup> Pita nakpi ka 'ko ani-e, ani atsia ato økø. Li nedhinga bhomu-o, ani adu ibili ne kalanga ndjikpa madjina ne ká badha. Ani du ayie bhú 'ngbé 'ti Ebhe gba omaYuda-a de. Ani adu amene kulu lie pi Ebhe sukpe ne ngbikpi. Ani adu atse ezú ngú nayo Ebhe. <sup>38</sup> Bha li nedhinga bhomu-o, ngaani di-e, ani ago, ani atsia aholo adhegø Ebhe. Ani aholo akpokpo 'ngú pindji ndili-e pi ndu okpála hana inde adu adjeke me Ebhe gbegbe okpála na Yelusalema bhú likabhu gba o ko.

### *U agie lio bhú Nadjaleta*

<sup>39</sup> Li 'dyi Yesu ne 'hi Yesu andjia namene ndu 'ngú hana inde li líli gba Ngámá apa e lie, u atsia agie lio bhú ndu doto na Galilaya, bhú kuti gba o na Nadjaleta-o. <sup>40</sup> Ndili-e adu abhele, ani atsia adu abi angu. Imbilangu gba ani-e atsia adu di abhulu lie. Bádha bhú 'bu gba Ebhe-e atsia adu di bhú dabili bini ne ani.

*Yesu bhú 'ngbé 'ti Ebhe gba omaYuda*

<sup>41</sup> Ndu kalanga hana, okpála inde azu ani-e adu anú bhú Yelusalema ngú namene anokomia na Pasika .

<sup>42</sup> Li ani akolo lie ne kalanga ndjikpa ne ká bhisi-e, u atsia anu ne ani bhú dabili bini maka u amemene lie ko. <sup>43</sup> Li anokomia andjia lie, u aholo agie lio. Engú bini, ndili-e Yesu atigala naae bhú Yelusalema me 'dyi ani ne 'hi ani nde mbila de. <sup>44</sup> U adu abhundja lie me ani bhú dabili bini ne obi o na kpadji-e, u atsia adhuku ekpi bini libhomu. Pipita-a, u aholo nagili ani bhú ká opiga gba o di ne bhú ká obi o-o. <sup>45</sup> U u la ani lie de-e, u atsia agie lio bhú Yelusalema ngú nagili ani.

<sup>46</sup> Bhú 'kpi na bata-a, u abhaka ani bhú 'ngbé 'ti Ebhe gba omaYuda me ani nde adu bhú ká omusuno. Ani adu adje uo di ne nayiyi uo. <sup>47</sup> Ndu okpála inde adu adje ani-e hana, adu angamba naali ka imbilangu inde ani adu agie engú ne e ko. <sup>48</sup> Li okpála inde azu ani au ani lie, u angamba naali. 'Hi ani atsia ayi ani me: «Ndika ma, mo omene ya mo-o ka ni? Tsia nga ya ne 'dyi mu-o, ya adu igini agili mu me bua ya nde alu bha ndju abhúlá má gba!» <sup>49</sup> Engú bini, ani agie pi uo me: «Yi de ngagili ma ngú ni? Yi mbila igini de me, a ayo me ma du bhú 'ti gba 'dyi ma-a di?» <sup>50</sup> Engú bini, u mbila nani ta 'ngú inde ani adu apa e pi uo-o de.

<sup>51</sup> Pipita-a, ani atsia agie lie ne uo bhú Nadjaleta. Ani adu amene líli gba uo-o. 'Hi ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>52</sup> Yesu adu abhele, imbilangu gba ani-e adu di abhulu lie. Engú inde ani adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

## 3

*Kulu gba Djaabhu nabatisa okpála*

*(Tsia bhú Mat. 3:1-12; ne bhú Mlk. 1:1-8; di ne bhú Dja. 1:19-28.)*

1-2 Pipita-a, Tibeles akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba ani-e, Djaá ndili gba Djakalia, inde adu nani adu abhú 'gu-o, asia eli gba Ebhe . Nedhinga ango-o, Pose Pilate adu alila ndu doto na Yudaya. Elode adu ngámá na ndu doto na Galilaya. Ndaí ani Filipino atsia adu ngámá na ndu doto na Itule ne Talakonite. Lisiansi atsia adu nae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimandø gba Ebhe . 3 Abhomu-o, Djaá aholo adhuku bhú 'gu lingo ngade 'ngu na Djuludani, ani atsia adu atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.» 4 Maka li polofeta Isaya, aye lie bhú bhuku gba e me:

«A ko kpála bini inde ngatotobhila abhú 'gu me:

<Yi leke kpadji pi Ngámá,  
yi li okpadji pi ani ngbingbili!

5 Ndu tsutsukudhu bili sunda ongba 'ta hana abédhe lie.

Ndu oeta na ngbengbengbe ne obhe na djedjedje hana adjí lie,

i kólo má gbata gbata!

Ndu kpadji na gagala hana akólo ngbingbili.

Okpadji na sisiti akólo babadha.

6 Li ndu okpála hana tsia ú maka li Ebhe ngakobho okpála lie ko!†»

7 Abhomu-o, okpála bhelé adu ago abhaka Djaá ngubula nasia batisimo. Ani atsia adu ayi uo me: «Ngayi opiga kpulu inde-e! A asuno pi yi da me yi kpe mangimbo gba Ebhe inde ngago-o? 8 I du mo-o, yi mene engú inde asúno me yi adjí bua yi kukulu! Yi adú abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi

Abalahama! 9 Maka ma ngapapa lie inde-e, u a'o ngbakpa bhú li ndula-a ngú nadede a'o. Ndu ndula hana inde i li líli na babadha de-e, u adé, u tsia bhíke bhú djua.»

10 Abhomu-o, okpála ango-o atsia adu ayi ani me: «I du mo-o, a ayo me ya mene pi?» 11 Ani atsia adu agie pi uo me: «Kpála bhende li bongo na mbulu nde ka e bhisi-e, a ayo me ani ha bini pi kpála bhende li bongo na mbulu nde ka e ade ko. Kpála bhende li ezu nde ka e e, a ayo me ani ha di mbo pi kpála bhende li ezu nde ka e ade ko.»

12 Ondembi na mandjandja ago di ngú nasia batisimo, u atsia ayi ani me: «Musuno, a ayo me ya mene pi?» 13 Ani atsia agie pi uo me: «Yi ayó tia ane bhende li líli aziba e de.»

14 Osudha atsia ayi di ani me: «A la ya-a, a ayo me ya mene naaya pi?» Ani atsia agie pi uo me: «Yi agbálu tia ka kpála bini ne kpéke, di ne eu de. Engú bini, yi mbila bha tia na kulu gba yi ko.»

15 Maka li okpála adu adjeke nago ka Masiya lie, u atsia adu ayi lio li bua o pindji Djaá me: «A ko ndi-e Masiya inde li Ebhe atima e di?»

16 Djaá atsia agie pi ndu uo hana me: «Ngama-a, ma ngabatisa naama yi ne engu. Engú bini, a ngago pita ma ne kpála. Kpála ango-o ane ma ne angu. Ma belegu ne tetele kpála ade ngubula me ma bhulu ekpú na maløke gba ani-o.\* Ani abátisa yi ne Bu Bhobua di ne djua. 17 Ani aholo kakpa gba e sa 'kpa e ngú nape nguwa gba e-o. Ani apó bhúla nguwa na babadha gba e bhú ngbokopi, engú la bini, ani tsia bú fufukudha-a bhú djua inde li kpála bini ti da nabulu e de.»

18 Djaá aha nani líli koko bhelé pi okpála. Bhúbhú-o, ani atsia adu akpokpo Bádha Ngali gba Ebhe-e pi uo. 19 Ngámá Elode aha nani

† 3:6 3:4-6 Tsia bhú Isa. 40:3-5. \* 3:16 3:16 Nani agba omaYuda-a, kulu nagbe maløke bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá.

Elodiade,    gba ndai e-o.† Ani amene nani mat  di osisiti 'ng  koko bhel . Kaka-a, Djaa atsia ambe bh  'ndji ani. <sup>20</sup> Abhom -o, Elode amene mat  siti 'ng  koko p p , ani aha Djaa, ani atsia abhike ani bh  tikp .

*Djaa abatisa Yesu*

*(Tsia bh  Mat. 3:13-17; di ne bh  Mlk. 1:9-11.)*

<sup>21</sup> Kala me Djaa li bh  tikp -o, ani abatisa ngaiza ndu okp la hana. Abhom -o, Yesu atsia asia di batisimo. Nedhinga li Yesu adu akpokpo 'ng  ne Ebhe lie, kokp  abhulu lie, <sup>22</sup> u au Bu Bhobua ngak  p  ani maka b bh . U atsia adje eli ayie abh l  apa me: «M  ne ndili gba ma na mukunda. Djali li bua ma ng  m  naali.»

*Onguo ogbi Yesu*

*(Tsia bh  Mat. 1:1-17.)*

<sup>23</sup> Yesu akpo nani lita kulu gba e me ani nde ne kalanga masakpe de ndjikpa bata. Okp la adu abhundja naao me, a ko ndili gba Djodjefu .

Djodjefu ndili gba Eli,

<sup>24</sup> Eli ndili gba Matati,

Matati ndili gba Levi,

Levi ndili gba Maleki,

Maleki ndili gba Djanai,

Djanai ndili gba Djodjefu ,

<sup>25</sup> Djodjefu ndili gba Matatiasi,

Matatiasi ndili gba Amosi,

Amosi ndili gba Nauma,

Nauma ndili gba Eseli,

Eseli ndili gba Nagai,

<sup>26</sup> Nagai ndili gba Mata,

Mata ndili gba Matatiasi,

Matatiasi ndili gba Semeini,

Semeini ndili gba Djoseke,

Djoseke ndili gba Djoda,

<sup>27</sup> Djoda ndili gba Yoanana,

Yoanana ndili gba Lesa,

Lesa ndili gba Djelubabela,

Djelubabela ndili gba Salatiele,

Salatiele ndili gba Neli,

<sup>28</sup> Neli ndili gba Maleki,

Maleki ndili gba Adi,

Adi ndili gba Kosama,  
Kosama ndili gba Elemadama,

Elemadama ndili gba Ele,

<sup>29</sup> Ele ndili gba Yesu,

Yesu ndili gba Eliedjele,

Eliedjele ndili gba Djolime,

Djolime ndili gba Matati,

Matati ndili gba Levi,

<sup>30</sup> Levi ndili gba Simeo,

Simeona ndili gba Yuda,

Yuda ndili gba Djodjefu ,

Djodjefu ndili gba Djonama,

Djonama ndili gba Eliakime,

<sup>31</sup> Eliakime ndili gba Melea,

Melea ndili gba Mena,

Mena ndili gba Matata,

Matata ndili gba Natana,

Natana ndili gba Davidi,

<sup>32</sup> Davidi ndili gba Yese,

Yese ndili gba Obede,

Obede ndili gba Boadja,

Boadja ndili gba Salamona,

Salamona ndili gba Nasone,

<sup>33</sup> Nasona ndili gba Aminadaba,

Aminadaba ndili gba Adimina,

Adimina ndili gba Aluni,

Aluni ndili gba Edjelone,

Edjelone ndili gba Peledje,

Peledje ndili gba Yuda,

<sup>34</sup> Yuda ndili gba Yakobho,

Yakobho ndili gba Isaka,

Isaka ndili gba Abalahama,

Abalahama ndili gba Tela,

Tela ndili gba Naola,

<sup>35</sup> Naola ndili gba Seluga,

Seluga ndili gba Lagau,

Lagau ndili gba Pelege,

Pelege ndili gba Ebele,

Ebele ndili gba Sela,

<sup>36</sup> Sela ndili gba Kainame,

Kainame ndili gba Alepakasada,

Alepakasada ndili gba Seme,

Seme ndili gba Nua,

Nua ndili gba Lemeke,

<sup>37</sup> Lemeke ndili gba Matusalema,

Matusalema ndili gba Enoka,

Enoka ndili gba Yelede,

Yelede ndili gba Malalele,

Malalele ndili gba Kenana,

† 3:19 3:19 Filipo ne ndai Elode nani inde abh le Djaa bhulu nabatisa okp la ko. A adu nani me Filipo nde kpi nga de. Tsia bh  Lev. 20:21.

38 Kenana ndili gba Enosa,  
Enosa ndili gba Sete,  
Sete ndili gba Adamu ,  
Adamu ndili gba Ebhe.

#### 4

##### *Djabulu ale Yesu*

(*Tsia bhú Mat. 4:1-11; di ne bhú Mlk. 1:12-13.*)

<sup>1</sup> Pita li Yesu abedhe lie ne Bu Bhobua-a , ani ayie lingo 'ngu na Djuludani, Bu Bhobua atsia amba bhúla ani abhú mili bili. <sup>2</sup> Oo, Djabulu ale ani ngubula ekpí ndjikpa badha. Bhú oekpí bhomu-o, ani zu 'he de. Pipita-a, gumu aholo amene ani. <sup>3</sup> Abhomu-o, Djabulu atsia apa pi ani me: «I du me mu nde ne Ndili gba Ebhe-e, pa pi teme inde-e me a dji lie, amba a kolo ezu.»

<sup>4</sup> Yesu agie pi ani me: «Eli gba Ebhe-e apa me: <Kpála kóbho bha bini ka ezu de.†>»

<sup>5</sup> Djabulu aha ani, anu ne ani apí 'ta. Ani asuno ndu ondende na doto pi ani hana, bhú nedhinga bedi bhomu. <sup>6-7</sup> Ani atsia apa pi ani me: «Ebhe aha ndu angu, ne otia na ondende bhomu-o hana mu ma. Ma ti da nahaha pi kpála inde ma akunda nahaha pi e. I du me mu nde akikita lipaku mu kuto kala ma-a, ma ahá ndu angu ne otia na ondende bhomu-o hana pi mu.»

<sup>8</sup> Yesu atsia agie pi ani me: «Eli gba Ebhe-e apa me:

<Dhөгө Ebhe Ngámá gba mu,  
amba mu toko bha bini ani kpi  
e kpi.†>»

<sup>9</sup> Pipita-a, Djabulu aha ani, anu ne ani abhú Yelusalema. Ani a'o ani apí tulundji 'ngbé 'ti Ebhe gba omaYuda, ani atsia apa pi ani me: «I du me mu nde bha ndju ne Ndili gba Ebhe-e, 'ulu, mu ke kuto, <sup>10</sup> anga eli gba Ebhe-e apa me:

<Ebhe ahá líli pi oandjelu gba e me,  
u lila mu. †>

<sup>11</sup> La di matá:

<U abí mu sa 'kpa o, amba mo otú  
'dhu mu lí teme de.†>»

<sup>12</sup> Yesu atsia agie pi ani me: «Eli gba Ebhe-e apa la di me: <Mo olé Ebhe Ngámá gba mu-o de.†>»

<sup>13</sup> Pita li Djabulu andjia nale Yesu lie ne ndu kpadji hana-a, ani atsia a'o ka ani ngú nadjеке nedhinga koko.

##### *Yesu agie lie bhú Galilaya*

(*Tsia bhú Mat. 4:12-17; di ne bhú Mlk. 1:14-15.*)

<sup>14</sup> Abhomu-o, Yesu atsia agie lie bhú ndu doto na Galilaya, bhú angu gba Bu Bhobua. Ndu okpála hana aholo nakpokpo 'ngú gba ani-e bhú ndu doto bhomu-o libhому. <sup>15</sup> Ani adu asuno bhú oeti gba uo nadjе líli gba Moidje-o . Ndu okpála hana atsia adu adhөгө ani.

##### *Yesu anu bhú Nadjaleta*

(*Tsia bhú Mat. 13:53-58; di ne bhú Mlk. 6:1-6.*)

<sup>16</sup> Pipita-a, ani atsia anu bhú Nadjaleta, kuti inde ani abhele bhú e-o. Li 'kpí nague gba omaYuda-a , ani ali bhú 'ti nadjе líli gba Moidje maka ani adu amemene lie ko. Ani ayie bhúlá ngú natanga eli gba Ebhe-e pi okpála. <sup>17</sup> Abhomu-o, u atsia aha bhuku gba polofeta Isaya pi ani. Ani abhulu bhuku-o, ani atsia agili bili u aye lie me:

<sup>18</sup> «Bua gba Ngámá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

Ani atima ma ngú natobhila pi obalise me, u azé bhú bali gba o-o maze,

pi okpála i u 'kpí de-e me, u aú matá 'kpí mau.

Ani atima ma di ngú napandja obhende bhú mbolo sa 'kpa obhende ngato mbolo li uo-o.

<sup>19</sup> Ngama-a, ma akpókpo pi okpála me nedhinga inde li

† 4:4 4:4 Tsia bhú Det. 8:3. † 4:8 4:8 Tsia bhú Det. 6:13. † 4:10 4:10 Tsia bhú Ets. 91:11.  
† 4:11 4:11 Tsia bhú Ets. 91:12. † 4:12 4:12 Tsia bhú Det. 6:16. † 4:19 4:18-19 Tsia bhú Isa. 61:1-2.

Ebhe adjé ndjinga uo lie akolo.†»

<sup>20</sup> Pita li Yesu andjia natatanga lie, ani agagala bhuku-o, ani atsia agie pi kpála na kulu-o. Abhomu-o, ani aha lie adu kuto. Ndu okpála inde adu bhú 'ti oo hana abanga djila o li ani. <sup>21</sup> Ani atsia aholo napa pi uo me: «Engú inde yi adje e bhú Bhuku gba Ebhe-e li bili bhomu-o, amene lie naki amene.» <sup>22</sup> Ndu okpála hana adu angamba li Yesu naali. U atsia adu aziba eli na bádha bhú 'bu inde ani adu akpokpo e-o. Abhomu-o, u atsia adu apa me: «A inde-e ndili gba Djodjefu-o di?»

<sup>23</sup> Abhomu-o, ani atsia apa pi uo me: «Ma ambila na paká me yi apá muma gbitaku inde me: <Mutia, kobho limu ne titi mu.> Yi tsia pá di muma me: <Ya adje ndu 'ngú inde mo omene e bhú Kapalanauma-a hana. Mene nga la di ngua 'ngú ango-o bhú kuti mo obhele bhú e ko.>» <sup>24</sup> Ani atsia apa matá pipita-a me: «A moko, ma apa pi yi me, a ko kukulu 'ngú, okpála ziziba polofeta bhú kuti gba e belegu de bini.

<sup>25</sup> Ma apa pi yi na paká me, oekesi na olisilisi adu nani bhelé bhú ká omaɬsalaele li nedhinga gba polofeta Eliya. Li nedhinga bhomu-o, ebha dhi nani-i de ngubula kalanga bata ne epe madhia. Kaka-a, adyindi na ngbéngbé atsia ali bhú doto ango-o libhomu. <sup>26</sup> Engú bini, Ebhe tima nani Eliya ngú nateteke suka oekesi bhomu-o bini de. Ani atima bha bini ani gba eké bini na gandji kuti na Salepeta bhú ndu doto na Sidona. <sup>27</sup> Matá-a, okpála na kába adu di nani bhelé bhú ká omaɬsalaele li nedhinga gba polofeta Elisa. Engú bini, Ebhe kobho nani suka uo de, bha bini Namana, gandji kpála na Silia.»

<sup>28</sup> Li ndu okpála hana inde adu bhú 'ti oo adje 'ngú bhomu-o lie, u ake 'ngú lio naali. <sup>29</sup> U ayie bhúlá, u agbe ani bhú 'ti bhomu-o, u agbele ani apí 'ta inde u ayiki gudhu gba

o pí e-o. U amene nani mo-o ngú nandjimba ani akuto. <sup>30</sup> Engú bini, ani akodho bha 'kpí bhú ká uo oo, ani atsia atapa.

*Yesu akobho kpála li siti bua adu ato mbolo lie*  
(Tsia bhú Mlk. 1:21-28.)

<sup>31</sup> Abhomu-o, Yesu anu bhú Kapalanauma, kuti bini na ndu doto na Galilaya. Ani atsia adu asuno pi okpála bhú 'kpí naguo gba omaYuda-o. <sup>32</sup> U adu nangamba li ngua nasuno gba ani-o, anga ani adu nasuno ne angu gba Ebhe. <sup>33</sup> Bhú 'ti nadje líli gba Moidje oo, kpála bini li siti bua adu nato mbolo lie, aholo asusula kpekpeke me: <sup>34</sup> «Aa! Yesu, kpála na Nadjaleta, mo okunda namene ngú ya pi? Mo ogo ngú nabhili ya? Ma mbila mu hana, mu ne kpála na bubu inde li Ebhe atima e ko!» <sup>35</sup> Yesu atsia ambe bhú 'ndji ani me: «Gbite 'bhe mu, amba mu koto la di bhú kpála bhomu!» Siti bua-a agu 'i kpála ango-o kuto má gbwe, bhú ká djila ndu okpála inde adu oo hana. Ani akoto bhú ani, engú bini ani mene ani sisiti de. <sup>36</sup> Ndu okpála hana angamba, u atsia adu ayi lio sunda o me: «A inde-e mangua eli dho? Ani ngaha líli ne kpéke, di ne angu pi osisiti bua, u ngaze bhú okpála!» <sup>37</sup> Okpála atsia adu apa 'ngú gba Yesu-o bhú ndu okuti bhomu-o hana.

*Yesu akobho okpála bhelé na kuo*  
(Tsia bhú Mat. 8:14-17; di ne bhú Mlk. 1:29-34.)

<sup>38</sup> Li Yesu ayie lie bhú 'ti nadje líli gba Moidje-e, ani atsia anu ali bhú 'ti gba Simo. A abhaka me a nde li 'hi wala Simo ne kpéke bandji. Abhomu-o, u atsia ayo ka Yesu me ani kobho ani. <sup>39</sup> Ani ago alu pi ani, ani ambe bhú 'ndji bandji-o. Abhomu-o, bandji-e atsia ayie li ani. Ani ayie bhúlá kolo má gala, ani atsia aholo nalu 'zu pi uo.

<sup>40</sup> Li ela ati lie, ndu okpála hana inde adu ne okpála na kuo ngangá agba o-o, abha uo, u atsia ago ne

uo pi Yesu. Aní a'o 'kpa e pí 'ndjí uo bini ne bini, u atsia akobho ndu o hana. <sup>41</sup> Osisiti bua aze di bhú okpála na kuo bhelé. Osisiti bua ango-o atsia adu asusula me: «Mú ne Ndili gba Ebhe!» Engú bini, Yesu adu ambe bhú 'ndjí uo. Aní atsia adu di agbite kpadji pi uo me u agama 'ngú de, anga u adu ambila hana me a ko Masiya inde li Ebhe atima e ko.

*Yesu akpokpo Bádha Ngali bhú ndu doto na Yudaya*  
(Tsia bhú Mlk. 1:35-39.)

<sup>42</sup> Li ekpí aseke lie, aní akoto bhú kuti bhomu, aní atsia atapa bhú mili bili. Bhiti okpála aholo nagili aní. U au aní lie, u aholo akikiliki lio pi aní me: «Mo o'ó ká ya de, ní tigala ne yi si-i.» <sup>43</sup> Engú bini, Yesu apa pi uo me: «A ayo me ma anu di nakpokpo Bádha Ngali Nau gba Ebhe-e bhú okuti koko, anga Ebhe atima ma ngánga.» <sup>44</sup> Abhomu-o, aní atsia adu akpokpo Bádha Ngali bhú oti nadje líli gba Moidje na ndu doto na Yudaya-o.

## 5

*Yesu a'i omukpata na gigina*  
(Tsia bhú Mat. 4:18-22; di ne bhú Mlk. 1:16-20.)

<sup>1</sup> A akolo ekpí bini, Yesu adu lingo ekpe na Genedjaleta.\* Bhiti okpála asulu de aní má wakaka ngú nadje 'li Ebhe. <sup>2</sup> Aní au zabu bhisi lingo 'ngu me obhubhulu-o nde aze, u nde ngavulu onado gba o na sungu-o. <sup>3</sup> Yesu atsia a'u bhú susuka bini, bhende gba Simo-o. Do aní pi Simo me: «Yie lingo 'gø-o, amba mu dyudyo limu mbo ne abhú 'ngu.» Yesu atsia adu bhú zabu-o kuto. Aní aholo nasuno pi bhiti okpála bhomu-o. <sup>4</sup> Aní andjia nagama 'ngú lie, aní atsia apa pi Simo me: «Dyudyo zabu-o apí tsiba, amba ngayi ne obi mu-o, yi bala

onado gba yi-e bhú 'ngu ngú naholo osungu-o.»

<sup>5</sup> Simo agie pi aní me: «Musuno, ya amene kulu sukpe inde-e libhomu, ya holo belegu sungu de bini. Engú la bini, ka 'li mu-o, ya abhike onado-o bhú 'ngu mabhike.» <sup>6</sup> U abala onado lie bhú 'ngu-o, u atsia aholo osungu bhelé. Kaka-a, onado gba uo-o aholo natsot-solo. <sup>7</sup> Abhomu-o, u amene 'kpa o pi obi o inde adu bhú zabu koko ngú na'i uo me, u go ha mbo 'kpa o pi o. Obhobhomu-o ago, u abebedhe ozabu bhisi-e ne osungu bedhebedhe. Kaka-a, ozabu atsia aholo nalinda bhú 'ngu.

<sup>8</sup> Li Simo Piele au lie mo-o, aní atí bhú li 'dhu Yesu, aní atsia apa me: «Ngámá, gbe limu de ma ne sidi, anga ma ne siti kpála!» <sup>9</sup> Aní apa mo-o, anga ngauo ne obi e, u angamba nani naali ka bhiti osungu inde u aholo e ko. <sup>10</sup> Djaki ne Djaa, ongisi gba Djebedayo inde adu amene bhú dabili bini ne Simo-o, angamba bhadi moko. Engú bini, Yesu apa pi Simo me: «Mo odjé tsulu de, anga nayie pi mbia inde-e, mu dú matá agili osungu de, engú bini, mo odú ibili agili okpála pi Ebhe.» <sup>11</sup> Abhomu-o, u agbele ozabu gba o apí 'gø. U a'o ka ndu 'he gba o hana, u atsia anu bhú dabili bini ne Yesu.

*Yesu akobho kpála na kába*  
(Tsia bhú Mat. 8:1-4; di ne bhú Mlk. 1:40-45.)

<sup>12</sup> A akolo ekpí bini, Yesu adu bhú kuti bini na ndu doto na Galilaya, kpála bini inde li kába atsotsolo kute e hana-a, akoto. Li aní au Yesu lie, aní ago atí kala aní, aní atu bhúla e ne kuto, aní atsia alopola lie pi aní me: «Ngámá, i du me mu nde akunda-a, mu ti da nakobho ma.» <sup>13</sup> Yesu aha 'kpa e a'o li aní. Aní atsia apa me: «Ma akunda moko, kokobho!» Abhomu-o, kába agulu bha kolo li kute kpála ango-o hana maka ndjombe. <sup>14</sup> Yesu atsia aha

\* 5:1 5:1 Genedjaleta: A ko 'ili koko na ekpe na Galilaya. Tsia bhú Mlk. 6:53.



lílí pí aní me: «Mo opá belegu engú inde-e pí kpála bini de. Engú bini, nũ suno bha limũ pí dimandø gba Ebhe maka lí kũte mũ nde lie ko. Pípíta-a, amba mũ ha makiso maka lí lílí gba Moidje apa lie, ngũbula napana pí ndũ okpála hana me mo okobho.»<sup>15</sup> Abana mo-o, engú gba Yesu adũ bha ayangba ne kalanũ. Okpála bhelé adũ ago apo bhúla o de aní ngú nadjé aní, ne di me aní kobho o ne okuo gba o-o.<sup>16</sup> Engú la bini, aní adũ anũ bhú omili bílí. Oo, aní atsia adũ akpokpo 'ngú ne Ebhe.

*Yesu akobho dukuto  
(Tsia bhú Mat. 9:1-8; di ne bhú  
Mlk. 2:1-12.)*

<sup>17</sup> Ekpí bini, Yesu adũ asuno pí okpála. OmũFalisai koko ne omũsuno na lílí gba Moidje inde ayie nani bhú ndũ okuti hana na ndu doto na Galilaya ne Yudaya, di ne bhú 'ngbé gũdhu na Yelusalema adũla de aní. Ne angu gba Ebhe-e, aní atsia adũ akobho okpála na kuo.<sup>18</sup> Lí nedhinga bhomũ-o, okpála koko ago ne dukuto bini me u nde abí aní pí kalagba. U adũ nagili kpadji ngú nato aní abhú 'ti, amba u 'o aní kala Yesu.<sup>19</sup> Engú bini, u ale nali ne aní abhú 'ti pima ka lí okpála adũ lie bhelé-o. Abhomũ-o, u atsia a'ũ ne aní apí 'ngbũ 'ti. U adũ gudho lí 'ngbũ 'ti-e má vuu! U atsia akø aní ne ekpú tété ne kalagba gba e hana bhú ká okpála kala Yesu.<sup>20</sup> Lí Yesu ambila lie me okpála bhomũ-o abhuka ní na paká-a, aní atsia apa pí kpála na kuo-o me: «Olia ma, ma a'e osisiti 'ngú gba mũ-o a'e.»

<sup>21</sup> Lí omũsuno na lílí di ne omũFalisai adje 'ngú bhomũ-o lie, u atsia aholo nabhundja me: «Kpála inde ngasobho Ebhe me-e, a ko nga naae da? A ti da na'e siti 'ngú gba okpála da, bha bini Ebhe ngae kpi e kpi dí?»<sup>22</sup> Yesu ambila mabhundja gba uo lie, aní apa pí uo me: «Yi ngabhundja lí bua yi mo-o ka ní?»<sup>23</sup> Ne napa me, «Ma a'e osisiti 'ngú

gba mũ a'e», ne napa me, «Yie bhúlá, amba mũ dhuku-o» a ane ne bhuku ne bhedho?<sup>24</sup> Engú bini, ma akũnda me yi mbila me ngama, Ndíli gba kpála-a, ma ne angu píla doto ngú na'e siti 'ngú.» Abhomũ-o, Yesu atsia apa pí dukuto-o me: «Ma apa pí mũ me yie bhúlá, ha dabili gba mũ-o, amba mũ gie limũ agba mũ!»<sup>25</sup> Kolo má gala me-e, kpála bhomũ ayie bhúlá bhú ká djila ndũ okpála hana, aní aha dabili inde aní de asi pí e, aní atsia agie lie agba e me aní nde ngadhøgø Ebhe.<sup>26</sup> Ndũ okpála hana adũ angamba naali. U abedhe ne tsũla bedhe, u adũ adhøgø Ebhe, u atsia adũ apa me: «Ya au naki ongú na ngangamba!»

*Yesu a'i Levi  
(Tsia bhú Mat. 9:9-13; di ne bhú  
Mlk. 2:13-17.)*

<sup>27</sup> Pípíta-a, Yesu akoto kilidjo, aní atsia au ndømbi bini na mandjandja, adũ 'lí aní me Levi,<sup>†</sup> aní nde adũ kuto bhú bilo gba e-o. Yesu apa pí aní me: «Kpata ma.»<sup>28</sup> Levi ayie bhúlá, aní a'o ka ndũ 'he hana, aní atsia akpata Yesu.

<sup>29</sup> Pípíta-a, Levi atsia amene 'ngbé anokomia pí Yesu abhú 'ti gba e. Ondømbi na mandjandja bhelé di ne okpála koko adũ nazũ 'he ne uo bhú dabili bini.<sup>30</sup> OmũFalisai di ne omũsuno na lílí gba o adũ nadi mutokono, u atsia ayi omũkpata gba Yesu-o me: «Ka ní yi ngazũ 'he ne nandji vino lie bhú dabili bini ne ondømbi na mandjandja di ne okpála na sisiti-e?»<sup>31</sup> Yesu atsia agie pí uo me: «Okpála bhende lí kuo nde lí o ade-e, u ne gumũ mutia ade. Engú bini, obhende inde lí o ne kuo ne gumũ mutia ngao.<sup>32</sup> Ma go ngú na'i okpála bhende ngbingbili-e de. Engú bini, ma ago ngú na'i obhende na sisiti-o, ngũbula me u dji bua o.»

*Yesu akpo 'ngú pindji natse ezũ  
ngú nayo Ebhe  
(Tsia bhú Mat. 9:14-17; di ne bhú  
Mlk. 2:18-22.)*

<sup>†</sup> 5:27 5:27 Levi: A ko 'ili koko gba Matié.

<sup>33</sup> Okpála bhomu-o apa pi ani me: «Omukpata gba Djaa di ne obhende gba omuFalisai ngatse ezụ piko ngú nayo Ebhe. Engú bini, obhende gba mu-o la bha naao ngazu 'he ne nandji vino.» <sup>34</sup> Yesu agie pi uo me: «Yi abhundja naayi me yi ti da naholo omaha 'ko elø ne kpéke ngú natse ezụ me 'ko elø-o nde nga bha bhú dabili bini ne uo? <sup>35</sup> Nedhinga koko akólo makolo, nedhinga inde li okpála adhépe 'ko elø-o lie bhú ká uo-o. Li oekpi angoo, u tsia tsé la 'zụ.»

<sup>36</sup> Yesu atsia aha di gbitaku inde-e pi uo me: «Kpála bini tí da nasidha bongo na mbia, ani tsia há pápála-a ngú nadudu li bongo na didili de. Ani mene mo-o, li bongo na didili-e sídha, la di-e, pála bongo na mbia lé ne bhe na didili-e de. <sup>37</sup> Kpála bini tí da na'o vino na mbia bhú odidili dhudhu na ko 'nu de. Ani mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o tsia síti di. <sup>38</sup> Engú bini, a ayo na'o vino na mbia bhadi bhú odhudhu na mbia!‡ <sup>39</sup> I du me kpála bini nde andji pandi na didili andji-e, ani kúnda matá pandi na mbia de, anga ani pá me: «Pandi na didili-e ane ne bádha.»»

## 6

*Yesu aziba me ni ne ngámá pí 'ndji ekpi naguo gba omaYuda*

*(Tsia bhú Mat. 12:1-8; di ne bhú Mlk. 2:23-28.)*

<sup>1</sup> Ekpi bini naguo gba omaYuda-a, Yesu ne omukpata gba e adu akodho 'kpi bhú ngu 'zụ inde u a'i e me ngano. Omukpata gba ani-e aholo akodho 'ndji 'ndji, atutuluba sa-tikpa o, u atsia adu nazuzu.\* <sup>2</sup> OmuFalisai koko ayi uo me: «Yi ngamene bhomu-o ni? Líli gba ní-e ziba namene kulu bhú 'kpi naguo de.» <sup>3</sup> Yesu atsia agie pi uo me:

«Yi atanga ndjindji bhú Bhuku gba Ebhe-e , engú nani li Davidi amene e? Ekpi bini, ngaani ne omaha e, u adu lie ne gumu-o, <sup>4</sup> ani ali nani bhú 'ti Ebhe. Ani aha mapa inde u a'o e ngú nadhøgø Ebhe-e, ani azu. Ani atsia aha di pi omaha e, abana li líli gba ní-e apa lie me azú bha mapa angoo ne odimandø-o .» <sup>5</sup> Yesu atsia apa matá pi uo me: «Yi mbila me ngama, Ndili gba kpála-a, ma ne ngámá pí 'ndji ekpi naguo.»

*Yesu akobho kpála li 'kpa e adu ne eze*

*(Tsia bhú Mat. 12:9-14; di ne bhú Mlk. 3:1-6.)*

<sup>6</sup> A adu nani ekpi naguo koko bini, Yesu ali bhú 'ti nadje líli gba Moidje-o . Ani akolo lie oo, ani atsia aholo nasuno. Bhú ká okpála-a, bhoko bini adu oo, adu li 'kpa ani na kokpa-a ne eze. <sup>7</sup> Omusuno na líli gba Moidje di ne omuFalisai adu agili kpadji ngú napu ngbángá Yesu me, ani ngamene siti 'ngú. Kaka-a, u aholo atsia ani ne kpéke djila atigala ani kóbho kpála li 'kpi naguo.

<sup>8</sup> Engú bini, li Yesu ambila lie me ali bua uo oo, u ngabhundja mo-o, ani atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála angoo ayie bhúlá, ani atsia alu kala ndu okpála inde adu bhú 'ti oo hana. <sup>9</sup> Pipita-a, Yesu atsia apa pi uo me: «Ma ne engú bini ngú nayi yi tété: Li 'kpi naguo, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbho ani de?» <sup>10</sup> Ani atsia ndu uo hana bini ne bini. Abhomu-o, ani atsia apa pi kpála na eze-e me: «Gbele 'kpa mu.» Kpála angoo agbele 'kpa e, 'kpa ani atsia akolo ndjindji. <sup>11</sup> Engú bini, okpála angoo abi 'gú naali, u atsia aholo nayi lío

‡ 5:38 5:38 Yesu akúnda napa bhomu-o me, u ti da na'o nasuno gba ni na mbia pí bhe gba omuFalisai-e de. \* 6:1 6:1 Agba omaYuda-a, i du me kpála nde ngakodho ngano-o, amba ani ngamene bhomu-o kulu. La-a, líli gba uo-o ziba namene kulu bhú 'kpi naguo-o de. Tsia bhú Det. 23:26, di ne bhú Lev. 23:5-14.

sunda o me: «Ní ti da namene ngú Yesu mangua 'ngú dho?»

*Yesu alo obhulɔ titima ndjikpa ne ká bhisi*

*(Tsia bhú Mat. 10:1-4; di ne bhú Mlk. 3:13-19.)*

<sup>12</sup> Bhú oekpí bhomu-o, sukpe bini, Yesu a'ɔ apí 'ta ngú nakpokpo 'ngú ne Ebhe. Sukpe libhomu aní así nakpokpo 'ngú ne Ebhe. <sup>13</sup> Li ekpí aseke lie, aní a'í omukpata gba e-o, aní atsia alo okoko bhú ká uo ndjikpa ne ká bhisi inde aní agisila nani 'li o me obhulɔ titima gba Yesu . <sup>14</sup> A adu nani Simo (inde li Yesu agisila 'li e me Piele) ne ndai e Andili, Djaki ne Djaa , Filipino ne Batelemi, <sup>15</sup> Matié ne Tuma, Djaki ndili gba Alafayo ne Simo (inde u a'í e me kpála inde akunda doto gba e), <sup>16</sup> Djude ndili gba Djaki ne Yuda Isikaliote, inde apú Yesu pí obhulɔ yala-o.

*Yesu asuno pí bhiti okpála*  
*(Tsia bhú Mat. 4:23-25.)*

<sup>17</sup> Aní akɔ ne uo, aní atsia alu asabu 'ta li bili li omukpata gba aní koko bhelé adu lie ko. Okpála bhelé na ndu doto na Yudaya libhomu, na Yelusalema ne ogudhu na ngo 'ngbé 'ngu, gudhu na Tile ne Sidona adu di oo. <sup>18</sup> Okpála ango-o ago nani ngú nadje Yesu, amba aní kobho di obhende adu ne okuo-o. Aní atsia akobho di okpála inde li osisiti bua adu ato mbolo li o ko. <sup>19</sup> Ndu okpála hana adu nagili nabu 'kpa o li kute aní, anga ndu uo hana adu akobho ka angu inde adu bhú aní-o.

*Yesu akpo 'ngú pindji djali ne likabhu*

*(Tsia bhú Mat. 5:1-12.)*

<sup>20</sup> Yesu atsia omukpata gba e-o, aní atsia apa pí uo me:

«A ko djali pí yi, ngayi obhulɔ ndibhili,  
anga Ebhe ne ngámá gba yi-e ngae!

<sup>21</sup> A ko djali pí yi, ngayi obhende ngadje gumu mbia inde,  
anga yi azú 'he, yi tsia 'ú 'u!

A ko djali pí yi, ngayi obhende ngaku 'gba mbia inde,  
anga yi amú 'zo!

<sup>22</sup> A ko djali pí yi, i du me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. <sup>23</sup> Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhulá. Ogbi uo adu nani amene bhadi opolofeta sisiti moko.

<sup>24</sup> Engú bini, a ko likabhu pí yi obhulɔ tia,

anga yi asia makalá gba yi-e asia!

<sup>25</sup> A ko likabhu pí yi, ngayi obhulɔ ká 'zú mbia inde,  
anga yi adú adjé gumu!

A ko likabhu pí yi, ngayi obhende ngamu 'zo mbia inde,  
anga yi adú bhú talia, yi tsia dú naku 'gbá!

<sup>26</sup> A ko likabhu pí yi, i du me ndu okpála hana nde ngapa 'ngú gba yi-e ndjindji, anga ogbi uo adu apa bhadi nani babadha 'ngú moko li opolofeta na eu ko!»

*Yi kunda obhulɔ yala gba yi-o*  
*(Tsia bhú Mat. 5:38-48, 7:12a.)*

<sup>27</sup> «Engú bini, ma apa la pí yi me, ngayi obhende ngadje ma-a, yi kunda obhulɔ yala gba yi-o. Yi mene bádha 'ngú pí obhende ngayala yi ko. <sup>28</sup> Yi yo me bisagu gba Ebhe-e go pí okpála bhende ngatɔ pedje li yi, amba yi yo Ebhe pí obhende ngamene yi sisiti ko. <sup>29</sup> Li kpála bini su pála mu li pápá bini-e, mu de dji di pápá koko pí aní, amba aní su.† Li kpála bini gbulu koti gba mu-o, mu de 'o di aní amba aní ha bongo na mbulu mu-o. <sup>30</sup> Li kpála yo 'he ka mu-o, mu de ha pí aní. I du me kpála bini nde agbulu 'he ka mu-o, mo oyó matá ka aní de. <sup>31</sup> Yi mene

† 6:29 6:29 Agba omaYuda-a, nasu kpála li pabhɔ e-e, a ko sobho na ngbéngbé.

pi okpála koko bhadi maka bhende yi akunda me u mene e pi yi ko.

<sup>32</sup> I dɔ me yi nde ngakunda bha bini okpála bhende ngakunda yi-e, yi abhúndja de me yi asía makalá kaka-a de, anga okpála na sisiti-e, u ngakunda bhadi okpála bhende ngakunda o ko! <sup>33</sup> I dɔ me yi nde ngamene bha bini bádha 'ngú pi okpála bhende i ngamemene pi yi-e, yi abhúndja de me yi asía makalá kaka-a de, anga okpála na sisiti-e bhadi ngamemene moko! <sup>34</sup> I dɔ me yi nde ngaha bha bini 'he pi okpála inde yi abhundja me u ti da di nagigie pi yi li 'kpí koko-o, yi abhúndja de me yi asía makalá kaka-a de. Abana okpála na sisiti, u ngaha di 'he pi obi o okpála na sisiti ngabula me, u gie di pi o li 'kpí koko!

<sup>35</sup> Engú bini, yi kunda obhulu yala gba yi-o. Yi mene bádha 'ngú pi uo. Yi ha 'he pi uo me yi nde bhundja de me u agie pi yi magie de. Yi asía 'ngbé makalá. Yi mene mo-o, yi tsia dú ongisi gba Ebhe Apí 'Kpí, anga ngaani-e, ani babadha pi okpála inde i gie heni pi ani de. Ani di babadha pi okpála na sisiti. <sup>36</sup> Yi bedhe ne ndjinga pi okpála maka li 'dyi yi Ebhe abedhe di ne di lie pi okpála ko.»

*Yi akódho 'ngú gba okpála koko de*

*(Tsia bhú Mat. 7:1-5.)*

<sup>37</sup> «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú pí okpála koko de, amba Ebhe a'ó di engú pí yi de. Yi mbu li siti 'ngú gba okpála koko, amba Ebhe mbu di li siti 'ngú gba yi ko. <sup>38</sup> Yi ha 'he pi okpála koko, amba Ebhe ha di 'he pi yi. Ani abédhe kili gba yi-e ne nguwa bedhe má kpambi, i hóló nabala kuto. A moko, Ebhe ahá bhadi pi yi maka lele yi ngahaha pi okpála koko lie ko.»

<sup>39</sup> Yesu atsia apa matá pi uo gbitaku bini me: «Kpála i u 'kpí de-e ti da naholo 'kpa kilí e inde i u 'kpí de ngú nasuno kpadji pi ani uu? A mo-o ade! I dɔ mo-o, li ndu uo bhisi hana bála bhú 'dú. <sup>40</sup> Mɔkpata bini ne mɔsuno gba e ne imbilangu de. Engú la bini, ndu mɔkpata hana inde u asuno 'he pi e ndjindji-e, ani kólo maka mɔsuno gba e-o. <sup>41</sup> Ka ni mɔ ngau mboye ku mɔsoli inde bhú djila ndai mɔ-o lie, mɔ tsia u la ndula inde bhú djila mɔ-o de? <sup>42</sup> Lele pi mɔ ti da napa lie pi ndai mɔ me: <Ndai ma, 'o ma, ma gbe mboye ku mɔsoli inde bhú djila mɔ bhomɔ>, ngamɔ-o, mɔ nde u ngala belegu de ndula inde bhú djila mɔ-o? Bhulu kali, gbe ngaiza ndula inde bhú djila mɔ-o. Pipita-a, mɔ tsia u la 'kpí ndjindji ngú nagbe mboye ku mɔsoli inde bhú djila ndai mɔ ko.»

*Ndula ne lí e*

*(Tsia bhú Mat. 7:16-20, 12:33-35.)*

<sup>43</sup> «Ndula na babadha lili lílí na sisiti de. La di-e, ndula na sisiti lílí lílí na babadha de. <sup>44</sup> U mbila ndula li lí e. U koko manga li ndula na eti de. La di-e, u koko malibhombi li kobe de. <sup>45</sup> Kpála na babadha-a, ka bádha 'ngú inde li bua ani-e, ani méne bhadi engú na babadha. La di-e, kpála na sisiti-e, ka siti 'ngú inde li bua ani-e, ani méne bhadi engú na sisiti. Engú inde ngakoto bhú 'bhé kpála-a, a ko engú inde ngayie ali bua ani ko.»

*Oeti bhisi*

*(Tsia bhú Mat. 7:24-27.)*

<sup>46</sup> «La ka ni yi nga'i ma lie ndu 'kpí hana me: <Ngámá, Ngámá?> Yi la ngamene engú inde ma ngapa e pi yi me yi mene e ade. <sup>47</sup> Kpála bini inde agó abháka ma, adjé 'li ma, ani tsia méne maka ma apa lie, ma akunda napana pi yi me ani maka da. <sup>48</sup> Ani maka kpála inde aholo nayiki eti. Ani adjí edú tsutsu, ani atsia a'o 'dhu 'dhu-o pí teme. Li engu asi lie, a ago atu lie li kute eti-o, eti ango-o tsia dyiki de, anga a alu kpekpeke.

49 Engú bini, kpála bhende adje 'li ma, ani tsia mene maka ma apa lie de-e, ani maka kpála inde ayiki eti gba e pí doto. 'Dhũ 'dhũ tété ade. Li engu asi lie, a ago atũ lie li kute eti-o. Eti-e atuko bha kolo má gala, a atsia agugumũ hana má kpəkəbhə!»

## 7

*Yesu akobho kpála na kulu gba ngámá bini gba osudha*  
(Tsia bhú Mat. 8:5-13.)

1 Pita ani andjia napa ndũ ongú bhomũ-o lie hana pi okpála-a, ani atsia atapa bhú kuti na Kapalanauma. 2 Oo, abhú Kapalanauma-a, ngámá bini gba osudha na Loma,\* adũ ne bali gba e bini inde ani adũ akunda e naali. A adũ li bali ango-o ne kuo masikpe de me ani kodho bua e. 3 Li ani adje 'ngú gba Yesu-o lie, ani atsia atima obhelesi okpála koko gba omaYuda agba Yesu. U anũ napa pi ani me, ani go kobho bali gba ngámá ango-o. 4 Li obhelesi okpála bhomũ-o akolo de Yesu lie, u atsia aholo nakikiliki lio pi ani me: «Mũ ti da namene ehe inde ani ayo e pi ani, i dũ me mũ nde akunda-o, anga ani ndjindji. 5 Ani kunda di omaha ní naali. Ani ayiki eti nadjé líli gba Moidje pi ní ngae.»

6 Abhomũ-o, Yesu atsia aholo 'nú ne uo. Ani akolo lie de kuti-e masikpe-e, ngámá gba osudha-a atsia atima obi e me u pa pi ani me: «Ngámá, mo ondála limũ de. Ma ne kpála na padhá. A ayo ka mũ nali bhú 'ti gba ma-a de.† 7 Kaka-a, ma u igini lima ndjindji de me ma go kolo li mũ ngama-a de. Engú bini, pa bha koli eli bini, amba bali gba ma-a kobho. 8 Ma ngapa mo-o, anga ma sa líli gba ongámási. Ma la di ngaha líli pi osudha. Ma pa pi bhe bini-e me: «Nũnũ!» Ani nú. Ma pa pi bhe koko-o me: «Gogo!» Ani gó.

\* 7:2 7:2 Ngámá gba osudha na Loma: Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adũ nani maYuda de. † 7:6 7:6 Li maYuda bini li bhú 'ti gba kpála inde ne maYuda ade-e, li maYuda ango-o kólo sisiti kala Ebhe.

Ma pa pi bali gba ma-a me: «Mene 'he inde!» Ani méne.»

9 Li Yesu adje engú inde li ngámá bhomũ-o apa e lie, ani angamba naali. Ani adji lie, ani atsia apa pi bhiti okpála inde adũ akpata ani-e me: «Ma apa pi yi me, ma bhaka nga ngua kpála inde abhuka ma me-e de, belegũ de bhú ká omaIsalaele!» 10 Li okpála na titima agie lio lie agba ngámá-a, u abhaka me kuo nde ayie li bali gba ngámá ango-o ayie.

*Yesu azuku ndili na bhobhoko gba øke bini na øelø*

11 Pita li Yesu akobho bali gba ngámá bhomũ-o lie, ani atsia atapa bhú gũdhũ na Naine. Omũkpata gba ani ne okpála bhelé anũ bhú dabili bini ne ani. 12 Ani akolo li 'bhø bhoti na gũdhũ-o lie, a abhaka me u nde adji ne ngbangba makombi bini ngú nazizi. A ko nani koli ndili na bhobhoko bini gba øke bini na øelø. Okpála bhelé na gũdhũ bhomũ-o adũ bhú dabili bini ne ølø ango-o.

13 Abhomũ-o, Ngámá Yesu au ani. Li ani au ani lie, ani adje ndjinga ani naali. Ani atsia apa pi ani me: «'O naku 'gbá!» 14 Pipita-a, ani adyudyo lie, ani a'o 'kpa e li ngbangba-o. Abhomũ-o, okpála inde abi kuo atsia alũ. Yesu atsia apa pi makombi bhomũ-o me: «Ma apa pi mũ me, yie bhúlá!» 15 Kpála inde adũ igini me ani nde akpi-e, ani ayie bhúlá, ani adũ madũ. Ani atsia aholo nagama 'ngú. Abhomũ-o, Yesu atsia aha ani pi 'hi e. 16 Ndũ okpála hana adje tsulũ. U adũ adhøgø Ebhe, u atsia adũ apa me: «'Ngbé polofeta akoto bhú ká ní! Ebhe ago nateteke okpála gba e-o!» 17 Ngali na engú li Yesu amene e atsia agbolo bhú ndu doto na Yudaya libhomu di ne bhú okuti na ngongo-o hana.

*Djaa bhulɔ nabatisa okpála atima okpála agba Yesu*

*(Tsia bhú Mat. 11:2-19.)*

<sup>18</sup> Li omukpata gba Djaa agie lio lie, u atsia akpokpo ndu ongamba 'ngú inde li Yesu amene e hana pi Djaa. Abhomu-o, ani a'i okpála bhisi bhú ká uo. <sup>19</sup> Ani atsia atima uo ngú nayi Yesu me: «Ne me mu ne Masiya inde ngago, ne me ayo me ya adjeke kpála koko?» <sup>20</sup> Li okpála bhomu-o akolo lie de ani-e, u atsia apa pi ani me: «Djaa bhulɔ nabatisa okpála atima ya me ya go yi mu me: <Ne me mu ne Masiya inde ngago, ne me ayo me ya djeke kpála koko?>»

<sup>21</sup> Bha li nedhinga bhomu-o, Yesu akobho okpála bhelé na kuo. Ani akobho obhende adu ne okuo ngangá. Ani akobho di obhende adu ne osisiti bua bhú o-o. Ani atsia abhulu di djila okpála bhelé inde i u 'kpí de-e bhú bádha bhú 'bu gba e-o. <sup>22</sup> Pipita-a, ani atsia agie pi okpála li Djaa atima o-o me: «Yi nu kpokpo pi Djaa engú inde yi au e, di ne bhende yi adje e ko. Okpála i u 'kpí de-e ngau 'kpí. Obhende ne eze li 'dhu o-o, u ngadhuku ndjindji. Okpála na kába ngakobho. Obhende i dje 'kpí de-e ngadje 'kpí. Obhende amu-o ngazuku. Ma ngakpokpo Bádha Ngali pi obhulu ndibhili. <sup>23</sup> A ko djali pi kpála inde i bhúka ma ne bua na bhisi bhisi de ko!»

*Yesu akpokpo 'ngú gba Djaa bhulɔ nabatisa okpála*

<sup>24</sup> Bhiti okpála adu oo. Pita li obhulu titima gba Djaa agbida lie, Yesu atsia aholo akpokpo 'ngú gba Djaa pi uo me: «Yi anu igini natsia abhú 'gu-o ni? Yi anu igini natsia kpála inde maka mbamba inde ngadyiki ka anvi-e? A mo-o ade. <sup>25</sup> I du mo-o de-e, yi anu la igini natsia ni? Kpála inde adyi babadha bongo-o? A mo-o ade, anga obhende ngadyi babadha bongo-o, inde di ne ká tia ka o-o ngadu abhú 'ti gba ongámási. <sup>26</sup> Yi anu nga la igini

natsia ni? Polofeta? A moko, ma apa pi yi me, yi au bhende ane belegu polofeta mane. <sup>27</sup> Padhá de, anga a ko kpála inde li eli gba Ebhe-e apa 'ngú gba e me:

<Ebhe apa me, ma ngatima bhulu titima gba ma-a

pi mu kalanu ngú naleke kpadji pi mu.†>

<sup>28</sup> Ma apa pi yi me, Djaa ngbéngbé ane ndu okpála hana. Engú bini, kpála inde ane ne mboye bhú Nau gba Ebhe-e, ani ane ani ne engbé.»

<sup>29</sup> Ndu okpála hana, belegu ondombi na mandjandja adu adje Yesu. Abhomu-o, u ambila nani ngbili 'ngú gba Ebhe-e lie, Djaa atsia abatisa uo. <sup>30</sup> Engú bini, omuFalisai ne omusuno na líli gba Moidje ayala nani me Djaa batisa o. U amene lie mo-o, u ayala engú inde li Ebhe adu akunda e pi uo-o.

<sup>31</sup> Do Yesu matá me: «Ma tí da nasuno okpála na naki si li da? Uo maka da? <sup>32</sup> Uo maka ongisi inde adulu bhú daposu. Okoko ngasusula pi obi o me:

<Ya abhi ngbabi na ebi pi yi, engú bini, yi tsia dho 'bi de!

Ya ali etsi na da kuo pi yi, engú bini, yi ku 'gbá de!»

<sup>33</sup> Padhá de, anga Djaa bhulɔ nabatisa okpála ago, ani zu 'he maka okpála koko de, ani ndji di vino de, do yi me: <A bhú ani ne siti bua!> <sup>34</sup> Ngama, Ndili gba kpála, ma ago, ma ngazu 'he maka okpála koko, ma ngandji vino, do yi me: <Yi tsia nga kpála inde ngabhundja bha bini nazu 'he di ne nandji vino! Ani ngakunda ondombi na mandjandja, a ko la di olia okpála na sisiti!> <sup>35</sup> Engú bini, ndu okpála hana inde abhuka imbilangú gba Ebhe-e, u ambila me imbilangú ango-o ngbingbili.»

*Yesu azu 'he abhú 'ti gba Simo muFalisai*

<sup>36</sup> A adu nani muFalisai bini, ani a'i Yesu ngú nazu 'he bhú dabili bini

† 7:27 7:27 Tsia bhú Mal. 3:1.

ne e. Yesu ali bhú 'ti gba mufalisai-o. Oo, ani atsia aholo nazu 'he-o. <sup>37</sup> Òlò bini na sisiti adu bhú gudhu bhomu-o. Ani adje lie me Yesu ngazu 'he abhú 'ti gba mufalisai bhomu-o, ani ago ne gili bini inde u abho e li teme inde u a'i e me alabatele.‡ Gili ango-o abedhe nani ne mungotsi bedhe. <sup>38</sup> Ani akolo lie, ani atsia akita bhú li 'dhu Yesu li pápá ne akele ani. Ani aholo naku 'gbá, ngula adu atuko li 'dhu Yesu. Abhomu-o, ani aholo nakukuo ne sundjo e. Ani akama 'dhu ani, ani atsia aha mungotsi-e, ani atuko tété. <sup>39</sup> Li mufalisai inde a'i Yesu au lie mo-o, ani atsia apa li bua e me: «Kpála inde-e, a ko bha ndju polofeta de kukulu! Padhá de, anga òlò inde ngabu 'kpa e li ani bhomu-o, a ko siti òlò. Ani mbila la-a de!»

<sup>40</sup> Abhomu-o, Yesu atsia apa pi mufalisai-e me: «Simo, ma mbo ne engú bedi napapa pi mu.» Simo atsia agie me: «Musunu, papa.» <sup>41</sup> Yesu atsia apa me: «Kpála bini aha nani bopulu pi okpála bhisi. Ani aha pi kpála bhe bini-e lí falanga kámá bhuluvue. Ani atsia aha pi kpála bhe koko-o lí falanga ndjikpa bhuluvue. <sup>42</sup> Li tia du la lie ka okpála ango-o ngú nagigie de-e, abhomu-o, ani atsia ambu li bopulu gba ndu uo bhisi hana. Bhú ká okpála bhisi bhomu-o, akúnda ani ané mane ne bhedho?» <sup>43</sup> Simo atsia agie me: «Ma abhundja me a ko kpála bhende u ambu li bopulu gba e adu bhelé naali ko.» Do Yesu pi ani me: «Mo opa ndjindji.»

<sup>44</sup> Pipita-a, ani adji lie ne li pápá gba òlò-o, ani atsia apa pi Simo me: «Mo ou engú li òlò inde-e amene e au? Ma ali lie bhú 'ti gba mu-o, mu ha engu muma ngú navulu 'dhu ma de.§ Engú bini, ngaani-e, ani avulu 'dhu ma ne ngula na djila e. Ani atsia akuo ne sundjo e. <sup>45</sup> Mu kama ma de. Engú bini, ngaani-e,

nayie maka ma ali igini lie si-e, akolo pi mbia inde-e, ani 'o nakama 'dhu ma de. <sup>46</sup> Mu tuko emu pí 'ndji ma de. Engú bini, ngaani-e, ani atuko mungotsi li 'dhu ma.

<sup>47</sup> Kaka-a, ma apa pi mu me, mukunda na ngbéngbé inde ani asuno e, apana me u a'e bhiti siti 'ngú gba ani-e a'e. Engú bini, kpála inde u a'e siti 'ngú gba e me a nde yeye-e, ani pána bhadi mukunda na yeye.» <sup>48</sup> Abhomu-o, ani atsia apa pi òlò bhomu-o me: «Ma a'e osisiti 'ngú gba mu-o a'e.» <sup>49</sup> Okpála inde adu azu 'he bhú dabili bini ne ani aholo nabhundja me: «A inde-e mangua kpála dho? Ani nga 'e belegu siti 'ngú!» <sup>50</sup> Abhomu-o, Yesu atsia apa pi òlò-o me: «Ebhe akobho mu, anga mo obhuka ma. Nu ne guo 'ngú.»

## 8

### *Omukpata ndjikpa ne ká bhisi ne olisi koko akpata Yesu*

<sup>1</sup> Pipita-a, Yesu adu adholo bhú ndu ogudhu di ne bhú ndu okuti hana. Ani adu akpokpo Bádha NgaliNau gba Ebhe-e ne ndu bili hana. Omukpata ndjikpa ne ká bhisi-e adu bhú dabili bini ne ani. <sup>2</sup> Olisi koko nani li Yesu apandja osisiti bua bhú o, ne obhe ani akobho o ne okuo-o, a adu di bhú dabili bini ne ani. A du nani: Malia (u a'i e me kpála na gudhu na Magadala) nani li Yesu apandja osisiti bua bhú e mananika-o; <sup>3</sup> Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndu olisi bhomu-o hana adu aha tia gba o ngú nateteke Yesu ne omukpata gba e ne di.

*Gbitaku gba kpála nalu nguwa (Tsia bhú Mat. 13:1-9; di ne bhú Mlk. 4:1-9.)*

<sup>4</sup> Okpála adu nayie bhú gudhu bini ne bini, u adu ago abhaka Yesu. Li

‡ 7:37 7:37 Alabatele: A ko teme na mase naali inde u abhobho oehe maka gili lie ko. § 7:44 7:44 Simo ha nani engu pi Yesu ngú navulu 'dhu e de, anga Simo adu au lie me ni ngbéngbé pi Yesu ngaani. Tsia bhú Dje. 18:4, 19:2.

okpála bhelé adu apokobhò bhúla o lie de ani-e, ani atsia apa gbitaku inde-e me: <sup>5</sup> «Kpála bini anu ngú nabala nguwa abhú 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhu o, odhu atsia ago, u azu bhobhomu-o hana. <sup>6</sup> Koko abala li bili na teme. Li ezu-o aze lie, atsia a'ulu anga engu du bhú doto sasa de. <sup>7</sup> Koko atsia abala li bili na eti. A akò lie, ezu-o akò ne eti-e bhú dabili bini. Eti-e atsia agaga ezu-o. Kaka-a, ezu-o bhele ndjindji de. <sup>8</sup> Engú bini, koko atsia abala nae bhú doto na babadha. Ezu-o akò, a atsia ali lílí. Nguwa bini ne bini ali lílí kámá bini.» Yesu atsia apa matá me: «Yi dje ndjindji, i du me a nde li yi ne 'dje 'dje ngú nadjé 'kpí ko!»

*Ka ni li Yesu adu akpo 'ngú lie bhú ogbitaku-o?*

*(Tsia bhú Mat. 13:10-17; di ne bhú Mlk. 4:10-12.)*

<sup>9</sup> Omukpata gba Yesu ayi ani me: «Ta gbitaku bhomu-o pi?» <sup>10</sup> Ani atsia agie pi uo me: «Ngayi-e, yi ambila naayi engú inde awo nani lie kalanu pindji Nau gba Ebhe-e ambila. Engú bini pi okpála koko-o, ma akpo engú bhomu-o bhú ogbitaku maka li Bhuku gba Ebhe apa lie me:

«U ti da natsia 'kpí,  
engú la bini, u ú 'kpí de.  
U ti da nadjé 'kpí,  
engú la bini, u mbíla tata-a  
de.†»

*Yesu akpo ta gbitaku gba kpála nalu nguwa-o*

*(Tsia bhú Mat. 13:18-23; di ne bhú Mlk. 4:13-20.)*

<sup>11</sup> «Ta gbitaku bhomu-o me, nguwa-a, a ko eli gba Ebhe-o. <sup>12</sup> Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabulu gó, ani tsia dhépe eli ango-o li bua uo, ngú nagbite kpadji pi uo me u abhúka de, amba Ebhe akóbho uo de. <sup>13</sup> Nguwa

bhende abala li bili na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o lí li bua uo de. U bha ngabhuka ngubula nedhinga bedi. Li nale kolo-o, u 'ó ká nabhuka gba o-o. <sup>14</sup> Nguwa bhende abala li bili na oeti-e, a ko okpála bhende ngadje eli gba Ebhe-o. Engú bini, u ne gumu ndu 'he na doto ngangá. U ne gumu tia na doto ne odjali na mukobho na doto. Gumu tia na doto ne odjali na mukobho na doto ango-o ngagaga Eli-o. Kaka-a, eli bhomu-o lí lílí nabhele mabhele de. <sup>15</sup> Nguwa bhende abala bhú doto na babadha, a ko okpála bhende ngadje eli gba Ebhe ne bua na babadha, u tsia ziba. U líla ndjindji, u tsia lí lílí ka kekele gba o ko.»

*Gbitaku na eke*

*(Tsia bhú Mlk. 4:21-25.)*

<sup>16</sup> «I du me kpála bini nde adhedhe eke-e, ani búku ne lusa de. Ani tó di asa polo de. Engú bini, ani 'ó pí 'he ngubula me okpála inde ngali bhú 'ti-e, u u 'kpí tété ndjindji. <sup>17</sup> A moko, ndu 'he hana inde awo lie mawo-o, akóto bhú mbasu. Ndu 'he inde na pepe hana akóto li zi 'kpí, li okpála tsia mbíla. <sup>18</sup> Kaka-a, 'e-e! Yi líla liyi bhú nadjé eli-o, anga kpála li ehe nde ka e, u ahá matá koko pi ani pépé. Engú bini, kpála inde li ehe nde ka e ade-e, u adhépe belegu mboye 'he bhende ani ngabhundja me a ka ni ko.»

*'Hi Yesu ne ondaise Yesu*

*(Tsia bhú Mat. 12:46-50; di ne bhú Mlk. 3:31-35.)*

<sup>19</sup> 'Hi Yesu ne ondaise Yesu ago ngú natsia ani. Engú bini, u ale nakolo li ani pima ka bhiti okpála-o. <sup>20</sup> Abhomu-o, u atsia apa pi Yesu me: «'Hi mu ne ondaise mu akilidjo, u ngakunda nau mu.» <sup>21</sup> Engú bini, Yesu atsia apa pi ndu uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

† 8:10 8:10 Tsia bhú Isa. 6:9.



*Yesu ayoko kpéke anvi pí 'ngu*  
(*Tsia bhú Mat. 8:23-27; di ne bhú*  
*MLk. 4:35-41.*)

<sup>22</sup> Ekpí bini pipita-a, Yesu ne omukpata gba e a'ụ bhú zabụ bini. Aní atsia apa pí uo me: «Ní gulu ekpø-o ai 'ngu.» Abhomụ-o, u atsia atapa. <sup>23</sup> Nedhinga u adụ agulu 'ngu-o lie, Yesu atsia ati ne ela. Kpéke anvi na gipi aholo nape pí ekpø-o. Engu aholo nabedhe bhú zabụ-o, kuo atsia akolo de uo masikpe. <sup>24</sup> Omukpata adyudyo lio de Yesu masikpe, u atsia azụkụ aní me: «Mụsuno, Mụsuno, ní adji amú!» Yesu azụkụ, aní atsia ambe bhú 'ndji anvi di ne wowo 'ngu-o. Abhomụ-o, anvi-e a'o nape, engu-o atsia akolo guguo. <sup>25</sup> Do aní pí uo me: «Nabhuka gba yi-e su?» Engú bini, u adụ adje tsulụ, u atsia adụ angamba naali. Abhomụ-o, u adụ apa sụnda o me: «A e mangua kpála dho inde ngaha belegu líli pí anvi ne engu, uo ngamemene!»

*Yesu akobho kpála bini lí osisiti*  
*bua adụ ato mbolo lí e*  
(*Tsia bhú Mat. 8:28-34; di ne bhú*  
*MLk. 5:1-20.*)

<sup>26</sup> Abhomụ-o, u akolo bhú ndu doto gba okpála na Gelasa, ayi ekpø bhúla ndu doto na Galilaya. <sup>27</sup> Nedhinga lí Yesu adụ akoto bhú zabụ-o lie, kpála bini na kuti bhomụ-o ago ngú nabhaka aní. Kpála angoo, osisiti bua adụ bhú aní. Ekpí bhelé, aní dụ adyi bongo de, aní dụ asi bhú 'ti de. La-a, aní adụ bha bini adụ bhú ká olata. <sup>28-29</sup> Siti bua-a adụ agbulụ aní piko. Abhomụ-o, u atsia adụ agbite 'kpa aní ne 'dhụ aní ne ekpú di ne gbíndjili ngú nalila aní. Engú bini, kpála angoo adụ atstsolo gbíndjili di ne ekpø-o má dhu dhu dhu! Siti bua atsia adụ amba bhúla aní ne abhú mili bíli. Lí kpála angoo au Yesu lie me-e, aní aholo natụ 'ue. Abhomụ-o, aní ati bhú lí 'dhụ Yesu, aní atsia asula

kpekpeke me: «Yesu, Ndili gba Ebhe na Apí 'Kpí, mo okunda namene ngú ma pí? Ma ayo ka mụ me, mo oméne ma sisiti de!» Aní apa nani mo-o, anga Yesu adụ aha líli pí siti bua angoo me aní koto bhú kpála bhomụ-o makoto.

<sup>30</sup> Yesu atsia ayi kpála angoo me: «A 'li mụ pí?» Aní agie me: «A 'li ma me <Bhelé.>» Aní apa mo-o anga osisiti bua bhelé alí nani bhú aní. <sup>31</sup> Osisiti bua angoo atsia adụ akikiliki lio pí Yesu me: «Mo ombá ya bhú tsu 'dú bhe má ngbongobho-o de!» <sup>32</sup> A abhaka me 'ngbé piga opame bini nde ngagili 'zụ gba o pí 'ta oo. Osisiti bua-a atsia apa pí Yesu me: «Ha kpadji pí ya, ya lí bhú opame bhomụ-o.» Aní atsia aziba pí uo.\* <sup>33</sup> Abhomụ-o, osisiti bua aze bhú kpála angoo, u atsia amba lio bhú opame-o. Piga opame bhomụ-o libhomu ayie ne holo apí 'ta, u anụ alilinda bhú ekpø-o, u atsia amu.

<sup>34</sup> Lí omulila gba opame au engú inde akodho 'kpí-e lie, u atsi ne holo, u atsia anụ nakpokpo ngali angoo abhú gudhụ ne abhú okuti. <sup>35</sup> Okpála aze ngú nau engú inde akodho 'kpí-o. U akolo de Yesu lie, u abhaka me kpála inde lí osisiti bua aze bhú e nde adụ kuto bhú lí 'dhụ Yesu. Aní adụ me aní nde adyi bongo, aní nde ngabhundja 'ngú hana ndjindji. Abhomụ-o, tsulụ atsia aholo uo. <sup>36</sup> Okpála inde au ndụ 'ngú bhomụ-o hana atsia akpokpo pí uo maka lí Yesu akobho kpála angoo lie ko.

<sup>37</sup> Abhomụ-o, ndụ okpála hana na ndu doto bhomụ-o atsia apa pí Yesu me aní yie bhú kuti gba o mayie, anga u adụ adje tsulụ naali. Yesu a'ụ bhú zabụ-o ngú na'e ne enú. <sup>38</sup> Kpála inde lí osisiti bua aze bhú e aholo nalopolo lie pí Yesu me: «Yesu, i dụ me mụ nde akunda-a, mo o'ó ka ma de, ní nụ ne mụ.» Engú bini, Yesu agie aní sidi, aní

\* **8:32** 8:32 Engú inde amene lie si-e, a dụ nani bhú kuti gba omaYuda de, anga omaYuda ngau opame sisiti. Tsia bhú Lev. 11:7, ne bhú Det. 14:8, di ne bhú MLk. 5:11.

atsia apa pi ani me: <sup>39</sup> «Gie limu agba mu, amba mu kpokpo ndu 'ngu inde li Ebhe amene e pi mu-o hana.» Abhomu-o, kpala ango-o atsia atapa ne kpokpo ndu 'ngu li Yesu amene e pi ani-e hana bhú gudu libhomu.

*Yesu akobho olo bini, ani atsia azuku di ndili na olo gba Yailo*

*(Tsia bhú Mat. 9:18-26; di ne bhú Mlk. 5:21-43.)*

<sup>40</sup> Nedhinga li Yesu agie lie lie ali pala ekpe koko-o, okpala bhelé asia ani ndjindji, anga ndu uo hana adu adjeke ani. <sup>41</sup> Li nedhinga bhomu-o, kpala bini akolo. A adu 'li ani me Yailo. Ani adu nani ngamá na eti nadije líli gba Moidje na bili bhomu-o. Ani ati bhú li 'dhu Yesu, ani atsia akikiliki lie pi ani me ani nu agba ni, <sup>42</sup> anga ndili gba ani na olo adu masikpe de nakpi. Koli ndili bhomu-o bha nani ka ani bini, ani adu ne kalanga ndjikpa ne ka bhisi. Li kpadji-e, bhiti okpala asulu Yesu ma wakaka!

<sup>43</sup> A abhaka me olo bini nde oo. Olo ango-o, ngute adu atuko li ani bhú sunda kalanga ndjikpa ne ka bhisi. [Ani andjia nani tia lie hana pi omutia], engú bini, kpala bini ti nani da nakobho ani de. <sup>44</sup> Ani ago ne akele Yesu, ani atsia abu 'kpa e li bongo 'ta ani-o.† Ngute-e a'o bha kolo natuko li ani maka ndjombe. <sup>45</sup> Abhomu-o, Yesu atsia ayi me: «A abu 'kpa e li ma da?» Ndu uo hana agie me: «A ko naae ya de!» Piele atsia apa pi Yesu me: «Musuno, bhiti okpala inde asa mu ngbalina inde-e, ngasulu mu ngao.» <sup>46</sup> Engú bini, Yesu atsia apa me: «Kpala bini abu 'kpa e li ma, anga ma ambila me te angu gba ma-a akoto.»

<sup>47</sup> Olo ango-o au me Yesu ambila engú inde ni amene e ambila. Abhomu-o, ani ago ne naguku, ani tsia ati bhú li 'dhu Yesu. Ani atsia akpokpo pi Yesu kala ndu okpala hana ta 'ngu inde ani abu 'kpa e li

ani lie, di ne maka ani akobho bha lie maka ndjombe-o. <sup>48</sup> Yesu pi ani me: «Ndi olo-e, mo okobho, anga mo obhuka ma kakulu. Nu ne guo 'ngu.»

<sup>49</sup> Nedhinga li Yesu adu apa lie mo-o, kpala bini ayie agba ngamá Yailo, ani ago apa pi ani me: «Ndili gba mu-o andjili. Mo ondala mata musuno de.» <sup>50</sup> Engú bini, li Yesu adje ani lie, ani atsia apa pi Yailo me: «Mo odje tsulu de, du bha ne nabhuka, ndili gba mu-o akobho makobho.»

<sup>51</sup> Li Yesu akolo lie agba ngamá Yailo, ani ziba de me kpala bini li nganda ni abhu 'ti-e de, bha bini Piele, Djaa ne Djaki, a la bhadi-e 'dyi ndili-e ne 'hi ndili-o. <sup>52</sup> Ndu okpala inde adu oo hana, adu atu 'ue ne naku 'gba ngu ndili ango-o. Abhomu-o, Yesu atsia apa pi uo me: «Yi 'o naku 'gba! Ndili-e kpi de, engú bini, ani tila.» <sup>53</sup> La-a, u aholo namu ani anga u adu ambila ndjindji me ndili-e akpi. <sup>54</sup> Abhomu-o, Yesu aholo 'kpa ani, ani atsia asula kpekpeke me: «Ndika ma, yie bhulá!» <sup>55</sup> Ndili-e azuku, ani ayie bhulá kolo ma gala! Yesu atsia aha líli pi uo me, u ha ezu pi ani. <sup>56</sup> Okpala inde azu ani angamba naali. Engú bini, Yesu agbele 'dje uo kpekpeke me u apa belegu engú inde akodho 'kpi-e pi kpala bini de.

## 9

*Yesu atima obhulu titima ndjikpa ne ka bhisi gba e-o*

*(Tsia bhú Mat. 10:5-15; di ne bhú Mlk. 6:7-13.)*

<sup>1</sup> Ekpí bini, Yesu apo bhula omukpata ndjikpa ne ka bhisi gba e-o. Ani aha angu pi uo me u pandja ndu osisiti bua hana bhú okpala, amba u kobho di okpala na kuo. <sup>2</sup> Pipita-a, ani atsia atima uo me u nu ne kpokpo ngali Nau gba Ebhe , amba u kobho di okpala na kuo.

† 8:44 8:44 Bhú líli gba omaYuda-a, li olo du ne kuo gba olisi-e, ani bu 'kpa e li bhoko-o, li bhoko ango-o kolo sisiti kala Ebhe. Tsia bhú Lev. 15:25-33.

<sup>3</sup> Anì pì uo me: «Nanɔ ka yi-e, yi abhá oehe de. Yi ahá ndula de. Yi ahá ehe ngú nabi 'he bhúbhú de. Yi ahá ezɔ de. Yi ahá falanga de. Kpála bini bhú ká yi ahá bongo na mbulu bhisi de. <sup>4</sup> Ndu eti hana u asia yi bhú e-e, yi dɔ bha oo, akólo li nedhinga inde yi ayie lie bhú eti ango-o. <sup>5</sup> Ndu eti hana u sía yi bhú e de-e, yi de koto bhúbhú, amba yi pulu doto na kuti gba uo inde adhedhe li 'dhu yi-o. Bhobhomɔ-o asúno pì uo me u amene siti 'ngú.»\* <sup>6</sup> Obhulɔ titima gba Yesu agbida, u apɔ bhú ndu okuti hana. U akpokpo Bádha Ngali gba Ebhe-e pì okpála. U atsia akobho di okpála na kuo ne ndu bili hana.

*Mabhundja gba Elode adholo ngangá*

*(Tsia bhú Mat. 14:1-12; di ne bhú Mlk. 6:14-29.)*

<sup>7</sup> Elode , ngámá na ndu doto na Galilaya, adje ndu 'ngú li Yesu ne omɔkpata gba e adu amene e hana. Abhomɔ-o, mabhundja gba ani-e atsia aholo adholo ngangá, anga okpála koko adu apa me: «Djaa bhulɔ nabatisa okpála azuku!» <sup>8</sup> Okoko adu apa me: «Polofeta Eliya akoto bhomɔ-o ngae.» Okoko atsia adu apa matá me: «Suka opolofeta na kalanɔ-o, azuku bhomɔ-o ngae.» <sup>9</sup> Engú bini, Elode atsia apa naae me: «Ma aha nani líli-e ngama me u kodho ngulɔ Djaa . Kpála bhende ma ngadje okpála apa 'ngú gba e me-e, a ko matá naae da?» Abhomɔ-o, anì atsia adu agili me ni u Yesu.

*Yesu aha 'zɔ pì bhiti okpála*  
*(Tsia bhú Mat. 14:13-21; ne bhú Mlk. 6:30-44; di ne bhú Dja. 6:1-14.)*

<sup>10</sup> Li obhulɔ titima agie lio lie de Yesu-o, u atsia akpokpo ndu 'ngú inde u amene e hana pì ani. Pipita-a, anì abha uo, anì atsia atapa ne uo de okpála tsutsu li pápá na gudhu na Betesaida. <sup>11</sup> Engú bini, li bhiti

okpála bhomɔ-o ambila lie me u agbida oo, u atsia akpata ani. Abhomɔ-o, Yesu asia uo, anì atsia akpokpo 'ngú pindji Naɔ gba Ebhe-e pì uo. Anì atsia akobho di okpála inde adu ne kuo ko.

<sup>12</sup> Li ekpí aholo lie nabi-e, obhulɔ titima ndjikpa ne ká bhisi-e adyudyo lio de Yesu, u atsia apa pì ani me: «Ha kpadji pì okpála, amba u gbida nagili dabili nasi tété, di ne ehe nazɔ mazɔ bhú odjedje kuti masikpe si, anga ní ei bhú mili bili.» <sup>13</sup> Do Yesu pì uo me: «Yi ha 'zɔ pì uo ngayi.» U atsia agie me: «A bha ka ya si ne mapa bhuluvue di ne sungu bhisi. Ne me mo okunda me ya nɔ nakala ezɔ pì ndu okpála inde-e hana ngaya?» <sup>14</sup> (Obhosi adu nani oo masikpe de kutu bhuluvue.) Yesu atsia apa pì omɔkpata gba e me: «Yi pa pì uo me u popo bhúla o okpála ndjikpa bhuluvue, ndjikpa bhuluvue, amba u dulɔ kuto.»

<sup>15</sup> Omɔkpata-a amene maka ani apa pì uo lie ko. U atsia apa pì ndu okpála hana me u dulɔ kuto. <sup>16</sup> Abhomɔ-o, Yesu aha mapa bhuluvue ne sungu bhisi-o, anì atsia 'kpí ne bhúlá, anì atsia agie heni pì Ebhe ngubula ezɔ bhomɔ-o. Pipita-a, anì agumɔ mapa ne sungu-o, anì aha pì omɔkpata ngú nagagapa li okpála. <sup>17</sup> Ndu uo hana azɔ 'he, u a'u'u má kpú kpú kpú! Dudu atigala-a, obhulɔ titima alo, a atsia abebedhe okili ndjikpa ne ká bhisi.

*Piele apa me Yesu ne Masiya*  
*(Tsia bhú Mat. 16:13-19; di ne bhú Mlk. 8:27-29.)*

<sup>18</sup> A akolo ekpí bini, Yesu adu akpokpo 'ngú ne Ebhe kpi e kpi me, omɔkpata gba ani-e nde de anì. Anì atsia ayi uo me: «Okpála ngapa me ma ne da?» <sup>19</sup> U agie me: «Okpála koko ngapa me, mɔ ne Djaa bhulɔ nabatisa okpála. Okoko me, mɔ ne polofeta Eliya. Okoko matá me, suka opolofeta na kalanɔ-o azuku.» <sup>20</sup> Anì

\* **9:5** 9:5 Okuti gba omaYuda inde i ziba nani Bádha Ngali gba Ebhe-e de-e, u dɔ nani au uo maka omaYuda de, ne odoto gba o-o hana. Tsia bhú Mlk. 6:11.

atsia ayi matá uo me: «A la yi-e, yi ngapa naayi me ma ne da?» Do Piele me: «M̄ ne Masiya inde li Ebhe atima e ko.»

*Yesu akpo 'ngú p̄ndji nakpi ne nazuku ka e*

*(Tsia bhú Mat. 16:20-28; di ne bhú Mlk. 8:30, 9:1.)*

<sup>21</sup> Engú bini, ani agbele 'dje uo kpekpeke, ani atsia aha líli me u apá belegu engú bhomu-o p̄i kpála bini de. <sup>22</sup> Abhomu-o, ani atsia apa matá p̄i uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandø di ne omusuno na líli gba Moidje ayála ma. U abhøle ma, engú bini, ekpí na bata-a, ma tsia zúku.»

<sup>23</sup> Pipita-a, ani apa p̄i ndu okpála hana inde adu oo me: «Í du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a ayo me ani bi kulusi gba e-o, amba ani kpata ma. <sup>24</sup> Padhá de, anga i du me kpála nde akunda nalila mukobho gba e, ani kpí. La-a, i du me kpála nde akunda nakpi ngubula ma-a, ani tsia kóbho. <sup>25</sup> Í du me kpála nde asia ndu 'he na doto hana, engú la bini, ngaani makpe ani ngita-a, ani tsia kpi-e, a la p̄i ani babadha bhúbhú ne ni? <sup>26</sup> Í du me kpála bini nde adje numu li 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi numu li 'ngú gba ani. A adú moko li nedhinga ma agó lie bhú nau na asasaua gba ma, ne bhe gba 'Dyi ma, di ne bhe gba oandjelu na bububu-o. <sup>27</sup> Ma apa p̄i yi na paká me, okpála koko bhú ká obhende inde si-e, mú padhá de, u aú ngaiza Nau gba Ebhe-e kalanu.»

*Zi Ebhe asa Yesu ngbalina*

*(Tsia bhú Mat. 17:1-8; di ne bhú Mlk. 9:2-8.)*

<sup>28</sup> Masikpe de ekpí madjina pita ani apa 'ngú bhomu-o lie, Yesu aha Piele, ne Djaa di ne Djaki, ani atsia a'u ne uo apí 'ta ngú nakpokpo 'ngú ne Ebhe. <sup>29</sup> Ani adu akpokpo 'ngú ne

Ebhe lie, bhúla ani ayipa lie, bongo gba ani avu má tuu! <sup>30</sup> Kolo me-e, okpála bhisi aze, u atsia aholo nagama 'ngú ne ani. A adu nani Moidje ne Eliya. <sup>31</sup> Zi Ebhe asa uo ngbalina. U atsia adu akpokpo 'ngú ne Yesu maka ani adji nandjia kulu gba e lie ne nakpi ka e abhú Yelusalema ko. <sup>32</sup> Piele ne obi e adu ne ela má yikpokpo! U agbungbua lio lie, u au Yesu ne okpála bhisi me zi Ebhe nde asa uo ngbalina. <sup>33</sup> Li okpála bhisi bhomu-o adu ayie lie de Yesu-o, Piele atsia apa p̄i ani me: «Musuno, ya si ndjindji. A ayo me ya yiki 'ti ngbangbali bata, bini p̄i mu, bini p̄i Moidje, bini p̄i Eliya.» (Engú bini, ani du ambila ta 'ngú inde ani adu apa e de.)

<sup>34</sup> Nedhinga ani adu apa 'ngú bhomu-o lie, ndindi atsia ago abuku uo. Li ndindi adu abuku uo lie, omukpata atsia aholo nadje tsulu naali. <sup>35</sup> Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhu e ko. Yi dje ani!» <sup>36</sup> Pita li eli bhomu-o andjia lie, u au bha ibili Yesu kpi e kpi. Nani li nedhinga bhomu-o, omukpata andjili bha má bulu! U tsia pa nga nani engú ango-o p̄i kpála bini de.

*Yesu akobho ndili na bhobhoko bini li siti bua adu ato mbolo lie*

*(Tsia bhú Mat. 17:14-18; di ne bhú Mlk. 9:14-27.)*

<sup>37</sup> Li ekpí aseke lie, Yesu ne omukpata bata-a akø eta-o. Okpála bhelé atsia ago ngú nakø lio ne Yesu. <sup>38</sup> Bhú ká okpála bhomu-o, kpála bini aholo nasusula me: «Musuno, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini! <sup>39</sup> Siti bua ngagbulu ani piko. A ngaha p̄i ani natu 'ue. A ngadyiki ani kpekpeke má djigi djigi! Li efu holo naze bhú 'bhe ani. Bua ango-o le bha nakoto bhú ani pima. Li angu ani ndjia má ngba! <sup>40</sup> Ma akikiliki lima p̄i omukpata gba mu-o me u gbe bua

ango-o bhú ani, engú bini, u ale pima.»

<sup>41</sup> Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adú matá ne yi bhú dabili bini ngubula ekpí madho? Ma akibila matá yi ngubula ekpí madho?» Pipita-a, Yesu apa pi kpála ango-o me: «Go ne ndili gba mu ei.»

<sup>42</sup> Li ndili-e adu ago lie, bua ango-o adyiki ani má djigi djigi! Ani atsia agu 'i ani kuto má gbwe! Abhomu-o, Yesu ambe bhú 'ndji siti bua ango-o. Ani akobho ndili-o, ani atsia aha ani pi 'dyi e. <sup>43</sup> Ndu okpála hana adu angamba. U atsia aziba me Ebhe ne angu naali.

*Yesu akpo matá engú pindji nakpi gba e ko*

*(Tsia bhú Mat. 17:22-23; di ne bhú Mlk. 9:30-32.)*

Li ndu okpála hana adu angamba lie li ndu 'ngú li Yesu adu amene e, ani atsia apa pi omukpata gba e me: <sup>44</sup> «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» <sup>45</sup> Engú bini, omukpata gba ani-e mbila nani ta 'ngú bhomu-o de. Ebhe awo nani tata-a pi uo mawo. U atsia adu adje tsulu ngú nanyi ani tété.

*A ngbéngbé da?*

*(Tsia bhú Mat. 18:1-5; di ne bhú Mlk. 9:33-37.)*

<sup>46</sup> Abhomu-o, omukpata aholo amene kpekebhe sunda o ngú nambila me, a ti da nadu ngbéngbé bhú ká o da. <sup>47</sup> Engú bini, li Yesu ambila engú inde u adu abhundja e li bua o-o lie, abhomu-o, ani aha mboye ndili bini, ani a'o ani de e. <sup>48</sup> Ani atsia apa pi uo me: «Kpála inde asia mboye ndili inde-e ka 'li ma-a, ani asia bhomu-o ma. Kpála inde asia ma-a, ani asia la di bhomu-o kpála inde atima ma ko. Padhá de, anga kpála inde ane ne mboye

bhú ká yi hana-a, ani ane ne engbé ngae.»

*Kpála inde i yala yi de-e, a ko naayi kpála*

*(Tsia bhú Mlk. 9:38-40.)*

<sup>49</sup> Abhomu-o, Dja adyudyo lie de ani, ani atsia apa pi ani me: «Musuno, ya au kpála bini ngapandja osisiti bua bhú okpála ne 'li mu. Ya di me yoko ani, anga a ko mukpata gba mu-o maka ya de.»

<sup>50</sup> Engú bini, Yesu agie pi ani me: «Yi ayoko ani de, anga kpála inde i yala yi de-e, a ko naayi kpála.»

*Okpála na kuti bini na ndu doto na Samalia ayala nasia Yesu*

<sup>51</sup> Li nedhinga nagie lie ka Yesu abhulá-a akolo lie masikpe-e, ani atsia aholo kpadji na Yelusalema ne kpeke bua hana. <sup>52</sup> Ani atima obhulu titima kalanu bhú kuti bini na ndu doto na Samalia, ngú naleke ndu 'ngú hana pi ani ndjindji.

<sup>53</sup> Engú bini, ani adu la anu lie ne abhú Yelusalema-a, okpála na kuti bhomu-o atsia ayala nasia ani.

<sup>54</sup> Omukpata Djaki ne Dja au lie mo-o, u atsia apa pi Yesu me: «Ngámá, mo okunda me ya ha líli me mugbálá yie abhulá, amba a go bhili uo?» <sup>55</sup> Engú bini, Yesu adji bhula e ne li pápá gba uo, ani atsia ambe bhú 'ndji uo.† <sup>56</sup> Abhomu-o, u atsia agbida bhú kuti koko.

*Okpála bhende akunda nakpata Yesu*

*(Tsia bhú Mat. 8:19-22.)*

<sup>57</sup> U adu lie li kpadji-e, kpála bini apa pi Yesu me: «Ma akpáta mu li ndu bili mo onú lie hana.» <sup>58</sup> Yesu atsia apa pi ani me: «A ka onekpø di ne odhu ne dabili gba o ngú nasi tété. Engú bini, dabili ngú naguo ka ma, Ndili gba kpála tété ade.»

<sup>59</sup> Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga

† 9:55 9:55 U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngú nabhili okpála de, ma ago mangbo ngú nakobho uo.» Tsia bhú Luk. 19:10.

ma, amba ma nú zi ngaiza 'dyi ma.»‡

<sup>60</sup> Yesu agie pi ani me: «'O okpála bhende amu-o, u zi okuo gba o-o, amba ngamu-o, mu nu naamu ne kpokpo ngali Nau gba Ebhe ko.»

<sup>61</sup> Kpála koko apa matá pi ani me: «Ngámá, ma akpáta mu makpata. Engú la bini, 'o ngaiza ma, amba ma nu bhana lima pi opiga gba ma ko.»

<sup>62</sup> Yesu agie pi ani me: «Li kpála bini holo namene kulu ne konge-o, pipita ani tsia 'kpí ne sidi-e, kpála ango-o ti ne Nau gba Ebhe-e de.»

## 10

*Yesu atima omakpata ndjikpa mananika ne ká bhisi*

<sup>1</sup> Pipita-a, Ngámá Yesu alo omakpata koko ndjikpa mananika ne ká bhisi.\* Aní atsia atima uo bhisi bhisi kalanu bhú ndu ogudhu ne ndu bili hana inde a ayo nako lie me, ani nu bha ngae makpe ko.

<sup>2</sup> Aní atsia apa pi uo me: «Nguwa abhú 'dyi bhelé. Engú bini, okpála namene kulu ango-o bhelé ade. Yi yo ka bhulu edyi-e me ani tima okpála na kulu bhelé bhú edyi gba e ko. <sup>3</sup> Ma atima yi maka okandele bhú ká osia. Yi nunu! <sup>4</sup> Yi ahá falanga de. Yi ahá ehe nabi 'he bhúbhú de. Yi ahá maleke de. Yi adú ne lulu li kpadji-e ngú nayiyi okpála de.

<sup>5</sup> Yi li bhú 'ti bini-e, yi de pa ngaiza me: «Guo 'ngú gba Ebhe-e du bhú 'ti inde.» <sup>6</sup> Li kpála inde akunda guo 'ngú du bhú 'ti ango-o, li guo 'ngú gba yi-e dú bhú dabili bini ne ani. I du mo-o de-e, nayi na guo 'ngú gba yi-e gie lie pí yi. <sup>7</sup> Yi du bhú 'ti ango-o. I du me u nde aha ehe nazu mazú di ne bhe nandji mandji pi yi-e, yi de zu, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

<sup>8</sup> I du me yi nde ali bhú gudhu bini-e, li okpála na gudhu ango-o sia yi-e, yi de zu 'he inde u ahá e pi yi ko. <sup>9</sup> Yi kobho obhulu kuo inde bhú gudhu ango-o, amba yi pa pi ndu okpála hana me: «Nau gba Ebhe-e akolo de yi masikpe.»

<sup>10</sup> Engú bini, i du la me yi nde ali bhú gudhu bini-e, u sia yi de-e, yi de ze ali kpadji, amba yi pa me: <sup>11</sup> «Ya ngapulu belegu doto na gudhu gba yi inde adhedhe li 'dhu ya, ngú nasuno pi yi me yi amene siti 'ngú. Yi mbila la ndjindji me, Nau gba Ebhe-e akolo de yi masikpe.» <sup>12</sup> Ma apa pi yi me li 'kpí li Ebhe akódho 'ngú gba okpála lie, okpála na gudhu ango-o adjé likabhu naali ané okpála na Sodomu† mane.»

*Okuti inde ayala nabhuka Yesu (Tsia bhú Mat. 11:20-24.)*

<sup>13</sup> «'E-e! A ko likabhu pi yi okpála na gudhu na Koladjina! A ko likabhu pi yi okpála na gudhu na Betesaida! Padhá de, anga i du me ongamba 'ngú inde amene lie agba yi-e, i méne lie bhú ogudhu na Tile ne Sidona-a, okpála na ogudhu ango-o de adyi nani pili didili, u tsia túko 'mbi bhú 'ndji o ngú napana me u adjí bua o adjí. <sup>14</sup> Kaka-a, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane. <sup>15</sup> Ne yi di, okpála na Kapalanauma-a, yi abhundja naayi me u a'é'e yi abhúla-a? A mo-o ade. U abála yi bhú djua na duduma.»

<sup>16</sup> Do ani matá pi omakpata gba e me: «Li kpála bini dje yi-e, amba ani adje bhomu-o ma. Li kpála bini yala nasia yi-e, amba ani ayala bhomu-o nasia ma. Engú bini, li kpála bini yala nasia ma-a, amba ani ayala bhomu-o nasia kpála inde atima ma ko.»

‡ **9:59** 9:59 A adu me 'dyi ani nde kpi nga nani-i de. Tsia bhú Eki. 20:12. \* **10:1** 10:1 U aye bhú obhuku koko-o me: «Ndjikpa mananika.» † **10:12** 10:12 Sodomu: A ko gudhu inde li Ebhe atsulu nani e ka siti 'ngú gba okpála ango-o. Tsia bhú Dje. 19:24-28.

*Omukpata ndjikpa mananika ne ká bhisi-e agie lio*

<sup>17</sup> Omukpata ndjikpa mananika ne ká bhisi-e agie lio me u nde abedhe ne djali bedhe. U atsia apa me: «Ngámá, osisiti bua ngamanga belegu ya ngao nedhinga ya ngaha líli pi uo lie ne 'li mụ ko!» <sup>18</sup> Yesu atsia apa pi uo me: «Ma au Satana ayie abhúlá akø kuto maka mụgbálá. <sup>19</sup> Yi djedje nga, ma aha angu pi yi ngú nadele okpulu ne oapekebhe ne 'dhu yi di ne nandjia ndu angu gba bhulu yala gba yi-e hana. Ehe bini tí da namene yi sisiti de. <sup>20</sup> Engú bini, yi akpí djali ka li osisiti bua ngamanga yi lie de. Yi kpi mangbo djali ka li Ebhe aye 'li yi lie abhúlá ko.»

*Yesu akpi djali*

*(Tsia bhú Mat. 11:25-27, 13:16-17.)*

<sup>21</sup> Bha li nedhinga angoo makpe-e, Yesu abedhe nani ne djali bedhe ka Bu Bhobua . Aní atsia apa me: «Ma agie heni pi mụ, 'Dyi ma, Ngámá na abhúlá ne Ngámá na doto. Padhá de, anga engú inde mo opana e pi obhende imbilangu de-e, mo owo pi okpála na imbilangu di ne obhende amene balua má too! A moko, 'Dyi ma, anga mo okunda bha nani moko.

<sup>22</sup> 'Dyi ma, mo oha ndu 'he hana muma. Kpála bini mbila de me ngama, Ndili-e, ma ne da-ie, bha bini ngamu, 'Dyi ma. Kpála bini mbila la di de me ngamu, 'Dyi ma-a, mụ ne da-ie, bha bini ngama, Ndili gba mụ-o, la di ne okpála bhende li ngama, Ndili-e, ma akunda napana mụ pi o ko.»

<sup>23</sup> Pipita-a, aní adji bhúla e li pápá gba omukpata gba e-o, aní atsia apa pi uo kpi o kpi me: «A ko djali pi yi, ngayi okpála i ngau engú inde yi ngau e ko! <sup>24</sup> Padhá de, anga ma apa pi yi me opolofeta di ne ongbengbe ongámási bhelé akunda nani nau

engú yi ngau e inde, engú bini u u de. U akunda nani nadje engú yi ngadje e inde, engú bini u dje de.»

*Kpála bini na ndu doto na Samalia inde amene bádha 'ngú*

<sup>25</sup> Abhomu-o, musuno bini na líli gba Moidje ayie bhúlá. Aní atsia ayi Yesu ngú nale aní me: «Musuno, a ayo me ma mene pi ngubula me ma sia mukobho na duduma?» <sup>26</sup> Yesu agie pi aní me: «U aye bhú líli gba ní-e pi? Mo otatanga lie, mụ djedje bhúbhú pi?» <sup>27</sup> Kpála angoo atsia agie pi aní me: «A ayo me kunda Ebhe, Ngámá gba mụ-o, ne bua mụ hana, ne mukobho gba mụ-o hana, ne angu gba mụ-o hana, ne mabhundja gba mụ-o hana», amba «Mụ kunda la di kilí mụ, maka mo okunda limu lie makpe ko.»† » <sup>28</sup> Do Yesu pi aní me: «Mo ogie ndjindji. Mene moko, amba mụ sia mukobho na duduma.»

<sup>29</sup> Engú bini, musuno na líli-e angoo adu akunda nasuno me engú inde ni ayi e, a ngbingbili. Abhomu-o, aní atsia ayi Yesu me: «Kilí ma-a, a ko da?»

<sup>30</sup> Do Yesu pi aní me: «Kpála bini ayie nani bhú Yelusalema, aní adu akø ne abhú Djeliko. Li kpadji-e, aní atí bhú 'kpa obhulu 'zi inde adu agbulu 'he gba okpála ne kpéke. U abha obongo gba aní-o. U abhi aní má kpú! U abha lio-o, u agbida. U atsia a'o ka aní masikpe de nakpi.

<sup>31</sup> Dimandø bini adu apu li kpadji angoo. Aní au kpála angoo lie me-e, aní abuma bha aní li pála kpadji koko, aní atsia atapa. <sup>32</sup> Kpála bini na piga gba Levi‡ akolo di li bili li kpála angoo adu lie-o. Aní au aní lie, aní abuma bha aní li pála kpadji koko, aní atsia atapa.

<sup>33</sup> Engú bini, kpála bini na ndu doto na Samalia inde adu naae bhú dhuku li kpadji bhomu-o, akolo de aní. Aní au aní lie, aní adje ndjinga aní naali. <sup>34</sup> Aní adyudyo lie de aní

† **10:27** 10:27 Tsia bhú Det. 6:5; di ne bhú Lev. 19:18. ‡ **10:32** 10:32 Piga gba Levi: A ko okpála inde a adu nani ateteke odimandø li kulu bhú 'ngbé 'ti Ebhe gba omaYuda-o.

masikpe. Ani aha emu di ne vino, § ani atuko li djila oeka gba ani-o, ani atsia agbite ne papala bongo. Ani aha ani, ani a'o ani pi 'ngbu punda gba e-o. Ani anu ne ani bhú 'ti gba ogomago. Oo, ani atsia alila ani ndjindji. <sup>35</sup> Li ekpi aseke lie, ani agbe li falanga bhisi, ani aha pi bhulu etio. Ani atsia apa pi ani me: <Lila kpála inde-e ndjindji. I du me mu nde apu tia koko pi ani pi bhende-e, ma agie pi mu ngama, nedhinga ma apu matá lie sii ko.>>

<sup>36</sup> Yesu atsia ayi musuno bhomu-o me: «Mo obhundja naamu pi? Bhú ká okpála bata bhomu-o, a ko kpála bhedho adu nani kilí kpála inde ati bhú 'kpa obhulu 'zi bhomu-o?» <sup>37</sup> Musuno na líli-e agie me: «A ko bhende adje ndjinga ani-o.» Yesu atsia apa pi ani me: «Nunu, amba mu mene bhadi moko.»

### *Yesu anu natsia Malata ne Malia*

<sup>38</sup> Li Yesu ne omukpata gba e adu lie li kpadji-e, ani ali bhú kuti bini. Oo, eole bini adu 'li ani me Malata, ani atsia asia Yesu agba e. <sup>39</sup> Malata adu ne ndai e na eole bini, adu 'li ani me Malia. Malia adu naae kuto bhú li 'dhu Yesu, ani atsia adu adje engu inde li Yesu adu apa e ko. <sup>40</sup> Bua Malata adu abhula ka bhiti kulu-o. Ani ago de Yesu, ani atsia apa pi ani me: «Ngamá, li ndai ma a'o ka ma lie namene ndu kulu hana kpi ma kpi me-e, mu bhundja 'ngu tété bini di? Pa ngala pi ani me, ani go ha mbo 'kpa e muma.» <sup>41</sup> Ngamá agie pi ani me: «Malata, Malata, mu nga'o bua mu abhula, mu la di ngatutu limu ngubula ongu bhelé. <sup>42</sup> La-a, a ndjindji ne koli 'he bini. Malia aha naae ehe inde ane ne badha, inde li kpála bini dhepe e ka ani de.»

## 11

*Yesu asuno nakpokpo 'ngu ne Ebhe pi omukpata gba e-o (Tsia bhú Mat. 6:9-13.)*

<sup>1</sup> A adu ekpi bini, Yesu adu akpokpo 'ngu ne Ebhe li bili bini. Ani andjia lie, suka omukpata gba ani-e atsia apa pi ani me: «Ngamá, suno nakpokpo 'ngu ne Ebhe pi ya, maka li Djaa asuno di lie pi omukpata gba e ko.» <sup>2</sup> Yesu atsia apa pi uo me: «Yi du akpokpo 'ngu ne Ebhe-e, yi de pa me:

<'Dyi ya,

a ayo me, okpála mbila me, mu ne Ebhe na bubu;

a ayo me, mu go u Ngamá píla doto.

<sup>3</sup> Ha ezu gba ya na ekpi bini ne bini-e pi ya.

<sup>4</sup> Mbu li osisiti 'ngu gba ya ko.

A moko, ngaya makpe, ya ngambu di li osisiti 'ngu li okpála amene e li pabili gba ya ko.

Mo o'ó de me nale ha angu ya-a de.>>

<sup>5</sup> Yesu atsia apa matá pi uo me: «I du me suka yi bini nde ne kilí e, ani nu bhaka ani agba e tutu sukpe ngu napa pi ani me: <Wai, ha mbo mapa muma bata. <sup>6</sup> Kilí ma bini inde bhú dholo ago li ma oo, ehe la ka ma ngu nahaha pi ani ade.> <sup>7</sup> I du me bhende abhu 'ti-e nde agie pi ani me: <Mo ondála ma de! Ma ani bhoti-e ani. Ngaya ne ongisi gba ma-a, ya asili kuto asili. Ma ti da nayie bhula ngu naha mapa pi mu de.> <sup>8</sup> Ma apa pi yi na paká me, abana ani yie bhula ngu nahaha pi ani kabula mukunda gba o-o de-e, engu bini, ani ayie bhula ngu naha ndu 'he hana inde ani nde ne gumu e pi ani ka ani ngandala ani lie ko.

<sup>9</sup> Ngama-a, ma atsia apa pi yi me, yi yo 'he inde yi nde ne gumu e-o, amba Ebhe ha pi yi. Yi gili 'he inde yi nde ne gumu e-o, amba yi u. Yi bhi bhoti-o, amba Ebhe 'u pi yi. <sup>10</sup> Padhá de, anga ndu okpála hana inde ngayo 'he ani nde ne gumu e, ani ngasisia. Kpála bhende ngagili 'he inde ani nde ne gumu e, ani ngauu. Ebhe nga'u bhoti pi kpála

§ 10:34 10:34 Vino du di nani ngu nabhili okokó bhú djila eka.



bhende ngabhibhi-o. <sup>11</sup> Bhú ká yi odyi ongisi-e, a ti da naha kpulu pi ndili gba e da, i du me ndili-e nde ayo ka ani sungu-o?\*

<sup>12</sup> I du me ani nde ayo ka ani pala 'ngu-o, ani tsia há pi ani apekebhe-e? <sup>13</sup> Belegu ngayi okpála na sisiti-e, yi ngaha babadha 'he pi ongisi gba yi-o. A ane la mane ne bádha pi 'Dyi yi inde abhúlá-a me ani ha Bu Bhobua pi obhende ngayoyo ka ani ko!»

*Yesu agbe siti bua inde adu ani 'bhø kpála-o*

*(Tsia bhú Mat. 12:22-30; di ne bhú Mlk. 3:22-27.)*

<sup>14</sup> Yesu adu agbe siti bua inde adu ani 'bhø kpála bhú bhoko bini. Li siti bua ang-o akoto lie, kpála ang-o aholo agama 'ngú. Abhomu-o, bhiti okpála inde adu oo angamba naali. <sup>15</sup> Okpála koko bhú ká uo atsia apa me: «Ngámá gba osisiti bua inde 'li e me Beledjebula ngaha angu pi ani ngae, ngú napandja osisiti bua ne di!»

<sup>16</sup> Okoko adu agili nale ani. Abhomu-o, u atsia apa pi ani me, ani mene ngamba 'ngú ngú napana me, angu gba ani-e ngayie abhúlá.

<sup>17</sup> Engú bini, Yesu ambila mabhundja gba uo-o lie, ani atsia apa pi uo me: «I du me okpála gba ngámá bini nde ngagu gbele sunda o, nau ang-o lú-u de. Li ndu eti hana túko.

<sup>18</sup> I du me omaha Satana nde ngagu gbele sunda o-o, nau gba ani-e ti da nalú lele pi? Padhá de, anga yi ngapa me, ma ngapandja osisiti bua ne angu gba Beledjebula. <sup>19</sup> I du me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! <sup>20</sup> La-a, i du me ma nde ngapandja osisiti bua ne angu gba Ebhe na paká-a, apa bhomu-o me, Nau gba Ebhe-e akolo li yi akolo.

<sup>21</sup> Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de.

<sup>22</sup> Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua e lie hana. Ani tsia gápa ndu 'he inde ani abha e ka ani-e hana.

<sup>23</sup> Kpála bhende pi ma ade-e, a ko yala ma. Kpála bhende i ha 'kpa e muma ngú napo bhúla okpála de-e, ani ngatsambala uo matsambala.»

*Siti bua ti da matá nagie lie*

*(Tsia bhú Mat. 12:43-45.)*

<sup>24</sup> «Li siti bua koto bhú kpála bini-e, ani nú ne djakadha abhú omili bili† ngú nagili bili naguo ka e tété. I du me ani nde u de-e, ani pá li bua e me: «Ma agie lima bhú 'ti gba ma inde ma akoto nako bhú e-o.» <sup>25</sup> Ani gie lie oo, ani bháka me u apo bhú 'ti-o, u aleke ndjindji.

<sup>26</sup> Abhomu-o, ani nú, ani bhá osisiti bua koko mananika inde ane ani ne siti. U gie lio bhú dabili bini, u lí bhú 'ti-o, u tsia dúlu. Pipita-a, mukobho gba kpála ang-o, kólo la matá sisiti naali ane bhende na kalanu-o mane.»

*Djali na kukulu*

<sup>27</sup> Nedhinga ani adu apa 'ngú bhomu-o lie, ølø bini atsia asula pi ani bhú ká okpála me: «A ko djali pi ølø inde azu mu-o, inde di mo ondji 'ka e-o!» <sup>28</sup> Engú bini, Yesu agie me: «A ko djali mangbo pi okpála inde ngadje eli gba Ebhe di ne nalilila ko!»

*Yesu ayala namene ngamba 'ngú pi okpála*

*(Tsia bhú Mat. 12:38-42.)*

<sup>29</sup> Li bhiti okpála ago apo bhúla o lie de Yesu-o, ani atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende

\* **11:11** 11:11 U aye bhú obhuku koko-o me: «Teme i du me u nde ayo ka ani mapa.» † **11:24** 11:24 Mili bili: A ko bili inde li engu nde lie ade, li kpála ti da di nasi kati lie de.

gba polofeta Djonasi. <sup>30</sup> Padhá de, anga maka li Ebhe aha nani Djonasi lie ngú napana ngamba 'ngú pi okpála na Ninive-e, Ebhe ahá bhadi ma, Ndili gba kpála-a, ngú napana ngamba 'ngú pi okpála na naki moko. <sup>31</sup> Ngámá na òelò inde adu atsia 'kpí li ndu doto na Saba ayie nani tsutsu ngú nago nadje oeli na imbilangu gba 'ngbé ngámá Salomo. Li Ebhe akódho 'ngú gba okpála lie, ngámá na òelò angò alú kala okpála na naki, ani tsia a'ó 'ngú pí uo. Kaka-a, kpála bini si, ani ane Salomo mane! <sup>32</sup> Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, ani ane Djonasi mane!»

*Nadu li zi 'kpí*

*(Tsia bhú Mat. 5:15, 6:22-23.)*

<sup>33</sup> «I du me kpála bini nde adhedhe eke-e, ani tó asa lusa de. Engú bini, ani 'ó pí 'he amba okpála inde ngali bhú 'ti-e, u u 'kpí tété ndjindji. <sup>34</sup> Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. <sup>35</sup> Tsia ndjindji me zi 'kpí inde bhú mu-o, adú biti de. <sup>36</sup> I du me ndu kute mu hana nde li zi 'kpí-e, yá mu bini nde bhú biti ade-e, kute mu libhому dú li zi 'kpí, maka li zi 'ke ngaziga mu lie má ngilili ko!»

*Yesu ambamba ta osisiti 'ngú gba omuFalisai di ne bhende gba omusuno na líli gba Moidje-o*

*(Tsia bhú Mat. 23:1-36; di ne bhú Mlk. 12:38-40.)*

<sup>37</sup> Li Yesu andjia nagama 'ngú lie, muFalisai bini atsia a'i ani agba e ngú nazu 'he. Ani ali abhú 'ti gba muFalisai-o, ani atsia aholo nazu

'he-o. <sup>38</sup> MuFalisai angò angamba naali, anga ani au me Yesu vulu lie kala nazu 'he-e de.‡

<sup>39</sup> Abhomu-o, Ngámá Yesu apa pi ani me: «Ngayi omuFalisai-e, yi ngavulu kute pápá di ne kute saani. Engú la bini, ngayi-e, yi abedhe ne 'ngbé bua di ne siti bua bhú yi bedhe. <sup>40</sup> Imbilangu bhú yi ade! Ebhe inde abho kute-e, ani bho di bua ngae di? <sup>41</sup> Kaka-a, yi ha mangbo pi obhulu ndibhili ehe bhende bhú opápá di ne bhú osaani gba yi ko. Yi mene mo-o, li ndu 'he hana kólo pi yi babadha.

<sup>42</sup> La-a, a ko likabhu pi yi, omuFalisai! Padhá de, anga yi ngaha bini bhú ká ndjikpa na oulu na sese ne ndu djedje ulu na abhú 'dyi-e hana pi Ebhe. La-a, yi mene engú na ngbingbili pi okpála de. Yi kunda la di Ebhe de. A la bhomu-o engú inde ayo me yi mene ngaiza e me, yi nde 'ili 'to yi li naha bini bhú ká ndjikpa na oehe gba yi-e pi Ebhe de ko. <sup>43</sup> A ko likabhu pi yi, omuFalisai! Padhá de, anga yi kunda bha nadulu pí dabili na akalanu bhú oti nadje líli gba Moidje . Yi kunda la di me okpála du ne yiyi yi maka ongámási li ohi-kpadji. <sup>44</sup> A ko likabhu pi yi! Padhá de, anga yi maka olata inde u 'o 'he pí e ngú nasusuno de, li okpála ngadhuku pí e me u nde mbila de!»

<sup>45</sup> Suka omusuno na líli-e apa pi ani me: «Musuno, mo opa lie mo-o, mo osobho di bhomu-o ya.» <sup>46</sup> Yesu atsia agie me: «A ko di likabhu pi yi, omusuno na líli! Padhá de, anga yi ngamene mugito me yi nga'o titili 'he li 'ngbu okpála. Engú la bini, ngayi makpe-e, yi 'o belegu likpa yi bini tété ngú nateteke uo de. <sup>47</sup> A ko likabhu pi yi! Padhá de, anga yi ngaleke olata opolofeta, inde li ogbi yi abhili nani o-o! <sup>48</sup> Yi ngapana bhomu-o me, yi aziba engú inde li ogbi yi amene nani e ko. Padhá

‡ 11:38 11:38 OmuFalisai adu nani navulu li o kala nazu 'he ngubula nasuno me o naao ne obabadha okpála kala Ebhe.

de, anga ngauo-o, u abhili opolofeta, ngayi-e, yi la ngaleke olata uo!  
<sup>49</sup> Kaka-a, Ebhe ne imbilangũ gba e, apa li 'ngũ gba yi-e me: <Ma atima opolofeta di ne obhũlu titima pi uo. U abhili okoko bhũ ká uo, u tsia méne okoko sisiti.>

<sup>50</sup> Nayie maka li Ebhe abho nani doto lie, okpála atuko ngute opolofeta bhelé. Kaka-a, okpála na naki abí mangimbo ang-o ngao.  
<sup>51</sup> Kalanũ-o, u abhẽlẽ Abele. Ali soso-o, u abhẽlẽ Djakalia bhũ mbadhasũ na 'ngbé 'ti Ebhe gba omaYuda, sũnda bilĩ natsulu enũ pi Ebhe ne titina na bubu-o. Ma apa pi yi na paká me, okpála na naki abí mangimbo na ngute okpála bhomũ-o hana ngao!

<sup>52</sup> A ko likabhu pi yi, omũsuno na líli! Padhá de, anga yi ani bhoti na imbilangũ-o. La ngayi makpe-e, yi li de. Yi atsia ani la di bhoti ang-o pi obhende akũnda nali-o.»

<sup>53</sup> Li Yesu ayie lie li bilĩ bhomũ-o, omũsuno na líli ne omũFalisai aholo napadha ani. U atsia aholo ayiyi ani li ongũ bhelé bhelé. <sup>54</sup> Padhá de, anga u adũ agili nagbo ani li 'li e.

## 12

*Yi dũ apa 'ngũ mbámbá, yi adũ ne tsulu de*  
*(Tsia bhũ Mat. 10:26-27.)*

<sup>1</sup> Nedhinga bhomũ-o, bhiti okpála apo bhũla o de Yesu. U adũ bhibhiti naali, kaka-a, u adũ adedele 'dhũ obi o. Abhomũ-o, Yesu atsia aholo napa ngaiza pi omũkpata gba e me: «'E-e! Yi lila liyi ka levile gba omũFalisai-e uu! Padhá de, anga u ngali bhũ ndũ ongũ hana ne kali gba o-o maka li levile\* ngali bhũ mapa lie hana ko. <sup>2</sup> Ndũ 'ngũ inde awo lie mawo-o hana, akóto bhũ mbasũ. Ndũ 'ngũ inde na pepe hana, ndũ okpála hana ambĩla. <sup>3</sup> Kaka-a, ndũ 'ngũ inde yi apá e sukpe-e hana, okpála adjé ne ngbikpi. Ndũ 'ngũ inde yi apá e

bhũ tũpele abhũ 'ti-e hana, okpála asũsula ne di bhũ mbasũ.»

*Kpála inde a ayo me yi kpe e ko*  
*(Tsia bhũ Mat. 10:28-31.)*

<sup>4</sup> «Ma apa pi yi, ngayi ondaise ma me: yi akpé okpála bhende ngabhẽlẽ kũte-e de, inde pipita-a, i ti da matá namene 'he bini de ko. <sup>5</sup> Ma asũno pi yi kpála inde a ayo me yi kpe e ko. Yi kpe Ebhe inde ka e ne angu ngũ nabhili okpála. Pipita-a, ani ti da nabu uo bhũ djua na dũdũma. A moko, ma apa pi yi me: yi kpe mangbo ani!

<sup>6</sup> U tsitsindji odjedje odhu bhulu-vue ngũbula senge bhisi di? La-a, Ebhe 'ilĩ 'to e li sũka uo bini de. <sup>7</sup> Ebhe mbĩla belegũ alo na sundjo yi-e hana. Yi adjé tsulu de, bhũ djila Ebhe-e, yi ane bhiti odjedje 'dhu bhomũ-o mane!»

*Okpála ayála Yesu-o, Yesu ayála di uo*  
*(Tsia bhũ Mat. 10:32-33, 12:32.)*

<sup>8</sup> «Ma apa pi yi me: kpála inde apá li ma bhũ ká djila okpála me ni ne naama kpála-a, ngama, Ndili gba kpála-a, ma apá bhadi li ani bhũ ká djila oandjelu gba Ebhe-e me, a ko naama kpála. <sup>9</sup> Engũ bini, kpála inde apá li ma bhũ ká djila okpála me ni mbĩla ma de-e, ngama, Ndili gba kpála, ma apá bhadi li ani bhũ ká djila oandjelu gba Ebhe-e me, ma ambĩla ani de.

<sup>10</sup> I dũ me kpála bini nde apa siti 'ngũ li kũte ma, Ndili gba kpála-a, li Ebhe mbũ li ani. I dũ la me kpála bini nde asobho Bu Bhobua-a, Ebhe mbũ li ani de.

<sup>11</sup> Nedhinga u anũ lie ne yi bhũ oti nadje líli gba Moidje, di ne kala ongámási inde ngatsia 'kpĩ li doto me u kodho 'ngũ gba yi-e, yi adjé tsulu de me yi akóbho li mangua kpadji dho-ie de, di ne me yi apá pi-ie de. <sup>12</sup> Padhá de, anga li nedhinga bhomũ-o, Bu Bhobua asũno pi yi ngae engũ inde a ayo me yi pa e-o.»

\* **12:1** 12:1 Li bilĩ inde-e, levile ngasuno ehe na sisiti.

*Mukobho gba kpála ane tia*

<sup>13</sup> Abhomu-o, kpála bini bhú ká okpála apa pi Yesu me: «Musunu, pa pi ndai ma me ani ha naama tia na libhondi 'dyi ya-a muma haha.»

<sup>14</sup> Yesu agie pi ani me: «Wai, a'o ma kpála nakodho 'ngú di ne nagbogbo bhusu otia gba yi-e da?» <sup>15</sup> Ani atsia apa pi ndu uo hana me: «'E-e! Yi lila liyi ka gumu tia na doto uu, anga belegu li tia du bha ka kpála bhelé-e, mukobho gba ani-e dú bhúbhú de.»

<sup>16</sup> Abhomu-o, ani atsia akpokpo gbitaku inde-e pi uo me: «Kpála bini na tia adu nani ne odyi bhelé inde aha nguwa pi ani naali. <sup>17</sup> Ani adu ayi li bua e me: «Ma améne si pi? Dabili ka ma ngú nalila nguwa gba ma-a tété hana ade.»

<sup>18</sup> Pipita-a, ani me: «Ma ambila engú inde ma améne e ambila! Ma apándjala ongbokopi gba ma-o, ma ayiki ibili obhe na ngbengbengbe. Ma bú nguwa ne otia gba ma-a hana bhúbhú. <sup>19</sup> Abhomu-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zu babadha 'zu, ma ndji pandi, amba ma kpi djali.» <sup>20</sup> Engú bini, Ebhe pi ani me: «Mu ne ngingi! Sukpe na naki-e, mu ngakpi. Ndu 'he inde mo opo bhúla e hana-a atígala pi da?» <sup>21</sup> Yesu apa matá me: «A bhadi moko pi kpála inde ngapo bhúla tia pi e makpe, me ani nde gili nadu bhulu tia li pápá gba Ebhe de ko.»

*Yi ha liyi pi Ebhe*

*(Tsia bhú Mat. 6:25-34.)*

<sup>22</sup> Pipita-a, Yesu atsia apa pi omukpata gba e me: «Kaka-a, ma apa pi yi me: yi akina liyi ngubula ezu inde yi nde ne gumu e ngú mukobho gba yi-e de. Yi akina di liyi ngubula obongo inde yi nde ne gumu e ngú kute yi-e de. <sup>23</sup> Padhá de, anga mukobho gba yi-e ane ezu. La di-e, kute yi ane bongo. <sup>24</sup> Yi tsia nga odhu, u lulu 'dyi de. U popo bhúla nguwa de. Dabili ngú naleke

'zu ka uo tété ade. Ngbokopi ka uo ade. La-a, Ebhe ngaku uo! Mukobho gba yi-e, ane bhe gba odhu-o tsutsu naali!

<sup>25</sup> A ko da bhú ká yi-e, inde ka nakina lie, i ti da nadyudyo ekpi na mukobho gba e nga bha mbo ne ekpi bini-e? <sup>26</sup> I du me yi nde ti da namene belegu de mboye ehe bhomu-o, yi la ngakina liyi ngú ongú koko ka ni? <sup>27</sup> Yi tsia nga ofelele abhiye. U memene kulu de. U dudu bongo de. Ma apa la pi yi me, belegu 'ngbé ngámá Salomo bhú ndu ká tia gba e hana-a, ani sia bongo bini ane ne bádha maka susu de. <sup>28</sup> I du me Ebhe nde ngadyi bongo li ulu inde naki abhiye, mambi u tsia bhike e bhú djua-a, ani ti da nadyi bongo li yi ane mane di? Ngayi okpála inde li nabhuka gba yi-e nde yeye!

<sup>29</sup> Kaka-a, yi a'ó bua yi abhúla ngú nagili ezu inde yi azú e, ne ehe bhende yi andji e de. <sup>30</sup> Omupagano, okpála na doto inde-e, u ngagili ehe bhomu-o ndu 'kpi hana ngao. Engú bini, 'Dyi yi Ebhe mbila hana me yi ne gumu. <sup>31</sup> Yi gili nga mangbo namene ongú inde li Nau gba Ebhe-e akunda e ko. Yi mene mo-o, li Ebhe tsia há di ndu 'he koko pi yi hana pépé.»

*Yi wo tia gba yi-e abhúla*

*(Tsia bhú Mat. 6:19-21.)*

<sup>32</sup> «Ngayi okpála gba ma, inde bhelé ade-e, yi adjé tsulu de. Padhá de, anga 'Dyi yi Ebhe au ndjindji me yi du ongámási bhú Nau gba ani-e, maka ngaani 'Dyi yi, ni nde lie ne Ngámá ko. <sup>33</sup> Yi tsindji ohe gba yi-o, amba yi ha tiatia, yi ha pi obhulu ndibhili. Yi bho pi yi oti bongo inde i kádha de. Yi wo tia gba yi-e abhúla, li bili i síti lie de. Obhulu 'zi ti da nakolo tété de. Okokó ti la di da nazuzu de. <sup>34</sup> Padhá de, anga bili inde li tia gba yi-e nde lie, bua yi bhadi oo ko.»

*Okpála na kulu inde i ngalila*

<sup>35</sup> «Yi du bedhe ngubula kulu maka kpála inde adyi bongo na

kulu, ani atsia adhedhe eke gba e madhedhe. <sup>36</sup> Yi dɔ bedhe maka okpála inde i ngadjeke ngámá gba o me, ani nde atapa bhú anokomia na kɔva. U ngadjeke me u 'u bhoti-e pì ani má gala, li nedhinga inde ani agó nabhibhi lie ko. <sup>37</sup> A ko djali pì okpála na kulu inde li ngámá gba o akólo lie, ani bháka me u nde la de ko! Ma apa pì yi na paká me, ani dyí bongo na kulu gba e-o, ani 'í uo ngubula nazɔ 'he. Ani tsia há ezɔ-o pì uo. <sup>38</sup> A ko djali pì uo, i dɔ me ani nde abhaka me u nde la de ko, belegu ani go tutu sukpe, belegu ani go bhú sikikpi! <sup>39</sup> Yi mbíla ndjindji me, i dú me bhulu eti mbíla nedhinga inde li bhulu 'zi agó lie mambíla-a, ani de 'ó de me ani li abhú 'ti gba ni-e de. <sup>40</sup> Ngayi di-e, yi dɔ bedhe. Padhá de, anga yi mbíla nedhinga li ngama, Ndili gba kpála-a, ma agó lie de.»

*Kpála na kulu na ngbingbili di ne kpála na kulu na sisiti*

*(Tsia bhú Mat. 24:45-51.)*

<sup>41</sup> Abhomɔ-o, Piele atsia ayi ani me: «Ngámá, mo opa gbitaku inde e bha bini pì ya kpi ya kpi? Ne me, mo opa pì ndɔ okpála hana.» <sup>42</sup> Ngámá agie pì ani me: «Kpála na kulu na ngbingbili ne imbilangɔ-o, a ko bhedho? A ko kpála bhende li ngámá gba e a'o e ngú nalila eti gba e-o, di ne nagapa ezɔ pì okpála koko na kulu, i dɔ me nedhinga ango-o nde akolo-o. <sup>43</sup> A ko djali pì kpála na kulu ango-o, i dɔ me ngámá gba ani-e nde agie lie agba e, ani tsia bhaka me ani nde ngamene kulu gba e ko! <sup>44</sup> Ma apa pì yi na paká me, ngámá bhomɔ-o 'ó ani pì 'ndji ndɔ 'he gba e hana. <sup>45</sup> Engú bini, i dɔ me kpála na kulu ango-o nde apa li bua e me: «Ha-a! Ngámá gba ma-a gó má gala de.» Ani hólo nabhi obi e na obhosibhosi di ne obhe na olisilisi-o. Ani hólo nazɔ 'he, nandji pandi ne nalangba ne di. <sup>46</sup> Ngámá gba

ani-e gíe lie li ekpí ani djeke ani lie de, li nedhinga inde ani mbíla e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.†

<sup>47</sup> I dɔ me kpála na kulu nde ambíla engú li ngámá gba e akunda e, engú bini ani tsia leke lie ngú namemene maka li ngámá ango-o akunda lie de-e, kaka-a, u bhí ani naali. <sup>48</sup> La-a, i dɔ me kpála na kulu nde mbíla 'ngú li ngámá gba e ngakunda e de-e, ani mene engú inde a ayo me u bhí ani ka e, u bhí ani naali de. Padhá de, anga kpála bhende u aha 'he pì e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

*Yesu ago ngú nagbogbo bhɔsu okpála*

*(Tsia bhú Mat. 10:34-36.)*

<sup>49</sup> «Ma ago ngú nabhike djua píla doto. Ma akunda me adɔ atsi matsi! <sup>50</sup> A ayo me ma sia batisimo na likabhu. La-a, likabhu li bua ma naali akólo li 'kpí inde ma asía lie ko! <sup>51</sup> Yi abhundja naayi me ma ago ngú na'o guo 'ngú píla doto? Ma apa pì yi me, a mo-o ade. Ma ago mangbo ngú nagbogbo bhɔsu okpála. <sup>52</sup> Nayie pì mbíla inde-e, piga bini na okpála bhuluvue agbó bhɔsu e, bata ayála bhisi, li bhisi yála bata.

<sup>53</sup> 'Dyi ndili ayála ndili na bhobhoko gba e-o,

li ndili-e yála 'dyi e.

'Hi ndili ayála ndili na øøø gba e-o,

li ndili-e yála 'hi e.

Ogbi na øøø ayála øøø gba ndala e,

li øøø gba ndili-e yála ogbi e. †»

*Yi mbíla engú inde ngakodho 'kpí mbíla inde-e ko*

*(Tsia bhú Mat. 16:2-3.)*

<sup>54</sup> Yesu apa matá pì okpála me: «Yi u me ebha ngago ne kati, yi kolo pá me: «Ebha inde-e adhi madhi.» I tsia méne la bhadi lie moko. <sup>55</sup> Yi dje anvi me a nde ngayie li pápá

† 12:46 12:46 U aye bhú obhuku koko-o me: «U kókodho bhɔsu ani má mbi mbi mbi!» † 12:53 12:53 Tsia bhú Mik. 7:6.

na yoyoko, yi pá me: <Ekpí-e akpá naali.> † tsia méne la bhadi lie moko. <sup>56</sup> Ngayi obhulú kali inde-e! Yi mbíla engú inde ngakodho 'kpí abhúlá ne bhende pílá doto-o hana. La ka ni, yi kúnda nambíla engú inde ngakodho 'kpí li nedhinga inde-e lie de-e?>

*Yi dje liyi ne kpála inde yi nde ne e bhú 'ngú ko*

*(Tsia bhú Mat. 5:25-26.)*

<sup>57</sup> «Ka ni, ngayi makpe, yi mbíla nakodho 'ngú na ngbingbili inde ayo namene e lie de-e? <sup>58</sup> † dū me yi nde bhú 'ngú ne kilí mū-o, ani dū anú ne mū bhú djila okpála nakodho 'ngú-o, mū de mene ne kpéke me yi dje liyi ne ani li kpadji. Mū ngakpe bhomū-o me, ani anú ne mū pí kpála nakodho 'ngú-o de. Li kpála nakodho 'ngú-o há mū pí osudha de. Li osudha-a tsia bhíke mū bhú tikpū de. <sup>59</sup> Ma apa pí mū me, mū kóto bha oo me, mū nde agie ndū bopulu gba mū-o hana má kpəkəbhə!»

### 13

*Ebhe nga'i okpála me u dji bua o*

<sup>1</sup> Abhomū-o li nedhinga ango-o, okpála koko ago akpokpo pí Yesu me: «Pilate abhili okpála koko na Galilaya me u nde ngatsulu enū pí Ebhe.» <sup>2</sup> Ani agie pí uo me: «Yi abhundja naayi me, i dū me Pilate nde abhili uo mo-o, a akúnda napa me u adū sisiti ane ndū okpála koko na Galilaya hana? <sup>3</sup> Ma apa pí yi me, a mo-o ade. Engú bini, i dū me yi nde dji bua yi de-e, ndū yi hana, yi amú bhadi maka uo. <sup>4</sup> Yi bhundja okpála ndjikpa ne ká madjina nani li 'ndjá 'ti na Silæ abhili o-o. Yi abhundja naayi me u adū nani sisiti ane ndū okpála koko na Yelusalema hana? <sup>5</sup> Ma apa pí yi me, a mo-o ade. Engú bini, i dū me yi nde dji bua yi de-e, ndū yi hana, yi amú bhadi maka uo.»

*Ndula na figi inde i li lílí de*

<sup>6</sup> Pípita-a, Yesu atsia apa gbitaku inde-e pí uo me: «Kpála bini alu

nani ndula na figi bhú edyi gba e na vino. Ekpí bini, ani ago nagili lílí bhúbhú. La-a, ani u belegu de bini. <sup>7</sup> Abhomū-o, ani atsia apa pí kpála na kulu gba e me: <Tsitsia nga, a ko mbia inde-e kalanga bata, ma ngago agili lílí bhú ndula inde. La-a, ma u belegu de bini. Dede! A ngangí bili padhá ka ni?> <sup>8</sup> Engú bini, kpála na kulu-o agie pí ani me: <Ngámá, 'o nga matá ndula ango-o li kalanga inde, amba ma dji doto bhú lili ngbalina, ma tuko doto na eká bhúbhú. <sup>9</sup> Koko bhú kalanga na sidi-e, i lí lílí. † dū la me a nde li lílí de-e, mū tsia dé.>>

*Yesu akobho ələ bini na kuo bhú 'kpí naguo gba omaYuda*

<sup>10</sup> Li 'kpí bini naguo gba omaYuda-a, Yesu adū asuno bhú 'ti nadje lílí gba Moidje-o. <sup>11</sup> A abhaka me ələ bini na kuo nde oo. Sunda kalanga ndjikpa ne ká madjina, siti bua adū bhú ani. Siti bua ango-o atsia adū anu 'ngbū ani. Kaka-a, ani ale nani nali lie pima. <sup>12</sup> Li Yesu au ələ ango-o lie, ani a'i ani. Ani atsia apa pí ani me: «'Hi ma, kuo gba mū-o ayie.» <sup>13</sup> Ani abu 'kpa e pí ani, kolo má gala me-e, ani ali lie má ngbū! Ani atsia aholo nadhəgə Ebhe.

<sup>14</sup> Engú bini, ngámá na eti nadje lílí-e ake 'ngú lie naali, ka li Yesu akobho kpála lie bhú 'kpí naguo-o. Do ani pí okpála inde adū oo me: «A ne 'kpí madhia ngú namene kulu. Yi go li okpí bhomū-o, ngubula me u kobho yi ne okuo gba yi ko. Engú bini, yi agó bhú 'kpí naguo de!» <sup>15</sup> Abhomū-o, Ngámá Yesu atsia agie pí ani me: «Yi ne obhulú kali! Li 'kpí naguo-o, yi bhuhulu bagala di ne punda gba yi-e bhú 'ti o, ngú nanū ne uo me u ndji 'ngu di? <sup>16</sup> Ələ inde-e, ani bhú piga gba Abalahama. Satana agbite ani kalanga ndjikpa ne ká madjina. A ayo de me u bhulu ani li 'kpí naguo di?» <sup>17</sup> Li Yesu agie pí uo lie mo-o, ndū obhulú yala gba ani-e hana atsia asia nūmū. Engú

bini, ndu okpála hana adu akpi djali ka ndu obabadha kulu hana inde ani adu amene e ko.

*Gbitaku pindji lí ndula u a'i e me mutadi*

*(Tsia bhú Mat. 13:31-32; di ne bhú Mlk. 4:30-32.)*

<sup>18</sup> Abhomu-o, Yesu atsia apa me: «Nau gba Ebhe-e , a maka ni? Ma ti da napapana li ni? <sup>19</sup> A maka li ndula na mutadi. Kpála bini aha, ani alu bhú 'dyi gba e-o. A akø, a akolo 'ngbé ndula. Odhu atsia ayiki 'ti o bhú oyáyá ko.»

*Gbitaku pindji levile*

*(Tsia bhú Mat. 13:33.)*

<sup>20</sup> Do Yesu matá me: «Ma ti da napana Nau gba Ebhe-e li ni? <sup>21</sup> A maka levile inde li ølø bini aha e. Ani atsia akpødhøle ne bhiti faline akólo li nedhinga li faline hana afúka lie ko.»

*Yi li li bhoti na yeye*

*(Tsia bhú Mat. 7:13-14, 21-23.)*

<sup>22</sup> Yesu aholo 'nú bhú Yelusalema. Li ani adu anu lie oo, ani adu apu bhú ogudhu ne bhú okuti me ani nde ngasuno Bádha Ngali pi okpála. <sup>23</sup> Kpála bini ayi ani me: «Ngámá, Ebhe akóbho bha okpála masudha?» Abhomu-o, Yesu atsia agie pi uo me: <sup>24</sup> «Yi mene ne kpéke me yi li li bhoti na yeye-o. Padhá de, anga ma apa pi yi me, okpála bhelé agli me ni li, engú la bini u alé pima.

<sup>25</sup> A maka me li nedhinga li bhulu 'ti-e ayie bhúlá lie, ani ní bhoti-o. Pipita-a, yi dúlu akilidjo. Yi hólo nabhi bhoti-e me yi nde ngapa me: «Ngámá, 'u bhoti-e pi ya.» Ani tsia gie pi yi me: «Ma mbila bili li yi ayie lie de!» <sup>26</sup> Abhomu-o, yi tsia pá pi ani me: «Ní azu nani 'he, ní andji di pandi ne yi bhú dabili bini. Mo otsia asuno li okpadji gba ya-o.» <sup>27</sup> Ani tsia gie pi yi me: «Ma mbila bili li yi ayie lie de. Ngayi osisiti okpála, yi yie de ma oo ko!» <sup>28</sup> Nedhinga yi aú Abalahama, Isaka, Yakobho

di ne ndu opolofeta hana lie bhú Nau gba Ebhe-e, li Ebhe tsia bála la naae yi akilidjo! Oo, yi adú aku 'gbá di ne nazu Tate yi. <sup>29</sup> Okpála ayie ne 'dje doto badha hana, u tsia gó bhú anokomia bhú Nau gba Ebhe ko. <sup>30</sup> Abhomu-o, okpála koko inde asidi mbia inde-e, u akólo akalanu. Li obhe koko inde akalanu mbia inde-e, u tsia kólo asidi.»

*Yesu li kpadji na Yelusalema*

*(Tsia bhú Mat. 23:37-39.)*

<sup>31</sup> Li nedhinga ango-o, omuFalisai koko ago apa pi Yesu me: «Yie si mayie, anga ngámá Elode ngakunda nabhøle mu.» <sup>32</sup> Yesu atsia agie pi uo me: «Yi nu pa pi bhulu kali maka nekpø bhomu-o me: «Ma ngapandja osisiti bua bhú okpála. Ma di ngakobho okpála na kuo naki di ne mambi. Ma tsia ndjia kulu gba ma-a bhú 'kpi na bata.» <sup>33</sup> Engú bini, a ayo me ma kpata kpadji gba ma-a, naki, mambi di ne ekpi na bata. Padhá de, anga a ayo de me, okpála bhøle polofeta li bili koko de, bha bini abhú Yelusalema.

<sup>34</sup> Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhutsibhutsi madho ma akunda napo bhula yi maka li 'hi 'ngu apopo bhula ongisi gba e lie sa mbudha e-o. La-a, yi tsia kunda de! <sup>35</sup> Mbia inde-e, kuti gba yi-e atigala padhá. Ma apa pi yi me, yi ú matá ma belegu de bini akólo li nedhinga inde yi apa lie me: «A ayo me Ebhe tuko bisagu pi kpála inde ngago ne 'li ani ko!†»»

## 14

*Yesu akobho kpála na kuo li 'kpi naguo gba omaYuda*

<sup>1</sup> A akolo ekpi bini, ekpi naguo gba omaYuda-a , Yesu anu nazu 'he agba suka ongámási gba omuFalisai-o . Okpála inde adu oo adu atsia Yesu ne kpéke djila. <sup>2</sup> Abhomu-o, kpála

† 13:35 13:35 Tsia bhú Djlm. 22:5; di ne bhú Ets. 118:5.

bini inde li kute e asisika ne engu adu kala ani. <sup>3</sup> Yesu ayi omusuno na lili gba Moidje ne omuFalisai-e me: «Lili gba ni aziba nakobho kpala li 'kpi naguo? Ne me a ziba de.» <sup>4</sup> Engu bini, u andjili bha ma bulu! Abhomu-o, Yesu aha 'kpa bhulu kuo-o, ani akobho ani. Ani atsia apa pi ani me ani gie lie agba e. <sup>5</sup> Pipita-a, ani pi uo me: «Belegu li 'kpi naguo-o, li saka ongisi gba yi na bhosibhosi-e,\* i du di-e saka bagala gba yi-e ti bhú 'du 'ngu-o, yi kolo gbé ani ma gala! A mo-o adi?» <sup>6</sup> U mbila engu bini inde u agie e tété-e de.

### *Yi ke liyi ne kuto*

<sup>7</sup> Yesu au me okpala inde u a'i o-o ngadulu pi odabili na akalanu. Abhomu-o, ani atsia apa gbitaku inde-e pi ndu uo hana me: <sup>8</sup> «Li kpala bini 'i mu bhú anokomia na kava-a, mo onu adu pi dabili na akalanu de. Padha de, anga mu mbila de me, u a'i kpala koko inde ane mu mane e-e de. <sup>9</sup> I du mo-o, li kpala inde a'i ndu yi bhisi hana go pa pi mu me: «O ka dabili bhomu-o pi ani.» Abhomu-o, mu nu ne namu hana, mu tsia du asidi. <sup>10</sup> Engu bini, li kpala bini 'i mu bhú anokomia-a, mu de nu du pi dabili na asidi, amba li kpala inde a'i mu ago lie, ani de pa pi mu me: «Ndai ma, dyudyo limu ne akalanu.» Li ndu okpala bhende yi ngazu 'he ne o-o hana, tsia u mu me, mu ne 'ngbe kpala. <sup>11</sup> Padha de, anga i du me kpala nde nga'o lie ne abhula-a, li Ebhe ke ani ne kuto. I du la me kpala nde nga'o lie ne kuto-o, li Ebhe 'e'e ani ne abhula.»

### *A ayo na'i da bhú anokomia gba mu-o?*

<sup>12</sup> Pipita-a, Yesu apa pi kpala inde a'i ani-e me: «Li mu 'i okpala ngu nazu 'he tulukpe, i du di-e tagolo-o, mo o'i obi mu de. Mo o'i ondaise mu de. Mo o'i okpala na piga gba mu-o de. Mo o'i la di okpala na tia inde asili kuti lingo mu-o de. Padha de,

anga ngauo-o, u 'i di mu li 'kpi koko, u tsia gie ehe inde mo omene e pi uo-o pi mu. <sup>13</sup> Engu bini, li mu 'i okpala bhú anokomia-a, 'i obhulu ndibhili. 'I okpala na eze. 'I obhende ne eze li 'dhu o-o di ne obhende i u 'kpi de ko. <sup>14</sup> Mu mene mo-o, mu du ne djali, anga u ti da nagie 'he bini pi mu de. Ebhe agie pi mu li 'kpi li okpala na ngbingbili-e azuku lie ko.»

### *Gbitaku pindji 'ngbe anokomia (Tsia bhú Mat. 22:1-10.)*

<sup>15</sup> U adje 'ngu bhomu-o lie, saka okpala inde adu azu 'he bhú dabili bini ne Yesu-o atsia apa pi ani me: «A ko djali pi kpala inde azu anokomia bhú Nau gba Ebhe-o !» <sup>16</sup> Do Yesu pi ani me: «Kpala bini amene 'ngbe anokomia. Ani atsia a'i okpala bhele nganga. <sup>17</sup> A akolo lie li nedhinga nazu 'he-e, ani atsia atima kpala na kulu gba e ngu napa pi okpala inde ani a'i o-o me: «Ezu-o abhu, yi gogo.» <sup>18</sup> Kpala ne kpala aholo ayo ka ani me ani mbu li ni. Bhe na kalanu-o apa pi ani me: «Ma akala edyi, a ayo me ma nu natsitsia. Ma ayo ka mu me mbu li ma.» <sup>19</sup> Koko apa pi ani me: «Ma akala obagala ndjika ngubula kulu na edyi. Ma adji nale uo. Ma ayo ka mu me mbu li ma.» <sup>20</sup> Koko atsia apa mata me: «Ma aha elo mbia inde. Kaka-a, ma ti da nanu-u de.»

<sup>21</sup> Kpala na kulu-o agie lie agba ngama gba e-o. Ani atsia akpokpo 'ngu bhomu-o pi ani. Abhomu-o, ngama-a aholo ake 'ngu lie. Ani atsia apa pi kpala na kulu gba e me: «Nu ma gala bhú odaposo, di ne li okpadji. 'I obhulu ndibhili. 'I okpala na eze. 'I obhende i u 'kpi de, di ne obhende ne eze li 'dhu o-o.» <sup>22</sup> Pita nedhinga masudha-a, kpala na kulu ago, ani atsia apa me: «Ngama, ma amene lili gba mu-o amene. Engu bini, dabili nga bha uu.» <sup>23</sup> Abhomu-o, ngama atsia apa pi kpala na kulu gba e me: «Nu li okpadji 'dyi, lingo

\* 14:5 14:5 Ongisi na obhosibhosi: Bhú obhuku koko-o u aye me «punda.»



oaga na edyi, mba okpála ne kpéke, amba eti gba ma-a bedhe bedhe. <sup>24</sup> Padhá de, anga ma apa pi yi me, okpála inde ma a'i o kalanu-o, suka uo bini zú anokomia gba ma-a de!»

*Yi 'o ka ndu 'he hana ngú nakpata Yesu*

*(Tsia bhú Mat. 10:37-38.)*

<sup>25</sup> Ekpí koko-o, li okpála bhelé adu adhuku lie bhú dabili bini ne Yesu-o, ani adji bhúla e li pápá gba uo-o, ani atsia apa pi uo me: <sup>26</sup> «Kpála inde akunda akpata ma-a, a ayo me ani yala 'dyi e ne 'hi e. Ani yala wala e ne ongisi gba e-o. Ani yala ondaise e na obhosibhosi, di ne obhende na olisilisi, amba ani yala belegu mukobho gba e makpe ko. I du mo-o de-e, ani tí da nadu mukpata gba ma-a de. <sup>27</sup> Kpála inde i kunda nabi kulusi gba e de-e, inde i kpata ma de-e, ani tí da nadu mukpata gba ma-a de.

<sup>28</sup> I du me suka yi nde akunda nayiki 'ngbé 'ti-e, ani dú ngaiza kuto. Ani tsia hólo nabhundja ngú nambila me tia ka ni bhelé ngú nandjia kulu ango-o. <sup>29</sup> I du mo-o de-e, ani 'o 'dhu 'ti-e, pipita ani tsia ndjia eti-e de-e, ndu okpála hana inde aú-o, u hólo namu ani. <sup>30</sup> U tsia dú apa me: <Yi tsia nga kpála inde, ani akpo nako lita nayiki eti. Engú bini, ani ndjia de!> <sup>31</sup> A bhadi moko, i du me 'ngbé ngámá bini nde akunda nagu 'gú ne 'ngbé ngámá koko, ani dú ngaiza kuto. Ani holo nabhundja ngú nambila me, ne okpála kutu ndjikpa-a, ni ti da nagu 'gú ne 'ngbé ngámá inde ka e ne okpála kutu ndjikpa bhisio. <sup>32</sup> I du mo-o de-e, ani tíma obhulu titima pi 'ngbé ngámá ango-o nedhinga ani nde nga bha lie tsutsu-o. Ani tsia yí ani me: <A ayo namene pi ngubula me egú adú-u de-e?>» <sup>33</sup> Abhomu-o, Yesu atsia apa matá me: «Suka yi bini ti da nadu mukpata gba ma-a de, i du me ani nde 'o ka ndu 'he gba e hana de ko.»

*Ngutu inde akolo padhá*

*(Tsia bhú Mat. 5:13; di ne bhú Mlk. 9:50.)*

<sup>34</sup> «Ngutu ne bádha 'he. Engú bini, i du me kpokpo nde andjia bhúbhú andjia, u tí da nagie matá kpokpo bhúbhú ne ni? <sup>35</sup> A belegu ndjindji ade ngú doto di ne ngú nalu 'zu. U bála bha ibili akilidjo. Kpála inde ne 'dje 'dje ngú nadje 'kpí-e, ani djedje!»

## 15

*Gbitaku gba kandelo inde angita, u atsia au matá e*

*(Tsia bhú Mat. 18:12-14.)*

<sup>1</sup> Ekpí bini, ondombi na mandjandja di ne okpála na sisiti ago ndu o hana de Yesu ngú nadje ani. <sup>2</sup> Omufalisai ne omusuno na líli gba Moidje adu adi ani. U adu apa me: «Kpála inde-e ngasia okpála na sisiti. Ani la di ngazu 'he ne uo bhú dabili bini!»

<sup>3</sup> Abhomu-o, Yesu atsia apa gbitaku inde-e pi uo me: <sup>4</sup> «Kpála bini bhú ká yi ne okandelo kámá bini. Li suka uo bini ngita-a, ani mene pi? A na paká me, ani 'ó ká obhende ndjikpa odukpabini ne ká odukpabini-e li bili nazu 'he ka o-o. Ani tsia nú nagili bhende angita-a, akólo li nedhinga inde ani aú ani lie-e ko. <sup>5</sup> Li ani au ani lie, ani bédhe ne djali bedhe. Ani há kandelo-o, ani 'ó ani pí de-ngulu e. <sup>6</sup> Ani gíe lie agba e. Pipita-a, ani 'í obi e ne okpála inde asili kuti de ani-o. Ani tsia pá pi uo me: <Yi kpi djali bhú dabili bini ne ma, anga ma au kandelo gba ma inde angita nako au!»» <sup>7</sup> Yesu atsia apa matá me: «Djali adú bhadi moko abhúlá ngubula kpála bini na sisiti inde adji bua e. Djali ango-o ané bhende u nde ne e ngubula okpála na ngbingbili ndjikpa odukpabini ne ká odukpabini, inde ngabhundja me o ne gumu nadji bua o ade ko.»

*Gbitaku pindji lí falanga inde angita, u atsia au matá e*

<sup>8</sup> «Matá di-e, i du me øle bini nde ne lí falanga\* ndjikpa, lí súsuka bini ngita-a, ani méne pí? A na paká me, ani dhédhe eke. Ani pó bili abhú 'ti. Ani gíli má bhotobhoto, akólo lí nedhinga inde ani aú lie-e ko! <sup>9</sup> Lí ani au lie, ani 'í obi e di ne okpála inde asili kuti de ani-o. Ani tsia pá pí uo me: <Yi kpi djali bhú dabili bini ne ma, anga ma au lí falanga inde angita nako ka ma-a au!>» <sup>10</sup> Yesu atsia apa matá me: «Oandjelu gba Ebhe-e akpí bhadi djali moko ngubula koli kpála na sisiti bini inde adji bua e ko.»

*Gbitaku gba ndili inde angita, u atsia au matá e*

<sup>11</sup> Yesu atsia apa matá me: «Bhoko bini adu nani ne ongisi na obhosibhosi bhisi. <sup>12</sup> Bhende na ndimindimi-e apa pí 'dyi e me: <'Dyi ma, ha naama tia na libhondi-e muma haha.> Abhomu-o, 'dyi uo atsia agapa tia gba e lí uo. <sup>13</sup> Pita 'kpí bedi, ndili na ndimindimi-e abha tia gba e, ani atapa ne di bhú kuti bini tsutsu. Oo, ani andjia tia gba e hana má kpøkøbhø lí ndu 'ngú na padhá padhá!

<sup>14</sup> Lí ani andjia tia gba e lie hana-a, adyindi na ngbéngbé atsia ali bhú ndu doto ango-o. Abhomu-o, ani aholo adje gumu. <sup>15</sup> Ani anu ali bhú kulu pí suka kpála na ndu doto bhomu-o. Kpála ango-o aha ani, ani atsia atima ani abhú 'dyi gba e me ani du nalila opame. <sup>16</sup> Ani adu akunda nazu ezu gba opame-o. La-a, kpála bini ha nani ehe nazu mazú pí ani de.

<sup>17</sup> Abhomu-o, ani aholo abhundja. Pipita-a, ani atsia apa lí bua e me: <Ndu okpála na kulu gba 'dyi ma-a hana, ezú ka uo bhíbhití naali. Ngama la ei-e, ma ngakpi ne gumu!

<sup>18</sup> Ma agie lima agba 'dyi ma, ma tsia pá pí ani me: 'Dyi ma, ma amene siti 'ngú kala Ebhe di ne lí pápá gba mu.

<sup>19</sup> A ayo matá na'i ma me ndili ka

mu de. Ha bha ibili ma maka suka okpála na kulu gba mu ko.>

<sup>20</sup> Ani atsia aholo agie lie agba 'dyi e. Lí nedhinga inde ani adu nga bha lie de kuti-e tsutsu-o, 'dyi ani au ani. Ani au ani lie, ani adje ndjinga ani naali. Ani anu ne holo, ani ati lí ngulu ani, ani atsia akama ani lí kute e. <sup>21</sup> Abhomu-o, ndili-e atsia apa pí ani me: <'Dyi ma, ma amene siti 'ngú kala Ebhe di ne lí pápá gba mu. A ayo matá na'i ma me ndili ka mu de.> <sup>22</sup> U akolo lie akuti-e, do 'dyi ani pí okpála na kulu gba e me: <Yaka! Yi go ne yambu bhende ane ne bádha, yi dyi lí ani. Yi to kati bhú 'kpa ani, amba yi to maleko bhú 'dhu ani. <sup>23</sup> Pipita-a, yi nu bhøle folo bagala na tsikpa-o. Ní zu 'he, amba ní kpi djali. <sup>24</sup> Padhá de, anga ndili gba ma inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani.> Abhomu-o, u atsia aholo nakpi djali.

<sup>25</sup> Lí nedhinga bhomu-o, ndili bhende na gigina adu abhiye. Nedhinga ani adu agie lie lie akuti-e, ani akolo lie de eti-e masakpe-e, ani adje tolo 'tsi ne ebi. <sup>26</sup> Ani a'i suka okpála na kulu-o. Ani atsia ayi ani lí engú inde adu akodho 'kpí-o. <sup>27</sup> Kpála na kulu ango-o agie pí ani me: <Ndai mu agie lie agie. 'Dyi mu atsia abhøle folo bagala na tsikpa-o, anga ani au me, ani agie lie ne kute na angu.> <sup>28</sup> Abhomu-o, ndili na gigina-a aholo nake 'ngú lie. Ani ayala nali abhú 'ti-o. 'Dyi ani akoto, ani atsia alopolo lie pí ani me ani líli. <sup>29</sup> Engú bini, ndili-e agie pí 'dyi e me: <Djedje nga, a ko kalanga bhelé ma ngamene kulu pí mu maka bali. Ma ndjo suka líli gba mu-o 'kpí bini de. Mu ha nga la belegu ndili meeme muma bini de me, ya mene anokomia ne obi ma-a ne di. <sup>30</sup> Lí ndili gba mu inde andjia tia gba mu-o hana ne olisi na

\* **15:8** 15:8 Agba omaYuda-a, lí falanga bini (denaliusi) nani ne makalá pí kpála na kulu ngubula ekpi bini.

zabhe-e ago lie, mo otsia abhøle folo bagala na tsikpa-a pi ani!»

<sup>31</sup> 'Dyi ani atsia apa pi ani me: «Ndika ma, ndu 'kpí hana, ní ne mu bhú dabili bini. Ndu 'he inde gba ma-a hana, a ko naamu. <sup>32</sup> Engú bini, a ayo bha igini me ní mene anokomia amba ní kpi djali. Padhá de, anga ndai mu inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani!»»

## 16

### *Kpála na kulu na kali*

<sup>1</sup> Pipita-a, Yesu atsia apa matá pi omukpata gba e me: «Bhulu tia bini adu ne kpála na kulu gba e. Kpála ang-o adu atsia 'kpí li ohe gba ani-o. Okpála koko ago apa pi ani me, kpála na kulu ang-o ngapuru tia gba ani-o. <sup>2</sup> Abhomu-o, ani a'i kpála na kulu-o. Ani atsia apa pi ani me: «Ma ngadje pindji mu e mangua 'ngú dho? Suno obhuku na ndu tia gba ma-a hana mu, anga mu tí da matá natsia 'kpí li ohe gba ma-a de.» <sup>3</sup> Abhomu-o, kpála na kulu ang-o aholo ayi bua e me: «Ma améne si pi? Padhá de, anga ngámá gba ma adji a'é ma bhú kulu. Angu ka ma ngú nade edyi ade. A la di li ma ne namu ngú nadu ne yoyo 'he. <sup>4</sup> Aa! Ma ambila engú inde ma améne e ambila, ngubula me okpála sia ma ndjindji li nedhinga u a'é ma lie bhú kulu ko!»

<sup>5</sup> Abhomu-o, ani a'i okpála bini ne bini inde adu ne bopulu gba ngámá gba ani-o. Ani ayi bhende na kalanu-o me: «Bopulu gba ngámá gba ma-a ka mu madho?» <sup>6</sup> Ani agie pi ani me: «Ngbøngøle na emu kámá bini.» Kpála na kulu-o pi ani me: «Ha 'kpa balua na bopulu gba mu-o. Du kuto má gala, amba mu dji me ndjikpa bhuluvue.» <sup>7</sup> Pipita-a, ani ayi koko me: «A la mu-o, bopulu gba mu-o madho?» Ani agie me: «Kili mapunga kámá bini.» Kpála na

kulu-o pi ani me: «Ha 'kpa balua na bopulu gba mu-o, amba mu dji me ndjikpa madjina.» <sup>8</sup> Ngámá gba kpála na kulu na kali ang-o adhege ani, anga ani amene ehe maka kpála inde ngau 'kpí tsutsu. Okpála na doto inde-e ne imbilangu na kali gba o-o, u ambila namene ehe sãnda o ane ongisi gba Ebhe.

<sup>9</sup> Ngama-a, ma apa pi yi me, yi gili nadu bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kuti na dudu. <sup>10</sup> Kpála bhende ngbingbili bhú ohe na djedjedje-e, ani bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, ani di ngbingbili bhú ohe na ngbengbengbe ade. <sup>11</sup> I du me yi nde mene ndjindji ne tia na kali na doto inde-e de-e, Ebhe tí da naha kukulu tia pi yi de. <sup>12</sup> I du me yi nde mene ehe ngbingbili ne tia gba kpála koko de-e, a há tia gba yi-e pi yi da?

<sup>13</sup> Kpála bini ti da namene kulu pi ongámási bhisi de. Ani yála bini, ani tsia kúnda koko. Ani méne kulu pi koko ndjindji, ani tsia ú koko bhú djila e padhá. Yi ti da namene kulu pi Ebhe bhú dabili bini ne namene pi tia de.»

*Yesu asuno pindji 'ngú ngangá  
(Tsia bhú Mat. 11:12-13, 5:31-32;  
di ne bhú Mlk. 10:11-12.)*

<sup>14</sup> Omufalisai adje ndu 'ngú bhomu-o hana. Abhomu-o, u atsia adu amu Yesu, anga u adu nani akúnda tia naali. <sup>15</sup> Yesu atsia apa pi uo me: «Yi ngamene ehe bhú djila okpála mugito me yi ngbingbili. Engú bini, Ebhe mbila bua yi hana, anga ehe li okpála ngau e bhú djila o ngbéngbé-e, Ebhe ngauu bhú djila e padhá.

<sup>16</sup> Nakolo li nedhinga gba Djaa bhulu nabatisa okpála-a, u akpokpo 'li Ebhe pi okpála bhú líli gba Moidje di ne bhú obhuku gba opolofeta . Nayie li nedhinga bhomu-o, u

akpokpo Bádha NgaliNau gba Ebhe-e pi okpála. Kpála ne kpála ngagili ne kpéke me ni li bhú kúti na mundeysi-o. <sup>17</sup> A ko mboye 'ngú masudha me ekpí di ne doto kodho 'kpí. A ko la kpéke da 'ngú me okpála 'e mboye kú eli bini bhú ká líli gba Moidje-o.

<sup>18</sup> Li bhoko bini 'e wala e bhú kúva-a, ani ha elè koko-o, ani akúnda bhomu-o elè gba kpála koko. Li bhoko bini ha elè inde li 'ko e a'e e bhú kúva-a, ani akúnda di bhomu-o elè gba kpála koko.»

### *Gbitaku gba bhulu tia ne bhulu ndibhili*

<sup>19</sup> «A adu nani bhulu tia bini. Ani adu adyi babadha bongo na tia naali. Ndu 'kpí hana, ani adu nandu ndjindji. Ani atsia adu di nazu 'he ndjindji. <sup>20</sup> Bhulu ndibhili bini adu di nani oo. A adu 'li ani me Ladjalo. Eka atsotsolo nani kute ani hana. Ani adu asi kuto li bhoti gba bhulu tia-o. <sup>21</sup> Ani adu akúnda nazu okulu 'zu inde adu abala sa dabili nazu 'he gba bhulu tia-o. La di-e, obulu adu ago adhapa oeka gba ani-o. <sup>22</sup> Bhulu ndibhili-e akpi. Oandjelu aha ani, u atsia anu a'o ani ade Abalahama. Bhulu tia akpi di, u atsia azi ani.

<sup>23</sup> Oo, li bili gba okpála inde amu-o, ani adu adje likabhu naali. Ani atsia 'kpí ne abhúla, ani au Abalahama tsutsu ne Ladjalo de e. <sup>24</sup> Abhomu-o, ani aholo natobhila me: <'Dyi ma Abalahama, dje nga bha mbo ndjinga ma! Tima Ladjalo me ani to ndji-likpa e bhú 'ngu, amba ani go ne di tunu pí 'mi ma, anga ma ngadje likabhu bhú djua inde-e naali.> <sup>25</sup> Abalahama agie pi ani me: <Ndika ma, bhundja me mo osia nani tia bhelé li nedhinga mo odu lie bhú mukobho pála doto-o. La-a, Ladjalo atsia asia nani nae likabhu naali. Mbia inde-e, ani ngasia bádha 'ngú, mu la naamu ngasia likabhu. <sup>26</sup> Matá-a, a sunda ní ne tsú 'dú, ngubula me li kpála kúnda nayie gba ya ei akodho 'kpí ne agba yi oo, ani de le pima! Li

kpála kúnda nayie gba yi oo akodho 'kpí ne agba ya ei-e, ani de le di pima!>

<sup>27</sup> Do bhulu tia me: <'Dyi ma, kikiliako, ma ayo nga bha-a ka mu me, tima Ladjalo agba 'dyi ma, <sup>28</sup> anga ondaise ma na obhosibhosi bhuluvue oo. A ayo me, ani nu nagbele 'dje uo, amba ngauo di-e, u agó li bili na likabhu inde-e de.>

<sup>29</sup> Abalahama agie me: <U mbila líli gba Moidje di ne obhuku gba opolofeta-a hana. A ayo me u dje uo.> <sup>30</sup> Bhulu tia atsia apa me: <'Dyi ma Abalahama, a mo-o ade. Engú bini, i du me sika okpála inde amu-o nde azuku-o, ani nu pa pi uo-o, u dji bua o.> <sup>31</sup> Abalahama pi ani me: <I du me u nde dje engú inde bhú líli gba Moidje di ne bhú obhuku gba opolofeta de-e, belegu i du me sika okpála inde amu-o nde azuku-o, u dje di ani de.>»

## 17

### *Yi mbu li siti 'ngú gba okpála koko (Tsia bhú Mat. 18:6-7, 21-22; di ne bhú Mlk. 9:42.)*

<sup>1</sup> Pipita-a, Yesu apa pi omukpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pi kpála inde i ngato engú ango-o ko! <sup>2</sup> I du me kpála bini nde ngato ongisi bhú siti 'ngú-o, a pi ani ndjindji me u gbite ngingi tangulu ani, amba u bhike ani bhú 'ngbé 'ngu. Bhobhomu-o pi ani ndjindji naali ane me sika okpála na bhuhuku-o ti ka ani bhú siti 'ngú. <sup>3</sup> 'E-e! Yi lila liyi ndjindji!

I du me ndai mu nde amene siti 'ngú-o, mu de suno pi ani. I du me ani nde apa me ni amene sisiti-e, mu de mbu li ani. <sup>4</sup> I du me ani nde amene mu sisiti bhutsibhutsi mananika li 'kpí bini-e, ani go bhutsibhutsi mananika hana, ani pa pi mu me: <Ma amene mu sisiti, mbu li ma.> Mu de mbu li ani.»

### *Nabhuka na kpekpeke*

<sup>5</sup> Obhulũ titima apa pi Ngámá Yesu me: «Mene me nabhuka gba ya-a kolo matá kpekpeke.» <sup>6</sup> Abhomũ-o, Ngámá Yesu atsia agie me: «Í dú me nabhuka gba yi-e dú maka lí ndula na mutadi-e, yi de tí da napa pi ndula inde-e me: <Yie si, amba mũ nũ lu limũ abhú 'ngbé 'ngu.> Í tsia méne bhadi moko.»

*Kulu inde a ayo me kpála na kulu mene e ko*

<sup>7</sup> «Lí kpála bini bhú ká yi dũ ne kpála na kulu gba e bini-e, í dũ me kpála na kulu ango-o nde ngamene kulu abhiye, aní dũ di-e ngalila onũ-o, aní gie lie akuti-e, aní tsia pá pi kpála na kulu ago-o me: <Go má gala ngú nazũ 'he?> <sup>8</sup> A mo-o ade. Aní pá mangbo pi aní me: <Lũ ezũ, mũ yipa bongoo ngú naha ezũ-o mũma akólo lí nedhinga ma andjia nazũ 'he lie di ne nandji 'he bhende nandji mandji lie ko. Pipita-a, mũ tsia zũ 'he amba mũ ndji di 'he bhe gba mũ-o.> <sup>9</sup> Aní tí da nagie heni pi kpála na kulu-o, anga aní amene líli gba aní-e uu? Belegũ de bini. <sup>10</sup> A bhadi pi yi moko. Nedhinga yi amene ndũ 'ngú inde u apa e pi yi e lie hana-a, yi de pa me: <Ya bha naaya ne okpála na kulu. Ya amene bha kulu inde a ayo igini me ya mene e ko.>»

*Yesu akobho okpála na kába ndjikpa*

<sup>11</sup> Lí Yesu adũ anũ lie abhú Yelusalema-a, aní apũ sũnda ndu doto na Samalia ne bhe na Galilaya. <sup>12</sup> Aní alí lie bhú kuti bini me-e, obhosi na kába ndjikpa ago akẽ lio ne aní. U alũlũ mbo de aní tsutsu. <sup>13</sup> U atsia aholo atobhila me: «Ngámá Yesu, dje nga bha-a mbo ndjinga ya!» <sup>14</sup> Yesu au uo lie, aní atsia apa pi uo me: «Yi nũ suno liyi pi odimandẽ gba Ebhe-o.» Nedhinga u adũ anũ lie, u atsia akobho. <sup>15</sup> Lí sũka uo bini au lie me ni akobho-o, aní atsia agie lie sidi me aní nde ngadhẽgõ Ebhe ne angu hana. <sup>16</sup> Aní atí bhú lí 'dhũ Yesu.

Aní atũ bhúla e ne kuto. Aní atsia agie heni pi Yesu. Bhoko ango-o adũ nani kpála na Samalia. <sup>17</sup> Abhomũ-o, Yesu atsia ayi me: «Ndũ okpála ndjikpa hana akobho adí? Obhende odukupabini-e la su? <sup>18</sup> Kpála bini bhundja nago nagie heni pi Ebhe de, bha bini kpála inde naae ne maYuda ade inde-e?» <sup>19</sup> Pipita-a, Yesu atsia apa pi aní me: «Yie bhúlá, nũnũ. Mo okobho, anga mo obhuka ma.»

*Nedhinga lí Ebhe agó naũ lie pĩla doto*

*(Tsia bhú Mat. 24:23-28, 37-41.)*

<sup>20</sup> OmũFalisai ayi Yesu me: «Naũ gba Ebhe-e agó nadho?» Aní atsia agie pi uo me: «Naũ gba Ebhe-e gó ngua bhende de me okpála nde ngauu mau-o de. <sup>21</sup> U pá de me: <Yi tsitsia, a sii!> ne me <A aoo!> padhá de, anga yi mbila me Naũ gba Ebhe-e bhú ka yi.»

<sup>22</sup> Pipita-a, aní atsia apa pi omũkpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála, 'kpí bini. Engú bini, yi ú la ma de. <sup>23</sup> U apá pi yi me: <Aní aoo!> di ne me: <Aní sii!> engú bini, yi agú holo oo de. <sup>24</sup> Ekpí lí ngama, Ndili gba kpála, ma agó lie, a adú maka mũgbálá, lí zĩ e ngayie lí 'dje kokpí, lí pápá bini akólo lí pápá koko. <sup>25</sup> Engú bini, a ayo me ma dje ngaiza líkabhu naali, amba okpála na naki yala di ma.

<sup>26</sup> Maka engú inde akodho 'kpí nani bhú 'kpí Nũa-a, akódho bhadi 'kpí moko lí 'kpí inde lí ngama, Ndili gba kpála, ma agó lie ko. <sup>27</sup> Padhá de, anga bhú 'kpí Nũa, okpála adũ azũ 'he. U adũ andji pandi. Obhosi ne olisi adũ aha lio akolo lí 'kpí lí Nũa alí bhú zabũ lie ko. Ebha adhi, engu asi pĩla doto libhomu, a atsia abhili ndũ uo hana. <sup>28</sup> A adú maka bhú 'kpí gba Loto. Okpála adũ azũ 'he. U adũ andji pandi. U adũ akala 'he di ne natsĩndji 'he. U adũ alu 'zũ. U adũ ayiki 'ti. <sup>29</sup> Engú bini, ekpí lí Loto akoto bhú Sodomũ lie,

djua di ne itimeli ayie abhúlá, abala pí uo maka ebha, atsia abhili ndu uo hana. <sup>30</sup> A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pí okpála ko.

<sup>31</sup> Li 'kpí ang-o, kpála bhende abháka e apí 'ngbu 'ti-e, a ayo de me ani li abhú 'ti ngú nabha ohe gba e de. A bhadi moko, kpála bhende abháka e abhú 'dyi-e, a ayo de me ani gie lie akuti-e de. <sup>32</sup> Yi bhundja engú inde amene nani wala Loto-o.\* <sup>33</sup> Kpála bhende agíli nalila mukobho gba e, ani kpí. Kpála bhende la abhíke mukobho gba e, ani tsia kóbho. <sup>34</sup> Ma apa pí yi me, sukpe ang-o, okpála bhisi adú pí mako bini, u ahá bini, u tsia 'ó ká koko. <sup>35</sup> Olisi bhisi adú atu mapunga bhú dabilí bini, u ahá bini, u tsia 'ó ká koko. [ <sup>36</sup> Obhosi bhisi adú amene kulu bhú edyi bini, u ahá bini, u tsia 'ó ká koko. » ] <sup>37</sup> Omukpata ayi ani me: «Ngámá, engú ang-o akódho 'kpí ne su?» Ani atsia agie pí uo me: «Bili li kuo kpála adú lie, oagbagba apékèbhè bhadi bhúla o oo ko.»

## 18

*Gbitaku gba siti kpála nakodho 'ngú ne òkè bini na òelè*

<sup>1</sup> Pipita-a, Yesu apa gbitaku bini pí omukpata gba e ngú nasuno pí uo me, a ayo me u du nayo Ebhe ndu nedhinga hana, u andála de. <sup>2</sup> Ani pí uo me: «Kpála nakodho 'ngú bini adu nani bhú gudhu bini. Ani du akpe Ebhe de. Ani atsia adu di au okpála bhú djila e padhá. <sup>3</sup> Bhú gudhu ang-o, òkè na òelè bini adu di oo. Ani adu ago apa pí ani me: «Leke engú sùnda ya ne kpála inde ya nde ne e bhú 'ngú ko.» <sup>4</sup> Ekpí bhelé, kpála nakodho 'ngú ang-o adu ayayala. Pipita-a, ani atsia apa li bua e me: «Ma ngakpe Ebhe ade. Ma la di ngau okpála bhú djila ma padhá. <sup>5</sup> Engú bini, òkè

inde ngandala ma naali. A ayo me ma leke engú gba ani-o, anga i du mo-o de-e, ani du bha ago naba 'ndji ma.»

<sup>6</sup> Ngámá Yesu atsia apa matá me: «Yi dje engú inde li siti bhulu nakodho 'ngú bhomu-o apa e ndjindji! <sup>7</sup> Ebhe méne bádha 'ngú pí okpála inde ani alo o-o di? I du me u nde ngaku 'gba pí ani sukpe ne ngbikpi-e? Ani djéke ngengele ngú nateteke uo? <sup>8</sup> Ma apa pí yi me, ani aléke 'ngú gba uo-o má gala! La-a, li nedhinga li ngama, Ndili gba kpála, ma agó lie, ma abháka me okpála nde abhuka Ebhe píla doto uu?»

*Gbitaku gba muFalisai , ne ndombi na mandjandja*

<sup>9</sup> Okpála koko adu au lio me o naao ngbingbili. U atsia adu au ndu okpála koko hana bhú djila o padhá. Abhomu-o, Yesu atsia apa gbitaku inde-e li 'ngú gba uo-o me: <sup>10</sup> «Ekpí bini, okpála bhisi anu bhú 'ngbé 'ti Ebhe gba omaYuda ngú nayo Ebhe. Bhe bini adu muFalisai , bhe koko adu ndombi na mandjandja. <sup>11</sup> MuFalisai-e ayie bhúlá, ani atsia ayo Ebhe a li bua e me: «Oo, Ebhe! Ma ngagie heni pí mu, anga ma maka okpála koko ade. U ngazi 'he. U ngamene sisiti 'ngú. U ngakunda olisi, i du di-e obhosi gba okpála koko. Ma di ngagie heni pí mu, anga ma maka ndombi na mandjandja inde-e ade. <sup>12</sup> Ma tsetse ezu 'kpí bhisi sùnda poso bini ngú nayo mu. Ma haha bini bhú ká ndjikpa pí ndu 'he ma ngasia e hana.»

<sup>13</sup> Ndombi na mandjandja alu naae mbo tsutsu, ani akpe belegu natsia 'kpí ne abhúlá. Engú bini, ani atu bhúla e ne kuto, ani abu 'kpa e pí 'ka e, ani atsia apa me: «Oo, Ebhe! Dje nga bha-a mbo ndjinga ma, ma naama ne siti kpála.» <sup>14</sup> Do Yesu matá me: «Ma apa pí yi me, ndombi na mandjandja ang-o agie nani lie agba e me, Ebhe nde adje

\* **17:32** 17:32 Wala Loto akolo nani teme na ngutu anga ani agumu nani líli gba Ebhe. Tsia bhú Dje. 19:26.

nayo gba ani-e adje. Engú bini, Ebhe dje bhende gba mɔFalisai-e de. Padhá de, anga kpála bhende nga'o lie ne bhúlá-a, li Ebhe ké ani ne kuto. La-a, kpála bhende nga'o lie ne kuto-o, li Ebhe 'é'e ani ne bhúlá.»

*Yesu asia ongisi na ndjendje*

<sup>15</sup> Okpála adu ago di pi ani ne ongisi na ndjendje ngubula me ani 'o 'kpa e pí 'ndji uo. Li omukpata au lie mo-o, u aholo nayoko uo. <sup>16</sup> Engú bini, Yesu a'i uo, ani atsia apa me: «Yi 'o ongisi na djedje me u go bhaka ma! Yi aní kpadji pi uo de, anga Nau gba Ebhe-e , a pi okpála inde maka uo ko. <sup>17</sup> Ma apa pi yi na paká me, kpála inde i sia Nau gba Ebhe-e maka mboye ndili de-e, ani ti ne Nau gba Ebhe-e de.»

*Bhulɔ tia ne uo ne Yesu  
(Tsia bhú Mat. 19:16-30; di ne bhú  
Mlk. 10:17-31.)*

<sup>18</sup> Abhomɔ-o, ngámá bini gba omaYuda ayi Yesu me: «Mɔsuno, ngamɔ bádha kpála, a ayo me ma amene pi ngubula nasia mukobho na duduɔma?» <sup>19</sup> Yesu atsia agie pi ani me: «Mɔ nga'i ma me bádha kpála ka ni? Kpála bini babadha ade. Ebhe bha babadha ngae kpi e kpi. <sup>20</sup> Mɔ mbila olili-e ndjindji: «Mo okúnda ɔlɔ, i du di-e bhoko gba kpála koko de. Mo obhólɔ kpála de. Mo ozi 'he de. Mo opá eu li kilí mɔ de. Manga 'dyi mɔ ne 'hi mɔ mamanga.†» <sup>21</sup> Ngámá ango-o atsia apa me: «Nayie bhú ndili li ma-a, ma amene ndu 'ngú bhomɔ-o hana.» <sup>22</sup> Pita li Yesu adje engú bhomɔ-o lie, ani atsia apa pi ani me: «Mo oneke matá koli ehe bini. Nɔnɔ, tsindji ndu 'he gba mɔ-o hana, amba mɔ gapa tiatia pi obhulɔ ndibhili. Mo osía tia abhúlá. Pipita-a, mɔ go kpata ma.» <sup>23</sup> Ani adje lie mo-o, ani asia likabhu naali, anga tia adu nani ka ani bhelé naali.

<sup>24</sup> Li Yesu au lie me ani asia likabhu mo-o, ani atsia apa me:

«A bha ndju kpekpeke pi obhulɔ tia ngú nali bhú Nau gba Ebhe-o! <sup>25</sup> A kpekpeke pi eya ngubula nali li gudho mɔsana. A la matá kpekpeke ane pi bhulɔ tia ngubula nali bhú Nau gba Ebhe ko.»

<sup>26</sup> Abhomɔ-o, okpála inde adje engú inde ani apa e atsia ayi me: «I du mo-o, a ti da nakobho da?»

<sup>27</sup> Yesu agie me: «Engú bhende i ti ne okpála de-e, a ati bha ne Ebhe.»

<sup>28</sup> Abhomɔ-o, Piele atsia apa me: «Tsitsia nga, ya a'o ká ndu 'he gba ya-a hana ngú nakpata mɔ.» <sup>29</sup> Do Yesu pi uo me: «Ma apa pi yi na paká me, i du me kpála bini nde a'o ká eti gba e, ani 'o ká wala e, ani 'o ká ondaise e, ani 'o ká okpála inde azu e, ani 'o ká ongisi gba e ngubula Nau gba Ebhe-e, <sup>30</sup> ani sía 'he bhelé naali kuto ei. Pipita-a, bhú nedhinga inde ngago-o, ani tsia sía di mukobho na duduɔma.»

*Yesu akpo 'ngú bhutsibhutsi na  
bata pindji nakpi di ne nazuku ka e*

*(Tsia bhú Mat. 20:17-19; di ne bhú  
Mlk. 10:32-34.)*

<sup>31</sup> Pipita-a, Yesu aha okpála na titima ndjikpa ne ká bhisi-e, ani anu ne uo li ngongo, ani atsia apa pi uo me: «Yi djedje, ní adji mbia inde e abhú Yelusalema. Oo, ndu 'ngú hana inde li opolofeta aye e pindji ma, Ndili gba kpála-a, adji amene lie. <sup>32</sup> Padhá de, anga u apú ma pi omupagano. Li okpála ango-o mú ma, u sóbho ma, u tsia kú di ngusɔ li kute ma. <sup>33</sup> U abhí ma ne fimbo. Pipita-a, u tsia bhólɔ ma. La-a, bhú 'kpi na bata-a, ma tsia zúku.» <sup>34</sup> Engú bini, omukpata mbila nani ta 'ngú ango-o de, anga a awo nani lie pi uo mawo. U tsia du ambila ta 'ngú li Yesu adu apa e de.

*Yesu akobho kpála bini inde i u  
'kpi de*

*(Tsia bhú Mat. 20:29-34; di ne bhú  
Mlk. 10:46-52.)*

† 18:20 18:20 Tsia bhú Eki. 20:12-16; di ne bhú Det. 5:16-20.

<sup>35</sup> Li Yesu akolo lie masikpe de Djeliko-o, kpála bini inde i u 'kpí de-e adu kuto denko 'hi-kpadji. Ani adu ayo 'he. <sup>36</sup> Ani adje tolo okpála akodho 'kpí lie, ani atsia ayi me: «A ko ni?» <sup>37</sup> Okpála atsia agie pi ani me: «Yesu, kpála na kuti na Nadjaleta ngakodho 'kpí bhomu-o ngae.» <sup>38</sup> Abhomu-o, ani atsia asula me: «Yesu, Ndili gba Davidi, dje nga bha-a mbo ndjinga ma!» <sup>39</sup> Okpála inde adu akalanu-o aholo ambembe bhú 'ndji ani me: «Gbite 'bhø mu.» Engú bini, ani aholo asusula matá kpekpeke me: «Ndili gba Davidi, dje nga bha-a mbo ndjinga ma!» <sup>40</sup> Yesu alu, ani atsia aha líli me u go ne ani pi ni. Ani akolo lie de ani-e, Yesu atsia ayi ani me: <sup>41</sup> «Mo okunda me ma mene pi mu ni?» Ani agie me: «Ngámá, bhulu djila ma, amba ma u matá 'kpí.» <sup>42</sup> Yesu apa pi ani me: «U matá 'kpí uu! Mo okobho anga mo obhuka ma.» <sup>43</sup> Kolo má gala me-e, ani aholo matá nau 'kpí. Ani atsia adu akpata Yesu me ani nde ngadhøø Ebhe. Ndu okpála hana inde au engú ango-o, aholo di nadhøø Ebhe.

## 19

### *Yesu ali bhú 'ti gba Djakayo*

<sup>1</sup> Pita li Yesu ali lie bhú Djeliko, ani atsia adu agulu gudhu-o. <sup>2</sup> A abhaka me kpála bini nde oo, a adu 'li ani me Djakayo. A adu nani ngámá gba ondombi na mandjandja. Tia adu ka ani bhelé. <sup>3</sup> Ani adu agili nau me Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu. <sup>4</sup> Abhomu-o, ani ayiki lie ne holo ne akalanu. Ani atsia a'u bhú ndula bini denko 'hi-kpadji ngubula me ni u Yesu nedhinga inde ani apú lie oo ko.

<sup>5</sup> Li Yesu akolo lie li bili bhomu-o, ani a'e djila e ne abhúlá, ani atsia ani. Ani atsia apa pi ani me:

«Djakayo, kø kuto má gala, anga a ayo me ma si naki bhú 'ti gba mu-o.» <sup>6</sup> Abhomu-o, Djakayo akø kuto bhú holo. Ani atsia asia Yesu ne djali hana. <sup>7</sup> Ndu okpála hana au lie mo-o, u aholo adi mutokono. U atsia adu apa me: «Lele pi li kpála inde-e atapa lie nasi agba kpála na sisiti-e!» <sup>8</sup> Djakayo ayie bhúlá, do ani pi Yesu me: «Ngámá, djedje nga. Ma agbó bhusu tia gba ma-a bhisi. Ma ahá bhe bini-e pi obhulu ndibhili. I du me ma nde aha tia gba kpála bini ne kali-e, ma agie pi ani bhutsibhutsi badha.» <sup>9</sup> Abhomu-o, Yesu atsia apa pi ani me: «Naki-e, Ebhe akobho mu. Ngamu di-e, mu bhú piga gba Abalahama-o. <sup>10</sup> Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

### *Gbitaku gba okpála na kulu ndjikpa*

*(Tsia bhú Mat. 25:14-30.)*

<sup>11</sup> Yesu akolo de Yelusalema masikpe. Okpála inde adu adje ani-e adu abhundja naao me, Nau gba Ebhe-e asúno lie pi okpála mbia inde. <sup>12</sup> Kaka-a, ani atsia apa gbitaku bini pi uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini. <sup>13</sup> Kala me ani nu-o, ani a'i okpála na kulu gba e ndjikpa-o. Ani agapa lí falanga\* bini bini li ndu uo hana. Ani atsia apa pi uo me: «Yi mene kulu ne falanga inde, akólo li nedhinga inde ma agie lima lie ko.» <sup>14</sup> Okpála na doto gba ani-e adu ayala ani. U atima okpála nganda ani ngú napa me: «Ya kunda de me kpála bhomu-o u ngámá pí 'ndji ya-a de.»

<sup>15</sup> La-a, u ato palata na ngámá tangulu ani. Ani atsia agie lie bhú doto gba e-o. Abhomu-o, ani a'i okpála na kulu inde ani agapa nako falanga lio ngubula nambila bhende

\* **19:13** 19:13 Agba omaYuda-a, lí falanga bini (olo) nani ne makalá pi kpála na kulu ngubula epe bata.



u asia e pépé-o. <sup>16</sup> Abhomu-o bhe na kalanu-o ago. Ani atsia apa me: <Ngámá, ma asia lí falanga ndjikpa pí bhende nako mo oha e muma ko.>

<sup>17</sup> Abhomu-o, ngámá-a apa pí ani me: <A ndjindji. Mu ne bádha kpála na kulu, anga mo omene ndjindji bhú mboye ehe bedi. Ma a'ó ibili mu ngámá pí 'ndji ogudhu ndjikpa.>

<sup>18</sup> Bhe na bhisi-e ago, ani atsia apa me: <Ngámá, ma asia lí falanga bhuluvue pí bhende nako mo oha e muma ko.> <sup>19</sup> Abhomu-o, ngámá-a apa di pí ani me: <Ngamu di-e, ma a'ó mu ngámá pí 'ndji ogudhu bhuluvue.>

<sup>20</sup> Pipita-a, koko ago, do ani de-e: <Ngámá, lí falanga gba mu-o ii. Ma awo nako bhú bongo . <sup>21</sup> Mu 'o li ma tsulu, anga mu ne kpála inde ngamene 'ngú na kpekpeke. Mu ngaha ehe bhende mu 'o e ngamu de. Mu ngaha 'zu inde mu lu e ngamu de.> <sup>22</sup> Ngámá-a apa pí ani me: <Mu ne siti kpála na kulu. 'Li mu makpe agbite mu ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'o e ngama de. Ma ngaha ezú inde ma alu e ngama de. <sup>23</sup> Ka ni mu 'o nako tia gba ma-a lie bhú baki de-e? Maka ma ago-o, ma de asia koko pépé.>

<sup>24</sup> Pipita-a, ani apa pí okpála inde adu oo me: <Yi dhepe tia inde ka ani bhomu, amba yi ha pí bhende ne di ndjikpa ko.> <sup>25</sup> U atsia apa pí ani me: <Ngámá, a ka ani ndjikpa!> <sup>26</sup> Ani agie me: <Ma apa pí yi me, kpála bhende li ehe nde ka e, u ahá ehe pí ani bhelé. Engú bini kpála bhende li ehe nde ka e ade-e, u adhépe belegu mboye ehe inde ka ani ko. <sup>27</sup> La-a, pí obhulu yala gba ma inde i kunda nako de me ma au ngámá pí 'ndji o-o, yi go ne uo ei, amba yi bhili uo kala ma sii.>>

*Yesu ali bhú Yelusalema*  
(*Tsia bhú Mat. 21:1-11; ne bhú Mlk. 11:1-11; di ne bhú Dja. 12:12-19.*)

<sup>28</sup> Pita li Yesu akpo 'ngú bhomu-o lie, ani atsia akodho 'kpí ne akalanu ngú nanu bhú Yelusalema. <sup>29</sup> Ani akolo lie sunda kuti na Betefadje ne Betania-a,† lingo 'ta na ondula na Olive, ani atsia atima omukpata bhisi. <sup>30</sup> Ani pí uo me: «Yi nu bhú kuti inde kala yi aoo. Yi akólo lie oo, yi abháka me u nde agbite ndili punda oo. Kpála bini dhuku nga pí ani de. Yi bhulu ani amba yi go ne ani ei. <sup>31</sup> I du me kpála bini nde ayi yi me: <Yi ngabhulu ani ngú ni?> Yi de pa pí ani me: <Ngámá ne gumu ani.>» <sup>32</sup> Omukpata bhisi anu, u atsia abhaka ndu 'ngú hana maka li Yesu apa pí uo lie ko. <sup>33</sup> U adu abhulu enu-o lie, obhubhulu-o ayi uo me: «Yi ngabhulu enu bhomu-o ngú ni?» <sup>34</sup> U agie me: <Ngámá ne gumu ani.>

<sup>35</sup> Pipita-a, u ago ne ndili 'nu-o pí Yesu. U apa okoti gba o pí 'ngbu enu-o. U atsia ateteke Yesu ngú na'u pí 'ngbu ani.‡ <sup>36</sup> Ani adu anu lie, okpála adu apa okoti gba o li kpadji. <sup>37</sup> Ani akolo de Yelusalema masikpe li ngba 'ta na ondula na Olive. Ndu omukpata hana abedhe ne djali bedhe. U atsia aholo nadhogø Ebhe kpekpeke ngú ndu ongamba 'ngú hana inde u au e ko. <sup>38</sup> U adu apa me:

«A ayo me Ebhe tuko bisagu pí  
'ngbé ngámá inde ani atima e  
ko!  
Guo 'ngú abhúlá,  
amba sangu du di pí Ebhe Apí  
'Kpí!†»

<sup>39</sup> Omufalisai koko inde adu bhú ká okpála bhomu-o, apa pí Yesu me: «Musuno, yoko omukpata gba mu-o mayoko.» <sup>40</sup> Yesu atsia agie me: «Ma apa pí yi me, i du me u nde agbite 'bhe o-o, li oteme holo natu 'ue!»

† 19:29 19:29 Nayie bhú Yelusalema akólo bhú Betefadje ne Betania, a ko kilometele bata. ‡ 19:35 19:35 Na'u ka Yesu pí 'ngbu punda-a, asuno nani bhomu-o guo 'ngú di ne nako lie ka ani ne kuto. Tsia bhú Djkl. 9:9. † 19:38 19:38 Tsia bhú Ets. 118:26.

*Yesu aku 'gbá ngú okpála na Yelusalema*

<sup>41</sup> Li Yesu akolo lie masikpe de Yelusalema-a, ani au gũdhũ-o lie, ani atsia aholo aku 'gbá ngú okpála ango-o. <sup>42</sup> Ani adũ apa me: «Aa! Ngayi okpála na Yelusalema-a, i dũ me yi mbĩla li 'kpĩ na naki inde-e, guo 'ngú inde u ago pi yi ne e uu-o! La-a, a ko likabhu pi yi anga mbia inde-e, awo lie pi yi mawo. <sup>43</sup> Padhá de, anga oekpĩ koko akólo pi yi makolo, li 'kpĩ ango-o, obhũlu yala gba yi-e, asá aga dengo yi ngbalina. U búka yi, u tsia há 'gú pi yi ne ndũ pápá hana. <sup>44</sup> U agúgumũ gũdhũ-o. U tsia bhĩli ndũ okpála inde bhũbhũ-o hana. Agba yi-e, teme bini tĩgala pí kilĩ e de, anga yi mbĩla nani ekpĩ inde li Ebhe ago natsia yi lie de!»

*Yesu ali bhú 'ngbé 'ti Ebhe gba omaYuda*

*(Tsia bhú Mat. 21:12-17; ne bhú Mlk. 11:15-19; di ne bhú Dja. 2:13-22.)*

<sup>45</sup> Pipita-a, Yesu ali bhú 'ngbé 'ti Ebhe gba omaYuda-o. Ani atsia aholo natsambala okpála inde adũ atsindji 'he oo-o. <sup>46</sup> Ani apa pi uo me: «U aye bhú Bhuku gba Ebhe-e me, Ebhe apa me: <Eti gba ma-a, a adũ eti nayo ma.> Engú bini, ngayi-e, yi adjĩ, atsia akolo bili gba obhũlu 'zi!†»

<sup>47</sup> Yesu adũ asuno ndũ 'kpĩ hana bhú 'ngbé 'ti Ebhe gba omaYuda. Ongbengbe odimandø , omũsuno na líli gba Moidje di ne obhelesi okpála adũ agili kpadji ngú nabhøø ani. <sup>48</sup> Engú bini, u tsia sia kpadji ngú namemene de, anga ndũ okpála hana adũ adje ani ne gũgumũ naali.

## 20

*A ngaha angu pi Yesu da?*

*(Tsia bhú Mat. 21:23-27; di ne bhú Mlk. 11:27-33.)*

§ 19:45 19:45 U adũ nani atsindji onũ di ne odhu bhú 'ngbé 'ti Ebhe gba omaYuda ngubula me okpála, inde adũ ne gũgumũ ngú nahaha pi Ebhe-e, kala. † 19:46 19:46 Tsia bhú Isa. 56:7; di ne bhú Djlm. 7:11. \* 20:9 20:9 Bhú bhuku gba polofeta Isaya-a, vino ngasuno piga gba omaIsalaele. Tsia bhú Isa. 5:1-7.

<sup>1</sup> A akolo ekpĩ bini, Yesu adũ asuno pi okpála bhú 'ngbé 'ti Ebhe gba omaYuda. Ani atsia adũ di nakpokpo Bádha Ngali pi uo. Ongbengbe odimandø gba Ebhe , omũsuno na líli gba Moidje di ne obhelesi okpála ago. <sup>2</sup> U atsia ayi ani me: «Pa nga pi ya, aha kpadji pi mũ ngú namene ongú inde-e da? A aha la di angu ango-o pi mũ ngánga da?» <sup>3</sup> Abhomũ-o, Yesu atsia agie pi uo me: «Ngama di-e, ma ayĩ yi li 'ngú bini. Yi pa nga mũma, <sup>4</sup> a ha kpadji pi Djaa ngú nabatisa okpála da? Ne me a ko Ebhe, ne me a ko okpála?»

<sup>5</sup> U aholo namene kpekebhe sũnda o. U atsia adũ apa me: «I dũ me ní nde agie me: <A aha kpadji pi ani ne Ebhe>, ani yĩ ní me: <I dũ mo-o, ka ni yi bhuka la nani engú inde ani adũ apa e lie de-e?» <sup>6</sup> I dũ di me ní nde apa me: <A ha kpadji pi ani ne okpála-a>, li ndũ okpála hana bhĩli ní ne teme, anga u ambĩla ndjindji me Djaa nani ne polofeta .» <sup>7</sup> Abhomũ-o, u atsia agie me: «Ya mbĩla kpála inde aha kpadji pi ani-e de.» <sup>8</sup> Do Yesu pi uo me: «I dũ mo-o, ngama di-e, ma pá pi yi de me aha kpadji mũma da ngú namene ehe inde.»

*Gbitaku pĩndji okpála na kulu inde abhøø ndĩli gba ngámá gba o-o*

*(Tsia bhú Mat. 21:33-46; di ne bhú Mlk. 12:1-12.)*

<sup>9</sup> Pipita-a, Yesu aholo nakpokpo gbitaku inde-e pi okpála me: «Kpála bini alu nani ngu vino.\* U adje lio ne okpála ngú namene kulu bhú 'dyi-o, amba o dũ agbó bhũsũ o ne uo li nguwa-o. Ani atsia atapa dhũku ngubula 'kpĩ bhelé.

<sup>10</sup> A akolo li nedhinga nako líli o. Abhomũ-o, ani atima kpála na kulu bini agba okpála ango-o me u

ha nguwa bhe gba ni-e pi ni haha. Engú bini, okpála ango-o abhi kpála na kulu bhomu-o má kpú! U atsia agie ani ne mbulu 'kpa e padhá. <sup>11</sup> Bhulu 'dyi-e atima matá kpála na kulu koko bini. U abhi di ani, u asosobho ani, u atsia agie ani ne mbulu 'kpa e padhá. <sup>12</sup> Ani atima matá kpála na bata. Bhobhomu-o, u atsotsolo kate ani ne eka. U atsia agbe ani bhú 'dyi-o.

<sup>13</sup> Abhomu-o, bhulu 'dyi atsia apa me: <Ma améne si pi? Ma atima nga ibili ndili gba ma na mukunda-o. Nedhinga koko-o, u tí da namanga ani.> <sup>14</sup> Engú bini, li okpála ango-o au ndili-e lie me-e, u atsia apa sunda o me: <Yi tsia nga la ndju kpála inde atígala galikpe ne edyi-o. Ní bhelo ani, amba edyi-e kolo ibili naaní.> <sup>15</sup> Abhomu-o, u agbe ani bhú 'dyi-o, u abhelo ani.> Yesu atsia ayi me: «Mbia inde-e, bhulu 'dyi-e améne ngú uo pi? <sup>16</sup> Ani agó, ani bhili okpála na kulu ango-o. Ani tsia há edyi-e pi okpála na kulu koko.» Li okpála adje engú bhomu-o lie, u atsia apa me: «A ayo de me, bhobhomu-o mene lie de!»

<sup>17</sup> Yesu atsia uo, ani atsia apa me: «Engú inde u aye e bhú Bhuku gba Ebhe-e me:

<Teme inde li okpála nayiki eti-e abhike e,

akolo teme inde abi eti-e lib-homu.†>

A akunda napa pi? <sup>18</sup> I du me kpála nde ati pí teme ango-o, ani gúgumu. I du la di me teme ango-o nde ati pí kpála-a, i tú nu ani.»

*Engú pindji nakala mandjandja*

*(Tsia bhú Mat. 22:15-22; di ne bhú Mlk. 12:13-17.)*

<sup>19</sup> Bha li nedhinga bhomu-o, omusuno na líli gba Moidje di ne ongbengbe odimandé gba Ebhe-e, agili nani naholo Yesu, anga u ambila me ani apa gbitaku bhomu-o li 'ngú gba o-o. Engú bini, u adu adje tsulu ka okpála. <sup>20</sup> Abhomu-o,

u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála ango-o adu agili naholo ani li 'li e ngubula me o pu ani pi Pilate, ngámá na ndu doto ango-o. <sup>21</sup> U ayi ani me: «Musuno, ya ambila me mu ngagama 'ngú ndjindji, mu la di ngasuno 'ngú ngbingbili. Mu tsia engbé gba kpála de. Mu ngasuno kpadji gba Ebhe-e pi okpála ngbingbili. <sup>22</sup> Pa nga pi ya, a ayo me ya kala mandjandja gba Kaisala, 'ngbé ngámá na doto na Loma-a, ne me ya kala de?»

<sup>23</sup> Li Yesu ambila ekú gba uo-o lie, ani atsia apa pi uo me: <sup>24</sup> «Yi suno nga lí falanga muma bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngámá na doto na Loma, di ne 'li ani.» <sup>25</sup> Abhomu-o, Yesu atsia apa pi uo me: «I du mo-o, yi ha ehe bhende gba Kaisala, 'ngbé ngámá na doto na Loma-a pi e, amba yi ha la di bhende gba Ebhe-e pi Ebhe.» <sup>26</sup> U u siti 'ngú bhú engú inde ani adu apa e kala okpála-a de. Engú bini, u angamba naali ka eli inde ani agie e ko. Kaka-a, u andjili bha má bulu!

*Nazuku ka okpála inde amu*

*(Tsia bhú Mat. 22:23-33; di ne bhú Mlk. 12:18-27.)*

<sup>27</sup> Abhomu-o, oSadukai koko ago de Yesu. OSadukai ziba nani naao de me okpála inde amu-o, azuku mazuku-o de. U ayi ani me:

<sup>28</sup> «Musuno, Moidje aye nani líli pi ní me: <Li kpála kpi 'o ká wala e

me ani nde zu de-e, a ayo me ndai ani de ha elo ango-o, amba ani zu

ongisi pi ndai e inde akpi ko.> <sup>29</sup> La-

a, adu nani obhosi mananika bhú piga bini. Bhende na kalanu-o aha

elo, ani akpi padhá me ani nde zu de. <sup>30</sup> Bhende na bhisi-e aha oko

ango-o. Ani atsia akpi. <sup>31</sup> Pipita-

a, bhende na bata-o. A adu bhadi moko pi ndu uo mananika hana, u amu me u nde zu de. <sup>32</sup> Ali soso-o,

† 20:17 20:17 Tsia bhú Ets. 118:22.

өлө анго-о атсия акпи ди. <sup>33</sup> Ya ngayi mu me: Li 'kpi li okpala inde amu-o azuku lie, өлө анго-о адү наа да? Padhá de, anga ndu uo mananika hana aha nani ani!»

<sup>34</sup> Abhomu-o, Yesu atsia agie pi uo me: «Okpala na naki inde-e ngaha lio. <sup>35</sup> Engú bini, okpala bhende amu-o, li Ebhe au me u ti da nazuku ngu nasia mukobho bhú nedhinga inde ngago-o, u há lio de. <sup>36</sup> U ti da matá namu-u de, anga u akolo ibili maka oandjelu . A ko ongisi gba Ebhe, anga u azuku. <sup>37</sup> Moidje asuno pi ní mbámhá me okpala inde amu-o azuku mazuku. Ani aye bhú bhuku gba e li bili inde ani akpo 'ngú lie pindji tsa 'po inde adu atsi-e me, Ebhe apa me: <Ma ne Ebhe inde li Abalahama ngadhögö e, Ebhe inde li Isaka ngadhögö e, Ebhe inde li Jakobho ngadhögö e ko.†> <sup>38</sup> Ebhe ne Ebhe gba okpala bhende amu-o ade. Engú bini, a ko Ebhe gba okpala bhende bhú mukobho, maka li Abalahama, Isaka ne Jakobho nde pi ani lie bhú mukobho ko.»

<sup>39</sup> Abhomu-o, omusuno na líli koko atsia agie pi ani me: «Musuno, mo opa ndjindji.» <sup>40</sup> Kaka-a, u yi matá ani li 'ngú bini de.

*Masiya ne Ngámá gba Davidi*  
(Tsia bhú Mat. 22:41-46; di ne bhú Mlk. 12:35-37.)

<sup>41</sup> Abhomu-o, Yesu apa matá pi uo me: «Lele pi li okpala ti da napa lie me Masiya ne ndili na piga gba Davidi-e? <sup>42</sup> Padhá de, anga ngaani Davidi makpe-e, ani apa bhú bhuku na oetsi gba omaYuda me:

<Ebhe Ngámá apa pi Ngámá gba ma-a me:  
Du kuto li pá 'kpa ma na kokpa,  
<sup>43</sup> akólo li nedhinga inde ma a'ó obhulu yala gba mu-o lie dabili na sa-tidhu mu ko.> †

<sup>44</sup> † du me Davidi nde nga'i Masiya me Ngámá gba ni-e, lele pi li Masiya

ti da ndu lie ndili na piga gba Davidi-e?»

*Yi améne maka omusuno na líli de*  
(Tsia bhú Mat. 23:1-36; di ne bhú Mlk. 12:38-40.)

<sup>45</sup> Ani apa pi omukpata kala ndu okpala hana inde adu adje ani-e me: <sup>46</sup> «'E-e! Yi lila liyi ka omusuno na líli gba Moidje-e uu! U kunda bha nadhuku ne ondjandja yambu. U kunda bha me okpala du ne yiyi o maka ongámási li bili li okpala apöpököbhö bhúla o lie ko. U kunda bha nadulu pi odabili na akalanu bhú oeti nadje líli , di ne odabili na akalanu bhú da anokomia. <sup>47</sup> U ngandjia angu oökösi na olisilisi ne nabha ohe gba uo. U ngayo Ebhe ngengele ngu nasuno mugito me a ko obabadha okpala. Kaka-a, u asia likabhu naali!»

## 21

*Makiso gba ökö bini na öölö*  
(Tsia bhú Mlk. 12:41-44.)

<sup>1</sup> Ekpí bini, Yesu adu bhú 'ngbé 'ti Ebhe gba omaYuda. Ani atsia 'kpi, ani au me obhulu tia ngabhike tia gba o-o bhú sanduku na makiso na 'Ngbe 'ti Ebhe-e ngu nahaha pi Ebhe.

<sup>2</sup> Ani atsia au di ökö bini na öölö bhulu ndibhili me ani nde ngabhike senge bhisi. <sup>3</sup> Abhomu-o, ani atsia apa me: «Ma apa pi yi na paká me, ölö na ndibhili li 'ko e akpi inde-e, aha makiso ane ndu okpala koko hana. <sup>4</sup> Padhá de, anga ndu okoko hana, u aha tia bhende u nde ne gumu e ade ko. Engú bini, ngaani-e, abana ani nde lie bhú ndibhili-e, ani aha ndu bhende ani adu akobho lie hana.»

*Yesu apa me: «U agúgumu 'ngbé 'ti Ebhe gba omaYuda-o»*

(Tsia bhú Mat. 24:1-2; di ne bhú Mlk. 13:1-3.)

<sup>5</sup> Pipita-a, okpala koko aholo akpokpo 'ngú pindji 'ngbé 'ti Ebhe gba omaYuda-o. U adu apa me:

† **20:37** 20:37 Abalahama, Isaka ne Jakobho ngadhögö Ebhe anga pi Ebhe-e, belegu u amu lie li kute o, uo bhú mukobho li bua o. Tsia bhú Eki. 3:6. † **20:43** 20:42-43 Tsia bhú Ets. 110:1.

«A bha ndju babadha naali ne obabadha teme ango-o, di ne ohe na mase naali inde u aha e pi Ebhe-o.» Engú bini, Yesu atsia apa me: <sup>6</sup> «Ndú 'he inde yi ngau e inde-e, ekpí koko akólo makolo, teme bini tígala pí kilí e de. U agúgumú eti-e hana kuto.»

*Likabhu inde akólo kala sokpí-o*  
(*Tsia bhú Mat. 24:3-14; di ne bhú Mlk. 13:3-13.*)

<sup>7</sup> Abhomú-o, u atsia ayi ani me: «Músunu, engú inde mú ngakpokpo 'ngú pindji e bhomu-o, akólo nadho? Ehe inde asúno nedhinga nago ka engú ango-o, a adú ní?» <sup>8</sup> Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'li ma, u tsia pá me: <Ma ne Masiya !> U tsia pá di me: <Nedhinga nago ka Masiya akolo!> Engú bini, yi akpáta uo de. <sup>9</sup> I dú me yi nde adje okpála ngakpo 'ngú na oegú di ne ongú na okpekpeke 'ndji-e, yi adjé tsulú de. Padhá de, anga a ayo ngaiza me oengú ango-o kolo kalanú. La-a, sokpí-e dú nga kolo má gala mo-o de.» <sup>10</sup> Pipíta-a, ani matá pi uo me: «Okpála na kuti bini ahá 'gú pi okpála na kuti koko. Li ngámá na kuti bini há 'gú pi ngámá na kuti koko. <sup>11</sup> Doto adyíki ne adjigidjo na ngbéngbé. Adyíndi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulú tsulú abhúlá.»

<sup>12</sup> Engú bini, kala me ndú 'ngú bhomu-o hana kolo-o, u ahólo yi. U améne yi sisiti. U anú ne yi me u kodho 'ngú gba yi-e bhú 'ti nadjé líli gba Moidje . U tsia bhíke yi bhú tíkpú. U asungula yi pi ongbengbe ongámási di ne obhende ngatsia 'kpí li kuti-e kabula 'li ma. <sup>13</sup> Bhobhomú-o ahá kpadji pi yi ngubula me, yi kpokpo 'ngú gba ma-a pi uo. <sup>14</sup> Yi 'o li bua yi me, yi gíli engú inde yi apá e li nedhinga nakodho 'ngú gba yi-e kalanú de. <sup>15</sup> Padhá de, anga ma ahá eli di ne imbilangú pi yi ngama makpe, ngubula nagbite 'bhe ndú

obhulú yala gba yi-e hana. <sup>16</sup> Odyi yi ne ohi yi, ondaise yi ne okpála na piga gba yi di ne obi yi apú belegú yi ngao. U abhíli okpála koko bhú ka yi. <sup>17</sup> Ndú okpála hana ayála yi kabula 'li ma. <sup>18</sup> Engú bini, 'kpa sundjo yi ngíta belegú de bini. <sup>19</sup> I dú me yi nde alú kpekpeke akólo li soso-o, yi sía mukobho na dáduma.»

*Engú inde akólo li Yelusalema*  
(*Tsia bhú Mat. 24:15-21; di ne bhú Mlk. 13:14-19.*)

<sup>20</sup> «Nedhinga yi aú lie me osudha asa Yelusalema ngbalina-a, yi de mbila me, nakpi kaka-a akolo masakpe. <sup>21</sup> Abhomú-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gúdhú-o, a ayo matá de me u li abhú gúdhú-o de. <sup>22</sup> Padhá de, anga adú ekpí nakodho 'ngú gba Ebhe ngubula me ndú 'ngú hana inde u aye e bhú Bhuku gba Ebhe-e , amene lie. <sup>23</sup> Li 'kpí ango-o, adú likabhu na ngbéngbé pi olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pi uo. <sup>24</sup> U abhíli okoko ne ombotia. U tsia mbá okoko bhú bali ne ndú bíli hana. Omupagano adédele Yelusalema ne 'dhú o akólo bha bini li nedhinga gba uo andjia lie ko.»

*Nakolo ka sokpí*  
(*Tsia bhú Mat. 24:29-31; di ne bhú Mlk. 13:24-27.*)

<sup>25</sup> «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú ati má ngbi ngbi ngbi ne tsulú ka tolo, di ne ka li 'ngbé 'ngu adú adimba lie ko! <sup>26</sup> Okpála amú ne tsulú ka nabhundja engú inde akólo píla doto libhomu-o, anga ndú 'he na abhúlá hana adyíki má djigi djigi! <sup>27</sup> Pipíta-a, u tsia ú ma ngama, Ndíli gba kpála, me ma nde ngago

bhú ndindi ne angu di ne asasaua gba ma-a hana.† <sup>28</sup> Nedhinga li ongu ango-o ahólo amene lie lie, yi de lu kpekpeke, amba yi 'e 'ndji yi ne abhúlá, anga ekpí li Ebhe akóbho yi lie akolo masikpe.»

*Gbitaku pindji ndula na figi*  
(Tsia bhú Mat. 24:32-35; di ne bhú Mlk. 13:28-31.)

<sup>29</sup> Pipita-a, Yesu atsia apa gbitaku inde-e pi uo me: «Yi tsia nga ndula na figi di ne ondula koko hana. <sup>30</sup> Yi u me 'kpá 'kpá aholo nakə-o, yi mbila me gboko 'kpí akolo masikpe. <sup>31</sup> A bhadi moko, nedhinga yi aú ongu bhomu-o lie ngakolo-o, yi de mbila me Nau gba Ebhe-e akolo masikpe. <sup>32</sup> Ma apa pi yi na paká me, ndu 'ngú bhomu-o hana akólo me okpála na naki inde-e nde mu nga ndu o hana de. <sup>33</sup> Ekpí ne doto akódho 'kpí makodho. Engú bini, 'li ma kódho 'kpí belegu de bini.»

*Yi lila liyi malila*

<sup>34</sup> «'E-e! Yi lila liyi uu! Yi adú abhundja bha engú na anokomia, ne engú nalangba ne pandi di ne ongangá 'ngú na doto inde-e de. I du mo-o, li ekpí li ngama, Ndili gba kpála, ma agó lie, i kólo li yi bhú gbilikiti, <sup>35</sup> maka ekú ahoholo onu lie ko. Padhá de, anga ahólo okpála píla doto libhomu. <sup>36</sup> Yi alá-a de. Yi du nayo Ebhe ndu nedhinga hana, ngubula me yi sia angu ngú nakpe ndu 'ngú inde akólo hana, amba yi koto ngú nalu kala ma, Ndili gba kpála-o.»

<sup>37</sup> Ne ngbikpi-e, Yesu adu asuno bhú 'ngbé 'ti Ebhe gba omaYuda-o. Tagolo, ani atsia adu anu asi apí 'ta na ondula na Olive. <sup>38</sup> Ndu okpála hana adu ago bhú sikikpi bhú 'ngbé 'ti Ebhe ngú nadjé ani.

† 21:27 21:27 Tsia bhú Dan. 7:13.

## 22

*Ongámási gba omaYuda agili nabhøø Yesu*

(Tsia bhú Mat. 26:1-5; ne bhú Mlk. 14:1-2; di ne bhú Dja. 11:45-53.)

<sup>1</sup> Ekpí na anokomia na Pasika , ekpí ayo di lie me u zu mapa inde li levile nde bhú e ade-e, akolo masikpe. <sup>2</sup> Ongbengbe odimandø gba Ebhe di ne omusuno na líli gba Moidje adu agili kpadji ngú nabhøø Yesu. Engú la bini, u adu adje tsalu ka okpála.

<sup>3</sup> Pipita-a, Satana ali li bua Yuda inde u a'i e me Isikaliote, suka obhulu titima ndjikpa ne ká bhisi gba Yesu-o. <sup>4</sup> Abhomu-o, ani anu nadjé lie ne ongbengbe odimandø gba Ebhe di ne ongámási gba okpála nalila 'ngbé 'ti Ebhe gba omaYuda. Ani anu nakpokpo ne uo maka ani apú Yesu lie pi uo ko. <sup>5</sup> U akpi djali naali, u atsia adje lio sunda o me o há pi ani falanga. <sup>6</sup> Yuda aziba. Ani atsia aholo agili nedhinga na ndjindji ngú napu Yesu pi uo me, okpála nde de uo ade.

*Yesu atima okpála me, u nu po bhúla ezu na anokomia*

(Tsia bhú Mat. 26:14-16; ne bhú Mlk. 14:12-21; di ne bhú Dja. 13:21-30.)

<sup>7</sup> Ekpí na anokomia nazu mapa inde li levile nde bhú e ade-e akolo. A adu di ekpí inde ayo lie me u bhøø folo kandøø ngubula anokomia na Pasika-o. <sup>8</sup> Yesu atima Piele ne Dja . Ani pi uo me: «Yi nu leke ndu 'ngú hana pi ní ngú anokomia-o.» <sup>9</sup> U atsia ayi ani me: «Mo okunda me ya nu leke su?» <sup>10</sup> Ani agie pi uo me: «Yi djedje, yi alí lie bhú Yelusalema-a, yi atú liyi ne bhoko bini me ani nde abi lusa 'ngu pí 'ndji e. Yi kpata ani bhú eti inde ani alí bhú e-o. <sup>11</sup> Yi yi bhulu eti ango-o me: «Musuno ngayi mu me, tina 'ti inde ma azú anokomia ne omukpata gba ma-a bhú e ngae dho?» <sup>12</sup> Ani

asúno 'ngbé tina 'ti bhe na abhúlá-a pì yi bini. Ndú 'he hana bhúbhú. Yi leke ehe na anokomia bhúbhú.»  
<sup>13</sup> U agbida, u abhaka ndú 'ngú hana maka li Yesu apa lie ko. Abhomu-o, u atsia aleke ezú na anokomia-o.

*Yesu aha mapa ne vino pì obhulú titima*

*(Tsia bhú Mat. 26:26-30; ne bhú Mlk. 14:22-26; di ne bhú 1 Kol. 11:23-25.)*

<sup>14</sup> Li nedhinga ango-o akolo lie, Yesu ne obhulú titima gba e atsia adúlú kuto ngú nazú 'he-o. <sup>15</sup> Aní apa pì uo me: «Ma adú nako ne gumu naali me ní zú anokomia inde e ne yi bhú dabilí bini kala me ma dje líkabhu ko! <sup>16</sup> Padhá de, anga ma apa pì yi me, ma zú matá-a de, akólo li nedhinga inde li tata-a asúno lie lie bhú Nau gba Ebhe ko.» <sup>17</sup> Abhomu-o, aní aha kópo na vino-o, aní agie heni pì Ebhe. Aní atsia apa me: «Yi haha, amba yi ndjì ndú yi hana. <sup>18</sup> Ma apa pì yi me, ma ndjì matá-a de akólo li nedhinga inde li Nau gba Ebhe-e agó lie ko.» <sup>19</sup> Pípita-a, aní aha mapa-o, aní agie heni pì Ebhe. Aní agumu bhusu bhusu, aní aha pì uo. Aní atsia apa me: «A inde-e kute ma [inde aha lie pì yi-o. Yi dú amemene moko, ngubula nabhundja ma.» <sup>20</sup> Pita u andjia nazú 'he bhomu-o lie, aní aha di kópo na vino-o pì uo, aní atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pì yi-o.]

<sup>21</sup> Engú bini yi tsitsia, kpála inde apú ma-a, aní ngazú 'he ne ma bhú dabilí bini sí! <sup>22</sup> Padhá de, anga a ayo me ngama, Ndílí gba kpála-a, ma kpi maka li Ebhe apa lie ko. Engú la bini, a ko líkabhu naali pì kpála inde apú ma ko!» <sup>23</sup> Abhomu-o, u atsia aholo ayi lío sánda o me, a ko kpála bhedho bhú ka o inde i tí da namene 'ngú bhomu-o.

*Ane ne engbé da?*

<sup>24</sup> Pípita-a, omukpata aholo amene kpekebhe sánda o ngú nambila me

ane ne engbé bhú ká o da. <sup>25</sup> Yesu atsia apa pì uo me: «Ongbengbe ongámási gba omupagano-o ngaha líli pì okpála gba o-o. Obhende ngatsia 'kpí li doto-o kúnda me u 'i o me <Obabadha okpála.> <sup>26</sup> Pì yi-e, yi améne mo-o de. Engú bini, a ayo me kpála inde ane ne engbé bhú ká yi-e dú maka mboye ndílí, amba kpála inde ngatsia 'kpí li okpála koko-o, dú naae maka kpála na kulu gba uo-o. <sup>27</sup> Padhá de, anga ane ne engbé da, ne me a ko kpála inde ngazú 'he? Ne me a ko kpála inde ngamene kulu kulu-o. A ko kpála inde ngazú 'he-e di? La-a, ma bhú ká yi maka kpála na kulu gba okpála koko.

<sup>28</sup> Ngayi obhulú titima gba ma-a, ní adú ne yi ndú 'kpí hana bhú nedhinga inde ma adú adje líkabhu gba ma-a lie ko. <sup>29</sup> Kaka-a, ma ahá Nau pì yi maka li 'Dyi ma aha di múma lie ko. <sup>30</sup> Abhomu-o, yi azú 'he, yi tsia ndjì di vino ne ma bhú dabilí bini, i dú me ma nde alí bhú Nau gba ma-o. Yi adúlú di pí odabilí na ngámá ngú nakodho 'ngú gba opiga ndjikpa ne ká bhisi gba omafosalaele ko.»

*Yesu apa pì Piele me: «Mo oyála ma»*

*(Tsia bhú Mat. 26:31-35; ne bhú Mlk. 14:27-31; di ne bhú Dja. 13:36-38.)*

<sup>31</sup> Pípita-a, Ngámá Yesu atsia apa me: «Simo, Simo, djedje nga! Ebhe aha kpadjì pì Satana me aní pe yi maka u apepe mapunga lie ko. <sup>32</sup> Engú bini, ngama-a, ma ayo Ebhe ngú mú, amba mo o'ó ká nabhuka gba mú-o de. Mo odjì matá bua mú lie, mú de ha di angu pì ondaise mú uu.» <sup>33</sup> Piele apa pì aní me: «Ngámá, ma bedhe me, abana i dú nanu bhú tikpu di ne nakpi-e, ní nú ne mú bhú dabilí bini.» <sup>34</sup> Yesu agie pì aní me: «Piele, ma apa pì mú me, sukpe na naki inde-e, kala me engu ku 'gbá-a, mo opá bhutsibhutsi bata me ní mbila ma de.»

*Yesu apa pi omukpata gba e me, u leke lio ngubula egú*

<sup>35</sup> Pipita-a, aní atsia ayi uo me: «Nedhinga nako ma atima yi lie mandí tia-a, mandí gonia ne maløkø-o, ehe bini aneke nako ka yi uu?» U agie me: «Ehe bini neke ka ya de.» <sup>36</sup> Do aní pi uo me: «Mbia inde-e, kpála bhende lí tia ne gonia nde ka e-e, a ayo me aní haha. Kpála bhende lí mbotia nde ka e ade-e, a ayo me aní tsindji koti gba e-o, amba aní kala mbotia ne di. <sup>37</sup> Padhá de, anga ma apa pi yi me, engú inde u aye e bhú Bhuku gba Ebhe-e me, «U ato aní bhú ká okpála na sisiti-e», a ayo me amene lie lí kute ma. A moko, engú inde atsia ma-a, a adji amene lie.†» <sup>38</sup> Omukpata atsia apa me: «Ngámá, a ka ya si ne ombotia bhisi.» Aní atsia agie pi uo me: «Ale.»

*Yesu anu nayo Ebhe pí eta na ondula na Olive*

*(Tsia bhú Mat. 26:36-46; di ne bhú Mlk. 14:32-42.)*

<sup>39</sup> Pipita-a, Yesu akoto. Aní anu apí eta na ondula na Olive\* maka aní adu amemene lie ko. Omukpata gba aní atsia akpata di aní. <sup>40</sup> U akolo lie oo, aní atsia apa pi uo me: «Yi yo Ebhe, amba yi alí bhú nale de.» <sup>41</sup> Aní ayie de uo, aní adyudyo mbo lie tsutsu masudha. Aní akikita lipuku e kuto, aní atsia ayo Ebhe me: <sup>42</sup> «'Dyi ma, i du me mu nde akunda-a, mu de 'e likabhu inde-e de ma tsutsu. La-a, mo oméne maka ma akunda lie de, mene mangbo maka mo okunda lie ko.» [ <sup>43</sup> Abhomu-o, andjelu bini ayie abhúla, aní akoto lí aní, aní atsia aha angu pi aní. <sup>44</sup> Aní abedhe lie ne likabhu-o, aní atsia aholo matá nayo Ebhe kpekpeke naali. Ngufu na kute aní akolo maka ngute, a atsia adu ayi kuto má ta ta ta!]

<sup>45</sup> Pita lí aní a'o nayo Ebhe lie, aní ayie bhúla, aní agie lie ade omukpata. Aní abhaka me u nde

atuko ne ela ka likabhu. <sup>46</sup> Aní atsia apa pi uo me: «Yi atuko ne ela ka ní? Yi yie bhúla, amba yi yo Ebhe, ngubula me yi alí bhú nale de.»

*U aholo Yesu*

*(Tsia bhú Mat. 26:47-56; ne bhú Mlk. 14:43-50; di ne bhú Dja. 18:3-11.)*

<sup>47</sup> Lí nedhinga lí Yesu adu apa 'ngú bhomu-o lie, Yuda saka obhulu titima ndjikpa ne ká bhisi-e ago ne bhiti okpála. Aní adyudyo lie de Yesu masikpe ngubula me ní nvu pabhø aní. <sup>48</sup> Abhomu-o, Yesu atsia apa pi aní me: «Mu nganvu pabhø ma, Ndili gba kpála, ngubula napu ma-a?»

<sup>49</sup> Lí omukpata gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?» <sup>50</sup> Saka uo asu kpála na kulu gba bhele kpála gba odimandø gba Ebhe-o . Aní atsia akodho kpadje aní lí pápá na kokpa-a má tse! <sup>51</sup> Engú bini, Yesu atsia apa me: «Yi 'o'o, a apise moko.» Aní aha kpadje kpála ango-o, aní a'o 'kpa e tété, aní atsia akobho aní.

<sup>52</sup> Pipita-a, Yesu atsia apa pi ongbengbe odimandø ne ongámási gba omulila na 'ngbé 'ti Ebhe gba omaYuda, di ne obhelesi okpála inde ago ngú naholo aní-e me: «Ka ní yi ago ngú ma lie ne ombotia, di ne ondula mugito me yi ago ngú naholo bhulu 'zi-e? <sup>53</sup> Ní adu nako ne yi ndu 'kpí hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na bitio.»

*Piele apa me ni mbila Yesu de*

*(Tsia bhú Mat. 26:57-58, 69-75; ne bhú Mlk. 14:53-54, 66-72; di ne bhú Dja. 18:12-18, 25-27.)*

<sup>54</sup> Abhomu-o, u aholo Yesu, u anu ato aní bhú 'ti gba bhele kpála gba odimandø gba Ebhe-o. Piele adu akpata uo mbo tsutsu. <sup>55</sup> A abhaka

† 22:37 22:37 Tsia bhú Isa. 52:12. \* 22:39 22:39 Eta na ondula na Olive-e asangba gudhu na Yelusalema.



me u nde akpo djua tɔ mbadhasɔ, okpála aduɔ dede. Piele atsia ago adu bhú ká uo. <sup>56</sup> Kpála na kulu bini na ɔlɔ au ani li zi djua me ani nde adu kuto. Ani atsia Piele ne kpéke djila, ani me: «Kpála inde-e dɔ di nako ne ani bhú dabili bini!» <sup>57</sup> Engú bini, Piele ayala, do ani de-e: «Ma ambila ani de, ɔlɔ-e.» <sup>58</sup> Pita nedhinga bedi-e, bhoko bini au ani, ani atsia apa me: «Ngamɔ di-e, mɔ ne sɔka okpála gba Yesu-o!» Engú bini, Piele atsia agie me: «Bhoko-e, ma ne sɔka uo ade.»

<sup>59</sup> Pipita abhue mbo ngengele. Bhoko koko atsia azi kekele tété me: «A ko kɔkɔlɔ 'ngú, kpála inde-e dɔ nako ne Yesu bhú dabili bini, anga a ko di kpála na Galilaya.» <sup>60</sup> Engú bini, Piele agie pi bhoko ango-o me: «Bhoko-e, ma mbila 'ngú inde mɔ ngapa e de.» Bha li nedhinga inde ani adu apapa lie, engu atsia aku 'gbá. <sup>61</sup> Ngámá Yesu adji bhúla e, ani atsia bhúla Piele. Abhomɔ-o, Piele atsia abhundja engú inde li ngámá Yesu apa iginí e pi ani-o me: «Sukpe na naki inde-e, kala me engu ku 'gbá-a, mo opá bhutsibhutsi bata me ni mbila ma de.» <sup>62</sup> Piele akoto kilidjo, ani abhɔlɔ kuo e ne egbá má kusu!

*U asobho Yesu, u atsia abhi di ani (Tsia bhú Mat. 26:67-68; di ne bhú Mlk. 14:65.)*

<sup>63-64</sup> Okpála inde adu alila Yesu-o aholo amɔ ani. U agbite djila ani. U aholo abhi ani. U atsia adu ayi ani me: «Aa! Ngamɔ, polofeta-a, pa nga pi ya me asu mɔ da!» <sup>65</sup> U asosobho ani. U atsia apa di ongú koko pi ani bhelé bhú osobho inde u adu asosobho ani ne e ko.

*Odimandɔ akodho 'ngú gba Yesu (Tsia bhú Mat. 26:59-66; ne bhú Mlk. 14:55-64; di ne bhú Dja. 18:19-24.)*

<sup>66</sup> Li ekpí aseke lie, obhelesi okpála gba omaYuda apəkəbhə bhúla o bhú dabili bini ne ong-bengbe odimandɔ gba Ebhe, di ne

omɔsuno na líli gba Moidje-o. U atsia agbe ani kala Libi okpála natsia 'kpí li 'ngú gba omaYuda-o. <sup>67</sup> U ayi ani me: «Í dɔ me mɔ nde ne Masiya-a, mɔ de pa pi ya.» Abhomɔ-o, ani agie pi uo me: «Í dɔ me ma nde apa pi yi-e, yi bhúka de. <sup>68</sup> Í dɔ la di me ma nde ayi yi li 'ngú-o, yi gíe 'ngú mɔma tété de. <sup>69</sup> Nayie pi mbia inde-e, ngama, Ndili gba kpála-a, ma adú li pápá na kokpa gba Ebhe na angu-o.†» <sup>70</sup> Abhomɔ-o, ndu uo hana atsia ayi me: «Bhobhomɔ-o apa me mɔ ne Ndili gba Ebhe?» Ani agie pi uo me: «A maka yi apa lie ko.» <sup>71</sup> Abhomɔ-o, u atsia apa me: «Ní matá ne gumɔ okpála koko inde i tí da napa engú ango-o pi ní ade, anga ní adje bha nganí makpe bhú 'li ani adje!»

## 23

*U anɔ ne Yesu kala Pilatɔ (Tsia bhú Mat. 27:1-2, 11-14; ne bhú Mlk. 15:1-5; di ne bhú Dja. 18:28-38.)*

<sup>1</sup> Pipita-a, ndu okpála hana inde adu bhú dá bula-a ayie bhúla, u atsia anɔ ne Yesu kala Pilatɔ, ngámá na Loma. <sup>2</sup> Oo, u aholo apa li Yesu me: «Ya abhaka kpála inde-e me ani nde ngaha kpéke 'ndji pi okpála gba ya-o. Ani nde ngayoko uo me u akala mandjandja gba Kaisala, 'ngbé ngámá na Loma-a de. Ani atsia adu apa di me ni ne Masiya, akunda napa me 'ngbé ngámá.»

<sup>3</sup> Pilatɔ ayi ani me: «Ngamɔ-o, mɔ ne 'ngbé ngámá gba omaYuda?» Yesu agie pi ani me: «Mo opa ngamɔ.» <sup>4</sup> Abhomɔ-o, Pilatɔ atsia apa pi ongbengbe odimandɔ di ne bhiti okpála bhomɔ-o me: «Ma u engú bini inde a ayo me u holo kpála inde-e ngú e de.» <sup>5</sup> Engú bini, u azi bha kekele tété me: «Bhú nasuno gba ani-e, ani ngaha kpéke 'ndji pi okpála me u améne líli gba ngámá-a de. Ani amene bhú doto gba omaYuda libhomu. Ani akpo bhú

† 22:69 22:69 Tsia bhú Ets. 110:1.

ndu doto na Galilaya. Mbía inde-e, aní akolo íbili ne dí ei.»

*U anụ ne Yesu kala ngámá Elode*

<sup>6</sup> Lí Pilatè adje lie mo-o, aní atsia ayi me: «Kpála inde-e, a ko kpála na Galilaya?» <sup>7</sup> U agie pí aní me: «A moko, a ko kpála na Galilaya.» Abhomu-o, lí Pilatè adje lie me Yesu ayie bhú ndu doto lí ngámá Elode adu alila e-e, aní atsia atima aní pí aní. Padhá de, anga bhú ekpí angoo, Elode adu di bhú Yelusalema oo. <sup>8</sup> Elode akpi djali naali lí aní au Yesu lie. Padhá de, anga nayie nani didili naali, aní adu akunda me ní u Yesu ka engú gba aní inde aní adu adje e-o. Aní atsia adu akunda nau aní me aní nde ngamene ngamba 'ngú. <sup>9</sup> Aní ayiyi Yesu lí ongú bhelé. Engú bini, Yesu gie 'ngú pí aní tété belegu de bini. <sup>10</sup> Ongbengbe odimandè di ne omusuno na líli gba Moidje adu oo. U adu apa 'ngú lí kute aní sítí naali. <sup>11</sup> Elode ne osudha gba e amu aní, u atsia asosobho di aní. Pipita-a, u adyi bádha bongo lí aní, u atsia agie aní pí Pilatè. <sup>12</sup> Kalanuo, Elode ne Pilatè du nadje lio de. Nayie lí 'kpí angoo, u atsia akolo bhú makpolia.

*U akodho 'ngú gba Yesu me aní kpi bha makpi*

(Tsia bhú Mat. 27:15-26; ne bhú Mlk. 15:6-15; di ne bhú Dja. 18:39 - 19:16.)

<sup>13</sup> Abhomu-o, Pilatè apo bhúla ongbengbe odimandè, ongámási gba omaYuda di ne okpála. <sup>14</sup> Aní atsia apa pí uo me: «Yi ago ne kpála inde-e muma me aní ngaha kpéke 'ndji pí okpála. La-a, ma ayi aní lí 'ngú angoo kala yi si, ma u aní ne sítí 'ngú belegu de bini bhú ká ndu 'ngú hana inde yi apa e lí aní-o. <sup>15</sup> Elode u di sítí 'ngú ka aní de anga aní agie aní pí ní ei. A moko me kpála inde-e mene sítí 'ngú belegu de bini inde u ti da nabhèlè aní ka e ko. <sup>16</sup> Kaka-a, ma abhí aní ne fimbo, ma atsia tsé 'kpa lí aní.» [<sup>17</sup> Bhú ndu anokomia na Pasika hana, a ayo me

Pilatè tse 'kpa lí kpála inde u aholo e bhú tikpu-o pí uo bini.]

<sup>18</sup> Engú bini, ndu uo hana aholo asusula bhú dabilí bini me: «Bhèlè kpála bhomu-o mabhèlè, amba mu tse 'kpa lí Balaba pí ya!» <sup>19</sup> (U aholo nani Balaba bhú tikpu anga aní agbe nani kpéke 'ndji abhú Yelusalema, aní atsia abhèlè di kpála.) <sup>20</sup> Pilatè adu akunda natse 'kpa lí Yesu. Kaka-a, aní atsia ayi matá uo lí 'ngú angoo ko. <sup>21</sup> Engú bini, u aholo bha nasusula me: «Gí aní lí kulusi! Gí aní lí kulusi!» <sup>22</sup> Bhutsibhutsi na bata-a, aní apa pí uo me: «Aní amene la mangua sítí 'ngú dho? Ma u engú inde aní amene e, u ti da nabhèlè aní ka e de. Ma abhí bha aní ne fimbo, ma tsia tsé 'kpa lí aní.»

<sup>23</sup> Engú bini, u azi bha kekele tété kpekpeke me, a ayo me u gí Yesu lí kulusi. U adu bha a'é'e 'lí o ne bhúlá, akolo lí nedhinga lí 'lí uo aha angu Pilatè lie ko. <sup>24</sup> Abhomu-o, Pilatè atsia aziba namene maka u adu akukunda lie ko. <sup>25</sup> Aní atsia atse 'kpa lí kpála inde u adu ayo e-o, kpála inde u aholo e bhú tikpu-o. Padhá de, anga aní agbe kpéke 'ndji, aní atsia abhèlè di kpála. Engú bini, aní atsia aha Yesu pí uo me u mene ne aní maka u adu akukunda lie ko.

*U anụ ne Yesu ngú nabhèlè aní*

(Tsia bhú Mat. 27:32-44; ne bhú Mlk. 15:21-32; di ne bhú Dja. 19:17-27.)

<sup>26</sup> Lí osudha adu anu ne Yesu lie, u akè lio ne Simo, kpála na ndu doto na Silene, me aní nde ayie abhiye. U aholo aní, u atsia a'o kulusi gba Yesu-o lí 'ngbu aní me, aní bibi amba aní kpata Yesu ne di.

<sup>27</sup> Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú aní-o. <sup>28</sup> Yesu adji bhúla e ne apí uo, aní atsia apa pí uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egbá ngú yi ne ongisi gba yi ko. <sup>29</sup> Padhá de, anga oekpí koko akólo makolo, oekpí inde u apá lie me: «A ko djali

pi olisi inde i zu de, inde i bi 'bhi de, di ne obhende li ongisi ndji 'ka o de-o!»<sup>30</sup> Li nedhinga bhomu-o, okpála ahólo napa pi ongbengbe 'ta me: <Yi buku ya!» U tsia pá pi odjedje 'ta me: <Yi wo ya!»†<sup>31</sup> Padhá de, anga i dũ me okpála nde amene ndula bhe na yiyi-e mo-o, u méne la ibili naae ndula bhe na keke-e pi?»\*

<sup>32</sup> Li nedhinga bhomu-o, u anũ di ne obhosi bhisi koko inde amene sisiti 'ngú naali me u bhili uo bhú dabili bini ne Yesu.

### *U agi Yesu li kulusi*

*(Tsia bhú Mat. 27:45-56; ne bhú Mlk. 15:33-41; di ne bhú Dja. 19:28-30.)*

<sup>33</sup> U akolo li bili inde u a'i e me «Pelegendji.» U atsia agi Yesu li kulusi di ne okpála na sisiti bhisi-o, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. <sup>34</sup> [Abhomũ-o, Yesu atsia apa me: «'Dyi ma, mbu li siti 'ngú gba uo, anga u mbila engú inde u ngamene e de.»]

Osũdha agu gbanda ngú nagapa obongo gba ani-e li o. <sup>35</sup> Okpála adũ oo, u adũ atsia engú inde adũ akodho 'kpí-o. Ongámási gba omaYuda adũ amũ ani. U atsia adũ apa me: «Ani akobho okpála koko. A ayo me ani kobho di lie ne titi e, i dũ me ani nde ne Masiya inde li Ebhe abhũ e ko!»<sup>36</sup> Osũdha amũ di ani. U adyudyo lio masakpe, u aha kpongadha pandi pi ani, u atsia apa me: <sup>37</sup> «I dũ me mũ nde bha ndjũ ne 'ngbé ngámá gba omaYuda-a, mũ de kobho limũ ne titi mũ!»<sup>38</sup> Pí 'ndji ani-e, u aye me: «A INDE-E 'NGBÉ NGÁMÁ GBA OMAYUDA-O.»

<sup>39</sup> Sũka okpála na sisiti inde u agi o li kulusi adũ asobho ani me: «Mũ ne Masiya adi? Kobho limũ ne titi mũ, amba mũ kobho di ya!»<sup>40</sup> Engú bini, bhe koko ambe bhú 'ndji ani, do ani de-e: «Mũ kpe Ebhe di, ngamũ inde ngasia bhadi likabhu maka ani-e?»<sup>41</sup> Pi ní-e, a li likabhu gba ní-e ne

tata, anga ní ngasia bhomu-o mbini kulu gba ní ko. La-a, ngaani-e, ani mene naae siti 'ngú belegũ de bini.»

<sup>42</sup> Pipita-a, ani atsia apa pi Yesu me: «Bhundja ma uu, li nedhinga inde mo ogó lie ngú nau ngámá gba mũ ko.»<sup>43</sup> Yesu agie pi ani me: «Ma apa pi mũ na paká me, naki-e, ní adũ ne mũ bhú dabili bini bhú kuti na mũndeyi ko.»

### *Yesu akpi*

<sup>44</sup> A akolo masakpe de tulukpe, ela a'o nasũ. Biti aha pĩla doto libhomu akolo li saa na bata pita tulukpe. <sup>45</sup> 'Ngbé 'kpá bongo inde adũ agbo bhũsũ 'ngbé 'ti Ebhe gba omaYuda asidha bhũsũ e tutũ má tsue!<sup>46</sup> Abhomũ-o, Yesu atsia asũla kpekpeke me: «'Dyi ma, ma nga'o bua ma sa 'kpa mũ.» Pita ani apa engú bhomu-o lie, ani atsia andala 'kpa li bua e. <sup>47</sup> Li ngámá gba osũdha na Loma au engú inde akodho 'kpí-e lie, ani atsia adũ adhøgø Ebhe me: «A ko paká me kpála inde-e bha ndjũ nako ne kpála na ngbingbili!»<sup>48</sup> Ndũ okpála hana inde ago apo bhũla o ngú natsia engú ango-o, au engú inde akodho 'kpí-o. U atsia adũ agie lio agba o me u nde abubu 'kpa o pí 'ka o ka likabhu. <sup>49</sup> Ndũ obi Yesu hana di ne olisi inde adhũkũ ne ani bhú dabili bini nayie bhú Galilaya-a, alũlũ mbo tsutsu. U adũ natsia engú inde adũ akodho 'kpí ko.

### *U azi Yesu*

*(Tsia bhú Mat. 27:57-61; ne bhú Mlk. 15:42-47; di ne bhú Dja. 19:38-42.)*

<sup>50-51</sup> Kpála bini adũ nani oo. A adũ 'li ani me Djodjefũ, kpála na Alimaté, sũka gũdhũ gba omaYuda. A ko nani kpála na babadha inde adũ di ngbingbili. Ani adũ nani nadjeke nago ka Nau gba Ebhe pĩla doto. A ko nani sũka Libi okpála natsia 'kpí li ongú gba omaYuda-o. Engú bini, ani dũ azĩba engú

† 23:30 23:30 Tsia bhú Oz. 10:8. \* 23:31 23:31 Ndula bhe na yiyi-e, a ko Yesu. Ndula bhe na keke-e, a ko okpála.

inde li Libi okpála natsia 'kpí li onǵú gba omaYuda adu abhundja e di ne namene e li Yesu-o de. <sup>52</sup> Ani anu abhaka Pilate, ani atsia ayo kuo Yesu ka ani. Pilate aziba. <sup>53</sup> Pipita-a, ani atsia a'e kuo ani li kulusi-o. Ani agagala ne bongo. Ani atsia ato bhú lata inde u adjí e bhú teme, lata inde u zi nga kpála bhú e kalanu de. <sup>54</sup> A adu nani 'kpí kulu bhuluvue, masikpe de ekpí nagueo .

<sup>55</sup> Olisi inde ayie nani ne Yesu bhú Galilaya-a, anu bhú dabili bini ne Djodjefu. U atsia lata-o, u au maka u a'o kuo Yesu lie bhúbhú-o. <sup>56</sup> Pipita-a, u agie lio agba o. U atsia aleke emu, di ne mungotsi ngubula me sisi-e, u nu pulu kute kuo-o ne di. Li 'kpí nagueo-o, u atsia aguo maka li líli apa lie ko.

## 24

*Yesu azuku*  
(*Tsia bhú Mat. 28:1-10; ne bhú Mlk. 16:1-8; di ne bhú Dja. 20:1-10.*)

<sup>1</sup> Bhú 'kpí yinga kèkpí má bhé-o, olisi aha mungotsi inde u agili e-o, u atsia agbida abhú lata. <sup>2</sup> U abhaka me teme nde awawala li 'bhé lata-a awawala. <sup>3</sup> U ali lie, u bhaka kuo Ngámá Yesu de. <sup>4</sup> Nedhinga u adu akiaka lie ka 'ngú ango-o, kolo me-e okpála bhisi aze li uo. Okpála ango-o adyidiyí bubu bongo má tuu tuu! <sup>5</sup> U adu la lie ne tsulu naali-e, u atutu bhúla o ne kuto. Okpála ango-o atsia apa pi uo me: «Yi ngagili kpála inde nu-o bhú ká okpála inde amu-o ka ni? <sup>6</sup> Ani sii ade. Engú bini, ani azuku. Yi bhundja engú nako ani apa e pi yi li nedhinga inde ani adu nga bha lie bhú Galilaya me: <sup>7</sup> «A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpí na bata-a, ma tsia zuku.» <sup>8</sup> Abhomu-o, u atsia abhundja 'li ani-o.

<sup>9</sup> U ayie bhú lata-o. U atsia anu nakpokpo ndu 'ngú bhomu-o hana pi obhulu titima ndjikpa ne ká bini, di ne ndu obhende adu ne uo bhú

dabili bini-e hana. <sup>10</sup> Olisi ango-o, adu nani Malia , kpála na gudhu na Magadala, Djaani ne Malia , 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. <sup>11</sup> Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. <sup>12</sup> Engú bini, Piele ayie bhúlá, ani anu ne holo abhú lata. Ani akolo lie oo, ani akita ne kuto, ani atsia 'kpí, ani au bha bongo inde u agagala kuo ne e ko. Pipita-a, ani agie lie agba e me ani nde ngangamba naali ka engú inde akodho 'kpí ko.

*Yesu akoto li omukpata bhisi li kpadji na Emausi*  
(*Tsia bhú Mlk. 16:12-13.*)

<sup>13</sup> Bha li 'kpí ango-o, omukpata bhisi adu anu bhú kuti bini inde u a'i e me Emausi. Kutí ango-o adu de Yelusalema tsutsu, masikpe de kilometele ndjikpa ne ká bini. <sup>14</sup> U adu akpokpo 'ngú sánda o pindji ndu 'ngú hana inde akodho 'kpí-o. <sup>15</sup> Nedhinga uo adu akpokpo 'ngú di ne namene kpekebhe lie sánda o-o, ngaani Yesu makpe, ani adyudyo lie de uo masikpe. Ani atsia aholo 'nú ne uo bhú dabili bini. <sup>16</sup> U adu au ani, engú bini, ehe bini adu amene me u ambíla ani de. <sup>17</sup> Ani ayi uo me: «A ko mangua 'ngú dho yi adjí ne kpokpo e sánda yi me-e?» Abhomu-o, u alu, u atsia abedhe ne likabhu bedhe.

<sup>18</sup> Saka uo bini inde adu 'li e me Keleopasi apa pi ani me: «Bhú ká ogomago na Yelusalema libhomu-o, engú inde akodho 'kpí sánda okpí inde-e, mu mbíla bha de ngamu kpi mu kpi?» <sup>19</sup> Ani ayi uo me: «Mangua 'ngú dho?» U atsia agie pi ani me: «Engú inde akolo li Yesu, kpála na Nadjaleta! A ko nako polofeta kukulu. Ongú inde ani amene e ne bhende ani asuno e, ani amene ndundu hana ne angu. Ani atsia asuno ongú ango-o kala Ebhe

di ne kala ndu okpála hana. <sup>20</sup> La-a, ongbengbe odimandø gba Ebhe di ne ongamási gba ní-e, apu ani me u bhøle ani. U atsia agi ani li kulusi.

<sup>21</sup> La-a, ya adu nako ne 'to ya naaya me, a ko kpála inde agbègbe Isalaele bhú bali-o. Engú bini, a ane naki ekpí bata maka li oengú ang-o akodho 'kpí lie ko. <sup>22</sup> La matá di-e, ya angamba ka olisi koko bhú ka ya naali. U anu igini bhú sikikpi abhú lata. <sup>23</sup> Engú bini, u u kuo ani de. U agie lio, u apa pi ya me oandjelu aze lio. Oandjelu atsia apa pi o me ani uu. <sup>24</sup> Pipita-a, okpála koko bhú ká ya anu abhú lata, u atsia abhaka ndu 'ngú hana maka li olisi akpokpo lie ko. Engú bini, ngaani makpe-e, u u ani de.»

<sup>25</sup> Abhomu-o, Yesu atsia apa pi uo me: «Yi ne ongingi! Ka ni yi ngabhuka lie má gala ade ndu 'ngú hana inde li opolofeta-a apa e! <sup>26</sup> A ayo nako de me Kilisito dje likabhu kala me ani li bhú nau na asasaua gba e di?» <sup>27</sup> Pipita-a, ani aholo nakpokpo ndu 'ngú hana inde u apa e pindji ani bhú oBhuku gba Ebhe-e pi uo. Ani akpokpo nayie bhú obhuku gba Moidje akólo bhú obhuku gba ndu opolofeta-a hana.

<sup>28</sup> U akolo lie de kuti inde u adu anu bhú e masakpe-e, Yesu amene mugito me ni adji tsutsu. <sup>29</sup> Engú bini, u atsia apa pi ani me: «Ní si ne yi si, anga ekpí asegele, biti la di ngago.» Ani atsia ali ngú nasi bhú dabili bini ne uo oo ko. <sup>30</sup> Nedhinga ani adu azu 'he lie bhú dabili bini ne uo-o, ani aha mapa, ani agie heni pi Ebhe. Pipita-a, ani agumu mapo-o, ani atsia aha pi uo. <sup>31</sup> Abhomu-o, djila uo abhulu, u atsia ambila ani. Engú bini, ani angita bha kolo bhú djila uo má pele! <sup>32</sup> U atsia aholo nayi lio sunda o me: «Li nedhinga inde ani adu akpokpo 'ngú di ne nasuno ta eli gba Ebhe lie pi ní li kpadji-e, bua ní bedhe igini bhú ní ne djali bedhe di?»

<sup>33</sup> Bha li nedhinga bhomu-o, u ayie bhúlá kolo má gala, u atsia agie lio abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabili bini. <sup>34</sup> U atsia apa pi obhe bhisi bhomu-o me: «Ngamá azuku na kukulu! Simo au ani!» <sup>35</sup> Pipita-a, omukpata bhe bhisi-e atsia akpokpo 'ngú inde akodho 'kpí li kpadji-e pi uo, di ne maka u ambila Yesu lie li nedhinga ani agumu mapa lie ko.

*Yesu asuno lie pi omukpata gba e-o*  
(*Tsia bhú Mat. 28:16-20; ne bhú Mlk. 16:14-18; ne bhú Dja. 20:19-23; di ne bhú Kul. 1:6-8.*)

<sup>36</sup> Li nedhinga u adu nga bha lie nakpokpo 'ngú ang-o, Yesu atsia ala bhú ká uo. Do ani pi uo me: «Guo 'ngú du bhú dabili bini ne yi!» <sup>37</sup> U adje tsulu naali, u atsia aholo aguku, anga u adu abhundja me o ou igbadyibhe. <sup>38</sup> Engú bini, Yesu atsia apa pi uo me: «Yi ngadje tsulu ka ni? Yi ne bua na bhisi bhisi ka ni? <sup>39</sup> Yi tsia nga 'kpa ma di ne 'dhu ma, a ko bha ma makpe. Yi tana nga kute ma, amba yi u, anga mbilika ne biki li igbadyibhe ade maka yi ngau ma lie ne di ko.» <sup>40</sup> Ani apa engú bhomu-o lie, ani atsia asuno 'kpa e di ne 'dhu e pi uo. <sup>41</sup> Li djali di ne nangamba aha angu uo lie naali-e, u tsia bhuka ngaiza de. Ani atsia ayi uo me: «Mbo 'he nazu mazu ka yi si uu?» <sup>42</sup> U atsia aha ndu sungu inde u azi e mazi-e pi ani. <sup>43</sup> Ani aha, ani atsia azu li djila uo oo.

<sup>44</sup> Pipita-a, ani pi uo me: «Ma apa nako pi yi ndjindji nedhinga ní adu nga bha lie bhú dabili bini-e me, a ayo me ndu 'ngú hana inde u aye e pindji ma bhú líli gba Moidje, bhú obhuku gba opolofeta di ne bhú bhuku na oetsi gba ní-e, amene lie.» <sup>45</sup> Pipita-a, ani atsia abhulu imbilangu gba uo ngubula me u mbila ta engú inde u aye e bhú oBhuku gba Ebhe ko. <sup>46</sup> Ani atsia apa pi uo me: «Maka u aye lie

bhú oBhuku gba Ebhe-e me, a ayo me Kilisito dje likabhu, amba ani tsia zuku bhú 'kpí na bata. <sup>47</sup> A ayo me okpála kpokpo 'ngú gba ani-e pi ndu okpála hana pila doto libhomu. U akpókpo nayie bhú Yelusalema me okpála dji bua o, amba Ebhe 'e siti 'ngú gba uo ko. <sup>48</sup> Yi au engú inde akodho 'kpí-e ne djila yi makpe. <sup>49</sup> Ngama-a, ma atíma pi yi bhende li 'Dyi ma apa me ni atíma e-o. Kaka-a, yi du bha bhú gadhú si akólo li 'kpí inde li Ebhe atíma angu pi yi lie ko.»

*Ebhe aha Yesu abhúlá*  
(*Tsia bhú Mlk. 16:19-20; di ne bhú Kul. 1:9-11.*)

<sup>50</sup> Pipita-a, Yesu anu ne omakpata gba e masakpe de kuti na Betania. U akolo lie oo, ani a'e 'kpa e, ani atsia atuko bisagu pí uo. <sup>51</sup> Li nedhinga ani adu atuko bisagu pí uo lie, ani ayie bhú ká uo. Ebhe atsia aha ani abhúlá. <sup>52</sup> Ngauo-o, u adhögö ani. Pipita-a, u atsia agie lio abhú Yelusalema me u nde abedhe ne djali bedhe. <sup>53</sup> Ndu 'kpí hana, u adu nadu bhú 'ngbé 'ti Ebhe gba omaYuda ngú nadhögö Ebhe.

**Bádha Ngali**  
**gba Yesu Kilisito maka li**  
**Djaa**  
**aye lie ko**  
**Eli na kalanu**

Bádha Ngali gba Yesu Kilisito maka li Djaa aye lie ngasuno Yesu maka Eli na duduma gba Ebhe. Eli akolo maka kpála-kuti atsia adu bhú ká ní (1:14). Maka li bhuku ngae makpe ngapapa lie, Bádha Ngali inde aye nani li e ngubula me okpála inde ngatatanga bhuka me Yesu ne Mukobho inde li Ebhe abhu nani e, inde di Ndili gba Ebhe, ngubula me ka nabhuka bhú ani-e, u sia mukobho na duduma (20:31).

U aye engú gba eɔ na zabhe sɔnda oehe bhisi me anga bhú obhuku na didili koko-o, u ye engú ang-o de, okoko atsia aye li obili koko (8:1-11).

Djaa ngagama 'ngú naali pindji mukobho na duduma inde li Ebhe aha e padhá bhú Yesu. A ngakpo lita e naki inde i tsia gó pi obhende ngaziba Yesu maka kpadji, maka kukulu 'ngú, la di maka mukobho. Engú na ngbéngbé inde bhú Bádha Ngali gba Djaa, a ko ngubula nasuno engú inde bhú mukobho gba kpála ngubula ekpi bini ne bini, ngubula nasuno lele kukulu 'ngú na Bu Bhobua : maka engu, maka mapa, maka zi 'kpi, maka mulila gba okandele ne okandele gba e, la di maka vino ne lí e.

**Ongbengbe ongú inde bhú bhuku inde-e ngae inde:**

Eli na kalanu 1:1-18

Djaa bhulu nabatisa okpála, ne omakpata gba Yesu na kalanu 1:19-51

Kulu gba Yesu bhú ká okpála 2:1 - 12:50

Oekpi nasoso gba Yesu abhu Yelusalema 13:1 - 19:42

Nazuku gba Yesu, ne nakoto ka Ngamá li okpála 20:1-31

Eli nasoso: ani akoto matá li okpála abhu Galilaya 21:1-25

*Eli inde zi 'kpi di ne mukobho*

- 1 Nayie li lilita-a, Eli\* adu nani uu. Eli ang-o adu nani bhú dabili bini ne Ebhe. La di-e, Eli ang-o a adu Ebhe.
- 2 Nayie li lilita-a, Eli ang-o adu nani bhú dabili bini ne Ebhe.
- 3 Ebhe atsia abho ndu 'he hana ne Eli ang-o. Ehe bini inde amene lie mandi ani ade.
- 4 Mukobho akoto bhú Eli ang-o. Mukobho ang-o atsia adu zi 'kpi pi okpála.
- 5 Zi 'kpi ngaziga bili bhú biti. Engú la bini, biti ha angu zi 'kpi ang-o de.
- 6 Ebhe atima kpála bini. A adu 'li kpála ang-o me Djaa . 7 Ani ago maka kpála nakpokpo 'ngú. Ani atsia akpokpo 'ngú mbámbá pindji zi 'kpi-o, amba ndu okpála hana bhuka ka ani.† 8 Ngaani makpe-e, ani du nani zi 'kpi de. Engú bini, ani ago nani ngú nakpokpo 'ngú pindji zi 'kpi-o. 9 Zi 'kpi ang-o, a ko nani zi 'kpi na kukulu. A ago píla doto, a ngaziga ndu okpála hana.
- 10 Eli-e adu nani píla doto. Ebhe atsia abho ndu 'he hana ne di. La-a, okpála na píla doto tsia mbila ani de. 11 Eli-e ago nani bhú ká omaha e. Engú bini, omaha ani tsia sia ani de.
- 12 La-a, okpála koko asia ani, u atsia abhuka di ani. Abhomu-o, ani atsia aha angu pi uo me u kolo ongisi gba Ebhe. 13 U kolo ongisi gba Ebhe li kpadji bhende maka u azuzu okpála na doto lie de. A ko la di ka gumu gba bhoko bini de. Engú bini, ayie ka Ebhe.
- 14 Eli-e adji lie, atsia akolo kpála. Ani adu nani bhú ká ní. Ní au sangu gba ani, sangu inde ani asia e ka 'Dyi e-o. A ko sangu gba koli Ndili

\* 1:1 1:1 Eli: Eli-e, a ko Yesu (tsia lukuluku 14). a ko Djaa bhulu nabatisa okpála-o.

† 1:7 1:7 Okpála bhuka zi 'kpi ka ani: Ani inde-e,

bini, inde abedhe ne bádha bua di ne ngbili 'ngú . <sup>15</sup> Djaa‡ akpokpo 'ngú pindji ani mbámbá. Ani atsia asula me: «Engú nani ma apa e me: <Kpála inde ngago pita ma-a, ani ane ma mane. Padhá de, anga nani me ma nde nga ade-e, ani adu bha naae uu.> Ma apa nani engú ango-o pindji ani.» <sup>16</sup> Abhomu-o, bhú bádha bua gba ani inde bedhe-e, ndu ní hana ní atsia asia bádha bua pí bádha bua koko. <sup>17</sup> Padhá de, anga ní asia líli sa 'kpa Moidje . La-a, bádha bua di ne ngbili 'ngú-o, ní asia ka Yesu Kilisito . <sup>18</sup> Kpála bini u Ebhe belegu de bini. La-a, koli Ndili bini inde di Ebhe, inde ngadu de 'Dyi e-e, asuno ani pi ní ngae.

*Djaa bhulu nabatisa okpála akpokpo 'ngú gba Masiya*

*(Tsia bhú Mat. 3:1-12; ne bhú Mlk. 1:1-8; di ne bhú Luk. 3:1-18.)*

<sup>19</sup> A inde-e engú li Djaa akpokpo e, nedhinga li ongámási gba omaYuda na Yelusalema atima odimandø di ne okpála na piga gba Levi lie agba ani-o. U atima uo ngú nayi ani me: «Mu ne da?» <sup>20</sup> Ani yala nagie engú tété de. Ani apa mbámbá me: «Ngama-a, ma ne Masiya ade.» <sup>21</sup> U atsia ayi ani me: «Mu la ne da? Mu ne Eliya?» Djaa agie me: «Ma ne ani ade.» U ayi ani me: «Mu ne polofeta inde ya ngadjeke e?» Ani agie me: «Ma ne polofeta ade.» <sup>22</sup> Abhomu-o, u atsia apa pi ani me: «Mu la naamu ne da? Padhá de, anga a ayo me ya gie engú tété pi okpála inde atima ya ko. Ngamu makpe-e, mu ngapa li 'ngú gba mu-o pi?» <sup>23</sup> Djaa agie me: «Ma ne kpála inde ngatotobhila bhú 'gu me,

<Yi leke kpadji ngbingbili pi Ngámá.>»

(A bhomu-o engú inde li polofeta Isaya apa nani e-o).†

<sup>24</sup> Okpála inde u atima o agba Djaa, a adu nani omuFalisai . <sup>25</sup> U

ayi ani me: «Mu ne Masiya ade. Mu ne Eliya ade. Mu ne polofeta inde ya ngadjeke e ade. Mu la ngabatisa okpála ngú ni?» <sup>26</sup> Djaa agie pi uo me: «Ngama-a, ma ngabatisa okpála ne engu. La-a, kpála bini bhú ká yi, inde yi mbila e de. <sup>27</sup> Ani ngago pita ma. Ma belegu ne tetele kpála ade ngubula me ma bhulu ekpú na maløkø gba ani-o.»

<sup>28</sup> Engú bhomu-o akodho 'kpí bhú kuti na Betania, ayi 'ngu na Djuludani li bili inde li Djaa adu abatisa okpála li e-o.

*Yesu ne Ndili Kandølo gba Ebhe*

<sup>29</sup> Li ekpí aseke lie, Djaa au Yesu me ani nde ngago li pápá inde ani adu li e-o. Ani atsia apa me: «Yi tsia nga Ndili Kandølo gba Ebhe-o. Ani nga'e siti 'ngú píla doto ngae. <sup>30</sup> Engú inde ma akpokpo e, ma akpokpo pindji ani, engú inde me: <Kpála bini ngago pita ma. La-a, ani ane ma mane. Padhá de, anga ani adu nani muma kalanu.> <sup>31</sup> Ma du ambila ani de. Engú bini, ma ago nabatisa okpála ne engu, ngubula me Ebhe suno ani pi omaIsalaele.» <sup>32</sup> Djaa akpokpo matá engú gba ani-e me: «Ma au BuaŠ gba Ebhe-e ngayie ne abhúlá, maka bøbhe, atsia adu pí ani. <sup>33</sup> Ma du ambila ani de. Engú bini, Ebhe inde atima ma ngú nabatisa okpála ne engu-o, apa muma me: <Mo ou Bua gba Ebhe-e ngakø, i tsia dú pí kpála bini. A bhomu-o kpála inde abátisa okpála ne Bu Bhobua ko.> <sup>34</sup> Ngama-a, ma au, ma atsia akpokpo la di 'ngú mbámbá me kpála inde-e, a ko Ndili gba Ebhe!»

*Yesu a'i omukpata na gigina*

<sup>35</sup> Li ekpí aseke lie, Djaa adu ago matá oo bhú dabili bini ne omukpata gba e bhisi. <sup>36</sup> Nedhinga ani au Yesu lie ngakodho 'kpí-e, ani atsia apa me: «Yi tsia nga

‡ 1:15 1:15 Djaa: A ko Djaa bhende Bhulu nabatisa okpála-o. † 1:23 1:23 Tsia bhú Isa. 40:3. § 1:32 1:32 Bua: I du me u nde aye ne 'dhu balua na ngbéngbé-e (madjisikile), amba a ko Bu Bhobua.



Ndili Kandөлө gba Ebhe-o.» <sup>37</sup> Li omukpata gba ani bhisi-e adje ani lie ngapa 'ngü bhomu-o, u atsia akpata Yesu. <sup>38</sup> Yesu adji lie. Ani au me u adu akpata ni, ani atsia ayi uo me: «Yi ngagili ni?» U agie pi ani me: «Labi, mu ngadu su?» (Labi akunda napa me Musuno.) <sup>39</sup> Yesu agie pi uo me: «Yi gogo amba yi u.» (A adu nani masikpe de saa na badha pita tulukpe.) U anu, u atsia au bili inde ani adu nadu li e ko. Li 'kpi angoo, u atsia adulu ne uo bhü dabili bini.

<sup>40</sup> Andili, ndai Simo Piele, nani ne saka omukpata bhisi inde adje engü li Djaa apa e-e, atsia akpata Yesu-o. <sup>41</sup> Andili abhaka ngaiza kalanu hana-a ndai e makpe Simo. Ani atsia apa pi ani me: «Ya au Masiya au.» (A akunda napa me Kilisito.) <sup>42</sup> Ani anu ne Simo agba Yesu. Yesu atsia ani, ani atsia apa me: «Ngamu-o, mu ne Simo, ndili gba Djaa . U adu a'i mu me Sefasi.» ('Hi angoo akunda napa me Piele.)

### *Yesu a'i Filipino*

<sup>43</sup> Li ekpi aseke lie, Yesu akunda nanu bhü ndu doto na Galilaya. Ani abhaka Filipino, ani atsia apa pi ani me: «Kpata ma.» <sup>44</sup> (Filipo nani ne kpala na gudhu na Betesaida, gudhu inde li Andili ngauo ne Piele ayie bhü e-o.) <sup>45</sup> Pipita-a, Filipino abhaka Natanaele. Ani apa pi ani me: «Ya au kpala inde li Moidje aye nani engü gba e bhü bhuku na lili-o, li opolofeta akpokpo di nani engü gba e-o. A ko Yesu, ndili gba Djodjefu , kpala na gudhu na Nadjaleta.» <sup>46</sup> Natanaele ayi ani me: «Ehe na ndjindji ti da nayie bhü kuti na Nadjaleta uu?» Filipino agie pi ani me: «Gogo, amba mu u.»

<sup>47</sup> Li Yesu au Natanaele lie ngago li papa gba e, ani atsia apa li 'ngü gba ani-e me: «Yi tsia nga kukulu matsalaele inde. Pulu 'ngü bhü ani belegu ade bini.» <sup>48</sup> Natanaele ayi ani me: «Mo ombila ma lele pi?» Yesu agie pi ani me: «Ma au mu nedhinga mo odu lie sa ndula na figi

, kala me Filipino 'i mu-o.» <sup>49</sup> Abhomu-o, Natanaele atsia apa pi ani me: «Labi, ngamu-o, mu ne Ndili gba Ebhe! Mu ne 'ngbé Ngamá gba omatsalaele!» <sup>50</sup> Yesu apa pi ani me: «Mo obhuka, anga ma apa pi mu me ma au mu sa ndula na figi? Mo ou ongu na ngbengbengbe ane bhobhomu-o mane!» <sup>51</sup> Yesu atsia apa mata me: «Ma apa pi yi na paká me yi au kokpi me a nde abhulu lie, oandjelu gba Ebhe-e nde nga'u, u nde di ngakö pi 'ndji ma, Ndili gba kpala!»

## 2

### *Anokomia na kuva bhü kuti na Kana*

<sup>1</sup> Abhomu-o, pita 'kpi bhisi-e, anokomia na kuva adu bhü Kana, kuti bini na ndu doto na Galilaya. 'Hi Yesu adu oo. <sup>2</sup> U atsia a'i di Yesu ne omukpata gba e bhü anokomia angoo. <sup>3</sup> Li vino andjia lie, 'hi Yesu atsia apa pi ani me: «Vino mata ka uo ade.» <sup>4</sup> Engü bini, Yesu agie pi ani me: «'Hi ma, a ka ni ne mu ne ni? Nedhinga gba ma-a kolo nga de.» <sup>5</sup> Abhomu-o, 'hi ani atsia apa pi okpala na kulu-o me: «Yi mene ndu 'ngü hana inde ani apa e pi yi ko.»

<sup>6</sup> Ngbengbe madakpa inde u abho e li teme-e, adu oo madhia. OmaYuda vuvulu lio bhübhü ngubula nakolo bubu kala Ebhe. Omadakpa angoo bini ne bini ti da naha litele kama bini. <sup>7</sup> Yesu apa pi okpala na kulu-o me: «Yi bebedhe omadakpa bhomu-o ne engu.» Okpala na kulu-o abebedhe omadakpa ne engu bedhe bedhe. <sup>8</sup> Abhomu-o, Yesu atsia apa pi uo me: «Mbia inde-e, yi sese, amba yi nu ha pi ngamá na anokomia-o.» U amene bhadi moko. <sup>9</sup> Li ngamá na anokomia ale engu-o lie, ani au me akolo vino. Ani du ambila bili inde ayie li e de. (La-a, okpala na kulu inde asene engu-o, adu ambimbila ngao.) Abhomu-o, ani a'i 'ko elo-o. <sup>10</sup> Ani apa pi ani me: «Ndu okpala hana haha ngaiza kalanu vino na

babadha. I du la me u nde andji vino bhelé andji-e, u tsia há bhende babadha ade ko. La-a, ngamu-o, mo owo vino bhende na babadha-a akolo li nedhinga inde!»

<sup>11</sup> Abhomu-o gina ongu na ngangamba\* inde li Yesu amene e-o. Ani amene bhú Kana, kuti bini na ndu doto na Galilaya. Ani asuno sangu gba e-o, omukpata gba ani-e atsia abhuka ani. <sup>12</sup> Pipita-a, ani anu bhú gudhu na Kapalanauma bhú dabili bini ne 'hi e, ne ondaise e, di ne omukpata gba e-o. U mene la oo ekpi bhelé de.

*Yesu atsambala okpala natsindji 'he bhú 'ngbé 'ti Ebhe gba omaYuda (Tsia bhú Mat. 21:12-13; ne bhú Mlk. 11:15-17; di ne bhú Luk. 19:45-46.)*

<sup>13</sup> Anokomia na Pasika gba omaYuda akolo masikpe. Abhomu-o, Yesu atsia anu bhú gudhu na Yelusalema. <sup>14</sup> Oo, ani ali bhú 'ngbé 'ti Ebhe gba omaYuda-o. Ani abhaka me okpala ngatsindji obagala, ne okandele, di ne obebhe. Ani atsia abhaka di me okpala nayipa falanga nde adulu.† <sup>15</sup> Abhomu-o, Yesu amene fimbo li kute ekpu. Ani apandja ndu uo hana bhú 'ngbé 'ti Ebhe gba omaYuda-a kilidjo, bhú dabili bini ne okandele, di ne obagala gba o-o. Ani agu 'i dabili gba okpala nayipa falanga kuto. Ani atsia abala di falanga gba uo-o. <sup>16</sup> Ani atsia apa pi okpala inde adu natsindji obebhe-o me: «Yi 'e ehe inde-e si ma'e! Yi adji eti gba 'Dyi ma-a eti natsindji 'he de!» <sup>17</sup> Omukpata gba ani-e atsia abhundja engu inde u aye e bhú Bhuku gba Ebhe-e me: «Makunda inde ma nde ne e ngubula eti gba mu-o, atsulu ma maka djua!†»

<sup>18</sup> Abhomu-o, omaYuda ayi ani me: «Mo oméne pi ya mangua ngamba 'ngú dho inde asuno me, mu ne angu namene mo-o?» <sup>19</sup> Yesu agie pi uo me: «Yi bhelo 'ngbé 'ti Ebhe gba omaYuda inde, sunda 'kpi bata-a, ma tsia yiki mata.» <sup>20</sup> OmaYuda ayi ani me: «A ayo nani kalanga ndjikpa badha ne ka madhia, ngu nayiki 'ngbé 'ti Ebhe gba omaYuda inde! La ngamu-o, mu tsia yiki sunda 'kpi bata?»

<sup>21</sup> Engu bini, 'ngbé 'ti Ebhe inde li Yesu adu apa 'ngu e, adu kute ani. <sup>22</sup> Kaka-a, li Yesu azuku lie, omukpata gba ani-e atsia abhundja engu nani ani apa e-o. Abhomu-o, u atsia abhuka engu inde u aye e bhú Bhuku gba Ebhe, di ne bhende nani li Yesu apa e ko.

*Yesu mbila bua ndu okpala hana*

<sup>23</sup> Li Yesu adu lie bhú gudhu na Yelusalema ngubula anokomia na Pasika-a, okpala bhelé au ongu na ngangamba inde ani adu amene e-o. Abhomu-o, u atsia abhuka ani. <sup>24</sup> Engu bini, ngaani makpe, ani ziba uo de. Padha de, anga ani adu ambila ndu uo hana ndjindji. <sup>25</sup> Ani ne gamu nayi kpala bini li 'ngu pindji kpala-kuti ade. Padha de, anga ngaani makpe, ani adu ambila engu inde bhú kpala ndjindji.

### 3

*Yesu ngauo ne Nikodemu*

<sup>1</sup> Kpala bini adu nani bhú ka omuFalisai . A adu 'li ani me Nikodemu. Ani adu nani suka ongamasu gba omaYuda . <sup>2</sup> Ani anu abhaka Yesu sukpe, ani atsia apa pi ani me: «Musuno, ya ambila me Ebhe atima mu ngae, ngu nasuno 'ngu pi ya. Padha de, anga kpala bini ti da

\* **2:11** 2:11 Ongu na ngangamba: Bhú Bádha Ngali gba Yesu Kilisito maka li Djaa aye lie, mo obháka ongamba 'ngu mananika inde asuno okulu gba Yesu-o. Bhú obhuku koko u aye me «Okulu», bhú okoko u aye me «Ehe inde ngasuno ehe koko, i du di-e engu koko» (sinye). Tsia bhú Dja. 4:43-54, 5:1-16, 6:1-21. † **2:14** 2:14 OmaYuda inde adu ayie bhú okuti koko adu ngaiza nayipa falanga gba o-o. Pipita-a, u tsia ti la da nakala enu ngu nahaha pi Ebhe di ne nadi epo na 'ngbé 'ti Ebhe gba omaYuda-o. † **2:17** 2:17 Tsia bhú Ets. 69:10.

namene ongamba 'ngú , maka mu ngamemene lie inde-e de, i du me Ebhe nde bhú dabili bini ne ani ade ko.» <sup>3</sup> Yesu agie pi ani me: «Ma apa pi mu na paká me, kpála bini ti da nau Nau gba Ebhe-e de, i du me u nde zu ani ne toto de ko.» <sup>4</sup> Nikodemu ayi ani me: «Lele pi, u ti da nazu gbé kpála lie ne toto-o? Ani ti da nagie lie bhú 'bu 'hi e, li 'hi ani tsia zú ani ne toto?»

<sup>5</sup> Yesu agie pi ani me: «Ma apa pi mu na paká me, kpála bini ti da nali bhú Nau gba Ebhe-e de, i du me ani nde sia nazu li kpadji na engu di ne li kpadji na Bua de ko. <sup>6</sup> Bhende azu lie bhú kute-e, a ko kute. Bhende azu lie bhú Bhobua-a , a ko bua. <sup>7</sup> Mo ongamba de ka ma apa lie pi mu me: <A ayo me u zu ndu yi hana ne toto.> <sup>8</sup> Anvi ngape li pápá akunda nape li e. Mu ngadje gigili. Engú bini, mu mbila bili li anvi angoo ayie li e de. Mu mbila la di pápá adji li e de. A bhadi moko pi ndu obhende hana asia nazu li kpadji na Bua.»

<sup>9</sup> Abhomu-o, Nikodemu ayi Yesu me: «Engú angoo ti da namene lie lele pi?» <sup>10</sup> Yesu atsia agie pi ani me: «Ngamu-o, mu ne suka ongbengbe omusuno na Isalaele. Engú la bini, mu mbila engú angoo de! <sup>11</sup> Ma apa pi mu na paká me: ya ngapa engú inde ya ambila e. Ya la di ngakpokpo 'ngú pindji bhende ya au e ne djila ya. Engú la bini, yi bhuka engú inde ya akpokpo e pi yi-e de. <sup>12</sup> Ma ngakpokpo 'ngú pi yi pindji 'ngú na píla doto. Engú bini, yi bhuka de. I du la me, ma nde akpokpo 'ngú pi yi pindji 'ngú na abhúlá-a, yi tsia bhúka? <sup>13</sup> Padhá de, anga kpála bini ade inde akolo nga abhúlá, bha bini ngama, Ndili gba kpála inde ayie oo!

<sup>14</sup> Maka li Moidje a'e'e nani kulu kpulu lie li ndula abhú 'gu-o, a ayo bhadi me ngama, Ndili gba kpála-a, u 'e'e bhadi ma moko.\* <sup>15</sup> U 'e'e ma, amba kpála ne kpála inde abhuka

ma-a, ani sia mukobho na duduma. <sup>16</sup> Padhá de, anga Ebhe akunda okpála na píla doto naali. Kaka-a, ani atima koli Ndili gba e bini-e ngubula me kpála ne kpála inde abhuka ani-e, ani akpí-i de. Engú bini, ani sia mukobho na duduma. <sup>17</sup> La-a, Ebhe tima nani Ndili gba e ngú nakodho 'ngú gba okpála na píla doto de. Engú bini, ani atima ani ngubula me, okpála na píla doto kobho ka ani. <sup>18</sup> Kpála ne kpála inde abhuka ani-e, mangimbo pí ani ade. Engú la bini, kpála inde i bhuka de-e, u a'o mangimbo pí ani bhutode. Padhá de, anga ani bhuka koli Ndili bini gba Ebhe-e de.

<sup>19</sup> Ta mangimbo angoo me: zi 'kpí ago píla doto, engú la bini, okpála na píla doto akunda mangbo biti ane zi 'kpí, ka siti 'ngú inde u ngamene e-o. <sup>20</sup> Ndu kpála hana inde ngamene siti 'ngú-o, yala zi 'kpí mayala. Ani gó di li bili li zi 'kpí nde li e de. Padhá de, anga ani ngakpe me osisiti 'ngú gba ni-e akoto mbámbá li zi 'kpí de. <sup>21</sup> Engú la bini, ndu kpála hana inde ngamene ngbili 'ngú , ngago li bili li zi 'kpí nde li e-o. Ani ngamene mo-o ngubula me u u mbámbá me okulu ni ngamene e, a amene lie maka li Ebhe aziba lie ko.»

### *Yesu ngauo ne Djaa*

<sup>22</sup> Pita 'ngú angoo, Yesu ngauo ne omukpata gba e anu bhú ndu doto na Yudaya. Oo, ani adu ne uo ngubula mbo nedhinga bedi. Ani atsia adu abatisa okpála. <sup>23</sup> Djaa atsia adu di nabatisa okpála bhú 'ngu na Enona, de bili na Salime, anga engu adu li bili angoo naali. Okpála adu ago abhaka ani, ani atsia adu abatisa uo. <sup>24</sup> (Li nedhinga bhomu-o, a abhaka me u nde bhike nga Djaa bhú tikpu de.)

<sup>25</sup> Abhomu-o, bhú ká omukpata gba Djaa, okoko aholo nabi bhayiki ne maYuda bini, pindji 'ngú navulu lie ngú nakolo ka e bubu, maka li

\* **3:14** 3:14 Yesu ngapa bhomu-o engú nakpi ka e li kulusi di ne nagie lie ka e agba Ebhe.

líli apa lie-o. <sup>26</sup> U anu abhaka Djaa, u atsia apa pi ani me: «Musunu, kpála nako yi adu ne e ayi 'ngu na Djuludani-e, di mo okpokpo 'ngú gba e-e, tsia nga mbia inde-e, ani ngabatisa okpála. Okpála bhelé nganu abhaka ani.»

<sup>27</sup> Djaa agie pi uo me: «Kpála bini ti da nasia 'he belegu de bini, i du me Ebhe nde ha pi ani ngae de ko. <sup>28</sup> Ngayi makpe, yi ti da napapa li ma ngayi me, ma apa nako me: «Ngama-a, ma ne Masiya ade. Engú la bini, ma ne kpála inde u atima e pi ani kalanu.» <sup>29</sup> Bhulu elu-o, a ko 'ko elu-o. Olu bhoko-o alu de ani, ani ngadje ani. Ani ngakpi djali naali ka ani ngadje 'li 'ko elu-o lie-o. A ko di djali gba ma-o, djali ango-o mbia inde-e libhomu. <sup>30</sup> A ayo me u 'e'e ani ne abhúla, amba ngama-a, ma ke naama ne kuto.»

#### *Kpála inde ayie abhúla-a ane ndu okpála hana*

<sup>31</sup> «Kpála inde ayie abhúla ane ndu okpála hana. Kpála inde ayie píla doto-o, a ko kpála na píla doto. Ani ngakpokpo 'ngú na píla doto. Kpála inde ayie abhúla-a ane ndu okpála hana. <sup>32</sup> Ani ngakpokpo 'ngú pindji engú inde ani au e, di ne bhende ani adje e-o. La-a, kpála bini ziba engú inde ani ngakpokpo e de. <sup>33</sup> Kpála inde aziba engú inde ani ngakpokpo e abhuka me Ebhe ngapa kukulu 'ngú. <sup>34</sup> Kpála inde li Ebhe atima e, ngakpokpo eli gba Ebhe. Padhá de, anga Ebhe abedhe ani ne Bua gba e bedhe. <sup>35</sup> 'Dyi Ndili-e, akunda Ndili na bhobhoko gba e-o. Ani a'o ndu 'he hana sa 'kpa ani. <sup>36</sup> Kpála inde abhuka Ndili-e, asia mukobho na dudu. La-a, kpála inde i bhuka Ndili-e de-e, sia mukobho ango-o de. Engú bini, ke 'ngú gba Ebhe-e adú pí ani.»

## 4

### *Yesu ngauo ne elu bini na ndu doto na Samalia*

<sup>1-3</sup> Abhomu-o, omuFalisai adje me okpála bhelé ngakpata Yesu, di ne me ani ngabatisa okpála bhelé ane Djaa. (A na paká me Yesu du nani naae nabatisa okpála de. Omukpata gba ani-e adu mangbo nabatisa okpála ngao.) Li Yesu adje lie mo-o, ani ayie bhú ndu doto na Yudaya, ani atsia agie lie bhú ndu doto na Galilaya, <sup>4</sup> ngú nanu oo. Padhá de, anga a ayo me ani pu bhú ndu doto na Samalia.

<sup>5</sup> Ani akolo bhú gudhu bini na Samalia. A adu 'li gudhu ango-o me Sikale, deno ndu doto inde nani li Jakobho aha e pi ndili gba e Djodjefu-o. <sup>6</sup> Li dabili ango-o, kpongu gba Jakobho adu oo. Li Yesu andala lie ka dhuku-o, ani atsia adu deno kpongu ango-o kuto. A adu masikpe de tulukpe.

<sup>7</sup> Elu bini na Samalia ago ngú nase 'ngu. Abhomu-o, Yesu atsia apa pi ani me: «Ha mbo engu nandji mandji mu. <sup>8</sup> (A abhaka me omukpata gba ani-e nde agbida bhú gudhu, ngú nakala ezu nazu mazú.) <sup>9</sup> Abhomu-o, elu-o apa pi Yesu me: «Mu ne maYuda. Ngama-a, ma ne kpála na Samalia. Lele pi mu ti da nayo engu nandji mandji lie ka ma?» (Padhá de, anga omaYuda djedje li ne omuSamalia de.)

<sup>10</sup> Yesu agie pi ani me: «I du me mu mbila makala gba Ebhe-e uo, i du la di me mu mbila kpála inde apa pi mu me: «Ha mbo engu nandji mandji mu uo», mu de ayo mangbo engu ka ani ngamu. Ani de aha engu na mukobho pi mu.» <sup>11</sup> Elu ango-o agie pi ani me: «Ngamá, ehe ngú nase engu-o ne di ka mu ade. 'Du 'ngu-o la di tsutsu. Mo oyie ne engu na mukobho-o su? <sup>12</sup> Ogbi ya Jakobho aha kpongu inde-e pi ya ngae. Ngaani makpe, ani andji engu inde-e bhú dabili bini ne ongisi di ne onu gba e-o. Mo obhundja namu me mu ngebéne ane ani?»

<sup>13</sup> Yesu agie pi ani me: «Kpála inde andji engu inde-e, ani adjé matá

gumɔ 'ngu madje. <sup>14</sup> Engú bini, kpála inde andjí engu inde ma ahá e pi ani-e, ani djé matá gumɔ 'ngu belegu de bini. La-a, engu inde ma ahá e pi ani-e, akólo bhú ani kpongu na mukobho na duduɔa.» <sup>15</sup> Ɖlɔ angoo-oo apa pi ani me: «Ngámá, ha mbo engu angoo-oo muɔa, amba ma adjé matá gumɔ 'ngu de. Ma agó la di matá nase engu inde-e de.»

<sup>16</sup> Yesu apa pi ani me: «Nu 'i 'ko mu, amba mu gie matá limu ei.»

<sup>17</sup> Ani agie pi Yesu me: «Bhoko ka ma ade.» Yesu atsia apa pi ani me: «Mo opa ndjindji me bhoko ka mu ade ko. <sup>18</sup> Padhá de, anga mo odu nako ne obhosi bhuluvue. Bhoko bhende yi nde ne e mbia inde-e, a ko la di 'ko mu de. Mo opa kukulu 'ngú.»

<sup>19</sup> Abhomu-oo, Ɖlɔ angoo-oo apa pi Yesu me: «Ngámá, ma au me mu ne polofeta. <sup>20</sup> Onguo ogbi ya, okpála na ndu doto na Samalia-a, adhögö Ebhe pí eta inde. Engú bini, ngayi omaYuda-a, yi ngapa me gudhu na Yelusalema ne bili inde a ayo lie me u dhögö Ebhe-oo.»

<sup>21</sup> Yesu atsia agie pi ani me: «Ɖlɔe, bhuka 'li ma. Nedhinga ngago, nedhinga inde yi dhögö 'Dyi ní lie pí eta inde-e de. Yi dhögö la di ani lie bhú gudhu na Yelusalema de. <sup>22</sup> Ngayi okpála na ndu doto na Samalia-a, yi ngadhögö Ebhe inde yi mbila e de. Engú bini, ngaya-a, ya ngadhögö Ebhe inde ya ambila e. Padhá de, anga mukobho ago ne li pápá gba omaYuda. <sup>23</sup> Engú bini, nedhinga ngago, nedhinga angoo-oo belegu akolo, nedhinga inde li okukulu okpála nadhögö 'Dyi ní adhögö ani lie bhú Bu Bhobua, di ne bhú kukulu 'ngú-oo. Padhá de, anga a bhomu-oo okukulu okpála nadhögö 'Dyi ní inde ani nde ne gumu o-oo. <sup>24</sup> Ebhe ne Bua. Kaka-a, a ayo me okpála inde ngadhögö ani-e, dhögö ani bhú Bua di ne bhú kukulu 'ngú.»

<sup>25</sup> Ɖlɔ-oo apa pi Yesu me: «Ma ambila me Masiya ('ili angoo-oo akunda napa

me Kilisito) agó mago. Li ani agó lie-e, ani tsia bhúlu ndu 'ngú hana pi ya mbámhá.» <sup>26</sup> Yesu agie pi ani me: «Ngama kpála inde ngakpokpo 'ngú pi mu mbia inde-e, ma ne ani.»

<sup>27</sup> Li nedhinga bhomu-oo, omukpata gba Yesu-oo agie lio. U angamba naali ngú nau ani me ani nde ngagama 'ngú ne Ɖlɔ. Engú bini, sũka uo bini yi ani de me: «Mu ngagili ni?» di ne me: «Mu ngagama 'ngú ne ani ngú ni?»

<sup>28</sup> Abhomu-oo, Ɖlɔ angoo-oo a'oo ká lusa 'ngu gba e-oo. Ani agie lie abhú gudhu. Ani atsia apa pi okpála me: <sup>29</sup> «Yi gógo, yi u kpála inde akpokpo ndu 'ngú hana inde ma amene e muɔa. A ko ndi Masiya di?» <sup>30</sup> Abhomu-oo, u aze bhú gudhu-oo, u atsia agbida nabhaka Yesu.

<sup>31</sup> Bhú nedhinga bhomu-oo, omukpata gba Yesu-oo adu atu ani me ani zu 'he. U adu apa pi ani me: «Musuno, zu nga mbo 'he!» <sup>32</sup> Engú bini, ani agie pi uo me: «A ka ma ne ehe nazu mazú inde yi mbila 'ngú li e de.» <sup>33</sup> Abhomu-oo, omukpata-a ayi lio sũnda o me: «Kpála bini ago ndi pi ani ne ehe nazú mazú adi?»

<sup>34</sup> Yesu apa pi uo me: «Ezu gba ma-a, a ko namene gumu gba kpála inde atima ma-oo, di ne nandjia kulu inde ani aha e muɔa-oo.

<sup>35</sup> Ngayi-e, yi papa me: «A atigala matá epe badha ngubula na'e nguwa abhiye.» La ngama-a, ma apa pi yi me, yi tsia nga oedyi-ndjindji. Padhá de, anga nguwa abhele, a akolo bedhe ngubula na'e'e abhiye! <sup>36</sup> Kpála inde ngagbe nguwa abhiye-e ngasia makalá gba e-oo. Ani ngapo bhúla nguwa-a ngubula mukobho na duduɔa. Kaka-a, kpála nalu nguwa, ne kpála inde nga'e'e abhiye-e, ngakpi djali bhú dabili bini. <sup>37</sup> Padhá de, anga a ko kukulu 'ngú, engú inde u apa e bhú gbitaku me: «Kpála koko ngalu nguwa-oo, li kpála koko tsia 'é abhiye.» <sup>38</sup> Ngama-a, ma atima yi na'e nguwa bhiye inde yi ndala bhú e de. Okpála koko

andala bhúbhú, yi la ngasia bádha 'ngú li kulu gba uo-o.»

<sup>39</sup> Abhomu-o, okpála bhelé na gudhu na Samalia bhomu-o abhuka Yesu ka eli inde li elo-o akpokpo e me: «Ani akpokpo ndu 'ngú hana inde ma amene e muma.» <sup>40</sup> Kaka-a, li okpála na gudhu na Samalia akolo lie de Yesu-o, u ayo ka ani me ani du mbo gba o oo. Abhomu-o, Yesu atsia amene oo ekpi bhisi. <sup>41</sup> Okpála bhelé naali abhuka matá ka eli inde li Yesu apa e-o. <sup>42</sup> U atsia apa pi elo-o me: «Mbia inde-e, ya bhuka bha bini ka engú mo okpokpo e de. Engú bini, ya abhuka anga ngaya makpe-e, ya adje ani. Ya atsia ambila na paká me a ko Mukobho gba okpála na píla doto.»

*Yesu akobho ndili na bhobhoko gba 'ngbé kpála bini*

<sup>43</sup> Pita 'kpi bhisi li Yesu amene e oo, ani ayie oo, ani atsia anu bhú ndu doto na Galilaya. <sup>44</sup> Ngaani makpe-e, ani apa nani me: «Polofeta inde u amanga e bhú doto gba e belegu ade bini.» <sup>45</sup> Li ani akolo lie bhú ndu doto na Galilaya-a, okpála inde oo asia ani ndjindji. Padhá de, anga u au ndu 'ngú hana inde li ani amene e li nedhinga na anokomia bhú gudhu na Yelusalema-o, anga u adu di oo.

<sup>46</sup> Pipita-a, Yesu agie lie bhú kuti na Kana, bhú ndu doto na Galilaya. A bhomu-o bili inde ani adji nani engu li e, atsia akolo vino-o. 'Ngbé kpála bini na Lita adu oo. Adu li ndili gba ani na bhobhoko-o ne kuo, bhú kuti na Kapalanauma. <sup>47</sup> Li kpála ango-o adje lie me Yesu ayie bhú ndu doto na Yudaya, ani akolo bhú ndu doto na Galilaya-a, ani anu abhaka ani. Ani atsia akikiliki lie pi ani me ani nu bhú kuti na Kapalanauma, amba ani kobho ndili gba ni na bhobhoko-o. Padhá de, anga ndili ango-o adu masakpe de nakpi.

<sup>48</sup> Abhomu-o, Yesu atsia apa pi ani me: «I du me yi nde u ongamba

'ngú, di ne okiaka 'ngú de-e, a na paká me yi ti da nabhubhuka de!»

<sup>49</sup> 'Ngbé kpála na Lita-a apa pi ani me: «Ngámá, kala me ndili-e kodho bua e, gogo.» <sup>50</sup> Yesu apa pi ani me: «Gie limu agba mu, ndili gba mu-o akobho!» Kpála ango-o abhuka engú inde li Yesu apa e pi ani-o. Ani atsia atapa. <sup>51</sup> Nedhinga ani adu anu lie-e, okpála na kulu gba ani-e ago aké lio ne ani li kpadji. U apa pi ani me: «Ndili gba mu-o akobho!» <sup>52</sup> Ani atsia ayi uo li nedhinga li ndili-e akolo lie ndjindji-o. U apa pi ani me: «Bandji-e ayie li ani lili bhú saa na bini, pita tulukpe.» <sup>53</sup> Abhomu-o, 'dyi ndili-e atsia ambila me, a ko saa inde li Yesu apa pi ani lie me: «Ndili gba mu-o akobho-o.» Nayie li nedhinga bhomu-o, ngaani makpe-e, ani abhuka, di ne piga gba e libhomu.

<sup>54</sup> A bhomu-o ngamba 'ngú na bhisi li Yesu amene e, pita ani ayie lie bhú ndu doto na Yudaya, ani atsia agie lie bhú ndu doto na Galilaya ko.

## 5

*Yesu akobho kpála inde agugumu kuto*

<sup>1</sup> Pita ongu akodho 'kpi-e, anokomia bini gba omaYuda ati. Abhomu-o, Yesu atsia anu bhú gudhu na Yelusalema. <sup>2</sup> Bhú gudhu oo, de bhoti inde u a'i e me bhoti gba Okandelo-o, 'du 'ngu bini navulu kute adu oo. A adu 'li 'li bhú eli na Ebele me Betedjata. Djedje 'he maka 'ti ngbangbali adu dede bhuluvue. <sup>3</sup> Obhulu kuo bhelé adu me u nde asili kuto sasa. A adu nani okpála inde i u 'kpi de, ne okpála inde ne eze li 'dhu o, di ne okpála na bhuku kute. [U adu adjeke me engu-o dimba. <sup>4</sup> Padhá de, anga li onedhinga koko-o, andjelu bini gba Ngámá-a adu aké bhú 'ngu-o, engu-o atsia adu adimba. Kpála na kuo inde adu aké bhúbhú kalanu-o, adu nakobho. Belegu li kuo du bha nani pi-ie.]

<sup>5</sup> Bhoko bini adu oo, ani asi nani ne kuo kalanga ndjikpa bata ne ka madjina. <sup>6</sup> Li Yesu au ani lie asi kutoo, ani ambila di lie me ani asi ne kuo 'kpí bhelé-e, ani atsia ayi ani me: «Mo okunda nakobho?» <sup>7</sup> Kpála na kuo ango-o agie pi ani me: «Ngámá, kpála ka ma ade ngubula me ani ko ma bhú 'ngu-o, li nedhinga inde i ngadimba lie-o. Ma le me ma nu me-e, li kpála koko kodho 'kpí kala ma.» <sup>8</sup> Yesu apa pi ani me: «Yie bhúlá, ha tsala gba mu-o, nu.» <sup>9</sup> Kolo má gala me-e, kpála na kuo-o akobho. Ani aha tsala gba e-o, ani atsia aholo nadhuku.

La-a, adu nani li 'kpí nago gba omaYuda-o. <sup>10</sup> Abhomu-o, omaYuda apa pi kpála inde akobho-o me: «A ko 'kpí nago. A ayo de me mu bi tsala gba mu-o de.» <sup>11</sup> Ani agie pi uo me: «Kpála inde akobho ma-a, apa muma me: «Ha tsala gba mu-o, nu.»» <sup>12</sup> U ayi ani me: «A ko kpála bhedho inde apa pi mu me: «Ha tsala gba mu-o nu?»» <sup>13</sup> Engú bini, kpála inde akobho-o mbila de me a ko da. Padhá de, anga adu me Yesu nde angita bhú ka okpála inde adu li bili ango-o angita.

<sup>14</sup> Pipita-a, Yesu abhaka ani bhú 'ngbé 'ti Ebhe gba omaYuda-o. Yesu apa pi ani me: «Tsitsia nga, mo okobho. Mo oméne matá siti 'ngú de, amba engú inde ane ne siti-e, akólo li kute mu de.» <sup>15</sup> Kpála ango-o anu napa pi omaYuda me Yesu akobho ni ngae. <sup>16</sup> Kaka-a, omaYuda aholo nadje siti bua pindji Yesu. Padhá de, anga ani amene nani engú ango-o bhú 'kpí nago. <sup>17</sup> Engú bini, Yesu agie pi uo me: «Maka li 'Dyi ma ngamene kulu lie nakolo pi mbia inde-e, Ngama di-e, ma ngamemene moko.» <sup>18</sup> Kaka-a, omaYuda adu agili matá ne kekele ngú nabholo ani. Padhá de, anga ani gumu bha bini líli na 'kpí nago de, engú bini, ani adu apa lie me Ebhe ne 'Dyi ni-e, ani adu ale lie bhomu-o li Ebhe.

### *Ebhe aha ndu 'ngú gba e hana pi Ndili gba e-o*

<sup>19</sup> Abhomu-o, Yesu apa matá pi uo me: «A moko, ma apa pi yi na paká me ngama Ndili-e, ma ti da namene 'he bini bhú ngu ma de, bha bini bhende ma au me 'Dyi ma ngamene e-o. Padhá de, anga ehe inde li 'Dyi ma ngamene e, ngama Ndili-e, ma ngamemene bhadi moko. <sup>20</sup> 'Dyi ma kunda ma, Ndili gba e-o. Ani ngasuno ndu 'ngú hana inde ngaani makpe ani ngamene e muma, Ndili gba e-o. Ani asuno muma, Ndili gba e, okulu na ngbengbengbe inde ane obhende-e mane. Yi tsia ngamba tété. <sup>21</sup> Padhá de, anga maka li 'Dyi ma ngazuku okpála inde amu-o lie, ani la di ngaha mukobho pi uo-o, ngama, Ndili gba ani-e, ma ngaha bhadi mukobho moko pi kpála inde ma akunda nahaha pi e ko. <sup>22</sup> 'Dyi ma kodho 'ngú gba kpála bini de. Engú bini, ani aha nakodho 'ngú hana muma, Ndili gba e, <sup>23</sup> ngubula me ndu okpála hana du namanga ma, Ndili gba ani, maka u ngamanga ani 'Dyi ma lie ko. Kpála inde i manga ma, Ndili-e de-e, ani manga di 'Dyi ma inde atima ma-a de.

<sup>24</sup> A moko, ma apa pi yi na paká me kpála inde adje 'li ma-a, inde abhuka la di kpála inde atima ma-a, kpála ango-o asia mukobho na duduma. U 'ó mangimbo pi kpála ango-o de. Engú bini, ani ayie bhú kuo, ani atsia akodho 'kpí bhú mukobho. <sup>25</sup> A moko, ma apa pi yi na paká me nedhinga ngago, mbia inde-e, nedhinga ango-o belegu akolo, nedhinga li okpála inde amu-o, adjé 'li Ndili gba kpála-a lie-o. Abhomu-o, okpála inde adjé-e, u tsia kóbho.

<sup>26</sup> Padhá de, anga maka li 'Dyi ma nde lie ne angu ngubula naha mukobho-o, ani aha bhadi angu muma, Ndili gba e moko ngubula me ma du naha mukobho. <sup>27</sup> Ani atsia aha la di angu muma, Ndili gba e, ngú nakodho 'ngú gba okpála,

anga ma ne Ndili gba kpála. <sup>28</sup> Yi angamba tété de. Padhá de, anga nedhinga ngago. Bhú nedhinga ango-o, ndu okpála hana inde bhú lata-a, adjé 'li Ndili gba kpála-o. <sup>29</sup> Abhomu-o, u tsia zé. Okpála bhende amene bádha 'ngú-o, azúku ngubula nasia mukobho. Engú bini, okpála bhende amene siti 'ngú-o, azúku ngubula nasia mangimbo.»

*Yesu bha bini ngamene gumu gba 'Dyi e*

<sup>30</sup> Ngama-a, ma ti da namene 'he bini bhú ngu ma de. Ma ngakodho 'ngú maka li kpála atima ma-a ngapapa muma lie ko. Kaka-a, nakodho 'ngú gba ma-a ngbingbili. Padhá de, anga ma gili namene gumu gba ma-a de. Engú bini, ma ngagili mangbo namene gumu gba kpála inde atima ma ko. <sup>31</sup> I dú me ma du akpokpo 'ngú inde a atsia ma-a, engú ango-o de dú kukulu 'ngú de. <sup>32</sup> Engú bini, kpála koko ngakpokpo 'ngú gba ma-a ngae. Ma ambila me engú gba ma inde ani ngakpokpo e, a ko kukulu 'ngú. <sup>33</sup> Ngayi-e, yi atima okpála agba Djaa, ani atsia akpokpo kukulu 'ngú. <sup>34</sup> Ngama-a, ma ne gumu kpála ngu nakpokpo 'ngú gba ma-a ade. La-a, ma ngapapa mo-o ngubula me yi sia mukobho.

<sup>35</sup> Djaa nani maka eke inde u adhedhe e, inde ngatsi matsi. Ngayi-e, yi atsia akunda nani nakpi djali ngubula mbo nedhinga bedi li zi 'ke gba ani-o. <sup>36</sup> Engú bini, engú gba ma inde u ngakpokpo e, ane bhende gba Djaa mane. A ko bhende na kulu inde li 'Dyi ma apa me ma mene e-o. A moko, kulu inde ma ngamene e ngasuno me 'Dyi ma atima ma ngae. <sup>37</sup> 'Dyi ma inde atima ma-a, akpokpo di engú gba ma-a ngae. La-a, yi dje nga 'li ani belegu de bini, yi u nga la di ani de. <sup>38</sup> Eli gba ani-e ngadu bhú yi ade. Padhá de, anga yi ayala nabhuka kpála inde ani atima e-o. <sup>39</sup> Yi ngadjipi 'ngú pindji Bhuku gba Ebhe-e ndjindji, anga yi ngabundja

me yi asia mukobho na duduma bhúbhú. A la bhomu-o Bhuku inde ngakpokpo 'ngú gba ma-o! <sup>40</sup> Abana mo-o, yi kunda nago abhaka ma ngu nasia mukobho ango-o de.

<sup>41</sup> «Ma gili de me okpála dhogè ma-a de. <sup>42</sup> Engú bini, ma mbila yi ndjindji. Ma ambila me yi ne mukunda pi Ebhe ade. <sup>43</sup> 'Dyi ma atima ma ngae. La-a, yi sia ma de. I du la me kpála koko nde ago bhú ngu e, yi tsia sia ani! <sup>44</sup> Yi ngatoko liyi sunda yi. Yi gili de me Ebhe toko bha yi ngae de. Lele pi yi ti da nabhuka ma lie? <sup>45</sup> Yi abhundja de me ma a'ó yi bhú mangimbo kala 'Dyi ma ngama-a de. Kpála bhende a'ó yi bhú mangimbo-o, a ko Moidje inde yi a'o 'to yi 'to e ko. <sup>46</sup> I dú me yi bhúka Moidje kukulu-o, yi de abhúka di ma mabhuka. Padhá de, anga Moidje aye nani engú gba ma-o. <sup>47</sup> Engú bini, i du me yi nde bhuka engú inde ani aye e de-e, yi abhúka la 'li ma lele pi?»

## 6

*Yesu aha ezu pi obhosi kutu bhuluvue*

*(Tsia bhú Mat. 14:13-21; ne bhú Mlk. 6:30-44; di ne bhú Luk. 9:10-17.)*

<sup>1</sup> Pipita-a, Yesu akodho 'kpí li pápá koko na ekpè na Galilaya, inde u a'i di-e me ekpè na Tibeliade. <sup>2</sup> Bhiti okpála na bhighbiti adu akpata ani. Padhá de, anga u adu au ongamba 'ngú inde ani adu amene e li nakobho okpála na kuo-o. <sup>3</sup> Yesu atsia a'u apí 'ta. Oo, u atsia adulu ne omukpata gba e kuto. <sup>4</sup> A adu me anokomia na Pasika gba omaYuda nde akolo masikpe.

<sup>5</sup> Abhomu-o, Yesu atsia 'kpí, ani au bhiti okpála na bhighbiti ngago abhaka ani. Ani atsia ayi Filipino me: «Ní ti da nakala mapa su ngubula me okpála inde-e hana zu-o?» <sup>6</sup> (Yesu adu apa mo-o ngubula nale Filipino. Padhá de, anga ngaani Yesu-o, ani adu ambila engú inde ani



améne e ndjindji.) <sup>7</sup> Filipino atsia agie pi ani me: «Abana ya kala mapa ne lí denalio kámá bhisi-e, alé de me kpála ne kpála sia mbo-o de.» <sup>8</sup> Suka omukpata gba ani koko-o, Andili ndai Simo Piele, apa pi ani me: <sup>9</sup> «Ndili na bhobhoko bini si-i, a ka ani ne mapa na olodje\* bhuluvue di ne sungu bhisi. A la bhomu-o ni pi bhiti okpála inde-e?»

<sup>10</sup> Do Yesu de-e: «Yi pa pi okpála me u dulá kuto.» (Ulu adu li bili ango-o naali.) Okpála atsia adulu kuto. Obhosi adu masikpe de kutu bhuluvue. <sup>11</sup> Abhomu-o, Yesu aha mapa-o. Ani atsia agie heni pi Ebhe. Ani atsia agapa li okpála inde adu oo-o. Ani aha bhadi sungu-o pi uo moko li lele maka u adu akukunda lie ko. <sup>12</sup> Li okpála a'u'u lie, Yesu atsia apa pi omukpata gba e me: «Yi po bhúla dudu inde atigala-o, ngubula me asíti de.» <sup>13</sup> Dú mapa na olodje bhuluvue inde atigala-a, u apo bhúbhúla. A atsia abebedhe okíli ndjikpa ne ká bhisi.

<sup>14</sup> Li okpála au ngamba 'ngú inde li Yesu amene e lie, u atsia apa me: «A inde-e bha ndju polofeta inde a ayo me ani go píla doto-o!» <sup>15</sup> Yesu ambila me u ngakunda nago aholo ni ne kpéke me ni du ngámá. Abhomu-o, ani ayie, ani atsia anu matá kpi e kpi apí 'ta.

### *Yesu adhuku pí 'ngu*

*(Tsia bhú Mat. 14:22-33; di ne bhú Mlk. 6:45-52.)*

<sup>16</sup> A akolo lie tagolo-o, omukpata gba Yesu aké alingo ekpø-o. <sup>17</sup> U a'u bhú zabu bini u atsia aholo nagugulu, anu li pápá na Kapalanauma. La-a, ekpí abi li uo padhá me Yesu nde kolo nga li uo de. <sup>18</sup> Anvi adu ape kpekpeke. Kaka-a, engu-o aholo nadimba. <sup>19</sup> A abhaka me omukpata-a nde adhuku ne zabu-o masikpe de kilometele madhia. Li nedhinga bhomu-o, u au Yesu me ani nde ngadhuku pí 'ngu.

Ani akolo de zabu-o. Abhomu-o, u aholo nadje tsulu. <sup>20</sup> Engú bini, Yesu apa pi uo me: «A ko ma, yi adjé tsulu de!» <sup>21</sup> U adu akunda me o ha ani, amba o bi ani bhú zabu-o. La-a, zabu akolo bha kolo lingo 'gø li bili u adu anu lie-o.

### *Bhiti okpála agili Yesu*

<sup>22</sup> Li ekpí aseke lie, bhiti okpála inde atigala ayi 'ngu-o au bha koli zabu bini. La-a, u adu ambila ndjindji me Yesu 'u bhú zabu bhú dabili bini ne omukpata gba e de. Omukpata-a anu kpi o kpi. <sup>23</sup> Li nedhinga bhomu-o, ozabu koko ayie bhú gudhu na Tibeliade, atsia akolo de bili li okpála azu mapa li e pita li Ngámá agie heni lie pi Ebhe-o. <sup>24</sup> Li bhiti okpála bhomu-o au lie me Yesu ne omukpata gba e oo ade-e, u a'u'u bhú ozabu-o, u atsia agbida bhú Kapalanauma ngú nagili Yesu.

### *Yesu ne mapa na mukobho*

<sup>25</sup> U anu abhaka Yesu ayi 'ngu. Abhomu-o, u ayi ani me: «Musunu, mo okolo ei nadho?» <sup>26</sup> Yesu agie pi uo me: «Heni, ma apa pi yi na paká me, yi ngagili ma ka ongamba 'ngú inde yi au e ade. Yi ngagili mangbo ma ka mapa inde yi azu e, yi atsia a'u'u ne e má kpú kpú kpú-o!» <sup>27</sup> La-a, yi améne kulu ngubula ezu inde ngazi mazi-e de. Engú bini, yi mene mangbo ngubula ezu inde ngabhue, di ne bhende ngaha mukobho na dudama ko. Ngama, Ndili gba kpála-a, ma ahá ezu ango-o pi yi ngama. Padhá de, anga Ebhe 'Dyi ma a'o kasé na angu gba e li kute ma.»

<sup>28</sup> Abhomu-o, u atsia ayi ani me: «A ayo me ya mene pi ngú namene kulu maka li Ebhe akunda lie?» <sup>29</sup> Do Yesu pi uo me: «Kulu gba Ebhe-e, a ko me yi bhuka kpála inde ani atima e ko.»

<sup>30</sup> Abhomu-o, u atsia ayi ani me: «Mo oméne mangua ngamba 'ngú dho me ya u, amba ya bhuka mu-o? Kulu gba mu-o ne ni?» <sup>31</sup> Li

\* **6:9** 6:9 Mapa na olodje: A ko nani mapa na bhuku mase. Okpála na ndibhili ti nani da nakakala ndjindji.

onguo ogbi ya adu lie abhú 'gu-o, u azu mana maka u aye nani lie bhú Bhuku gba Ebhe-e me: «Ani aha mapa inde ayie abhú-lá-a pi uo ngú nazuzu.†»<sup>32</sup> Abhomu-o, Yesu agie pi uo me: «A moko, ma apa pi yi na paká me, Moidje ha mapa na abhú-lá-a pi yi ngae de. Engú bini, 'Dyi ma ngaha mapa na kukulu na abhú-lá-a pi yi ngae.<sup>33</sup> Padhá de, anga mapa inde li Ebhe ngaha e, a ko bhende ngayie abhú-lá, inde ngaha la di mukobho pi okpála na doto-o.»<sup>34</sup> Abhomu-o, u atsia apa pi Yesu me: «Ngámá, ha pi ya ndu 'kpi hana mapa bhomu!»

<sup>35</sup> Yesu agie pi uo me: «Ma ne mapa na mukobho. Kpála bhende ago abhaka ma-a, gumu 'zu méne ani belegu de bini. Kpála bhende abhuka la di ma-a, gumu 'ngu méne ani belegu de bini.<sup>36</sup> Engú bini, ma apa 'ngú inde-e pi yi apa. Yi au ma. La-a, yi bhuka de.<sup>37</sup> Ndu kpála hana inde li 'Dyi ma ngaha e muma-a, agó li pabili gba ma. La di-e, ndu kpála hana inde agó li pabili gba ma-a, ma bhike ani de.<sup>38</sup> Padhá de, anga ma ayie abhú-lá, ma ago ngú namene engú inde li kpála inde atima ma-a akunda e ko. Engú bini, ma go ngú namene naama 'ngú de.<sup>39</sup> Engú inde li kpála inde atima ma akunda e-e, a ngae inde: ndu okpála inde ani aha o muma hana, a ayo de me suka uo bini ngita-a de. Engú bini, a ayo me, ali sokpi-e, ma zuku ndu uo hana.<sup>40</sup> Padhá de, anga 'Dyi ma akunda me, ndu okpála hana inde au ma Ndili-e, inde abhuka la di ma-a, sia mukobho na duduma, amba ma zuku uo ali sokpi.»

<sup>41</sup> Abhomu-o, omaYuda aholo namene bhayiki li kute ani. Padhá de, anga ani apa nani me: «Ma ne mapa inde ayie abhú-lá.»<sup>42</sup> U atsia apa me: «A inde-e Yesu, ndili gba Djodjefu-o di? Ya mbila 'dyi ani ne 'hi ani hana. Lele pi ani apa lie

me ni ayie abhú-lá?»<sup>43</sup> Yesu agie pi uo me: «Yi 'o namene bhayiki sunda yi.<sup>44</sup> Kpála ti da nago abhaka ma de, i du me 'Dyi ma inde atima ma-a nde holo 'kpa ani ngae de ko. Ngama la di-e, ma azuku ani li sokpi.<sup>45</sup> Opolofeta aye engú inde-e me: «Ebhe asuno 'ngú pi ndu okpála hana.†» Kpála ne kpála inde adje 'li 'Dyi ma, inde asia la di nasuno gba ani-e, ago nabhaka ma.<sup>46</sup> Bhobhomu apa me, kpála bini u Ebhe de. Bha bini ma, kpála inde ayie agba Ebhe-e, ma au bha 'Dyi ma ngama.<sup>47</sup> A moko, ma apa pi yi na paká me, kpála inde abhuka-a, asia mukobho na duduma.

<sup>48</sup> Ngama-a, ma ne mapa na mukobho.<sup>49</sup> Onguo ogbi yi azu nani mana abhú 'gu. La-a, u atsia amu.<sup>50</sup> Engú bini, mapa bhende ayie abhú-lá-a, a ko bhende li kpála zu e, ani kpi de ko.<sup>51</sup> Ma ne mapa inde zu, inde ayie abhú-lá ko. I du me kpála nde azu mapa angoo, ani dú bhú mukobho na duduma. Mapa inde ma ahá e, a ko kute ma. Ma ngahaha me okpála na doto sia mukobho.»

<sup>52</sup> Li omaYuda adje 'ngú bhomu-o lie, u aholo amene kpekebhe sunda o kpekpeke. U adu apa me: «Lele pi kpála inde-e ti da naha kute e lie pi ní me ní zu-o?»<sup>53</sup> Abhomu-o, Yesu apa pi uo me: «A moko, ma apa pi yi na paká me: i du me yi nde zu kute ma, Ndili gba kpála de-e, i du la di me yi nde ndji ngute ma de-e, yi dú bhú mukobho de.<sup>54</sup> Kpála inde ngazu kute ma, inde la di ngandji ngute ma-a, ani bhú mukobho na duduma. Ngama-a, ma azuku la di ani ali sokpi.<sup>55</sup> Padhá de, anga kute ma-a, a ko ezu na kukulu. Ngute ma la di-e, a ko ehe nandji mandji na kukulu.<sup>56</sup> Kpála inde ngazu kute ma, inde la di ngandji ngute ma-a, ani ngadu bhú ma. Ma la di ngadu bhú ani.

† 6:31 6:31 Tsia bhú Eki. 16:4, 15; di ne bhú Ets. 78:24. † 6:45 6:45 Tsia bhú Isa. 54:13.

<sup>57</sup> 'Dyi ma inde atima ma-a, ani uu. Ma la di ngadu bhú mukobho ka ani. A bhadi moko, kpála inde azú ma-a, ani adú bhú mukobho ka ma. <sup>58</sup> A bhomu-o mapa inde ayie abhúlá ko. A maka bhende li onguo ogbi yi azu e, u atsia amu-o ade. Engú bini, kpála inde azú mapa inde-e, adú bhú mukobho na duduma.» <sup>59</sup> Yesu akpokpo ndu 'ngú bhomu-o li nedhinga inde ani adu asuno lie bhú 'ti nadje líli gba Moidje bhú Kapalanauma-o.

### *Eli inde ngaha mukobho na duduma*

<sup>60</sup> Pita u adje engú inde li Yesu apa e lie, bhelé na omukpata gba ani-e atsia apa me: «Eli inde-e, a kpekpeke! A ti da naziziba da?» <sup>61</sup> Engú bini, Yesu ambila me omukpata gba ni-e ngamene kpekebhe pindji 'ngú ango-o. Kaka-a, ani apa pi uo me: «Engú ango-o ngamene yi sisiti?» <sup>62</sup> A la yi u me ngama, Ndili gba kpála-a, ma nde nga'u li bili inde ma adudu nani lie kalanu-o? <sup>63</sup> Bua gba Ebhe-e ngaha mukobho ngae. Kpála-kuti ti da namene 'he bini de. Oeli inde ma apa e pi yi bhomu-o, a ko Bua inde ngaha mukobho. <sup>64</sup> Engú bini, okoko bhú ká yi bhuka de.» A na paká me Yesu ambila nani nayie li lilita me obhende i bhuka ni de-e ngao dho. Ani atsia ambila la di me apú ni daie. <sup>65</sup> Ani atsia apa matá me: «Kaka-a, ma apa nako pi yi me: «Kpála bini ti da nago gba ma de, i du me 'Dyi ma nde ha kpadji pi ani ngae de ko.»»

<sup>66</sup> Nayie li nedhinga bhomu-o, bhelé na omukpata gba ani-e a'o ká ani. U kpata matá ani de. <sup>67</sup> Abhomu-o, Yesu atsia ayi obhende ndjikpa ne ká bhisi-e me: «Ngayi di-e, yi akunda nagbida?» <sup>68</sup> Simo Piele agie pi ani me: «Ngámá, ya ti da nanu gba da? A ka mu ne oeli inde ngaha mukobho na duduma. <sup>69</sup> Ngaya-a, ya abhuka. Ya atsia ambila la di me mu ne Kpála na

bubu inde li Ebhe atima e ko.» <sup>70</sup> Yesu agie pi uo me: «Ngayi okpála ndjikpa ne ká bhisi-e, ma lo nako yi ngama di? La-a, suka yi bini ne djabulu!» <sup>71</sup> Ani adu apa 'ngú bhomu-o li Yuda, ndili gba Simo Isikaliote. Padhá de, anga belegu ani adu lie suka omukpata ndjikpa ne ká bhisi-e, adu kpála inde apú Yesu-o ngae.

## 7

### *Ondaise Yesu bhuka ani de*

<sup>1</sup> Pipita-a, Yesu aholo nadholo bhú ndu doto na Galilaya. Ani du akunda nadholo bhú ndu doto na Yudaya de, anga omaYuda adu akunda nabhele ani oo. <sup>2</sup> A adu me, anokomia na oti ngbangbali gba omaYuda nde akolo masikpe. <sup>3</sup> Abhomu-o, ondaise Yesu atsia apa pi ani me: «Yie si yiyie. Nu bhú ndu doto na Yudaya, ngubula me omukpata gba mu-o, ngauo di-e, u u ngamba 'ngú inde mu ngamene e ko. <sup>4</sup> Padhá de, anga kpála inde akunda me okpála u ngamba 'ngú inde ni ngamene e mau-o, ani méne bhú pepe de. I nde lie me mu nde ngamene ngua ngamba 'ngú bhomu-o, mene kala ndu okpála hana!» <sup>5</sup> Padhá de, anga ondaise ani-e, ngauo makpe-e, u bhuka nani ani de.

<sup>6</sup> Abhomu-o, Yesu atsia apa pi uo me: «Nedhinga gba ma-a kolo nga de. Engú bini, pi yi-e, nedhinga ndu 'kpí hana ndjindji. <sup>7</sup> Okpála na doto ti da nayala yi de. La muma-a, u ngayala ma. Padhá de, anga ma ngapa me kulu gba uo-o ndjindji ade. <sup>8</sup> Yi nu bhú anokomia-a nunu. Ngama-a, ma nú-u de. Padhá de, anga nedhinga gba ma-a kolo nga de.» <sup>9</sup> Pita ani apa lie mo-o, ani atsia atigala bhú ndu doto na Galilaya.

### *Yesu asuno pi okpála bhú 'ngbé 'ti Ebhe gba omaYuda*

<sup>10</sup> Li ondaise Yesu agbida lie bhú anokomia-a, ani atsia anu di oo. La-a, ani suno lie mbámá de. Ani

adu me ani nde awo lie mawo. <sup>11</sup> Abhomu-o, omaYuda adu agili ani bhú nedhinga na anokomia-o. U adu ayi me: «Ani su?» <sup>12</sup> U adu amene kpekebhe naali li 'ngú gba ani-e bhú ká okpála. Okoko adu apa me: «A ko bádha kpála.» Okoko adu apa me: «A mo-o ade, ani ngapite okpála.» <sup>13</sup> Engú bini, u du apa engú ango-o mbámbá de. Padhá de, anga u adu akpe omaYuda.

<sup>14</sup> Nedhinga li anokomia akolo lie tutu-o, Yesu anu bhú 'ngbé 'ti Ebhe gba omaYuda, ani atsia aholo nasuno pi okpála. <sup>15</sup> Abhomu-o, omaYuda angamba naali. U atsia adu ayi lio me: «Kpála inde-e mene balua de. Ani ambila la 'he me-e lele pi?» <sup>16</sup> Yesu agie pi uo me: «Nasuno gba ma-a ngayie ka ma ade. Engú bini, a ngayie ka Kpála inde atima ma ko. <sup>17</sup> I du me kpála nde akunda namene engú inde li Ebhe akunda e-e, ani ti da nambila me, ne me ayie ka Ebhe, ne me ma ngakpokpo 'ngú gba ma makpe. <sup>18</sup> Kpála bhende ngakpokpo 'ngú gba e makpe-e, ani ngagili me okpála dhөгө ni. Engú bini, kpála bhende ngagili me u dhөгө kpála bhende atima ni-e, ani ngapa 'ngú na kukulu. Ani pa la di eu de. <sup>19</sup> Moidje aha nani líli pi yi ngae. A mo-o adi? La-a, kpála bini bhú ká yi ngamene líli ango-o ade. Yi la ngagili nabhele ma ngubula ni?»

<sup>20</sup> Okpála agie pi ani me: «A bhú mu ne siti bua ! A ngagili nabhele mu da?» <sup>21</sup> Yesu agie pi uo me: «Ma amene bha koli ngamba 'ngú bini má kpikili, ndu yi hana yi atsia aholo nangamba! <sup>22</sup> Moidje aha nani líli pi yi me, yi du nato ongisi na bhosibhosi-e bhú gandja. Engú bini, líli ango-o yie ka Moidje de. A ayie ka onguo ogbi yi. Kaka-a, yi ngaziba nato kpála bhú gandja belegu bhú 'kpí naguo gba omaYuda . <sup>23</sup> Yi ngato kpála bhú gandja bhú 'kpí naguo ngú nakpe me yi agumu líli gba Moidje-e de. Ngama-a, ma

akobho kpála-kuti libhomu bhú 'kpí naguo. Yi la ngake 'ngú liyi muma tété ngú ni? <sup>24</sup> Yi akódho 'ngú maka yi ngauu lie de. Engú bini, yi kodho 'ngú ngbingbili!»

### *Yesu ne Masiya ?*

<sup>25</sup> Abhomu-o, okpála koko na gudhu na Yelusalema adu apa me: «A oo kpála inde u ngagili nabhele e di? <sup>26</sup> Yi tsitsia nga, ani ngagama 'ngú mbámbá bhú ká okpála. La-a, u pa 'ngú pi ani belegu de bini! Ongamási gba ni-e ambila bha ndju si ndjindji me Masiya ngae inde-e? <sup>27</sup> Padhá de, anga bili li kpála inde-e ayie li e, ya mbila hana. Engú bini, nedhinga inde li Masiya agó lie, kpála bini mbila bili inde ani ayie li e de.»

<sup>28</sup> Li nedhinga bhomu-o, Yesu adu asuno bhú 'ngbé 'ti Ebhe gba omaYuda. Abhomu-o, ani atsia asula me: «Yi mbila bha ndju ma ndjindji? Yi mbila la di bili inde ma ayie li e hana? Padhá de, anga ngama-a, ma go bhú angu gba ma makpe-e de. Engú bini, kpála inde atima ma-a, a ko kpála na ngbingbili . Kpála ango-o, yi mbila ani de. <sup>29</sup> Ngama-a, ma mbila ani ndjindji. Padhá de, anga ma ayie agba ani. Ani atima la di ma ngae.»

<sup>30</sup> Abhomu-o, u adu agili me, o holo ani. La-a, kpála bini bu 'kpa e li kute ani de. Padhá de, anga nedhinga gba ani-e le nga nani-i de. <sup>31</sup> La-a, okpála bhelé bhú ká bhiti okpála bhomu-o abhuka ani. U adu apa me: «Nedhinga li Masiya agó lie, ani améne ongamba 'ngú ané obhende li kpála inde-e amene e?»

### *U atima okpála ngú naholo Yesu*

<sup>32</sup> Omufalaisai adje engú inde li okpála adu apa e bhú tupele li 'ngú gba Yesu-o. Abhomu-o, ong-bengbe odimandé di ne omufalaisai atima omulila na 'ngbé 'ti Ebhe gba omaYuda ngú naholo ani. <sup>33</sup> Yesu atsia apa me: «Ma adú nga matá ne yi ngubula nedhinga bedi. Pipita-a,

ma tsia tápa agba kpála inde atima ma ko. <sup>34</sup> Yi agíli ma, engú bini, yi ú la ma de. Padhá de, anga yi ti da nanu li bili inde ma adji li e de.» <sup>35</sup> Abhomu-o, omaYuda atsia ayi lio sunda o me: «Ani anú li bili bhedho inde ní ti da nau ani lie de-e? Ani anú nabhaka omaYuda bhende atsambala bhú ká oGiliki-e? Ani anú asuno pi oGiliki? <sup>36</sup> Oeli inde ani apa e me: <Yi agíli ma, engú bini, yi ú la ma de, anga yi ti da nanu li bili inde ma adji li e de.> A akunda napa pi?»

### *Engu na mukobho*

<sup>37</sup> Ekpí na soso na anokomia-a, a adu ekpí na ngbéngbé. Li 'kpí angoo, Yesu alu malu, ani asala me: «Í du me kpála nde ne gamu 'ngu-o, a ayo me, ani go bhaka ma, amba ani ndji! <sup>38</sup> Kpála bhende ngabhuka ma, maka li Bhuku gba Ebhe-e apa lie me: <Engu adú aze li bua ani. Engu angoo, a ko engu na mukobho.>» <sup>39</sup> (Yesu adu apa 'ngú bhomu-o li Bua gba Ebhe inde li okpála inde abhúka ani asía e-o. Li nedhinga bhomu-o, Bua gba Ebhe-e go nga nani-i de. Padhá de, anga Yesu nde sia nga nani sangu gba e de.)

### *OmaYuda koko abhuka me Yesu ne Masiya*

<sup>40</sup> Okpála adje oeli inde li Yesu apa e-o. Okpála koko bhú ká uo atsia apa me: «Kpála inde-e bha ndju ne polofeta inde ya ngadjeke e kukulú!» <sup>41</sup> Okoko atsia apa me: «A ko Masiya!» Engú bini, okpála koko atsia apa matá me: «Masiya ti da nayie bhú ndu doto na Galilaya? <sup>42</sup> Padhá de, anga Bhuku gba Ebhe-e apa me, Masiya adú suka okpála na piga gba Davidi. Ani ayie la di bhú Beteleme, kuti inde li Davidi abhele bhú e ko.» <sup>43</sup> Abhomu-o, okpála atsia agbogbo bhusu o li 'ngú gba ani-o. <sup>44</sup> Okoko bhú ká uo adu akunda me, o holo ani. Engú bini, kpála bini bu 'kpa e li ani de.

### *Ongámási gba omaYuda ayala nabhuka Yesu*

<sup>45</sup> Abhomu-o, omulila na 'ngbé 'ti Ebhe gba omaYuda-a agie lio agba ongbengbe odimandø, di ne omuFalisai-o. U atsia ayi omulila-a me: «Yi go ne Yesu de ngabula ni?»

<sup>46</sup> Omulila-a agie me: «Kpála inde agama 'ngú maka kpála bhomu-o belegu ade bini!» <sup>47</sup> Abhomu-o, omuFalisai atsia agie pi uo me: «Ngayi di-e, yi a'o di me ani pite yi? <sup>48</sup> Bhú ká ongámási, i du di-e bhú ká omuFalisai-e, kpála bini abhuka ani uu? <sup>49</sup> Engú bini, bhiti okpála bhende abhuka ani bhomu-o, u mbila líli gba Moidje de. Ebhe abála uo mabala.»

<sup>50</sup> Nikodemu-o, a ko suka omuFalisai. Ani anu la di nani kalanu abhaka Yesu-o ngae. Ani apa pi uo me: <sup>51</sup> «Líli gba ní-e ziba naholo kpála padhá de. A ayo ngaiza me ní dje ani, amba ní mbila la di engú inde ani amene e ko.» <sup>52</sup> U agie pi ani me: «Ngamu di-e, mu ne kpála na ndu doto na Galilaya? Tanga nga oBhuku gba Ebhe-e ndjindji. Mu ú de me, polofeta bini ayie bhú ndu doto na Galilaya de.»

[ <sup>53</sup> Pipita-a, kpála ne kpála atsia agie lie agba e.\*

## 8

### *Ele na zabhe*

<sup>1</sup> Abhomu-o, Yesu anu apí 'ta na ondula na Olive. <sup>2</sup> Li ekpí aseke lie, bhú sikikpi-e, ani agie lie bhú 'ngbé 'ti Ebhe gba omaYuda. Ndu okpála hana adyudyo lio de ani masikpe. Yesu adu kuto, ani atsia aholo nasuno pi uo. <sup>3</sup> Abhomu-o, omusuno na líli gba Moidje, di ne omuFalisai ago ne ele bini. U akoto li ele angoo bha li nedhinga u adu akunda lio lie ne bhoko koko. U aha ani, u atsia a'o ani kala ndu okpála hana. <sup>4</sup> Do uo pi Yesu me: «Musuno, u akoto li ele inde-e bha li nedhinga

\* 7:53 7:53 Ongú nayie si akólo bhú 8:11, a bhú obhuku koko na didili-e ade.

u adu akunda lio lie ne bhoko koko. <sup>5</sup> Moidje aye nani pi ya bhú líli-e me, a ayo nabhili ongua olisi bhomu-o ne teme. Ngamu-o, mo opa naamu tété pi?»

<sup>6</sup> U adu apa engú bhomu-o ngú na'o ekú ngú ani. Padhá de, anga u adu agili nau engú inde u a'ó e pí ani-o. Engú bini, Yesu akita ne kuto, ani aholo naye 'he kuto bhú doto ne likpa e. <sup>7</sup> La-a, u azi bha kekele li nayi ani. Abhomu-o, ani ayie bhúlá, ani atsia apa pi uo me: «A ayo me kpála inde bhú ká yi, i mene nga naae siti 'ngú bini de-e, ani tulu ani ne teme na kalanu-o ngae.» <sup>8</sup> Pipita-a, Yesu akita matá ne kuto, ani atsia aholo bha naye ehe kuto bhú doto. <sup>9</sup> Li u adje oeli bhomu-o lie, ndu uo hana atsia aholo ayie bini ne bini. Akpo nayie ne obhelesi okpála. Yesu atigala bha ngae kpi e kpi. Òlò angoo atsia adu la bhadi li bili inde u a'o ani li e bhomu. <sup>10</sup> Abhomu-o, Yesu ayie matá bhúlá, ani ayi òlò angoo me: «Okpála angoo su? Kpála bini kodho 'ngú gba mu-o sisiti di?» <sup>11</sup> Òlò angoo agie me: «Musuno, ma u kpála bini de.» Do Yesu pi ani me: «Ngama di-e, ma kódho 'ngú gba mu-o sisiti de. Mu ti da natapa. La-a, nayie pi mbia inde-e, mo oméne matá siti 'ngú belegu de bini.»]

*Yesu ne zi 'ke pi okpála na píla doto*

<sup>12</sup> Abhomu-o, Yesu apa matá pi bhiti okpála-a me: «Ngama-a, ma ne zi 'ke pi okpála na píla doto. Kpála inde ngakpata ma-a, ani dhúku bhú biti de. Engú bini, a adú ka ani ne zi 'ke na mukobho.» <sup>13</sup> Abhomu-o, omuFalisai atsia apa pi ani me: «Mu ngakpokpo bhomu-o naamu 'ngú makpe! Engú inde mu ngakpokpo e bhomu-o, tata tété ade!»

<sup>14</sup> Yesu agie pi uo me: «A na paká moko me ma ngakpokpo 'ngú gba ma makpe. La-a, engú inde

ma ngakpokpo e, a ko kukulu 'ngú. Padhá de, anga ma mbila bili inde ma ayie li e, di ne bili inde ma adji li e ndjindji. Engú bini, ngayi-e, yi mbila bili inde ma ayie li e de. Yi mbila la di bili inde ma adji li e de. <sup>15</sup> Yi ngakodho 'ngú maka okpála. Ngama-a, ma kodho 'ngú gba kpála bini de. <sup>16</sup> I du la me, ma nde akodho 'ngú-o, nakodho 'ngú gba ma-a dú ngbingbili. Padhá de, anga ma kpi ma kpi ade, engú bini, 'Dyi ma inde atima ma-a, ya ne ani bhú dabili bini.

<sup>17</sup> U aye bhú líli gba yi makpe-e me: «I du me okpála bhisi nde akpokpo 'ngú-o, engú angoo dú ngbingbili.» <sup>18</sup> Ma ngakpokpo naama 'ngú makpe. 'Dyi ma inde atima ma-a, ngakpokpo la di engú gba ma ko.»

<sup>19</sup> Abhomu-o, u ayi ani me: «'Dyi mu su?» Yesu agie pi uo me: «Yi mbila ma de. Yi mbila la di 'Dyi ma de. Yi mbila ma uu-o, yi de ambila di 'Dyi ma ambila.» <sup>20</sup> Yesu apa 'ngú bhomu-o li nedhinga ani adu asuno lie bhú 'ngbé 'ti Ebhe gba omaYuda, li bili li osanduku inde u adu a'o tia bhú e adu li e-o. Kpála bini tsia bu nani 'kpa e li ani de, anga nedhinga gba ani-e kolo nga nani-i de.

*Yesu akpo 'ngú pindji bili inde ani ayie li e-o*

<sup>21</sup> Abhomu-o, Yesu atsia apa matá pi uo me: «Ma adji. Yi agili ma. La-a, yi amú bhú siti 'ngú gba yi-o. Yi ti da nanu li bili inde ma adji li e de.» <sup>22</sup> OmaYuda atsia ayi lio sunda o me: «Ani abhólò lie ne titi e? Kaka-a, ani apa me bili inde ni adji li e, ní ti da nakolo tété di?»

<sup>23</sup> Yesu agie pi uo me: «Ngayi-e, yi ayie kuto si. Engú la bini, ngama-a, ma ayie abhúlá. Ngayi-e, yi ne okpála na píla doto. Engú la bini, ngama-a, ma ne kpála na píla doto ade. <sup>24</sup> Kaka-a, ma apa igini pi yi me, yi amú bhú siti 'ngú gba yi ko. Padhá de, anga i du me yi nde bhuka

\* **8:24** 8:24 Ma uu: A bhomu-o 'ili gba Ebhe inde ani asuno e pi Moidje nedhinga ani atima ani lie bhú Edjipeto. Tsia bhú Eki. 3:14.

de me Ma uu-o\* de-e, yi amú bhú siti 'ngú gba yi ko.»<sup>25</sup> Abhomu-o, u ayi aní me: «Ngamu-o, mu ne da?» Yesu agie pi uo me: «A ko bha engú inde ma apa e pi yi, nayie li lilita-o.<sup>26</sup> Ma ne engú bhelé napapa, di ne nakokodho li 'ngú gba yi ko. Engú bini, ma ngapa pi okpála engú inde ma adje e ka kpála inde atima ma ko. Ngaani-e, aní ngapa ngbili 'ngú.»

<sup>27</sup> U mbíla de me aní ngapa pi o bhomu-o engú gba 'Dyi e de.<sup>28</sup> Abhomu-o, Yesu atsia apa pi uo me: «Nedhinga yi a'é'e ma, Ndili gba kpála lie ne abhúla-a, yi tsia mbíla me ngama-a, ma uu. Yi mbíla la di me, ma mene ehe bini bhú angu gba ma makpe de. Engú bini, ma ngapa bha bini engú inde li 'Dyi ma asuno e muma ko.<sup>29</sup> Ya ne kpála inde atima ma-a bhú dabili bini. Aní 'o ká ma kpi ma kpi de. Padhá de, anga ma ngamene ndu 'kpí hana engú inde i nganga li aní manga ko.»<sup>30</sup> Abhomu-o, okpála bhelé inde adje Yesu ngapa 'ngú bhomu-o, atsia abhuka aní.

### *Okpála bhende ne obalise na siti 'ngú*

<sup>31</sup> Abhomu-o, Yesu atsia apa pi omaYuda inde abhuka nani aní-e me: «Í du me yi nde alila eli inde ma ngapa e pi yi-e ndjindji-e, yi dú omukpata gba ma-a na kukulú.»<sup>32</sup> Yi mbíla la di ngbili 'ngú. Li ngbili 'ngú-o tsia gbégbe yi bhú bali.»

<sup>33</sup> U agie pi aní me: «Ya ne odi Abalahama. Ya du nga bali pi kpála belegu de bini. Lele pi mu ti da napa lie pi ya me, ya azé bhú bali maze-e?»<sup>34</sup> Yesu agie pi uo me: «A moko, ma apa pi yi na paká me: ndu kpála hana inde ngamene siti 'ngú-o, a ko bali ka siti 'ngú.»<sup>35</sup> Bali ngadu bhú piga ndu 'kpí hana ade. Engú bini, ndili na bhobhoko ngadu ndu 'kpí hana bhú piga.<sup>36</sup> Kaka-a, i du me Ndili-e nde agbegbe yi bhú bali-e, yi tsia zé bhú bali kukulú.<sup>37</sup> Ma mbíla hana me, yi

ne odi Abalahama. Engú la bini, yi ngagili nabhelo ma. Padhá de, anga yi ngayala 'li ma.<sup>38</sup> Ngama-a, ma ngakpokpo engú inde li 'Dyi ma asuno e muma ko. La ngayi-e, yi ngamene engú inde li 'dyi yi apa e pi yi ko.»

<sup>39</sup> Abhomu-o, u atsia agie pi aní me: «'Dyi ya-a, a ko Abalahama.» Do Yesu pi uo me: «Í dú me yi dú ne odi Abalahama-a, yi de méne 'ngú maka Abalahama.<sup>40</sup> Engú bini, mbia inde-e, yi ngakunda nabhelo ma, abana ma apa kukulú 'ngú inde ma adje e ka Ebhe lie pi yi-o. Abalahama mene la nani mo-o de.<sup>41</sup> Engú bini, ngayi-e, yi ngamene bhadi ngua kulu inde li 'dyi yi ngamene e-o.» U atsia agie pi aní me: «Ya ne ongisi na ngongo ade. Koli 'dyi ya bha bini, Ebhe.»

<sup>42</sup> Yesu apa pi uo me: «Li Ebhe dú bha ndju ne 'Dyi yi-e, yi de akunda ma. Padhá de, anga ma ayie agba Ebhe. Ma la di si bhú ngu aní. Ma go bhú ngu ma de. Engú bini, aní atima ma ngae.<sup>43</sup> Yi mbíla engú inde ma ngapa e pi yi-e de ka ni? A ko anga, yi ti da naje eli inde ma ngapa e pi yi-e de.<sup>44</sup> 'Dyi yi ne Djabulú. Yi la di ngamene 'ngú inde li 'dyi yi akunda e-o. A ko bhulú nabhelo kpála nayie li lilita. Aní lu bhú kukulú 'ngú belegu de bini. Padhá de, anga kukulú 'ngú bhú aní ade. Nedhinga inde aní ngapa eu lie, aní ngapa 'ngú gba e makpe. Padhá de, anga a ko kpála na eu. A ko la di 'dyi eu.<sup>45</sup> Engú bini, ngama-a, ma ngapa kukulú 'ngú. Yi ngabhuka ma ade kaka.<sup>46</sup> A ko kpála bhedho bhú ká yi-e, i ti da nasuno siti 'ngú inde ma amene e? Í du me ma nde ngapa kukulú 'ngú-o, ka ni yi bhuka la ma lie de-e?»<sup>47</sup> Kpála gba Ebhe-e ngadje 'li Ebhe. Engú bini, yi ne okpála gba Ebhe ade. Kaka-a, yi ngadjedje ade.»

### *Yesu akpo 'ngú pindji Abalahama*

<sup>48</sup> OmaYuda agie pi Yesu me: «Ya apa kukulú 'ngú de me mu ne kpála na Samalia, a la di bhú mu ne siti

bua?» <sup>49</sup> Yesu agie pi uo me: «Siti bua bhú ma ade. Engú bini, ma ngadhögö 'Dyi ma. La-a, ngayi-e, yi ngayala nadhögö ma. <sup>50</sup> Ngama-a, ma gili de me okpála dhögö ma-a de. 'Dyi ma ngagigili muma ngae. Ani la di ngakodho 'ngú-o ngae. <sup>51</sup> A moko, ma apa pi yi na paká me: kpála inde alila eli inde ma ngapa e, ani kpí dudu ma de.»

<sup>52</sup> OmaYuda atsia apa pi ani me: «Mbia inde-e, ya ambila la kukulu me abhú mu ne siti bua! Abalahama akpi. Opolofeta di amu. La ngamu-o, mu ngapa me: «Kpála inde ngalila eli inde ma ngapa e, ani kpí dudu ma de.» <sup>53</sup> 'Dyi ya Abalahama akpi. Mu ngabhundja me ni ngbéngbé ane ani? Opolofeta di amu. Mu la ngau nga naamu limu me ni ne da?»

<sup>54</sup> Yesu agie pi uo me: «I du me, ma du adhögö lima ngama makpe-e, nadhögö gba ma-a de padhá. 'Dyi ma ngadhögö ma ngae, a ko kpála inde yi nga'i e me: «A ko Ebhe gba ya-o» <sup>55</sup> me yi nde mbila la ani de ko. Engú bini ngama-a, ma mbila ani hana. I dú me ma pá me ma mbila ani de-e, ma de ne kpála na eu maka yi. Engú bini, ma mbila ani hana. Ma la di ngalila eli inde ani ngapa e-o. <sup>56</sup> 'Dyi yi Abalahama akpi nani djali naali. Padhá de, anga ani adu abhundja me ni au ekpi nago gba ma-o. Ani au, ani atsia akpi djali.» <sup>57</sup> Abhomu-o, omaYuda atsia apa pi ani me: «Ngamu-o, mu kolo nga ne kalanga ndjikpa bhuluvue de. Mu la ngapa me, ni au Abalahama!» <sup>58</sup> Yesu agie pi uo me: «A moko, ma apa pi yi na paká me kala me u zu Abalahama, «Ma uu.»» <sup>59</sup> Abhomu-o, u abha teme ngubula natutulú ani ne di. Engú bini, Yesu awo lie, ani atsia akoto bhú 'ngbé 'ti Ebhe gba omaYuda-o.

## 9

*Yesu akobho kpála inde u azu e me ani nde u 'kpí de*

<sup>1</sup> Li Yesu adu akodho 'kpí lie li kpadji-e, ani au kpála bini inde u azu e me ani nde u 'kpí de. <sup>2</sup> Omukpata gba ani ayi ani me: «Musuno, u azu kpála inde-e me ani nde u 'kpí de ka ni? A ko ka siti 'ngú gba ani makpe, ne me a ko ka siti 'ngú gba okpála inde azu ani?»

<sup>3</sup> Yesu agie me: «A ko ka siti 'ngú gba ani-e de. A ko la di ka siti 'ngú gba okpála inde azu ani-e de. Engú bini, u azu ani mo-o ngubula me okpála u ngamba 'ngú inde li Ebhe ngamene e bhú ani. <sup>4</sup> A ayo me ní mene kulu gba kpála inde atima ma-a nedhinga li ekpi nde nga lie ne ngbikpi-o. Padhá de, anga biti ngago, kpála bini ti da namene kulu de. <sup>5</sup> Nedhinga ma nde nga lie pála doto-o, ma ne zi 'ke pi okpála na pála doto.» <sup>6</sup> Pita ani apa lie mo-o, ani aku ngusu bhú doto. Ani akpedhelo doto ne di. Ani aha ngbedhe ango-o, apulu pí kó djila kpála inde i u 'kpí de ko. <sup>7</sup> Abhomu-o, Yesu atsia apa pi ani me: «Nu vulu bhúla mu bhú 'dú 'ngu navulu kute na Siloe.\*» ('Ili bhomu-o akunda napa me «U atima ani.») Ani anu, ani atsia avulu bhúla e. Ani agie lie me ani nde ngau 'kpí ndjindji!

<sup>8</sup> Okpála bhende asili kuti lingo ani, di ne obhende au ani kalanu me ani nde ne yoyo 'he-e, a adu ayi me: «A inde-e kpála adu nako adu kuto ngú nayo 'he-e di?» <sup>9</sup> Okoko adu apa me: «A ko ani.» Do okpála koko me: «A ko ani de. Engú bini, ani mana ani.» La-a, kpála ango-o adu apa me: «A ko bha-a ma.» <sup>10</sup> Abhomu-o, u ayi ani me: «Djila mu abhulu lie lele pi?» <sup>11</sup> Ani atsia agie me: «Kpála inde u a'i e me Yesu-o, amene ngbedhe, ani apulu pí kó djila ma. Ani atsia apa muma me: «Nu vulu bhúla mu bhú Siloe.» Ma anu oo. Pita ma avulu lima lie, ma aholo nau 'kpí!» <sup>12</sup> U ayi ani me: «Kpála ango-o su?» Ani agie me:

\* 9:7 9:7 'Dú 'ngu navulu kute na Siloe nani abhú aga na Yelusalema.



«Ma mbila de.»

*Omufalisai ayiyi kpála inde li djila e akobho-o*

<sup>13</sup> Abhomu-o, u ago ne kpála inde adu kalanu me ani nde u 'kpí de-e pi omufalisai . <sup>14</sup> Yesu amene nani ngbødhø, ani atsia abhulu djila ani ne di me a nde la ekpí nague gba omaYuda . <sup>15</sup> Abhomu-o, omufalisai ayi di ani me djila ani aholo au 'kpí lele pi. Ani agie pi uo me: «Ani apulu ko djila ma ne ngbødhø. Ma avulu lima, ma atsia aholo au 'kpí.» <sup>16</sup> Omufalisai koko atsia adu apa me: «Kpála amene engú inde-e, ani yie agba Ebhe de. Padhá de, anga ani ngalila líli na ekpí nague ade.» Engú bini, okoko atsia adu apa naao me: «Kpála na sisiti ti da namene ngua ongamba 'ngú me-e lele pi?» U atsia agbogbo bhusu o.†

<sup>17</sup> Abhomu-o, omufalisai ayi matá kpála inde li djila e abhulu-o me: «A la mu-o, mo opa naamu li 'ngú gba kpála inde abhulu djila mu-o pi?» Ani agie me: «A ko polofeta .»

<sup>18</sup> Engú bini, ongámási gba omaYuda kunda nani nabhuka de me, ani adu me ani nde u 'kpí de, ani atsia aholo au 'kpí-e de. Kaka-a, u atsia a'i okpála inde azu ani-o. <sup>19</sup> U ayi uo me: «Kpála inde-e, a ko ndili gba yi na paká? A na paká me yi azu ani me ani nde u 'kpí di? Ani la ngau 'kpí mbia inde-e lele pi?» <sup>20</sup> Okpála inde azu ani-e agie me: «Ya ambila me a ko ndili gba ya. Ya azu ani me ani nde u 'kpí de. <sup>21</sup> Engú la bini, maka ani ngau 'kpí lie mbia inde-e, ya mbila naaya de. Ya mbila la di de me abhulu djila ani da-ie de. Yi yi ani, ani abhele, ani ti da nakpokpo 'ngú gba e ngae makpe!» <sup>22</sup> Okpála inde azu ani-e apa nani mo-o, anga u adu akpe omaYuda. Padhá de, anga omaYuda adje nani lio me, i du me kpála nde aziba me Yesu ne Masiya , u de gbe ani bhú 'ti nadje líli gba

Moidje-e magbe. <sup>23</sup> Kaka-a, okpála inde azu ani-e apa nani me: «Ani abhele, ani ti da nakpokpo 'ngú gba e ngae makpe. Yi yi ani!»

<sup>24</sup> Abhomu-o, omufalisai a'i matá kpála inde adu nako me ani nde u 'kpí de-o. U atsia apa pi ani me: «Dhøgø Ebhe bhú napa kukulu 'ngú. Ya ambila me kpála inde akobho mu bhomu-o, a ko siti kpála.» <sup>25</sup> Kpála ango-o atsia agie me: «I du siti kpála, i du siti kpála de, ma mbila naama de. La-a, ma ambila koli 'ngú bini: ma du nako au 'kpí de, engú bini, mbia inde-e, ma ngau 'kpí.»

<sup>26</sup> Abhomu-o, u ayi matá ani me: «Ani amene ngú mu pi? Ani abhulu djila mu lele pi?» <sup>27</sup> Ani agie pi uo me: «Ma apa igini pi yi apa. Engú bini, yi dje ma de. Yi akunda matá nadjedje ne toto-o? Atigala yi ngakunda me yi kolo di omukpata gba ani.» <sup>28</sup> U asosobho ani. U atsia apa pi ani me: «Mu mangbo ne mukpata gba kpála bhomu-o ngamu! Ngaya-a, ya naaya ne omukpata gba Moidje . <sup>29</sup> Ya ambila me Ebhe akpokpo 'ngú pi Moidje. Engú bini, ngaani-e, ya mbila de me ani ayie naae su-oie de!»

<sup>30</sup> Kpála ango-o agie pi uo me: «A ko 'ngú na ngangamba. Yi mbila bili inde ani ayie li e de. La-a, ani abhulu djila ma! <sup>31</sup> Ní mbila hana me Ebhe djedje okpála na sisiti de. Engú bini, ani djedje ndu kpála hana inde ngamanga ani, inde di ngamene engú ani akunda e-o. <sup>32</sup> Nani akpo lie, kpála bini dje nga de me u ngapa me kpála bini abhulu djila kpála inde u azu e me ani nde u 'kpí de-e de. <sup>33</sup> I dú me kpála inde-e yie agba Ebhe de-e, ani de tí da namene 'he bini de.» <sup>34</sup> Abhomu-o, u agie pi ani me: «Ngamu-o, 'lá mu libhomu bhú siti 'ngú nayie maka nani u azu mu lie. Mu la ngakunda nasuno 'ngú pi ya?»

† 9:16 9:16 Si-e, omufalisai au me li Yesu akobho kpála lie bhú 'kpí nague, ani amene bhomu-o kulu. La-a, líli gba Moidje ziba nani namene kulu bhú 'kpí nague de.

U atsia agbe ani bhú 'ti nadjé líli-e kilidjo.

### *Okpála i u 'kpí kùkù de*

<sup>35</sup> Yesu adje me omuFalisai agbe kpála inde li djila e akobho-o kilidjo. Yesu anu abhaka ani, ani atsia ayi ani me: «Mo obhuka Ndili gba kpála-a abhuka?» <sup>36</sup> Ani agie pi ani me: «Musunu, kpála ango-o, a ko da, amba ma bhuka ani-e?» <sup>37</sup> Yesu agie pi ani me: «Mo ou ani au. Ani ngagama 'ngú ne mu mbia inde-e ngae.» <sup>38</sup> Do kpála ango-o me: «Ngámá, ma abhuka.» Ani atsia atutu lipuku e kuto kala Yesu.

<sup>39</sup> Abhomu-o, Yesu atsia apa pi ani me: «Ma ago píla doto ngú nakodho 'ngú. Ma ago ngubula me okpála bhende i u 'kpí de-e, u u 'kpí, amba okpála bhende ngau 'kpí-e, 'o nau 'kpí.»

<sup>40</sup> OmuFalisai inde adu de ani oo, adje oeli bhomu-o. U atsia ayi ani me: «Ngaya di-e, ya u 'kpí di?»

<sup>41</sup> Yesu agie pi uo me: «Yi dú ne okpála bhende i u 'kpí de-e, yi de bhú siti 'ngú ade. Engú bini, maka yi apa lie me: «Ya ngau 'kpí-e, yi nga bha ne okpála na sisiti.»

## 10

### *Yesu ne mülila na babadha gba okandele*

<sup>1</sup> Yesu apa me: «A moko, ma apa pi yi na paká me: kpála inde i li bhú aga gba okandele li bhobho-o de-e, engú bini, inde nga'u li pabu aga li pápá koko-o, kpála ango-o ne bhulu 'zi. Ani la di ne bhulu nagbulu 'he gba okpála ne kpéke. <sup>2</sup> Kpála inde ali la naae li bhobho-o, a ko mülila gba okandele-o. <sup>3</sup> Mülila na 'bhø aga-nga'u pi ani. Okandele-o ngadje la di 'li ani. Ani nga'i okandele gba e bini ne bini li 'li e. Ani la di ngapandja uo kilidjo. <sup>4</sup> Li ani apandja uo hana lie kilidjo-o, ani ké kala uo, u tsia holo nakpata ani. Padhá de, anga u mbila 'li ani hana. <sup>5</sup> Engú bini, kpála bhende u mbila e

de-e, u kpáta ani de. U kpé de ani tsutsu. Padhá de, anga u mbila 'li ani de.»

<sup>6</sup> Yesu akpokpo gbitaku bhomu-o pi okpála inde adu adje ani-o. La-a, u mbila nani ta engú inde ani adu apa e pi uo-o de.

<sup>7</sup> Abhomu-o, Yesu atsia apa matá me: «A moko, ma apa pi yi na paká me: ma ne 'bhø aga gba okandele-o.

<sup>8</sup> Ndu okpála hana inde ago muma kalanu-o, a ko obhulu 'zi. A ko la di obhulu nagbulu 'he gba okpála ne kpéke. Engú bini, okandele-o dje uo de. <sup>9</sup> Ngama-a, ma ne 'bhø bhoti. Kpála inde alí li pá bili gba ma-a, ani kóbho. Ani tí da nali, ani kóto, ani tsia sía di ehe nazu mazu. <sup>10</sup> Bhulu 'zi ago bha naae ngubula nazi 'he. Ani ago ngubula nabhøbhøle mabhøle. Ani ago ngubula nasisiti masiti. La ngama-a, ma ago ngubula me okandele sia mukobho, u sia mukobho ango-o bhelé.

<sup>11</sup> Ma ne bádha mülila gba okandele. Mülila na babadha gba okandele-o bedhe ngú naha mukobho gba e pi okandele gba e-o.

<sup>12</sup> Kpála inde ngamene kulu bha bini ngubula tia-a, a ko kùkù mülila gba okandele-o de. A ko okandele ka ani de. Li ani u me sia ngago-o, ani há holo, ani 'ó ká uo. Abhomu-o, li sia-a tí pi uo, ani tsia tsámbara uo.

<sup>13</sup> Padhá de, anga ani ngamene bha naae kulu ngubula tia. Ani la di ne ndjinga uo ade. <sup>14-15</sup> Ngama-a, ma ne mülila na babadha gba okandele. Maka li 'Dyi ma ambila ma lie, ma atsia ambila di ani-e, ma ambila okandele gba ma-o, okandele gba ma-a atsia ambila di ma. Ma la di bedhe ngú naha mukobho gba ma-a pi okandele gba ma-o. <sup>16</sup> A ka ma ne okandele koko inde bhú aga inde-e ade. A ayo me ma go di ne uo. U adjé 'li ma. U akólo koli piga okandele bini, u tsia dú ne koli mülila bini.

<sup>17</sup> 'Dyi ma ngakunda ma, anga ma bedhe ngú naha mukobho gba ma-a, amba pipita-a, ma sia matá. <sup>18</sup> Kpála

bini ha mukobho gba ma-a ne kpéke de. Engú bini, ma ngahaha bha ngama. Ma ne angu ngú nahaha, ma la di ne angu ngú nasisia. Ma asia líli bhomu-o ka 'Dyi ma.»

<sup>19</sup> OmaYuda atsia agbogbo matá bhusu o ka oeli bhomu-o. <sup>20</sup> Bhelé bhú ká uo adu apa me: «A abhú ani ne siti bua ! A ko la di bhulu pele! Yi ngadje ani ka ni?» <sup>21</sup> Okoko adu apa me: «Kpála inde bhú e ne siti bua-a ti da napa 'ngú mo-o de. Siti bua ti da nabhulu djila okpála inde i u 'kpí de-e uu?»

### *OmaYuda ayala Yesu*

<sup>22</sup> Abhomu-o, bhú gudhu na Yelusalema-a, bhú nedhinga na zini-e, u amene anokomia Naleke 'ngbé 'ti Ebhe gba omaYuda-o . <sup>23</sup> Bhú 'ngbé 'ti Ebhe-e , Yesu adu adhuku sa ngba 'ti gba Salomo-o. <sup>24</sup> Abhomu-o, omaYuda asa lio deno ani ngbalina. U atsia apa pi ani me: «Bua ya adu bha ka mu me a nde alu abhúla má gba me-e ngubula ekpi madho? I du me mu nde ne Masiya-a , mu de pa pi ya mbamba.» <sup>25</sup> Yesu agie pi uo me: «Ma apa pi yi apa. Engú bini, yi ziba ma de. Ongamba 'ngú inde ma ngamene e ne 'li 'Dyi ma-a, a ngakpokpo 'ngú gba ma-o. <sup>26</sup> Engú bini, yi bhuka de anga yi ne okandole gba ma-a ade. <sup>27</sup> Okandole gba ma-a ngadje 'li ma. Ma ambila uo, u la di ngakpata ma. <sup>28</sup> Ma ngaha mukobho na duduma pi uo. U mú duduma de. Kpála bini tí la di da nagbulu uo ka ma de. <sup>29</sup> 'Dyi ma inde aha uo mama-a, ani ngbéngbé ane ndu 'ngú hana. Kpála bini tí la di da nagbulu 'he bini ka 'Dyi ma de. <sup>30</sup> Ngaya ne 'Dyi ma-a, koli ya bha bini.»

<sup>31</sup> Abhomu-o, omaYuda abha matá teme ngú natutulú ani ne di. <sup>32</sup> Yesu agie pi uo me: «Obabadha 'ngú bhelé inde ma asuno e pi yi-e, ayie ka 'Dyi ma. A ko ngubula obabadha 'ngú bhedho yi ngakunda nabhole

ma lie ne teme?» <sup>33</sup> OmaYuda agie pi ani me: «A ko de me ya ngakunda nabhole mu ne teme ka badha 'ngú-o de. Engú bini, a ko anga mu ngasobho Ebhe. Ngamu inde bha ne kpála-kuti-e, mu nga'o limu maka Ebhe.»

<sup>34</sup> Yesu agie pi uo me: «U aye bhú líli gba yi-e me, ngama-a, ma apa me: <Yi ne oebhe.> <sup>35</sup> Ya ambila me, u ti da nabulu engú inde li Bhuku gba Ebhe-e apa e de. Okpála inde li eli gba Ebhe-e akolo nani gba o-o, u a'i uo me oebhe. <sup>36</sup> Engú bini ngama-a, Ebhe abhu ma, ani atsia atima ma píla doto. Lele pi yi ngapa la lie me ma ngasobho Ebhe, anga ma ngapa me ma ne Ndili gba Ebhe-e? <sup>37</sup> I du me ma nde ngamene ngamba 'ngú gba 'Dyi ma ade-e, yi abhúka ma de. <sup>38</sup> I du la me ma nde ngamene ngamba 'ngú gba 'Dyi ma-a, abana yi bhuka ma de-e, yi de bhuka ngabha mbo ongamba 'ngú ang-o. Yi bhuka ongamba 'ngú ang-o ngubula nambila ndjindji me 'Dyi ma ngakobho bhú ma, ma la di ngakobho bhú ani.» <sup>39</sup> Abhomu-o, u agili matá naholo ani. Engú bini, ani atsia akobho sa 'kpa uo.

<sup>40</sup> Yesu atsia agie matá lie ayi 'ngu na Djuludani, li bili inde li Djaa adu nani abatisa okpála li e kalanu-o. Ani atsia adu oo. <sup>41</sup> Okpála bhelé ago nabhaka ani. U adu apa me: «Djaa mene ngamba 'ngú belegu de bini. Engú bini, ndu 'ngú hana inde ani apa nani e pindji kpála inde-e, a ko kukulu 'ngú.» <sup>42</sup> Oo, okpála bhelé abhuka ani.

## 11

### *Ladjalo akpi*

<sup>1</sup> Kpála bini inde adu 'li e me Ladjalo, asi kuo. Ani adu nadu bhú Betania, kuti li Malia ne ndai e Malata adu nadu bhú e-o. <sup>2</sup> Malia ne ole inde atuko nani mangotsi li 'dhu Ngamá, ani atsia akuo ne

† 10:34 10:34 Tsia bhú Ets. 82:6.

sundjo e-o. Ladjalo inde adu ne kuo-o, nani ne ndai ani. <sup>3</sup> Ondaise ani na olisilisi bhisi bhomu-o, atima kpála ngú napa pi Yesu me: «Ngámá, alí kpála mo okukunda e ne kuo.» <sup>4</sup> Li Yesu adje engú bhomu-o lie, ani atsia apa me: «Kuo bhomu-o ngubula nabhele ani mabhele ade. Engú bini, a ngubula naha sangu pi Ebhe. A ko la di ngubula me ngama, Ndili gba Ebhe-e, ma sia sangu bhúbhú.»

<sup>5</sup> Yesu adu ne mukunda pi Malata, ne ndai e na oelø, di ne Ladjalo naali. <sup>6</sup> La-a, ani adje lie me alí Ladjalo ne kuo-o, ani amene matá 'kpí bhisi li bili abhaka me ani nde li e-o. <sup>7</sup> Pipita-a, ani apa pi omukpata gba e me: «Ní gie matá liní bhú ndu doto na Yudaya.» <sup>8</sup> Omukpata-a apa pi ani me: «Musuno, a mene nga 'kpí bhelé de, omaYuda adu nako agili nabhele mu ne teme oo. Mo odji matá bha oo?» <sup>9</sup> Yesu agie pi uo me: «Ngbikpi ne saa ndjikpa ne ká bhisi. A mo-o adi? I du me kpála nde ngadhuku ne ngbikpi-e, ani dó 'dhu e de. Padhá de, anga ani ngau zi 'kpí na doto inde-e ndjindji. <sup>10</sup> Engú bini, i du la me kpála nde ngadhuku sukpe-e, ani dó 'dhu e. Padhá de, anga ani li zi 'kpí ade.»

<sup>11</sup> Pita li Yesu apa 'ngú bhomu-o lie, ani atsia apa pi uo me: «Ladjalo, olia ní-e, ani ala. Engú bini, ma adji, amba ma zuku ani.» <sup>12</sup> Abhomu-o, omukpata gba ani-e atsia apa pi ani me: «Ngámá, i du me ani nde tila-a, ani dú bhú mukobho.» <sup>13</sup> A na paká me Yesu adu apa me Ladjalo akpi. Engú bini, omukpata-a adu abhundja naao me ani akpo 'ngú pindji ela inde li okpála alala e-o. <sup>14</sup> Abhomu-o, Yesu atsia apa pi uo mbámbá me: «Ladjalo akpi. <sup>15</sup> Ma ne djali pi yi anga ma du nako oo de, amba yi bhuka ma. Engú bini, ní nu nabhaka ani!» <sup>16</sup> Abhomu-o, Tuma (inde u agisila 'li e me Bhuko-o), apa pi omukpata koko me: «Nganí-e, ní nu di oo, ngubula me ní mu ne

Musuno bhú dabili bini.»

### *Malata anu nako lie ne Yesu*

<sup>17</sup> Li Yesu akolo lie, ani abhaka me u azi Ladjalo azi, a nde ane nga 'kpí badha. <sup>18</sup> Kutí na Betania du nani de gudhu na Yelusalema masikpe de kilometele bata. <sup>19</sup> A abhaka me omaYuda bhelé nde ago oo ngú nateteke Malata ne Malia ka li ndai uo na bhobhoko-o akpi lie ko.

<sup>20</sup> Li Malata adje lie me Yesu akolo de kuti masikpe-e, ani anu akø lie ne ani li kpadji. Engú bini, Malia adu naae akuti. <sup>21</sup> Abhomu-o, Malata atsia apa pi Yesu me: «Ngámá, mu dú nako si-e, ndai ma de kpi de. <sup>22</sup> Engú bini, ma ambila me belegu mbia inde-e, Ebhe ti da naha ndu 'he hana inde mo oyó e ka ani-e pi mu.» <sup>23</sup> Yesu apa pi ani me: «Ndai mu azúku mazuku.» <sup>24</sup> Malata agie pi ani me: «Ma ambila me ani azúku li 'kpí li okpála inde amu-o, azúku lie li sokpi-o.»

<sup>25</sup> Yesu apa pi ani me: «Kpála nazuku okpála-a, a ko ma. Kpála naha la di mukobho pi okpála-a, a ko ma. Kpála inde abhuka ma-a, abana ani kpi, ani kóbho. <sup>26</sup> La di-e, kpála ne kpála inde bhú mukobho, inde abhuka la di ma-a, ani kpi duduma de. Mo obhuka mo-o?» <sup>27</sup> Malata agie me: «A moko, Ngámá, ma abhuka me mu ne Masiya, Ndili gba Ebhe. Kpála inde a ayo me ani go pila doto ko.»

### *Malia anu di nako lie ne Yesu*

<sup>28</sup> Pita ani apa 'ngú bhomu-o lie, Malata anu a'i ndai e Malia. Do ani pi ani bhú tupele me: «Musuno aoo. Ani nga'i mu.» <sup>29</sup> Li Malia adje lie mo-o, ani ayie kolo bhúlá má kia! Ani atsia anu abhaka Yesu. <sup>30</sup> A adu me Yesu nde kolo nga bhú kuti na Betania de. Engú bini, ani adu ngabha li bili inde li Malata anu akø lie ne ani li e ko. <sup>31</sup> Li omaYuda inde adu abhú 'ti ngú nateteke Malia au lie me ani ayie bhúlá ne nakoto kilidjo bhú holo-o, u atsia akpata ani. Padhá de, anga u adu abhundja naao me ani adji aku 'gba apí lata.

<sup>32</sup> Malia akolo li bili li Yesu adu li e-o. Ani au Yesu lie, ani ati bhú li 'dhu ani. Ani atsia apa pi ani me: «Ngámá, mu dú nako si-e, ndai ma de kpi de.» <sup>33</sup> Yesu au me ani ngaku 'gba di ne okpála inde ago ne ani bhú dabili bini-o. Ani asia likabhu naali li bua e. Mabhundja gba ani-e atsia angbingi di. <sup>34</sup> Abhomu-o, ani atsia ayi uo me: «Yi azi ani su?» U agie pi ani me: «Ngámá, gogo, amba mu u.» <sup>35</sup> Yesu aku 'gba. <sup>36</sup> Abhomu-o, omaYuda atsia apa me: «Yi u maka ani akunda nako ani lie ko!» <sup>37</sup> Engu bini, okpála koko bhú ká uo atsia apa me: «Ngaani inde abhulu nako djila kpála inde i u kpi de-e, ani ti da nako namene de me Ladjalo akpi de-e di?»

### *Yesu azuku Ladjalo*

<sup>38</sup> Abhomu-o, Yesu asia matá likabhu naali li bua e. Ani anu abhu lata. A adu nani lata inde u adji e bhú teme. U ani nani bhobho ne teme na ngbéngbé. <sup>39</sup> Abhomu-o, Yesu atsia apa me: «Yi 'e teme-o.» Malata, ndai kpála inde akpi-e, apa pi ani me: «Ngámá, se ani aholo napu aholo. Padhá de, anga ani amene nga saté 'kpi badha.» <sup>40</sup> Yesu agie pi ani me: «Ma pa igini pi mu de me, i du me mu nde abhuka ma-a, mu ú sangu gba Ebhe-e di?» <sup>41</sup> Abhomu-o, u a'e teme-o. Yesu atsia 'kpi ne bhúla, ani atsia apa me: «'Dyi ma, ma ngagie heni pi mu, anga mo odje ma. <sup>42</sup> Ma ambila ndjindji me mu ngadje ma ndu 'kpi hana. Ma ngapapa mo-o ka okpála inde asa lio dengo ma inde, amba u bhuka me, mo otima ma ngamu.» <sup>43</sup> Ani apa 'ngu bhomu-o lie, ani asula kpekpeke me: «Ladjalo, koto ei!» <sup>44</sup> Ladjalo akoto. Ani akoto me 'dhu ani, di ne 'kpa ani nde agbigbite lie ne opapala bongo . Bhúla ani nde agbite la di lie ne bongo. Yesu atsia apa pi uo me: «Yi bhulu ani, amba yi 'o ani, ani tapa.»

### *Ongámási gba omaYuda adje lio ngu nabhole Yesu*

*(Tsia bhú Mat. 26:1-5; ne bhú Mlk. 14:1-2; di ne bhú Luk. 22:1-2.)*

<sup>45</sup> Abhomu-o, omaYuda bhelé bhú ká okpála inde ago gba Malia au engu inde li Yesu amene e-o. U atsia abhuka Yesu. <sup>46</sup> Engu bini, okoko bhú ká uo anu abhaka omuFalisai . U akpokpo 'ngu inde li Yesu amene e pi uo. <sup>47</sup> Abhomu-o, ongbengbe odimandé gba Ebhe , di ne omuFalisai apo bhúla o bhú 'ngbé bula. U atsia apa me: «Kpála inde-e ngamene ongamba 'ngu bhelé. Ní améne si pi?» <sup>48</sup> I du me ní nde a'o me ani du bha anu ne di ne kalanu me-e, ndu okpála hana bhúka ani. Pipita-a, okpála na gudhu na Loma kólo ne angu. U bhéle 'ngbé 'ti Ebhe gba ní-o. U tsia bhéle la di kuti gba ní-o!»

<sup>49</sup> Kpála bini adu bhú ká uo. A adu 'li ani me Kaifa. Ani adu bhele kpála gba odimandé bhú kalanga bhomu-o ngae. Ani apa pi uo me: «Ngayi-e, yi mbila 'ngu de! <sup>50</sup> Yi mbila de me a pi yi ndjindji me kpála bini kpi pi ndu okpála hana, amba kuti libhomu akpi de-e di?» <sup>51</sup> La-a, ani du apa 'ngu bhomu-o bhú ngu e de. Engu bini, a adu la lie me ani nde ne bhele kpála gba odimandé bhú kalanga bhomu-o ngae-e, ani atsia apa 'ngu maka polofeta me: «A ayo me Yesu kpi ngubula kuti gba omaYuda-o. <sup>52</sup> Ani kpi bha bini ngubula omaYuda de. Engu bini, ani kpi ngubula me ni po bhúla ongisi gba Ebhe inde atsambala ne bili ngangá-a bhú piga bini.»

<sup>53</sup> Nayie li 'kpi bhomu-o, ongámási gba omaYuda atsia adje lio me o bhole Yesu. <sup>54</sup> Kaka-a, Yesu du matá adholo mbámá bhú ká omaYuda de. Ani atapa bhú gudhu na Efalaimé, bhú ndu doto inde de egu-o. Abhomu-o, ani atsia adu ne omukpata gba e oo.

<sup>55</sup> Pasika gba omaYuda akolo masikpe. Kaka-a, okpála bhelé na kuti ango-o atsia anu bhú gudhu

na Yelusalema ngubula me o vulu lio, amba o du pi Ebhe bubu kala anokomia-o . <sup>56</sup> Abhomu-o, u adu agili Yesu. U alulu bhú 'ngbé 'ti Ebhe gba omaYuda-o. U atsia adu ayi lio sunda o me: «Yi abhundja pi? Ani agó bha ndju bhú anokomia inde-e mago? Ne me, ani gó-o de?» <sup>57</sup> Ongbengbe odimandø gba Ebhe, di ne omuFalisai aha nani líli me: «ƒ du me kpála nde ambila bíli inde li Yesu nde lie-e, ani de pa, amba u nu holo ani.»

## 12

*Malia atuko mungotsi li 'dhu Yesu (Tsia bhú Mat. 26:6-13; di ne bhú Mlk. 14:3-9.)*

<sup>1</sup> Abhomu-o, ekpi madhia kala Pasika-a, Yesu anu bhú kuti na Betania. A bhomu-o bíli inde li Ladjalo, kpála inde li Yesu azuku e adu nadu li e-o. <sup>2</sup> Oo, u aha ezu pi ani, Malata atsia adu a'o'o kala ani. Ladjalo atsia adu di bhú ká okpála inde adu azu 'he bhú dabili bini ne Yesu-o. <sup>3</sup> Abhomu-o, Malia aha gili bini inde li mungotsi na mase naali adu bhú e-o. U amene nani mungotsi ango-o bha li ndula inde 'li e me nalade.\* Ani aha, ani atuko li 'dhu Yesu. Ani akuo 'dhu ani ne sundjo e. Bádha se mungotsi ango-o atsia aha eti-e libhomu.

<sup>4</sup> Engú bini, Yuda Isikaliete, saka omukpata gba Yesu, kpála inde apu ani pi obhulu yala-a, atsia apa me: <sup>5</sup> «A ayo igini de me u tsindji mungotsi inde-e li lí denalio kámá bata, amba u ha falanga ango-o pi obhulu ndibhili-e di?» <sup>6</sup> La-a, a ko de me ani apa mo-o, anga ani adu ne ndjinga obhulu ndibhili-e de. Engú bini, a ko anga ani adu bhulu 'zi. Padhá de, anga ani adu la alila gba tia lie ngae-e, ani adu azi tété. <sup>7</sup> Engú bini, Yesu atsia apa me: «'O ølø bhomu! Padhá de, anga engú inde ani amene e, a ngubula ekpi inde

u azi ma lie bhú lata ko. <sup>8</sup> Padhá de, anga yi adu bhú dabili bini ne obhulu ndibhili ndu 'kpi hana. Engú la bini, ngama-a, ní dú ne yi ndu 'kpi hana de.»

*Ongbengbe odimandø adje lio ngu nabhøø Ladjalo*

<sup>9</sup> Abhomu-o, bhiti omaYuda adje me Yesu abhu kuti na Betania, u atsia anu oo. U nu oo bha bini ngubula Yesu de, engú bini, u anu di me o u Ladjalo inde li Yesu azuku e-o. <sup>10</sup> Abhomu-o, ongbengbe odimandø gba Ebhe-e atsia adje lio me o bhøø di Ladjalo. <sup>11</sup> Padhá de, anga omaYuda bhelé adu a'o ká uo, u atsia adu abhuka Yesu ka engú gba Ladjalo-o.

*Yesu ali bhú gudhu na Yelusalema (Tsia bhú Mat. 21:1-11; ne bhú Mlk. 11:1-11; di ne bhú Luk. 19:28-40.)*

<sup>12</sup> Ekpi bhe pipita-a, bhiti okpála na bhibhiti inde ago bhú anokomia na Pasika adje me Yesu adji bhú gudhu na Yelusalema. <sup>13</sup> Abhomu-o, u abha 'kpa ngulu, u aze ngu nanu nakø lio ne ani. U atsia adu asusula me:

«Sangu pi Ebhe!

A ayo me Ebhe Ngámá tuko bisagu pi kpála inde ngago ne 'li ani-o!

A ayo me Ebhe tuko bisagu pi 'ngbé Ngámá gba omafsalaele-o!†»

<sup>14</sup> Yesu au ndili punda, ani atsia a'u pi 'ngbu ani maka li Bhuku apa lie me:

<sup>15</sup> «Gudhu na Siona , mo odjé tsulu de!

Tsitsia, 'ngbé Ngámá gba mu-o ngago,

ani adu pi 'ngbu ndili punda na øøø.†»

<sup>16</sup> Li nedhinga bhomu-o, omukpata gba ani-e mbila nga nani ta engú ango-o de. La li nedhinga inde li Yesu asia sangu gba e lie, u atsia abhundja me u aye nani ongu bhomu-o

\* **12:3** 12:3 Nalade: A ko mungotsi inde u amemene e li 'kpa ulu. Tsia bhú Mat. 26:7. † **12:13** 12:13 Tsia bhú Ets. 118:25-26. † **12:15** 12:15 Tsia bhú Djkl. 9:9.

bhú Bhuku gba Ebhe-e pindji ani. U atsia amene pi ani.

<sup>17</sup> Abhomu-o, bhiti okpála inde adu nani bhú dabili bini ne ani li nedhinga inde ani a'i Ladjalo lie me ani koto bhú lata-a, ani atsia azuku di ani-e, adu akpokpo 'ngú inde u au e-o. <sup>18</sup> Kaka-a, bhiti okpála ango-o abhaka ani. Padhá de, anga u adje nani me ani amene ngamba 'ngú bhomu-o. <sup>19</sup> Abhomu-o, omuFalisai atsia apa sunda o me: «Yi au, ní ti da namene 'he bini de. Ndu okpála hana agbida nganda ani!»

### *OGiliki koko agili Yesu*

<sup>20</sup> OGiliki koko adu bhú ká okpála inde ago bhú gudhu na Yelusalema ngu nadhogo Ebhe bhú anokomia-o. <sup>21</sup> U adyudyo lio de Filipino, kpála na gudhu na Betesaida, bhú ndu doto na Galilaya. U atsia apa pi ani me: «Musuno, ya akunda nau Yesu.» <sup>22</sup> Filipino anu apa pi Andili. Pipita-a, ndu u bhisi hana atsia anu apa pi Yesu. <sup>23</sup> Yesu agie pi uo me: «Mbia inde-e, a ko nedhinga inde a ayo lie me Ndili gba kpála sia sangu gba e-o. <sup>24</sup> A moko, ma apa pi yi na paká me: i du me lí ngano bini nde ati bhú doto, i kpi de-e, i tígala bha ngae kpi e kpi. Engú bini, i du la me a nde akpi-e, i lí lílí bhelé. <sup>25</sup> Kpála inde akunda mukobho gba e, ani kpi. Engú bini, li kpála bini kunda Ebhe ane mukobho gba e pila doto inde-e, mukobho ango-o líla lie, li kpála ango-o tsia sía di mukobho na duduma. <sup>26</sup> I du me kpála nde akunda namene kulu lie muma-a, a ayo me kpála ango-o kpata ma. La di-e, bili inde ma adú li e, kpála na kulu gba ma-a adú bhadi oo. 'Dyi ma adhogo kpála inde ngamene kulu muma ko.»

### *Yesu akpo 'ngú pindji nakpi ka e*

<sup>27</sup> «Mbia inde-e, bua ma ngadje likabhu. Ma apa la pi? Ma pá de me, <'Dyi ma, kobho ma li nedhinga inde-e de.> Padhá de, anga ma ago

ngubula nedhinga ango-o. <sup>28</sup> 'Dyi ma-e, dhogo 'li mu!» Abhomu-o eli ayie abhulá, atsia apa me: «Ma adhogo ani adhogo. Ma adhogo la matá ani madhogo.» <sup>29</sup> Abhomu-o, bhiti okpála inde adu oo, inde adje la di eli ango-o, adu apa me: «Mugbála asula bhomu-o ngae!» Okoko atsia adu apa me: «Andjelu bini agama 'ngú pi ani ngae.»

<sup>30</sup> La-a, Yesu apa pi uo me: «Eli bhomu-o pa lie ka 'ngú ka ma de. Engú bini, a apa lie ka 'ngú ka yi. <sup>31</sup> Mbia inde-e, u akódho 'ngú gba okpála na pila doto. Mbia inde-e, u ató holo bhú 'dhu ngamá na doto inde. <sup>32</sup> La ngama-a, li nedhinga inde u a'é'e ma lie abhulá-a, ma agbele ndu okpála hana li pápá gba ma.» <sup>33</sup> Yesu adu apa 'ngú bhomu-o ngu nasuno lele maka ani akpi lie-o.

<sup>34</sup> Abhomu-o, bhiti okpála-a atsia agie pi ani me: «Ya adje bhú bhuku na líli me Masiya adú duduma ne duduma. Lele pi mu ngapa lie me u a'é'e Ndili gba kpála abhulá? Ndili gba kpála ango-o ne da?» <sup>35</sup> Abhomu-o, Yesu atsia agie pi uo me: «Zi 'ke nga matá bhú ká yi ngubula nedhinga bedi. Yi dhuku bhú nedhinga inde yi nde nga lie ne zi 'ke, ngu nakpe me biti ahólo yi bhú gbilikiti de. Padhá de, anga kpála inde ngadhuku bhú biti-e mbila bili inde ani adji li e de. <sup>36</sup> Nedhinga yi nde lie ne zi 'ke-e, yi bhuka zi 'ke ango-o, amba yi kolo ongisi na zi 'ke.» Pita li Yesu apa engú bhomu-o lie, ani atapa, ani atsia anu awo lie de uo tsutsu.

### *OmaYuda bhuka Yesu de*

<sup>37</sup> Abana li Yesu amene ongamba 'ngú lie bhelé-e, omaYuda du abhuka ani de. <sup>38</sup> U du abhuka ani de ngubula napa me engú inde li polofeta Isaya apa e-e, a mene lie, engú inde me:

«Ngamá, abhuka engú inde ya adu apa e da?

Ngámá apana angu gba e pí da?†»

<sup>39</sup> Isaya apa di nani me, ka ni li okpála bhomu-o ti nani da nabhuka lie de-e. Aní apa me:

<sup>40</sup> «Ebhe agbite djila uo.

Aní adji bua uo maka teme, ngubula me u aú 'kpí de, ngubula me u ambíla 'ngú bini de,

di me u adjí bua o de,

amba Ebhe akóbho uo de.†»

<sup>41</sup> Isaya apa engú bhomu-o, anga aní au nani sangu gba Yesu-o. Aní atsia akpokpo di 'ngú pindji aní.

<sup>42</sup> La-a, belegu bhú ká ongámási gba omaYuda-a, bhelé abhuka Yesu. Engú bini, ka nakpe omFalisai-e, u du apa engú ango-o mbámbá de. Padhá de, anga u adu akpe me, u apándja o bhú 'ti nadjé líli gba Moidje de. <sup>43</sup> U adu akunda me okpála dhøø o ane me Ebhe dhøø o ngae.

*Kpála inde abhúka 'li Yesu-o, aní kóbho*

<sup>44</sup> Yesu asula me: «Kpála inde abhuka ma-a, aní bhuka bhomu-o ma de. Engú bini, aní abhuka kpála inde atima ma ko. <sup>45</sup> Kpála inde ngau ma-a, aní ngau bhomu-o kpála inde atima ma-o. <sup>46</sup> Ngama-a, ma ago píla doto maka zi 'ke, ngubula me ndu okpála hana inde abhuka ma-a, adú bhú biti de. <sup>47</sup> I du me kpála nde adje 'li ma-a, aní lila de-e, ma kódhò 'ngú gba aní-e ngama de. Padhá de, anga ma go ngubula na'o 'ngú pí okpála de. Engú bini, ma ago ngú nakobho uo. <sup>48</sup> Kpála inde ayala ma-a, inde i ziba di 'li ma de-e, u akódhò 'ngú gba aní-o. Eli inde ma apa e, eli ango-o akódhò 'ngú gba aní li sokpí-e ngae. <sup>49</sup> Padhá de, anga ma pa 'ngú gba ma makpe de. 'Dyi ma inde atima ma-a, aha líli muma ngae makpe ngubula ndu 'ngú hana inde a ayo me ma pa e, di ne bhende a ayo me ma kpokpo e-o. <sup>50</sup> Padhá de, anga ma ambíla me líli gba aní-e

ngaha mukobho na duduma. Kaka-a, ndu 'ngú hana inde ma ngapa e, ma ngapapa maka li 'Dyi ma apa muma lie ko.»

## 13

*Yesu avulu 'dhu omukpata gba e*

<sup>1</sup> A adu nani ekpí kala anokomia na Pasika . Yesu ambíla nani me nedhinga nayie ka ni píla doto inde-e, ngú nanu agba 'Dyi ni-e akolo. Aní adu akunda okpála gba e inde píla doto-o. Aní akunda uo akolo ali soso.

<sup>2</sup> Yesu ne omukpata gba e adu azu 'he tagolo. A adu me Djabulu nde a'o li bua Yuda, ndili gba Simo Isikaliote, me aní pu Yesu pí obhulu yala. <sup>3</sup> Yesu ambíla nani ndjindji me ngani makpe-e, ni ayie agba Ebhe. Aní atsia ambíla la bhadi ndjindji me ni agie liní agba Ebhe, la di me 'Dyi ni a'o ndu 'ngú hana sa 'kpa ni. <sup>4</sup> Aní ayie bhúlá, aní ayie li bili nazu 'he-o. Aní agbe bongo inde u adyidi e pí bongo koko-o. Aní aha pála bongo, aní agbite ludu e. <sup>5</sup> Pipita-a, aní aha engu, aní atuko bhú base. Aní aholo navulu 'dhu omukpata gba e ne di. Aní atsia adu akukuo ne bongo inde aní agbite e ludu e-o.

<sup>6</sup> Aní akolo li Simo Piele. Do Piele pí aní me: «Ngámá, mo ovulu bha ndju 'dhu ma ngamu makpe?»

<sup>7</sup> Yesu atsia agie pí aní me: «Engú inde ma ngamene e mbia inde-e, mu mbíla de. Engú bini, mo ombíla sisi.» <sup>8</sup> Piele apa pí aní me: «A mo-o ade. Mu vulu 'dhu ma belegu de bini!» Yesu atsia agie pí aní me: «I du me ma nde vulu 'dhu mu de-e, mu ti da nadu bhú dabili bini ne ma de.» <sup>9</sup> Simo Piele apa pí aní me: «Ngámá, mo ovulu bha bini 'dhu ma de. Engú bini, vulu di 'kpa ma, ne 'ndji ma!» <sup>10</sup> Yesu apa pí aní me: «Kpála inde avulu kute e avulu-o, kute aní libhomu akolo ndjindji. Aní tí matá da navulu kute e de. Engú bini, aní vulu bha ibili 'dhu e. Ngayi-e, yi bubu. La-a, yi bubu ndu yi

† 12:40 12:40 Tsia bhú Isa. 6:10.



hana ade.» <sup>11</sup> Yesu apa 'ngú bhomu-o anga ani adu ambila ndjindji me, apú ni pi obhulu yala da-ie. Kaka-a, ani atsia apa me: «Yi ndu yi hana bubu ade.»

<sup>12</sup> Pita ani avulu 'dhu uo lie, ani aha bongo gba e, ani adyi. Ani agie lie li bili nazu 'he-o. Ani atsia apa pi uo me: «Yi mbila ta 'ngú inde ma amene e li yi-e uu? <sup>13</sup> Yi nga'i ma me: <Musunu>, yi la di nga'i ma me: <Ngámá.> A ko kukulu 'ngú, anga ma mo-o. <sup>14</sup> I du me ngama, inde ne Ngámá, inde la di ne Musunu-o, ma nde avulu 'dhu yi-e, ngayi di-e, yi de vulu 'dhu yi sunda yi moko. <sup>15</sup> Ma asuno pi yi bhomu-o me amba ngayi di-e, yi mene maka ma amene pi yi lie ko. <sup>16</sup> A moko, ma apa pi yi na paká me, kpála na kulu ngbéngbé ane ngámá gba e ade. La di-e, bhulu titima ngbéngbé ane kpála inde atima ani-e ade. <sup>17</sup> Mbia inde-e, yi ambila ndu ongu bhomu-o hana ambila. A ko djali pi yi, i du me yi nde ngamene ongu ango-o.

<sup>18</sup> Engú inde ma ngapa e, a pi ndu yi hana ade. Ma mbila okpála inde ma abhu o-o hana. Engú bini, a ayo me engú inde u aye e bhú Bhuku gba Ebhe-e, a mene lie, engú inde me: <Kpála inde ya adu azu 'he ne e bhú dabili bini-e, adji lie bhulu yala gba ma.†> <sup>19</sup> Ma apa pi yi mbia inde-e kala nakolo ka ongu ango-o, amba li engú ango-o akólo lie, yi bhuka me ngama-a <Ma uu.> <sup>20</sup> A moko, ma apa pi yi na paká me: i du me kpála nde asia kpála inde ma atima e, amba ani asia bhomu-o ma. I du la di me kpála nde asia ma-a, amba ani asia bhomu-o kpála inde atima ma-o.»

*Yesu apa me Yuda apú ni pi obhulu yala gba ni-o*

*(Tsia bhú Mat. 26:20-25; ne bhú Mlk. 14:17-21; di ne bhú Luk. 22:21-23.)*

<sup>21</sup> Pita li Yesu apa ongu bhomu-o lie, ani asia likabhu li bua e naali. Ani atsia apa mbámbá me: «A moko,

ma apa pi yi na paká me: suka yi bini apú ma pi obhulu yala gba ma-o.» <sup>22</sup> Omukpata-a aholo natsitsia bhúla o. U du ambila de me Yesu ngapa inde-e engú gba da-ie de. <sup>23</sup> Li nedhinga u adu azu 'he lie, suka omukpata gba Yesu inde li Yesu adu akunda e naali-e, aseke 'ndji e pí mbulu ani. <sup>24</sup> Abhomu-o, Simo Piele amene 'kpa e pi mukpata ango-o me, ani yi Yesu me ani ngapa engú gba da. <sup>25</sup> Abhomu-o, mukpata ango-o adji bhúla e li pápá gba Yesu. Ani atsia ayi Yesu me: «Ngámá, a ko e da?»

<sup>26</sup> Yesu agie pi ani me: «Ma ngatunu mapa bhú 'mu 'zu-o, kpála inde ma ahá pi e-e, a ko ani.» Abhomu-o, Yesu aha mapa, ani atunu bhú 'mu 'zu-o. Pipita-a, ani atsia aha pi Yuda, ndili gba Simo Isikaliote. <sup>27</sup> Bha li nedhinga li Yuda aha mapa-a lie, Satana ali bhú ani. Yesu atsia apa pi ani me: «Engú inde mu nde ne e, mene má gala!» <sup>28</sup> Kpála bini bhú ká okpála inde u adu azu 'he ne o-o mbila de me ani apa pi Yuda mo-o ka ni-ie de. <sup>29</sup> Li Yuda adu alila tia lie ngae, kaka-a, okpála koko adu abhundja naao me, ani apa pi Yuda me ani kala ezu inde a ayo me u kala e ngu anokomia-o, ne me ani ha mbo ehe pi obhulu ndibhili. <sup>30</sup> Li Yuda aha ndu mapa lie, kolo má gala me-e, ani akoto kilidjo. A adu me ekpi nde abi.

### *Lili na mbia*

<sup>31</sup> Pita li Yuda akoto lie, Yesu atsia apa me: «Mbia inde-e, Ndili gba kpála, asia sangu gba e asia. Ebhe asia la di sangu ka ani. <sup>32</sup> Maka li Ebhe asia sangu ka ani lie, Ebhe asúno ngae makpe sangu gba ani-o. Ani asúno má gala! <sup>33</sup> Odi ma, ní dú matá ne yi ngubula 'kpí bhelé de. Pipita-a, yi agili ma. Engú la bini, ma ngapa pi yi mbia inde-e engú inde ma apa e pi omaYuda koko me, yi ti da nanu li bili inde ma adji li e de. <sup>34</sup> Ma ngaha pi yi-e lili na mbia. Lili

† 13:18 13:18 Tsia bhú Ets. 41:10.

inde me yi dɔ ne mukunda sɔnda yi. A ayo me yi dɔ ne mukunda sɔnda yi maka ma nde lie ne mukunda pi yi ko. <sup>35</sup> Padhá de, anga i dɔ me yi nde ne mukunda sɔnda yi-e, li ndɔ okpála hana mbíla me yi ne omukpata gba ma-o.»

<sup>36</sup> Simo Piele ayi ani me: «Ngámá, mo odji su?» Yesu agie pi ani me: «Mɔ ti da nakpata ma li bíli ma adjí li e mbia inde-e de. Engú bini, mo okpáta ma sidi.» <sup>37</sup> Piele apa pi ani me: «Ngámá, ma ti da nakpata mɔ mbia inde-e de ka ni? Ma bedhe ngú nandala 'kpa li mukobho gba ma-a ngubula mɔ!» <sup>38</sup> Yesu agie pi ani me: «Mɔ bha ndjɔ bedhe ngú nandala 'kpa li mukobho gba mɔ-o ngubula ma? A moko, ma apa pi mɔ na paká me, kala me engu ku 'gbá-a, mo opá bhɔtsibhɔtsi bata me ni mbila ma de.»

## 14

### *Yesu ne kpadji ngú nanu agba Ebhe*

<sup>1</sup> Yesu apa pi omukpata gba e me: «Yi a'ó bua yi abhúlá de. Yi bhuka Ebhe, yi bhuka di ma. <sup>2</sup> Abhú 'tí gba 'Dyi ma-a, dabili nadu tété-e bhelé. Ma adjí naleke dabili pi yi. I dɔ mo-o de-e, ma de apa pi yi apa. <sup>3</sup> Pita nanu ka ma naleke dabili pi yi-e, ma agó matá, ma atsia há yi ngú nadu bhú dabili bini ne yi, amba bíli inde ma ngadu li e, yi dɔ bhadi tété. <sup>4</sup> Yi mbíla la di kpadji na bíli inde ma adjí li e hana.»

<sup>5</sup> Tɔma apa pi ani me: «Ngámá, ya mbíla bíli mo odji li e de. Ya ti da nambíla kpadji-e lele pi?» <sup>6</sup> Yesu agie pi ani me: «Ma ne kpadji. Ma ne kukulɔ 'ngú. Ma la di ne mukobho. Kpála bini ti da nanu agba 'Dyi ma li kpadji koko de, bha bini me ani nde apɔ li pápá gba ma. <sup>7</sup> I dɔ me yi nde ambíla ma-a, yi mbíla di 'Dyi ma. Nayie pi mbia inde-e, yi mbíla ani hana. Yi au la di ani au.»

<sup>8</sup> Filipino apa pi ani me: «Ngámá, pana 'Dyi mɔ pi ya, amba ale pi ya.»

<sup>9</sup> Yesu agie pi ani me: «Filipo, enú ní abhue lie ne yi ngengele-e, mɔ mbíla nga ma sɔ di? Kpála inde au ma-a, ani au 'Dyi ma au. La ka ni mɔ ngapa lie me: <Pana 'Dyi mɔ pi ya?>

<sup>10</sup> Mɔ bhuka de me ma ngadu bhú 'Dyi ma, 'Dyi ma la di ngadu bhú ma-a di? Oeli inde ma ngapa e pi yi-e, ayie ka ma makpe de. Engú bini, 'Dyi ma inde ngadu bhú ma-a, ani ngamene kulu gba e-o. <sup>11</sup> Yi bhuka ma, maka ma apa lie pi yi me ma ngadu bhú 'Dyi ma, 'Dyi ma la di ngadu bhú ma-o. I dɔ mo-o de-e, yi de bhuka ka kulu inde ma ngamene e-o. <sup>12</sup> A moko, ma apa pi yi na paká me: kpála inde abhuka ma-a, ani améne bhadi okulu inde ma ngamene e-o. Ani améne belegu okulu na ngbengbengbe ane bhende-e mane. Padhá de, anga ma adjí agba 'Dyi ma. <sup>13</sup> Ma améne ndɔ 'ngú hana inde yi ayó e ne 'li ma-a mamene, ngubula me 'Dyi ma sia sangu gba e bhú ma, Ndili gba e ko. <sup>14</sup> I dɔ me yi nde ayo 'he ka ma ne 'li ma-a, ma améne.

### *Ebhe atíma Bu Bhobua pi obhulu titima gba Yesu*

<sup>15</sup> I dɔ me yi nde akunda ma-a, yi líla olíli gba ma-o. <sup>16</sup> Ma ayó ka 'Dyi ma me ani ha kpála koko ngú nateteke yi. Ani adú ne yi dɔdɔma ne dɔdɔma. <sup>17</sup> A ko Bua na kukulɔ 'ngú inde li okpála na píla doto ti da nasia e de. Padhá de, anga u u ani de. U mbíla la di ani de. Engú bini, ngayi-e, yi mbíla ani hana, anga ani ngadu bhú ká yi. Ani la di ngadu bhú yi. <sup>18</sup> Ma 'ó ká yi kpi yi kpi maka otsulosi de. Engú bini, ma agie matá lima agba yi magie. <sup>19</sup> Atigala nedhinga bedi, okpála na píla doto ú matá ma de. Engú bini, ngayi-e, yi aú ma, anga ma bhú mukobho. Ngayi di-e, yi adú bhú mukobho. <sup>20</sup> Li 'kpí ango-o, yi ambíla me ma ngadu bhú 'Dyi ma, yi ngadu bhú

ma, ma la di ngadu bhú yi. <sup>21</sup> Kpála inde akúnda ma-a, a ko kpála inde ngalila, di ne namene olíli gba ma-o. 'Dyi ma akúnda kpála inde akúnda ma-o. Li ma kúnda di ani. Ma tsia pána lima pi ani.»

<sup>22</sup> Abhomu-o, Yuda (a ko Yuda Isikaliote de) apa pi Yesu me: «Ngámá, mo opána bha bini limu pi ya, lele pi mu tsia pána limu pi okpála na píla doto lie de-e?» <sup>23</sup> Yesu agie pi ani me: «I du me kpála nde akúnda ma-a, ani méne engú inde ma ngapa e-o. Li 'Dyi ma kúnda ani. Ngaya ne 'Dyi ma-a, ya agó agba ani, ya tsia dúlu oo ko. <sup>24</sup> Kpála inde i kúnda ma de-e, ani méne oeli ma ngapa e de. Engú inde yi ngadje ma ngapa e, a ngayie ka ma ade. Engú bini, a ngayie ka 'Dyi ma inde atima ma ko.

<sup>25</sup> Ma apa ongú bhomu-o pi yi li nedhinga inde ní nde ngabha lie ne yi bhú dabili bini-o. <sup>26</sup> 'Dyi ma atíma Bu Bhobua pi yi ne 'li ma. Ani atéteke yi ngae. Bu Bhobua angoo asúno ndu 'ngú hana pi yi ngae. Ani tsia méne di me yi bhundja ndu 'ngú hana inde ma apa e pi yi ko. <sup>27</sup> Ma a'o pi yi guo 'ngú . Ma aha guo 'ngú gba ma-a pi yi. Ma ha pi yi maka li okpála na píla doto ngahaha lie de. Kaka-a, yi a'ó bua yi abhúlá de. Yi adjé la di tsulu de. <sup>28</sup> Yi adje maka ma apa lie pi yi me: «Ma adji, engú bini, ma agie matá lima agba yi magie.» I dú me yi kúnda ma uu-o, yi de kpí djali kabula me ma adji agba 'Dyi ma. Padhá de, anga 'Dyi ma ngbéngbé ane ma. <sup>29</sup> Ma apa pi yi mbia inde-e kala me ongú angoo kolo, amba i kolo-o, yi de bhuka. <sup>30</sup> Ma gáma matá 'ngú ne yi ngengele de, anga ngámá na píla doto inde-e ngago. Ani ne angu pí ma belegu ade bini. <sup>31</sup> Engú bini, a ayo me okpála na píla doto mbila me ma kúnda 'Dyi ma. U mbila la di me ma ngamene olíli inde ani aha e muma-o. Yi yie bhúlá! Ní yie si yiyie.»

## 15

### *Yesu ne ndula na vino na kukulu*

<sup>1</sup> «Ma ne ndula na vino na kukulu. 'Dyi ma la ne kpála inde ngaleleke-o. <sup>2</sup> Ani nga'e ndu yáyá hana inde aké li ma inde i li líli de ko. Engú bini, ani ngaleke obhende ngali líli-o, amba a li matá líli bhelé. <sup>3</sup> Eli inde ma apa e pi yi-e, avulu yi avulu. <sup>4</sup> Yi du bhú ma, maka ma nde lie bhú yi ko. Padhá de, anga yá ndula ngae kpi e kpi ti da nali líli de, i du me a nde li kute 'lá e ade ko. A bhadi moko, yi ti da nali líli de, i du me yi nde bhú ma ade ko.

<sup>5</sup> Ma ne ndula na vino. Yi ne oyáyá-o. Kpála inde ngadu bhú ma, ma nde la di ngadu bhú e-e, ani lí líli bhelé. Padhá de, anga i du me yi nde bhú dabili bini ne ma ade-e, yi ti da namene 'he bini de. <sup>6</sup> Kpála inde bhú ma ade-e, u abhíke ani akilidjo maka u abhibhike yá ndula lie-o. Yá ndula-a 'úlu, u há, u bhíke bhú djua, i tsí. <sup>7</sup> I du me yi nde bhú ma-a, 'li ma nde la di bhú yi-e, yi yo ehe inde yi akúnda e, amba yi sia. <sup>8</sup> I du me yi nde ali líli bhelé-e, yi suno di me yi ne omukpata gba ma-a, li 'Dyi ma tsia sía sangu . <sup>9</sup> Maka li 'Dyi ma akúnda ma lie, ma akúnda bhadi yi moko. Yi du bhú mukúnda gba ma-o. <sup>10</sup> I du me yi nde alila olíli gba ma-a, yi dú bhú mukúnda gba ma-o, maka ma alila olíli gba 'Dyi ma lie, ma ngadu bhú mukúnda gba ani-o.

<sup>11</sup> Ma apa engú bhomu-o pi yi, ngabula me djali gba ma-a du bhú yi, amba djali gba yi-e du libhomu. <sup>12</sup> Líli gba ma-a ngae inde: yi kúnda liyi sunda yi maka ma akúnda yi lie ko. <sup>13</sup> Mukúnda na ngbéngbé inde li kpála ti da nasuno e, a ko naha mukobho gba e pi oolia e. <sup>14</sup> Yi ne oolia ma, i du me yi nde amene líli gba ma-o. <sup>15</sup> Ma nga'i matá yi me okpála na kulu ade. Padhá de, anga kpála na kulu mbila ehe inde li ngámá gba ani-e ngamene e de. Ma nga'i yi me oolia ma. Padhá de, anga ma asuno ndu 'ngú hana inde

ma asia e ka 'Dyi ma-a pi yi asuno. <sup>16</sup> Yi bhũ ma ngayi de. Engú bini, ma abhũ yi ngama. Ma atima yi me yi nũ zu nguwa inde i ti da nabhue mabhue, amba ndũ 'he hana inde yi ayó e ka 'Dyi ma ne 'li ma-a, ani de ha pi yi. <sup>17</sup> La-a, líli ma aha e pi yi-e ngae inde, yi kũnda liyi sũnda yi.»

*Yesu apa me okpála na doto ayála ni ne omaha ni*

<sup>18</sup> «I dũ me okpála na doto nde ngayala yi-e, yi mbila ndjindji me u ayala ngaiza ma pi yi kalanũ. <sup>19</sup> I dú me, yi dú ne okpála na doto-o, okpála na doto de ngakũnda yi. Padhá de, anga yi bhũ ngu doto. Engú bini, ma abhũ yi, ma atsia a'e yi bhũ ká okpála na doto. Kaka-a, okpála na doto ngayala yi. <sup>20</sup> Yi bhundja engú inde ma apa e pi yi-e me: <Kpála na kulu ngbéngbé ane ngámá gba e ade.†> Maka nani u ato mbolo li ma lie, u ató bhadi mbolo li yi moko. I dú me u djé 'li ma uu-o, u de adjé bhadi 'li yi moko.

<sup>21</sup> Engú bini, u améne ndũ 'ngú bhomũ-o hana li yi kabula ma. Padhá de, anga u mbila kpála inde atima ma-a de. <sup>22</sup> I dú me ma gó de-e, i dú la di me ma kpókpo pi uo de-e, a de okpála namene siti 'ngú ade. Engú bini, mbia inde-e, u mbú li siti 'ngú inde u amene e de. <sup>23</sup> Kpála inde ayala ma-a, ani ayala di 'Dyi ma. <sup>24</sup> Ma amene bhũ ká uo ongamba 'ngú , inde li kpála bini mene nga e de. I dú me ma méne mo-o de-e, a de okpála namene siti 'ngú ade. Engú bini, u au ongamba 'ngú gba ma-o, u ayala ma, u atsia yala di 'Dyi ma. <sup>25</sup> Engú bini, engú bhomũ-o akolo ngũbula me, eli inde u aye e bhũ líli gba uo-o, amene lie, eli inde me: <U ayala ma padhá, tata tété ade.†>

<sup>26</sup> Ma atíma pi yi kpála inde a ayo me ani teteke yi-o. Kpála ango-o ayíe agba 'Dyi ma. A ko Bua na

kũkũlũ 'ngú inde ayie agba 'Dyi ma-o. Nedhinga ani agó lie, ani akpókpo 'ngú gba ma-a ngae. <sup>27</sup> Ngayi di-e, yi akpókpo 'ngú gba ma-o. Padhá de, anga ní adũ ne yi nayie li lilita.»

## 16

<sup>1</sup> «Ma apa 'ngú bhomũ-o pi yi, amba yi a'ó de me nabhuka gba yi-e kpi-e de. <sup>2</sup> U apándja yi bhũ oti nadje líli gba Moidje . La di-e, ekpí akólo makolo, li okpála inde abhili yi-e adũ abhundja lie me o ngamene lio bhomũ-o kulu pi Ebhe. <sup>3</sup> U améne mo-o, anga u mbila 'Dyi ma de, u mbila la di ma de. <sup>4</sup> Kaka-a, ma apa 'ngú ango-o pi yi kalanũ, amba li engú ango-o akólo lie, yi de bhundja me ma apa engú ango-o pi yi apa.»

*Bua na kũkũlũ 'ngú agó mago*

«Ma pa nga nani engú ango-o pi yi nayie li lilita de, anga ní adũ nga nani ne yi bhũ dabili bini. <sup>5</sup> Mbia inde-e, ma adjí agba kpála inde atima ma ko. La-a, kpála bini bhũ ká yi yi ma de me: <Mo odji su?> <sup>6</sup> Engú bini, bua yi abedhe ne babuma, anga ma apa pi yi moko. <sup>7</sup> Ma apa la pi yi na paká me, pi yi-e, a ndjindji me ma nũ. Padhá de, anga i dũ me ma nde nũ de-e, kpála inde atéteke yi-e gó-o de. Engú bini, i dũ me ma nde anũ-o, ma tsia tíma ani pi yi. <sup>8</sup> Nedhinga ani agó lie, ani asúno pi okpála na doto me u ngapite lio pindji osisiti 'ngú inde u ngamene e-o. U di ngapite lio pindji ngbili 'ngú , di ne pindji nakodho 'ngú gba Ebhe-o. <sup>9</sup> U ngapite lio pindji osisiti 'ngú inde u ngamene e, anga u bhuka ma de. <sup>10</sup> U ngapite lio pindji ngbili 'ngú, anga ma adjí agba 'Dyi ma. La di-e, u ú matá ma de. <sup>11</sup> U ngapite lio pindji nakodho 'ngú, anga u akodho 'ngú gba ngámá na doto inde-e akodho.

<sup>12</sup> Ma matá ne engú bhelé napapa pi yi. Engú bini, yi ti da nakikibila

† 15:20 15:20 Tsia bhũ Mat. 10:24; ne bhũ Luk. 6:40; di ne bhũ Dja. 13:16. † 15:25 15:25 Tsia bhũ Ets. 35:19, 69:5.

mbia inde-e de. <sup>13</sup> Nedhinga li Bua na kukulu 'ngú-o agó lie, ani asúno pi yi ndu okukulu 'ngú hana. Ani pá 'ngú gba e makpe-e de. Engú bini, ani apá ndu 'ngú hana inde ani adjé e-o. Ani tsia pá di ndu 'ngú hana inde akólo-o pi yi. <sup>14</sup> Ani adhégo ma. Padhá de, anga ndu 'ngú hana inde ani apá e pi yi-e, ani asía ka ma. <sup>15</sup> Ndu 'he gba 'Dyi ma-a hana, a ko di naama 'he. Kaka-a, ma apa me ndu 'ngú hana inde li Bua apá e pi yi-e, ayie ka ma.»

### *Yesu apa me babuma adjí lie djali*

<sup>16</sup> «Pita nedhinga bedi, yi ú matá ma de. La matá pita nedhinga bedi-e, yi ú ma.» <sup>17</sup> Omukpata koko gba ani-e apa sunda o me: «Ani apa pi ní me: <Pita nedhinga bedi, yi ú matá ma de. La matá pita nedhinga bedi-e, yi ú ma.> Ani apa matá di me: <Ma adjí agba 'Dyi ma.> Engú bhomu-o akunda napa pi?» <sup>18</sup> U adu apa matá me: «Engú inde ani ngapa e me: <Nedhinga bedi>, a akunda napa pi? Ní mbila engú inde ani ngapa e de.»

<sup>19</sup> Yesu ambila me, u ngakunda nayi ni. Abhomu-o, ani atsia apa pi uo me: «Yi ngagili sunda yi ta 'ngú inde me: <Pita nedhinga bedi, yi ú matá ma de. La matá pita nedhinga bedi-e, yi ú ma.> <sup>20</sup> A moko, ma apa pi yi na paká me yi akú 'gbá, yi tsia lópolo di liyi. La-a, okpála na doto adú naao akpi djali. Yi adú ne babuma engú bini, likabhu gba yi-e adjí lie djali. <sup>21</sup> Nedhinga li olo ngazu lie, ani dú adje likabhu naali. Padhá de, anga nedhinga na likabhu pi ani akolo. Engú bini, nedhinga inde ani azu lie, ani 'li 'to e 'to likabhu ango-o hana ka djali. Padhá de, anga u azu kpála-kuti pila doto. <sup>22</sup> Ngayi di-e, mbia inde-e, yi bhú likabhu. Engú bini, ma aú matá yi mau. Yi tsia kpi djali li bua yi. La di-e, kpála bini 'é djali ango-o bhú yi de.

<sup>23</sup> Li ekpi ango-o akólo lie, yi yi matá ma li 'ngú belegu de bini. A moko, ma apa pi yi na paká me ndu 'he hana inde yi ayó e ka 'Dyi ma ne 'li ma-a, ani ahá pi yi maha. <sup>24</sup> Nakolo pi mbia inde-e, yi yo nga 'he ne 'li ma belegu de bini. Yi yoyo, amba yi sia, ngubula me djali gba yi-e du bedhe.»

### *Yesu aha angu doto*

<sup>25</sup> «Engú bini, ma apa 'ngú bhomu-o pi yi bhú ogbitaku. Nedhinga inde ngago-o, ma pá matá 'ngú pi yi mo-o belegu de bini. La-a, nedhinga ango-o, ma akpókpo ongu gba 'Dyi ma-a pi yi mbámbá. <sup>26</sup> Li 'kpi ango-o, yi ayó 'he ka 'Dyi ma ne 'li ma. Ma pa la di pi yi de me, ma ayó 'Dyi ma Ebhe pi yi-e de. <sup>27</sup> Padhá de, anga 'Dyi ma, ngae makpe akunda yi. Ani akunda yi, anga yi akunda ma. La di-e, anga yi abhuka me ma ayie agba Ebhe. <sup>28</sup> Ma ayie agba 'Dyi ma. Ma atsia ago pila doto. Mbia inde-e, ma nga'o ká doto, ma tsia gie lima agba 'Dyi ma.»

<sup>29</sup> Abhomu-o, omukpata gba ani-e atsia apa pi ani me: «Tsia nga mbia inde-e, mu ngapa 'ngú mbámbá. Mu matá ngapapa bhú ogbitaku ade. <sup>30</sup> Mbia inde-e, ya ambila me, mu ngambila ndu 'ngú hana. A padhá me u yi mu li 'ngú. Kaka-a, ya ngabhuka me mo oyie agba Ebhe.» <sup>31</sup> Yesu atsia agie pi uo me: «Yi abhuka la mbia inde-e abhuka? <sup>32</sup> Yi tsitsia nga. Nedhinga ngago, mbia inde-e, nedhinga ango-o akolo, nedhinga inde yi andjambala lie má mae! Kpála ne kpála atápa li kpadji gba e. Yi tsia 'ó la di ká ma kpi ma kpi. Engú bini, ma la kpi ma kpi ade, anga 'Dyi ma bhú dabili bini ne ma. <sup>33</sup> Ma apa 'ngú bhomu pi yi, amba yi sia guo 'ngú bhú ma. Yi asía likabhu pila doto. Engú bini, yi adjé tsulu de! Padhá de, anga ma aha angu doto aha.»

## 17

### *Yesu ayo Ebhe ngú e makpe*

<sup>1</sup> Pita li Yesu apa ongú bhomu-o lie, ani atsia 'kpí ne bhúlá, ani atsia apa me: «'Dyi ma, nedhinga akolo. Ha sangu muma, ngama Ndili gba mu-o, amba ngama, Ndili gba mu-o, ma ha di sangu pi mu. <sup>2</sup> Padhá de, anga mo oha angu muma pí 'ndji ndu okpála hana, amba ma ha mukobho na duduma pi ndu okpála hana inde mo oha o muma-o. <sup>3</sup> La-a, mukobho na duduma-a, a ko me u mbila mu, ngamu koli Ebhe inde na kukulu-o. A ko me u mbila la di Yesu Kilisito , kpála inde mo otima e-o. <sup>4</sup> Ma aha sangu pi mu píla doto. Ma andjia kulu inde mo oha e muma me ma mene e andjia. <sup>5</sup> La mbia inde-e, 'Dyi ma, ha sangu muma de mu, sangu inde ma adu nani ne e agba mu kala me u bho doto ko.»

### *Yesu ayo Ebhe ngubula omakpata gba e*

<sup>6</sup> «Ma asuno 'li mu pi okpála inde mo 'e o bhú ká okpála na doto, mo otsia aha o muma-o. A ko nani okpála ka mu, mo otsia aha uo muma. U atsia alila la di 'li mu. <sup>7</sup> Mbia inde-e, u ambila me ndu 'he inde mo oha e muma hana, ayie ka mu. <sup>8</sup> Padhá de, anga oeli inde mo okpokpo e muma-a, ma akpokpo pi uo. U asia oeli ango-o. U ambila na paká me ma ayie agba mu. U atsia abhuka di me mo otima ma ngamu.

<sup>9</sup> Ma ngayo mu ngubula uo. Ma ngayo mu ngubula okpála na doto ade. Engú bini, ma ngayo ngubula obhende mo oha o muma ko. Padhá de, anga a ko okpála ka mu. <sup>10</sup> Ndu 'he inde ka ma-a hana, a ko naamu. Ndu 'he inde la di ka mu-o hana, a ko naama. La di-e, ma atsia asia sangu ka uo. <sup>11</sup> Ma matá ne kpála na doto ade. Engú bini, ngauo-o, a ko okpála na doto. Ngama-a, ma adjí agba mu. 'Dyi ma inde bubu, lila uo ne 'li mu inde mo oha e muma-o, amba u du bini maka nganí ne mu, ní nde lie bini-o. <sup>12</sup> Nedhinga ya adu lie ne uo-o, ma alila uo ne 'li mu

inde mo oha e muma ko. Ma alila uo ndjindji, kpála bini bhú ká uo ngita de. Angita bha bini ne kpála inde a ayo me ani ngita-o ngubula me engú inde u aye e bhú Bhuku-o, a amene lie.

<sup>13</sup> La mbia inde-e, ma adjí agba mu. Ma ngapa mo-o li nedhinga inde ma nde nga lie píla doto, amba u sia djali gba ma-a bhú o makpe, u bedhe la di ne di bedhe. <sup>14</sup> Ma aha 'li mu pi uo. Okpála na doto atsia ayala uo. Padhá de, anga uo bhú ngu doto ade, maka ma nde lie bhú ngu doto ade ko. <sup>15</sup> Ma ngayo mu ade me mu 'e uo píla doto ma'e-e de. Engú bini, ma ngayo mu me lila uo sakpa Siti malila. <sup>16</sup> A ko okpála na doto de, maka ma nde lie ne kpála na doto ade ko. <sup>17</sup> Mene me u du libhomu bubu li kpadji na kukulu 'ngú. 'Li mu-o, a ko kukulu 'ngú. <sup>18</sup> Ma atima uo píla doto, maka mo otima ma lie píla doto-o. <sup>19</sup> Ngama makpe-e, ma aha lima hana pi mu ngubula me ngauo di-e, u ha lio hana pi mu li kpadji na kukulu 'ngú.»

### *Yesu ayo Ebhe ngú ndu okpála hana abhuka ani-o*

<sup>20</sup> «Ma ngayo bha bini ngubula uo ade. Engú bini, ma di ngayo ngubula okpála bhende abhúka ma ka 'li uo ko. <sup>21</sup> Ma ngayo me ndu uo hana du bini. 'Dyi ma, a ayo me u du bhú ní, maka mu nde lie bhú ma, ma la di bhú mu-o. A ayo me u du bini, amba okpála na doto bhuka me mo otima ma ngamu.

<sup>22</sup> Ma aha sangu inde mo oha e muma-a pi uo, amba u du bini maka nganí ne mu ní nde lie bini-o. <sup>23</sup> Ma bhú uo, mu la di bhú ma. Abhomu-o, u tí da nadu bha ndju bini, amba okpála na píla doto mbila me mo otima ma ngamu, u mbila la di me mo okunda uo maka mo okunda ma lie ko. <sup>24</sup> 'Dyi ma, mo oha uo muma. Ma akunda me u du bhú dabili bini ne ma li bili inde ma nde li e, amba u u sangu gba ma ko, sangu inde mo oha e muma anga mo okunda ma kala nabho doto. <sup>25</sup> 'Dyi ma inde

ngbingbili, okpála na p'la doto mbila mụ de. Engú bini, ngama-a, ma ambila mụ. Okpála inde-e ambila la di me mo otima ma ngamụ. <sup>26</sup> Ma asuno 'li mụ pi uo. Ma asúno la matá mụ pi uo masuno, ngubula me mụkanda inde mụ nde ne e mụma-a dū bhú uo, amba ngama makpe-e, ma dū di bhú uo.»

## 18

*U aholo Yesu*  
(*Tsia bhú Mat. 26:47-56; ne bhú Mlk. 14:43-50; di ne bhú Luk. 22:47-53.*)

<sup>1</sup> Pita li Yesu andjia nayo Ebhe lie, ani anụ ne omụkpata gba e ayi mutselemutsele inde 'li e me Sedolo. Eyi bini adu oo. Yesu atsia ali ne omụkpata gba e bhúbhú. <sup>2</sup> Yuda, bhulụ napụ Yesu-o adu ambila di bili ango-o ndjindji. Padhá de, anga Yesu ne omụkpata gba e adu anụ oo piko. <sup>3</sup> Abhomụ-o, Yuda anụ abhú 'dyi oo bhú dabili bini ne ká osudha, di ne omulila na 'ngbé 'ti Ebhe gba omaYuda, inde li ongbengbe odimandə di ne omụFalisai atima o-o. A adu sa 'kpa osudha-a ne otolosi, ne oeke, di ne otia 'gú. <sup>4</sup> La-a, Yesu inde adu ambila ndu 'ngú inde akólo li kute e hana-a, adyudyo lie de uo. Ani atsia ayi uo me: «Yi ngagili da?» <sup>5</sup> U agie pi ani me: «Ya ngagili Yesu, kpála na Nadjaleta.» Yesu atsia apa pi uo me: «A ko ma.» Yuda, bhulụ napụ Yesu-o adu di bhú dabili bini ne uo. <sup>6</sup> Li Yesu apa pi uo lie me: «A ko ma-a», u agbe lio ne sidi, u atuko kuto má dhululu!

<sup>7</sup> Yesu atsia ayi matá uo me: «Yi ngagili da?» U agie me: «Ya ngagili Yesu, kpála na Nadjaleta.» <sup>8</sup> Yesu apa pi uo me: «Ma apa iginini pi yi apa me, a ko ma. I dū la me, yi nde ngagili ma-a, yi de 'o okpála koko-o, amba u gbida naao.» <sup>9</sup> Engú bhomụ-o amene lie mo-o, ngubula me eli inde nani li Yesu apa e, amene lie, eli inde ani apa nani e me: «'Dyi ma, bhú ká okpála inde mo oha o mụma-a, sūka uo bini ngita ka ma de.»

<sup>10</sup> Simo Piele adu ne mbotia ludu e. Ani aluko ngise ango-o bhú 'ti e má vuu! Ani asu Malakusi, kpála na kulu gba 'ngbé dimandə gba Ebhe-o. Ani atsia akodho kpadje ani li pápá na kokpa-a má tse! <sup>11</sup> Engú bini, Yesu atsia apa pi Piele me: «Gie mbotia gba mụ-o bhú titi. Mo obhundja naamụ me likabhu inde li 'Dyi ma aha e mụma-a, ma azú-ú di?»

*U anụ ne Yesu kala Ana*

<sup>12</sup> Abhomụ-o, osudha ne ngámá gba o, di ne omulila na 'ngbé 'ti Ebhe gba omaYuda inde anụ naholo Yesu-o, atsia aholo ani. U agbite ani ne ekpu. <sup>13</sup> U atsia anụ ngaiza ne ani gba Ana. Ana ango-o, a ko nani 'dyi wala Kaifa. Kaifa adu nani bhele kpála gba odimandə bhú kalanga bhomụ-o ngae. <sup>14</sup> Abhomụ-o, Kaifa atsia aha nani mabhundja pi ongámási gba omaYuda ngae me, a ndjindji mangbo me koli kpála bini kpi ngubula ndu okpála hana.

*Piele apa me ni ne mụkpata gba Yesu ade*

(*Tsia bhú Mat. 26:69-70; ne bhú Mlk. 14:66-68; di ne bhú Luk. 22:55-57.*)

<sup>15</sup> Simo Piele, ngauo ne mụkpata koko adu akpata Yesu. Bhele kpála gba odimandə-o ambila nani mụkpata ango-o ndjindji. Kaka-a, mụkpata ango-o ali nani ne Yesu bhú dabili bini bhú mbadhasu gba bhele kpála gba odimandə-o. <sup>16</sup> Engú bini, Piele atigala nae li 'bhə aga akilidjo. Abhomụ-o, mụkpata koko inde li bhele kpála gba odimandə-o ambila e ndjindji-e akoto. U agama 'ngú ne ələ inde adu alila 'bhə aga-o. Ani atsia ato Piele. <sup>17</sup> Ələ inde adu bhú kulu nalila 'bhə aga-a, apa pi Piele me: «Ngamụ di-e, mụ ndi ne sūka omụkpata gba kpála inde-e adi?» Piele agie pi ani me: «A mo-o ade, ma ne sūka uo ade.» <sup>18</sup> Okpála na kulu, di ne omulila na 'ngbé 'ti Ebhe gba omaYuda-a akpo djua na makala. U ago alulụ dede

ngú natutu. Padhá de, anga zini adu naali. Piele ago alu di bhú dabili bini ne uo ngú natu djua-o.

*Bhele kpála gba odimandø ayiyi Yesu*

(*Tsia bhú Mat. 26:59-66; ne bhú Mlk. 14:55-64; di ne bhú Luk. 22:66-71.*)

<sup>19</sup> Abhomu-o, bhele kpála gba odimandø-o aholo nayiyi Yesu pindji 'ngú gba omukpata gba ani, di ne pindji nasuno gba ani-o. <sup>20</sup> Yesu agie pi ani me: «Ma akpokpo 'ngú mbámá pi ndu okpála hana. Ma adu asuno ndu 'kpí hana bhú oti nadjé líli gba Moidje , di ne bhú 'ngbé 'ti Ebhe gba omaYuda li bili li ndu omaYuda hana adu apøkøbhe bhúla o li e-o. Ma pa 'ngú bhú pepe belegu de bini. <sup>21</sup> Mu ngayi ma ka ni? Yi okpála inde adje ma-a me ma apa pi. Padhá de, anga u mbila engú inde ma apa e ndjindji.» <sup>22</sup> Li Yesu apa lie mo-o, sùka okpála nalila 'ngbé 'ti Ebhe gba omaYuda-a asu pála ani má pa! Ani atsia apa pi ani me: «Abhomu-o eli inde mu ti da nagie e pi bhele kpála gba odimandø gba Ebhe-e?» <sup>23</sup> Yesu atsia apa pi ani me: «Engú inde ma apa e, i du me a nde sisiti-e, yi de suno sisiti ango-o. Engú bini, i du la me ma nde apa ndjindji-e, mo otsia asu la ma ngú ni?» <sup>24</sup> Abhomu-o, Ana atsia atima Yesu pi Kaifa, bhele kpála gba odimandø-o me u nde agbigbite ani magbigbite.

*Piele apa matá me ni ne mukpata gba Yesu ade*

(*Tsia bhú Mat. 26:71-75; ne bhú Mlk. 14:69-72; di ne bhú Luk. 22:58-62.*)

<sup>25</sup> Nedhinga ango-o, Simo Piele alu de djua-o. Ani adu atutu. U atsia apa pi ani me: «Ngamu di-e, mu ne sùka omukpata gba kpála inde-e adi?» Piele ayala, ani atsia apa me: «A mo-o ade, ma ne sùka uo ade.» <sup>26</sup> Sùka okpála na kulu gba bhele kpála gba odimandø gba Ebhe-e, inde adu kpála na piga gba

kpála li Piele akodho kpadje e, ayi Piele me: «A ko mu di inde ma au nako e ne Yesu abhú 'dyi-e?» <sup>27</sup> Engú bini, Piele atsia ayala matá. Bha bini li nedhinga ango-o, engu atsia aku 'gbá.

*U anu ne Yesu kala Pilatø*  
(*Tsia bhú Mat. 27:1-2, 11-14; ne bhú Mlk. 15:1-5; di ne bhú Luk. 23:1-5.*)

<sup>28</sup> Abhomu-o, omaYuda ayie ne Yesu agba Kaifa, u atsia anu ne ani agba ngámá na Loma , inde adu atsia 'kpí li ndu doto-o. A adu kèkpí má bhø! Engú bini, omaYuda li naao abhú 'ti oo de. Padhá de, anga u adu akunda nadu bubu kala Ebhe, amba o zu anokomia na Pasika-o . <sup>29</sup> Kaka-a, Pilatø ngámá na ndu doto ango-o ago abhaka uo akilidjo. Ani atsia ayi uo me: «Yi agbe kpála inde-e kala ma me ani nde amene mangua siti 'ngú dho?» <sup>30</sup> U agie pi ani me: «Li kpála inde-e dú ne siti kpála de-e, ya de go ne ani pi mu de.» <sup>31</sup> Abhomu-o, Pilatø atsia apa pi uo me: «Yi ha ani ngayi makpe, amba yi kodho 'ngú gba ani-e maka li líli gba yi-e apa lie ko.» OmaYuda agie pi ani me: «U ha kpadji pi ya ngú nabhøø kpála de.»

<sup>32</sup> Engú bhomu-o amene lie mo-o ngú nakpata engú inde li Yesu apa nani e-o. Engú inde ani apa nani e ngú nasuno lele maka ani akpí lie ko. <sup>33</sup> Abhomu-o, Pilatø agie matá lie abhú 'ti. Ani a'i Yesu, ani atsia ayi ani me: «Mu ne 'ngbé ngámá gba omaYuda?» <sup>34</sup> Yesu agie pi ani me: «Engú inde mo opa e bhomu-o, mo obhundja bha ngamu makpe? Ne me okpála koko apa 'ngú gba ma-a pi mu ngao!» <sup>35</sup> Pilatø agie pi ani me: «Ngama-a, ma ne maYuda? Okpála na kuti gba mu di ne ongbengbe odimandø gba Ebhe-e apu mu mu. Mo omene la mangua 'ngú dho?»

<sup>36</sup> Yesu agie pi ani me: «Nau gba ma-a, a ko bhende na doto inde-e de. I dú bhende na doto inde-e, okpála gba ma-a de agu 'gú, ngubula me u



apú ma pí omaYuda de. Engú bini, nau gba ma-a, a ko bhende na doto inde-e de.» <sup>37</sup> Pilatø atsia apa pí ani me: «A akúnda napa me, mú ne 'ngbé ngámá?» Yesu agie pí ani me: «Mo opa ngamú me ma ne 'ngbé ngámá. U azu ma, ma atsia ago píla doto ngú nakpokpo 'ngú píndji kúkulu 'ngú. Kpála inde bhú kúkulu 'ngú-o ngadje engú inde ma ngapa e-o.» <sup>38</sup> Pilatø ayi ani me: «Kúkulu 'ngú-o, a ko ní?»

Píta lí Pilatø apa 'ngú bhomú-o lie, ani akoto, ani anu matá nabhaka omaYuda akilidjo. Ani atsia apa pí uo me: «Ma u engú inde u tí da nabhøle kpála inde-e ka e belegu de bini. <sup>39</sup> Engú bini, maka u amemene lie agba yi-e, bhú anokomia na Pasika-a, a ayo me ma tse 'kpa lí bhulú 'kpú pí yi bini. Yi akúnda me ma tse 'kpa lí 'ngbé ngámá gba omaYuda-a pí yi?» <sup>40</sup> Abhomú-o, u aholo asúsula me: «Í-í! Ngaani de. Engú bini, tse mangbo pí ya 'kpa lí Balabasi!» La-a, Balabasi nani ne 'ngbé bhulú 'zi.

## 19

<sup>1</sup> Abhomú-o, Pilatø atsia apa me u go ne Yesu, amba u bhí ani ne fimbo.

<sup>2</sup> Osudha agala ehe na eti má kilili, u ato bhú 'ndji ani! U atsia ato di bongo na zúmbe zúmbe lí kúte ani.

<sup>3</sup> U adu ago de ani. U atsia adu apa pí ani me: «'Ngbé ngámá gba omaYuda-a, atou!» U adu di nabhi bhúla ani.

<sup>4</sup> Abhomú-o, Pilatø akoto matá kilidjo. Ani atsia apa pí uo me: «Yi djedje nga! Ma agbé ani pí yi kilidjo ei, amba yi mbíla ndjindji me ma u belegu ehe bini de inde ma tí da naholo ani ngú e.» <sup>5</sup> Abhomú-o, Yesu atsia akoto kilidjo me u nde ato ehe na eti-e bhú 'ndji ani, ani nde di ne bongo na zúmbe zúmbe lí kúte e. Abhomú-o, Pilatø atsia apa pí uo me: «Kpála ango-o í!» <sup>6</sup> Engú bini, lí ongbengbe odimandø gba Ebhe ,

di ne omúlila na 'ngbé 'tí Ebhe au ani lie me-e, u aholo nasúsula me: «Gí ani lí kulusi! Gí ani lí kulusi!» Pilatø apa pí uo me: «Yi nu gí ani lí kulusi ngayi makpe. Padhá de, anga ngama-a, ma u belegu ehe bini de inde ma tí da naholo ani ngú e.» <sup>7</sup> OmaYuda agie pí ani me: «A ka ya ne líli. A ayo me ani kpi maka lí líli ango-o apa lie-o. Padhá de, anga ani apa me ní ne ndíli gba Ebhe.»

<sup>8</sup> Lí Pilatø adje engú bhomú-o lie, ani adje matá tsulú naali. <sup>9</sup> Ani agie lie abhú 'tí. Ani atsia ayi Yesu me: «Mo oyie su?» Engú bini, Yesu gie 'ngú de. <sup>10</sup> Abhomú-o, Pilatø atsia apa pí ani me: «Mú kúnda nagama 'ngú múma dí? Mú mbíla de me ma ne angu natse 'kpa lí mú. Ma la dí ne angu nagí mú lí kulusi-e dí?»

<sup>11</sup> Yesu atsia apa pí ani me: «Mú ne angu pí ma belegu ade bini. Í dú me Ebhe há angu pí mú de-e, mú de tí da namene 'he bini ngú ma de. Kaka-a, kpála inde apu ma pí mú-o, amene siti 'ngú naali ane mú.» <sup>12</sup> Nayie lí nedhinga bhomú-o, Pilatø adu agíli kpadji me ní tse 'kpa lí Yesu. Engú bini, omaYuda aholo asúsula me: «Í dú me mú nde atse 'kpa lí kpála bhomú-o, amba mú kúnda 'ngbé ngámá Kaisala de! Ndú kpála hana inde apa me ní ne 'ngbé ngámá-a, a ko bhulú yala gba 'ngbé ngámá Kaisala!»

<sup>13</sup> Lí Pilatø adje eli bhomú-o lie, ani agbe Yesu kilidjo. Pilatø atsia adu pí dabilí nakodho 'ngú-o, lí bíli inde u a'í e me «U apa oteme kuto» (inde u a'í e bhú eli na ebele me «Gabata»). <sup>14</sup> A adu nani masakpe de tulukpe, kala ekpí na Pasika. Pilatø apa pí omaYuda me: «'Ngbé ngámá gba yi-e í!» <sup>15</sup> Engú bini, u aholo nasúsula me: «Bhøle ani! Bhøle ani! Gí ani lí kulusi!» Pilatø apa pí uo me: «A ayo me ma gí 'ngbé ngámá gba yi-e lí kulusi?» Ongbengbe odimandø gba Ebhe-e agie pí ani me: «'Ngbé ngámá koko ka ya ade. A ko bha bini 'ngbé ngámá

Kaisala.» <sup>16</sup> Abhomu-o, Pilate atsia atse 'kpa li Yesu ngubula me u gi ani li kulusi.

*U agi Yesu li kulusi*

*(Tsia bhú Mat. 27:32-44; ne bhú Mlk. 15:21-32; di ne bhú Luk. 23:26-43.)*

U aha Yesu, u atsia atapa ne ani. <sup>17</sup> Yesu abi kulusi gba e ngae makpe. Ani atsia akoto nayie bhú gudhu akolo li bili na «Pelege 'ndji» (u a'i e bhú eli na ebele me «Gologota»). <sup>18</sup> A bhomu-o bili inde li osudha agi Yesu li e li kulusi-o. U atsia agi di okpála koko bhisi li kulusi. Yesu adu tutu, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. <sup>19</sup> Pilate atsia aha di líli me, u ye balua, amba u bhi li kulusi gba Yesu-o. Balua angoo adu me: «YESU, KPÁLA NA NADJALETA, 'NGBÉ NGÁMÁ GBA OMA YUDA.»

<sup>20</sup> Abhomu-o, omaYuda bhelé atanga balua angoo. Padhá de, anga bili inde u agi nani Yesu li kulusi li e, a adu de gudhu masakpe. La di-e, balua angoo adu bhú eli na ebele, a adu bhú eli na latino, a atsia adu di bhú eli na giliki. <sup>21</sup> Abhomu-o, ongbengbe odimandé gba omaYuda atsia apa pi Pilate me: «Mo oyé de me, <'ngbé ngámá gba omaYuda-a> de. Engú bini, ye mangbo me, <Kpála bhomu-o apa me, ma ne 'ngbé ngámá gba omaYuda.>» <sup>22</sup> Pilate agie pi uo me: «Bhende ma aye e, adjí lie de.»

<sup>23</sup> Li osudha agi Yesu li kulusi lie, u abha obongo gba ani-o. U agbo bhusu bhusu badha. Sudha bini ne bini aha naae bini. U atsia aha di bongo gba ani inde u du e madu de-o. Pápála adu bha bini nayie abhúlá akolo akuto. <sup>24</sup> Osudha-a apa sunda o me: «Ní asidha bongo inde-e de. Engú bini, ní gu mangbo gbanda tété, amba ní mbila me a adú na da.» U amene mo-o ngubula me eli inde

u aye e bhú Bhuku-o, amene lie, eli inde me:

«U agbogbo bhusu o li obongo gba ma-o.

U atsia agu gbanda li bongo gba ma ko.†»

A bhomu-o engú inde li osudha amene e-o.

<sup>25</sup> Malia, 'hi Yesu, ne ndai e na eole, ne Malia, wala Kolopasi, di ne Malia, kpála na kuti na Magadala, alulu de kulusi gba Yesu-o. <sup>26</sup> Yesu au 'hi e ne mukpata inde li ani adu akunda e naali-o. Mukpata angoo adu me ani nde alu de 'hi ani oo. Ani atsia apa pi 'hi e me: «Ole-e,\* tsia ndili gba mu-o i.» <sup>27</sup> Pipita-a, ani atsia apa pi mukpata-a me: «Tsia 'hi mu i.» Nayie li nedhinga bhomu-o, mukpata-a atsia aha 'hi Yesu agba e.

*Yesu akpi*

*(Tsia bhú Mat. 27:45-56; ne bhú Mlk. 15:33-41; di ne bhú Luk. 23:44-49.)*

<sup>28</sup> Pita ongu bhomu-o, Yesu ambila me, mbia inde-e, ndu 'ngú hana andjia. Abhomu-o, ngubula me 'li Bhuku-o amene lie akolo ali soso-o, ani atsia apa me: «A li ma ne gumu 'ngu.» <sup>29</sup> Lusa bini adu oo. A adu bhúbhú ne kpongadha pandi bedhe. Osudha aha epondje, u ato bhú kpongadha pandi-o. U agbite li ndula inde u a'i e me idjope.† U atsia adyudyo de 'bhé Yesu masakpe. <sup>30</sup> Li Yesu andji kpongadha pandi-e lie, ani atsia apa me: «Ndu 'ngú hana andjia!» Abhomu-o, ani atu 'ndji e ne kuto, ani atsia andala 'kpa li bua e.

*Sudha bini adu pá kala Yesu ne mandambi*

<sup>31</sup> A adu nani ekpi inde u adu aleke lio lie ngu ekpi naguo-o. Ongámási gba omaYuda du akunda de me okuo okpála du li okulusi li 'kpi naguo-o de. Padhá de, anga ekpi naguo angoo, adu ngbéngbé ane

† 19:24 19:24 Tsia bhú Ets. 22:19. \* 19:26 19:26 Li kulusi-e, Yesu agama 'ngú pi 'hi e maka Ebhe. Kaka-a, ani a'i ani me: «Ole-e.» † 19:29 19:29 Idjope: A ko saka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope.

okoko mane. Kaka-a, u atsia ayo ka Pilatø me u gũgũmũ 'dhũ okpála inde u agi o li okulusi-o, amba u 'e okuo uo tété ma'e. <sup>32</sup> Abhomũ-o, osũdha ago de okpála inde u agi o li okulusi bhũ dabili bini ne Yesu-o. U agũgũmũ 'dhũ kpála bhe na kalanũ-o. Pipita-a, u agũgũmũ 'dhũ kpála bhe koko-o. <sup>33</sup> U akolo lie li Yesu-o, u abhaka me ani nde akpi. Kaka-a, u gũgũmũ 'dhũ ani de.

<sup>34</sup> Engũ bini, sũdha bini adũ pá kala ani ne mandambi má pũũ! Kolo me-e, ngũte di ne engu aze bhũ eka ango-o. <sup>35</sup> Kpála inde ngakpokpo ongũ inde-e, au ongũ ango-o ne djila e. La di-e, ongũ inde ani ngakpokpo e, a ko kũkũlũ 'ngũ. Ngaani-e, ani mbila ndjindji me ni ngakpo e kũkũlũ 'ngũ. Ani ngakpokpo ngũbula me ngayi di-e, yi bhuka. <sup>36</sup> Ongũ bhomũ-o akolo ngũbula me engũ inde u aye e bhũ Bhuku-o, amene lie, engũ inde u aye e me: «U gũmũ sũka biki ani belegũ de bini.†» <sup>37</sup> La di-e, u aye bhũ Bhuku li bili koko me: «U atsia kpála inde u adũ e-o.†»

*U azi Yesu*  
(*Tsia bhũ Mat. 27:57-61; ne bhũ Mlk. 15:42-47; di ne bhũ Luk. 23:50-56.*)

<sup>38</sup> Pita ongũ akodho 'kpĩ-e, Djodjefũ , kpála na gũdhũ na Alimatayo, ayo ka Pilatø me ani ha kpadji pi ni ngũ na'e kuo Yesu. (Djodjefũ nani ne sũka omũkpata gba Yesu-o. Engũ bini, ani dũ asuno lie mbámbá de, anga ani adũ akpe ongámási gba omaYuda-o.) Pilatø aziba pi ani. Abhomũ-o, Djodjefũ anũ, ani atsia a'e kuo Yesu. <sup>39</sup> Nikodemũ, inde anũ nani nabhaka Yesu 'kpĩ bini sukpe-e, ago di. Ani ago ne mũngotsi inde u amene e li mila bhũ dabili bini ne aloesi.‡ Mũngotsi ango-o, adũ masikpe de kilo ndjikpa bata. <sup>40</sup> Abhomũ-o, ndũ uo bhisi hana aha kuo Yesu. U agagala ne opapala

bongo na lene me u nde atuko mũngotsi tété, maka li omaYuda adũ amemene lie bhũ nedhinga nazi kuo-o. <sup>41</sup> Li bili nani u agi Yesu li e li kulusi-e, edyi bini adũ oo. Bhũ 'dyi ango-o, edũ bini na mbia adũ oo. Edũ ango-o, u zi nga nani kpála bini bhũbhũ de. <sup>42</sup> U atsia ato Yesu bhũbhũ. Padhá de, anga u adũ agbene lio ka li ekpi naguo gba omaYuda adũ lie masikpe-o. La di-e, edũ ango-o adũ oo masikpe.

## 20

*Yesu azuku*  
(*Tsia bhũ Mat. 28:1-8; ne bhũ Mlk. 16:1-8; di ne bhũ Luk. 24:1-12.*)

<sup>1</sup> Abhomũ-o, bhũ 'kpĩ yinga kũkpĩ má bhø-o, Malia , kpála na gũdhũ na Magadala, anũ abhũ lata. A adũ me ekpi nde nga bha ne biti. Ani au me teme inde adũ li 'bhø lata-a nde ayie li bhøbhø ayie. <sup>2</sup> Abhomũ-o, ani anũ ne holo, ani anũ abhaka Simo Piele, di ne mũkpata koko inde li Yesu adũ akũnda e naali-o. Ani atsia apa pi uo me: «U agbe kuo Ngámá bhũ lata-a agbe. La-a, ya mbila de me u a'o ani su-oie de.»

<sup>3</sup> Abhomũ-o, Piele ne uo ne mũkpata koko-o aholo 'nú, u atsia agbida abhũ lata. <sup>4</sup> Ndũ uo bhisi hana agu holo. Engũ bini, mũkpata bhe koko agu naae holo kpekpeke ane Piele mane. Kaka-a, ani atsia akolo abhũ lata kalanũ. <sup>5</sup> Ani akita ne kuto ngũ natsia 'kpĩ bhũbhũ. Ani au opapala bongo na lene me a nde a'o lie oo. La-a, ani li de. <sup>6</sup> Abhomũ-o, Simo Piele inde adũ akpata ani sidi-e, akolo di. Ani atsia ali abhũ lata. Ani au opapala bongo na lene me a nde a'o lie oo, <sup>7</sup> la di ne bongo bhende adũ me a nde abuku bhũla Yesu-o. Bongo ango-o dũ bhũ dabili bini ne opapala bongo na lene de. Engũ bini, a adũ me a nde agagala naae lie kpi li bili koko. <sup>8</sup> Abhomũ-o, mũkpata

† 19:36 19:36 Tsia bhũ Eki. 12:46; ne bhũ Nom. 9:12; di ne bhũ Ets. 34:21. † 19:37 19:37 Tsia bhũ Djkl. 12:10. ‡ 19:39 19:39 Aloesi: A ko mũngotsi inde li se e nde má wese. A ko la di elá, u memene li ndende ndula.

koko inde akolo abhú lata kalanu-o, atsia ali di. Aní au, aní atsia abhuka. <sup>9</sup> Padhá de, anga nakolo li nedhinga bhomu-o, omukpata mbila nga nani ndjindji de, engú inde u aye e bhú Bhuku gba Ebhe-e me Masiya azúku bhú ká okpála inde amu-o mazuku. <sup>10</sup> Pita 'ngú bhomu-o, omukpata bhisi-e atsia agie lio agba o.

*Yesu akoto li Malia, kpála na kuti na Magadala*

*(Tsia bhú Mat. 28:9-10; di ne bhú Mlk. 16:9-11.)*

<sup>11</sup> Malia adu me aní nde alu akilidjo de lata-o. Aní adu naku 'gbá. Nedhinga inde aní adu nga bha lie naku 'gbá-a, aní akita ne kuto ngabula natsia 'kpí abhú lata. <sup>12</sup> Aní au oandjelu bhisi. U adyidyí obubu bongo. U adulu li bili inde u a'o nako kuo Yesu li e ko. Bini adu li pápá na 'ndji aní, koko atsia adu li pápá na 'dhu aní. <sup>13</sup> Oandjelu-o ayi Malia me: «Olo-e, mu ngaku 'gba ngú ni?» Aní agie pi uo me: «U a'e kuo Ngámá gba ma-a a'e. Ma mbila de me u a'o su-oie de.»

<sup>14</sup> Pita aní apa 'ngú bhomu-o lie, aní adji lie, aní atsia au Yesu me aní nde alu oo. Engú bini, aní du ambila de me a ko Yesu-o de. <sup>15</sup> Yesu ayi aní me: «Olo-e, mu ngaku 'gbá ngú ni? Mu ngagili da?» Malia abhundja me a ko kpála inde ngamene kulu bhú 'dyi-o. Kaka-a, aní apa pi aní me: «'Dyi ma, i du me mu nde a'e kuo Ngámá gba ma-a ngamu-o, suno bili mo o'o li e muma, amba ma nu ha.» <sup>16</sup> Yesu apa pi aní me: «Malia!» Malia adji lie, aní atsia apa pi aní bhú eli na ebele me: «Laboni!» (A akunda napa me «Musunu.») <sup>17</sup> Yesu apa pi aní me: «Mo obú 'kpa mu li ma de. Padhá de, anga ma nu nga agba 'Dyi ma abhúla de. Engú bini, nu bhaka ondaise ma, amba mu pa pi uo me: «Ma adji abhúla agba 'Dyi ma. A ko la di 'Dyi yi. Ma adji abhúla agba Ebhe gba ma-o. A ko la di Ebhe gba yi-o.»»

<sup>18</sup> Abhomu-o, Malia, kpála na kuti na Magadala, atsia anu akpokpo pi omukpata me: «Ma au Ngámá au!» Aní atsia akpokpo 'ngú inde li Yesu apa e pi aní-e, pi uo.

*Yesu akoto li omukpata gba e-o*

*(Tsia bhú Mat. 28:16-20; ne bhú Mlk. 16:14-18; di ne bhú Luk. 24:36-49.)*

<sup>19</sup> Bha bhú 'kpí yinga bhomu-o tagolo-o, omukpata-a apo bhúla o bhú 'ti bini. U atsia adhodho obhe bhoti nganda o madhodho. Padhá de, anga u adu akpe ongámási gba omaYuda-o . Yesu ago alu tu uo. Aní atsia apa pi uo me: «Guo 'ngú du bhú dabili bini ne yi!» <sup>20</sup> Pita aní apa 'ngú bhomu-o lie, aní asuno 'kpa e, di ne pála kala e pi uo. Li omukpata au Ngámá lie, u abedhe ne djali bedhe. <sup>21</sup> Yesu atsia apa matá pi uo me: «Guo 'ngú du bhú dabili bini ne yi! Maka li 'Dyi ma atima ma lie, ngama di-e, ma atima yi.» <sup>22</sup> Pita aní apa lie mo-o, aní a'ulu wo e pí uo, aní atsia apa pi uo me: «Yi sia Bu Bhobua ! <sup>23</sup> Okpála bhende yi ambú li siti 'ngú gba o-o, li Ebhe mbú di li siti 'ngú gba uo-o. Okpála bhende yi mbú li siti 'ngú gba o de-e, Ebhe mbú di tété de.»

*Yesu akoto li omukpata gba e pita Tuma*

<sup>24</sup> Nedhinga li Yesu akoto li omukpata gba e lie abhú 'ti-e, suka omukpata ndjikpa ne ká bhisi-e Tuma (inde u a'i di-e me Bhuko-o) du bhú dabili bini ne uo de. <sup>25</sup> Abhomu-o, omukpata koko atsia apa pi aní me: «Ya au Ngámá.» Engú bini, aní atsia agie pi uo me: «Ma akunda nau oeka na osete inde li okpa aní-o. Ma akunda na'o likpa ma li pokoli na osete ango-o. Ma akunda la di na'o 'kpa ma li pála kala aní. I du mo-o de-e, ma bhúka de.» <sup>26</sup> Pita 'kpí madjina, omukpata gba Yesu apo matá bhúla o abhú 'ti. Tuma adu bhú dabili bini ne uo. Obhe bhoti-e adu me a nde adhodho lie madhodho. Engú bini, Yesu ago, aní

alɔ tɔ uo. Anɔ atsia apa pi uo me: «Guo 'ngú dɔ bhú dabilɔ bini ne yi!»  
<sup>27</sup> Pipita-a, anɔ apa pi Tɔma me: «'O likpa mɔ sɔ, amba mɔ tsia 'kpa ma. Go ne 'kpa mɔ, amba mɔ 'o li pála kala ma. Mo odú ne bua na bhisi bhisi de. Dɔ mangbo ne nabhuka.»  
<sup>28</sup> Tɔma agie pi anɔ me: «Ngámá gba ma, di ne Ebhe gba ma!»  
<sup>29</sup> Yesu apa pi anɔ me: «Mo obhuka ka mo ou ma lie? A ko djali pi okpála inde ngabhuka me u nde u ne djila o de ko.»

### *A inde-e ta bhuku inde*

<sup>30</sup> Yesu amene matá ongamba 'ngú koko bhelé li djila omɔkpata gba e-o. La-a, u ye bhú bhuku inde-e de.  
<sup>31</sup> Engú bini, ongú inde aye lie bhúbhú-o, a ko ngubula me yi bhuka me Yesu ne Masiya, Ndili gba Ebhe, amba i dɔ la me yi nde abhuka ani-e, yi de sia mɔkobho ka 'li anɔ.

## 21

### *Yesu akoto li omɔkpata gba e lingo ekpɔ na Tibeliade*

<sup>1</sup> Ekpɔ koko pipita-a, Yesu akoto matá li omɔkpata gba e lingo ekpɔ na Tibeliade. Lele maka anɔ akoto li uo lie, ngae inde: <sup>2</sup> a adɔ nani Simo Piele, ne Tɔma, (inde u a'i e me Bhuko), ne Natanaele, (kpála na kuti na Kana, bhú ndu doto na Galilaya), ne ongisi gba Djebedayo, di ne omɔkpata koko bhisi gba Yesu-o. U adɔ bhú dabilɔ bini.  
<sup>3</sup> Simo Piele apa pi uo me: «Ma adji nagbe sungu.» U agie pi anɔ me: «Ngaya di-e, ní anú ne yi bhú dabilɔ bini.» Abhomɔ-o, u anɔ, u atsia a'ɔ'ɔ bhú zabɔ. Engú bini, sukpe bhomɔ-o, u gbe sungu belegɔ de bini.

<sup>4</sup> Li ekpɔ aholo naseke lie, Yesu alɔ lingo 'ngu oo. Engú bini, omɔkpata-a dɔ ambila de me a ko ani-e de.  
<sup>5</sup> Abhomɔ-o, Yesu atsia apa pi uo me: «Odi ma, yi aholo mbo sungu uu?» U agie pi anɔ me: «Ya holo de.»  
<sup>6</sup> Anɔ apa pi uo me: «Yi bhike nado lingo zabɔ-o ne li pápá na kokpa, amba yi holo sungu.» Abhomɔ-o,

u atsia abhike nado-o bhú 'ngu. U ale nagbele nado ango-o bhú 'ngu pima. Padhá de, anga osungu adɔ bhúbhú bhibhiti naali.  
<sup>7</sup> Abhomɔ-o, mɔkpata inde li Yesu adɔ akunda e naali-e apa pi Piele me: «A ko Ngámá!»

Li Simo Piele adje lie me a ko Ngámá-a, anɔ adyi bongo. Padhá de, anga abhaka me anɔ nde agbe bongo-o magbe ngú nagbe sungu-o. Anɔ atsia agɔ 'i e bhú 'ngu.  
<sup>8</sup> Omɔkpata koko agie lio ne zabɔ-o me u nde ngagbele nado-o. Nado ango-o adɔ me a nde abedhe ne osungu bedhe. U dɔ nani dengo 'gɔ-o tsutsu de. U adɔ masikpe de metele kámá bini.

<sup>9</sup> Nedhinga u aze lie apɔ 'gɔ-o, u au djua ne sungu pépé, di ne mapa.  
<sup>10</sup> Yesu apa pi uo me: «Yi go ne té osungu inde yi aholo e-o.»  
<sup>11</sup> Abhomɔ-o, Simo Piele a'ɔ matá bhú zabɔ-o. Anɔ agbele nado apigo. Nado ango-o adɔ me a nde abedhe ne ongbengbe osungu kámá bini ndjikpa bhuluvue ne ká bata. Abana li osungu adɔ lie bhúbhú bhelé-e, nado ango-o tsotsolo de.  
<sup>12</sup> Yesu apa pi uo me: «Yi go zɔ 'he.» Kpála bini bhú ká omɔkpata-a le nayi anɔ de me: «Mɔ ne da?» Padhá de, anga u adɔ ambila hana me, a ko Ngámá.  
<sup>13</sup> Abhomɔ-o, Yesu adyudyo lie masikpe. Anɔ aha mapa, anɔ atsia agapa li uo. Anɔ atsia aha di sungu-o pi uo.  
<sup>14</sup> A adɔ nani bhomɔ-o bhutsibhutsi na bata me Yesu koto li omɔkpata gba e, pita anɔ azuku lie bhú ká okpála bhende amu ko.

### *Yesu ayi Piele bhutsibhutsi bata me ani kunda ni uu ie*

<sup>15</sup> Pita u azɔ 'he-e lie, Yesu ayi Simo Piele me: «Simo, ndili gba Djaa, mɔ kunda ma nane maka li okpála koko inde-e akunda ma lie mane?» Piele agie pi anɔ me: «Henɔ, Ngámá, mɔ mbila hana me ma kunda mɔ.» Yesu apa pi anɔ me: «Kɔ ongisi kandele gba ma-o.»  
<sup>16</sup> Yesu ayi matá anɔ bhutsibhutsi na

bhisi-e me: «Simo, ndili gba Djaa, mu kunda ma uu?» Piele agie pi ani me: «Hení, Ngámá, mu mbila hana me ma kunda mu.» Yesu apa pi ani me: «Lila okandøle gba ma-o.»<sup>17</sup> Yesu ayi matá ani bhutsibhutsi na bata-a me: «Simo, ndili gba Djaa, mu kunda ma uu?» Piele asia likabhu li bua e. Padhá de, anga Yesu ayi ani bhutsibhutsi na bata me: «Mu kunda ma uu?» Ani atsia apa pi Yesu me: «Ngámá, mu mbila ndu 'ngú hana. Mu mbila bhadi hana me ma kunda mu!» Yesu apa pi ani me: «Ku okandøle gba ma-o.

<sup>18</sup> A moko, ma apa pi mu na paká me, nedhinga nani mo odu lie makombi-e, mo odu agbite ekpú gba mu-o ludu mu ngamu makpe. Mo odu la di anu li bili inde mo odu akunda nanu li e-o. Engú bini, nedhinga mo okólo lie 'gbé kpála-a, mo o'é'e 'kpa mu abhúlá, li kpála koko tsia gbíte 'kpú gba mu-o ludu mu ngae. Ani tsia nú di ne mu li bili inde mu kunda nanu li e de.»<sup>19</sup> Yesu adu apa mo-o ngubula nasuno lele maka li Piele akpí lie, ani tsia há la di sangu pi Ebhe ko. Pipita-a, Yesu apa pi ani me: «Kpata ma!»

*Piele ayi 'ngú pindji mukpata inde li Yesu adu akunda e naali-o*

<sup>20</sup> Li Piele adji lie lie, ani au mukpata li Yesu adu akunda e-o, (kpála inde aseke nani 'ndji e pi mbulu Yesu, nedhinga inde u adu azu 'he lie-o, inde atsia ayi di nani Yesu me: «Ngámá, kpála bhende apú mu-o, a ko da?») <sup>21</sup> Abhomu-o, Piele au mukpata angoo, ani atsia ayi Yesu me: «Ngámá, a la ani-e, a akólo li ani ne mangua 'ngú dho?»

<sup>22</sup> Yesu agie pi ani me: «I du me ma nde akunda me ani du, akolo li nedhinga inde ma agó matá lie, a ko naamu 'ngú? Ngamu-o, kpata ma!» <sup>23</sup> Abhomu-o, ngali atsia ayangba bhú ká omabhuka me, mukpata angoo kpí naae de. La-a, Yesu pa nani pi Piele de me: «Ani kpí de-e de.» Engú bini, ani

apa nani mangbo me: «I du me ma nde akunda me ani du akólo li nedhinga inde ma agó matá lie, a ko naamu 'ngú?»<sup>24</sup> Mukpata angoo ngakpokpo ongú inde-e ngae makpe. Ani aye la di bhú bhuku ngae. Ya mbila la di ndjindji me engú inde ani ngakpokpo e, a ko kukulu 'ngú.<sup>25</sup> Yesu amene di nani ongú koko bhelé. I dú me u yé ongú angoo bini ne bini hana-a, ma abhundja me doto libhomu de tí ne obhuku inde i de yé lie de.

## Kulu gba obhulũ Titima gba Yesu Eli na kalanu

Kulu gba obhulũ Titima gba Yesu ne bhuku na bhisi inde li Luka aye e-o.

Engú na ngbéngbé inde bhú bhuku inde-e, a ko nakpokpo lele maka li omakpata gba Yesu na kalanu adu adhuku bhú angu gba Bu Bhobua, u atsia adu akpokpo Bádha Ngali pindji Yesu inde adu ayangba abhú: «Yelusalema, ne bhú Yudaya, ne abhú Samalia nakolo makolo abhú dje doto» (1:8). A ko Ngali gba Kilisito inde akpo lita e agba omaYuda atsia akolo nabhuka pi ndu okpála na píla doto hana.

Engú na ngbéngbé inde bhú bhuku gba obhulũ titima-a, a ko kulu gba Bu Bhobua inde ago ne angu pí omabhuka abhú Yelusalema li 'kpí na Patekote. Bu Bhobua angoo, la di ngateteke ne naha angu pi Piga gba Ebhe ne okpála inde ngadjedjele, nakpata lele ongú inde u aye e bhú bhuku angoo. Engú na kalanu inde atsia omakilisito akpokpo lie bhelé bhú eli gba Ebhe inde u adu aha e pi okpála-o. A la di ongú inde u aye e bhú bhuku gba obhulũ titima gba Yesu ngasuno angu na ongú angoo bhú mukobho gba omabhuka, la di bhú makpetse inde bhú Piga gba Ebhe-o.

### **Ongbengbe ongú inde bhú bhuku inde-e ngae inde:**

Naleke lio ngú nakpokpo 'ngú pindji 'ngú mo ue ne bhe mo adje e 1:1-26

- (1) Lili na soso ne engú inde li Yesu apa me ni amene e 1:1-14

- (2) Kpála inde aha da Yuda-o 1:15-26

Okpála inde akpokpo 'ngú pindji 'ngú inde u au e ne bhe u adje e abhú Yelusalema 2:1 - 8:3

Okpála inde akpokpo 'ngú pindji 'ngú inde u au e ne bhe u adje e abhú Yudaya ne abhú Samalia 8:4 - 12:25

Kulu gba Polo 13:1 - 28:31

- (1) Dholo gba Polo na kalanu ngubula nakpokpo Bádha Ngali 13:1 - 14:28

- (2) Bula abhú Yelusalema 15:1-35

- (3) Dholo gba Polo na bhisi ngubula nakpokpo Bádha Ngali 15:36 - 18:22

- (4) Dholo gba Polo na bata ngubula nakpokpo Bádha Ngali 18:23 - 21:16

- (5) Polo bhú tikpu abhú Yelusalema, ne bhú Sedjale a la di-e bhú Loma 21:17 - 28:31

*Yesu apa me: «Yi asia Bu Bhobua»*

<sup>1</sup> Ndai ma na mukunda Tiofile,

Bhú bhuku gba ma na kalanu-o,\* ma akpokpo ndu 'ngú hana inde li Yesu amene e di ne bhende ani asuno e ko. Ma akpokpo nayie li lilita† <sup>2</sup> akolo li 'kpí li Ebhe aha ani lie abhúla ko. Kala nanu ka ani abhúla-a, bhú angu gba Bu Bhobua-a, ani aha olili gba e pi okpála inde ani alo nani o maka obhulũ titima-o. <sup>3</sup> Pita nakpi ka ani-e, ani apana lie pi obhulũ titima gba e-o. Ani asuno pi uo li okpadji bhelé me ni bhú mukobho. Ani asuno lie pi uo ngubula 'kpí ndjikpa badha. Ani atsia akpokpo di 'ngú pi uo pindji Nau gba Ebhe. <sup>4</sup> Ekpí bini, li ani adu azu 'he lie bhú dabili bini ne uo-o, ani atsia aha lili inde-e pi uo me: «Yi ayie bhú Yelusalema de, engú bini, yi djeke ehe inde li 'Dyi ma apa me ni ahá e pi yi ko. A ko ehe inde ma apa 'ngú pi yi pindji e ko. <sup>5</sup> Padhá

\* 1:1 1:1 Bhuku na kalanu: A akunda napa me Bádha Ngali gba Yesu Kilisito maka li Luka aye lie ko. Kulu gba obhulũ titima gba Yesu ne bhuku na bhisi gba ani-o. † 1:1 1:1 Lilita: A akunda napa me a ko nayie li lita kulu gba Yesu Kilisito li 'kpí ani asia batisimo lie ko.

de, anga Djaa abatisa nani okpála ne engu. Engú bini ngayi-e, pita 'kpí masudha-a, yi asía batisimo na Bu Bhobua.»

### *Ebhe aha Yesu abhúlá*

<sup>6</sup> Li obhulú titima adu apo bhúla o lie de Yesu-o, ekpí koko-o, u atsia ayi ani me: «Ngámá, mo ogbégbe omafalaale bhú bali, mu tsia há ngámá pí uo mbia inde-e?» <sup>7</sup> Yesu atsia agie pí uo me: «A ko engú ka yi de ngú nambila nedhinga di ne oekpí angó-o. Padhá de, anga Ebhe ne angu gba e makpe, a'o oekpí angó-o maka ani akúnda lie ko. <sup>8</sup> Engú bini, yi asía angu, li nedhinga li Bu Bhobua aké pí yi lie-o. Yi tsia kpókpo 'ngú gba ma inde yi au e ne bhe yi adje di e bhú gudhu na Yelusalema, bhú ndu doto na Yudaya libhomu, ne bhende na Samalia, akólo makolo ali dje doto.»

<sup>9</sup> Li Yesu andjia nakpokpo 'ngú bhomu-o lie, Ebhe atsia aha ani abhúlá me ndu uo hana nde ngatsia ani. Abhomu-o, ndindi atsia abuku ani. U u matá ani de. <sup>10</sup> Nedhinga u adu nga bha lie atsia 'kpí abhúlá-a, li pápá li Yesu atapa lie, kolo me-e, okpála bhisi aze li uo. U adyidyí bubu bongo. <sup>11</sup> U atsia apa pí uo me: «Ngayi okpála na Galilaya, yi alulú si ne natsia 'kpí abhúlá ka ní? Yesu inde li Ebhe aha e abhúlá bhomu-o, ani agie bhadi lie maka yi au ani lie anu abhúlá ko.»

### *Libi obhulú titima gba Yesu*

<sup>12</sup> Abhomu-o, obhulú titima-a ayie pí eta u a'i e me eta na ondula na Olive, u atsia agie lio bhú gudhu na Yelusalema. Eta angó-o adu de Yelusalema masikpe de kilometele bini.† <sup>13</sup> U akolo lie bhú Yelusalema-a, u a'u bhú tina 'ti bhe abhúlá, bili inde u adu adulu lie-o. A adu nani: Piele ne Djaa, ne Djaki di ne Andili, ne Filipino di ne Tuma, ne Batelemi di ne Matié, ne Djaki ndili gba Alafayo, ne Simo kpála nakúnda doto gba o,

la di ne Djude ndili gba Djaki. <sup>14</sup> Ndu uo hana, adu apo bhúla o ne bua bini, ndu nedhinga hana ngú nayo Ebhe. U adu bhú dabili bini ne olisi koko, ne Malia 'hi Yesu, di ne ondaise Yesu.

### *U agbe kpála bhú dá Yuda*

<sup>15</sup> Bhú oekpí bhomu-o, ekpí bini, omabhuka apo bhúla o. U adu masikpe de kámá ne ndjikpa bhisi. Abhomu-o, Piele ayie bhúlá bhú ká uo. Ani atsia apa pí uo me: <sup>16</sup> «Ondaïse ma, engú inde u aye e bhú Bhuku gba Ebhe-e, a ayo me amene lie. Bu Bhobua apa 'ngú angó-o bhú 'li Davidi pindji Yuda, kpála inde ago nani ne okpála inde aholo Yesu-o. <sup>17</sup> Yuda nako ne sùka ní. Ngámá abhu ani ngú namene kulu maka ní adu di ne di lie-o.»

<sup>18</sup> (Ani akala edyi ne tia inde u aha e pí ani li ani abholo kpála lie-o. Bhú edyi angó-o, ani ati adji 'ndji e ne kuto. 'Bu ani aupa. 'Ndja ani atsia aze kuto. <sup>19</sup> Ndu okpála hana na Yelusalema ambila 'ngú angó-o ndjindji. Kaka-a, u a'o nani 'ili li edyi angó-o bhú eli na gba o me «Akeledama», a akúnda napa me «edyi na Ngate».)

<sup>20</sup> Pipita-a, Piele apa matá me: «Padhá de, anga u aye bhú bhuku na oEtsi gba omaYuda-a me:

<A ayo me kuti gba ani-e kolo mili bili,

kpála bini adú bhúbhú de.>

U atsia aye matá me:

<A ayo me kpála koko ha kulu gba ani-o.†>

<sup>21-22</sup> Kaka-a, a ayo me kpála bini li bhú ká ní, amba ani du akpokpo ngali nazuku gba Ngámá Yesu-o. A ayo me kpála angó-o du sùka okpála inde adhuku bhú dabili bini ne ní ndu nedhinga hana li Ngámá Yesu adhuku lie ne ní píla doto ko. Kpála angó-o du kpála inde adhuku bhú dabili bini ne ní nayie li nedhinga li

‡ 1:12 1:12 Masikpe de kilometele bini: U aye bhú obhuku koko me «maka enú na ekpí naguo gba omaYuda.» † 1:20 1:20 Tsia bhú Ets. 69:26, 109:8.



Djaa abatisa Yesu lie, § akolo li ekpí li Ebhe aha ani lie ngú nanu abhúlá-o.»

<sup>23</sup> Abhomu-o, u atsia agbe okpála bhisi. A adu 'li bhe bini-e me Djodjefu, inde u a'i e me Balasabasi. 'Ili koko gba ani-e matá me Djusitisi. A adu 'li bhe koko me Matiasí. <sup>24</sup> U atsia ayo Ebhe me: «Ngámá, mu mbila bua ndu okpála hana. Pana kpála inde mo obhu e bhú ká okpála bhisi inde-e pi ya. <sup>25</sup> Ani adú bhulu titima gba Yesu. Ani ahá kulu inde li Yuda a'o ká e ngú nanu li bili gba e makpe ko.» <sup>26</sup> Pita u ayo Ebhe lie, u agu gbanda.\* Gbanda asuno Matiasí. Abhomu-o, u atsia ato ani bhú ká obhulu titima ndjikpa ne ká bini-o.

## 2

### *Bu Bhobua akè pí omabhuka*

<sup>1</sup> Li ekpí na Patekote akolo lie, ndu omabhuka hana apo bhúla o li bili bini. <sup>2</sup> Má gala kolo me-e, tolo ayie abhúlá maka anvi na kpekpeke. Tolo ango-o aha bili bhú 'ti inde u adu bhú e hana. <sup>3</sup> Abhomu-o, u au oehe maka dingidhi djua. Oehe ango-o agbogbo bhusu e, atsia adulu pí 'ndji ndu uo hana bini ne bini. <sup>4</sup> Ndu uo hana abedhe ne Bu Bhobua. U atsia aholo agama 'ngú bhú oeli koko, maka li Bu Bhobua adu ahaha pi uo lie ngú ngagama ko.

<sup>5</sup> Bhú gudhu na Yelusalema-a, omaYuda inde ayie bhú ndu okuti hana\* píla doto libhomu adu oo. A adu okpála inde adu akpe Ebhe. <sup>6</sup> Li u adje tolo ango-o lie, bhiti okpála ango-o ago apo bhúla o. U atsia adu angamba naali. Padhá de, anga kpála ne kpála adu adje omabhuka agama 'ngú bhú eli gba e makpe. <sup>7</sup> U abedhe ne nangamba, di ne nakiaka. U atsia adu apa me: «Okpála i ngagama 'ngú inde-e, ndu uo hana

ne okpála na ndu doto na Galilaya adi? <sup>8</sup> Lele pi ndu ní hana bini ne bini, ní ngadje uo lie ngagama 'ngú bhú eli gba ní makpe na kuti-e?

<sup>9-10</sup> Bhú ká ní si-e, okpála koko ayie bhú doto na Palate. Okoko ayie bhú Media. Okoko ayie bhú Elama. Okoko ayie bhú Edjipeto. Okoko ne okpála na Medjopotami. Okoko ayie bhú ndu doto na Yudaya. Okoko ayie bhú Kapadose. Okoko ayie bhú Pote di ne Adjia. Okoko ayie bhú Filidjia. Okoko ayie bhú Pamifilia. Okoko ayie lingo gudhu na Silene inde bhú doto na Libi ko. Okoko ayie bhú gudhu na Loma. <sup>11</sup> Okoko ayie bhú kpomè na Kelete. Okoko ayie bhú doto na Alabi. U azu okoko omaYuda. Okoko-o, a ko ogandji okpála inde abhuka Ebhe gba omaYuda-o. La-a, lele pi ní ngadje uo ngakpokpo 'ngú pindji ongamba 'ngú gba Ebhe bhú eli gba ní na kuti lie bini ne bini-e!» <sup>12</sup> Ndu uo hana adu ne nangamba naali. Mabhundja gba uo-o angbingi. Abhomu-o, u atsia apa sunda o me: «Engú inde-e akunda napa pi?» <sup>13</sup> Engú bini, okoko adu amu omabhuka. U atsia adu apa me: «Pandi aholo uo e-e ngae bha-a!»

### *Piele akpokpo eli gba Ebhe-e pí bhiti okpála*

<sup>14</sup> Piele ayie bhúlá bhú dabili bini ne obhulu titima ndjikpa ne ká bini koko-o. Ani aholo agama 'ngú kpekpeke pi bhiti okpála me: «Ngayi omaYuda, di ne ndu yi okpála hana inde ngadulu bhú gudhu na Yelusalema-a, yi dje ma ndjindji, amba yi mbila la di engú i ngakodho 'kpí inde. <sup>15</sup> Okpála inde-e, a holo uo ne pandi maka yi ngabhundja lie de. Padhá de, anga a ko nga bha saa na odukpabini na

§ 1:21-22 1:21-22 Nayie li nedhinga li Djaa abatisa Yesu lie: U aye bhú obhuku koko me «nayie li nedhinga inde li Djaa adu abatisa okpála lie-o.» \* 1:26 1:26 U agu gbanda: U du nani agu gbanda ango-o pi Ebhe, ngú nambila engú inde ani akunda e-o. \* 2:5 2:5 OmaYuda inde ayie bhú ndu okuti hana: U adu nani ago bhú Yelusalema ngú nadhøge Ebhe bhú anokomia na Patekote .

kekpí. <sup>16</sup> Engú bini, engú i ngakodho 'kpí mbia inde-e, a ko engú inde li polofeta Djuele apa nani e-o. Engú inde me:

<sup>17</sup> <Ebhe apa me: li sokpí-e,  
ma atúko Bua† gba ma-a pí ndu okpála hana.

Ongisi gba yi na obhosibhosi, di ne obhe na olisilisi akpókpo ongú inde ma akúnda e-o.

Omakombise gba yi-e aú ongú inde ma akúnda nasuno e bhú loto.

Ogbegbe okpála gba yi-e atsia alóto oloto inde ma atíma e pí uo ko.

<sup>18</sup> Li oekpí ango-o, ma atúko belegu di Bua gba ma-a

pí okpála na kulu gba ma na obhosibhosi, di ne obhe na olisilisi.

U tsia kpókpo ongú inde ma akúnda e-o.

<sup>19</sup> Ma améne ongamba 'ngú abhúlá. Ma tsia méne ongamba 'ngú kuto píla doto.

Ngute atúko, li djua tsí, a adú di ne ndindi nguwa.

<sup>20</sup> Kala me ekpí gba Ngámá-a kolo-o, ekpí na ngbéngbé, di ne ekpí na asasaua-a,

ela adjí lie biti.

Li epe djí lie maka ngute.

<sup>21</sup> Abhomu-o, kpála ne kpála inde abhu 'li Ngámá-a, tsia sía mukobho.†»

<sup>22</sup> Abhomu-o, Piele atsia apa me: «Ngayi okpála na Isalaele, yi dje nga engú ma adjí apa e pí yi inde: Ebhe apana pí yi mbámbá me ni atima Yesu, kpála na kúti na Nadjaleta-a, pí yi. Aní apana li namene ongamba 'ngú sánda yi bhú aní. Aní amene okiaka 'ngú , di ne oehe na tsulutsulu bhú aní. Ngayi makpe-e, yi mbíla 'ngú tété ndjindji. <sup>23</sup> Kpála bhomu-o, u apu aní pí yi. Ebhe ambíla nani 'ngú tété kalanu. Aní atsia akúnda me amene lie moko. Yi abhøle aní. Padhá de,

anga yi aha aní pí okpála na sisiti. U agi aní li kulusi, u atsia abhøle aní.

<sup>24</sup> Engú bini, Ebhe azuku aní, aní atsia a'e aní bhú likabhu na kuo. Padhá de, anga a ayo nani de me kuo to aní bhú tikpu gba e-e de. <sup>25</sup> Kaka-a, Davidi apa li 'ngú gba aní-e me:

<Ma adu au Ngámá Ebhe kala ma ndu nedhinga hana.

Padhá de, anga aní li pá 'kpa ma na kokpa, amba ma agúku de.

<sup>26</sup> Kaka-a, bua ma abedhe ne djali bedhe.

Ma la di ngali 'tsi ne djali hana. Ekpí ma akpí lie,

ma adú ne 'to ma me ma akóbho makobho.

<sup>27</sup> Padhá de, anga mu 'ó ká ma de me ma du li bíli gba okpála inde amu-o de.

Mu kúnda de me kpála gba mu na ngbingbili-e zi bhú lata-a de.

<sup>28</sup> Mo osuno muma okpadji na mukobho.

Mo obédhe ma ne djali, anga ní ne mu bhú dabili bini.†»

<sup>29</sup> Piele apa matá me: «Ondaise ma, ma ti da napa engú pí yi mbámbá píndji ogbi ní Davidi. Aní akpi, u atsia azi aní. Lata aní bhú ká ní akolo pí naki. <sup>30</sup> Engú bini, a ko nani polofeta. Aní ambíla me Ebhe apa nani ne natu silika me: <Ma a'ó suka ongisi gba mu-o bini ngámá bhú da mu.> <sup>31</sup> Davidi au nani engú inde agó-o kalanu. Kaka-a, aní atsia apa engú nazuku gba Masiya me:

<Ebhe 'o ká aní li bíli gba okpála inde amu-o de.

Aní 'o la di de me aní zi bhú lata-a de.>

<sup>32</sup> Yesu inde ma ngapa 'ngú gba e-e, Ebhe azuku aní. Ndu ya hana, ya au engú ango-o ne djila ya. <sup>33</sup> Pipita-

a, Ebhe a'e aní abhúlá, aní atsia a'o aní li pá 'kpa e na kokpa. 'Dyi ní Ebhe aha Bu Bhobua pí aní maka aní apa nani lie kalanu ko. Aní atsia atuko Bu Bhobua ango-o pí ya. A ko

† 2:17 2:17 Bua: † du me u nde aye ne 'dhu balua na ngbéngbé-e (madjisikile), amba a ko Bu Bhobua. † 2:21 2:17-21 Tsia bhú Djl. 3:1-5. † 2:28 2:25-28 Tsia bhú Ets. 16:8-11.

bhende yi ngau e, di ne bhende yi ngadje e mbia inde-e ko. <sup>34</sup> Padhá de, anga Davidi ngae makpe 'u nani abhúlá de. Engú bini, ani apa ngae me:

<Ngámá Ebhe apa nani pi Ngámá gba ma-a me:

Du li pá 'kpa ma na kokpa,

<sup>35</sup> akólo li 'kpí ma a'ó obhulú yala gba m-u-o lie sa 'dhu m-u ko.†>

<sup>36</sup> A ayo me ndu okpála hana na Isalaele mbila engú inde-e ndjindji me: Yesu inde-e, inde yi abhøle e li kulusi-e, Ebhe a'o ani Ngámá, ani atsia a'o di ani Masíya!»

<sup>37</sup> Li u adje engú bhomu-o lie, bua uo asia likabhu naali. U atsia ayi Piele di ne obhulú titima koko-o me: «Ondaise ya, a ayo me ya mene pi?» <sup>38</sup> Abhomu-o, Piele atsia agie pi uo me: «Kpála ne kpála dji bua e, ani sia batisimo ne 'li Yesu Kilisito, amba Ebhe 'e siti 'ngú gba ani-o. Abhomu-o, yi tsia sía la di Bu Bhobua padhá. <sup>39</sup> Padhá de, anga ani apa nani kalanu me ni améne pi yi ne ongisi gba yi-e moko. Ani atsia apa me ni améne di pi okpála bhende ngadulu tsutsutsu,‡ di ne pi ndu okpála hana bhende li Ngámá gba ni-e a'í o-o.»

<sup>40</sup> Abhomu-o, Piele atsia akpo 'ngú koko pi uo bhelé ngú naha pi uo gumu me u bhuka, di me u du ne nalila lio malila. Ani adu apa pi uo me: «Okpála na naki inde-e sisiti. Yi yie bhú ká uo mayie, amba Ebhe kobho yi.» <sup>41</sup> Okpála bhelé inde adje 'li Piele-e, aziba. U atsia asia batisimo. Li ekpí ang-o, okpála masikpe de kutu bata ali bhú ká omabhuka.

*Omabhuka na kalanu-o adu nani lele o pi?*

<sup>42</sup> U adu aha lio ndu 'kpí hana ngú nadje nasuno gba obhulú titima gba Yesu-o. U adu nadu sunda o bhú mukunda maka ondaise. U adu azu

'he bhú dabili bini,§ u atsia adu di ayo Ebhe bhú dabili bini. <sup>43</sup> Ndu okpála hana adu ne tsulu. Padhá de, anga obhulu titima-a adu amene ongú na ngangamba, di ne okiaka 'ngú naali. <sup>44</sup> Ndu omabhuka hana adu adulu bhú dabili bini. Ndu 'he gba uo-o hana adu bhadi bhú dabili bini. U atsia adu agbogbo bhusu bhusu li o. <sup>45</sup> U adu atsiindji oedyi gba o, di ne oehe koko gba o-o. U atsia adu agbogbo bhusu tia ang-o li ndu okpála hana, maka li gumu gba kpála bini ne bini adu lie ko. <sup>46</sup> Ekpí bini ne bini hana, u adu apo bhúla o bhú dabili bini, u adu ali bhú 'ngbé 'ti Ebhe gba omaYuda. U adu agumu mapa bhú eti gba o, u atsia adu azu 'he ne djali, di ne bua na bhubhuku. <sup>47</sup> U adu atoko Ebhe. Engú inde u adu amene e-e bhú bádha bhú 'bu gba Ebhe-e, a adu anga li okpála naali. Abhomu-o, ndu 'kpí hana, Ngámá atsia adu ato okpála koko bhende asia mukobho-o bhú ká uo.

### 3

#### *Dukuto adhuku*

<sup>1</sup> Ekpí bini, pita tulukpe, Piele ne Djaa adu anu bhú 'ngbé 'ti Ebhe gba omaYuda, ngú nayo Ebhe inde u adu ayo e bhú saa na bata-o. <sup>2</sup> De 'bhø 'ngbé 'ti Ebhe gba omaYuda ang-o inde u a'i e me «Babadha-a», kpála bini inde i dhuku de nayie maka u azu ani lie adu oo. Ndu 'kpí hana, u adu ago a'o ani oo ngubula me ani du ayo tia ka okpála inde ngali bhú 'ti Ebhe ko. <sup>3</sup> Li ani au Piele ne Djaa lie me u nde adji ali bhú 'ngbé 'ti Ebhe-e, ani atsia ayo tia ka uo.

<sup>4</sup> Piele ne Djaa abanga djila o li ani. Abhomu-o, Piele atsia apa pi ani me: «Tsia ya!» <sup>5</sup> Kpála ang-o atsia a'o mabhundja gba e-e hana pí uo. Padhá de, anga ani adu abhundja me ni asia 'he ka uo masia.

† 2:35 2:34-35 Tsia bhú Ets. 110:1. ‡ 2:39 2:39 Okpála bhende ngadulu tsutsutsu: A akunda napa me ogandji okpála, okpála bhende ne omaYuda ade. § 2:42 2:42 Nazu 'he bhú dabili bini: A ko nazu komonyo. A ko la di nazu 'he bhú dabili bini.

6 Abhomu-o, Piele atsia apa pi ani me: «Falanga ka ma ade. Olo la di ka ma ade. Engu bini, ma aha pi mu ehe inde ka ma-o: ne 'li Yesu Kilisito na Nadjaleta-a, yie bhula, amba mu dhuku!» 7 Pipita-a, Piele aholo 'kpa ani na kokpa, ani atsia a'e ani bhula. Ma gala kolo me-e, obiki na 'dhu ani akolo kpekpeke. 8 Ani a'ulu, akoma kprii! Ani atsia aholo nadhuku. Pipita-a, ani ali bhugbe 'ti Ebhe bhugbe dabili bini ne Piele ne Dja. Ani adu adhuku. Ani adu a'ulu. Ani atsia adu adhogbe Ebhe. 9 Ndu okpala hana au ani me ani nde ngadhuku, ani nde ngadhogbe Ebhe. 10 U atsia ambila me, a ko kpala inde adu nadu li 'bhe 'ngbe 'ti Ebhe, li bhobhe bhende u a'i e me «Babadha», ngubula nayo 'he. Abhomu-o, ndu uo hana angamba, u atsia akiaka naali ka engu inde akolo li kute dukuto-o.

*Piele akpokpo 'ngu pi bhiti okpala bhugbe 'ti Ebhe gba omaYuda*

11 Abhomu-o, kpala ango-o du ayie de Piele ne Dja de. Ndu okpala hana angamba naali ka engu inde akodho 'kpi-o. U ago ne holo, u atsia apo bhula o de uo sa basa inde u a'i e me «Sa ngba 'ti gba Salomo.\*»

12 Li Piele au lie mo-o, do ani pi bhiti okpala bhomu-o me: «Ngayi okpala na Isalaele, yi ngangamba li nakobho ka kpala inde-e ka ni? Li yi abanga djila yi lie li ya mugito me ya amene ngaya ne angu gba ya makpe me kpala inde-e dhuku-o? La di mugito me a ko anga ya ngakpata engu gba Ebhe-e? A mo-ade. 13 Ebhe gba Abalahama, Ebhe gba Isaka, Ebhe gba Yakobho, Ebhe gba onguo ogbi ni amene me 'li bali gba ni Yesu-o adhogbe lie. La-a, ngayi makpe-e, yi apu ani pi ongamasu. Yi atsia ayala ani kala Pilato me ani nde adu akunda la me ni tse 'kpa li ani-o.

14 Ngayi-e, yi ayala Kpala bhende bubu, inde di ngbingbili. Yi atsia ayo me Pilato suno badha bhugbe 'bu pi kpala bhende ngabhili okpala-o. 15 Yi abhelo kpala inde ngaha mukobho. Engu bini, Ebhe azuku ani bhugbe ka okpala bhende amu-o. Ya au engu ango-o ne djila ya makpe. 16 Mbia inde-e, yi ngau kpala inde, yi mbila la di hana me a ko nako dukuto. Ani akobho ka 'li Yesu. Padha de, anga ya abhuka ani. A ko ka nabhuka bhugbe Yesu, ani atsia akobho hana maka yi ngau ani lie inde.

17 Engu bini, ondaise ma, ma ambila ndjindji me ngayi ne ongamasu gba yi-e, yi amene li Yesu mo-o, anga yi mbila nani kukulu 'ngu-o de. 18 La-a, Ebhe ngae makpe amene mo-o ngubula nasuno mbamba engu inde ani apa nani e kalanu bhugbe 'li ndu opolofeta hana ko. Ani apa nani me Masiya gba ni-e azu likabhu. 19 Kaka-a, yi dji bua yi. Yi gie liyi li papa gba Ebhe, amba ani 'e siti 'ngu gba yi-o. 20 Abhomu-o, Ebhe aha onedhinga naguo pi yi. Ani tsia tima mata Masiya inde ani abhu nani e kalanu-o pi yi. A akunda napa me Yesu.

21 Engu bini, mbia inde-e, a ayo me Yesu Kilisito du ngaiza abhula. Ani du oo akolo li nedhinga inde li ndu 'ngu hana akolo lie na mbia-o. Nayie didili naali-e, Ebhe apa nani engu ango-o bhugbe 'li obubu opolofeta-o. 22 Maka li Moidje apa la di nani lie me: «Ebhe Ngama gba yi-e atima polofeta pi yi maka ma. A adu saka ondaise yi. A ayo me yi dje ndu 'ngu hana inde ani apa e pi yi ko. 23 La-a, kpala bhende i dje 'li ani de-e, u agbe ani bhugbe ka okpala gba Ebhe, u tsia bhelo ani.†»

24 La di-e, ndu opolofeta hana inde akpokpo 'ngu gba Ebhe-e, nayie li Samuele, akpo engu ndu o hana bini ne bini pindji engu inde-e akolo li

\* 3:11 3:11 Sa ngba 'ti gba Salomo: A ko sa ngba 'ngbe 'ti Ebhe gba omaYuda-o. † 3:23 3:22-23 Tsia bhugbe Det. 18:15, 18, 19.

'kpí angó-o ko. <sup>25</sup> Engú li Ebhe apa nani e kalanu bhú 'bhø opolofeta-a, a pi yi. La di-e, gandja inde li Ebhe akodho nani e kalanu-o ne onguo ogbi yi-e, a di pi yi. Aní apa nani kalanu pi Abalahama me: <Ma atúko bisagu pí ndu opiga hana píla doto li pápá gba ongisi gba mu-o.†> <sup>26</sup> Kaka-a, Ebhe abhu bali gba e, aní atsia atima ngaiza aní pi yi omafsalaele. Aní atima aní me aní tuko bisagu pí yi. Aní agbé kpála ne kpála bhú siti 'ngú gba e-o.»

## 4

*Libi okpála natsia 'kpí li 'ngú gba omaYuda aholo Piele ne Djaa*

<sup>1</sup> Li Piele ne Djaa adu akpo 'ngú lie pi okpála-a, odimandø gba Ebhe-e ago bhú dabili bini ne ngámá gba okpála nalila 'ngbé 'ti Ebhe gba omaYuda di ne oSadukai . <sup>2</sup> U adje siti bua naali. Padhá de, anga Piele ne Djaa adu asuno pi bhiti okpála. U adu akpokpo pi uo me okpála inde amu-o azúku di mazuku, maka li Yesu azuku lie ko. <sup>3</sup> Abhomu-o, u aholo Piele ne Djaa. U atsia ato uo bhú tikpu akolo pi kèkpí, anga adu me ekpí nde ngabi. <sup>4</sup> La-a, bhelé na okpála inde adje nani eli gba Ebhe-e , akolo omabhuka . Abhomu-o, omabhuka abe ndu o, u atsia akolo masikpe de okpála kutu bhuluvue.

<sup>5</sup> Li ekpí aseke lie, ongámási gba omaYuda , ne obhelesi okpála di ne omusuno na líli gba Moidje , apo bhúla o bhú gudhu na Yelusalema. <sup>6</sup> A adu nani: bhele kpála gba odimandø Ana, ne Kaifa, ne Djaa , ne Alekidjandele di ne ndu okpála hana inde bhú piga gba bhele kpála gba odimandø gba Ebhe-o. <sup>7</sup> Abhomu-o, okpála inde aholo Piele ne Djaa, atsia agbe Piele ne Djaa kala uo. U atsia ayi uo me: «Yi akobho kpála inde ne mangua angu dho? La di ne 'li da?»

<sup>8</sup> Abhomu-o, Piele inde abedhe nani ne Bu Bhobua-a atsia apa pi uo me: «Ngayi ongámási, di ne yi obhelesi okpála-a, <sup>9</sup> ya amene bádha 'ngú pi dukuto inde. La naki-e, u ngayi ya me aní akobho lele pi. <sup>10</sup> A ayo me ndu yi hana, di ne ndu okpála na Isalaele hana, yi mbila engú inde-e ndjindji: kpála inde-e alu kala yi ne kute na angu ka angu gba Yesu Kilisito , kpála na Nadjaleta. A ko Yesu inde yi agi nani e li kulusi, Ebhe atsia azuku ani-o. <sup>11</sup> Yesu ne kpála inde li Bhuku gba Ebhe-e apa nani engú gba e me Ebhe apa me:

<Aní ne teme inde li ngayi okpála nayiki 'ti-e abhike e-o.

La-a, teme angó-o akolo teme inde abi eti-e libhomu.†>

<sup>12</sup> Aní ti bha da nakobho okpála ngae kpi e kpi. Padhá de, anga píla doto libhomu, Ebhe ha 'li kpála koko bini de inde u ti da nakobho ka e.»

<sup>13</sup> Li Libi okpála natsia 'kpí li 'ngú gba omaYuda au lie me Piele ne Djaa ngagama 'ngú ne tsulu ade-e, u angamba naali. Padhá de, anga u adu ambila ndjindji me Piele ne Djaa ne okpála na padhá. U mene balua bhelé de. La di-e, u adu ambila ndjindji me, u adu adhuku nani bhú dabili bini ne Yesu. <sup>14</sup> Engú bini, u adu di au kpála inde akobho-o alu de uo. U tsia du ne engú nagigie pi uo de. <sup>15</sup> Abhomu-o, ongámási aha líli me obhulu titima ze kilidjo. U atsia aholo nagama 'ngú sunda o. <sup>16</sup> U adu apa me: «Ní améne ngú okpála inde-e pi? Padhá de, anga ndu okpála hana na Yelusalema ambila ndjindji me, u amene ngamba 'ngú inde-e ngao. Ní ti la di da nayayala de. <sup>17</sup> Engú bini, ngubula me ngali angó-o ayángba naali sunda okpála de-e, a ayo me ní gbele 'dje uo kpekpeke me u apá matá engú ne 'li Yesu pi kpála belegu de bini.»

<sup>18</sup> Abhomu-o, u a'i matá obhulu titima-o. U atsia aha líli pi uo

† 3:25 3:25 Tsia bhú Dje. 22:18. † 4:11 4:11 Tsia bhú Ets. 118:22.

kpekpeke me, u agáma 'ngú di ne me u asúno ne 'li Yesu matá-a de. <sup>19</sup> Engú bini, Piele ne Djaa agie pi uo me: «Yi kodho 'ngú inde-e ngayi makpe. Bhú djila Ebhe-e, a ngbingbili ne bhedho? Ne me ya mene líli gba yi, ne me ya mene mangbo líli gba Ebhe! <sup>20</sup> La pi ya-a, ya ti da na'o nakpokpo ngali na engú inde ya au e ne bhende ya adje e de.» <sup>21</sup> Abhomu-o, Libi okpála natsia 'kpí li 'ngú gba omaYuda agama matá engú pi uo kpekpeke. Pipita-a, u atsia atse 'kpa li uo. La-a, u u nani engú inde u ti da namene uo sisiti ka e de. Padhá de, anga ndu okpála hana adu adhögö Ebhe ka engú inde akodho 'kpí-o. <sup>22</sup> Dukuto li nakobho gba e adu ngangamba bhomu-o, adu nani ne kalanga nane ndjikpa badha mane.

### *Omabhuka ayo Ebhe*

<sup>23</sup> Li u atse 'kpa li Piele ne Djaa lie, u anu abhaka obi o. U atsia akpokpo ndu 'ngú hana inde li ongbengbe odimandö gba Ebhe di ne obhelesi okpála apa e-e pi uo. <sup>24</sup> Pita u adje engú bhomu-o lie, omabhuka ayo Ebhe ne bua bini me: «Ngámá, mo obho ekpí ne ndu 'he inde bhúbhú-o hana ngamu. Mo obho doto ne ndu 'he inde bhúbhú-o hana ngamu. Mo obho la di 'ngbé 'ngu ne ndu 'he inde bhúbhú-o hana ngamu. <sup>25</sup> Mo opa nani ngamu bhú angu gba Bu Bhobua, bhú 'li ogbi ya Davidi, bali gba mu-o, me:

<Opiga inde ne omaYuda ade-e abedhe ne siti bua ka ni?

Okpála na kuti koko adje lio ngú namene ongu na padhá padhá ka ni?

<sup>26</sup> Ongbengbe ongámási na doto aleke lio ngú egú.

Ongámási apo bhúla o bhú dabili bini

ngú nagu Ngámá Ebhe,  
di ne kpála inde li Ebhe abhu e-o.\*>

<sup>27</sup> Padhá de, anga a na paká me ngámá Elode Atipasi ne Pose Pilato apo nani bhúla o bhú gudhu inde, bhú dabili bini ne opiga inde ne omaYuda ade, di ne opiga na Isalaele. U apo bhúla o ngubula me o gu Yesu, bali na bubu gba mu, inde mo obhu e maka Masiya-o. <sup>28</sup> U amene bhomu-o ndu 'ngú hana inde mo opa nani e didili ne angu gba mu-o me améne lie mamene ko. <sup>29</sup> La mbia inde-e, Ngámá, tsia nga maka u ngato mbolo li ya lie-o. Kaka-a, ha angu pi ya, obalise gba mu, amba ya akpókpo eli gba mu-o ne tsulu de. <sup>30</sup> Ha angu gba mu-o pi ya, ngubula me ya akobho okpála, amba ya mene ongamba 'ngú di ne okiaka 'ngú ne 'li Yesu, bali gba mu na bubu-o.» <sup>31</sup> Li u andjia nayo Ebhe lie, bili inde u apo bhúla o lie adyiki má djigi djigi! Ndu uo hana abedhe ne Bu Bhobua. U tsia du akpokpo eli gba Ebhe-e ne tsulu de.

### *Omabhuka abu 'he gba o bhú dabili bini*

<sup>32</sup> Ndu omabhuka hana adu ne bua bini. U adu di ne nabhundja bini. Bhú ká uo-o, kpála bini du abhundja de me ehe gba ni-e bha pi ni kpi ni kpi-e de. Engú bini, oehe gba uo-o adu bha pi ndu uo hana. <sup>33</sup> Obhulu titima gba Yesu adu akpokpo ne angu hana me Ngámá Yesu azuku. Abhomu-o, bádha bhú 'bu gba Ebhe-e atsia adu pí ndu uo hana. <sup>34</sup> Bhú ká uo-o, kpála bini du aneke 'he de. Padhá de, anga ndu okpála hana inde adu ne oedyi di ne oeti-e adu atsitsindji, u adu ago ne tia ango-o. <sup>35</sup> U atsia adu ahaha pi obhulu titima. Pipita-a, u atsia adu agbogbo bhusu tia ango-o li kpála bini ne bini maka li gumu gba ani adu lie ko.

<sup>36</sup> Kpála bini adu nani bhú ká uo, a adu 'li ani me Djodjefu. Ani adu kpála na piga gba Levi. U azu nani ani bhú kpemö na Sipele. Obhulu

\* **4:26** 4:25-26 Kpála inde li Ebhe abhu e-o: A akunda napa me Kilisito. Tsia bhú Ets. 2:1-2.

titima agisila nani 'ili koko li ani me Balanabasi (inde akunda napa me «Kpála inde ngato masi»). <sup>37</sup> Ani atsindji edyi gba e. Ani ago ne tia ango-o, ani atsia a'o kala obhulú titima.

## 5

### *Siti 'ngú gba Anania ne Safila*

<sup>1</sup> Abhomu-o, kpála bini inde adu 'li e me Anania, adje lie ne wala e Safila. U atsindji edyi gba o-o. <sup>2</sup> Ani aha té tia ango-o, a'o pi e. Ani atsia anu a'o dudu-o kala obhulú titima gba Yesu-o . Wala ani adu ambila 'ngú tété ndjindji. <sup>3</sup> Abhomu-o, Piele apa pi ani me: «Anania, mo oziba me Satana pite ni ngú ni? Mo opa eu pi Bu Bhobua , anga mo oha té tia na edyi-e, mo o'o pi mu. <sup>4</sup> Kala me mu tsindji edyi ango-o, a ko nako naamú di? La di-e, mo otsindji lie, tia ango-o, a ko nako naamú di? Mo oziba me ni mene ngua 'ngú inde-e ka ni? Mu pite okpála de, engú bini, mo opite bhomu-o Ebhe.» <sup>5</sup> Bha li nedhinga inde li Anania adje engú bhomu-o lie, ani ati, ani atsia akpi. Ndu okpála hana inde adje engú ango-o, adu ne tsulu naali. <sup>6</sup> Abhomu-o, omakombise ago. U agala kuo ani ne bongo , u a'e, u atsia anu azi.

<sup>7</sup> Masikpe de pita saa bata-a, wala Anania ago ali oo me ani nde mbila engú inde akodho 'kpí-e de. <sup>8</sup> Piele ayi ani me: «Pa nga muma, yi atsindji bha ndju edyi gba yi-e bhú mase inde-e?» Òlò-o agie me: «A moko, ya atsindji bhú mase bhomu-o.» <sup>9</sup> Abhomu-o, Piele atsia apa pi ani me: «Yi adje liyi ne 'ko mu ngú nale Bua gba Ngámá-a ngú ni? Djedje nga! Okpála inde i kolo nazi 'ko mu-o, u alulu li bhoti bhomu. U abí bhadi mu moko!» <sup>10</sup> Bha li nedhinga bhomu-o, òlò-o ati kuto bhú li 'dhu Piele, ani atsia akpi. Omakombise ali, u abhaka me ani nde akpi. Abhomu-o, u a'e kuo ani, u atsia anu azi ani denngo 'ko e. <sup>11</sup> Ndu okpála na Piga gba Ebhe-e hana, di

ne ndu okpála hana inde adje engú inde akodho 'kpí-e, adje tsulu naali.

### *Obhulú titima gba Yesu-o amene ongamba 'ngú bhelé*

<sup>12</sup> Obhulú titima gba Yesu-o adu amene nani ongamba 'ngú di ne okiaka 'ngú bhelé bhú ká okpála. Ndu omabhuka hana adu apo bhúla o sa basa inde u a'i e me «Sa ngba 'ti gba Salomo.» <sup>13</sup> Kpála bini bhú ká okpála bhende i bhuka de-e le nani nali bhú ká uo de, abana li ndu okpála hana adu apa 'ngú gba uo-o lie ndjindji-o. <sup>14</sup> Obhosi bhelé naali di ne olisi bhelé naali inde abhuka Ngámá-a, adu ali bhú ká omabhuka, u atsia adu abe ndu o. <sup>15</sup> U aholo belegu apandja okpála na kuo li okpadji. U adu aseke uo pí okalagba di ne pí otsala. U adu amene mo-o, anga u adu abhundja me i du me Piele nde akodho 'kpí oo, kulu ani de pu mbo pí suka uo, amba ani kobho. <sup>16</sup> Okpála bhelé adu di ayie bhú okuti na ngo Yelusalema, u adu ago ne okpála na kuo di ne okpála inde adu ne osisiti bua bhú o-o. Ndu uo hana atsia adu akobho.

### *U aholo obhulú titima gba Yesu*

<sup>17</sup> Abhomu-o, bhele kpála gba odimandè gba Ebhe-e di ne ndu okpála hana inde adu bhú dabili bini ne ani-e, a akunda napa me libi oSadukai , adje siti bua naali pindji obhulú titima gba Yesu. U atsia apa me, a ayo namene uo sisiti. <sup>18</sup> U aholo obhulú titima-o, u atsia ato uo bhú tikpu bhe na ngbéngbé-o. <sup>19</sup> La sukpe-e, andjelu bini gba Ngámá a'u obhè bhoti na tikpu-o. Ani apandja obhulú titima-o. Ani atsia apa pi uo me: <sup>20</sup> «Yi nu bhú 'ngbé 'ti Ebhe gba omaYuda. Oo, yi kpokpo pi okpála ndu 'ngú hana inde atsia mukobho na mbia-o.» <sup>21</sup> Obhulú titima-a amene bhadi mo-o. Kèkpí naali-e, u anu bhú 'ngbé 'ti Ebhe, u atsia aholo nasuno pi okpála.

Li nedhinga bhomu-o, bhele kpála gba odimandè gba Ebhe-e bhú dabili

bini ne okpála gba e-e, u a'i Libi okpála natsia 'kpí li 'ngú gba omafalaale-o. U atsia atima okpála me u n̄ ha obhul̄u titima-a bhú tikp̄u, amba u go ne uo. <sup>22</sup> Engú bini, li okpála ango-o an̄ lie, u bhaka uo bhú tikp̄u de. U agie lio, u atsia apa pi Libi okpála natsia 'kpí li 'ngú gba omaYuda-a me: <sup>23</sup> «Ya abhaka me 'bh̄e tikp̄u-o nde ani lie ndjindji. Okpála nalila tikp̄u-o nde ad̄ul̄u li obh̄ebh̄e. La-a, ya a'u bhoti-e lie, ya abhaka kpála bhúbhú oo belegu de bini!» <sup>24</sup> Li ngámá gba okpála nalila 'ngbé 'ti Ebhe-e, di ne ongbengbe odimand̄e gba Ebhe , adje engú ango-o lie-e, mabhundja gba uo angingi naali. U mbila de me a akolo li obhul̄u titima-a ne mangua 'ngú dho-ie de. <sup>25</sup> Pipita-a, kpála bini ago, ani apa pi uo me: «Yi djedje nga! Okpála inde yi abu nako o bhú tikp̄u-o, uo mbia inde-e bhú 'ngbé 'ti Ebhe. U alul̄u malul̄u, u ngasuno pi okpála.»

<sup>26</sup> Abhom̄u-o, ngámá gba om̄lila-a an̄ ne osudha gba e-o. Ani aha obhul̄u titima-a, ani ago ne uo. Engú bini, u mene uo sisiti de. Padhá de, anga u ad̄u akpe me okpála abh̄ili o ne teme de. <sup>27</sup> Pita ani ago ne uo lie, ani a'o uo kala Libi okpála natsia 'kpí li 'ngú gba omaYuda-o. Abhom̄u-o, bhele kpála gba odimand̄e gba Ebhe-e ah̄olo nayiyi uo me: <sup>28</sup> «Ya aha nako líli pi yi kpekpeke me yi asúno ne 'li kpála bhom̄u-o de. La-a, nasuno gba yi-e aha Yelusalema libhomu! Yi ngakunda me ngute kpála bhom̄u-o tuko pí ya!»

<sup>29</sup> Piele di ne obhul̄u titima koko agie me: «A ayo me ya mene líli gba Ebhe ane líli gba okpála. <sup>30</sup> Ngayi-e, yi abh̄el̄e Yesu li kulusi. Engú bini, Ebhe gba ogbi ní-e azuku ani bhú ká okpála inde amu. <sup>31</sup> Ebhe a'e'e ani abh̄úlá li pá 'kpa e na kokpa, ani a'o ani Ngámá di ne M̄ukobho . Ani amene mo-o nḡubula me okpála na f̄salaele dji bua o, amba Ebhe 'e siti

'ngú gba uo-o. <sup>32</sup> Ya au ongú bhom̄u-o ne djila ya makpe. Bu Bhobua, inde li Ebhe ngaha e pi okpála inde ngamene líli gba ani-e, au di.»

<sup>33</sup> Li Libi okpála natsia 'kpí li 'ngú gba omaYuda adje engú ango-o lie, u abi 'gú naali. U di me bhili obhul̄u titima gba Yesu-o. <sup>34</sup> Engú bini m̄Falisi bini inde ad̄u 'li e me Gamaliele, a ad̄u bhú ká uo. A ad̄u m̄suno na líli . Nd̄u okpála hana ad̄u amanga ani ndjindji. Ani ayie bh̄úlá. Ani ayo me u pandja nga obhul̄u titima-a kilidjo. <sup>35</sup> Pipita-a, ani atsia apa me: «Ngayi okpála na f̄salaele, yi lila liyi ndjindji li 'ngú inde yi adji amene e li kute okpála inde-o! <sup>36</sup> Padhá de, anga ane nga ekpí bhel̄é de, kpála bini akoto nako, a ad̄u 'li ani me Teudasi. Ani ad̄u apa me ni ne 'ngbé kpála. Okpála masikpe de kámá badha ad̄u akpata ani. Engú bini, u abh̄el̄e ani lie, nd̄u okpála hana inde ad̄u akpata ani-e atsia atsambala. Abhom̄u-o, engú gba ani-e atsia andjia.

<sup>37</sup> Pita ani-e, li nedhinga u ad̄u atanga okpála lie, Yuda, kpála na Galilaya, akoto. Ani agbele okpála nganda e bhel̄é. Ngaani di-e, u abh̄el̄e ani. Abhom̄u-o, okpála inde ad̄u akpata ani-e atsia atsambala. <sup>38</sup> Kaka mbia inde-e, ma apa pi yi me yi adhd̄e li okpála inde-e de. Yi 'o uo. Padhá de, anga i d̄u me mabhundja di ne ongú gba uo nde ayie ka okpála-a, i kólo padhá. <sup>39</sup> Engú bini, i d̄u la me ongú bhom̄u-o nde ayie ka Ebhe-e, yi tí da nabh̄ebh̄el̄e de. 'E-e! Yi agú gbele ne Ebhe de.»

Abhom̄u-o, Libi okpála natsia 'kpí li 'ngú gba omaYuda atsia aziba mabhundja gba Gamaliele-o. <sup>40</sup> U a'i obhul̄u titima-o. U aha líli me u bhi uo ne fimbo. U aha di líli pi uo kpekpeke me u akpó 'ngú matá ne 'li Yesu belegu de bini. Pipita-a, u atsia atse 'kpa li uo. <sup>41</sup> Abhom̄u-o, obhul̄u titima-a akoto me u nde abedhe ne djali bedhe. Padhá de, anga Ebhe au ndjindji me u z̄u likabhu nḡubula



'li Yesu. <sup>42</sup> Ekpí bini ne bini hana, u adu bha nasuno di ne nakpokpo Bádha Ngali gba Yesu Masiya bhú 'ngbé 'ti Ebhe di ne bhú oti gba o-o.

## 6

*U alo okpála mananika ngú nateteke obhulú titima gba Yesu*

<sup>1</sup> Li nedhinga ango-o, omukpata adu akolo bhelé. Engú bini, omaYuda inde adu nadi eli na gilike, atsia aholo nadi mutokono li obhende adu nadi eli na ebele-o. U adu apa me: «Ndu 'kpí hana nedhinga nagapa 'zu-o, u ngaha ezu pi oekesi na libi gba ya-ndjindji ade.» <sup>2</sup> Abhomu-o, obhulú titima ndjikpa ne ká bhisi gba Yesu-o apokobhe bhúla ndu omabhuka hana. U atsia apa pi uo me: «A ayo de me ya 'o ká nakpokpo eli gba Ebhe-e ngú nagapa 'zu-o de. <sup>3</sup> Kaka-a, ondaise ya, yi gili okpála mananika inde li okpála ngaziba o ndjindji, inde abedhe ne Bu Bhobua di ne imbilangu bhú ká yi, amba ya ha kulu bhomu-o pi uo. <sup>4</sup> Abhomu-o ngaya-a, ya tí da naha ndu nedhinga gba ya-a hana ngubula nayo di ne nakpokpo Bádha Ngali gba Ebhe-o.»

<sup>5</sup> Ndu okpála hana aziba engú inde li obhulú titima apa e ko. Abhomu-o, u alo Etieni, kpála inde abedhe ne nabhuka di ne Bu Bhobua, ne Filipo, ne Polokole, ne Nikanola, ne Timoni, ne Palamenasi, ne Nikola, kpála na kuti na Atiokia inde abhuka nani Ebhe gba omaYuda ko.\* <sup>6</sup> U anu ne uo kala obhulú titima. Abhomu-o, obhulú titima a'o 'kpa o pí uo, u atsia ayo Ebhe pi uo.

<sup>7</sup> Eli gba Ebhe-e adu bha naya ne kalanu. Abhomu-o, alo gba omabhuka atsia adu a'u ne bhúla naali bhú Yelusalema. Odimandø gba Ebhe bhelé atsia abhuka di.

*U aholo Etieni*

<sup>8</sup> Etieni abedhe nani ne angu ka bádha bhú 'bu gba Ebhe . Abhomu-o, ani atsia adu amene ongbengbe 'ngú di ne ongu na ngangamba bhú ká okpála. <sup>9</sup> Okpála koko ago ngú namene kpekebhe ne Etieni. Bhú ká uo-o, okoko adu okpála inde adu apo bhúla o bhú eti nadje líli gba Moidje , inde u a'i e me «Eti nadje líli gba okpála inde aze bhú bali-o.» Okoko ayie nani bhú gudhu na Silene, ne bhú gudhu na Alekidjandili, ne bhú ndu doto na Silisia di ne bhú ndu doto na Adjia. <sup>10</sup> Engú bini, imbilangu gba uo ti nani da nakolo li bhe gba ani-e de. Padhá de, anga ani adu agama 'ngú ne imbilangu di ne angu inde li Bu Bhobua adu aha e pi ani ngae ko.

<sup>11</sup> Abhomu-o, u aha tia pi okpála, amba u pa eu li ani me: «Ya adje ani me ani nde ngasobho Moidje di ne Ebhe!» <sup>12</sup> U amene moko ngubula me okpála, ne obhelesi okpála di ne omusuno na líli-e , bi 'gú ngú Etieni. Pipita-a, u aze li Etieni, u aholo ani. U atsia anu ne ani kala Libi okpála natsia 'kpí li 'ngú gba omaYuda ko. <sup>13</sup> Oo, u anu di ne okpála inde adu apa 'ngú li Etieni ne eu. Okpála ango-o atsia adu apa me: «Kpála inde-e, ndu 'kpí hana, ngapa bha bini 'ngú sisiti li kute 'ngbé 'ti Ebhe na bubu gba ní, di ne li kute líli gba Moidje-o . <sup>14</sup> Ya adje ani me ani nde ngapa me: «Yesu ango-o, kpála na Nadjaleta, abhéle 'ngbé 'ti Ebhe inde, ani tsia djí di odasundu inde ya asia e ka Moidje ko.» <sup>15</sup> Ndu okpála inde adu bhú 'ti oo hana abanga djila o li Etieni. U atsia au me bhúla ani adu asu maka bhúla andjelu .

## 7

*Etieni akpokpo 'ngú kala okpála*

<sup>1</sup> Abhomu-o, bhele kpála gba odimandø ayi Etieni me: «Engú inde u ngapa e li mu bhomu-o, a ko bha

\* **6:5** 6:5 Nabhuka Ebhe gba omaYuda: A akunda napa me okpála koko, inde ne omaYuda ade-e, adji nani bua o, u atsia abhuka Ebhe gba omaYuda-o. Nikola inde-e, atsia abhuka di nani Yesu.

ndju kukulu 'ngú?» <sup>2</sup> Etieni atsia agie me: «Odyi ma di ne ondaise ma, yi djedje nga! Ebhe na sangu akoto nani li ogbi ní Abalahama bhú ndu doto na Medjopotami kala me ani nu nasi kuti bhú ndu doto na Alana. <sup>3</sup> Ani atsia apa pi ani me: <'O ká doto gba mu di ne piga gba mu-o, amba mu nu bhú doto inde ma asúno e pi mu ko.†>

<sup>4</sup> Abhomu-o, Abalahama ayie bhú doto gba oKaladea, ani atsia anu nasi kuti bhú Alana. Pita li 'dyi ani akpi lie, Ebhe a'e ani bhú Alana, ani atsia ago a'o ani bhú doto yi nde bhú e mbia inde-e ko. <sup>5</sup> Ebhe ha nga nani edyi pi ani sii de, belegu de mboye bili na'o 'dhu e ka ani tété. La-a, ani atsia apa nani pi ani kalanu me: <Ma ahá doto inde-e pi mu, li ongisi gba mu-o\* tsia tígala ne di pita mu-o ngao.> La-a, li nedhinga bhomu-o, ndili du nga nani ka ani de.

<sup>6</sup> Ebhe apa pi ani bhomu-o me: <Ongisi gba ongisi gba mu-o anu adalu bhú doto na gandji gandji. Oo, u akólo obalise gba okpála na doto ango-o. Li okpála ango-o méne uo sisiti ngubula kalanga kámá badha.>

<sup>7</sup> La-a, Ebhe apa mata di me: <Ma akódho 'ngú gba okpála inde u akólo obalise pi o-o ngama. Pipita-a, u zé oo, u tsia gó dú adhogé ma li bili inde.†> <sup>8</sup> Abhomu-o, Ebhe atsia akodho gandja ne Abalahama. Li Abalahama azu Isaka lie, ani atsia ato ani bhú gandja bhú 'kpí na madjina nayie li 'kpí u azu ani lie-o. Isaka amene bhadi moko pi Yakobho. Yakobho atsia amene bhadi moko pi onguo ogbi ní ndjikpa ne ká bhisi-o.

<sup>9</sup> Pipita-a, onguo ogbi ní ango-o adje siti bua naali pi Djodjefu, ndindili pita o-o. Abhomu-o, u atsia atsindji ani me u nu ne ani bhú bali bhú Edjipeto. La-a, Ebhe adu bhú dabili bini ne ani. <sup>10</sup> Ebhe agbegbe Djodjefu bhú likabhu gba e hana.

Ani asuno bádha bhú 'bu gba e pi ani ne imbilangu, ani atsia amene di me engú gba ani-e du anga li Falao, 'ngbé ngámá na doto na Edjipeto-o naali. Abhomu-o, Falao atsia a'o ani ngámá pí 'ndji Edjipeto di ne pí 'ndji eti gba e libhomu.

<sup>11</sup> Pipita-a, adyindi atsia ali bhú Edjipeto libhomu di ne bhú doto na Kanana. Likabhu adu naali. Kaka-a, onguo ogbi ní du asia ehe nazu mazú de. <sup>12</sup> Li Yakobho adje lie me ehe nazú mazú bhú Edjipeto-o, ani atsia atima ongisi gba e, onguo ogbi ní oo bhutsibhutsi na bini. <sup>13</sup> U anu lie bhutsibhutsi na bhisi-e, Djodjefu atsia asuno lie pi ondaise e. Abhomu-o, Falao atsia ambila piga gba Djodjefu-o.

<sup>14</sup> Pipita-a, Djodjefu atima okpála me u nu ha 'dyi ni Yakobho ne piga gba e hana. U adu nani ndu o hana okpála ndjikpa mananika ne ká bhuluvue. <sup>15</sup> Abhomu-o, Yakobho anu bhú dabili bini ne ongisi gba e, onguo ogbi ní, bhú Edjipeto. U atsia amu oo. <sup>16</sup> U abha kuo uo anu ne di bhú gudhu na Sikeme. Abhomu-o, u atsia azi bhú lata inde li Abalahama akala nani e ka ongisi gba Emola bhú Sikeme-o.

<sup>17</sup> Li nedhinga akolo lie masakpe ngubula me Ebhe mene engú inde ani apa nani e kalanu me ni améne e pi Abalahama, piga gba ní-e abe ndu e. Okpála atsia akolo bhelé bhú Edjipeto. <sup>18</sup> Pipita-a, ngámá koko aholo nau bhú Edjipeto. Ngámá ango-o mbila nani engú gba Djodjefu-o de. <sup>19</sup> Ani apite okpála gba ní-o, ani atsia amene onguo ogbi ní sisiti. Ani aholo uo ne kpéke me u 'o ká ongisi na ndjendje gba o-o, amba ongisi ango-o mu. <sup>20</sup> Li nedhinga bhomu-o, u azu Moidje. Ani adu babadha naali bhú djila Ebhe. U aku ani epe bata bhú 'bu 'ti gba 'dyi e. <sup>21</sup> Li u a'o ká ani lie, ndili na eole gba Falao aha ani, ani atsia aku ani

† 7:3 7:3 Tsia bhú Dje. 12:1. \* 7:5 7:5 Ongisi gba mu: A akunda napa me ongisi gba ani na obhosibhosi. † 7:7 7:6-7 Tsia bhú Dje. 15:13-14.

maka ndili gba e makpe. <sup>22</sup> U asuno ndu imbilangu hana gba okpála na Edjipeto pi Moidje. Aní atsia akolo kpekpeke bhú nagama 'ngú di ne namene 'he.

<sup>23</sup> Li Moidje akolo lie ne kalanga ndjikpa badha-a, aní atsia abhundja li bua e me ni nu tsia ondaise ni, omafalaale. <sup>24</sup> Oo, aní au me maEdjipeto bini ngamene saka omafalaale sisiti. Abhomu-o, ngú nagie siti 'ngú bhomu-o, aní atsia abhelo maEdjipeto ango-o. <sup>25</sup> Moidje adu abhundja nae me ondaise ni omafalaale ambila me Ebhe alo ni ngú nakobho o. Engú bini ngauo-o, u mbila la mo-o de. <sup>26</sup> Li ekpi aseke lie, Moidje abhaka me omafalaale bhisi nde ngagu gbele sunda o. Abhomu-o, aní akunda nayoko uo. Do aní de-e: <Wai, yi ne ondaise. Yi ngamene liyi sisiti ka ni?> <sup>27</sup> Engú bini, kpála bhende adu amene kilí e sisiti-e andjimba Moidje, aní atsia apa me: <A ko da inde a'o mu ngamá di ne kpála nakodho 'ngú gba ya-a?> <sup>28</sup> Mo okunda nabhelo ma, maka mo obhelo lili maEdjipeto lie?†> <sup>29</sup> Li Moidje adje eli bhomu-o lie, aní ayie bhú Edjipeto, aní akpe, aní atsia anu adu bhú doto na Madiana. Oo, aní azu ongisi na obhosibhosi bhisi.

<sup>30</sup> Pita kalanga ndjikpa badha-a, andjelu bini akoto li Moidje bhú mili bili dengo eta na Sinai. Andjelu ango-o akoto li aní bhú djua me a nde ngatsi bhú tsá 'pó. <sup>31</sup> Aní angamba naali ka engú inde aní au e-o. Nedhinga aní adu adyudyo lie lie masikpe ngú natsitsia-a, aní atsia adje 'li Ngamá apa me: <sup>32</sup> <Ma ne Ebhe gba onguo ogbi mu, Ebhe gba Abalahama, Ebhe gba Isaka, Ebhe gba Yakobho.†> Moidje aholo naguku ka tsulu, aní le natsitsia de. <sup>33</sup> Abhomu-o, Ngamá atsia apa pi aní me: <Pandja maloko bhú 'dhu mu, anga bili mo olu lie inde-e, a ko bili na bubu. <sup>34</sup> Ma au maka u

ngato mbolo li okpála gba ma bhú Edjipeto lie au. Ma atsia adje la di maka u ngalopolo lio lie adje. Ma ago ngú nagbegbe uo bhú bali ango-o. Mbia inde-e, ma ngatima mu bhú Edjipeto, nunu.†>

<sup>35</sup> A ko Moidje inde li omafalaale ayala e, inde u apa pi e me: <A'o mu ngamá di ne kpála nakodho 'ngú gba ya-a da?> Ebhe atima aní me aní du ngamá di ne mukobho. Andjelu apa pi aní li nedhinga inde aní akoto li aní lie bhú tsá 'pó inde adu atsi ko. <sup>36</sup> Moidje agbegbe omafalaale bhú doto na Edjipeto ngae. Aní amene ongu na ngbeng-bengbe di na ngangamba bhú doto ango-o, bhú 'ngbé 'ngu na Mbe-mbe di ne bhú 'gu. Aní amene ongu ango-o bhú kalanga ndjikpa badha. <sup>37</sup> A ko matá bhadi Moidje inde apa pi omafalaale me: <Ebhe agbé polofeta pi yi maka ma bhú ká ondaise yi.†> <sup>38</sup> Li onguo ogbi ní apokobho bhúla o lie bhú 'gu-o, Moidje adu oo. Aní adu bhú dabili bini ne onguo ogbi ní. Aní adu la di bhú dabili bini ne andjelu inde adu agama 'ngú pi aní apí 'ta na Sinai-o. Aní asia eli na mukobho-o ngú nakpokpokpo pi ní ngae.

<sup>39</sup> Engú bini, onguo ogbi ní du amene líli gba aní-e de, u adu ayala aní. Abhomu-o, u adu akunda nagie lio bhú doto na Edjipeto. <sup>40</sup> U apa pi Alona me: <Bho oebhe pi ya, amba u du adholo kala ya. Padhá de, anga Moidje inde-e, inde apandja ya bhú doto na Edjipeto-o, ya mbila engú inde akolo li aní-e de.†> <sup>41</sup> Abhomu-o, u abho kulu ndili bagala, bhú oekpi bhomu, u atsia atsulu enu pi aní. U amene anokomia kabula ehe inde u abho e ne 'kpa o-o. <sup>42</sup> Engú bini, Ebhe adji 'ngbu e li uo, aní atsia a'o uo me u dhoge oikupala, maka u aye lie bhú bhuku gba opolofeta me: <Ngayi okpála na Isalaale-e, yi at-

† 7:28 7:27-28 Tsia bhú Eki. 2:14. † 7:32 7:32 Tsia bhú Eki. 3:6. † 7:34 7:33-34 Tsia bhú Eki. 3:5, 7, 8, 10. † 7:37 7:37 Tsia bhú Det. 18:15, 18. † 7:40 7:40 Tsia bhú Eki. 32:1.

sulu nani oenu muma uu?

Yi aha la di oehe koko muma uu  
sunda kalanga ndjikpa badha  
bhú 'gu-o?

A mo-o ade.

43 Yi abi mangbo wema gba ebhe  
Moloko,  
di ne kulu ikupala gba ebhe gba  
yi Lefana-o.

A bhomu-o kulu oehe na padhá  
padhá, inde yi abho o ngubula  
nadhøø o-o.

Kaka-a, ma ambá yi tsutsu nane  
Babilona mane.†

44 Onguo ogbi ní, bhú 'gu-o, adu  
nani ka uo ne 'ti ngbangbali li Ebhe  
adu asuno lie bhú e-o. Moidje abho  
nani maka bhende li Ebhe asuno  
nani e pi ani-o. 45 Abhomu-o, u  
atsia aha 'ti ngbangbali ango-o pi  
ongisi gba onguo ogbi ní, inde adu li  
nedhinga li Djodjue adu lie ngámá-o.  
U atsia adu ali ne di bhú odoto gba  
opiga inde li Ebhe ato nani holo bhú  
'dhu o kala uo-o. U adu oo akolo bhú  
nedhinga gba 'ngbé ngámá Davidi.

46 Engú gba Davidi inde asia nani  
bádha bhú 'bu gba Ebhe-e, adu bhú  
djila Ebhe ndjindji. Ani atsia ayo  
nani kpadji me ni yiki eti pi Ebhe  
gba Yakobho. 47 Engú bini, Salomo,  
ndili gba Davidi-e, ayiki mangbo  
nani eti pi ani ngae. 48 La-a, Ebhe  
Apí 'Kpí dudú bhú 'ti inde li okpála  
ayiki e ne 'kpa o-o de. Maka li  
polofeta apa lie me:

49 «Ngámá apa me: ekpí ne dabili na  
ngámá gba ma-o.

Doto ne dabili na sa 'dhu ma.

Mangua 'ti dho yi ayiki e muma?

Bili ma agúo lie su?

50 Ma bho ndu 'he bhomu-o hana  
ngama di?†»

51 Pipita-a, Etieni atsia apa me:  
«Ngayi-e, yi ne okpála na kpekpeke  
'ndji! Bua yi agbigbite lie, 'dje  
yi atsia anini! Ndu 'kpí hana yi  
ngamene kpekpeke ne Bu Bhobua  
maka onguo ogbi yi! 52 A ko polofeta

bhedho inde li onguo ogbi yi to  
mbolo li e de-e? U abhøø belegu  
obhende akpokpo 'ngú pindji nago  
ka Kpála na Ngbingbili-o. Mbia inde-  
e, kpála ango-o, yi apu ani, yi atsia  
abhøø ani. 53 Ngayi okpála inde asia  
líli gba Ebhe-e ka oandjelu-o, engú  
bini, yi mene la líli ango-o de!»

### *U abhøø Etieni*

54 Li okpála inde adu li bili  
nakodho 'ngú-o adje engú li Etieni  
apa e lie, u abi 'gú li bua o. U  
atsia aholo nazú tate o ngubula ani.

55 Engú bini, Etieni inde adu me ani  
nde abedhe ne Bu Bhobua-a, atsia  
'kpí ne abhúlá, ani au zi Ebhe. Ani  
atsia au di Yesu me ani nde alu li  
pá 'kpa na kokpa gba Ebhe-o. 56 Ani  
atsia apa me: «Yi djedje nga! Ma au  
kokpí abhulu lie, Ndili gba kpála alu  
li pá 'kpa na kokpa gba Ebhe!»

57 Ndu okpála hana inde adu oo  
adje engú bhomu-o lie, u asula ne  
'ue kpekpeke, u anini 'dje o. U anu  
ndu o hana bhú dabili bini, u atsia  
atuko pí Etieni. 58 U agbe ani bhú  
gudhu-o, u atsia aholo natutulú ani  
ne oteme ngú nabhøø ani. Okpála  
inde adu apa 'ngú li ani ne eu-o,  
abhu nani makombi bini. U atsia  
abu obongo gba o-o bhú li 'dhu ani  
ngú nalilila. A adu 'li makombi  
ango-o me Saulo.† 59 Nedhinga u  
adu atutulú Etieni lie ne teme ngú  
nabhøø ani-e, ani atsia ayo Ebhe  
me: «Ngámá Yesu, ha bua ma  
haha!» 60 Abhomu-o, ani akikita  
lipuku e kuto, ani asula kpekpeke  
me: «Ngámá, mo otsia siti 'ngú gba  
uo-o de!» Pita ani apa 'ngú bhomu-o  
lie, ani atsia andala 'kpa li bua e.

## 8

1 Abhomu-o, Saulo atsia aziba me  
u bhøø Etieni.

*U aholo nato mbolo li okpála na  
Piga gba Ebhe*

† 7:43 7:42-43 Tsia bhú Ams. 5:25-27. † 7:50 7:49-50 Tsia bhú Isa. 66:1-2. † 7:58 7:58 Saulo:  
A ko 'ili na ebele. Polo: a ko 'ili na giliki. U aholo na'i ani me Polo li nedhinga ani aholo nakpokpo  
Bádha Ngali lie pi ogandji okpála ko.

Bha li 'kpí ang-o, u aholo nato mbolo naali li okpála na Piga gba Ebhe na gũdhũ na Yelusalema. Ndũ omabhuka hana akpe, naneke bha bini obhũlũ titima gba Yesu-o . U atsia atsambala bhũ ndu doto na Yudaya ne bhũ ndu doto na Samalia. <sup>2</sup> Okpála koko bhende adũ akpe Ebhe-e aku 'gbá Etieni naali. U aha kuo ani, u atsia anũ azi. <sup>3</sup> La-a, Saulo aholo nato mbolo li Piga gba Ebhe-e ngũ nabhøbhø. Ani adũ nali bhũ 'ti bini ne bini. Ani adũ napandja omabhuka, olisi di ne obhosi, ani atsia adũ namba uo bhũ tikpũ.

### *Filipo akpokpo Bádha Ngali bhũ Samalia*

<sup>4</sup> Omabhuka inde atsambala adũ anũ ne ndũ bili hana me u nde ne kpokpo Bádha Ngali . <sup>5</sup> Abhomũ-o, Filipo anũ bhũ sũka gũdhũ bini na Samalia. Oo-o, ani atsia akpokpo ngali gba Masiya-o . <sup>6</sup> Okpála bhelé ne bua bini abhuka 'li Filipo. Padhá de, anga u adũ adje ngali ongũ na ngangamba inde ani adũ amene e-o. U atsia adũ la di auu ne djila o. <sup>7</sup> Osisiti bua bhelé aze bhũ okpála. Osisiti bua ang-o adũ aze me u nde ngatũ 'ue kpekpeke. Okpála bhelé inde adũ odukuto, di ne obhende adũ ne eze li 'dhũ o-o, atsia akobho. <sup>8</sup> Abhomũ-o, djali atsia adũ naali bhũ gũdhũ ang-o.

<sup>9</sup> Kpála bini adũ nani bhũ gũdhũ ang-o, a adũ 'li ani me Simo. Nayie didili naali, ani adũ amene 'ngũ na mambengũ mambengũ. Ndũ okpála hana na ndu doto na Samalia adũ angamba ka ani naali. Ani atsia adũ apa me ni ne 'ngbé kpála. <sup>10</sup> Ndũ okpála hana adũ aha lio ngũ nadjé ani, nayie li okpála na padhá, akólo li okpála na ngbengbengbe. U adũ napa me: «Kpála inde-e, a ko angu gba Ebhe, angu inde u a'i e me <Angu na ngbéngbé.» <sup>11</sup> U adũ nakpata ani, anga nayie didili naali, ongũ na mambengũ gba ani-e adũ angamba uo naali. <sup>12</sup> Engũ bini, li Filipo adũ akpokpo Bádha Ngali Naũ gba

Ebhe , di ne Yesu Kilisito lie pi uo-o, olisi ne obhosi abhuka. Pipita-a, u atsia asia batisimo. <sup>13</sup> Simo abhuka belegũ di ngae, ani atsia asia batisimo. Ani dũ matá nayie de Filipo de. Ani adũ nangamba naali li oehe di ne ongamba 'ngũ na ngbengbengbe inde li Filipo adũ namene e-o.

<sup>14</sup> Obhũlũ titima gba Yesu abhũ gũdhũ na Yelusalema adje me okpála na ndu doto na Samalia asia eli gba Ebhe-o . Abhomũ-o, u atima Piele di ne Djaa pi uo. <sup>15</sup> U akolo lie bhũ ndu doto na Samalia oo, u atsia ayo Ebhe pi uo ngũbula me u sia Bu Bhobua . <sup>16</sup> Padhá de, anga Bu Bhobua kè nga nani pí sũka uo bini de. U asia nga bha nani batisimo ne 'li Ngámá Yesu. <sup>17</sup> Abhomũ-o, Piele ne Djaa a'o 'kpa o pí 'ndji uo, u atsia asia Bu Bhobua.

<sup>18</sup> Simo au me Bu Bhobua akè pí okpála inde li obhũlũ titima a'o 'kpa o pí 'ndji o-o. Abhomũ-o, ani ago ne tia me ni ngaha makiso pi Piele ne Djaa. <sup>19</sup> Do ani de me: «Yi ha di angu ang-o mũma, amba kpála bhende ma a'ó 'kpa ma pí 'ndji e, ani de sia Bu Bhobua.» <sup>20</sup> Engũ bini, Piele agie pi ani me: «Siti de bhaka bhado bha mũ bhũ dabili bini ne tia gba mũ-o! Padhá de, anga mo obhundja me mũ ti da nakala ehe inde li Ebhe ngaha e padhá-a ne tia. <sup>21</sup> Ndũ 'ngũ inde ngakodho 'kpí inde-e hana, a pi mũ ade. Mũ ti la di da nali bhũbhũ de. Padhá de, anga bua mũ kala Ebhe ngbingbili ade. <sup>22</sup> La-a, dji bua mũ ka siti 'ngũ inde mo obhundja e li bua mũ ko. Yo ka Ngámá ngũbula me, i dũ me ani nde akũnda-a, ani de 'e siti 'ngũ ang-o. <sup>23</sup> Padhá de, anga ma au me mo obedhe bhũ mũ ne gumũ 'he. Mũ la di bhũ 'kpũ gba siti.» <sup>24</sup> Abhomũ-o, Simo apa pi Piele ne Djaa me: «Ngayi makpe-e, yi yo mangbo Ngámá ngũ ma ngayi, ngũbula me ngua 'ngũ yi apa e bhomũ-o, akólo li ma de.»

<sup>25</sup> Pipita-a, Piele ne Djaa akpokpo ongũ inde li Ngámá Yesu amene e

li djila uo-o. U asuno eli gba ani-e pi okpála. Abhomu-o, u atsia agie lio bhú Yelusalema. Li kpadji-e, u akpokpo Bádha Ngali bhú okuti bhelé na ndu doto na Samalia.

*Kpála bini na Etiopi adji bua e*

<sup>26</sup> Pipita-a, andjelu bini gba Ngámá-a apa pi Filipino me: «Yie bhúlá, amba mu ke li pápá na yoyoko, li kpadji inde ayie bhú gudhu na Yelusalema, atsia aké bhú Gadjá ko. Kpadji ang-o apu bhú mili bili.» <sup>27</sup> Abhomu-o, Filipino ayie bhúlá, ani atsia aholo ne enú li kpadji ang-o. Li kpadji-e, bhoko bini akoto. A adu nani eniki,\* 'ngbé kpála na doto na Etiopi. Ani adu nalila ndu tia hana gba Kandase, ngámá na eole na Etiopi-o. Ani anu nani bhú Yelusalema ngú nadhoge Ebhe, <sup>28</sup> ani atsia adu nagie lie agba e. Ani adu kuto bhú kpulukpulu gba e-o. Ani atsia adu natanga bhuku gba polofeta Isaya.

<sup>29</sup> Bu Bhobua apa pi Filipino me: «Nu de kpulukpulu bhomu, amba yi nu ne bhuhulu-o.» <sup>30</sup> Filipino anu bhú holo, ani atsia adje kpála na Etiopi bhomu-o ngatanga bhú bhuku gba polofeta Isaya. Abhomu-o, Filipino ayi ani me: «Engú inde mu ngatanga e bhomu-o, mu ngadje tata-a uu?» <sup>31</sup> Kpála ang-o agie me: «Ma ambila la tata-a lele pi, i du me kpála nde kpokpo kúkú mu de-e?» Abhomu-o, ani a'i Filipino me ani 'u bhú kpulukpulu-o, amba ani du de ni. <sup>32</sup> Eli inde ani adu atanga e bhú bhuku gba Isaya ngae inde:

«U adu nanu ne ani maka kandole inde u adji nabhole e,  
maka ndili kandole inde agbite 'bhe e li nedhinga u ngaka su ani lie-o.  
Ani 'u 'bhe e de.

<sup>33</sup> U aké ani ne kuto, u kodho 'ngú gba ni-e ngbingbili de.

A ko da inde i ti da napa 'ngú gba ongisi gba ani-e?

Padhá de, anga u a'e mukobho gba ani-e pila doto a'e.†»

<sup>34</sup> Bhoko na Etiopi ang-o ayi Filipino me: «Ma ayo ka mu me pa nga mu: polofeta ngapa 'ngú bhomu-o li da? Ne me ani ngapapa li e, ne me ani ngapapa li kpála koko?» <sup>35</sup> Abhomu-o, Filipino aholo na'o'o tata pi ani li Bádha Ngali gba Yesu-o nayie li Eli inde ani adu atanga e-o.

<sup>36</sup> U adu anu lie li kpadji-e, u akolo li bili bini, adu oo ne engu. Abhomu-o, 'ngbé kpála ang-o apa pi Filipino me: «Tsia nga engu ii! Nasia batisimo ka ma-a, a adha mbia inde-e li ni?» [ <sup>37</sup> Filipino atsia apa pi ani me: «I du me mu nde abhuka ne bua mu hana-a, mu ti da nasia batisimo.» Kpála ang-o agie pi ani me: «Ma abhuka me Yesu Kilisito ne Ndili gba Ebhe.»] <sup>38</sup> Abhomu-o, ani atsia apa me kpulukpulu-o lulu. Pipita-a, ndu uo bhisi hana, Filipino ne kpála ang-o, aké bhú 'ngu. Filipino atsia abatisa ani. <sup>39</sup> Li u aze lie bhú 'ngu-o me-e, Bua gba Ngámá-a atsia adhepe Filipino. Kpála na Etiopi u matá ani de. Kpála na Etiopi ang-o aholo bha ibili enú kpi e kpi me ani nde ngakpi djali. <sup>40</sup> La pi Filipino-o, u anu au bha ibili ani bhú gudhu na Adjota. Pipita-a, ani apu bhú ndu ogudhu hana me ani nde ngakpokpo Bádha Ngali akólo bha bini li nedhinga ani akolo lie bhú Sedjale ko.

## 9

*Saulo adji bua e*

(*Tsia bhú Kul. 22:6-16, 26:12-18.*)

<sup>1</sup> Li nedhinga bhomu-o, Saulo adu nagili omukpata gba Ngámá Yesu ngú nabhili uo. Ekpí koko ani anu nabhaka bhele kpála gba odimandé gba Ebhe-o . <sup>2</sup> Ani anu nayo balua me ni nu ne di ngú nali bhú oti nadje lili gba Moidje inde bhú gudhu na Damasi. Ni nu oo, amba i du me ni nde abhaka okpála inde ngakpata

\* **8:27** 8:27 Eniki: A ko bhoko inde i ti da nakunda ole de, anga angu na bhoko bhú ani ade. Tsia bhú Mat. 19:12. † **8:33** 8:32-33 Tsia bhú Isa. 53:7-8.

'ngú gba Yesu-o, obhosi di ne olisi, ni de holo uo, amba ni nũ ne uo bhú gũdhũ na Yelusalema.

<sup>3</sup> Nedhinga ani adũ anũ lie, ani akolo lie de Damasi masikpe-e, má gala kolo me-e, zi 'kpí bini ayie abhúlá, a ago asa ngo ani ngbalina.

<sup>4</sup> Ani atsokodho ati kuto má ngbi! Ani atsia adje eli bini apa pi ani me: «Saulo, Saulo, mũ ngato mbolo li ma ngú ni?» <sup>5</sup> Abhomũ-o, Saulo atsia ayi me: «Ngámá, a ko mũ da?» Eli atsia akoto matá pi ani me: «A ko ma Yesu, mũ ngato mbolo e li ma. <sup>6</sup> La-a, yie bhúlá yiyie, amba mũ nũ bhú gũdhũ. Engú inde ayo me mũ mene e-e, u apá pi mũ oo ko.»

<sup>7</sup> Okpála inde adũ anũ ne ani bhú dabili bini-e alũ. Bhú 'bhø uo akpina má ndje ka tsũ. U adũ adje eli, engú bini, u dũ au kpála inde adũ agama 'ngú-o de. <sup>8</sup> Abhomũ-o, Saulo ayie bhúlá, ani abhulu djila e, engú bini, ani u la 'kpí de. U atsia aholo 'kpa ani ngú nanũ ne ani bhú Damasi. <sup>9</sup> Oo, ani amene ngbolo 'kpí bata. Ani u 'kpí de, ani zũ 'he de, ani ndji la di ehe nandji mandji de.

<sup>10</sup> Mũkpata bini adũ bhú Damasi oo, a adũ 'li ani me Anania. Ngámá a'i ani bhú ehe maka loto me: «Anania!» Anania atsia abhuka me: «Ma ii, Ngámá!» <sup>11</sup> Abhomũ-o, Ngámá atsia apa pi ani me: «Mbía inde-e, a ayo me mũ nũ li kpadji inde u a'i e me Ngbili kpadji bhú 'ti gba kpála bini inde u a'i e me Yuda. Yi Saulo, kpála na gũdhũ na Talasi. Li nedhinga inde-e, ani ngayo Ebhe. <sup>12</sup> Ani atsia au bhú 'he maka loto kpála bini, inde 'li e me Anania, ali bhú 'ti nganda ni. Kpála ango-o atsia a'o 'kpa e pí 'ndji ani ngú napa me ani u matá 'kpí.»

<sup>13</sup> Anania atsia agie me: «Ngámá, okpála bhelé apa 'ngú mũma pindji bhoko bhomũ. Ma mbila la di ndũ siti 'ngú hana inde ani amene e li kũte okpála na bububu gba mũ bhú Yelusalema-o. <sup>14</sup> Ongbengbe odimandø aha la di kpadji pi ani me ani

go ei ngú naholo ndũ okpála hana inde ngabhuka mũ-o.» <sup>15</sup> Engú bini, Ngámá apa pi ani me: «Nũnũ, anga bhoko bhomũ-o, ma abhũ ani ngú kulu gba ma-o. Ani anũ nakpokpo engú gba ma-a pi opiga inde i mbila ma de, pi ongbengbe ongámási gba uo, di ne pi omafšalaele. <sup>16</sup> Ma asúno pi ani, ngama makpe, ndũ likabhũ hana inde a ayo me ani zũ e kabula 'li ma-o.»

<sup>17</sup> Abhomũ-o, Anania anũ, ani ali bhú 'ti oo, ani abhaka Saulo, ani a'o 'kpa e pí ani. Ani atsia apa me: «Ndai ma Saulo, Ngámá atima ma ngae. A ko Yesu inde akoto li mũ li kpadji nedhinga mo odũ nago lie-o. Ani atima ma, ngũbula me mũ u matá 'kpí, amba mũ bedhe di ne Bu Bhobua .» <sup>18</sup> Kolo má gala me-e, ehe maka kũdhũ 'he ayie bhú djila Saulo, abala kuto. Ani atsia aholo nau matá 'kpí. Abhomũ-o, ani ayie bhúlá, ani atsia asia batisimo. <sup>19</sup> Pipita-a, ani azũ 'he, ani atsia asia angũ.

### *Saulo akpokpo Bádha Ngali bhú gũdhũ na Damasi*

Saulo amene mbo ekpí bhú dabili bini ne omũkpata na Damasi. <sup>20</sup> Kolo má gala me-e, ani aholo nakpokpo pi omaYuda bhú oeti nadje líli gba Moidje me Yesu ne Ndili gba Ebhe. <sup>21</sup> Ndũ okpála hana inde adũ nadje ani-e adũ angamba naali. U adũ nayi me: «A inde-e bhũlũ nato mbolo li okpála inde ngabhuka Yesu abhú gũdhũ na Yelusalema di? Ani go nako e ngú naholo uo, di ne nanũ ne uo pi ongbengbe odimandø gba Ebhe di?»

<sup>22</sup> Engú bini, Saulo adũ akolo ne angu bhú nasuno. Ani adũ asuno mbámbá pi omaYuda na Damasi me Yesu ne Masiya . Kaka-a, u dũ nambila matá engú inde u agie e pi ani-e de.

<sup>23</sup> Pita ekpí bhelé, omaYuda adje lio me o bhele Saulo. <sup>24</sup> Engú bini, Saulo ambila siti mabhundja gba uo-o. U atsia adũ di nalila obhoti na

gudhu-o sukpe ne ngbikpi ngubula nato ani, amba o bhelo ani. <sup>25</sup> Sukpe bini-e, ngaani ne omukpata gba e, u anu li malilisa na aga na gudhu-o. U ato ani bhú kili, u atsia akè ani ne di kuto akilidjo.

### *Saulo bhú gudhu na Yelusalema*

<sup>26</sup> Li Saulo akolo lie bhú Yelusalema-a, ani adu nale nagbite lie li omukpata, engú bini, ndu uo hana adu nadjé tsulu. Padhá de, anga u du nabhuka de me a ko ndju kukulu mukpata-a de. <sup>27</sup> La-a, Balanabasi anu aha Saulo, ani atsia anu ne ani pi obhulu titima gba Yesu-o. Oo, Balanabasi akpokpo pi uo maka li Saulo au Ngámá Yesu lie li kpadji, di ne maka li Ngámá agama 'ngú lie pi ani-o. Ani atsia akpokpo di maka li Saulo du nasuno 'ngú lie ne tsulu de ne 'li Yesu bhú Damasi-o. <sup>28</sup> Abhomu-o, obhulu titima atsia aziba Saulo. Nayie li nedhinga bhomu-o, Saulo du matá na'o ká obhulu titima-a de. U adu adhuku bhú Yelusalema bhú dabili bini. Ani tsia du nasuno ne 'li Yesu ne tsulu de. <sup>29</sup> Ani adu di nasuno pi omaYuda inde adu nadi eli na giliki-o, ani atsia adu namene kpekebhe ne uo. Engú bini, ngauo-o, u adu agili nabhelo ani. <sup>30</sup> Li ondaise Saulo, omabhuka adje lie, u anu na'o Saulo bhú Sedjale. Oo, u atsia atima ani bhú Talasi.

<sup>31</sup> Abhomu-o, omabhuka bhú ndu doto na Yudaya, bhú ndu doto na Galilaya, di ne bhú ndu doto na Samalia libhomu adu bhú guo 'ngú. U adu akolo kpekpeke bhú nabhuka. U adu amanga Ngámá mamanga. U atsia adu nabe ndu o, ka angu gba Bu Bhobua.

### *Piele akobho Ene*

<sup>32</sup> Piele adu napu ne ndu bili hana. Abhomu-o, ekpi bini, ani anu natsia omabhuka inde adu bhú gudhu na Lida-o. <sup>33</sup> Oo-o, ani abhaka bhoko bini, a adu 'li ani me Ene. Sunda kalanga madjina, ani adu me ani nde asi kuto pi kalagba gba e-o.

Padhá de, anga adu nani dukuto. <sup>34</sup> Li Piele au ani lie, ani atsia apa pi ani me: «Ene, Yesu Kilisito akobho mu mbia inde akobho! Yie bhúlá, amba mu leke dabili gba mu-o, ngamu makpe.» Kolo má gala me-e, Ene ayie bhúlá. <sup>35</sup> Ndu okpála hana na Lida, di ne egu na Salona au lie mo-o, u adji bua o, u atsia abhuka Ngámá

### *Piele azuku Tabita*

<sup>36</sup> Li nedhinga bhomu-o, mukpata bini na eole adu nani bhú gudhu na Djope, a adu 'li ani me Tabita (bhú eli gba oGiliki-e me «Dolokasi», a akunda napa me «gbelende»). Ani adu amene obabadha 'ngú, ani atsia adu ateteke di obhulu ndibhili ndu 'kpi hana. <sup>37</sup> Ekpi bini, ani asi kuo, ani atsia akpi. U avulu kute kuo ani, u atsia a'o bhú tina 'ti bini abhúlá.

<sup>38</sup> Gudhu na Lida masakpe de gudhu na Djope. Kaka-a, li omukpata adje lie me Piele bhú Lida-a, u atsia atima okpála bhisi ngú napa pi ani me: «Kikiliako, ya ayo ka mu me go nga gba ya ei má gala!» <sup>39</sup> Piele ayie bhúlá kolo má gala, ani atsia anu bhú dabili bini ne okpála inde u atima o-o. Ani akolo lie oo-o, u anu na'o ani bhú tina 'ti inde abhúlá-o. Ndu oekesi hana na gudhu ango-o ago de Piele me u nde ngaku 'gbá. U adu asuno obongo na mbulu, di ne okoti inde li Tabita adu amene e nedhinga ani adu lie bhú mukobho-o pi ani.

<sup>40</sup> Piele apandja ndu okpála hana kilidjo, ani akikita lipuku e kuto, ani atsia ayo Ebhe. Pipita-a, ani adji bhúla e ne api kuo-o, ani atsia apa me: «Tabita, yie bhúlá!» Abhomu-o, Tabita a'u djila e. Li ani au Piele lie, ani atsia adu madu. <sup>41</sup> Piele aholo 'kpa ani, ani atsia a'e ani bhúlá. Pipita-a, Piele a'i omabhuka koko di ne oekesi na olisilisi, ani atsia asuno ani pi uo me ani nde uu. <sup>42</sup> Ndu okpála hana na Djope adje engú inde akodho 'kpi-o. Abhomu-o, okpála bhelé atsia abhuka Ngámá. <sup>43</sup> Piele amene bhú Djope ekpi bhelé.



Ani adu nadi gba kpála bini inde li 'li e adu me Simo. Kpála ango-o adu namene kulu na kó 'nu.

## 10

### *Koloneli a'i Piele agba e*

<sup>1</sup> Kpála bini adu nani bhú gudhu na Sedjale, a adu 'li ani me Koloneli. Ani adu ngámá pí 'ndji osudha kámá bini. Libi osudha ango-o inde u a'i e bhú dabili bini ne osudha koko-o me «Libi osudha na Itali.» <sup>2</sup> Kpála ango-o adu amanga Ebhe di ne nakpe Ebhe bhú dabili bini ne piga gba e libhomu. Ani adu ateteke obhulu ndibhili inde adu bhú ká omaYuda-naali. Ani atsia adu ayo Ebhe piko.

<sup>3</sup> Ekpí bini, masikpe de saa na bata pita tulukpe-e, ani au mbámbá bhú 'he maka loto me andjelu bini gba Ebhe-e nde ngali agba ani. Andjelu ango-o a'i ani me: «Koloneli!»

<sup>4</sup> Ani atsia andjelu ango-o ne tsulu hana. Ani atsia apa pi ani me: «A ko mangua 'ngú dho, Ngámá?» Andjelu-o agie pi ani me: «Ebhe adje nayo gba mu-o adje. Ani aziba di oehe inde mu ngaha e pi obhulu ndibhili-o. Kaka-a, 'to ani 'ili li mu de. <sup>5</sup> Mbia inde-e, tima okpála bhú Djope ngubula na'i kpála bini inde u agisila 'li e me Simo Piele-o. <sup>6</sup> Ani ngasi agba kpála bini inde 'li e me Simo, kpála namene kulu na kó 'nu. Kutí gba ani-e a de 'ngbé 'ngu.» <sup>7</sup> Pipita-a, andjelu inde agama 'ngú pi ani-e atapa. Abhomu-o, Koloneli atsia a'i okpála na kulu gba e bhisi, di ne sudha bini. Sudha ango-o adu kpála nakpe Ebhe. Ani atsia asi di nani bhú kulu gba ani-e naali. <sup>8</sup> Koloneli akpokpo ndu 'ngú inde akodho 'kpí-e hana pi uo. Pipita-a, ani atsia atima uo bhú Djope. Abhomu-o, u atsia agbida.

### *Piele anu agba Koloneli*

<sup>9</sup> Li ekpí aseke lie, okpála u atima o-o adu nga bha lie li kpadji-e, u

akolo de gudhu na Djope. A abhaka me Piele nde a'u apí 'ngbu 'ti ngú nayo Ebhe masikpe de tulukpe. <sup>10</sup> La-a, gumu aholo amene ani, ani adu akunda nazu 'he. Nedhinga u adu alu 'zu-o lie pi ani-e, ani atsia au engú maka loto. <sup>11</sup> Ani au kokpí abhulu lie. Ani au ehe bini maka 'ngbé 'kpá bongo . U ahoholo li odjedje badha. A ayie abhúlá, atsia adu akò kuto.

<sup>12</sup> Bhú 'ngbé 'kpá bongo ango-o, ndu djua onu hana na 'dhu badha, ne ndu djua onu inde ngagbele lio ne 'bu o kuto, di ne ndu djua odhu hana adu bhúbhú. <sup>13</sup> Abhomu-o, ani adje eli bini inde apa pi ani me: «Piele, yie bhúlá! Bhèbhèlè, amba mu zu!» <sup>14</sup> Engú bini, Piele agie me: «A mo-o ade, Ngámá! Padhá de, anga ma zu nga ezu inde li líli gba Moidje ayala e, di ne bhende na sisiti kala Ebhe belegu de bini.\*» <sup>15</sup> Ani adje matá eli ango-o bhutsibhutsi na bhisi-e me: «Ehe inde li Ebhe adji e akolo bubu-o, mo opá de me a sisiti-e de.» <sup>16</sup> Engú ango-o amene lie bhutsibhutsi bata. Pipita-a, má gala kolo me-e, bongo ango-o atsia agie lie abhúlá.

<sup>17</sup> Abhomu-o, mabhundja gba Piele atsia angbingi ka engú inde ani au e-o. Ani adu ayi bua e me: «Tata-a pi?» Bha li nedhinga li Piele adu ayi bua e lie bhomu-o, okpála inde li Koloneli atima o akolo li bhoti gba Simo-o. A adu me u nde ayi okpála me eti gba Simo-o su. <sup>18</sup> U a'i kpála bini, u atsia ayi ani me: «A inde-e bili li Simo u agisila 'li e me Piele asisi lie?» <sup>19</sup> Li nedhinga bhomu-o, Piele adu nga bha nabhundja pindji engú inde ani au e-o. Abhomu-o, Bu Bhobua atsia apa pi ani me: «Tsitsia nga, okpála bata† ngagili mu. <sup>20</sup> Yie bhúlá, kò akuto, amba yi nu bhú dabili bini ne uo. Mo odjidji limu de. Padhá de, anga ma atima uo ngama.»

\* **10:14** 10:14 Líli gba omaYuda adu nani nayala nazu onu koko maka pame mayala. † **10:19** 10:19 U aye bhú obhuku koko me «kpála bini.» U aye bhú okoko me «okpála bhisi.» U atsia aye bhú okoko me «okpála.»

21 Abhomu-o, Piele akø, ani abhaka okpála ango-o. Do ani pi uo me: «Kpála inde yi ngagili e-e, a ko ma. Yi ago la ngú ni?» 22 U agie pi ani me: «Ngámá gba osudha, inde 'li e me Koloneli-e atima ya ngae. A ko kpála na ngbingbili, inde di ngadhøgø Ebhe. Ndu omaYuda hana ngapa 'ngú gba ani-e ndjindji. Andjelu bini gba Ebhe-e akoto li ani, ani atsia apa pi ani me: «Tima okpála ngú na'i Piele, amba mu dje engú inde ani akpokpo e pi mu ko.»» 23 Abhomu-o, Piele ato okpála ango-o abhú 'ti. Ani atsia asuno dabili u asi lie pi uo. U atsia asi tété.

Li ekpi aseke lie, Piele anu bhú dabili bini ne uo. Abhomu-o, omabhuka koko na Djope atsia anu na'o Piele. 24 Pita 'kpi bini-e, u atsia akolo bhú Sedjale. A abhaka me Koloneli nde apo bhúla omaha e di ne obi e na mukunda. Ani atsia adu adjeke uo oo. 25 Li Piele akolo lie, Koloneli ago nakø lio ne ani. Ani ati bhú li 'dhu ani. Ani atsia atu bhúla e ne kuto ngú namanga ani. 26 Engú bini, Piele a'e ani bhúla. Ani atsia apa pi ani me: «Lu malu! Padhá de, anga ngama-a, ma bhadi ne kpála na padhá!» 27 Ani adu agama 'ngú lie ne Koloneli-e, ani atsia ali abhú 'ti. Oo-o, ani abhaka me bhiti okpála nde apo bhúla o. 28 Ani apa pi uo me: «Yi ambila ndjindji me líli ziba de me maYuda bini du bhú dabili bini ne gandji kpála-a de. A ziba la di de me ani nu agba ani-e de. Engú bini, ngama-a, Ebhe asuno muma me ma a'í kpála bini de me a ko kpála na sisiti kala Ebhe-e de. 29 Kaka-a, mo o'i ma lie, ma yala de. Mbia inde-e, ma akunda nambila ta 'ngú inde mo o'i ma ngú e-o.»

30 Abhomu-o, Koloneli agie pi ani me: «A ane nga ekpi bata, masikpe de li ngua nedhinga inde, bhú saa na bata pita tulukpe, ma adu nayo Ebhe bhú 'ti gba ma-o. Kolo me-e, kpála bini alu kala ma. Ani adyi bongo inde adu li e ne zizi. 31 Ani

atsia apa muma me: «Koloneli, Ebhe adje nayo gba mu-o adje. Ani atsia abhundja di maka mu ngateteke obhulu ndibhili lie ko. 32 Mbia inde-e, tima okpála bhú Djope ngú na'i Simo inde u agisila 'li e me Piele. Ani ngadu gba Simo, inde adudu denko 'ngbé 'ngu, kpála namene kulu na kó 'nu.» 33 Abhomu-o, ma atima bha kolo okpála ngú na'i mu má gala! Heni naali! A ndjindji maka mo ogo lie-o. Mbia inde-e, ndu ní hana ní kala Ebhe si ngú nadje ndu 'ngú hana inde li Ngámá akpokpo e pi mu me mu pa e pi ya-o.»

### *Piele akpokpo Bádha Ngali pi ogandji okpála*

34 Abhomu-o, Piele aholo nakpokpo me: «Mbia inde-e, ma ambila ndjindji me Ebhe gbogbo bhusu okpála de. 35 Engú bini, bhú ká ndu opiga hana, kpála inde ngamanga Ebhe, inde di ngamene engú na ngbingbili-e, kpála ango-o bhú djila Ebhe ndjindji. 36 Yi mbila ndjindji me Ebhe atima eli gba e pi omafalaale. A ko Bádha Ngali na guo 'ngú inde ní asia e ka Yesu Kilisito-o. Ngaani-e, a ko Ngámá gba ndu okpála hana. 37 Yi mbila ndu 'ngú hana inde akodho 'kpi nayie bhú ndu doto na Galilaya, akolo bhú ndu doto na Yudaya libhomu, pita li Djaa akpokpo eli gba Ebhe, di ne nabatisa okpála lie ko.

38 Yi mbila hana me Ebhe abhu nani Yesu, kpála na Nadjaleta-a kalanu. Ani atsia aha Bu Bhobua di ne angu pi ani ngú namene kulu gba e-o. Ani apu ne ndu bili hana me ani nde ngamene bádha 'ngú. Ani atsia adu di nakobho ndu okpála hana inde li Djabulu agbigbite o-o. Padhá de, anga Ebhe adu bhú dabili bini ne ani. 39 Ngaya makpe, obhulu titima gba Yesu-o, ya au ndu 'ngú hana inde ani amene e bhú kuti gba omaYuda di ne bhú Yelusalema ne djila ya. U abhøø ani me u nde agi ani li kulusi. 40 Engú bini, Ebhe azuku ani bhú 'kpi na bata. Ani aha

angu pi ani ngú napana lie pi okpála me ni uu.

<sup>41</sup> Ani pana lie pi ndu okpála hana de. Engú bini, ani apana bha lie pi ya okpála inde li Ebhe abhu o kalanu, inde au 'ngú ango-o ne djila o-o. Pita ani azuku lie, ya azu 'he, ya atsia andji di ehe bhe nandji mandji ne uo bhú dabili bini. <sup>42</sup> Abhomu-o, ani atsia atima ya me ya nu ne kpokpo Bádha Ngali pi okpála. Ani atima ya me ya apa pi okpála me, a ko kpála inde li Ebhe a'o e ngú nakodho 'ngú gba okpála inde uu di ne okpála bhende amu-o. <sup>43</sup> Ndu opolofeta hana akpokpo 'ngú gba ani-o. U akpokpo me kpála ne kpála inde abhuka Yesu-o, Ebhe a'é siti 'ngú gba ani-e ka Yesu.»

#### *Ogandji okpála asia Bu Bhobua*

<sup>44</sup> Bha li nedhinga li Piele adu akpokpo 'ngú bhomu-o lie, Bu Bhobua atsia aké pí ndu okpála hana inde adu adje ani-o. <sup>45</sup> OmaYuda koko inde abhuka Yesu-o, ago bhú dabili bini ne Piele. U angamba naali, anga u au me Ebhe atuko di Bu Bhobua pí ogandji okpála. <sup>46</sup> Padhá de, anga u adu adje uo ngagama 'ngú bhú odikongu koko. U adu adhege Ebhe maka ani nde lie ngbéngbé-o. Abhomu-o, Piele atsia apa me: <sup>47</sup> «Mbia inde-e, li okpála inde asia di Bu Bhobua lie maka ní-e, kpála bini ti da nayoko me u abátisa uo ne engu di?» <sup>48</sup> Ani aha líli me u batisa uo ne 'li Yesu Kilisito. Abhomu-o, u atsia ayo ka ani me ani du nga mbo ne o ngubula mbo 'kpí bedi.

## 11

#### *Piele akpokpo maka li ogandji okpála asia Bu Bhobua lie ko*

<sup>1</sup> Obhulu titima gba Yesu , di ne omabhuka inde bhú ndu doto na Yudaya-a, adje me ogandji okpála

asia di eli gba Ebhe , u atsia abhuka Yesu Kilisito . <sup>2</sup> Li Piele agie lie lie bhú gudhu na Yelusalema-a, omaYuda inde abhuka\* aholo namene kpekebhe ne ani. <sup>3</sup> U adu apa me: «Lele pi ngamu kpála inde ali gandja mo oli lie bhú 'ti gba okpála inde i li gandja de-e, mo otsia azu belegu di 'he ne uo bhú dabili bini-e?†»

<sup>4</sup> Abhomu-o, Piele atsia aholo akpokpo kúku pi uo nayie li lilita. Ani pi uo me: <sup>5</sup> «Ngama-a, ma adu bhú gudhu na Djope. Nedhinga ma adu ayo Ebhe lie, ma au engú maka loto. Ehe bini ayie abhúlá maka 'ngbé 'kpá bongo . U ahoholo li odjedje badha. A ayie abhúlá, atsia aké kuto li bili ma adu lie-o. <sup>6</sup> Ma atsia 'kpí bhúbhú ne kpeke djila. Ma au onu na kuti, ma au onu na bili, ma au onu bhende ngagbele lio ne 'bu o kuto di ne odhu. <sup>7</sup> Ma atsia adje di eli bini inde apa muma me: «Piele, yie bhúlá! Bhèbhèle amba mu zu!» <sup>8</sup> Abhomu-o, ma atsia apa me: «A mo-o ade, Ngámá! Padhá de, anga ezu inde li líli gba Moidje ziba e de-e, di ne bhende na sisiti kala Ebhe li nga bhú 'bhè ma belegu de bini.» <sup>9</sup> Bhutsibhutsi na bhisi, ma adje matá eli ayie abhúlá, a apa muma me: «Ehe inde li Ebhe apa li e me a bubu-o, mo opá de me a sisiti-e de.» <sup>10</sup> Engú ango-o, amene lie bhutsibhutsi bata. Pipita-a, bongo ango-o ne ndu 'he inde bhúbhú-o hana atsia agie lie abhúlá.

<sup>11</sup> Bha li nedhinga bhomu-o, obhosi bata akolo li bili inde ya adu li e-o. Kpála bini na gudhu na Sedjale atima uo me u go bhaka ma. <sup>12</sup> Abhomu-o, Bu Bhobua apa muma me: «Nu bhú dabili bini ne uo, mo opá de me a ko ogandji okpála-a de.» Ondaise ma madhia inde-e atsia anu bhú dabili bini ne ma. Ndu ya hana, ya ali bhú 'ti gba kpála inde

\* **11:2** 11:2 Okpála koko na imbilangu adu nabhundja me té omaYuda bedi adu apa me a ayo me ogandji okpála li bhú gandja ngú nakolo omakilisito. † **11:3** 11:3 Líli gba omaYuda ziba nani de me u du bhú dabili bini ne ogandji okpála de.

a'i ya-o. <sup>13</sup> Abhomu-o, ani akpokpo pi ya maka li andjelu akoto li ani lie abhu' 'ti gba ani-o. Andjelu ango-o atsia apa pi ani me: <Tima okpala bhú gudhu na Djope ngu' na'i Simo inde u agisila 'li e me Piele-o. <sup>14</sup> Ani akpokpo pi mu, ngamu di ne okpala inde bhú 'ti gba mu-o, eli gba Ebhe inde akóbho mu-o.>

<sup>15</sup> Li nedhinga li ngama Piele, ma aholo nagama 'ngú lie, Bu Bhobua atsia akè pí uo maka ani akè nani di lie pí ní li 'kpí na Patekote ko. <sup>16</sup> Abhomu-o, ma atsia abhundja eli gba Ngámá inde apa me: <Djaa abatisa nani okpala ne engu, engú bini ngayi-e, yi asia batisimo na Bu Bhobua.> <sup>17</sup> Ma au mbámbá me Ebhe aha Bu Bhobua pi ogandji okpala bhomu-o, maka ani aha di nani koli Bu Bhobua bini bhomu-o pi ní, li nedhinga inde ní abhuka Ngámá Yesu Kilisito lie-o. La-a, ngama-a, ma ne da me ma yoko Ebhe li engú inde ani akunda namene e?» <sup>18</sup> Li omaYuda inde abhuka bhomu-o adje lie, u adhogè Ebhe, u atsia apa me: «A na paká me Ebhe aha di nadjí bua o pi ogandji okpala, amba u sia di mukobho na duduma.»

*Lita Dadjua gba Ebhe na gudhu na Atiokia bhú ndu doto na Silia*

<sup>19</sup> Pita u abhèlè Etieni lie, u aholo namene omabhuka sisiti. Abhomu-o, omabhuka bhelé atsia atsambala. † Okoko bhú ká uo agbida bhú ndu doto na Fenisia, di ne bhú kpemè na Sipele, di ne bhú gudhu na Atiokia. U atsia adu nakpokpo Bádha Ngali gba Yesu-o bha bini pi omaYuda. <sup>20</sup> Okoko bhú ká uo adu okpala na kpemè na Sipele, di ne gudhu na Silene. U anu bhú gudhu na Atiokia. Abhomu-o ngauo, u atsia aholo nakpokpo Bádha Ngali gba Ngámá Yesu di pi ogandji okpala. <sup>21</sup> Angu gba Ngámá-a adu bhú dabili bini ne uo. Kaka-a, ogandji okpala

bhelé abhuka, u atsia adji lio pi Ngámá.

<sup>22</sup> Omabhuka na Yelusalema adje engú ango-o. Abhomu-o, u atsia atima Balanabasi bhú Atiokia. <sup>23-24</sup> Balanabasi nani ne bádha kpála. Ani abedhe nani ne Bu Bhobua di ne nabhuka bedhe. Ani akolo oo, ani atsia au me Ebhe atuko bisagu pí omabhuka. Abhomu-o, ani akpi djali, ani atsia ato masi bhú ndu uo hana me u ha lio pi Ngámá ne bua o bini. Abhomu-o, okpala bhelé atsia abhuka Ngámá.

<sup>25</sup> Pipita-a, Balanabasi anu nagili Saulo bhú gudhu na Talasi. <sup>26</sup> Li ani au ani lie, u atsia agie lio ne ani bhú gudhu na Atiokia. Ndu uo bhisi hana amene kalanga bini libhomu bhú ká omabhuka ango-o. U atsia adu asuno pi okpala bhelé. U agisila nani 'ili na omakilisito li omabhuka bhutsibhutsi na bini bhú gudhu na Atiokia.

<sup>27</sup> Li nedhinga bhomu-o, opolofeta koko ayie bhú gudhu na Yelusalema, u atsia ago bhú gudhu na Atiokia. <sup>28</sup> Abhomu-o, suka uo bini, a adu 'li ani me Agabusi ayie bhúlá. Ani akpokpo bhú angu gba Bu Bhobua me: «Adyindi na ngbéngbé alí píla doto libhomu.» (Atsia amene lie bhú nedhinga li Kolode adu lie 'ngbé ngámá-o.) <sup>29</sup> Omabhuka atsia apa me kpála ne kpála ha tia bhende li angu ani akólo lie, ngubula natitima me ateteke omabhuka inde bhú ndu doto na Yudaya ko. <sup>30</sup> Abhomu-o, u amene bhadi mo-o. U atsia atima tia ango-o pi obhelesi okpala bhú Yelusalema sa 'kpa Balanabasi ne uo ne Saulo.

## 12

*Elode abhèlè Djaki, ani atsia abhike Piele bhú tikpu*

<sup>1</sup> Bhú nedhinga bhomu-o, 'ngbé ngámá Elode Agilipa aholo amene okpala koko na Piga gba Ebhe-e sisiti. <sup>2</sup> Ani aha líli me u bhèlè Djaki,

† 11:19 11:19 Pita nabhèlè Etieni-e, u adu ato mbolo li omabhuka ane kalanga ndjikpa mane. Kaka-a, omabhuka bhelé atsia atsambala.

ndai Djaa , ne mbotia. U atsia abhøle ani. <sup>3</sup> Li ani au lie me engú angoo anga li omaYuda naali-e, ani atsia aha matá líli me u holo Piele. (A adu masikpe de nedhinga na anokomia na Pasika , di ne anokomia nazu mapa inde li levile nde bhú e ade ko.) <sup>4</sup> Li ani aholo Piele lie, ani abhike ani bhú tikpu. Abhomu-o, ani atsia a'o osudha badha badha bhú libi badha ngú nalila ani. Ani adu akunda nakodho 'ngú gba ani-e bhú ká djila ndu okpála hana pita anokomia na Pasika-o. <sup>5</sup> Li Piele adu lie bhú tikpu-o, okpála na Piga gba Ebhe-e adu ayo Ebhe ne bua o hana ngubula ani.

*Piele akoto bhú tikpu maka ndjombe*

<sup>6</sup> Sukpe kala me Elode kodho 'ngú gba Piele, Piele adu ala sunda osudha bhisi. A adu me u nde agbigbite ani ne ogbindjili bhisi. Omalila atsia adu alila obhoti na tikpu-o. <sup>7</sup> Má gala kolo me-e, andjelu bini gba Ngámá-a akoto. Zi djua aha bili bhú tina 'ti angoo hana. Andjelu-o adula Piele li kala e, ani azuku ani. Ani atsia apa pi ani me: «Yie bhúlá má gala!» Abhomu-o, ogbindjili-e abhulu bhú 'kpa ani, atsia abala kuto.

<sup>8</sup> Pipita-a, andjelu-o apa pi ani me: «Gbite 'kpú ludu mu, mu toto la di maløke gba mu-o bhú 'dhu mu.» Piele amene bhadi moko. Andjelu-o atsia apa matá pi ani me: «To koti gba mu-o, amba mu kpata ma.»

<sup>9</sup> Piele aholo nakpata andjelu-o, ani atsia akoto bhú tina 'ti inde ani adu bhú e ko. Ani du ambila de me engú inde li andjelu ngamene e-e, a ko kukulu 'ngú-o de. Ani adu abhundja naae me a ko ehe maka loto. <sup>10</sup> U ane libi osudha na bini inde adu nalila tikpu-o. Pipita-a, u ane libi osudha bhende na bhisi-o. U akolo li 'ngbé bhoti na kalase inde nakoto bhú gudhu-o. Bhoti angoo a'cu bha lie kala uo ne titi e, u atsia aze. U

aholo 'nú, u akolo li kpadji bini. Má gala kolo me-e, andjelu-o angita li ani má pele!

<sup>11</sup> Abhomu-o, Piele ambila me engú inde amene lie-e, a ko kukulu 'ngú. Ani atsia apa me: «Mbia inde-e, ma ambila na paká me Ngámá atima andjelu gba e, ani atsia akobho ma sa 'kpa Elode di ne ndu osisiti 'ngú hana inde li omaYuda adu akunda namene e ngú ma ko.»

<sup>12</sup> Li imbilangu gba Piele abhulu lie lie, ani atsia anu bhú 'ti gba Malia , 'hi Djaa , kpála u agisila 'li e me Maloko-o. Oo, okpála bhelé apøkøbhø nani bhúla o, u atsia adu ayo Ebhe. <sup>13</sup> Piele abhi bhoti na ngbéngbé-o. Abhomu-o, suka kpála bini na kulu na øøle adu oo, a adu 'li ani me Lode. Ani atsia ago ngú na'cu bhoti-o. <sup>14</sup> Li ani ambila 'li Piele lie, ani tsia 'cu bhoti-e de ka djali. Engú bini, ani agie lie ne holo abhú 'ti, ani atsia apa pi okpála inde adu bhú 'ti oo me: «Piele alu li bhoti akilidjo!»

<sup>15</sup> Okpála angoo atsia agie pi ani me: «Mu ne bhulu pele!» Engú bini, ani azi bha kekele tété me a ko kukulu 'ngú. Abhomu-o, u atsia apa pi ani me: «A ko andjelu gba ani ko.» <sup>16</sup> La-a, Piele adu bha nabhi bhoti-o. U a'cu lie, u au ani, u atsia angamba naali. <sup>17</sup> Abhomu-o, Piele amene 'kpa e pi uo me u ndjili nga má bulu! Ani atsia akpokpo pi uo maka li Ngámá agbe ani lie bhú tikpu-o. Ani atsia apa matá me: «Yi kpokpo pi Djaki\* di ne pi ondaise ní koko-o.» Pipita-a, ani akoto, ani atsia atapa li bili koko.

<sup>18</sup> Li ekpi aseke lie, osudha inde adu alila tikpu-o, aholo nazi tolo naali sunda o. Abhomu-o, u atsia adu ayi lio me: «A akolo li Piele ne mangua 'ngú dho?» <sup>19</sup> Elode atima okpála me u gili ani. Engú bini, u u ani de. Ani ayiyi osudha inde adu alila ani-o. Abhomu-o, ani atsia aha líli me u bhili uo. Pipita-a, Elode

\* **12:17** 12:17 Djaki: A ko Djaki bhende ndai Yesu, nani akolo bhele kpála na Piga gba Ebhe na Yelusalema ko. Tsia bhú Kul. 15:13.

ayie bhú Yudaya, ani atsia anu bhú gúdhú na Sedjale. Oo, ani adu mbo ngubula nedhinga.

### *'Ngbé ngámá Elode Agilipa akpi*

<sup>20</sup> La-a, Elode adu adje siti bua naali pi okpála na gúdhú na Tile di ne Sidona. Okpála ango-o adje lio. Pipita-a, u atima okpála ngú nanu nagama 'ngú ne 'ngbé ngámá Elode. Okpála ango-o adje ngaiza lio ne Balasitusi, kpála natsia 'kpí li oehe gba 'ngbé ngámá Elode-o. U adu nayo ka 'ngbé ngámá guo 'ngú, anga ndu ezú gba uo-o hana adu nayie bhú doto gba ani-o.

<sup>21</sup> Abhomu-o, Elode a'o 'kpí ngú nagama 'ngú pi uo. Li 'kpí ango-o, ani adyi bongo na ngámá, ani atsia adu pí kiti na ngámá gba e-o. Ani atsia aholo agama 'ngú pi uo bhú ká djila ndu okpála hana. <sup>22</sup> Ndu okpála hana asula me: «A ngagama 'ngú inde mboye ebhe, a ko kpálakuti de!» <sup>23</sup> Li Elode adje lie mo-o, ani atsia aziba, ani dhögö Ebhe de. Bha li nedhinga bhomu-o, andjelu bini gba Ngámá-a asu ani. Padhá de, anga ani dhögö Ebhe de. Obangili aholo nazú ani, ani atsia akpi.

<sup>24</sup> Li nedhinga bhomu-o, eli gba Ebhe-e adu ayangba naali. <sup>25</sup> Li Balanabasi ne Saulo andjia kulu gba o-o lie bhú gúdhú na Yelusalema-a, u atsia agie lio bhú Atiokia bhú dabili bini ne Djaa inde u agisila 'li e me Maloko-o.

## 13

### *U alo Balanabasi ne Saulo ngú kulu*

<sup>1</sup> Opolofeta di ne omusuno inde adu nani bhú Piga gba Ebhe na Atiokia, a ko nani Balanabasi, Simeo (inde u a'i e me Negele\*), Lukiusi (kpála na Silene), Manaene inde abhele bhú dabili bini ne ngámá Elode Atipasi, di ne Saulo. <sup>2</sup> Ekpí bini,

nedhinga u adu nayo Ebhe lie di ne natse 'zu-o, Bu Bhobua atsia apa pi uo me: «Yi 'o Balanabasi ne Saulo muma kpi ngubula namene kulu inde ma a'i uo ngú e ko.» <sup>3</sup> Abhomu-o, pita natse 'zu di ne nayo Ebhe-e, u a'o 'kpa o pí 'ndji uo, u atsia aha kpadji pi uo me u nunu.

### *Balanabasi ne Saulo anu bhú Sipele*

<sup>4</sup> Li Bu Bhobua atima uo lie, u atsia anu bhú gúdhú na Selusia. Oo, u a'u bhú 'ngbé zabu, u atsia atapa bhú Sipele. <sup>5</sup> U akolo lie bhú Salamine-e, u aholo nakpokpo eli gba Ebhe-e bhú oeti nadjé líli gba omaYuda-o. Djaa Maloko adu bhú dabili bini ne uo ngú nateteke uo. <sup>6</sup> U agulu kpemö-o hana, u atsia akolo bhú Pafosi. Oo, u abhaka maYuda bini, bhulu mambengu inde adu 'li e me Bale-Yesu. Ani adu apa me ni ne polofeta. <sup>7</sup> Ani adu nadu agba Selugio Polo, kpála na imbilangú, inde adu ngámá na ndu doto ango-o. Ngámá ango-o a'i Balanabasi ne Saulo, anga ani akunda nani nadjé 'li Ebhe. <sup>8</sup> Engú bini, bhulu mambengu Elimasi (anga 'ili bhomu-o akunda napa bhú eli gba oGiliki moko) ayala. Ani adu agili me ni yoko ngámá na ndu doto ango-o me ani abhúka de.

<sup>9</sup> Abhomu-o, Saulo, inde li 'li e adu di me Polo-o,† abedhe ne Bu Bhobua, ani atsia ani ne kpéke djila. <sup>10</sup> Ani atsia apa me: «Ngamu siti kpála na kali inde ngapite okpála, ndili gba Djabulu, kpála nayala ndu 'ngú na babadha hana, mu 'ó nasiti okpadji na ngbingbili gba ngámá-a di!» <sup>11</sup> Tsitsia, mbia inde-e, Ebhe asú mu. Djila mu aní. La di-e, mu ú matá zindjila de ngubula mbo oekpi.» Kolo me-e, ndindi ani djila Elimasi. Biti atsia abuku ani hana, ani adu abubudha bili de e ngbalina nagili me kpála holo 'kpa ni ngú

\* **13:1** 13:1 Negele: U aye bhú obhuku koko me «Bibili.» † **13:9** 13:9 Polo: 'li na Saulo bhú eli gba omaYuda, bhende na Polo bhú eli gba oGiliki. U agisila nani 'li na Polo li ani nedhinga inde ani abhu ka nakpokpo Bádha Ngali gba Yesu Kilisito lie pi oGiliki ko.

nateteke ni. <sup>12</sup> Li ngámá na ndu doto au engú akodho 'kpí-e lie me-e, ani atsia abhuka di ne nangamba naali ka nasuno inde u asuno e ne 'li Ngámá ko.

*Polo ne Balanabasi bhú Atiokia inde abhú Pisidia*

<sup>13</sup> Polo di ne okpála inde adu adhuku bhú dabili bini ne ani-e, ayie bhú Pafosi ngú nanu bhú Peledje bhú ndu doto na Pamifilia. Engú bini, Dja Maloko a'o ká uo oo, ani atsia agie lie abhú Yelusalema. <sup>14</sup> Ngauo-o, u akpata bha kpadji gba o-o. U ayie bhú Peledje, u atsia akolo bhú Atiokia inde bhú Pisidia ko. Bhú 'kpí naguo gba omaYuda-a, Polo ngauo ne Balanabasi ali bhú 'ti nadjé líli gba Moidje, u atsia adalu kuto. <sup>15</sup> Pita natanga líli di ne obhuku gba opolofeta-a, ongámási na eti nadjé líli-e atsia atima eli pi uo me: «Ondaise ya, i du me yi nde ne engú ngú nateteke okpála ne di-e, yi de pa!»

<sup>16</sup> Polo ayie bhúlá, ani amene 'kpa e pi okpála, ani atsia apa me: «Ngayi okpála na Isalaele di ne yi okpála inde ngakpe Ebhe-e,‡ yi dje nga ma! <sup>17</sup> Ebhe gba okpála inde omaIsalaele, abhu nani onguo ogbi ní. Ani abe ndu uo bhú nedhinga u adu lie bhú bali bhú Edjipeto-o. Pipita-a, ne angu gba e-e, ani atsia agbe uo bhú doto na Edjipeto. <sup>18</sup> Ani akibila uo bhú mili bili ngubula kalanga masikpe de ndjikpa badha. <sup>19</sup> Pipita-a, ani abhili opiga mananika bhú doto na Kanana. Ani atsia aha doto gba uo-o pi onguo ogbi ní <sup>20</sup> ngubula kalanga masikpe de kámá badha ne ndjikpa bhuluvue.

Pipita-a, ani aha okpála nakodho mangimbo pi uo akolo bhú nedhinga gba polofeta Samuele. <sup>21</sup> Pipita-a, u ayo me o okunda 'ngbé

ngámá. Abhomu-o, Ebhe atsia aha Saulo pi uo, ndili gba Kisi, bhú piga gba Bendjamé. Ani au nani pi 'ndji uo ngubula kalanga ndjikpa badha. <sup>22</sup> Pita li Ebhe ayala Saulo lie, ani atsia agbe 'ngbé ngámá Davidi pi uo. Ani atsia apa li 'ngú gba ani-e me: «Ma au Davidi, ndili gba Yese. A ko kpála na babadha bhú djila ma. Ani améne ndu 'ngú hana maka ma akunda lie.†» <sup>23</sup> Bhú piga gba Davidi-e, Ebhe agbe pi omaIsalaele Mukobho Yesu maka ani apa nani lie kalanu ko. <sup>24</sup> Kala nago ka ani-e, Dja akpokpo Bádha Ngali pi ndu okpála na Isalaele hana. Ani adu ayo ka uo me u dji bua o, amba u sia batisimo. <sup>25</sup> Li Dja akolo lie li 'so kulu gba e, ani adu apa me: «Yi ngabhundja me ma ne da? Ma ne kpála inde yi ngadjeke e ade! Engú bini, yi djedje, a ngago pita ma ne kpála. Ma ne tetele kpála ade ngubula me ma gbe maləkəš bhú 'dhu ani.»

<sup>26</sup> Ondaise ma, ngayi okpála na piga gba Abalahama di ne yi okpála inde si-e, inde ngakpe Ebhe-e, Ebhe atima nani ngali na mukobho inde-e pi ní. <sup>27</sup> A na paká me okpála na Yelusalema di ne ongámási gba o-o mbila nani Yesu de. Bhú oekpi naguo gba omaYuda bini ne bini hana-a, u adu atanga obhuku gba opolofeta. La-a, u du ambimbila de. Engú bini u akodho 'ngú gba Yesu lie me u bhələ ani-e, u amene bhomu-o engú inde li opolofeta apa e ko. <sup>28</sup> Belegu u u nani engú bini inde u ti da nabhələ Yesu ka e lie de-e, u ayo ka Pilate me u bhələ ani. <sup>29</sup> Pita u amene ndu 'ngú hana maka li 'li Ebhe apa lie li 'ngú gba ani-e, u a'e ani li kulusi, u atsia anu ato ani bhú lata.

<sup>30</sup> Engú bini, Ebhe atsia azuku ani bhú ká okpála inde amu-o. <sup>31</sup> Yesu

‡ 13:16 13:16 Okpála inde ngakpe Ebhe: A ko ogandji okpála inde abhuka Ebhe gba omaYuda ko.

† 13:22 13:22 Tsia bhú 1 Sam. 8:5, 19, 10:21, 13:14, 16:12. § 13:25 13:25 Nagbe maləkə: Nani agba omaYuda-a, kulu nagbe maləkə bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá.

asuno lie pi okpála inde adu ad-  
holo ne ani bhú dabili bini nayie  
bhú Galilaya akólo bhú Yelusalema  
ngabula 'kpí bhelé. Mbia inde-  
e, okpála ango-o ngakpokpo 'ngú  
gba ani-e pi okpála na Isalaele  
ngao. <sup>32</sup> Ngaya makpe-e, ya ago ngú  
nakpokpo Bádha Ngali inde-e pi yi,  
Bádha Ngali inde li Ebhe apa nani  
kalanu me ni apá e pi onguo ogbi  
ní-o. <sup>33</sup> Ani amene mbia inde-e pi  
ní ongisi gba uo-o, li kpadji nazuku  
Yesu bhú ká okpála inde amu, maka  
u aye nani lie bhú Etsi na bhisi gba  
omaYuda-a me:

<Mu ne ndili gba ma na bhobhoko,  
Ma azu mu naki ngama  
makpe.†>

<sup>34</sup> Ebhe apa nani me ni azúku Yesu  
bhú ká okpála inde amu-o mazuku,  
ngabula me ani akpí matá-a de. A  
ko engú inde ani apa nani e me:

<Ma ahá obisagu na bububu inde di  
na kukulu-o pi mu,  
inde ma apana nani e pi Davidi  
ko.†>

<sup>35</sup> Kaka-a, ani apa matá li bili koko  
me:

<Mu 'ó de me kpála na ngbingbili  
gba mu-o zi bhú lata-a de.†>

<sup>36</sup> Padhá de, anga Davidi bhú  
nedhinga gba e, amene líli gba Ebhe-  
e hana. Pipita-a, ani akpi, u azi  
ani de onguo ogbi e, ani atsia azi.

<sup>37</sup> Engú bini, kpála inde li Ebhe  
azuku e, ani zí naae de. <sup>38-39</sup> Ondaise  
ma, yi mbila ndjindji me u apa pi  
yi me u a'e osisiti 'ngú gba yi-e ka  
Yesu. Yi ti da nakobho ka namene  
líli gba Moidje-e de. Engú bini yi  
akóbho bha me yi nde abhuka Yesu.  
<sup>40</sup> 'E-e! Yi lila liyi uu me engú inde li  
opolofeta apa e akólo li yi de, engú  
inde me:

<sup>41</sup> <Yi tsitsia nga, ngayi okpála na  
'ngbé 'ndji, yi ngamba naali,  
amba yi ngingita má pele  
pele!

Padhá de, anga bhú nedhinga  
gba yi-e, ma améne engú bini  
inde

yi ti da naziba e de,  
abana i du me kpála bini nde  
apa nani engú ango-o pi yi  
kalanu.†>»

<sup>42</sup> Li Polo ne uo ne Balanabasi  
akoto lie bhú 'ti nadge líli-e, u atsia  
ayo ka uo me u go bhú 'kpí naguo  
na sidi, amba u kpokpo matá engú  
bini bhomu-o. <sup>43</sup> U atsambala lie  
bhú bula-a, bhelé na omaYuda ne  
ogandji okpála inde adu akpe Ebhe-  
e, akpata Polo ne uo ne Balanabasi.  
Abhomu-o, Polo ne uo ne Balan-  
abasi, bhú nagama 'ngú gba o ne uo-  
o, u ato masi bhú uo me u holo lio li  
bádha bhú 'bu gba Ebhe-e kpekpeke.

<sup>44</sup> Ekpí naguo na sidi-e, masakpe  
de ndu okpála na gudhu hana apo  
bhúla o ngú nadge 'li Ebhe. <sup>45</sup> Li  
omaYuda au bhiti okpála ango-o lie,  
u asia siti bua , u atsia adu asobho  
Polo ka eli inde ani adu apa e ko.

<sup>46</sup> La-a, Polo ne uo ne Balanabasi du  
nani nagama 'ngú pi uo ne tsulu de.  
U adu apa me: «A ayo nani me ya  
kpo ngaiza nakpokpo eli gba Ebhe-  
e kalanu pi yi. Engú bini, maka  
yi ayala lie, yi au la di me yi ti  
da nasia mukobho na duduma de.  
Kaka mbia inde-e, ya anu ibili agba  
ogandji okpála. <sup>47</sup> Padhá de, anga líli  
inde ya asia e ka Ngámá-a ngae inde:

<Ma a'o mu eke pi opiga,  
ngabula me mu gapa ngali na  
mukobho

akólo bha bini ali 'dje doto!†>»

<sup>48</sup> Li ogandji okpála adje lie mo-o,  
u akpi djali, u atsia aholo nadhogo 'li  
Ngámá. Ndu okpála hana li Ebhe alo  
o ngú nasia mukobho na duduma  
atsia abhuka.

<sup>49</sup> Abhomu-o, 'li Ngámá atsia  
adhuku bhú ndu doto ango-o lib-  
homu. <sup>50</sup> Engú bini, omaYuda ato  
'ngú bhú 'ndji olisi na tia inde adu  
adhogo Ebhe di ne obhelesi okpála  
na kuti-o. Abhomu-o, u aholo amene

† 13:33 13:33 Tsia bhú Ets. 2:7. † 13:34 13:34 Tsia bhú Isa. 55:3. † 13:35 13:35 Tsia bhú Ets. 16:10. † 13:41 13:41 Tsia bhú Abk. 1:5. † 13:47 13:47 Tsia bhú Isa. 49:6.



Polo ne uo ne Balanabasi sisiti, u atsia agbe uo bhú doto gba o-o. <sup>51</sup> Abhomu-o, okpála bhisí angoo apulu doto na kuti gba uo inde adhedhe li 'dhu o, ngubula nasuno pi uo me u amene siti 'ngú. U atsia agbida bhú Ikoniomu. <sup>52</sup> Engú bini, pi omukpata-a, u abedhe ne djali di ne Bu Bhobua bedhe.

## 14

### *Polo ne Balanabasi bhú Ikoniomu*

<sup>1</sup> Bhú Ikoniomu-o, a amene bhadi lie moko. Polo ne uo ne Balanabasi ali bhú 'ti nadje líli gba omaYuda . OmaYuda bhelé di ne okpála inde ne omaYuda ade-e, akolo omabhuka ka engú inde u agama e ko. <sup>2</sup> Engú bini, omaYuda bhende i bhuka nani de-e, a ato bhú ogandji okpála mabhundja na sisiti pindji ondaise ní, omabhuka. <sup>3</sup> La-a, Polo ne uo ne Balanabasi abhue mbo nani bhú Ikoniomu naali. U du agama 'ngú ne tsulu de anga u adu ne nabhuka bhú Ngámá, inde adu asuno me eli inde u adu akpokpo e pindji bádha bhú 'bu gba ni-e, adu kukulu 'ngú. Padhá de, anga ani adu aha angu pi uo ngú namene okiaka 'ngú di ne ongú na ngangamba. <sup>4</sup> Kaka-a, okpála na gudhu angoo atsia agbo bhusu o: okoko adu pi omaYuda, okoko atsia adu pi obhulu titima gba Yesu .

<sup>5</sup> Abhomu-o, omaYuda di ne ogandji okpála bhú dabili bini ne ongámási gba o-o, atsia aleke lio ngú namene Polo ne Balanabasi sisiti, ngú nabhili uo ne teme. <sup>6</sup> Li okpála bhisí bhomu-o ambila 'ngú angoo lie, u atsia akpe agbida bhú ogudhu na Lisitele ne Delebe, la di ne bhú okuti na ngongo, bhú ndu doto na Likaonia. <sup>7</sup> Oo di-e, u aholo akpokpo Bádha Ngali pi okpála.

### *Polo ne Balanabasi bhú Lisitele*

<sup>8</sup> Bhú Lisitele-e, kpála inde li eze adu li 'dhu e adu oo. Ani dhuku

de nayie maka nani u azu ani lie-o. <sup>9</sup> Ani adu adje engú inde li Polo adu apa e ko. Polo atsia ani ne kpéke djila. Ani au me kpála angoo abhuka me ni ti da nasia mukobho. <sup>10</sup> Abhomu-o, Polo atsia apa pi ani ne kpéke 'li me: «Yie bhúlá, lu ngbingbili!» Kpála angoo ayie bhúlá, ani a'ulu aké má kprii! Ani atsia aholo nadhuku. <sup>11</sup> Li okpála bhelé au engú li Polo amene e lie, u asula bhú eli na kuti gba okpála na ndu doto na Likaonia me: «Oebhe akolo maka okpála-kuti, u atsia ago gba ní!» <sup>12</sup> U a'o 'ili li Balanabasi me Djeusi,\* u atsia a'o 'li Polo me Elemesi, anga ani adu agama 'ngú-o ngae. <sup>13</sup> Dimandé gba ebhe Djeusi, inde li 'ti ebhe gba e adu li 'bhé gudhu-o, ago ne obagala na obhosibhosi li 'bhé bhoti na gudhu-o. Ani aha di 'i felele, bhú dabili bini ne okpála na kuti-o, ani atsia adu akunda me ni bhele onu angoo ngú nahaha pi Balanabasi ne uo ne Polo.

<sup>14</sup> Li obhulu titima gba Yesu adje engú bhomu-o lie, u asidha obongo li kute o má tsue tsue!† U anu ne holo bhú ká okpála ne nasusula me: <sup>15</sup> «Ondaise ya, yi ngamene bhomu-o ni? Ya bha ne okpála maka yi. Ya ago pi yi ne Bádha Ngali me yi 'o ká oebhe inde na padhá padhá bhomu-o, inde li mbinimbini nde bhú o ade ko. La di me yi ha liyi pi Ebhe na mukobho inde abho ekpi, abho doto, abho 'ngbé 'ngu ne ndu 'he inde bhúbhú-o hana ko. <sup>16</sup> Bhú nedhinga gba okpála na kalanu-o, ani a'o me u kpata kpadji gba o makpe ko. <sup>17</sup> Engú bini, ani 'ili 'to e li napana lie ne namene babadha 'ngú pi uo de. Padhá de, anga ani ngatima pi yi ebha di ne onguwa bhú nedhinga gba o-o. Ani ngaha ezu pi yi. Ani la di ngabedhe yi ne djali.» <sup>18</sup> Abana u adu apapa lie mo-o, da me u yoko bhiti okpála adu

\* **14:12** 14:12 Djeusi: Bhú mabhundja gba oGiliki-e, Djeusi nani ne ngámá gba oebhe na eu. Elemesi atsia adu bhulu titima gba uo ko. † **14:14** 14:14 Li bili inde-e, nasidha bongo li kute akunda nasuno me nayala 'ngú.

kpekepeke me u abhélø onu pi o de ko.

<sup>19</sup> Li nedhinga bhomu-o, omaYuda inde ayie bhú Atiokia, bhú ndu doto na Pisidia, di ne bhú Ikoniomu, apite bhiti okpála bhomu-o me, u tutulu Polo ne teme ngú nabhøø ani. U agbe ani ali ngo gudhu anga u adu abhundja me ani akpi. <sup>20</sup> Engú bini, li omabhuka ago asa lio lie denge ani-e, ani ayie bhúlá, ani atsia agie matá lie bhú gudhu. Li ekpí aseke lie, ngauo ne Balanabasi-e, u atsia atapa bhú Delebe.

*Polo ne Balanabasi agie lio bhú Atiokia bhú ndu doto na Silia*

<sup>21</sup> Bhú gudhu na Delebe, u akpokpo Bádha Ngali pi okpála, u atsia asia omakpata bhibhiti. Pipita-a, u agie lio bhú Lisitele, bhú Ikoniomu di ne bhú Atiokia bhú ndu doto na Pisidia. <sup>22</sup> U a'e tsulu li bua uo, u ato masi bhú uo me u lu kpekepeke bhú nabhuka. U adu apa pi uo me: «A ayo me ní dje likabhu naali ngú nali bhú kuti na Nau gba Ebhe ko.» <sup>23</sup> Bhú Dadjua gba Ebhe bini ne bini hana, u adu alo obhelesi okpála . Pita u atse ezu ngú nayo Ebhe lie, u atsia a'o uo sa 'kpa Ngámá inde u abhuka e ko.

<sup>24</sup> U agulu Pisidia lie, u atsia akolo bhú Pamifilia. <sup>25</sup> Pita u akpokpo 'li Ebhe lie pi okpála bhú Peledje-e, u atsia anu bhú Atalia. <sup>26</sup> U ayie lie oo, u ali bhú zabu, u atsia anu bhú Atiokia. A bhomu-o bili inde u a'o nani uo lie me u sia bádha bhú 'bu gba Ebhe ngubula kulu inde u amene e mbia inde-e ko.

<sup>27</sup> U akolo lie oo, u apo bhúla okpála na Dadjua gba Ebhe-o. U atsia akpokpo pi uo ndu 'ngú hana inde li Ebhe amene e bhú dabili bini ne uo-o. U atsia akpokpo di pi uo maka li Ebhe abhulu kpadji pi ogandji okpála lie ngú nabhuka di ani Ebhe ko. <sup>28</sup> Polo ne Balanabasi asi nani mbo ekpí bhelé bhú dabili bini ne omakpata na Atiokia.

## 15

*Kpekebhe pindji nakodho gandja*

<sup>1</sup> Okpála koko inde ayie bhú Yudaya-a, akolo bhú Atiokia. U adu asuno pi omabhuka me: «Yi ti da nasia mukobho de, i du me u nde kodho yi bhú gandja maka li líli gba Moidje apa lie de ko.» <sup>2</sup> Abhomu-o, Polo ne Balanabasi agbe bhayiki, u atsia aholo amene kpekebhe ne uo naali pindji engú angoo. U atsia adje lio me Polo ne Balanabasi, la di ne okpála koko na Atiokia, nu bhú Yelusalema, amba u kpokpo 'ngú pindji 'ngú angoo bhú dabili bini ne obhulu titima gba Yesu di ne obhelesi okpála .

<sup>3</sup> Abhomu-o, ndu okpála hana na Dadjua gba Ebhe atsia anu a'o uo li kpadji. U apu bhú ndu doto na Fenisia di ne bhú Samalia. U adu akpokpo maka li ogandji okpála akolo omakilisito lie ko. Ngali angoo aha djali naali pi ndu omabhuka hana. <sup>4</sup> U akolo lie abhú Yelusalema-a, ndu okpála hana na Dadjua gba Ebhe, ne obhulu titima gba Yesu di ne obhelesi okpála-a, atsia asia uo. U atsia akpokpo pi uo ndu 'ngú hana inde li Ebhe amene e bhú dabili bini ne uo-o. <sup>5</sup> Engú bini, okpála bini bini bhú ká omuFalisai , obhende akolo omabhuka-a, ayie bhúlá, u atsia apa me: «A ayo me omabhuka inde ne omaYuda de-e, u to uo bhú gandja, amba u pa pi uo me u mene líli gba Moidje ko.»

<sup>6</sup> Abhomu-o, obhulu titima gba Yesu di ne obhelesi okpála apo bhúla o ngú natsia 'kpí li engú angoo. <sup>7</sup> Pita u amene kpekebhe lie naali-e, Piele ayie bhúlá, ani atsia apa me: «Ondaise ma, yi mbila hana me Ebhe abhu nani ma bhú ká yi bhutode ngubula me ma akpokpo Bádha Ngali pi okpála inde ne omaYuda ade ko. U dje, amba u bhuka di Ngali angoo. <sup>8</sup> La die, Ebhe inde ambila bua okpála-a, asuno me ni aziba uo anga ani aha Bu Bhobua pi uo maka ani aha nani

di lie pi ní ko. <sup>9</sup> Aní gbo bhṣu ní ne uo de. Aní avulu bua uo anga u abhuka. <sup>10</sup> Mbia inde-e, ka ni yi ngale Ebhe lie ne na'o tili 'ngú pí omabhuka? Engú inde li onguo ogbi ní, abana nganí makpe, ní ti nani da nabi e de-e! <sup>11</sup> A mo-o ade! Engú bini, ní abhuka mangbo me ní akobho maka uo ka bádha bhú 'bu gba Ngámá Yesu.»

<sup>12</sup> Abhomu-o, ndu okpála hana andjili má bulu! U atsia adu adje engú inde li Balanabasi ne Polo adu akpokpo e ko. U adu adje okiaka 'ngú di ne ongu na ngangamba inde li Ebhe amene e bhú dabili bini ne uo bhú ká ogandji okpála ko. <sup>13</sup> U andjia nagama 'ngú lie, Djaki atsia apa me: «Ondaise ma, yi dje nga ma! <sup>14</sup> Simo akpokpo maka li Ebhe amene nani lie nayie li lilita pi okpála inde naao ne omaYuda ade-e, maka ani alo piga bini lie bhú ká uo ngú nakolo piga gba e-o.† <sup>15</sup> La di-e, engú inde li opolofeta apa e aviti bini ne di, anga u aye bhú Bhuku gba Ebhe-e me:

<sup>16</sup> «Pita bhobhomu-o, ma agó matá,  
Ngámá apa moko,  
ngú nayiki eti gba Davidi inde atuko-o.

Ma aléke obili bhende asisiti-e,  
ma atsia líli ngbingbili.

<sup>17</sup> Ndu okpála koko hana aglí ma,  
Ngámá,  
bhú dabili bini ne ndu okpála hana inde nani ma alo o-o.

<sup>18</sup> A bhomu-o eli inde li Ngámá apa nani e ko.  
Ngaani inde i ngamene engú inde ani apa nani e didili-o.†»

<sup>19</sup> Djaki atsia apa matá me: «Kaka-a, ma abhundja me, a ayo nani kpadji pi ogandji okpála inde ngabhuka Ebhe-e de. <sup>20</sup> Engú bini, ní ye mangbo balua pi uo amba ní yo ka uo me, u 'o nazu so 'nu inde u abhelø e pi oebhe na padhá padhá-a ma'o. U 'o nakunda olisi di ne obhosi ngangá ma'o. U 'o di nazu so

'nu inde akpi ne ngute bhú e hana, amba u 'o di nazu ngute ma'o.† <sup>21</sup> Padhá de, anga nani bhutode, bhú ogadhú bini ne bini hana, okpála ngasuno líli gba Moidje. U la di ngatatanga bhú oti nadje líli-e ndu 'kpí naguo hana.»

*Balua pi omabhuka inde naao ne omaYuda ade*

<sup>22</sup> Abhomu-o, obhulu titima gba Yesu ne obhelesi okpála, bhú dabili bini ne ndu okpála na Dadjua gba Ebhe hana, atsia aziba me u gbe okpála koko bhú ká o. U tima uo bhú Atiokia bhú dabili bini ne Polo ne Balanabasi. U atsia alo Djude inde u a'i e me Balasabasi, di ne Sila, okpála bhisi inde li ndu okpála koko hana adu amanga o ko. <sup>23</sup> Balua u atima uo ne e, a ngae inde:

«Obhulu titima gba Yesu di ne obhelesi okpála na Dadjua gba Ebhe, ondaise yi-e, u apa me o yi ondaise o inde naao ne omaYuda ade inde ngadulu bhú Atiokia, bhú Silia di ne bhú Silisia mayi. <sup>24</sup> Ya adje me okpála koko inde ayie bhú ká ya ei-e, ato kpekebhe bhú ká yi ne 'li o, u atsia angbingi bua yi. Engú bini, yi mbila ndjindji me ya tima uo ngaya de. <sup>25</sup> Kaka-a, ya adje liya ne bua bini me ya alo okpála, amba ya tima uo gba yi oo. U anu bhú dabili bini ne ondaise ya na mukunda, Balanabasi ne Polo. <sup>26</sup> Okpála inde aha lio libhomu ngubula kulu gba Ngámá gba ní Yesu Kilisito ko.

<sup>27</sup> Kaka-a, ya atima pi yi Djude ne uo ne Sila, u akpokpo ndu 'ngú hana inde ya aye e si-e pi yi ndjindji. <sup>28</sup> Padhá de, anga Bu Bhobua di ne ya makpe-e, ya abhundja me, a ayo na'o tili 'ngú koko pi yi de, bha bini bhende a ayo me yi mene e ko: <sup>29</sup> yi azú so 'nu inde u abhelø e pi oebhe na eu-o de. Yi azú ngute de. Yi azú

† 15:14 15:14 Tsia bhú Kul. 10:34-48. † 15:18 15:16-18 Tsia bhú Ams. 9:11-12. † 15:20 15:20 Tsia bhú Eki. 34:15-16; di ne bhú Lev. 18:6-20, 17:10-14.

so 'nu inde akpi ne ngute bhú e hana-a de. Yi adú akunda olisi di ne obhosi ngangá de. I du me yi nde alila liyi makpe ne ndu 'ngú bhomu-o hana-a, bhobhomu-o dú ndjindji. Yi du ndjindji.»

<sup>30</sup> Abhomu-o, u aha kpadji pi uo, u atsia agbida bhú Atiokia. Oo, u apo bhúla omabhuka hana, u atsia aha balua pi uo. <sup>31</sup> U atanga balua-o. Ndu uo hana akpi djali naali ka masi inde li balua ango-o ato e bhú uo ko. <sup>32</sup> La-a, li Yuda ne Sila adu di lie ngao makpe opolofeta-a, u agama 'ngú pi omabhuka ngengele ngubula nato masi bhú uo, di ne naha angu pi uo. <sup>33</sup> Mbo pita 'kpí bedi-e, omabhuka atsia a'o uo me u gie lio ne guo 'ngú agba okpála inde atima uo ko. [ <sup>34</sup> \* ] <sup>35</sup> Abhomu-o, Polo ne Balanabasi atigala bhú Atiokia. U atsia adu asuno di ne nakpokpo Bádha Ngali gba Ngámá-a bhú dabili bini, di ne okpála koko bhelé.

### *Polo ne Balanabasi agbo bhusu o*

<sup>36</sup> Pita mbo 'kpí masudha, Polo apa pi Balanabasi me: «Ní gie liní bhú ndu okuti hana inde ní akpokpo nako eli gba Ngámá-a bhú e-o, amba ní mbila maka li omabhuka nde lie oo ko.» <sup>37</sup> Balanabasi adu akunda me o nu bhú dabili bini ne Djaá inde u agisila 'li e me Maloko-o. <sup>38</sup> Engú bini, Polo tsia ziba naha ani de, anga ani a'o nani ká uo bhú Pamifilia. Ani tsia du di matá namene kulu ne uo bhú dabili bini de. <sup>39</sup> U amene kpekebhe sunda o naali. Kaka-a, u atsia agbogbo bhusu o. Abhomu-o, Balanabasi aha Maloko, u a'u bhú zabu, u atsia agbida bhú Sipele. <sup>40</sup> Pita li omabhuka ayo lie me Polo sia bádha bhú 'bu gba Ebhe-e, ani aha Sila, ani atsia atapa. <sup>41</sup> Ani apu bhú ndu doto na Silia di ne Silisia. Ani atsia adu nateteke omabhuka na oDadjua gba Ebhe-o.

\* **15:34** 15:34 Lukuluku inde-e, a bhú obhuku koko na didili u aye e bhú eli na giliki ade. [Engú bini, Sila atsia au ndjindji me ní tigala ne ani oo.] \* **16:3** 16:3 'Dyi Timoté nani ne maYuda ade. Kaka-a, Timoté li nga nani bhú gandja kalanu de.

## 16

### *Timoté anu bhú dabili bini ne Polo di ne Sila*

<sup>1</sup> Abhomu-o, Polo akolo bhú Delebe, pipita-a, bhú Lisitele. Mukpata bini adu nani oo, a adu 'li ani me Timoté. 'Hi ani adu ne maYuda inde abhuka Ebhe. Engú bini, 'dyi ani nani naae ne Giliki. <sup>2</sup> Omabhuka na Lisitele di ne Ikoniomu adu apa 'ngú gba ani-e ndjindji naali. <sup>3</sup> Polo adu akunda me ni ha ani ngú nadhaku bhú dabili bini ne ani. Ani aha ani, ani atsia ato ani bhú gandja. Ani amene nani mo-o ka omaYuda inde adu oo, anga ndu okpála hana adu ambila ndjindji me 'dyi Timoté nani ne Giliki.\* <sup>4</sup> Bhú ndu ogudhu inde u adu apu bhú e hana-a, u adu akpokpo pi omabhuka líli inde li obhulu titima gba Yesu di ne obhelesi okpála na Yelusalema aha e-o. U atsia adu ayo ka uo me u mene líli ango-o ko. <sup>5</sup> ODadjua gba Ebhe-e adu akolo kpekpeke bhú nabhuka. Alo gba omabhuka atsia adu abe ndu e ndu 'kpí hana.

### *Polo apu bhú Adjia*

<sup>6</sup> La li Bu Bhobua ayoko uo lie me u akpokpo 'ngú gba Ebhe bhú ndu doto na Adjia de-e, u atsia apu bhú ndu doto na Filidjia di ne Galatia. <sup>7</sup> U akolo lie de ndu doto na Misia-a, u adu ale nanu bhú Bitinia. Engú bini, Bua gba Yesu atsia ayoko uo. <sup>8</sup> Abhomu-o, u agulu Misia, u atsia ake bhú gudhu na Tuluasi. <sup>9</sup> A akolo lie sukpe-e, Polo au engú maka loto: kpála bini na Makedonia alu kala ani. Ani atsia adu akikiliki lie pi ani me: «Kodho 'ngbé 'ngu-o, nu bhú Makedonia, amba mu teteke ya!» <sup>10</sup> Pita engú inde li Polo au e, ya agili bha kolo má gala me ya anu bhú Makedonia. Padhá de, anga ya ambila na paká me Ebhe a'i ya ngú nakpokpo Bádha Ngali pi okpála na kuti ango-o.

### *U akolo bhú gúdhú na Filipoi*

<sup>11</sup> Ya a'ụ bhú zabụ bhú Tụlụasi, ya anụ ngingbili bhú Samutalasi. Li ekpí aseke lie, ya atsia anụ bhú Neapolisi. <sup>12</sup> Ya ayie lie oo, ya atsia akolo bhú gúdhú na Filipoi, gina kuti na ndu doto na Makedonia inde adụ sa oLoma-o . Ya amene mbo ekpí bhelé bhú gúdhú ango-o. <sup>13</sup> Bhú 'kpí nago gba omaYuda-a , ya akoto bhú gúdhú ngú nanụ ali ngo 'ngu. Padhá de, anga ya adụ abhundja me dabili gba omaYuda ngú nayo Ebhe oo. Ya adụ kuto, ya atsia akpokpo 'ngú pi olisi inde apokobhọ bhúla o oo. <sup>14</sup> A adụ 'li suka olisi ango-o me Lidia. Aní ayie nani bhú gúdhú na Tiatile. Aní adụ nani atsindji ombembe obongo na mase naali. Aní adụ nani adhogọ Ebhe. Maka aní adụ adje ya lie, Ngámá atsia abhulu bua aní ngú nabhuka engú inde li Polo adụ apa e-o. <sup>15</sup> Abhomụ-o, aní atsia asia batisimo bhú dabili bini ne piga gba e-o. Pipita-a, aní atsia ayo ka ya me: «I dụ me yi nde au me ma abhuka Ebhe kuku-o, yi de go dụ gba ma.» Aní atsia agbite ya ne kpéke ngú naziziba.

### *U aholo Polo ne Sila*

<sup>16</sup> Ekpí bini, ya adụ anụ lie li bili nayo Ebhe-e, ndili na oelọ bini na kulu ago abhaka ya. Bua na madhoko adụ bhú aní. Aní atsia adụ asia tia pi omakulasi e naali. <sup>17</sup> Ngaya ne Polo-o, aní aholo akpata ya. Aní atsia adụ asusula me: «Okpála inde-e, a ko okpála na kulu gba Ebhe Apí 'Kpí! U ngasuno pi yi kpadji na mukobho.» <sup>18</sup> Aní amene engú ango-o ngubula ekpí bhelé. Li engú ango-o andala Polo lie naali-e, aní adji lie, aní atsia apa pi bua ango-o me: «Ne 'li Yesu Kilisito , ma apa pi mụ me: koto bhú aní!» Abhomụ-o, bua na madhoko ango-o atsia akoto bha kolo bhú aní bhú nedhinga ango-o. <sup>19</sup> Li omakulasi aní au lie me o sía matá tia ka aní de-e, u aholo Polo ne Sila, u atsia agbele uo bhú mbadhasu kala okpála nakodho 'ngú. <sup>20</sup> U atsia anụ

ne uo kala ongámási na Loma, do uo de-e: «Okpála inde-e, a ko omaYuda. U ngato mbedhembede bhú gúdhú gba ya-o. <sup>21</sup> U ngasuno ongú. La-a, líli gba ní okpála na Loma ziba nasia ongú ango-o ne namemene de.»

<sup>22</sup> Abhomụ-o, ndụ okpála hana atsia abi di 'gú ne uo. Ongámási aha líli me u pandja bongo li kute uo, amba u bhi uo ne fimbo. <sup>23</sup> Pita u abhi uo lie ne fimbo naali-e, u atsia abhike uo bhú tikpụ. U atsia aha líli pi mulila na tikpụ-o me aní lila uo ndjindji. <sup>24</sup> Li mulila asia líli ango-o lie, aní ato uo bhú tina tikpụ bhe na tutu-o. Aní atsia atoto 'dhụ uo bhú kpekpe.

### *Polo ne Sila aze bhú tikpụ*

<sup>25</sup> Masikpe de tutu sukpe-e, Polo ne Sila adụ ayo Ebhe di ne nadhogọ aní bhú etsi. Okpála koko na tikpụ-o adụ adje uo. <sup>26</sup> Má gala kolo me-e, doto adyiki ne adjigidjo na ngbéngbé má djigi djigi, masikpe de me tikpụ-o tuko kuto! Ndụ obhoti na tikpụ-o hana akolo abhubhulu lie. Ogbindjili inde u agbigbite ndụ okpála hana na tikpụ-o ne e-e, atsia abhubhulu di lie.

<sup>27</sup> Li mulila agbungbua lie lie tila-a, aní au me ndụ obhoti-e hana baba. Abhomụ-o, aní agbe mbotia me ni ngabhọlọ lini ne di, anga aní adụ abhundja me ndụ okpála na tikpụ-o hana akpekpe. <sup>28</sup> Engú bini, Polo atsia asula pi aní kpekpeke me: «Mo oméne limụ sisiti de, anga ndụ ya hana bha si!» <sup>29</sup> Abhomụ-o, mulila-a ayo eke, aní ali kolo má gala abhú 'ti me aní nde ngaguku ka tsulụ má kpi kpi kpi! Aní atsia ati bhú li 'dhụ Polo ne Sila. <sup>30</sup> Pipita-a, aní apandja uo kilidjo. Aní atsia ayi uo me: «Odyi ma, a ayo me ma mene pi ngubula me ma kobho?»

<sup>31</sup> U atsia agie pi aní me: «Bhuka Ngámá Yesu, amba mụ kobho, ngamụ di ne piga gba mụ-o hana.» <sup>32</sup> Abhomụ-o, u atsia akpokpo eli gba Ngámá Ebhe-e pi aní, di ne pi ndụ okpála hana inde adụ bhú 'ti gba

ani-o. <sup>33</sup> Bha sukpe bhomu-o, mulila na tikpu-o abha uo, ani atsia avulu oeka gba uo-o. Pipita-a, ani asia bha kolo batisimo má gala, bhú dabili bini ne okpála gba e hana. <sup>34</sup> Pipita-a, ani anu ne uo agba e. Ani atsia aha ezu pi uo. Ngaani ne piga gba e-e, u akpi djali naali, anga u abhuka Ebhe.

<sup>35</sup> Li ekpi aseke lie, ongámasi gba okpála na Loma atima okpála me u nu pa pi mulila na tikpu-o me: «Pandja okpála bhomu-o bhú tikpu-o, amba mu 'o uo, u gbida.»

<sup>36</sup> Abhomu-o, mulila atsia ago apa pi Polo me: «Ongámasi atima eli me ma apandja yi bhú tikpu papandja. Yi zeze, amba yi nu ne guo 'ngú .»

<sup>37</sup> Do Polo pi okpála ango-o me: «Ya ne okpála na Loma! U aha líli me u bhi ya bhú ká djila okpála me u nde kpokpo 'ngú li 'ngú gba ya-a de. U abhike ya bhú tikpu. La mbia inde-e, u ngakunda napandja ya bhú pepe? Belegu de bini, u go gbegbe bha ya ngao makpe!» <sup>38</sup> Okpála ango-o atsia anu apa eli ango-o pi ongámasi na Loma. Li ongámasi na Loma adje lie me Polo ne Sila a ko okpála na Loma-a, u atsia adje tsulu. <sup>39</sup> Abhomu-o, ongámasi ago nakiliki lio pi uo. U atsia ayo ka uo me u yie bhú kuti ango-o yiyie. <sup>40</sup> Li Polo ne Sila aze lie bhú tikpu-o, u atsia anu agba Lidia. Pita u au omabhuka lie, u ato masi bhú uo, u atsia agbida.

## 17

### *Polo ne Sila bhú gudhu na Tesalonike*

<sup>1</sup> Li Polo ne Sila agulu gudhu na Afipolisi ne Apolonia lie, u atsia akolo bhú gudhu na Tesalonike. A bhomu-o bili inde li omaYuda adu ne eti naje líli gba Moidje lie ko. <sup>2</sup> Polo amene maka ani amemene lie-o. Ani adu anu abhaka uo bhú 'ti naje líli-e ngubula poso bata bhú 'kpi nago gba omaYuda-o . Ani atsia adu amene kpekebhe ne uo pindji Bhuku gba Ebhe-o . <sup>3</sup> Ani adu

abhulu tata pi uo mbámbá, di ne nasuno pi uo me bhuku apa me a ayo me Kilisito zu likabhu, amba ani zuku. Ani adu apa pi uo me: «Yesu inde ma ngakpokpo 'ngú gba e pi yie, a ko Kilisito ngae.» <sup>4</sup> Okpála koko bhú ká uo abhuka, u atsia akpata Polo ne Sila. OGiliki bhelé, inde adu adhoghe Ebhe-e, amene bhadi moko bhú dabili bini ne bhiti olisi inde adu ne tia naali-o.

<sup>5</sup> Engú bini, omaYuda abi 'gú naali. U abha okpála koko na sisiti inde adu adjakadha li okpadi, u apokobhe bhúla uo. U agbe tolo bhú ká okpála, u atsia ato mbedhembedhe bhú 'ndji okpála bhú gudhu. U anu nagili Polo ne Sila bhú 'ti gba Djasone ngubula me o gbe uo kala okpála na kuti bhomu-o. <sup>6</sup> U bhaka la uo lie de-e, u aha Djasone di ne omabhuka koko, u atsia anu ne uo kala ongámasi. U aholo asusula me: «Okpála inde angbingi 'ndji okpála pila doto libhomu. Mbia inde-e, u akolo ibili si! <sup>7</sup> Djasone asia uo agba e! Ndu uo hana ngayala namene líli gba 'ngbé ngámá Kaisala . U ngapa me ngámá koko uu! A 'li ani me Yesu.» <sup>8</sup> Li bhiti okpála di ne ongámasi na kuti ango-o adje eli ango-o lie, bua uo atsia ake. <sup>9</sup> Pita li Djasone di ne okpála koko akakala lio lie ka uo, u atsia atse 'kpa li uo.

### *Polo ne Sila bhú gudhu na Belaya*

<sup>10</sup> A akolo lie sukpe-e, omabhuka anu a'o bha kolo Polo ne Sila bhú Belaya má gala! U akolo lie oo, u atsia ali bhú 'ti naje líli gba Moidje-o. <sup>11</sup> Okpála ango-o adu ne bádha bua nane okpála na Tesalonike. U asia eli gba Ebhe-e ne gugumu naali. Ndu 'kpi hana, u adu atsia 'kpi bhú Bhuku gba Ebhe ngú nambila me ongu ango-o, a ko 'ngú na paká. <sup>12</sup> Abhomu-o, okpála bhelé bhú ká uo atsia abhuka. Olisi na Giliki inde adu ne tia naali-e abhuka. Bhiti obhosi inde adu oo atsia abhuka di. <sup>13</sup> Engú bini, li omaYuda na Tesalonike adje lie me

Polo ngakpokpo eli gba Ebhe-e di bhú Belaya-a, u atsia ago di oo. U ato mbedhembedhe bhú ká okpála bhomu-o, u atsia angbingi di 'ndji uo. <sup>14</sup> Abhomu-o, omabhuka anu bha kolo a'o Polo me ani nu ali ngo 'ngbé 'ngu. Engú bini, Sila ne Timoté atsia atigala naao abhú Belaya. <sup>15</sup> Obhende anu na'o Polo-o, u akolo ne ani bhú gudhu na Atene. Pipita-a, u adu agie lio lie, Polo atsia atima eli me Sila ne Timoté kpata ni má gala! U atsia agbida.

### *Polo akolo bhú gudhu na Atene*

<sup>16</sup> Bhú nedhinga li Polo adu adjeke Sila ne Timoté lie bhú Atene-e, ani au me gudhu ango-o abedhe ne oebhe na eu bedhe. Kaka-a, bua ani adu ne likabhu naali. <sup>17</sup> Abhomu-o, ani adu amene kpekebhe ne omaYuda di ne okpála koko inde adu adheghe Ebhe bhú 'ti nadjelili gba Moidje-o. Ndu 'kpi hana, ani adu amene bhadi moko ne okpála inde ani adu akhe lie ne o oo. <sup>18</sup> Okpála na imbilangu koko oEpikulo\* ne oSatua† adu di agama 'ngú ne ani. Okoko adu ayi me: «Bhulu agelhe inde-e ngapa-e pi?» Li okpála koko adje Polo ngakpokpo 'ngú pindji Yesu di ne nazuku ka anie lie, u atsia adu apa me: «A amana mugito me ani ngasuno bhomu-o oebhe na gandji gandji.»

<sup>19</sup> Abhomu-o, u aholo ani, u anu ne ani kala okpála inde adu atsia 'kpi li 'ngú na gudhu na Atene-o. U adu a'i uo me Aliopadje.‡ U atsia apa pi ani me: «Ya ti da nambila engú na mbia inde mu ngasuno e uu? <sup>20</sup> Ya akunda nambila tata-o. Padhá de, anga mu ngandala 'dje ya ne ndu 'ngú na gandji gandji.» <sup>21</sup> (Ndu okpála na Atene hana di ne okpála na gandji gandji inde adu nadu oo, adu abhele

nedhinga gba o-o bha li nakpokpo 'ngú di ne nadjengú na mbia.)

<sup>22</sup> Abhomu-o, Polo ayie bhú lá tu Aliopadje-o, ani atsia apa me: «Ngayi okpála na Atene, ma au me yi kpekpeke li engú gba oebhe ane ndu 'ngú hana. <sup>23</sup> Padhá de, anga ma adu adhuku lie bhú gudhu gba yi-e, ma atsia okulu oebhe gba yi-o. Ma au belegu bili bini inde u ngatsulu enu lie pi Ebhe. U aye tété me: <Pi EBHE INDE YA AMBILA E DE.> A moko, ma ago asuno pi yi ebhe inde yi ngadhege e me yi nde mbila e de ko. <sup>24</sup> Ebhe inde abho doto di ne ndu 'he inde bhúbhú-o hana-a, a ko Ngamá na abhú lá di ne Ngamá na doto. Ani dadu bhú oeti inde li okpála ayiki e ne 'kpa o-o de. <sup>25</sup> Ani ne gumu ade me okpála mene ehe pi ni-e de, anga ani ne gumu 'he bini ade. Ani ngaha mukobho, ewo di ne ndu 'he koko pi ndu okpála hana ngae. <sup>26</sup> Ani abho kpála bini inde li ndu opiga hana aze bhú e-e ngae. Ani atsia abu uo píla doto libhomu. Ani agbo bhusu kalanga ne gbokokpi. Ani atsia akokodho okozie li bili inde ayo me u sili kuti lie ko.

<sup>27</sup> Ebhe amene mo-o ngubula me okpála gili ni amba u le nau ni, i du me u nde ti da nau ni uu ko. A na paká me Ebhe de ní bini ne bini tsutsu ade. <sup>28</sup> Padhá de, anga ani ngaha mukobho ne angu ngú namene ehe di ne maka ní nde lie pi ní ngae. La di maka li okpála koko na etsi gba yi-e apa lie me: <Ní di ne ongisi gba ani.> <sup>29</sup> La-a, ka ní nde lie ne ongisi gba Ebhe-e, a ayo nabhundja de me Ebhe maka ebhe na padhá u abho e li olo, li aladja di ne teme-e de. A ayo la di nabhundja de me Ebhe maka ebhe inde akoto li kulu di ne mabhundja gba kpála-a

\* **17:18** 17:18 OEpikulo: A ko nani omukpata gba Giliki bini inde adu 'li e me Epikulo. Ani adu asuno me engú na ngéngbé bhú mukobho gba kpála, a ko nadu ndjindji, nadu ne likabhu de.  
† **17:18** 17:18 OSatua: A ko nani omukpata gba Giliki bini inde adu 'li e me Djeno. U adu nani nau engú nadu bhú djali bhú djila o padhá. U atsia adu bha bini akpata 'ngú pindji imbilangu inde bhú kpála.  
‡ **17:19** 17:19 Aliopadje: A adu nga nani kalanu 'li eta inde li okpála ango-o adu apekebhe bhúla o pí e-o.

de.

<sup>30</sup> Nani-e, okpála dɔ ambila Ebhe de. Aní tsia matá 'kpí lí nedhinga ango-o de. Engú bini mbia inde-e, aní nga'i ndɔ okpála hana ne ndɔ bíli hana me u dji bua o. <sup>31</sup> Padhá de, anga aní a'o ekpí bini inde aní akódho 'ngú gba okpála na doto libhomu lie ngbingbili ko. Aní abhɔ kpála bini inde akódho 'ngú ango-o. Aní asuno engú ango-o pí ndɔ okpála hana lí nedhinga inde aní azuku kpála ango-o lie ko!»

<sup>32</sup> U adje Polo lie apa me okpála inde amu-o azúku mazuku-o, u aholo amɔ aní. Okoko atsia apa me: «Ya adjé nga matá mɔ pindji 'ngú ango-o lí 'kpí koko.» <sup>33</sup> Abhomɔ-o, Polo atsia a'o ká uo. <sup>34</sup> Abana mo-o, okpála koko aziba aní, u atsia abhuka. Bhú ká uo adɔ nani Denisi, sɔka okpála na Aliopadje, ne ɔlɔ bini inde adɔ 'lí e me Damalisi di ne okpála koko.

## 18

### *Polo akpo lita Dadjua na gɔdhu na Kolito*

<sup>1</sup> Pipita-a, Polo ayie bhú gɔdhu na Atene, aní atsia atapa bhú gɔdhu na Kolito. <sup>2</sup> Oo, aní abhaka maYuda bini, a adɔ 'lí aní me Akuila, kpála na ndu doto na Pote. Ngaani-e, aní ayie nani bhú Itali, bhú dabili bini ne wala e Pilisila, anga 'ngbé ngámá Kolode aha nani líli me ndɔ omaYuda hana ze bhú Loma maze. Abhomɔ-o, Polo atsia anɔ nabhaka uo. <sup>3</sup> Aní adɔ la lie amene ngua kulu bini ne uo (u adɔ abho eti inde u a'i e me 'ti ngbangbali), aní adɔ nadɔ agba uo, u atsia adɔ amene kulu bhú dabili bini. <sup>4</sup> Polo adɔ nasuno eli gba Ebhe-e bhú ndɔ 'kpí naguo gba omaYuda hana bhú eti nadje líli gba Moidje-o. Aní atsia adɔ di namene ne kpéke me omaYuda di ne oGiliki ziba 'lí ni.

<sup>5</sup> Lí Sila ne uo ne Timoté ayie lie bhú ndu doto na Makedonia, u atsia akolo bhú gɔdhu na Kolito. Polo aha nedhinga gba e hana ngú

nakpokpo Bádha Ngali gba Ebhe-e pí okpála. Aní adɔ asuno pí omaYuda me Yesu ne Masiya. <sup>6</sup> Engú bini, omaYuda adɔ ayayala, u atsia adɔ di nasobho Ebhe. Abhomɔ-o, aní apulu doto lí bongo gba e, aní atsia apa pí uo me: «A ayo me ngute gba yi-e, tuko pí 'ndji yi. A ko matá naama 'ngú de. Nayie pí mbia inde-e, ma anú ibili agba ogandji okpála.» <sup>7</sup> Abhomɔ-o, Polo ayie oo, aní atsia anɔ agba kpála bini inde lí 'lí e adɔ me Tito Djusitusi. Kpála ango-o adɔ kpála nadhɔgɔ Ebhe. Kuti gba aní e adɔ de eti nadje líli gba Moidje-o. <sup>8</sup> Kilisipisi, ngámá na eti nadje líli-e, abhuka Ebhe di ne piga gba e libhomu. Okpála bhelé na gɔdhu na Kolito adje Polo lie, u abhuka, u atsia asia di batisimo.

<sup>9</sup> Ekpí bini sukpe-e, Ebhe apa pí Polo bhú ehe maka loto me: «Mo odjé tsulɔ de. Engú bini, dɔ bha nagama 'ngú, mo ondjíli má bulu de. <sup>10</sup> Padhá de, anga ma bhú dabili bini ne mɔ. Kpála bini bú 'kpa e lí mɔ ngú namene mɔ sisiti de, anga okpála gba ma bhú gɔdhu inde-e bhelé.» <sup>11</sup> Abhomɔ-o, Polo asi bhú gɔdhu na Kolito oo kalanga bini ne epe madhia. Aní adɔ asuno eli gba Ebhe-e pí ndɔ okpála hana.

### *OmaYuda asungula Polo pí ongámási*

<sup>12</sup> Bhú nedhinga inde lí okpála na Loma a'o Galio lie ngámá na ndu doto na Akai-e, omaYuda adje lío bhú dabili bini me o mene Polo sisiti. Abhomɔ-o, u atsia agbe aní kala okpála nakodho 'ngú. <sup>13</sup> Do uo de me: «Kpála inde ngagili nagbele okpála ngú nadhɔgɔ Ebhe lí kpadji bhende lí líli ziba e de.» <sup>14</sup> Lí Polo di me gama 'ngú lie, Galio atsia apa pí omaYuda me: «Ngayi omaYuda-a, i dú iginí me kpála inde-e bhéle kpála, aní méne di engú na sisiti naali-e, ma de adje yi ndjindji. <sup>15</sup> La-a, i nde lie me yi nde ngamene kpekebhe pindji oeli ne o'ili di ne líli gba yi makpe-e, atsia bha-a yi!



Ma akunda naama nakodho 'ngú li ngua 'ngú bhomu-o de!» <sup>16</sup> Ani atsambala uo li bili nakodho 'ngú-o. <sup>17</sup> Abhomu-o, ndu uo hana aholo Sosetene, ngámá na eti nadjé líli gba Moidje, u atsia aholo nabhi ani bhú mbadhasu li bili nakodho 'ngú-o. Engú bini, Galio adu bha au 'ngú ang-o bhú djila e padhá.

### *Polo agie lie bhú gudhu na Atiokia*

<sup>18</sup> Polo adu matá mbo ngengele bhú gudhu na Kolito. Pipita-a, ani a'o ká omabhuka, ani a'u bhú zabu, ani atsia atapa bhú ndu doto na Silia bhú dabili bini ne Pilisila di ne Akuila. Kala me ani 'u bhú zabu-o, u aka ngaiza 'ndji ani bhú gudhu na Sekele, anga ani asili nani ndjinga me ni aha lini pi Ebhe. <sup>19</sup> U akolo bhú gudhu na Efeso. Oo, Polo a'o ká Pilisila ne Akuila. Ani ali bhú 'ti nadjé líli gba Moidje, ani atsia adu akpokpo 'ngú ne omaYuda.

<sup>20</sup> La-a, u ayo ka ani lie me o du nga matá mbo ne ani ngengele-e, ani atsia ayala. <sup>21</sup> Engú bini, nedhinga inde ani adu a'e ne enú lie, ani atsia apa me: «I du me Ebhe nde akunda-a, ma agó matá agba yi mago.» Ani a'u bhú zabu. Ani ayie bhú gudhu na Efeso, <sup>22</sup> ani atsia atapa bhú gudhu na Sedjale. Oo, ani a'u bhú gudhu na Yelusalema ngú nabhana lie pi omabhuka. Pipita-a, ani atsia aké bhú gudhu na Atiokia. <sup>23</sup> Ani abhue oo mbo ekpí bedi, abhomu-o, ani atsia atapa. Ani agulu ndu doto na Galatia ne ndu doto na Filidjia me ani nde ngato masi bhú omabhuka.

### *Apolosi anu bhú gudhu na Efeso, di ne bhú gudhu na Kolito*

<sup>24</sup> MaYuda bini akolo bhú gudhu na Efeso, a adu 'li ani me Apolosi, kpála na gudhu na Alekidjandili. Ani mbila nani nagama 'ngú ndjindji. Ani mbila di nani Bhuku gba Ebhe-e ndjindji. <sup>25</sup> U asuno nani kpadji gba Ngámá pi ani ndjindji. Ani adu ne bua na masi, ani atsia adu akpokpo di ne nasuno engú

pindji Yesu ngbingbili. Engú bini, ani ambila bha nani naae batisimo gba Djaa-o.

<sup>26</sup> Abhomu-o, ani aholo nakpokpo 'ngú ang-o bhú 'ti nadjé líli gba Moidje. Ani du ne tsulu de. Li Pilisila ne Akuila adje engú ani apa e lie, u aha ani, u anu ne ani. U atsia asuno kpadji gba Ebhe-e pi ani ndjindji. <sup>27</sup> Pipita-a, Apolosi adu akunda nanu bhú ndu doto na Akai. Abhomu-o, omabhuka ato masi bhú ani, u atsia aye balua pi omabhuka na ndu doto ang-o me, u sia ani ndjindji. Ani akolo lie oo, ani ateteke okpála inde abhuka ka bádha bhú 'bu gba Ebhe-e ndjindji naali. <sup>28</sup> Padhá de, anga ani adu asuno mbámábá ne angu hana bhú ká djila ndu okpála hana me omaYuda li ngbili kpadji ade. Ani atsia adu apana pi uo bhú Bhuku gba Ebhe-e me Yesu ne Masiya.

## 19

### *Polo akpokpo 'ngú gba Ebhe-e bhú gudhu na Efeso*

<sup>1</sup> Nedhinga li Apolosi adu lie bhú gudhu na Kolito-o, Polo agulu ndu doto na ndu ká eta na Adjia, ani atsia akolo bhú gudhu na Efeso. Ani abhaka omukpata koko oo. <sup>2</sup> Ani atsia ayi uo me: «Yi akolo omabhuka lie, yi asia Bu Bhobua uu?» U atsia agie pi ani me: «Ya adje nga engú pindji Bu Bhobua belegu de bini.» <sup>3</sup> Abhomu-o, Polo atsia ayi uo me: «Yi asia la mangua batisimo dho?» U agie pi ani me: «Batisimo bhende gba Djaa ko.» <sup>4</sup> Polo atsia apa pi uo me: «Djaa adu abatisa okpála inde adu aziba nadjé bua o. Ani atsia adu apa pi okpála na Isalaele me: «Yi bhuka kpála inde ngago pita ma ko.» A akunda napa me Yesu.» <sup>5</sup> U adje engú bhomu-o lie, Polo atsia abatisa uo ne 'li Ngámá Yesu. <sup>6</sup> Pipita-a, ani a'o 'kpa e pí 'ndji uo, u atsia asia Bu Bhobua. U aholo agama 'ngú bhú odikongu koko di ne nakpokpo 'ngú maka opolofeta

. 7 Ndụ obhosi bhomụ-o hana adu masikpe de ndjikpa ne ká bhisi.

8 Polo adu ali piko bhú 'ti nadjé líli gba Moidje , sùnda epe bata, aní dū akpokpo 'ngú pindji Nau gba Ebhe-e ne tsulú de. Aní atsia adu amene ne kpéke ngubula me okpála bhuka Yesu. 9 Engú bini, okpála koko adu ne kpéke 'ndji. U ayala nabhuka . U atsia adu apa sisiti 'ngú li kute okpála inde adu akpata kpadji gba Yesu-o kala ndu okpála hana. Abhomụ-o, Polo a'o ká uo, aní anu ne omukpata-a bhú 'ti balua gba Tulanisi. Oo, aní atsia adu asuno pi uo ndu 'kpí hana. 10 Aní amene mo-o ngubula kalanga bhisi. Abhomụ-o ndu okpála hana na ndu doto na Adjia, omaYuda di ne oGiliki, atsia adje eli gba Ngámá-o.

*Engú inde akolo li ongisí na obhosibhosi gba Seva*

11 Ebhe adu amene ongamba 'ngú na ngbengbengbe pi okpála bhú Polo. 12 Kaka-a, okitambala di ne obongo inde atunu lie li kute Polo-o, u adu ago ne di, a'o'o li kute okpála na kuo. Abhomụ-o, okpála na kuo angoo adu akobho, osisiti bua atsia adu di aze bhú uo.

13 OmaYuda koko, inde adu anu li obili koko hana ngubula napandja osisiti bua bhú okpála-a, ale di napandja osisiti bua ne 'li Ngámá Yesu. U adu apa pi osisiti bua angoo me: «Ma aha líli pi yi ne 'li Yesu, inde li Polo ngakpokpo 'ngú gba e me, yi zeze.» 14 Ongisí na obhosibhosi mananika gba Seva, sùka 'ngbé dimandè bini gba omaYuda-a adu amemene moko. 15 Engú bini, siti bua-a agie pi uo me: «Ma mbila Yesu hana. Ma mbila la di hana me Polo ne da-ie. Ngayi-e, yi la naayi ne oda?»

16 Abhomụ-o, kpála inde li siti bua adu bhú e, ati pi uo ne gbele, angu gba aní ane bhende gba uo-o mane. Aní amene uo sisiti naali. Kaka-a, u atsia aze bhú 'ti angoo ndumbu di ne oeka li kute o. 17 Ndụ okpála

na gudhu na Efeso hana, omaYuda di ne oGiliki, adje engú angoo. Ndụ uo hana adje tsulú naali. Abhomụ-o, u atsia adhögè 'li Ngámá Yesu. 18 Bhiti okpála inde abhuka adu ago ambamba ta osisiti 'ngú inde u amene e ko. 19 Bhelé bhú ká uo adu obhulu mambengụ. U ago ne obhuku gba o-o, u atsia atsulu kala ndu okpála hana. U ako masemase-e lie, u atsia au me a akoto olí falanga kutu ndjikpa bhuluvue. 20 Abhomụ-o, ka angu gba Ngámá-a, eli-e adu ayangba, atsia adu akolo kpekpeke.

*Tolo akoto bhú ká okpála na gudhu na Efeso*

21 Pita ongú bhomụ-o, Polo atsia abhundja me ní gulu ondu doto na Makedonia di ne Akai ngú nanu bhú gudhu na Yelusalema. Aní adu apa me: «I dū me ma nde akolo oo, a ayo me ma akolo di bhú gudhu na Loma .» 22 Abhomụ-o, aní atima okpála bhisi bhú ká okpála inde adu ateteke aní-e, Timoté di ne Elasiite, bhú gudhu na Makedonia. Engú bini, aní atsia adu mbo matá naae bhú ndu doto na Adjia ngubula nedhinga bedi.

23 Bha li nedhinga bhomụ-o, tolo na ngbéngbé atsia akoto bhú gudhu na Efeso pindji kpadji gba Ngámá Yesu-o. 24 Kpála bini adu oo, a adu 'li aní me Demetiliusi. Aní adu abho djedje kulu eti gba ebhe na ølø Alatemi li teme inde u a'i e me aladja. Okpála na kulu angoo adu asia tia tété naali.

25 Abhomụ-o, aní apo bhúla uo bhú dabili bini ne okpála inde adu amene di ngua kulu angoo. Aní atsia apa pi uo me: «Ondaise ma, yi mbila ndjindji me ní ngakobho ka kulu inde. 26 Yi ngauu, yi la di ngadjedje, engú li Polo inde-e ngamene e-o. Aní ngapa me oebhe inde li okpála amene e ne 'kpa-a, a ko oebhe de. Aní agbele okpála nganda e bhelé. Aní mene mo-o, bha bini bhú gudhu na Efeso sii de, engú bini, masikpe de bhú ndu

doto na Adjia libhomu. <sup>27</sup> Eli ango-o ti da nasiti bha bini kulu gba ní-e de, engú bini, a ti da nayaka di sa eti gba 'ngbé ebhe na øelø Alitemi. Abhomu-o, li okpála 'ó nadhøgø Alitemi, ebhe na øelø inde li okpála na ndu doto na Adjia di ne pála doto libhomu ngadhøgø e-o.»

<sup>28</sup> Li okpála inde adu oo adje engú bhomu-o lie, u abi 'gú naali. U atsia aholo nasusula me: «Alitemi gba okpála na gudhu na Efeso-o ngebéngbé!» <sup>29</sup> Abhomu-o, tolo aha gudhu libhomu. U aholo Gayusi, ngauo ne Alisitaluka, okpála bhisi na gudhu na Makedonia inde adu adhuku bhú dabili bini ne Polo-o. U atsia anu ne uo bhú holo li bili li okpála apøkøbhe bhúla o lie ko. <sup>30</sup> Kaka-a, Polo me ni ngakoto kala ndu okpála hana, engú bini, omukpata atsia ayoko ani. <sup>31</sup> Okpála koko di na ndu doto na Adjia inde adu akunda ani-e, atima eli pi ani me, ngaani makpe-e, ani anú li bili li okpála apøkøbhe bhúla o lie de.

<sup>32</sup> Li nedhinga ango-o, tolo adu naali. Abhomu-o, okpála dje lio de. Okoko adu asusula ne engú kpi, okoko atsia adu di asusula ne engú koko. Bhelé na uo du ambila ta 'ngú inde u apøkøbhe bhúla o ngú e de. <sup>33</sup> Okpála koko bhú ká bhiti okpála bhomu-o, akpokpo pi Alekidjandele inde adu bhú ká uo-o, u atsia adyudyo ani ne akalanu. Abhomu-o, ani a'e 'kpa e bhúlá, ngubula nasuno me ni ngakunda nagama 'ngú kala okpála. <sup>34</sup> Engú bini, li okpála ambila lie me a ko maYuda-a, ndu uo hana aholo asusula bhú dabili bini ngubula nedhinga masakpe de saa bhisi me: «Alitemi gba okpála na gudhu na Efeso-o ngebéngbé!»

<sup>35</sup> Ali soso-o, ndombi bini na gudhu ango-o ayoko uo, ani atsia apa me: «Ngayi okpála na gudhu na Efeso-o, ndu okpála hana mbila ndjindji me gudhu na Efeso ngalila

'ti ebhe gba 'ngbé ebhe na øelø Alitemi, di ne kulu ani inde ayie nani abhúlá atsia ati kuto-o. <sup>36</sup> Kpála bini ti da nayayala de. Kaka-a, a ayo me yi 'o bua yi kuto. Yi améne 'ngú bhú holo de.

<sup>37</sup> Yi ago ne okpála inde-e ei. Ngauo-o, u zi 'he bhú 'ti ebhe na øelø gba ní-e de. U tsia sobho la di ani de. <sup>38</sup> I du me Demetelisi ne okpála na kulu gba e nde ne engú sunda o ne kpála bini-e, a ne oekpi di ne ongámási ngú nakodho 'ngú ango-o. A bhomu-o bili inde a ayo me u nu kpokpo 'ngú sunda o lie ko. <sup>39</sup> I du me a nde matá ne engú koko inde a ayo me u gama 'ngú lie, ya apøkøbhe bhúla ya maka li lili apa lie, ya tsia kpokpo 'ngú tété. <sup>40</sup> Atigala bedi me u pa li ní me, ní ngaha kpéke 'ndji pi okpála li 'ngú inde akodho 'kpi naki-o. Padhá de, anga tata li napøkøbhe bhúla ní me-e ade. Ní ti la di da nakpokpo 'ngú tété pi okpála ndjindji de.» [ <sup>41</sup> \*]

## 20

### *Polo ayie bhú gudhu na Efeso*

<sup>1</sup> Li tolo andjia lie, Polo a'i omukpata-o, ani atsia ato masi bhú uo. Pipita-a, ani abhana lie pi uo, ani atsia atapa bhú ndu doto na Makedonia. <sup>2</sup> Ani agulu ndu doto ango-o, ani ato masi bhú omabhuka ne oeli bhelé. Pipita-a, ani atsia akolo bhú ndu doto gba oGiliki. <sup>3</sup> Oo, ani asi epe bata. Li nedhinga inde ani adu akunda lie naha 'ngbé zabu ngú nanu bhú ndu doto na Silia, ani adje me omaYuda apo bhúla o ngú namene ni sisiti. Abhomu-o, ani atsia au ndjindji me ni gie lini, amba ni pu ne abhú ndu doto na Makedonia. <sup>4</sup> Okpála inde adu nani adhuku ne ani bhú dabili bini-e, adu nani: Sopatolosi, ndili gba Pilusi, kpála na gudhu na Beloya; Alisitaluka ngauo ne Sekundusi, okpála na gudhu na

\* **19:41** 19:41 Lukuluku inde-e, a bhú obhuku koko na didili u aye e bhú eli na giliki ade. [Pita li ani andjia nakpo 'ngú bhomu-o lie, ani atsia aha kpadji pi okpála.]

Tesalonike; Gayusi, kpála na gũdhũ na Delebe, ne uo ne Timoté; Tisike ngauo ne Tolofime, okpála na ndu doto na Adjia. <sup>5</sup> Okpála bhomũ-o agbida kalanũ, u atsia adũ adjeke ya bhũ gũdhũ na Tũluasi. <sup>6</sup> Engũ bini, ngaya-a, ya aha 'ngbé zabũ bhũ gũdhũ na Filipoi. Pita anokomia nazũ mapa inde li levile nde bhũ e ade-e, ya atsia anũ abhaka uo bhũ gũdhũ na Tũluasi, pita ekpí bhuluvue. Oo, ya asi poso bini.

*Polo akpokpo 'ngũ gba Ebhe-  
bhũ gũdhũ na Tũluasi*

<sup>7</sup> Bhũ 'kpí kulu madhia tagolo-o,\* ya apo bhũla ya ngũ nazũ mapa-o. Polo adũ agama 'ngũ pĩ uo, anga ani adũ akũnda nanũ pita 'kpí angoo. Ani atsia agama 'ngũ ngengele akolo tutu sukpe. <sup>8</sup> Ya apo bhũla ya bhũ tina 'tĩ bhende na abhũlã-o. Oo, oeke adũ bhelé. <sup>9</sup> Makombi bini, a adũ 'li ani me Etikusi, ani adũ li malilisa. Li Polo adũ la lie agama 'ngũ ngengele-e, ani atĩ ne ela má kolio! Abhomũ-o, ani atsokodho abhũlã bhũ tina 'tĩ na bata-a, ani atsia atĩ kuto má kpu! U a'e bha ibili ani me ani nde akpi. <sup>10</sup> Polo akø, ani angumba pí ani, ani aha ani, abi ani sa 'kpa e. Ani atsia apa me: «Yi adjé tsulũ de. Ani kpi de.» <sup>11</sup> Pipita-a, Polo agie matá lie abhũlã, ani aha mapa-o, ani agũmũ, ani atsia azũ. Abhomũ-o, ani agama matá 'ngũ ngengele akolo bhũ sikikpi. Pipita-a, ani atsia atapa. <sup>12</sup> La-a, pĩ makombi bhomũ-o, u anũ ne ani me ani nde uũ. Engũ bhomũ-o ateteke okpála naali.

*Polo anũ bhũ gũdhũ na Milete*

<sup>13</sup> Ya ayie kalanũ, ya aha 'ngbé zabũ ngũ nanũ bhũ gũdhũ na Asosa. A bhomũ-o bili inde a ayo lie me ya ha Polo bhũ 'ngbé zabũ-o. Padhá de, anga ani apa pĩ ya mo-o ngae me, ni anũ naani ne 'dhũ ni. <sup>14</sup> Ani ago

abhaka ya lie bhũ gũdhũ na Asosa-a, ya aha ani bhũ 'ngbé zabũ, ya atsia atapa bhũ gũdhũ na Mitilene. <sup>15</sup> Li ekpí aseke lie, ya ayie oo, ya akolo bhũla kpømø na Kio. Ekpí na bhisi-e, ya akolo bhũ kpømø na Samosi. Ekpí na bata-a, ya atsia akolo bhũ gũdhũ na Milete. <sup>16</sup> Polo abhundja me ni lú bhũ gũdhũ na Efeso de. Padhá de, anga ani dũ akũnda de me ni bhue bhũ ndu doto na Adjia ngengele-e de. Ani adũ agbene lie ngũbula me, i dũ me nedhinga nde u-o, ni de dũ bhũ gũdhũ na Yelusalema bhũ anokomia na Patekote .

*Polo abhana lie pĩ obhelesi okpála  
na gũdhũ na Efeso*

<sup>17</sup> Li Polo adũ lie bhũ gũdhũ na Milete-e, ani atima okpála bhũ gũdhũ na Efeso me u nũ 'i obhelesi okpála na Dadjua gba Ebhe-o. <sup>18</sup> U akolo lie de ani-e, ani atsia apa pĩ uo me: «Yi mbila maka ma adũ nadũ lie bhũ ká yi, nayie li 'kpí ma akolo lie bhũ ndu doto na Adjia hana. <sup>19</sup> Ma amene kulu gba Ngámá me ma nde akø lima ne kuto. Ma adũ aku 'gbá, ma atsia adũ di adje likabhu ka li omaYuda adũ adje lio lie ngũ namene ma sisiti-o. <sup>20</sup> Yi mbila hana me ma wo 'he bini inde i tĩ da nadũ pĩ yi ndjindji-e belegũ de bini. Ma akpokpo Bádha Ngali gba Yesu-o. Ma atsia asuno la di pĩ yi mbámbá bhũ ká okpála, ne bhũ oeti gba yi-o. <sup>21</sup> Ma apa pĩ omaYuda di ne oGiliki me u dji lio pĩ Ebhe, amba u bhuka Yesu Ngámá gba ní ko.

<sup>22</sup> Mbia inde-e, ma adjĩ bhũ gũdhũ na Yelusalema maka li Bu Bhobua aha líli mũma lie ngũ namemene ko. Ma mbila de me abháka ma oo ne mangua 'ngũ dho-ie de. <sup>23</sup> Ma ambila bha bini me Bu Bhobua ngapa mũma me bhũ gũdhũ bini ne bini-e, tikpũ di ne likabhu ngadjeke ma. <sup>24</sup> La-a, mukobho gba ma makpe-e, bhũ djila ma ngbéngbé

\* **20:7** 20:7 'Kpí kulu madhia tagolo: U aye bhũ obhuku koko me «Ekpí na kalanũ.» Pĩ omaYuda-a, ekpí na kalanũ-o, a ko 'kpí kulu madhia. La pĩ ní-e, ekpí na kalanũ-o, a ko 'kpí yinga.

ade. Padhá de, anga ma akunda namene kulu inde li Ngámá Yesu aha e muma-a, akólo bha bini ali soso: nakpokpo Bádha Ngali na bádha bhú 'bu gba Ebhe ko.

<sup>25</sup> Ma apu bhú okuti gba yi, ma akpokpo 'ngú pindji Nau gba Ebhe. Engú bini mbia inde-e, ma ambila me yi ú matá ma de. <sup>26</sup> Kaka-a, ma apa pi yi naki me: i du me kpála bini bhú ká yi nde angita-a, a ko matá naama 'ngú de. <sup>27</sup> Padhá de, anga ma akpokpo ndu 'ngú gba Ebhe-e pi yi hana. Ma wo engú belegu de bini. <sup>28</sup> Yi lila liyi ngayi makpe, di ne ndu piga hana inde li Bu Bhobua a'o e sa 'kpa yi me yi lila e ko. Yi lila Piga gba Ebhe inde ani akala e ne ngute Ndili gba e makpe ko. <sup>29</sup> Padhá de, anga ma ambila ndjindji me pita ma-a, okpála inde maka onute-e ali bhú ká yi. U tsia bhólø piga gba Ebhe-o. <sup>30</sup> Abana bha bhú ká yi makpe-e, okpála koko azé, u adú apa eu, u tsia gbéle omabhuka bhelé nganda o. <sup>31</sup> 'E-e! Yi lila liyi, amba yi bhundja la di me, bhú sunda kalanga bata, sukpe ne ngbikpi, ma ndala li nasuno pi kpála bini ne bini de. Ma adu asuno belegu ne ngula bhú djila ma.

<sup>32</sup> Mbia inde-e, ma nga'o yi sa 'kpa Ebhe, di ne eli na bádha bhú 'bu gba ani-o. A ko ani inde ngateteke yi ngubula me yi lu kpekpeke-o. Ani di ne angu ngú naha pi yi obabadha 'ngú inde ani awo e pi ndu obubu okpála gba e hana-o. <sup>33</sup> Ma du ne gumu tia de. Ma du ne gumu olo de. Ma du di ne gumu bongo gba kpála bini de. <sup>34</sup> Ngayi makpe, yi ambila ndjindji me ma amene kulu ne 'kpa ma ngubula me ngaya ne obi ma-a, ya sia 'he inde ya adu ne gumu e ko. <sup>35</sup> Ma apana pi yi bhú ndu 'ngú hana me a ayo namene kulu ngubula nateteke okpála bhende bhú ndibhili-o. Yi bhundja di eli inde li Ngámá Yesu apa e ngae makpe me: <Djali naali

pi kpála inde ngaha 'he ane kpála inde ngasia 'he ko!>>

<sup>36</sup> Pita ani apa 'ngú bhomu-o lie, ani atutu lipuku e kuto, ani atsia ayo Ebhe bhú dabili bini ne uo. <sup>37</sup> Ndu uo hana aholo naku 'gbá. U aga ngulu ani. U atsia apa pi ani me, ani nu ndjindji. <sup>38</sup> U adu ne likabhu naali, anga Polo apa pi uo me u ú matá ni de. Abhomu-o, u atsia anu a'o ani ade 'ngbé zabu-o.

## 21

### *Polo atapa bhú gudhu na Yelusalema*

<sup>1</sup> Pita ya agbo bhusu ya ne uo lie, ya aha 'ngbé zabu, ya anu bhú kpemø na Kosi. Li ekpi aseke lie, ya akolo bhú kpemø na Lodosi. Ya ayie lie oo, ya atsia anu akolo bhú gudhu na Patala. <sup>2</sup> Oo, ya abhaka me 'ngbé zabu bini nde adji bhú ndu doto na Fenisia. Abhomu-o, ya a'u bhúbhú, ya atsia atapa. <sup>3</sup> Ya akolo lie lingo kpemø na Sipele-e, ya nde ibili ngauu hana-a, ya a'o káká ne li pápá na gali ngú nanu li pápá na ndu doto na Silia. Ya akolo bhú gudhu na Tile, li bili inde a ayo lie me u pandja 'he bhú 'ngbé zabu-o. <sup>4</sup> Ya abhaka la omabhuka lie oo, ya amene ne uo poso bini. Abhomu-o, Bu Bhobua atsia apa pi uo me, u pa pi Polo me ani anu bhú gudhu na Yelusalema de. <sup>5</sup> Engú bini, li ekpi gba ya ale lie, ya atsia agbida. Ndu uo hana, ne olisi di ne ongisi gba o-o, anu na'o ya. Ya akoto bhú gudhu-o. Ya akolo lingo 'ngbé 'ngu, ya atutu lipuku ya kuto, ya atsia ayo Ebhe. <sup>6</sup> Kala me ya agbo bhusu ya ne uo-o, ya aholo 'kpa uo. Ya anu a'u bhú 'ngbé zabu-o. Abhomu-o, u atsia agie lio agba o.

<sup>7</sup> Ya ayie bhú gudhu na Tile, ya akodho 'ngbé 'ngu-o, ya atsia akolo bhú gudhu na Potolemais. Ya akolo lie oo, ya aholo 'kpa ondaise ya, ya atsia adu ne uo ekpi bini. <sup>8</sup> Li ekpi aseke lie, ya aholo ne enú, ya atsia akolo bhú gudhu na Sedjale. Oo,

ya ali bhú 'ti gba Filipo, m̄suno na Bádha Ngali gba Ebhe, s̄ka okpála mananika nani inde u abh̄u o bhú ḡdhu na Yelusalema ko. Ya atsia ad̄u agba ani. <sup>9</sup> A ad̄u nani ka ani ne ongisi na olisilisi badha inde i mbila nga nani engú na obhosi de. U ad̄u nani akpokpo 'li Ebhe pi okpála.

<sup>10</sup> Ya ad̄u oo nḡubula ekpí bhelé. Li nedhinga ango-o, polofeta Agabusi ayie bhú ndu doto na Yudaya atsia ago oo. <sup>11</sup> Ani ago abhaka ya. Ani abhulu ekpú na ludu Polo. Ani agbigbite 'kpa e di ne 'dhu e ne di. Do ani de me: «Bu Bhobua apa me: «Bh̄u ekpú inde-e, bhú ḡdhu na Yelusalema-a, omaYuda agbigbite bhadi ani moko, u tsia pú ani pi ogandji okpála .» <sup>12</sup> Ya adje engú bhom̄-o lie, ngaya, di ne omabhuka na ḡdhu na Sedjale-e, ya akikiliki liya pi Polo me ani anú bhú ḡdhu na Yelusalema de. <sup>13</sup> Engú bini, Polo atsia agie me: «Yi ngamene bhom̄-o ni? Yi ngaku 'gbá, di ne nangbingi bua ma lie mo-o! Ma bha bini bedhe ade nḡubula me u mbimbi ma ne ekp̄, engú bini, ma bedhe nḡubula me ma kpi bhú ḡdhu na Yelusalema nḡubula 'li Ngámá Yesu.» <sup>14</sup> Ya ale la nadi mabundja gba ani-e lie pima-a, ya tsia zi kekele tété de. Ya apa bha ibili me: «A ayo me Ngámá mene maka ani akunda lie ko!»

<sup>15</sup> Pita ekpí ya amene e li bili bhom̄-o, ya aleke liya. Abhom̄-o, ya atsia agbida bhú ḡdhu na Yelusalema. <sup>16</sup> Om̄kpata koko na ḡdhu na Sedjale anu bhú dabili bini ne ya. U anu a'o ya gba kpála bini inde a ayo me ya ad̄u gba e-o. A ad̄u 'li ani me Menaso, kpála na kp̄m̄ na Sipele, s̄ka om̄kpata na kalanu ko.

*Polo anu natsia obhelesi okpála bhú ḡdhu na Yelusalema*

<sup>17</sup> Ya akolo lie bhú ḡdhu na Yelusalema-a, omabhuka asia ya ne djali. <sup>18</sup> Li ekpí aseke lie, Polo anu bhú dabili bini ne ya agba Djaki. Oo,

ndu obhelesi okpála hana na Dadja gba Ebhe-e, atsia ap̄k̄ebhe bh̄la o. <sup>19</sup> Polo aholo 'kpa uo. Abhom̄-o, ani atsia akpokpo ndu 'ngú hana bini ne bini maka li Ebhe ad̄u amemene lie bhú kulu gba ani bhú ká ogandji okpála ko. <sup>20</sup> Li u adje lie-e, u atsia adh̄ḡ Ebhe. Pipita-a, u atsia apa pi ani me: «Ndai ya, m̄ nḡauu! A ko omaYuda k̄t̄e ne k̄t̄e inde abhuka Ebhe, ndu uo hana agbite lio li líli. <sup>21</sup> La-a, u adje li 'ngú gba m̄-o me, m̄ ngasuno pi ndu omaYuda hana inde ngad̄lu bhú ká ogandji okpála me, a ayo me u 'o nakpata líli gba Moidje-o . U adje di me mo opa di pi uo me, u 'o nato ongisi gba o-o bhú gandja, amba u 'o di nakpata das̄ndu gba omaYuda-o. <sup>22</sup> A ayo me ya mene pi? A na paká me, u adjé madje me mo okolo si.

<sup>23</sup> Mene bhende ya apá e pi m̄ ko. A ka ya si ne obhosi badha inde asili ndjinga me, o aha lio pi Ebhe. <sup>24</sup> Ha uo, yi nu ne uo, yi v̄lu liyi nḡubula me yi kolo bubu kala Ebhe, amba m̄ ha tia nḡubula me u ka 'ndji uo. Abhom̄-o, li ndu okpála hana tsia mbila me engú inde u apa e li m̄-o, a ko k̄k̄lu 'ngú de. Engú bini ngam̄ di-e, m̄ ngakpata líli gba Moidje ko. <sup>25</sup> La pi ogandji okpála inde abhuka-a, ya aye pi uo líli gba ya-o: u 'o naz̄u so 'nu inde u abh̄e e pi oebhe na eu-o ma'o. U 'o naz̄u ngute di ne so 'nu inde akpi ne ngute bhú e hana, amba u 'o nakunda olisi di ne obhosi ngangá ma'o.»

<sup>26</sup> Abhom̄-o, li ekpí aseke lie, Polo abha obhosi ango-o, ani anu av̄lu lie ne uo bhú dabili bini nḡubula me o kolo bubu kala Ebhe. Pipita-a, ani ali bhú 'ngbé 'ti Ebhe gba omaYuda, ani atsia a'o ekpí inde li mav̄lu ango-o andjia lie, u tsia bh̄e enu pi Ebhe nḡubula ndu uo hana bini ne bini.

*U aholo Polo bhú 'ngbé 'ti Ebhe gba omaYuda*

<sup>27</sup> A akolo lie masakpe de me oekpí mananika-a ndjia, omaYuda koko na

ndu doto na Adjia au Polo bhú 'ngbé 'ti Ebhe gba omaYuda. Abhomu-o, u ato siti 'ngú bhú 'ndji ndu okpála hana. U atsia aholo ani. <sup>28</sup> U adu asusula me: «Ngayi omaIsalaele-e, yi go teteke ya! Yi tsia nga kpála inde ngasuno ne ndu bili hana pi ndu okpála hana me, u yala omaIsalaele, u yala líli gba Moidje, di ne 'ngbé 'ti Ebhe gba omaYuda-o. Ani amba belegu oGiliki bhú 'ngbé 'ti Ebhe. Abhomu-o, ani atsia asiti di bili na bubu ango-o.» <sup>29</sup> (U adu apa mo-o, anga kalanu-o, u au Tolofime, kpála na gudhu na Efeso, bhú dabili bini ne Polo abhú gudhu. Kaka-a, u adu abhundja me Polo ato ani bhú 'ngbé 'ti Ebhe gba omaYuda.)

<sup>30</sup> U aholo amene tolo bhú gudhu libhomu. Abhomu-o, okpála ayie ne ndu bili hana, u ago apokobhe bhúla o. U aholo Polo, u agbele ani akilidjo, u atsia anini kolo obhoti na 'ngbé 'ti Ebhe gba omaYuda-o. <sup>31</sup> Li u adu agili nabhelo Polo lie, ngali ango-o atsia akolo li 'ngbé ngámá gba osudha na gudhu na Loma me okpála bhú gudhu na Yelusalema libhomu ngazi tolo. <sup>32</sup> Kolo má gala me-e, ani abha ongámási gba osudha di ne osudha, ani anu ne uo li bili li okpála adu azi tolo lie-o. U au 'ngbé ngámá di ne osudha-a lie, u atsia a'o nabhi Polo. <sup>33</sup> Abhomu-o, 'ngbé ngámá-a adyudyo lie de Polo. Ani me u holo ani, ani atsia aha líli me u gbigbite ani ne gbindjili bhisi. Pipita-a, ani ayi me: «A ko naae da, ani amene la di ni?» <sup>34</sup> Bhú ká bhiti okpála bhomu-o, okpála adu asusula ne engú ngangá, u dje lio de. Li tolo adu lie naali-e, 'ngbé ngámá-a tsia dje ta 'ngú ango-o de. Abhomu-o, ani atsia aha líli me u nu ne Polo bhú 'ti inde li osudha nalila gudhu adu lie ko.

<sup>35</sup> Ani akolo lie li ngba 'ti-e, osudha atsia abi ani ka li bhiti okpála bhomu-o adu amene ani lie sisiti-o. <sup>36</sup> Padhá de, anga ndu uo hana adu akpata ani. U atsia adu atu 'ue me u bhelo ani.

### *Polo akpokpo 'ngú gba e-o*

<sup>37</sup> Nedhinga u adu akunda nato Polo lie abhú 'ti-e, Polo apa pi 'ngbé ngámá-a me: «Mu ti da naziba uu me ma pa mbo engú pi mu?» 'Ngbé ngámá-a atsia ayi ani me: «Mu mbila eli gba oGiliki-e hana? <sup>38</sup> A ko ndi mu di maEdjipeto inde ato kpéke 'ndji bhú okpála sunda 'kpí inde-e? Ani atsia anu di ne okpála kete badha bhú 'gu-o?» <sup>39</sup> Abhomu-o, Polo agie me: «Ngama-a, ma ne maYuda. U azu ma bhú gudhu na Talasi bhú ndu doto na Silisia. Ma ne kpála na gudhu na padhá padhá ade. Kikiliako, ha kpadji muma, ma gama 'ngú pi okpála.» <sup>40</sup> 'Ngbé ngámá-a atsia aziba pi ani. Abhomu-o, Polo alu li ngba 'ti-o, ani amene 'kpa e me ni akunda nagama 'ngú pi okpála. Ndu okpála hana andjili má bulu! Abhomu-o, Polo aholo nagama 'ngú pi uo bhú eli gba omaYuda me:

## 22

<sup>1</sup> «Odyi ma, di ne ondaise ma, yi dje engú inde ma adji apa e pi yi mbia inde-e ndjindji, amba yi mbila me ma mene 'ngú bhomu-o de.» <sup>2</sup> Li u adje lie me ani ngagama 'ngú pi o bhú eli gba omaYuda-a, u atsia andjili la matá má bulu! Polo atsia apa me: <sup>3</sup> «Ngama-a, ma ne maYuda. U azu ma bhú gudhu na Talasi, bhú ndu doto na Silisia. Ma abhele bhú gudhu na Yelusalema inde. Musuno gba ma Gamaliele asuno nambila líli gba onguo ogbi ní-e muma ndjindji. Ma aha nani lima pi Ebhe ne bua ma bini maka ndu yi hana yi ngamemene lie naki ko.

<sup>4</sup> Ma adu ato mbolo li okpála inde adu akpata kpadji gba Ngámá-o, ma atsia adu agili nabhili uo. Ma azumu obhosi di ne olisi, ma atsia amba uo bhú tikpu. <sup>5</sup> Bhele kpála gba odimandé gba Ebhe di ne obhelesi okpála mbila ndjindji me ma ngapa e kukulu 'ngú. U aha belegu obalua

muma ngubula me ma nu ne di pi ondaise ni inde bhú gudhu na Damasi. Ma anu oo me ma holo omabhuka inde oo, ma gbigbite uo ne gbindjili, amba ma mba uo bhú gudhu na Yelusalema ngubula me u mene uo sisiti.»

*Polo akpokpo maka ani adji bua e lie ko*

*(Tsia bhú Kul. 9:1-19, 26:12-18.)*

<sup>6</sup> «Abhomu-o, ma adu lie li kpadji-e, masikpe de nakolo bhú gudhu na Damasi de tulukpe-e, kolo me-e, zi 'kpí na kpekpeke ayie abhúlá, a ago asa ma ngbalina. <sup>7</sup> Ma agu 'i ma kuto má gbwæ! Ma atsia adje eli bini inde apa muma me: «Saulo, Saulo, mu ngato mbolo li ma ngu ni?» <sup>8</sup> Abhomu-o, ma atsia agie me: «A ko mu da, Ngámá?» Ani atsia agie muma me: «A ko ma Yesu, kpála na kuti na Nadjaleta, inde mu ngato mbolo lie ko.» <sup>9</sup> Okpála inde adu bhú dabili bini ne ma-a, au zi 'kpí angoo. Engú bini, u dje 'li kpála inde adu agama 'ngú muma-a de. <sup>10</sup> Abhomu-o, ma atsia ayi matá me: «Ngámá, a ayo la me ma mene pi?» Ngámá agie muma me: «Yie bhúlá, nu bhú gudhu na Damasi. Oo, u apa pi mu ndu 'ngú hana inde li Ebhe akunda me mu mene e ko.» <sup>11</sup> La-a, ma du au 'kpí ka kpéke zi 'kpí bhomu-o lie de-e, okpála inde adu bhú dabili bini ne ma-a, aholo 'kpa ma, u atsia anu ne ma bhú gudhu na Damasi.

<sup>12</sup> Kpála bini adu nani oo, a adu 'li ani me Anania. Ani adu akpe Ebhe, ani atsia adu di akpata líli gba ní-e ndjindji. Ndu omaYuda hana na gudhu na Damasi adu apa 'ngú gba ani-e ndjindji. <sup>13</sup> Ani ago natsia ma. Ani akolo lie de ma-a, ani atsia apa muma me: «Ndai ma Saulo, u matá 'kpí uu!» Bha li nedhinga bhomu-o, djila ma abhulu, ma atsia au ani. <sup>14</sup> Abhomu-o, ani atsia apa muma me: «Ebhe gba onguo ogbi ní abhu nani mu didili ngubula me mu mbila engú inde ani akunda e-o. Ani abhu mu ngubula me mu mbila Kpála

inde ngbingbili-o, amba mu dje di 'li ani makpe. <sup>15</sup> Padhá de, anga pi ani-e, mo odú akpokpo ongú gba ani bhende mo ou e, di ne bhende mo odje e pi ndu okpála hana. <sup>16</sup> Mbia inde-e, mu matá ngadjeke ni? Yie bhúlá, sia batisimo, mu yo Ebhe, amba ani 'e siti 'ngú gba mu ko.»

*Polo akpokpo maka li Ebhe atima ani lie agba ogandji okpála-o*

<sup>17</sup> Abhomu-o, ma agie lima bhú gudhu na Yelusalema. Ekpí bini, ma adu ayo Ebhe bhú 'ngbé 'ti Ebhe gba omaYuda, ma atsia au engú maka loto. <sup>18</sup> Ma au Ngámá, ani atsia apa muma me: «Yaka! Koto bhú gudhu na Yelusalema má gala, anga okpála na gudhu inde-e, u ziba engú gba ma inde mo opá e pi uo-o de.» <sup>19</sup> Abhomu-o, ma atsia apa me: «Ngámá, u mbila hana me ma adu nako nanu bhú oti nadjé líli gba Moidje, ma adu aholo okpála inde abhuka mu-o. Ma adu amba uo bhú tikpu, ma atsia adu di abhi uo ne fimbo. <sup>20</sup> Nedhinga u adu abhelo Etieni, kpála nakpokpo Bádha Ngali gba mu-o lie, ma adu di oo. Ma aziba okpála inde adu abhelo ani-o. Ma atsia adu alila obongo gba uo-o.» <sup>21</sup> Abhomu-o, Ngámá atsia apa muma me: «Nunu, anga ma atima mu tsutsu agba ogandji okpála .»

*Polo apa me, ni ne kpála na gudhu na Loma*

<sup>22</sup> Bhiti okpála bhomu-o adu nga bha nadjé ani akolo li engú inde ani apa e bhomu-o. Abhomu-o, u atsia aholo asusula me: «Yi bhelo kpála bhomu-o mabhelo! Ani ti da nadu píla doto de!» <sup>23</sup> U adu asusula kpekpeke. U adu ape obongo gba o, u atsia adu abala ndju doto ne abhúlá. <sup>24</sup> Abhomu-o, 'ngbé ngámá gba osudha aha líli me u to Polo abhú 'ti gba osudha. Ani atsia apa me u bhi ani ne fimbo, amba ani pa ta 'ngú inde li okpála ngasusula lie me u mene ani sisiti-o. <sup>25</sup> Li u agbigbite ani lie ne ekpu ngubula



nabhi ani ne fimbo-o, abhomu-o, ani atsia apa pi ngámá gba osudha inde adu oo me: «A ayo bha ndju uu me, yi bhi ndili na kuti na Loma ne fimbo me, u nde kodho nga 'ngú gba ani-e di?»

<sup>26</sup> Li ngámá bhomu-o adje engú li Polo ayi e lie, ani atsia anu abhaka 'ngbé ngámá gba osudha-o. Ani atsia ayi ani me: «Mo oméne pi, anga kpála bhomu-o, a ko ndili na kuti na Loma!» <sup>27</sup> 'Ngbé ngámá-a ago abhaka Polo, ani atsia ayi ani me: «Pa nga muma, mu ne ndili na kuti na Loma na paká?» Polo atsia agie pi ani me: «Hení, a na paká.» <sup>28</sup> Abhomu-o, 'ngbé ngámá-a atsia apa me: «Ma aha nani tia bhelé ngubula me ma kolo kpála na kuti na Loma.» Polo atsia apa naae me: «Ngama-a, u azu ma kpála na kuti na Loma.» <sup>29</sup> Kolo má gala me-e, okpála inde i di me bhi ani ngubula me ani gama 'ngú-o, u atsia atsambala de ani. Abhomu-o, 'ngbé ngámá gba osudha-a aholo adje tsulu, li ani ambila lie me ni aha líli ngani me u gbigbite ndili na kuti na Loma-o.

*Polo kala Libi okpála natsia 'kpí li 'ngú gba omaYuda*

<sup>30</sup> Abhomu-o, 'ngbé ngámá gba osudha-a adu akunda me, ni mbila kukulu ta 'ngú inde li omaYuda asungula Polo lie pi ongámási-o. Kaka-a, li ekpí aseke lie, ani aha líli me u bhuhulu Polo, di me ongbengbe odimandé gba Ebhe, di ne Libi okpála natsia 'kpí li 'ngú gba omaYuda pekébhe bhúla o. Pipita-a, ani ago ne Polo, ani atsia a'o ani kala uo.

## 23

<sup>1</sup> Abhomu-o, Polo atsia Libi okpála natsia 'kpí li 'ngú gba omaYuda ne kpéke djila. Do ani de-e: «Ondaise ma, nakolo pi mbia inde-e, ma adhuku kala Ebhe ndjindji.» <sup>2</sup> Engú bini, bhele kpála gba odimandé

Anania aha líli pi okpála inde adu de ani-e me u su 'bhé ani. <sup>3</sup> Abhomu-o, Polo atsia apa pi ani me: «Ebhe asú mu ngae, ngamu kpála inde maka pabu 'ti inde u ato embú lie! Mo odu oo ngú nakodho 'ngú gba ma-a maka li líli apa lie. Engú bini, mo ogumu líli anga mo opa me u su ma!» <sup>4</sup> Abhomu-o, okpála inde adu de Polo atsia apa pi Polo me: «Mu ngasobho bhele kpála gba odimandé gba Ebhe!» <sup>5</sup> Polo agie me: «Ondaise ma, ma mbila igini de me a ko bhele kpála gba odimandé gba Ebhe-e de. Padhá de, anga Bhuku gba Ebhe-e apa me: «Mo osóbho ngámá gba okpála na doto gba mu-o de.»»

<sup>6</sup> Li Polo ambila la nani lie me bhú ká okpála inde apo bhúla o bhomu-o, okoko adu oSadukai, okoko adu omuFalisai-e, ani atsia asula bhú ká uo me: «Ondaise ma, ma ne muFalisai, ndili gba omuFalisai. I du me u nde nga'o 'ngú pí ma me-e, a ko anga ní ne 'to ní me okpála inde amu-o, azúku mazuku.» <sup>7</sup> Li ani apa 'ngú bhomu-o lie, omuFalisai ne oSadukai aholo natsi sunda o. Abhomu-o, okpála atsia agbo bhusu o bhisí. <sup>8</sup> (Padhá de, anga oSadukai ziba nani naao de me okpála azúku mazuku-o de. U atsia apa di nani matá me andjelu ade, bua di ade. Engú bini, omuFalisai atsia aziba nani naao ndu 'ngú bhomu-o hana.) <sup>9</sup> Abhomu-o, tolo atsia akolo naali. Omusuno na líli koko inde adu bhú ká omuFalisai-e ayie bhúlá, u atsia apa ne angu hana me: «Ya u siti 'ngú bhú kpála inde-e belegu de bini. A mana mugito me andjelu bini, i du di-e bua, agama 'ngú pi ani ngae!»

<sup>10</sup> Li okpála adu alo 'bhé lie sunda o naali-e, 'ngbé ngámá gba osudha-a aholo adje tsulu me u adji adolo Polo. Kaka-a, ani aha líli pi osudha-a me, u kə, u nu ha Polo bhú ká uo, amba u gie ani abhú 'ti gba osudha inde ngalila gudhu-o.

† 23:5 23:5 Tsia bhú Eki. 22:27.

11 Sukpe-e, Ngámá akoto li Polo, ani atsia apa pi ani me: «Atou! Padhá de, anga maka mo okpokpo 'ngú gba ma lie bhú gúdhú na Yelusalema-a, a ayo bhadi me mụ nụ kpokpo bhú gúdhú na Loma moko.»

*OmaYuda adje lio ngú nabhөлө Polo*

12 Li ekpí aseke lie, omaYuda adje lio pindji Polo, u atsia atụ silika me o zú bha bini 'he, li o ndjí la bhadi 'he bhe nandji mandji-e me, o nde abhөлө bha bini ani kalanụ. 13 Okpála inde nani adje lio bhomụ-o ane nani ndjikpa badha mane. 14 U anụ abhaka ongbengbe odimandө di ne obhelesi okpála, u atsia apa pi uo me: «Ya atụ silika me ya azú bha 'he me ya nde abhөлө Polo kalanụ. 15 Mbia inde-e, a ayo me ngayi ne Libi okpála natsia 'kpí li 'ngú gba omaYuda-a, yi yo ka 'ngbé ngámá gba osudha-a me, ani go ne Polo kala yi si. Yi mene mụgito me yi akunda atsia 'kpí li engú gba ani-e ndjindji. La pi ya-a, ya bedhe ngú nabhөлө ani me ani nde kolo nga de.»

16 Engú bini, ndili na bhobhoko gba ndai Polo na өөлө-o adje engú ang-o. Ani anụ, ani ali bhú 'ti gba osudha inde ngalila gúdhú-o. Ani atsia apa pi Polo. 17 Abhomụ-o, Polo a'i sụka ongámási gba osudha-o. Do ani pi ani me: «Nụ ne makombi inde-e pi 'ngbé ngámá gba osudha-o. Padhá de, anga ani ne engú napapa pi ani.» 18 Ngámá gba osudha-a aha ani, ani anụ ne ani pi 'ngbé ngámá gba osudha-o. Ani atsia apa me: «Bhulụ 'kpú Polo a'i ma, ani atsia ayo ka ma me, ma go ne makombi inde-e pi mụ. Padhá de, anga ani ne engú napapa pi mụ.»

19 Abhomụ-o, 'ngbé ngámá gba osudha-a aha 'kpa makombi-o. Ani anụ ne ani ne li ngongo, ani atsia ayi ani me: «Mo okunda napa mụma mangua 'ngú dho?» 20 Ani atsia apa me: «OmaYuda adje lio me, o yo ka mụ me ha Polo, amba mụ go mambi ne ani kala Libi okpála natsia 'kpí

li 'ngú gba omaYuda-o. U améne mụgito me u ngakunda atsia 'kpí li 'ngú gba ani-e ndjindji. 21 Engú bini, mo obhúka uo de. Padhá de, anga okpála nane ndjikpa badha bhú ká uo, adje lio ngú namene ani sisiti. U atụ silika me o zú bha bini 'he, li o ndjí la bhadi 'he bhe nandji mandji-e me, o nde abhөлө bha bini Polo kalanụ. Mbia inde-e, uo bedhe. U ngadjeke bha maka mo opá lie ko.» 22 'Ngbé ngámá gba osudha-a apa pi makombi ang-o me: «Mo opá pi kpála bini de me, ni apa engú inde-e mụma apa-a de.» Pipita-a, 'ngbé ngámá gba osudha-a atsia agie ani sidi.

*U atima Polo bhú gúdhú na Sedjale*

23 Pipita-a, 'ngbé ngámá gba osudha-a a'i ongámási na sudha gba e-e bhis. Ani atsia apa pi uo me: «Yi po bhúla osudha kámá bhis, di ne obhende ndjikpa mananika inde adhudhukụ pí 'ngbụ opunda, amba yi po la di bhúla obhende na mandambi-e kámá bhis. Ndụ yi hana yi dụ bedhe ngú nanụ bhú gúdhú na Sedjale tagolo bhú saa na odukpabini. 24 Yi leke di punda ngú nabi Polo. Yi mene me ani kolo li bili li ngámá Felikisi nde lie ndjindji me ehe bini nde mene ani de.»

25 Abhomụ-o, ani atsia aye balua me:

26 «Kolode Lisiasi apa me, ni yi Felikisi, ngámá na asasaua, mayi.

27 OmaYuda aholo nako kpála inde ma atima e pi mụ inde-e ngao. U adụ akunda nabhөлө ani. La-a, ma adje lie me a ko ndili na kuti na Loma-a, ngama ne osudha gba ma-a, ya atsia agbulụ ani ka uo.

28 Maka ma adụ akunda nambila ta 'ngú inde u aholo ani ngú e lie, ma atsia anụ ne ani kala Libi okpála natsia 'kpí li 'ngú gba uo-o. 29 Ma au me, u aholo ani pindji ongú inde atsia líli gba uo-o. La-a, ma u ani ne engú bini inde u ti da nabhөлө ani, di ne bhende u ti da naholo ani ka e de. 30 Li u apa

muma lie me u adu agili nabhele ani-e, ma atsia atima ani pi mu kolo má gala! Ma atsia apa di pi okpála inde a'o 'ngú pí ani-e me, u nu kpokpo 'ngú gba ani-e pi mu.»

<sup>31</sup> Abhomu-o, osudha-a atsia amene maka li 'ngbé ngámá gba uo apa pi uo lie ko. U aha Polo, u atsia anu bha ne ani sukpe bhomu bhú gudhu na Atipatili. <sup>32</sup> Li ekpí aseke lie, osudha bhende adhuku ne 'dhu o agie lio li bili li osudha nalila gudhu-o adudu lie ko. U atsia a'o obhende adu adhuku pí 'ngbu opunda-a me, u nu ne Polo. <sup>33</sup> U akolo lie bhú gudhu na Sedjale-e, osudha-a aha balua pi ngámá na ndu doto ango-o. U atsia a'o di Polo sa 'kpa ani. <sup>34</sup> Abhomu-o, ngámá-a atanga balua-o. Ani atsia ayi me Polo ne kpála na ndu doto bhedho. Ani adje lá lie me a ko kpála na ndu doto na Silisia-a, <sup>35</sup> ani atsia apa pi ani me: «Ma adjé engú gba mu-o me okpála inde yi nde ne o bhú 'ngú-o nde akolo.» Abhomu-o, ani atsia aha líli me u lila Polo bhú eti gba 'ngbé ngámá Elode. \*

## 24

### *OmaYuda agbe Polo kala ngámá Felikisi*

<sup>1</sup> Pita ekpí bhuluvue, bhele kpála gba odimandø Anania akolo bhú gudhu na Sedjale, bhú dabili bini ne obhelesi okpála koko di ne avuka bini inde adu 'li e me Teletulusi. U atsia ato siti 'ngú ne 'li Polo pi Felikisi, ngámá na ndu doto ango-o. <sup>2</sup> U a'i Polo. Abhomu-o, Teletulusi atsia aholo akpokpo li ani me: «Ngámá na asasaua, Felikisi, mo oto guo 'ngú bhú ndu doto inde-e ngamu. Mu di aleke ongu bhelé bhú doto gba ya ne imbilangu gba mu-o. <sup>3</sup> Ndu 'kpí hana di ne ndu bili hana, ngámá na asasaua, Felikisi, ya ngagie heni ngú ndu 'ngú bhomu-o hana. <sup>4</sup> Engú bini, ma kunda nabhele nedhinga

gba mu-o de. Kaka-a, ma ayo ka mu me dje nga mbo ya bedi ne bádha bua.

<sup>5</sup> Ya au me kpála inde-e, a ko kpála na mugwe. Ani ngato kpéke 'ndji bhú 'ndji ndu omaYuda hana pála doto libhому. A ko la di ngámá na Dadjua bini na Ebhe gba okpála na kuti na Nadjaleta. <sup>6</sup> Ani ale belegu nasiti 'ngbé 'ti Ebhe gba omaYuda-o. Abhomu-o, ya atsia aholo ani. [Ya akunda nako me kodho 'ngú gba ani-e maka li líli gba ya apa lie-o. <sup>7</sup> Engú bini, Lisiasi, 'ngbé ngámá gba osudha-a, atsia ayoko. Ani atsia agbulu ani ka ya. <sup>8</sup> Pipita-a, ani atsia aha líli pi ya me ya go ne ani kala mu.] I du me mu nde ayi ani ngamu makpe-e, mu tsia mbila me ndu 'ngú hana inde ya apa e li ani-e, a ko kukulu 'ngú.» <sup>9</sup> OmaYuda atsia aziba di ongu ango-o. Do uo me: «A ko kukulu 'ngú.»

### *Polo akpokpo 'ngú gba e kala ngámá Felikisi*

<sup>10</sup> Abhomu-o, ngámá Felikisi amene 'kpa e pi Polo me ani kpokpo 'ngú gba e-o. Polo atsia apa me: «Ma mbila ndjindji me, ngubula kalanga bhelé-e, mu ngakodho 'ngú gba ya okpála na kuti inde-e ngbingbili. Kaka-a, ma ne djali naali ngú nakpokpo 'ngú gba ma-a pi mu. <sup>11</sup> Mu ti da nambila bha ngamu makpe me ane nga ekpí ndjikpa ne ká bhisi de maka ma anu nako lie bhú gudhu na Yelusalema ngú nadhøge Ebhe-o. <sup>12</sup> Kpála bini bhaka ma namene kpekebhe ne kpála bini na 'ngbé 'ti Ebhe gba omaYuda-a de. Kpála bini bhaka la di ma nato kpéke 'ndji bhú 'ndji okpála bhú 'ti nadge líli gba Moidje, di ne li kpadji de.

<sup>13</sup> Okpála ago ne ma kala mu inde-e ne engú bini ade inde i ti da nasuno me engú inde u ngapa e li ma inde-e, a ko kukulu 'ngú. <sup>14</sup> Ma

\* **23:35** 23:35 Eti gba 'ngbé ngámá Elode: A adu nani bhú Sedjale. Elode Ngebéngbé ayiki nani ngae. Ongámási na Loma atsia adji nani dabili nadu ka o tété.

aziba kala mụ si me ma ngakpata kpadji na mbia inde ngauo, u ngau e me a sisiti-o. La-a, ma ngadhөгө Ebhe gba onguo ogbi ní. Ma la di ngabhuka ndu 'ngú inde u aye e bhú obhuku na líli di ne bhe gba opolofeta-a hana. <sup>15</sup> Ma ne nabhuka bhú Ebhe bhadi maka uo me, okpála na ngbingbili di ne obhende ngbingbili ade-e azúku mazuku. <sup>16</sup> Kaka-a, ma ngamene ndu 'kpí hana ne kpéke me, bua ma du ndjindji kala Ebhe, di ne kala okpála.

<sup>17</sup> Ma du lie de bhú gudhu na Yelusalema ngubula kalanga bhelé-e, ma atsia agie lima oo ngú nateteke obhulu ndibhili na doto gba ma-a ne tia, di ne naha makiso gba ma-a pi Ebhe. <sup>18</sup> Kaka-a, u abhaka ma bhú 'ngbé 'ti Ebhe gba omaYuda me, ma nde avulu lima ngú nakolo bubu kala Ebhe avulu. Ma bha ká okpála de. Ma to la di kpéke 'ndji bhú 'ndji okpála de. <sup>19</sup> OmaYuda koko bhú ká obhende ayie bhú ndu doto na Adjia, adu oo. A ayo nako me u gbe ma kala mụ ngao, i du me u nde ne engú li pápá gba ma-o. <sup>20</sup> I du mo-o de-e, a ayo me okpála inde si-e suno siti 'ngú inde u au ma ne e, nedhinga inde u agbe nako ma lie kala Libi okpála natsia 'kpí li 'ngú gba omaYuda-o .

<sup>21</sup> Padhá de, anga ma amene bha koli 'he bini. Ma apa kpekpeke kala uo me: <Yi agbe naki ma kala yi ngú nakpokpo 'ngú anga ma abhuka me okpála inde amu-o, azúku mazuku!>» <sup>22</sup> La-a, pi ngámá Felikisi-e, ani adu ambila kpadji gba Yesu-o ndjindji. Abhomu-o, ani agie engú ango-o me ni akódho sidi. Ani atsia apa pi uo me: «Ma akódho 'ngú gba yi-e, li nedhinga li 'ngbé ngámá gba osudha Lisiasi agó lie ko.» <sup>23</sup> Ani atsia aha líli pi ngámá gba osudha-a me u lila Polo, kpála na 'kpü-o, malila. Engú la bini, u 'o ani me ani du mbo bhú ngu e. U ayóko di omaha ani ngú nateteke ani de.

### *U agbe matá Polo kala ngámá Felikisi ne Dulusile*

<sup>24</sup> Pita mbo ekpí bedi-e, ngámá Felikisi ago ne wala e Dulusile. Æ angoo adu maYuda. Ngámá Felikisi atima okpála me u nu 'i Polo. Abhomu-o, ani atsia adje engú li Polo akpokpo e pindji nabhuka Yesu Kilisito-o . <sup>25</sup> Pipita-a, Polo aholo akpokpo lele maka a ayo lie nadu ngbingbili , ne nane gumu kute di ne me ekpí koko akólo makolo, ekpí inde li Ebhe akódho 'ngú gba okpála lie ko. Abhomu-o, ngámá Felikisi aholo adje tsulu. Ani atsia apa me: «Mbia inde-e, mụ ti da nanu. I du me ma nde asia nedhinga-a, ma tsia 'i matá mụ.» <sup>26</sup> Ani adu di ne 'to e me ni asia tia ka Polo. Kaka-a, ani adu a'i Polo piko ngú nakpokpo 'ngú ne ani.

<sup>27</sup> Pita kalanga bhisi-e, Polosiusi Fesitusi akolo ngámá bhú da ngámá Felikisi. Engú bini, ngámá Felikisi a'o ká Polo bhú tikpu, anga ani adu amene me omaYuda u ni ndjindji.

## 25

### *Polo ayo me 'ngbé ngámá Kaisala kodho 'ngú gba ni-e ngae*

<sup>1</sup> Li ngámá Fesitusi akolo lie bhú ndu doto ango-o, pita 'kpí bata-a, ani ayie bhú gudhu na Sedjale, ani atsia anu bhú gudhu na Yelusalema. <sup>2</sup> Ongbengbe odimandö , di ne ongámási gba omaYuda-a , ago kala ani. U atsia ato siti 'ngú ne 'li Polo pi ani. U akikiliki lio pi ani me, <sup>3</sup> ani ziba pi o me o nu ne Polo bhú gudhu na Yelusalema. U adje lio me, li o kolo li kpadji-e, o de bhöle ani. <sup>4</sup> Engú bini, ngámá Fesitusi agie pi uo me: «Bili na tikpu gba Polo-o, a ko Sedjale. La-a, ngama makpe-e, ma adji bhadi oo mbia inde.» <sup>5</sup> Ani atsia apa matá me: «A ayo me ongbengbe okpála gba yi-e nu bhú dabili bini ne ma. I du me kpála bhomu-o nde amene siti 'ngú-o, u de kpokpo oo ko.»

<sup>6</sup> Ngámá Fesitisi amene agba uo ekpí nayie bhú madjina masikpe de nakolo bhú ndjikpa. Pipita-a, ani atsia agie lie bhú gúdhú na Sedjale. Li ekpí aseke lie, ani atsia anu li bili nakodho 'ngú-o. Abhomu-o, ani atsia aha líli me u go ne Polo. <sup>7</sup> Li Polo ago lie, omaYuda inde ayie bhú gúdhú na Yelusalema-a, asa lio deno ani. Abhomu-o, u aholo apa osisiti 'ngú na ngbengbengbe li ani bhelé bhelé. La-a, u dá ambila nakpokpo ta ongú ango-o de, anga a adu eu. <sup>8</sup> Abhomu-o, Polo atsia aholo nakpokpo 'ngú gba e me: «Ma mene siti 'ngú bini de. Ma gumu líli gba omaYuda-a de. Ma siti 'ngbé 'ti Ebhe gba omaYuda-a de. Ma mene la di siti 'ngú li 'ngbé ngámá Kaisala de.» <sup>9</sup> Ngámá Fesitisi adu amene me omaYuda u ni ndjindji. Kaka-a, ani atsia ayi Polo me: «Mo kunda nanu bhú gúdhú na Yelusalema, ngubula me u kodho 'ngú gba mu-o kala ma oo?»

<sup>10</sup> Engú bini, Polo agie me: «Ma alu e bhú ndende gba 'ngbé ngámá Kaisala-o. A ayo me u kodho 'ngú gba ma-a bha si. Ma mene siti 'ngú li omaYuda belegu de bini. Ngamu makpe-e, mo ombila 'ngú tété ndjindji. <sup>11</sup> I dá me ma nde atu 'ngú, i dá di me ma nde amene siti 'ngú inde ayo me u bhelè ma ka e-e, ma yala nakpi de. Engú bini, i dá la me, kukulu 'ngú nde bhú ká ongú inde u ngapa e li ma ade-e, kpála bini ti da natse 'kpa li ma pi uo de. Ma ayo me 'ngbé ngámá Kaisala kodho bha 'ngú gba ma-a ngae.»

<sup>12</sup> Abhomu-o, pita li ngámá Fesitisi agama 'ngú ne obhelesi okpála gba e lie, ani atsia apa me: «Mo oyo lie me 'ngbé ngámá Kaisala kodho bha 'ngú gba mu-o ngae, mo onú agba ani.»

*Polo akpokpo 'ngú gba e kala 'ngbé ngámá Agilipa*

<sup>13</sup> Pita mbo oekpí, 'ngbé ngámá Agilipa ne ndai e na eelè Belenise,

akolo bhú gúdhú na Sedjale. U anu natsia ngámá Fesitisi. <sup>14</sup> U asi oo mbo ekpí bhelé. Abhomu-o, ngámá Fesitisi atsia akpokpo 'ngú gba Polo pi 'ngbé ngámá Agilipa me: «Kpála bini bhú tikpu si, ngámá Felikisi a'o nani ka ani ngae. <sup>15</sup> Ma anu nako lie bhú gúdhú na Yelusalema-a, ongbengbe odimandè gba Ebhe di ne obhelesi okpála gba omaYuda-a, ato siti 'ngú ne 'li ani muma. U atsia apa muma me, ma 'o 'ngú pí ani. <sup>16</sup> Ma agie pi uo me: «Agba ya okpála na Loma-a, kala me u 'o 'ngú pí kpála-a, ayo me u dudu ngaiza kala ongámási ne okpála inde agbe ani kala uo-o bhú dabili bini. Ani kpokpo 'ngú gba e ngú nagbegbe lie bhú 'ngú ango-o ko.»

<sup>17</sup> Ya atsia ago si ne uo bhú dabili bini. Ma djeke de, li ekpí aseke lie, ma aha líli me u go ne kpála ango-o kala ma li bili nakodho 'ngú-o. <sup>18</sup> Okpála inde ato siti 'ngú li ani pi ongámási-e ago. Engú bini, ma u siti 'ngú inde u asungula ani pi ongámási ngú e maka bhende ma adu abhundja e de. <sup>19</sup> La-a, u adu amene kpekebhe pindji 'ngú na Ebhe gba o di ne pindji 'ngú gba kpála bini inde 'li e me Yesu. Padhá de, anga kpála ango-o akpi, engú bini, Polo la ngapa me ani uu.

<sup>20</sup> Muma-a, ma mbila 'ngú ma akódho e li ngua 'ngú bhomu-o de. Kaka-a, ma ayi Polo atigala ani ziba nanu bhú gúdhú na Yelusalema, amba u kodho 'ngú gba ani-e oo.

<sup>21</sup> Engú bini, Polo ayo me 'ngbé ngámá na gúdhú na Loma kodho bha engú gba ni-e ngae. Abhomu-o, ma atsia aha líli me u lila ani bhú tikpu akolo li 'kpí ma atíma ani lie pi 'ngbé ngámá Kaisala ko.»

<sup>22</sup> 'Ngbé ngámá Agilipa atsia apa pi ngámá Fesitisi me: «Ngama di-e, ma akunda nga di me ma dje kpála ango-o.» Ngámá Fesitisi atsia agie pi ani me: «Mo odjé ani mambi.»

<sup>23</sup> Abhomu-o, li ekpí aseke lie,

'ngbé ngámá Agilipa ne Belenise ago bhú اساسا ne bhiti okpála. U ali bhú 'ti nakodho 'ngú bhú dabili bini ne ongámási gba osudha di ne ong-bengbe okpála na gudhu-o. Ngámá Fesitusi atsia aha líli me u go ne Polo. <sup>24</sup> Pipita-a, ngámá Fesitusi atsia apa me: «'Ngbé ngámá Agilipa di ne ndu yi okpála hana inde bhú dabili bini ne ya si-e, yi tsia nga kpála inde. Ndu omaYuda hana ago akpokpo 'ngú gba ani-e muma. U abhaka ma bhú gudhu na Yelusalema, u atsia ago belegu ei ne nasusula me: <A ayo me u bhelo ani!»

<sup>25</sup> Muma-a, ma u siti 'ngú inde ayo me u bhelo ani ka e de. La-a, ani ayo lie me 'ngbé ngámá na Loma kodho bha 'ngú gba ni-e ngae, ma atsia aziba me ma tima ani pi ani. <sup>26</sup> Ma mbila engú inde ma ti da naye e pi 'ngbé ngámá li engú gba ani-e de. Kaka-a, ma agbe ani kala yi, la ndju makpe kala mu, 'ngbé ngámá Agilipa. Yi ani, amba ma sia engú inde ma ayé e ko. <sup>27</sup> Padhá de, anga a ko muma engú na ngingi me, ma tima kpála na tikpu pi 'ngbé ngámá Kaisala me, ma nde suno ta 'ngú inde u aholo ani ngú e pi ani de ko.»

## 26

### *Polo akpokpo 'ngú gba e kala 'ngbé ngámá Agilipa*

<sup>1</sup> 'Ngbé ngámá Agilipa atsia apa pi Polo me: «Mu ti da nakpokpo 'ngú gba mu-o.» Abhomu-o, Polo a'e 'kpa e, ani atsia akpokpo 'ngú gba e me: <sup>2</sup> «'Ngbé ngámá Agilipa, naki-e, ma ne djali naali ngubula nakpokpo 'ngú gba ma kala mu li ndu 'ngú hana inde li omaYuda apa e li ma ko. <sup>3</sup> Padhá de, anga mu mbila dasundu di ne kpekebhe gba omaYuda hana. Kaka-a, ma ayo ka mu me, dje nga mbo ma ne 'ndjá bua.

<sup>4</sup> Ndu omaYuda hana mbila mukobho gba ma-a ndjindji nayie li nedhinga ma adu lie makombi-o. U mbila maka ma adu akobho lie bhú ká okpála na doto gba ma

di ne bhú gudhu na Yelusalema ndjindji. <sup>5</sup> U ambila nani ma didili. U ti da napapa ngao, i du me u nde akunda-o. Ma du nani ne saka omuFalisai inde adu alila líli nadhogo Ebhe gba ni-e ndjindji-o. <sup>6</sup> La mbia inde-e, u agbe ma li bili nakodho 'ngú-o anga ma ne 'to ma 'to engú inde li Ebhe apa nani kalanu me ni amene e pi onguo ogbi ni-o. <sup>7</sup> Okpála na piga ndjikpa ne ká bhisi gba ni-e, nga'o 'to o me engú ango-o amene lie mamene. Ka 'ngú ango-o, u ngamene kulu kpekpeke pi Ebhe, sukpe ne ngbikpi. 'Ngbé ngámá Agilipa, ngama di-e, ma bhadi ngabhuka moko. Kaka-a, omaYuda atsia ato siti 'ngú ne 'li ma pi ongámási. <sup>8</sup> Ka ni ngayi omaYuda, yi ti da nabhuka lie de me, Ebhe azúku okpála inde amu-o mazuku-o?

<sup>9</sup> Ngama makpe, ma adu abhundja nani me, ma mene ne kpeke me okpála abhuka Yesu, kpála na kuti Nadjaleta de. <sup>10</sup> A ko engú inde ma amene di-e bhú gudhu na Yelusalema ko. Ongbengbe odimandø aha kpadji muma ngao. Ma amba omabhuka bhelé bhú tikpu. U adu akodho 'ngú gba uo lie me u bhili uo, ma atsia adu aziziba. <sup>11</sup> Ma adu apu piko bhú oti nadje líli gba Moidje-o. Ma adu amene uo sisiti ngubula me u sobho Yesu. Bhú nabi 'gú gba ma-a, ma adu belegu nakpata uo bhú ogudhu gba ogandji okpála .»

### *Polo akpokpo maka ani adji bua e lie-o*

<sup>12</sup> Kaka-a, ekpi bini ma adu anu bhú gudhu na Damasi. Ongbengbe odimandø aha angu muma, u atsia atima ma oo. <sup>13</sup> Li kpadji-e, bhú nedhinga na tulukpe-e, 'ngbé ngámá Agilipa, ma au zi 'kpi ayie abhulá. Zi 'kpi ango-o adu kpekpeke naali ane zi ela mane. Zi 'kpi ango-o aholo aziga ma ngbalina bhú dabili bini ne okpála inde ya adu ne o ko. <sup>14</sup> Ndu ya hana, ya atuko kuto má dhululu!

Abhomu-o, ma atsia adje eli bini apa muma bhú eli gba omaYuda me: «Saulo, Saulo, ma ngato mbolo li ma ka ni? Mu ngaha likabhu pi mu makpe maka enu inde atu lie li ndula gba mulila gba e-o.»<sup>15</sup> Ma atsia ayi me: «A ko mu da, Ngámá?» Abhomu-o, Ngámá atsia agie muma me: «Ngama-a, ma ne Yesu inde mu ngato mbolo lie ko.

<sup>16</sup> Engú bini, yie bhúlá, amba mu lu malu. Padhá de, anga ma akoto li mu ngubula me mu kolo kpála na kulu gba ma-o. Mo okpókpó pi okpála me mo ou ma naki. Mo okpókpó di matá pi okpála ndu 'ngú hana inde ma asúno e pi mu sidi ko. <sup>17</sup> Ma alila mu ka omaYuda di ne ogandji okpála inde ma atima mu agba o-o. <sup>18</sup> Mo obhúlu djila uo, u zé bhú biti, u tsia lí li zi 'kpí. U dú matá sa líli gba Satana de. Engú bini, u adjí ibili lio pi Ebhe. I da me u nde abhuka ma-a, u tsia sía nambu li siti 'ngú gba o-o. U tsia dú la di bhú dabili bini ne okpála na bububu gba Ebhe-o.»

*Polo akpokpo 'ngú pindji engú inde ani amene e-o*

<sup>19</sup> «Kaka-a, 'ngbé ngámá Agilipa, nayie li nedhinga bhomu-o, ma yala titima na engú ma au e inde ayie ka Ebhe-e de. <sup>20</sup> Engú bini, ma akpokpo ngaiza pi okpála na gudhu na Damasi, ne okpála na gudhu na Yelusalema, ne okpála na ndu doto na Yudaya libhomu, la di ne pi ndu okpála hana na gandjigandji. Ma akpokpo pi uo me: <Yi dji bua yi, amba yi gie liyi li pápá gba Ebhe.> La matá di me: <Yi mene bádha kulu inde asúno me yi adjí bua yi kukulu.> <sup>21</sup> Ka 'ngú angoo, omaYuda aholo ma bhú 'ngbé 'ti Ebhe gba omaYuda, u di me bhelo ma. <sup>22</sup> Engú bini, Ebhe alila ma nakolo pi naki. Padhá de, anga ma ngakpokpo engú gba Yesu-o pi ndu okpála hana, pi ongisi di ne pi obhelesi okpála. Ma pa 'ngú koko de, bha bini bhende li opolofeta di ne Moidje

apa nani e me akólo makolo-o. <sup>23</sup> U apa nani me Masiya azú likabhu, ani tsia dú kpála na bini inde azúku bhú ká okpála inde amu-o. Ani akpókpó pi ndu okpála na piga gba ní-e hana di ne pi ogandji okpála ngali na zi 'kpí na mukobho.»

*Eli gba Polo ale nagbele bua 'ngbé ngámá Agilipa*

<sup>24</sup> Li nedhinga li Polo adu akpokpo 'ngú gba e lie, ngámá Fesitisi atsia asula me: «Polo, mu ne bhulu pele! Balua mo omene e naali-e ato bhú djila mu pele!» <sup>25</sup> Abhomu-o, Polo atsia agie pi ani me: «Ngámá Fesitisi, ma ne bhulu pele ade. Engú inde ma ngapa e, a ko 'ngú na kukulu di na imbilangú. <sup>26</sup> 'Ngbé ngámá Agilipa mbila ndu 'ngú bhomu-o hana ndjindji. Kaka-a, ma ngakpokpokpo pi ani ne tsulu ade. Ma aziba me ani mbu li susuka bini de. Padhá de, anga ndu 'ngú bhomu-o hana mene lie bhú pepe de. <sup>27</sup> 'Ngbé ngámá Agilipa, mo obhuka engú inde li opolofeta apa e uu? Ma ambila me mo obhuka!»

<sup>28</sup> Abhomu-o, 'ngbé ngámá Agilipa ayi Polo me: «Mo obhundja naamu me ni ti da nadi ma makilisito bhú nedhinga bedi mo-o?»

<sup>29</sup> Polo atsia agie me: «Belegu i da ngubula nedhinga bedi, belegu i da di ngubula nedhinga bhelé-e, ma ngayo Ebhe bha ngubula mu kpi mu kpi ade. Engú bini, ma ngayo Ebhe ngubula ndu yi okpála hana inde ngadje ma li 'kpí na naki. Ma ngayo Ebhe ngú yi me, yi kolo di maka ma nde lie, naneke bha bini ogbindjili inde bhú 'kpa ma inde.»

<sup>30</sup> Abhomu-o, 'ngbé ngámá Agilipa, ne ngámá Fesitisi, ne Belenise di ne ndu okpála hana inde adu bhú dabili bini ne uo-o, ayie bhúlá.

<sup>31</sup> U agbe lio ne li ngongo, u atsia akpokpo sunda o me: «Kpála inde-e mene siti 'ngú bini de inde ayo me, u to ani bhú tikpu di me u bhelo ani ka e-o.» <sup>32</sup> 'Ngbé ngámá Agilipa

apa pi ngámá Fesitisi me: «Í dú me kpála inde-e yó nako de me 'ngbé ngámá Kaisala kodho bha 'ngú gba ni-e ngae de-e, mu de agbe ani bhú tikpu agbe .»

## 27

### *U atima Polo bhú gúdhú na Loma*

<sup>1</sup> Li u apa lie me ya nu bhú doto na Itali bhú 'ngbé zabu-o, u atsia aha Polo di ne okpála koko na tikpu-o pi ngámá bini gba osudha. A adu 'li ani me Djuliusi. Ani adu ngámá pí 'ndji libi osudha inde u adu a'i o me «Osudha gba 'ngbé ngámá Kaisala-o .» <sup>2</sup> Ya aha 'ngbé zabu na gúdhú na Adalamite. 'Ngbé zabu ango-o adu anu li pápá li obili li ozabu alulu lie bhú ndu doto na Adjia-o. Abhomu-o, ya atsia agbida. Kpála bini na gúdhú na Tesalonike, bhú ndu doto na Makedonia, anu bhú dabili bini ne ya. A adu 'li ani me Alisitaluka.

<sup>3</sup> Li ekpí aseke lie, ya akolo bhú gúdhú na Sidona. Djuliusi adu ne bádha bua li pápá gba Polo. Abhomu-o, ani atsia aha kpadji pi Polo me ani nu agba obi e, amba u teteke ani ne oehe inde ani nde ne gumu e-o. <sup>4</sup> Ya yie lie oo, ya apu lingo kpomø na Sipele, anga anvi adu akunda nagie ya ne sidi. <sup>5</sup> Ya agulu 'ngbé 'ngu inde lingo ndu doto na Silisia di ne Pamifilia ko. Abhomu-o, ya atsia akolo bhú gúdhú na Mila bhú ndu doto na Lisia. <sup>6</sup> Oo, ngámá gba osudha-a abhaka 'ngbé zabu bini na gúdhú na Alekidjandili me a nde adji bhú doto na Itali, ani atsia abu ya bhúbhú.

<sup>7</sup> 'Ngbé zabu-o adu adhuku bhúbhuku naali. Kaka-a, ya amene 'kpí bhelé, ya atsia adje likabhu naali ngubula nakolo lingo gúdhú na Sinide. La ya ale lie nanu li pápá bhomu-o pima ka anvi-e, ya atsia apu lingo doto na Salamone inde ali ne abhú 'ngu bhú kpomø na Kelete ne asage-o. <sup>8</sup> Ya adhuku má tili tili lingo kpomø-o, ya atsia akolo li bili

inde u a'i e me «Babadha ngo 'gø», masikpe de gudhu na Ladje.

<sup>9</sup> Abhomu-o, da nadhuku bhú 'ngbé zabu-o atsia akolo sisiti, masikpe de namu ka okpála. Padhá de, anga nedhinga na anokomia natse 'zu na epe na odukpabini-e adu me a nde ane. Kaka-a, Polo atsia apa pi uo me: <sup>10</sup> «Ondaise ma, ma ngau me enú inde-e adú sisiti. 'Ngbé zabu ne oehe inde bhúbhú-o asíti masiti, abana nganí makpe-e, ní akólo masikpe de namu.»

<sup>11</sup> Engú bini, ngámá gba osudha adu aziba naae naali mabhundja gba kpála inde adu adjele 'ngbé zabu-o, di ne bhe gba bhulu 'ngbé zabu-o. Ani tsia ziba bhe gba Polo-o de. <sup>12</sup> Matá di-e, kuti ango-o ti ne nabhue bhúbhú bhú nedhinga na zini de. Abhomu-o, masikpe de ndu okpála hana inde adu bhú 'ngbé zabu-o atsia apa me o yie oo mayie. U adu akunda di me, i du me o nde ne ngasa-a, o de kolo bhú gúdhú na Fenikisi. A ko suka gúdhú na ngo 'ngu na kpomø na Kelete. A ngatsia 'kpí ne li pápá na sunda yoyoko ne akati, di ne sunda abebe ne akati. U adu akunda me o kolo oo ngubula me nedhinga na zini-e kodho 'kpí me o nde oo ko.

### *Anvi na kpekpeke ape pí 'ngu*

<sup>13</sup> Abhomu-o, anvi na bhúbhuku aholo nape nayie ne li pápá na yoyoko. U atsia aziba me mabhundja gba o-o akódho 'kpí ndjindji. U agbe kalase inde u agbite e li 'kpí ngú nalu ka 'ngbé zabu-o bhú 'ngu, u atsia aholo akpangba ngo kpomø na Kelete. <sup>14</sup> Kolo pita nedhinga bedi-e, anvi na kpekpeke inde u a'i e me «Elakele», ayie bhú kpomø, atsia aholo nape. <sup>15</sup> Anvi ango-o aholo atumba 'ngbé zabu-o. Da napa me 'ngbé zabu-o lu kakala-a adu kpekpeke. Abhomu-o, ya atsia a'o me 'ngbé zabu-o nu ibili bha ne ya li pápá inde li anvi adu atumba ya lie ko.



16 Ya akolo lingo mboye kp̄m̄e u a'i e me Kauda inde alila mbo ya bedi ka anvi-o. Abhom̄u-o, ya atsia amene ne kp̄eke ngú nagbili mboye kéké-o ne bhúlá. 17 U aha, u ato bhú 'ngbé zab̄u-o. Pipita-a, u agbigbite ngo 'ngbé zab̄u-o hana ne ekp̄ú ngú nalilila. U adu la lie ne tsulu me 'ngbé zab̄u anú atu lie li sike, i tsia bála o lingo doto na Libi de-e, u a'e bongo inde pí 'ngb̄u 'ngbé zab̄u-o, u atsia a'o me anvi d̄u ibili adyudyo o ngae. 18 Li ekp̄í aseke lie, anvi adu bha adyiki 'ngbé zab̄u-o ne ya kpekpeke. Kaka-a, u atsia aholo apandja oehe inde adu bhúbhú-o, ababala bhú 'ngu. 19 Bhú 'kp̄í na bata-a, okpála na kulu ngao makpe-e, u abha oehe inde nadjele 'ngbé zab̄u-o, u atsia abala bhú 'ngu. 20 Sunda 'kp̄í bhelé, ya u ela de. Ya u di oikupala de. Anvi adu bha nape kpekpeke. Ya d̄u matá ne 'to ya de me ya akóbho makobho-o de.

21 Okpála inde adu bhú 'ngbé zab̄u-o z̄u 'he de ngubula 'kp̄í bhelé. Abhom̄u-o, Polo ayie bhúlá, aní alu bhú ká uo. Aní atsia apa me: «Ondaise ma, i d̄ú nako me yi djé ma uu me ní ayie bhú kp̄m̄e na Kelete de-e, ní de sia ngua likabhu inde-e de. Oehe-e de siti la di-i de. 22 La mbia inde-e, yi sia kp̄eke bua. Padhá de, anga s̄uka yi bini kp̄í-i de, engú bini, asíti bha bini ne 'ngbé zab̄u-o. 23 Sukpe na naki-e, Ebhe inde ma nde ne bali gba e-e, ma nde la di ngamene kulu pí e-e, atima andjelu gba e m̄uma. 24 Aní atsia apa m̄uma me: «Polo, mo odjé tsulu de. A ayo me m̄u kpokpo 'ngú gba m̄u-o kala 'ngbé ngámá Kaisala. Kaka-a, Ebhe bhú bádha bhú 'bu gba e akóbho m̄u di ne okpála inde yi nde ngadholo bhú dabilí bini ne o bhú 'ngbé zab̄u-o.» 25 Ka 'ngú ango-o, ondaise ma, atou! Padhá de, anga ma ngabhuka me, Ebhe améne maka aní apa lie m̄uma ko. 26 Engú

bini, 'ngbé zab̄u anú atu lie ne ní lingo kp̄m̄e bini.»

27 Sukpe na ekp̄í na ndjikpa ne ká badha, anvi adu adyudyo 'ngbé zab̄u-o ne ya pí 'ngbé 'ngu inde 'li e me Adiliatike.\* Abhom̄u-o, tutu sukpe-e, okpála nadjele 'ngbé zab̄u-o abhundja naao me ya akolo dengo 'ḡo. 28 U aha ekp̄ú inde u agbite tili 'he li 'ndji e, u abhike bhú 'ngu. U atsia au me engu-o tsutsu metele ndjikpa bata ne ká mananika. U adyudyo mbo lío ne kalanu masudha, u atsia abhike matá bhú 'ngu. U au me engu-o tsutsu metele ndjikpa bhisi ne ká madjina.

29 U adu adje tsulu me 'ngbé zab̄u-o atú lie li oteme de. Kaka-a, u atsia abala okalase badha inde u agbigbite e li okp̄u-o bhú 'ngu ne akele 'ngbé zab̄u-o, ngubula me alu bhú da e bini. U atsia adu ne gumu me ekp̄í seke bhado má gala!

30 Okpála nadjele 'ngbé zab̄u-o adu agili kpadji ngú nakpe. Abhom̄u-o, u agbe mboye kéké-o, u abhike pí 'ngu. U amene mugito me u adji abala okalase inde u agbigbite e li 'kp̄u-o, ngú nal̄u ka 'ngbé zab̄u-o ne akala zab̄u-o. 31 Polo atsia apa pí ngámá gba osudha di ne pí osudha-a me: «Li okpála inde-e d̄u bhú 'ngbé zab̄u-o de-e, yi ti da nakobho de.» 32 Abhom̄u-o, osudha-a atsia atsotsolo okp̄u na mboye kéké-o, atsia atapa.

33 Kala me ekp̄í seke-e, Polo ayo ka ndu okpála hana me u z̄u 'he. Aní atsia apa pí uo me: «A ko naki ekp̄í ndjikpa ne ká badha, yi ngadjeke. Yi ngasi gumu. Yi le ku 'he belegu de bini. 34 Kaka-a, ma ayo ka yi me yi z̄u 'he. Padhá de, anga yi ne gugumu ngubula me yi kobho. Kpála bini bhú ká yi kp̄í-i de.» 35 Pita aní apa lie mo-o, aní aha mapa, aní agie heni pí Ebhe bhú ká djila ndu okpála hana. Pipita-a, aní agumu mapa-o,

\* 27:27 27:27 Adiliatike: 'Ngbé 'ngu ango-o s̄unda doto na Itali ne bhende gba oGiliki. U aye bhú obhuku koko me «'ngbé 'ngu na Meditelani».

ani atsia aholo nazuzu. <sup>36</sup> Abhomu-o, ndu uo hana asia kpéke bua, u atsia aholo di nazu 'he. <sup>37</sup> Bhú 'ngbé zabu-o, ya adu hana okpála kámá bhisi ndjikpa mananika ne ká madhia.† <sup>38</sup> U a'u'u lie, u atsia abala ngano bhú 'ngu ngubula me 'ngbé zabu-o kolo yayaka.

### *'Ngbé zabu-o alinda bhú 'ngu*

<sup>39</sup> Li ekpí aseke lie, okpála nadjele 'ngbé zabu-o mbila de me o bhú mangua doto dho-ie de. Engú bini, u au ngo 'gø di ne sike. U atsia abhundja me o ti da nadyudyo 'ngbé zabu-o li bili ango-o. <sup>40</sup> U abhubhulu okalase-o, u atse 'kpa tété bhú 'ngu. U abhubhulu di ekpú na oehe inde adu amene me 'ngbé zabu-o dhuku-o. Pipita-a, u abhulu bongo inde li bhúla 'ngbé zabu-o ngubula me anvi holo nadyudyudyo. Abhomu-o, u atsia aholo nanu ne li pápá na ngo 'gø. <sup>41</sup> Engú bini, 'ngbé zabu-o anu atu lie li 'ta sike, li bili inde li engu ngago lie ne ndu pasu bhisi hana-o. Bhúla 'ngbé zabu-o adha bhú 'ta sike-o, a ale adula lie pima. Tabhu tabhu-o atsia agumu. Padhá de, anga engu-o atu lie tété kpekpeke.

<sup>42</sup> Osudha adu akunda nabhili okpála na tikpu-o, amba suka uo bini akpé ne akango de. <sup>43</sup> Engú bini, ngámá gba osudha-a adu akunda nakobho Polo. Abhomu-o, ani ayoko uo me u améne mo-o de. Ani atsia aha líli pi okpála bhende ambila nati akango me u bala bhú 'ngu kalanu, amba u ze apí 'gø. <sup>44</sup> Okpála koko akpáta uo sidi me u nde ahoholo lío li opalangí di ne opapala 'he na 'ngbé zabu-o. Abhomu-o, ndu uo hana atsia akolo apí 'gø ndjindji.

## 28

### *Polo bhú kpemø na Malete*

<sup>1</sup> Pita ya akobho lie, ya atsia adje me a 'li kpemø ango-o me Malete.

<sup>2</sup> Okpála na kpemø ango-o asia ya ndjindji. Li ebha aholo adhi lie, zini aholo amene ya. Abhomu-o, u akpo djua má tu tu tu! Ya atsia ago adulu ndu ya hana dede. <sup>3</sup> Polo akuo 'i 'wa, ani abu bhú djua. Engú la bini, mbama akoto bhúbhú ka wowo djua, ani atsia adhedhe li 'kpa ani. <sup>4</sup> Li okpála na kpemø ango-o au lie me kpulu adhedhe li 'kpa ani mo-o, u atsia apa sunda o me: «Kpála inde-e bha ndju ne bhulu nabhøø kpála kukulu. Padhá de, anga belegu ani akobho lie bhú 'ngu-o, Ebhe inde 'li e me ngbili 'ngú ziba de me ani du bhú mukobho-o de.»

<sup>5</sup> Engú bini, Polo adyiki 'kpa e, kpulu-o atsia ati bhú djua, ehe bini mene ani de. <sup>6</sup> La-a, u adu adjeke me 'kpa ani adji asika di ne me ani atí kuto ne nakpi ka e bini. U adjeke ngengele, u au la lie me ehe bini mene ani de-e, u adji mabhundja gba o-o. U atsia apa me: «A ko ebhe!» <sup>7</sup> Ngámá na kpemø inde adu 'li e me Pubiliusi adu ne kuti gba e na ngbéngbé de bili ango-o. Ani asia ya ndjindji, ya atsia asi agba ani ekpí bata. <sup>8</sup> Bhú nedhinga bhomu-o, 'dyi Pubiliusi adu ne kuo pí mako. Ani adu ne bandji, ani atsia adu di agie ngute. Abhomu-o, Polo anu natsia ani. Ani ayo Ebhe pi ani. Ani a'o 'kpa e pí 'ndji ani. Ani atsia akobho ani. <sup>9</sup> Pipita-a, okpála koko inde adu ne kuo bhú kpemø bhomu-o, ago di nabhaka ani, ani atsia akobho uo. <sup>10</sup> U adhøge ya naali. Nedhinga nayie ka ya oo, u aha ndu 'he hana inde a ti ne ya ngubula kpadji-e pi ya.

### *Polo akolo bhú gudhu na Loma*

<sup>11</sup> Pita epe bata-a, ya a'u bhú 'ngbé zabu na Alekidjandili. A adu 'li 'li me «Diosikulese.\*» Nedhinga na zini ane nani 'ngbé zabu ango-o bhú kpemø oo. <sup>12</sup> Ya akolo lie bhú gudhu

† 27:37 27:37 Kámá bhisi ne ndjikpa mananika ne ká madhia: U aye bhú obhuku koko me «kámá bhisi ne ndjikpa mananika ne ká bhuluvue.» \* 28:11 28:11 Diosikulese: A ko nani oebhe obhukosi inde li oGiliki adu aha o maka oebhe gba o. Okpála nadhuku bhú 'ngu aha nani uo maka oebhe inde adu alila o ko.

na Silakusi, ya asi oo ekpí bata. <sup>13</sup> Ya ayie oo, ya aholo nakpangba ngo 'ngu, ya atsia akolo bhú gúdhú na Ledjio. Li ekpí aseke lie, anví ayie ne li pápá na yoyoko, aholo nape. Abhomú-o, pita 'kpí bhisi-e, ya atsia akolo bhú gúdhú na Pudjole. <sup>14</sup> Bhú gúdhú ango-o, ya abhaka ondaise ya omabhuka oo. U atsia ayo ka ya me ya dū mbo ne o ngubula poso bini. Abhomú-o, ya atsia anū bhú gúdhú na Loma. <sup>15</sup> Ondaise ya na gúdhú na Loma adje me ya akolo. Kaka-a, u ago akolo bhú gúdhú inde 'li e me Daposo na Apiusi, di ne bhende 'li e me Oeti Bata, ngú nakə lio ne ya. Li Polo au uo lie, aní agie heni pí Ebhe, aní atsia asia kpéke bua. <sup>16</sup> Abhomú-o, ya akolo bhú gúdhú na Loma. U aha dabili pí Polo kpi bhú dabili bini ne sūdha inde adū atsia 'kpí li aní-o.

*Polo akpokpo 'ngú gba e bhú gúdhú na Loma*

<sup>17</sup> Abhomú-o, pita ekpí bata-a, Polo a'i ongámási gba omaYuda inde ngadulú bhú gúdhú na Loma-a agba e. U apo bhúla o lie, aní atsia apa pí uo me: «Ondaise ma, ma mene okpála na kuti gba ní-e sisiti de. Ma siti la di dasundū gba onguo ogbi ní-e de. Abana mo-o, u aholo ma bhú gúdhú na Yelusalema, u atsia apū ma pí okpála na gúdhú na Loma. <sup>18</sup> U ayiyi ma li ongú. Engú bini, u u ma ne engú bini inde u ti da nabhəle ma ka e de. Kaka-a, u adū akúnda me o tse 'kpa li ma. <sup>19</sup> La li omaYuda ayala lie, ma atsia au ndjindji me 'ngbé ngámá Kaisala kodho 'ngú gba ma-a ngae. Engú la bini, ma dū akúnda na'o 'ngú pí okpála na kuti gba ma-a de. <sup>20</sup> Kaka-a, ma akúnda nako me ma u yi, amba ní gama la di 'ngú ne yi. Padhá de, anga u agbite ma ne gbíndjili inde-e kabula kpála inde li omafsalaele nde ne 'to o me Ebhe atima e-o.»

<sup>21</sup> U agie pí aní me: «Ya sia balua bini nayie bhú ndu doto na Yudaya

inde akpokpo 'ngú pindji 'ngú gba mū-o de. Suka ondaise ya bini yie oo go ei de ne engú gba mū, di go kpokpo 'ngú na sisiti li kute mū de. <sup>22</sup> Engú bini, ya akúnda me kpokpo nga bha ngamū makpe, engú inde mū ngabhundja e ko. Padhá de, anga ya ambila me ne ndū bili hana, okpála ngapa 'ngú sisiti li libi okpála gba mū-o.»

*Polo akpokpo Bádha Ngali pí omaYuda na gúdhú na Loma*

<sup>23</sup> Abhomú-o, omaYuda a'o matá ekpí bini ngú nakə lio ne Polo. Li 'kpí ango-o, u ago bhelé naali li bili inde aní adū asi lie ko. Nayie kəkpí nakolo tagolo-o, Polo adū akpokpo 'ngú pí uo pindji Nau gba Ebhe-o. Aní adū amene ne kpéke me u ziba Yesu. Bhú nakpokpo 'ngú ango-o, aní adū atanga pí uo líli gba Moidje di ne obhuku gba opolofeta. <sup>24</sup> Okpála koko aziba engú inde aní akpokpo e-o. Engú bini, okoko tsia bhuka de. <sup>25</sup> Abhomú-o, u agbo bhúsū o me u nde dje lio sūnda o de. Polo atsia apa bha pí uo me: «Engú nani inde li Bu Bhobua apa e bhú 'li polofeta Isaya pí onguo ogbi yi-e, a ko kukulū 'ngú! <sup>26</sup> Aní apa nani me: <Nū pa pí okpála bhomú-o me:

Yi adjé 'kpí ndjindji, engú la bini, yi mbíla tata-a de.

Yi atsia 'kpí ndjindji, engú la bini, yi ú 'kpí de.

<sup>27</sup> Padhá de, anga bua uo akolo maka teme.

U anini 'dje o, u agbagba djila o, ngubula me, djila o aú 'kpí de, 'dje o adjé 'kpí de,

imbilangu gba o-o ambíla tata-a de,

u adjí bua o de,

amba ma akóbho uo de. Ebhe apa mo-o.†»

<sup>28</sup> Do Polo matá me: «Yi mbila me, Ebhe atima ngali na mukobho gba e pí ogandji okpála. Ngauo di-e, u adjé madje.» [ <sup>29</sup> Li u adje engú inde li Polo apa e lie, omaYuda atsambala

† 28:27 28:26-27 Tsia bhú Isa. 6:9-10.

me u nde ngamene kpekebhe sunda  
o kpekpeke.]

<sup>30</sup> Abhomu-o, Polo asi kalanga  
bhisi libhomu bhú eti inde ani adu  
nadu bhú e me ani nde ngaha pi  
bhubhulu-o falanga ko. Oo, ani atsia  
adu asia ndu okpala hana inde adu  
ago atsia ani-o. <sup>31</sup> Ani adu akpokpo  
ngali Nau gba Ebhe, di ne nasuno  
ne angu hana engu gba Ngama Yesu  
Kilisito-o . Ehe bini ni kpadji pi ani  
de.

**Balua gba Polo  
pi omabhuka na gudhu  
na  
Loma  
Eli na kalanu**

Balua inde li Polo aye nani e pi omabhuka na Loma-a , ani aye nani ngu napa pi uo me ni ne gamu ngu nanu atsia Dadjua na gudhu na Loma. Gamu gba ani adu me ni mene mbo kulu ne omabhuka inde oo, ngubula nedhinga bedi amba u teteke di ni ngubula nanu abhu Esipanye. Ani aye balua ango-o ngu nakpokpo lele maka ani ambila lele nabhuka bhú Yesu nde lie di ne ongu inde li nabhuka ango-o ngamene e, ngubula mukobho gba omakilisito. Engu li Polo akpokpo e hana abhu bhuku inde.

Pita li Polo ayi okpala na Dadjua na gudhu na Loma di ne ani ayo Ebhe pi uo lie-e, ani akpokpo engu na ngbéngbé inde bhú balua pi uo, engu inde me: Bádha Ngali ngasuno maka li Ebhe ngamene lie me okpala kolo ngbingbili: a ko ka nabhuka, nayie li lilita akolo ali soso (1:17).

Pipita-a, Polo atsia abhulu 'ngu ango-o. Ani apa me: i du omaYuda, i du die omupagano, a ayo me u kolo ngbingbili kala Ebhe. Padhá de, anga ndu uo hana amene siti 'ngu. Abhomu-o, li soso, Polo aye ongu pindji lele nadu ka mukobho gba omakilisito, ane la mane li kpadji na mukunda bhú nadu naje lio ne okpala koko. Ani atsia agama matá 'ngu pindji ongu maka kulu gba Ebhe, ne engu inde a ayo me omakilisito mene e pi ongámasi na doto, ne bhende gba okpala sunda o. Ani abu ta balua gba e ne nakpokpo 'ngu gba e makpe di ne oeli bhe nadhøge Ebhe.

**Ongbenge ongu inde bhú bhuku inde-e ngaie inde:**

Eli na kalanu ne engu na ngbéngbé inde bhú bhuku inde  
1:1-17

Gamu nasia mukobho 1:18 - 3:20  
Mabhundja gba Ebhe ngubula mukobho 3:21 - 4:25

Mukobho na mbia bhú Kilisito 5:1 - 8:39

Isalaele bhú mabhundja gba Ebhe 9:1 - 11:36

Lele dasundu gba omakilisito 12:1 - 15:13

Eli na soso ne nayi okpala 15:14 - 16:27

*Polo yi omabhuka na gudhu na Loma mayi*

<sup>1</sup> Ma aye balua inde-e ngama Polo. Ma ne bali gba Yesu Kilisito . Ebhe a'i ma me ma du ne bhulu titima gba ni, ani atsia a'o ma kpi pi e ngu nanu nakpokpo Bádha Ngali gba ni e pi okpala.

<sup>2</sup> Ebhe apa nani bhutode me ni atima Bádha Ngali bhomu-o pi okpala li kpadji gba opolofeta gba ni-o. Ani apa nani engu ango-o bhú Bhuku gba e-o. <sup>3</sup> Bádha Ngali ango-o pindji ndili gba ani Yesu Kilisito inde Ngámá gba ní-o. U azu ani bhú kate bhú piga gba 'ngbé ngámá Davidi. <sup>4</sup> Engu bini, li kpadji gba Bu Bhobua-a , ani asuno lie maka Ndili gba Ebhe bhú angu nedhinga ani azuku lie bhú ká okpala inde amu-o. <sup>5</sup> Li kpadji gba ani-e, Ebhe asuno bádha bhú 'bu muma me ma kolo bhulu titima gba ani. Ma ne bhulu titima ngubula me ma gbele ndu okpala inde ne omaYuda ade-e hana me u bhuka Yesu Kilisito, u manga ani, amba u toko la di ani. <sup>6</sup> Ngayi okpala na Loma-a , yi di bhú ká okpala bhomu-o, ngayi okpala inde li Ebhe a'i o me yi kolo di okpala gba Yesu Kilisito-o.

<sup>7</sup> Ma aye balua inde-e pi ndu yi hana, ngayi okpala inde li Ebhe nde ne mukunda pi o-o, ani atsia a'i o me yi du bhú mukobho pi ni-o. A ayo me Ebhe 'Dyi ní, ne Ngámá gba ní Yesu Kilisito suno bádha bhú 'bu

gba o-o pi yi, amba u ha di guo 'ngú pi yi.

*Polo apa me ni ne gumu nakpokpo Bádha Ngali gba Ebhe-e pi ndu okpála hana*

<sup>8</sup> Kala ndu 'ngú hana-a, ma ngagie heni pi Ebhe gba ma li kpadji gba Yesu Kilisito. Ma ngagie heni pi ani li 'ngú gba ndu yi hana, anga okpála na pála doto libhomu ngakpokpo 'ngú pindji nabhuka gba yi-o. <sup>9</sup> Ndu nedhinga hana, ma du nayo Ebhe-e, ma ngayo ani ngubula yi. Ebhe apa li ma ngae me a ko kukulu 'ngú. Ma ngamene kulu lima pi Ebhe bhomu-o li kpadji nakpokpo Bádha Ngali inde atsia Ndili gba ani-o. <sup>10</sup> Ma ngayo Ebhe ndu 'kpí hana me ani kunda-a, ani de bhulu kpadji muma me ma kolo li yi. <sup>11</sup> Padhá de, anga ma ne gumu naali me ma u yi ngubula me yi sia di bádha bhú 'bu inde ayie ka Bu Bhobua-a, amba yi sia angu li bua yi. <sup>12</sup> Ma akunda mangbo napa me ma ne gumu nakolo li yi ngubula napa me ní to angu bhú ní sunda ní ne yi. Ka nabhuka ní nde ne e bhú Kilisito-o, ma to angu bhú yi, amba yi to di angu bhú ma.

<sup>13</sup> Ondaise ma, yi mbila me bhatsibhatsi, ma adu ne mabhundja nanu agba yi, engú bini, ma sia nga kpadji de nato pi naki. Ma ne gumu nago gba yi ngubula me kulu gba ma-a zu di nguwa agba yi maka a azu di nguwa lie agba opiga koko inde ne omaYuda ade-o. <sup>14</sup> Kaka-a, a ayo me ma kpokpo Bádha Ngali pi ndu okpála hana, abana i du pi oGiliki di ne pi okpála inde ne oGiliki ade-o. Ma akpokpo Bádha Ngali bhomu-o pi okpála inde amene balua di ne obhende i mene balua de. Ebhe aha bhobhomu-o muma ngae. <sup>15</sup> A bhomu-o ta 'ngú inde ma nde lie ne gumu nago nakpokpo di Bádha Ngali pi yi, ngayi okpála inde ngadulu bhú gudhu na Loma-o.

<sup>16</sup> Ma belegu ne numu ade ngú nakpokpo Bádha Ngali-o. Padhá de, anga a bhúbhú ne angu inde li Ebhe ngamene kulu ne e ngú nakobho ndu okpála hana inde ngabhuka-o. Ebhe ade kpadji angu-o ngú nakobho ngaiza omaYuda, pipita-a, okpála inde ne omaYuda ade ko. <sup>17</sup> Padhá de, anga Bádha Ngali angu-o ngasuno lele maka li Ebhe nga'o okpála lie ngbingbili bhú djila e-o. Kpadji angu-o ngakpo lita e bhú nabhuka, engú koko kekele ade. A maka li Bhuku gba Ebhe-e apa lie me: «Kpála inde abhuka Ebhe-e, Ebhe méne me ani kolo bhú djila ni ngbingbili, a ko kpála inde bhú kukulu mukobho.†»

*Bua Ebhe ngake ne osisiti 'ngú gba okpála make*

<sup>18</sup> Li Ebhe nde lie abhúla-a, ani ngasuno mbámbá me ni ngazi mbutu li ndu osisiti 'ngú hana inde li okpála ngamene e li ani-o di ne bhe li okpála ngamene e sunda o-o. Ani ngazi mbutu anga ndu osisiti 'ngú li okpála ngamene e ngani kpadji me okpála koko ambila kukulu 'ngú de. <sup>19</sup> La-a, engú inde ayo me okpála mbila e li pápá gba Ebhe-e mbámbá pi ndu okpála hana. Ebhe ngae makpe apana pi uo mbámbá.

<sup>20</sup> Padhá de, anga nayie maka li Ebhe abho kokpi ne doto lie nakolo pi naki-e, ndu oehe inde ani abho e hana ngasuno ani mbámbá me ani maka da-ie. Oehe bhomu-o ngasuno me a bhú ani ne angu na dudama, oehe bhomu-o la bhadi ngasuno mbámbá me a ko Ebhe. Kaka-a, Ebhe ti da nambu li okpála inde aziba siti 'ngú-o de. <sup>21</sup> Padhá de, anga abana u ngambila lie hana me Ebhe uu-o, u dhogo ani de, u gie la di heni pi ani de maka ayo lie me u mene pi ani-o. Engú bini, mabhundja gba uo-o ati ngingi, bua uo bhú biti, u mbila matá bádha 'ngú de. <sup>22</sup> U ngapa me a bhú 'ndji

† 1:17 1:17 Tsia bhú Abk. 2:4.

o ne imbilangu, engú bini, u akolo obhulú pele. <sup>23</sup> Pi uo-o, ngú napa me u dhögø sangu gba Ebhe inde bhú mukobho dáduma ne dáduma-a, u mene mo-o de. U mangbo ngadhögø okulu 'he inde li okpála abho o maka o-o. La-a, kpála bhú mukobho dáduma ne dáduma ade. U di ngadhögø okulu 'he inde li okpála abho o maka oedhu, maka onú di ne obhende ngagbeke lio ne 'bu o kuto.

<sup>24</sup> Kaka-a, Ebhe atse 'kpa li uo me u mene ongú na sisiti inde li bua uo ngakúnda me u mene e-o. U ngamene lie mo-o, u bhomu-o ngamene engú na nümü lio sùnda o. <sup>25</sup> Ngauo-o, u a'o nabhuka kúkulu 'ngú inde atsia Ebhe-e li ngongo, u atsia abhuka eu. U ngadhögø oehe inde li Ebhe abho o, uo di ngamene kulu lio pi oehe ango-o, engú bini u dhögø Ebhe inde abho ndú 'he hana ngae de. A ayo la me u de atoko mangbo ani dáduma ne dáduma. A adú moko!

<sup>26</sup> Kaka-a, Ebhe atse 'kpa li uo me u mene ongú na nümü li gumu e asi bhú uo bedhe-o. Olisi gba uo-o nga'o ká obhosi, u ngadhuku ne obi o olisi mada obhosi. <sup>27</sup> A bhadi pi obhosi moko. U di nga'o ká nadhuku ne olisi, u abedhe mangbo ne gumu nadhuku ne obi o obhosi mada olisi. Obhosi ngamene engú na nümü ne obi o obhosi koko. U ngagbele pí o makpe bhomu-o ke 'ngú gba Ebhe inde ati ne ngua siti 'ngú u amene e bhomu-o.

<sup>28</sup> Maka li okpála bhomu-o ayala lie nambila kúkulu 'ngú inde atsia Ebhe-e, Ebhe atse 'kpa li uo me u abhúndja matá ndjindji de, di ne me u mene engú inde ayo de me u mene e mo-o de. <sup>29</sup> Sisiti 'ngú abedhe li bua uo bedhe, u abedhe ne gumu 'he gba okpála koko, a ko okpála na siti bua , u ngadje siti bua li obi o naali, u ngabhili obi o, a ko obhulú nagbe bhayiki, a ko obhulú kali, a ko obhulú napa eu ne 'li obi o. <sup>30</sup> U ngapa 'ngú lio sùnda o sisiti, a ko

obhulú yala gba Ebhe, u ngasobho obi o, u ngadje kute o, u ngapa 'li o, uo ndú 'kpí hana bedhe 'ngú nabhundja siti 'ngú koko na mbia, u manga okpála azu o-o de.

<sup>31</sup> Bubua li uo ade, u ngapa 'ngú ne 'li o bhisi bhisi, u ne mukúnda pi obi o ade, ndjinga bhú uo ade.

<sup>32</sup> U mbila hana me 'li Ebhe apa me okpála inde ngadhuku li ngua kpadji bhomu-o ati ne nakpi. Abana u ambila lie mo-o hana-a, u bha bini nganú ne kalanú bhú namene ngua osisiti 'ngú bhomu-o. Bhe ane la matá mane-e, u ngakpi ndjili li okpála inde ngamene ngua osisiti 'ngú bhomu-o.

## 2

### *Ebhe ngakodho 'ngú gba okpála li lelele*

<sup>1</sup> Ngamú kpála bhende a'o lie bhú dá djudji ngú nakodho 'ngú gba okpála koko-o, abana mú dú bha ne da-ie, Ebhe mbú li mú de. Padhá de, anga nedhinga mú ngakodho 'ngú gba okpála koko lie me mú nde bhadi ngamene 'ngú maka uo-o, mú ngato ngulú mú bhú 'kpí bhomu-o ngamú makpe. <sup>2</sup> Ní mbila hana me Ebhe ngakodho 'ngú gba okpála inde ngamene ngua sisiti 'ngú bhomu-o li lelele. <sup>3</sup> Ngamú kpála inde ngakodho 'ngú gba okpála koko li ngua siti 'ngú inde ngamú makpe mú ngamene e-e, mo obhundja naamú me mo onéke mangimbo gba Ebhe-e maneke?

<sup>4</sup> Nedhinga koko-o, mú ngau Ebhe bhú djila mú padhá, anga ani babadha naali, ani di ne 'ndjá bua, ani di ngandjili má bulu li osisiti 'ngú mú ngamene e-o. Mú u de me ani ngamene mú ndjindji ngubula me mú dji bua mú-o di? <sup>5</sup> Ngamú-o, mú ne kpéke 'ndji, mú kúnda nadjji bua mú de. Kaka-a, mú bhomu-o ngagbele pí 'ndji mú mangimbo bhende ane la matá mane bhú ekpí inde li Ebhe asúno ke 'ngú gba e lie, ani tsia kódko di engú gba okpála

hana ngbingbili-o. <sup>6</sup> Ekpí ang-o, ani ahá makalá pí kpála ne kpála li lele kulu gba e inde ani amene e-o.†  
<sup>7</sup> Ani ahá mukobho na dáduma pí okpála bhende adhedhe li namene bádha 'ngú-o. Okpála ang-o ngagili sangu sakpa ani, u ngagili me ani pa 'ngú gba o-o ndjindji, di ne me o sia mukobho na dáduma.

<sup>8</sup> Engú bini, ani asúno ke 'ngú gba e pí okpála bhende agbe kpéke 'ndji li ani-o, okpála inde ayala kukulú 'ngú inde di ngaziba namene siti 'ngú-o. Ani aké 'ngú lie pí uo na kuo kuo! <sup>9</sup> Ndu okpála hana inde ngamene siti 'ngú-o, asía likabhu bhe na kuo kuo! Likabhu ang-o akpó ngaiza li omaYuda, pipita-a i ké di li okpála inde ne omaYuda ade-o. <sup>10</sup> Engú bini, Ebhe ahá sangu pí kpála ne kpála inde ngamene bádha 'ngú, ani apá 'ngú gba uo-o ndjindji, ani tsia há di guo 'ngú pí uo. Ndu babadha 'ngú bhomu-o hana, Ebhe ahá ngaiza pí omaYuda, pipita-a ani tsia há di pí okpála inde ne omaYuda ade-o. <sup>11</sup> Padhá de, anga Ebhe ngakodho 'ngú gba kpála ne kpála li lelele, ani tsia bhála kpála de.

<sup>12</sup> Ndu okpála hana inde ngamene siti 'ngú mandí nambíla líli gba Moidje-e, amú mamu, nakpi gba uo kpáta la lele líli gba Moidje de. Engú bini, ndu okpála hana inde ngamene siti 'ngú me u nde ambíla líli gba Moidje hana-a, Ebhe akódho bhadi 'ngú gba uo-o nakpata lele líli bhomu-o.

<sup>13</sup> Padhá de, anga okpála inde ngbingbili bhú djila Ebhe-e, a ko obhende ngadje líli gba Moidje ne 'dje o-o de, engú bini, okpála inde ngbingbili bhú djila Ebhe-e, a ko obhende ngamene engú maka li líli-e aziba lie-o. <sup>14</sup> Okpála inde ne omaYuda ade-e, u mbíla líli gba Moidje-e de. Nedhinga koko, u la ngamene 'ngú maka li líli apa lie. Bhobhomu-o asuno me líli ang-o

asi kuti e abhú uo, belegu u mbíla lie de-o. <sup>15</sup> U bhomu-o ngasuno me engú inde li líli-e apa e asi kuti e li bua o. Bua nakpokpo ku 'ngú ne mabhundja gba uo-o bhadi ngasuno moko. Nedhinga koko-o, u ngambíla me o omene engú ndjindji ne me o omene sisiti. <sup>16</sup> A bhomu-o engú inde akóto ekpí inde li Ebhe akódho 'ngú gba okpála lie li kpadji gba Yesu Kilisito-o. Ekpí ang-o, Ebhe akódho 'ngú gba okpála maka li Bádha Ngali inde ma ngakpokpo e ngapapa lie-o. Ebhe akódho 'ngú ang-o píndji ongú inde awo lie mawo, inde li okpála ngabhundja e li bua o-o.

#### *OmaYuda na kukulú-o ngao dho?*

<sup>17</sup> La ngamu kpála inde ngapa me ni ne maYuda-a, mu ngalu pí líli gba Moidje-o, mu di ngabhi 'kpa mu pí mbulu mu me ni ne kpála gba Ebhe. <sup>18</sup> Mu mbíla engú li Ebhe akúnda e hana, líli gba Moidje asuno la bhadi pí mu ndjindji me engú inde babadha ngae dho-ie. <sup>19</sup> Mu ngabhundja li bua mu me ni ngasuno kpadji pí okpála inde i u kpí de. Mu di ngabhundja li bua mu me ni ne zi 'kpí pí okpála inde bhú biti-o. <sup>20</sup> Mu ngabhundja li bua mu me ni ti da nasuno 'ngú pí okpála bhende imbíla 'ngú de-o. Mu di ngabhundja li bua mu me ni ti da nasuno 'ngú pí okpála bhe i bhele nga li kpadji gba Ebhe-e de-o. Mu ngabhundja me líli gba Ebhe-e asuno imbilangu ne kukulú 'ngú pí ni hana.

<sup>21</sup> Kaka-a, ma ngayi mu me, ngamu kpála inde ngasuno 'ngú pí okpála koko-o, mu suno 'ngú ang-o pí mu ngamu bhubhulu de ka ni? Ngamu kpála inde ngapa pí okpála me u azí 'he de-e, mu ngazi 'he ka ni? <sup>22</sup> Ngamu kpála inde ngapa pí okpála me u akúnda elə, i du di-e bhoko gba kpála koko de-e, mu la ngakúnda elə, i du di-e bhoko gba kpála koko ka ni? Ngamu kpála inde ngayala engú na oebhe na eu-o, mu

† 2:6 2:6 Tsia bhú Ets. 62:13; di ne bhú Gbt. 24:12.



la ngabha oehe bhú 'ti nayo gba uo-o ngú ni? <sup>23</sup> Ngamú kpála inde ngabhi 'kpa mú pí mbulu mú me ni mbila líli gba Ebhe-e hana-a, mú nde la ngandjo líli ango-o, okpála ngasiti 'li Ebhe ka mú, anga mú ngamene engú maka lí líli gba ani-e apa lie ade. <sup>24</sup> A maka u aye lie bhú Bhuku gba Ebhe-e me: «Okpála inde ne omaYuda ade-e ngasobho 'li Ebhe ka engú lí ngayi omaYuda yi ngamene e-o.†»

<sup>25</sup> † dũ me mú nde ngamene engú maka lí líli-e apa lie, nali gandja pí mú ne tata. La-a, i dũ me mú nde mene engú maka lí líli-e apa lie de-e, a mana mágito me mú lí gandja de. <sup>26</sup> La di-e, lí kpála inde i lí gandja de-e dũ namene engú maka lí líli-e apa lie, Ebhe ú ani mágito me a ko kpála bhe alí gandja. <sup>27</sup> Kpála inde i lí gandja bhú kute de, engú bini, inde i ngamene engú maka lí líli-e apa lie, akódho 'ngú gba mú-o ngae, ngamú kpála inde i kpata líli-e de, abana inde lie me a ka mú ne líli, mú nde alí la di gandja-o.

<sup>28</sup> Padhá de, anga a ko de me kukulú maYuda-a, a ko bha bhende lí okpála ngau e lí kute e de, inde alí di gandja bha lí kute e de, ngú napa me okpála u ne djila o-o de. <sup>29</sup> La-a, kukulú maYuda-a, a ko bhende ne maYuda lí bua e, inde alí gandja lí lele Bua gba Ebhe, inde i lí gandja bha bini ka líli-e de. Kpála ango-o, Ebhe ngatoko ani ngae, okpála toko ani ngao de.

### 3

*Ebhe ndũ 'kpí hana bedhe ngú namene engú inde ani apa me ní améne e-o*

<sup>1</sup> † dũ me a nde mo-o, ta nadũ ne maYuda ne ní? Nali gandja ngateteke kpála lele pí? <sup>2</sup> Ndũ 'ngú bhomũ-o hana bha ndjindji! Ebhe ambamba ngaíza nani ta engú gba e pí uo omaYuda. <sup>3</sup> A na paká me okpála koko bhú ká uo kpata nani

ongú lí Ebhe apa e ne bua bini-e de. La-a, Ebhe amene bha naae engú inde ani apa nani me ní améne e pí uo-o. <sup>4</sup> Abana lí ndũ okpála hana dũ bha ne obhulũ eu-o, Ebhe papa bha naae kukulú 'ngú. A maka u aye lie bhú Bhuku gba ani-e me:

«Ngamú Ebhe, nedhinga mú ngagama 'ngú lie, ndũ okpála hana ngambila me mú ne ngbili kpála .

† dũ di me u nde anũ ne mú gba okpála nakodho 'ngú-o, u ú ehe inde ayo me u holo mú lí e belegũ de bini.†»

<sup>5</sup> Ma gama nga 'ngú nakpata lele maka okpála-kuti agagama 'ngú lie. Nedhinga koko, okpála koko pá me siti 'ngú ní ngamene e ngateteke okpála ngú nambila me Ebhe ne ngbili kpála. U pa mo-o, ní gíe pí uo mangua 'ngú dho? Ní gíe pí uo me a ko paká, Ebhe ne ngbili kpála, anga ani nga'o mangimbo pí 'ndji ní ade. <sup>6</sup> Ebhe bha ndũ 'kpí hana ne ngbili kpála, ani ngakodho 'ngú gba okpála na doto kaka.

<sup>7</sup> Engú bini, okpála koko tí da napa me eu o ngapa e ngagbe kukulú 'ngú gba Ebhe bhú mbasũ, a di ngaha sangu pí ani. A ko la ní lí Ebhe nga'o 'ngú lie pí o mágito me o ne osisiti okpála? <sup>8</sup> Okpála koko ngasobho ya. U ngapa lí ya me ya apa me: «Ní mene siti 'ngú, amba ní u lele bádha 'ngú inde akóto bhúbhú-o.» Ebhe a'o mangimbo pí okpála bhomũ-o a'o. U atí la bhadi ne di.

*Ndũ okpála hana ngamene siti 'ngú*

<sup>9</sup> Nganí omaYuda-a, ní belegũ bhú djila Ebhe ngbéngbé ade da nane opiga koko. Ma apa igini apa me ndũ ní okpála hana ní sa líli gba siti 'ngú. <sup>10</sup> A maka u aye lie bhú Bhuku gba Ebhe-e me:

«Ngbili kpála ade, belegũ de bini.

† 2:24 2:24 Tsia bhú İsa. 52:5. † 3:4 3:4 Tsia bhú Ets. 51:6.

- 11 Kpála inde ngakø mboli 'ngú ade,  
kpála inde ngagili Ebhe-e belegu ade bini.
- 12 Ndu okpála hana a'o ká kpadji gba Ebhe-e a'o,  
ndu uo hana angita.  
Kpála inde ngamene bádha 'ngú-o ade,  
belegu de bini!†
- 13 Tangulu uo mana lata inde li 'bhø e nde bábá.  
'Mi uo ngapa 'ngú napite okpála.  
Eli inde ngaze bhú 'bhø uo mana sili kpalu inde ngabhili okpála.†
- 14 U ngatu pødjø li okpála ndu 'kpí hana ne 'bhø o,  
u di ngapa oeli na susu pi uo.†
- 15 U ngagu holo ne angu o hana ngú nanu nabhili okpála.
- 16 Ndu bili u ngapu li e hana-a, u ngasiti ohe, u di ngato mbolo li okpála.
- 17 U mbila kpadji na guo 'ngú de.†
- 18 Tsulu Ebhe bhú uo belegu ade bini.†»
- 19 Ní mbila hana me ndu 'ngú inde u aye e bhú líli-e hana, u aye pi okpála inde li Ebhe aha nani líli angu-o pi o-o. Ebhe amene mo-o ngubula nagbite 'bhø ndu okpála hana ne napa me ni 'o mangimbo pi 'ndji ndu uo hana. 20 Padhá de, anga kpála bini belegu ade inde i ti da nakoto ngbili kpála kala Ebhe ka namene líli-o. Kulu gba líli-e bha bini ne nateteke okpála ngú nambila me siti 'ngú ngae dho-ie.

*Kpála ngakolo ngbingbili bhú djila Ebhe ka nabhuka*

- 21 Mbia inde-e, Ebhe apana kpadji inde ngamene lie me okpála kolo ngbingbili kala ni-o. Kpadji angu-o kpi, a koto li líli de. Obhuku na olíli di ne obhuku gba opolofeta apa nani engú angu-o kalanu. 22 Kpadji angu-o me, Ebhe nga'o okpála ngbingbili

kala e li kpadji nabhuka Yesu Kilisito ka uo-o. Ani ngamene mo-o pi ndu okpála hana inde ngabhuka ani-o. Ndu uo hana ngasia mukobho bha li koli kpadji bini inde gba Yesu Kilisito-o. 23 Padhá de, anga ndu okpála hana amene siti 'ngú, kaka-a, Ebhe bhú sangu gba e adji 'ngbu e li uo adji.

24 Engú bini, Ebhe bhú bádha bhú 'bu gba e amene me u kolo ngbingbili bhú djila ni padhá. Ani amene mo-o li kpadji gba Yesu Kilisito inde ngagbegbe uo sakpa siti-o. 25-26 Yesu Kilisito ne kpála inde li Ebhe abhu e me ani kpi mada ní ka siti 'ngú gba ní-o. Ani tuko ngute e ngú na'e siti 'ngú gba ní-o. Kpadji angu-o Ebhe aleke pi okpála bhende abhuka-o. Ebhe amene mo-o ngubula me ní mbila me ni ne ngbili kpála. Bhú nedhinga na kalanu-o, nedhinga li okpála adu namene siti 'ngú lie, ani adu ne 'ndjá bua pi uo, ani adu atsia siti 'ngú inde u adu amene e mugito me ani u de. Bhú nedhinga na mbia inde-e, ani ngasuno me ni ne ngbili kpála. Kaka-a, ani a'o ndu okpála hana inde abhuka Yesu-o me u du ngbingbili bhú djila ni.

27 I nde lie mo-o, engú bini belegu ade inde i ti da naha 'ngbé 'ndji pi ní. Ka ní? Anga ehe bhende ane ne engbé-e, a ko matá namene líli-e de, engú bini, a ko bha bini nabhuka. 28 Padhá de, anga ya au me kpálakuti ngakolo ngbingbili kala Ebhe ka nabhuka gba e. A ko de me anga ani amene líli-e hana-a de. 29 Yi abhundja naayi me Ebhe bha ne Ebhe ka omaYuda? A ko di Ebhe gba okpála inde ne omaYuda ade-e di? A mo-o ade. A ko di Ebhe gba okpála inde ne omaYuda ade-o. 30 Padhá de, anga koli Ebhe bha bini. Ani amene me ni 'o omaYuda kala ni ngbingbili li kpadji na nabhuka. Ani améne bhadi pi okpála inde ne omaYuda ade-e moko. 31 I du me a

† 3:12 3:10-12 Tsia bhú Ets. 14:1-3, 53:1-3; di ne bhú Ekl. 7:20. † 3:13 3:13 Tsia bhú Ets. 5:10, 140:3. † 3:14 3:14 Tsia bhú Ets. 10:7. † 3:17 3:15-17 Tsia bhú Isa. 59:7-8. † 3:18 3:18 Tsia bhú Ets. 36:2.

nde mo-o, a kunda napa me ní u ibili líli-e padhá? A mo-o ade, ní mangbo bhomu-o nga'o líli-e bhú da e.

## 4

### *Nabhuka gba Abalahama*

<sup>1</sup> Ní bhundja nga pindji ogbi ní Abalahama. Ní apá li 'ngú gba ani-e pi? A akolo nani li ani ne mangua 'ngú dho? <sup>2</sup> Li Ebhe ú nani ani me a ko ngbili kpála bhú djila ni ka obabadha kulu inde ani adu amene e, Abalahama de adu ne engú inde ani ti da nabhi 'kpa e pí mbulu e ka e-o. La-a, ani ti da namene bhú djila Ebhe mo-o de. <sup>3</sup> Padhá de, anga Bhuku gba Ebhe ngapa me: «Abalahama abhuka Ebhe, abhomu-o Ebhe atsia au ani me a ko ngbili kpála ka natsia nabhuka gba ani-o.†» <sup>4</sup> Ní mbila hana me li kpála mene kulu-o, u há kuo 'kpa pi ani tété, kuo 'kpa bhomu-o ha lie pi ani padhá de. Ani amene ngánga kulu. <sup>5</sup> La-a, li kpála mene kulu de, ani bhuka me Ebhe ngasia obhulu namene siti 'ngú-o, nabhuka gba ani-e nga'o ani ngbingbili bhú djila Ebhe. <sup>6</sup> Kaka-a, Davidi ngapa 'ngú na djali gba kpála inde li Ebhe au e maka ngbili kpála bhú djila e-o, inde ani tsia okulu gba e de-o. <sup>7</sup> Davidi apa me:

«A ko djali pi okpála inde li Ebhe ambu li ndjondjo gba o ambu, okpála inde li Ebhe a'e osisiti 'ngú gba o a'e-o!

<sup>8</sup> A ko djali pi okpála inde li Ebhe Ngámá lila

osisiti 'ngú gba o li bua e de-o!†»

<sup>9</sup> Engú li Davidi apa e bhomu-o, ne me a atsia bha bini okpála bhende ali gandja, ne me a atsia di obhende i li gandja de-o? Ní de ngapa me: «Ebhe au Abalahama ngbingbili bhú djila e, anga Abalahama abhuka ani.» <sup>10</sup> Engú bhomu-o akodho 'kpí nadho? Ne me a ko me Abalahama nde ali gandja ali, ne me a ko me ani nde li nga gandja de? A

mo-o ade, a ko kala me Abalahama li gandja.

<sup>11</sup> Kala me Abalahama li gandja-a, Ebhe au ani bhú djila e me a ko ngbili kpála. Pipita-a, Ebhe apa pi ani me ani li gandja. Gandja bhomu-o adu maka ehe inde asuno me ani ngbingbili bhú djila Ebhe kabula nabhuka gba e-o. Kaka-a, Abalahama akolo 'dyi ndu okpála hana inde ngabhuka Ebhe mandí nali gandja. Ebhe ngau ndu okpála bhomu-o hana bhú djila e ngbingbili maka ani au nani Abalahama lie-o. <sup>12</sup> Abalahama di ne 'dyi okpála bhende ali gandja-o. A akunda napa me Abalahama di ne 'dyi okpála inde ngakpi bha bini ndjili li nali gandja ade, engú bini, inde ngakpata lele nabhuka inde adu nani bhú ogbi ní Abalahama kala me ani li gandja-o.

<sup>13</sup> Ebhe apa nani pi Abalahama ne odi e me ni ahá doto pi uo. A ko de me Ebhe apa nani engú bhomu-o ka anga Abalahama amene líli-e de, a ko mangbo anga Ebhe au nani ani ngbingbili bhú djila e ka nabhuka gba e-o. <sup>14</sup> I du me okpála bhende ngamene líli-e nde asia bha bini ohe li Ebhe apana e ngao, a akunda napa me tata li nabhuka ade. La di-e, engú inde li Ebhe apa nani me ni amene e pi uo, a ko 'ngú na padhá. <sup>15</sup> Padhá de, anga nedhinga li okpála adje líli lie, i du me u nde kpata de-e, li Ebhe ké 'ngú lie. La-a, bili li líli nde li e ade-e, u agumu líli-e lele pi?

<sup>16</sup> A bhomu-o engú yi ngau lie me Ebhe apa nani me ni ahá doto pi Abalahama ne odi e kabula nabhuka gba e ngubula me a adu pi uo maka ehe ani aha e pi uo padhá bhú bádha bhú 'bu gba e-o. Oehe li Ebhe apa me ni ahá e pi okpála-a, a bha bini pi obhende ngakpata líli-e ade, engú bini, a di pi okpála inde abhuka Ebhe maka Abalahama abhuka lie-o. Kaka-a, Abalahama ne 'dyi ndu ní hana. <sup>17</sup> A maka u aye lie bhú

† 4:3 4:3 Tsia bhú Dje. 15:6. † 4:8 4:7-8 Tsia bhú Ets. 32:1-2.

Bhuku gba Ebhe-e me Ebhe apa pi Abalahama me: «Ma a'o mu 'dyi okpála na opiga bhelé.†» Abalahama ne 'dyi ní bhú djila Ebhe inde ani abhuka e-o. A ko Ebhe inde ngazuku okpála inde amu, inde di ngabho oehe inde nga ade-o.

18 Abalahama adu bha ne nabhuka bhú Ebhe, ani atsia adu bha na'o 'to e 'to ani. Natsia la lele ani-e, a ko nani kpála inde i ti matá nani da na'o 'to e 'to ehe inde li Ebhe apa me ni ahá e pi ani-e de. Abhomu-o, Ebhe amene engú ani apa nani me ni améne e pi ani-o. Ani atsia akolo 'dyi okpála na opiga bhelé maka li Ebhe apa nani lie pi ani me: «Opiga gba mu-o adú bhelé.†» 19 A abhaka me ani nde ne kalanga masakpe de kámá bini. Ani adu nambila ndjindji me ni agbe, ani adu di nambila hana me wala ni Sala ne izude, engú bini, nabhuka gba ani-e gie lie ne sidi de. 20 Ani adu bha nabhuka me Ebhe ahá ehe inde ani apa me ni ahá e pi ni-e maha. Ani du ne bua bhisi bhisi de da napa me ni gbe 'to ni 'to Ebhe-e de. Engú bini, nabhuka inde ani adu ne e bhú Ebhe-e, adu bha naha angu pi ani ngú nanu ne kalanu, ani atsia adu adhogø Ebhe. 21 Ani adu nabhuka na paká me Ebhe ne angu ngú namene engú inde ani apa me ni améne e-o.

22 Ka nabhuka gba Abalahama-a, Ebhe au ani bhú djila e me a ko ngbili kpála. 23 I du me Bhuku gba Ebhe-e nde apa me, Ebhe au ani bhú djila e me, a ko ngbili kpála-a, a ko bha bini pi ani kpi e kpi de. 24 Eli bhomu-o aye di lie pi ní okpála inde li Ebhe au o bhú djila e me ní ne okpála na ngbingbili-o. Padhá de, anga ní ne nabhuka bhú Ebhe inde azuku Yesu Ngámá gba ní-e bhú ká okpála inde amu-o. 25 Ebhe apu Yesu pi okpála ngubula me u bhøø ani li 'ngú na siti 'ngú gba ní-o. Ebhe atsia azuku ani bhú ká okpála inde amu-o ngú napa me ní kolo ngbingbili bhú

djila ni.

## 5

*Yesu ato guo 'ngú sunda ní ne Ebhe*

1 I nde lie me Ebhe au ní me ní ne okpála na ngbingbili bhú djila e ka ní abhuka ani lie, ní mbia inde-e ne guo 'ngú sunda ní ne Ebhe li kpadji gba Yesu Kilisito , Ngámá gba ní-o. 2 Yesu abhulu kpadji pi ní ngae ngubula me Ebhe suno bádha bhú 'bu gba e pi ní li kpadji na nabhuka . Nabhuka gba ní-e alu pí bádha bhú 'bu bhomu-o. Ní la bhadi ngakpi djali anga ní nga'o 'to ní me Ebhe ahá di sangu pi ní maka ani aha pi Yesu lie-o. 3 A pise bha bini li bhobhomu-o de. Ní di ngakpi ndjili bhú likabhu ní ngazu e anga ní ambila me likabhu ngaha pi ní nambila nadu ne 'ndjá bua. 4 Nadu ne 'ndjá bua ngaha pi ní nasia angu bhú kpéke da 'ngú, ní sia angu bhú kpéke da 'ngú-o, bhobhomu-o ngaha pi ní me ní 'o 'to ní li engú li Ebhe apa me ni améne e-o. 5 Ní du na'o 'to ní 'to engú li Ebhe apa me ni améne e mo-o, a padhá ade. Padhá de, anga li kpadji gba Bu Bhobua-a , Ebhe asuno me ni abedhe ne mukunda pi ní bedhe.

6 A ko paká, nedhinga ní adu lie me ní nde ti da nagbe 'ndji ní de-e, Yesu Kilisito akpi li 'ngú gba ní osisiti okpála li nedhinga inde li Ebhe a'o nani e-o. 7 Ní mbila hana me, da napa me kpála ziba nakpi li 'ngú gba ngbili kpála kpekpeke. Nedhinga koko-o, kpála ti da naziba mangbo nakpi li 'ngú gba kpála na bádha 'ngú. 8 Engú bini, ehe inde asuno me Ebhe ne mukunda pi ní-e ngae inde: nedhinga ní adu nga bha lie bhú siti 'ngú-o, Yesu Kilisito akpi li 'ngú gba ní-o.

9 I nde la lie me mbia inde-e Ebhe au ní okpála na ngbingbili bhú djila e li kpadji na ngute ani-e, ní mbila me ní akóbho bhú 'bhø ke 'ngú gba

† 4:17 4:17 Tsia bhú Dje. 17:5. † 4:18 4:18 Tsia bhú Dje. 15:5.

Ebhe-e li kpadji na ngute ani. <sup>10</sup> Nani kalanu, nedhinga ní adu lie nayala Ebhe-e, Ebhe ato guo 'ngú sunda ní ne o li kpadji nakpi gba Ndili gba e-o. Kaka-a, ní mbila ndjindji me maka li Ebhe ato guo 'ngú lie sunda ní ne o ato-o, ani akóbho bhadi ní li kpadji gba Ndili gba e, anga Ndili ango-o bhú mukobho. <sup>11</sup> La matá pépé-e, ní ngakpi djali li 'ngú li Ebhe amene e li kpadji gba Ngámá gba ní Yesu Kilisito-o. Padhá de, anga ani amene me guo 'ngú li sunda ní mbia inde-e ne Ebhe.

*Ní alí bhú mangimbo ka Adamu , ní akobho ka Yesu*

<sup>12</sup> Ní mbila hana me, siti 'ngú alí pila doto ka koli kpála bini má kpikili! A 'li kpála ango-o me Adamu . Siti 'ngú ango-o atsia azu kuo. Ka li ndu okpála hana amene siti 'ngú lie, kuo atsia akolo li ndu uo hana. <sup>13</sup> Kala me Ebhe ha líli gba e pi Moidje-e, siti 'ngú adu nani pila doto. Engú bini, inde lie me Ebhe nde ha nga nani líli gba e pi okpála de-e, ani du na'o 'to e 'to siti 'ngú gba uo de. <sup>14</sup> La-a, abana a adu lie mo-o, nayie li Adamu, nakolo li Moidje , kuo adu ne angu pí ndu okpála hana, abana pí okpála bhende i mene siti 'ngú maka Adamu andjo nani 'li Ebhe lie de-o. Adamu nani ne kulu kpála inde a ayo nani me ani go-o.

<sup>15</sup> Engú bini, siti 'ngú gba Adamu-o kpo 'ndji e ne bisagu li Ebhe aha e padhá-a de. Eu ade, okpála bhelé amu kabula siti 'ngú gba koli kpála bini bhomu-o. Engú bini, bádha bhú 'bu gba Ebhe-e ane ne engbé. La di-e, bisagu inde ani aha e padhá pi okpála bhelé li kpadji gba koli kpála bini inde 'li e me Yesu Kilisito-o, ane di ne engbé. <sup>16</sup> Bádha bhú 'bu li Ebhe aha e pi okpála-a naae ngazu ngua koko. A viti bini ne siti 'ngú inde li koli kpála bini bhomu-o amene e de. Siti 'ngú li koli kpála bini bhomu-o amene e, amene

me Ebhe 'o 'ngú pí okpála. La-a, bádha bhú 'bu li Ebhe aha e pi okpála padhá pita u amene siti 'ngú lie bhelé-e aha pi uo me u kolo ngbingbili kala Ebhe.

<sup>17</sup> A na paká me kuo apa lie li okpála ka siti 'ngú gba koli kpála bini. Engú bini, kpála bhe koko inde 'li e me Yesu Kilisito-o ngamene naae okulu na ngbengbengbe. Li kpadji gba ani-e, Ebhe ngasuno bádha bhú 'bu gba e inde ane mane-e pi okpála padhá, ani di ngau uo bhú djila e me a ko okpála na ngbingbili. Bha li kpadji gba ani-e, u asia mukobho na duduma, u aú di ngámá ka ani.

<sup>18</sup> Ní au me kabula siti 'ngú gba koli kpála bini inde 'li e me Adamu-o, mangimbo gba Ebhe-e ati pí ndu okpála hana. A bhadi moko, kabula bádha kulu gba kpála bini inde 'li e me Yesu Kilisito-o, okpála hana akolo ngbingbili bhú djila Ebhe. Bádha kulu gba Yesu Kilisito di ngaha mukobho pi okpála ngae. <sup>19</sup> Ka li kpála bini andjo 'li Ebhe lie, okpála bhelé ati bhú siti 'ngú. A bhadi moko, ka li kpála bini adje 'li Ebhe lie, okpála bhelé akolo ngbingbili bhú djila ani.

<sup>20</sup> Pindji bhende atsia líli gba Moidje-e , Ebhe aha nani pi okpála ngae. La natsitsia-a, siti 'ngú atsia abe matá ndu e naali. Engú bini, li bili inde li siti 'ngú abe ndu e lie, bádha bhú 'bu gba Ebhe abe la matá ndu e ane mane. <sup>21</sup> A bhadi moko, maka li siti 'ngú apana angu e pi okpála lie li kpadji gba nakpi-e, bádha bhú 'bu gba Ebhe-e apána bhadi angu e pi okpála li kpadji nakobho uo. Bádha bhú 'bu ango-o améne me ní kolo bhú mukobho na duduma li kpadji gba Yesu Kilisito, Ngámá gba ní-o.

## 6

*Ní akpi bhú dabilí bini ne Yesu, ní azúku bhadi maka ani*

1 Ní apá la ibili pí? Ní mene bha ibili siti 'ngú ne kalanu, amba bádha bhú 'bu gba Ebhe-e nu ne kalanu? 2 Belegu de bini! Ní amu li pabili gba siti 'ngú amu. Lele pí ní tí lie matá da nanu bhú siti 'ngú ne kalanu-o? 3 Yi mbila de me nedhinga ní asia batisimo lie, ndu ní hana ní akpètse liní bhú dabili bini ne Yesu Kilisito bhú nakpi ka e dí? 4 Li kpadji na batisimo-o, ní amu ne ani bhú dabili bini, u atsia azi ní ne ani bhú lata bhú dabili bini ngubula me Ebhe 'dyi ní zuku di ní bhú ká okpála inde amu-o maka ani azuku Yesu Kilisito lie bhú angu gba e inde ane mane-o. Ani azuku ní ngubula me ní du di ne lele mukobho na mbia.

5 Padhá de, anga maka ní akpètse liní ne ani lie bhú ngua nakpi inde ani akpi e-e, ní azúku bhadi ngua nazuku inde ani azuku e-o. 6 Ní mbila ndjindji me, nedhinga li Yesu Kilisito akpi lie li kulusi-e, Ebhe agi lele mukobho gba ní na kalanu-o bhadi li kulusi oo ngubula me lele mukobho bhomu-o kpi di, amba ní adú matá obalise gba siti 'ngú de. 7 Padhá de, anga kpála inde akpi-e, akoto bhú bali gba siti 'ngú akoto. 8 I du me ní nde akpi bhú dabili bini ne Yesu Kilisito akpi-e, ní bhadi ne nabhuka me ní adú bhadi ne ani bhú mukobho. 9 Yesu Kilisito azuku nani azuku. Ní mbila hana me nayie li 'kpi bhomu-o, ani kpi matá-a de. Nakpi matá ne angu pí ani ade. 10 Bhú nakpi ka ani e-e, ani akpi li pápá na siti 'ngú bhutsibhutsi bini má kpikili! Ani nde lie bhú mukobho mbia inde-e, ani bhú mukobho pí Ebhe. 11 A viti bhadi bini, ngayi di-e, yi 'o liyi mugito me yi amu li pápá gba siti 'ngú-o amu. La mbia inde-e, yi bhú mukobho pí Ebhe li kpadji na makpètse gba yi ne Yesu Kilisito.

12 I nde lie mo-o, a ayo matá de me siti 'ngú ko angu e pí kute yi na kukuo inde-e de. Yi adhúku li lele gumu na sisiti gba kute yi bhomu-o de. 13 Yi a'ó matá oyá yi de me

adu bhú kulu gba siti 'ngú maka otia kulu gba ani-e de. Yi ha mangbo liyi pí Ebhe maka okpála inde amu, u atsia azuku. Yi ha liyi libhomu ngú kulu gba Ebhe maka otia kulu ngú namene ngbili 'ngú . 14 Padhá de, anga a ayo de me siti 'ngú ko matá angu e pí yi-e de, anga yi matá sa líli ade, engú bini yi mangbo sa bádha bhú 'bu gba Ebhe-o.

*Ní matá ne obalise gba siti 'ngú ade, ní ibili ne obalise gba Ebhe*

15 Mbía inde-e, ní matá ngadhuku sa líli ade, ní mangbo sa bádha bhú 'bu gba Ebhe. I nde li mo-o, a ayo me ní nu bha ne siti 'ngú ne kalanu anga ní nde sa bádha bhú 'bu gba Ebhe? Belegu de bini! 16 Yi mbila hana me i du me mu nde bhú kulu gba kpála bini ngú namene engú ani akunda e-e, mu ne bali gba kpála inde mu nde bhú kulu gba e-o. I du me mu nde bhú kulu gba siti 'ngú-o, mu ne bali gba ani. Mu du bhú kulu gba Ebhe-e, mu ne bali gba ani. Yi mbila la me, siti 'ngú ngato kpála bhú kuo. Engú bini, namanga Ebhe ngamene me Ebhe 'o kpála ngbingbili bhú djila e.

17 Heni pí Ebhe, anga yi du nako ne obalise gba siti 'ngú, la mbia inde-e, yi abhuka Ebhe. Yi atsia aziba di ne bua yi bini nandu bhú mukobho nakpata lele nasuno inde u asuno e pí yi-o. 18 Ebhe agbegbe yi bhú bali gba siti 'ngú-o agbegbe, yi atsia akolo obalise gba ani ngú namene engú inde ngbingbili. 19 Ma ngakpokpo 'ngú bhomu-o pí yi ne nasuno li kute obalise, anga yi ngakø mboli engú má gala ade. Nani kalanu-o, yi aha kute yi libhomu maka obalise inde bhú kulu gba siti 'ngú inde ngazu kpéke 'ndji li pabili gba Ebhe. Maka yi aha nani liyi lie libhomu pí siti 'ngú-o, mbia inde-e, yi ha di liyi libhomu pí Ebhe maka obalise inde bhú kulu gba ngbili 'ngú ngubula me lele mukobho

gba yi-e du bhende nganga li Ebhe manga.

<sup>20</sup> Nedhinga yi adu nako lie obalise gba siti 'ngú-o, ehe bini ade inde i ti nako da natima yi me yi mene ngbili 'ngú. <sup>21</sup> Nedhinga yi adu lie amene osisiti 'ngú inde nga'o naki numu li yi bhomu-o, yi asia bhúbhú mangua bádha 'ngú dho? Ehe bini ade! Ongú bhomu-o ngatima kpála bhú kuo. <sup>22</sup> La mbia inde-e, Ebhe agbegbe yi bhú siti 'ngú agbegbe, yi atsia akolo okpála na kulu gba ani-o. Li kpadji bhomu-o, yi asia nadu bhú mukobho inde nganga li Ebhe-o. Ali soso-o, yi asia mukobho na duduma. <sup>23</sup> Padhá de, anga makalá gba siti 'ngú-o, a ko nakpi, engú bini, Ebhe naae ngaha pi okpála mukobho na duduma inde bhú Yesu Kilisito Ngamá gba ní-e padhá.

## 7

### *Ní aze bhú bali gba líli-e aze*

<sup>1</sup> Ondaise ma, yi mbila engú inde ma adjí apa e hana, anga yi ambila líli-e ndjindji. Yi mbila hana me líli ngako angu e pí kpála bha bini li nedhinga ani nde lie bhú mukobho-o. <sup>2</sup> Ní ha nga kukulu li eḷe inde bhú kava. Nedhinga li 'ko ani nde lie tété-e, ani tí da na'o ká ani ngú nanu naha bhoko koko de, anga líli ziba mo-o de. I du la me 'ko ani nde akpi-e, ehe bini inde ani matá kpadji pi ani ngú naha bhoko koko ade. <sup>3</sup> Bhobhomu-o apa me, i du me eḷe yie nu ha bhoko koko me 'ko ani nde nga bha tété-e, líli apa me eḷe bhomu-o akunda bhoko gba kpála koko. I du la me 'ko ani nde akpi ma kpi-e, líli ne engú bini pí ani ade. Kaka-a, ani tí da naha bhoko koko. U pá li ani de me ani aha bhoko gba kpála koko-o de.

<sup>4</sup> A bhadi pi yi moko, ngayi ondaise ma. Yi akolo li pabili gba líli maka okpála bhende amu, anga Yesu Kilisito akpi mada yi. Kaka-a, yi ibili ne okpála ka ani, ngaani kpála

inde li Ebhe azuku e-o. Ebhe amene mo-o ngubula me ní du azu pi ní onguwa na babadha. <sup>5</sup> Nedhinga ní adu nani akobho lie maka li osisiti gumu na kute ní adu atima ní lie, líli adu apana pi ní me, a inde-e siti 'ngú. La-a, ní dje mo-o, kute ní adu mangbo atima ní me ní mene osisiti 'ngú bhomu-o. Osisiti 'ngú ango-o adu atima ní ne kalanu ngú nazu nguwa inde ngatima kpála bhú kuo. <sup>6</sup> Engú bini, mbia inde-e, maka ní amu lie li pápá gba ehe inde a'o nako ní bhú bali-e amu-o, líli matá ne engú pí ní ade. Kaka-a, ní ti da namene kulu liní pi Ebhe li lele bhe na mbia. Ní améne kulu ango li kpadji gba Bu Bhobua, a adú matá li lele bhe na kalanu ní adu amene e sa líli inde u aye e maye-e de.

### *Líli gba Ebhe-e asuno siti 'ngú gba ní-e mbámhá*

<sup>7</sup> I du mo-o, ní pa me líli ne ehe na sisiti? A mo-o ade! I dú ka líli de-e, ma de mbila siti 'ngú de. U yé nani bhú líli de me: «Mo odú ne gumu 'he gba kpála de-e»,† ma de mbila de me nadu ne gumu 'he gba kpála ne siti 'ngú-o de. <sup>8</sup> Nedhinga ma ambila líli bhomu-o lie, siti 'ngú au kpadji e abhú ma. A tsia amba bhúla ma me ma du ne gumu ohe gba okpála ngangá. Padhá de, anga li líli du de-e, siti 'ngú kó angu e pí ma de. <sup>9</sup> Nani kalanu me ma nde mbila nga líli de-e, bua ma adu má bii! La-a, nedhinga ma aké mboli engú li Ebhe akunda e lie, siti 'ngú me ni ngani bhomu, <sup>10</sup> ma atsia akpi. Líli inde li Ebhe aha e ngubula me aha mukobho pi okpála-a, aha naae muma nakpi. <sup>11</sup> Padhá de, anga ma ambila líli-e lie, siti 'ngú au kpadji e bhú ma. A apite bua ma, ma atsia akpi kaka.

<sup>12</sup> Bhobhomu-o atima ní naziba me ndu líli-e hana ayie ka Ebhe, la di-e ndu ongu inde u aye e bhúbhú-o hana ayie ka ani. Ehe na sisiti bhúbhú belegu ade bini. <sup>13</sup> A

† 7:7 7:7 Tsia bhú Eki. 20:17; di ne bhú Det. 5:21.

akunda napa me ehe na babadha-a abhelo ma ngae? A mo-o ade! A abhelo mangbo ma ne siti 'ngú. Siti 'ngú-o aha líli, ani atsia abhelo ma nedi. A mene lie mo-o ngubula me okpála mbila me siti 'ngú bha ne siti 'ngú. Li kpadji gba líli-e, siti 'ngú atsia asuno la ibili me ni ane ne siti mane.

*Nganí okpála-kuti-e, ní ngagu gbele ne siti 'ngú inde abedhe bhú ní bedhe-o*

<sup>14</sup> Ní mbila hana me líli-e ayie ka Ebhe. La ngama-a, ma ne kpála li angu nde bhú e ade, ma ne bali gba siti 'ngú. <sup>15</sup> Ma ngakó mboli engú inde ma ngamene e ade. Padhá de, anga ma ngamene engú inde ma kunda namene e de. Ma mangbo ngamene bhende ma ayala namene e-o. <sup>16</sup> Í dū me ma nde ngamene engú inde ma ngayala e, bhobhomu-o asuno me ma abhuka me líli ne bádha 'he. <sup>17</sup> Bhobhomu-o apa me nedhinga ma ngamene siti 'ngú lie, a ko ma de, a ko mangbo siti 'ngú inde asi kuti e abhú ma ko. <sup>18</sup> Padhá de, anga ma ambila me bádha 'ngú si kuti e bhú ma de, a akunda napa me bhú kute ma, ngama kpála inde li angu nde bhú e ade-o. A na paká me a bhú ma ne gumu namene bádha 'ngú, engú bini angu namemene la bhú ma ade. <sup>19</sup> Padhá de, anga bádha 'ngú inde ma akunda namene e-e, ma ngamemene ade. Siti 'ngú inde ma ayala namene e-e, ma mangbo ngamene e. <sup>20</sup> Li ma dū amene engú inde ma akunda namene e de-e, a kunda napa me, a ko ma de, a ko mangbo siti 'ngú inde asi kuti e abhú ma-o.

<sup>21</sup> Í nde lie mo-o, engú ma ngau e ndu 'kpí hana ngae inde: ngama kpála inde ne gumu namene bádha 'ngú-o, a bha bini bhú ma ne angu namene siti 'ngú. <sup>22</sup> A li bua ma-a, ma ngakpi ndjili li líli gba Ebhe-o. <sup>23</sup> Engú bini, a bhú kute ma-a, ma ngau líli koko inde ngagu gbele ne líli inde li bua ma ngaziba e-o. Líli

inde bhú kute ma-a nga'o ma bali gba líli na siti 'ngú inde abhú ma-o. <sup>24</sup> A ko likabhu muma! A agbégebe ma sakpa kute ma inde ngato ma li kpadji nakpi inde-e da? <sup>25</sup> Heni pi Ebhe li kpadji gba Yesu Kilisito, Ngámá gba ní-o!

Ma ti da nabu 'li ma me, li bua ma-a, ma ne bali gba líli gba Ebhe, engú bini, li kute ma-a, ma ne bali gba líli gba siti 'ngú.

## 8

*Nadu bhú mukobho inde li Bu Bhobua aziba e*

<sup>1</sup> Mbía inde-e, engú na'o'o matá pí okpála inde akpotsé lio bhú dabili bini ne Yesu Kilisito ade. <sup>2</sup> Padhá de, anga líli gba Bu Bhobua inde ngaha mukobho pi kpála li kpadji gba Yesu Kilisito agbegbe ma bhú bali gba líli na siti 'ngú bhú dabili bini ne bali gba nakpi-e agbegbe. <sup>3</sup> Líli gba Moidje ti nako da naha mukobho pi ní de, anga nganí okpála-kuti-e, angu bhú ní ngú namene olíli-e hana-a de. Engú bini, Ebhe amene ehe inde li líli-e ti nako da namene e de-o. Ngú na'e osisiti 'ngú gba ní-e, ani atima Ndili gba e makpe me ani go kobho maka ní osisiti okpála. Bhobhomu-o akunda napa me Ebhe kunda siti 'ngú inde li okpála ngamene e belegu de bini.

<sup>4</sup> Ebhe amene mo-o ngubula me nganí okpála inde ngakobho maka Bu Bhobua akunda lie, ní mene ndu 'ngú hana inde li líli-e aziba e, ní améne matá ongú maka li kute ní aziba lie de. <sup>5</sup> Padhá de, anga mu dū akobho nakpata ongú inde li kute mu aziba e, mu dú bha nabhundja engú na kute. Engú bini, mu dū akobho nakpata ongú inde li Bu Bhobua akunda e-e, mu dú bhadi nabhundja ongú gba Bu Bhobua. <sup>6</sup> Í dū me mu nde ngabhundja bha bini pí ongú inde li kute mu akunda e-e, mu kpí. Engú bini, li mu dū abhundja bha bini pí bhende li Bu Bhobua gba Ebhe-e ngakunda e,



Ebhe méne me mu du bhú mukobho bhú dabili bini ne guo 'ngú .

<sup>7</sup> Okpála bhende ngabhundja bha bini ongú li kute o aziba e, a ko obhulu yala gba Ebhe. U ngamene líli gba Ebhe-e ade, u ti la di da namemene de. <sup>8</sup> Okpála bhende ngamene mo-o, u ti da nanga li Ebhe de.

<sup>9</sup> La ngayi-e, yi ngamene engú maka li kute yi aziba lie ade. Yi ngamene engú maka li Bu Bhobua aziba lie-o. Padhá de, anga Bu Bhobua gba Ebhe ngadu bhú yi. Kpála inde li Bua gba Ebhe-e ngadu bhú e ade-e, a ko makilisito de. <sup>10</sup> Li Yesu Kilisito du bhú yi-e, li pápá na kute yi-e, yi amú mamu, anga yi nde amene siti 'ngú. La li pápá na bua yi-e, Bua gba ani-e ngaha mukobho pi yi, anga yi akolo ngbingbili bhú djila Ebhe. <sup>11</sup> La di-e, li Bua gba Ebhe inde azuku nani Yesu bhú ká okpála inde amu-o du bhú yi-e, a na paká me Ebhe bini bhomu-o ahá di mukobho pi okute yi na kukuo bhomu li kpadji gba Bua gba ani inde ngadu bhú yi-o.

<sup>12</sup> Kaka-a, ondaise ma, a ayo me ní du akobho maka li Bu Bhobua akunda lie, a ayo de me ní du akobho maka li kute ní akunda lie de. <sup>13</sup> Padhá de, anga yi du akobho maka li kute yi makpe ngatima yi lie, yi mú. Engú bini, li Bu Bhobua teteke yi me yi 'o namene siti 'ngú na paká-a, yi sía mukobho. <sup>14</sup> Padhá de, anga ndu okpála hana inde ngadhuku maka li Bua gba Ebhe-e akunda lie, a ko ongisi gba Ebhe.

<sup>15</sup> Bu Bhobua inde li Ebhe aha e pi yi-e nga'o yi bhú bali ade, ani di ngabedhe matá yi ne tsulu ade. A ko mangbo Bua inde ngamene me yi kolo ongisi gba Ebhe. Ka angu gba Bua bhomu-o, ní ti da nagama 'ngú pi Ebhe ne na'i ani me: «Aba, 'Dyi ya!» <sup>16</sup> Bua gba Ebhe-e belegu ngapapa ngae makpe pi ní abhú ní me ní ne ongisi gba Ebhe. <sup>17</sup> Ní ne ongisi gba ani-e na paká. A akunda napa me ní asía obabadha

'ngú inde li Ebhe apa me ni ahá e pi ní-e masia. Ní asía obabadha 'ngú bhomu-o nganí bhú dabili bini ne Yesu Kilisito. Maka ní ngazu likabhu lie bhú dabili bini ne ani-e, ní adú bhadi bhú dabili bini ne ani li bili gba ani na sangu-o .

*Sangu inde ní nga'o 'to ní 'to e-o*

<sup>18</sup> Ma ambila na paká me olikabhu ní ngazu e mbia inde-e kpo 'ndji e ne sangu inde li Ebhe ambamba galikpe 'ta e pi ní-e belegu de bini. <sup>19</sup> Padhá de, anga ndu 'he inde li Ebhe abho e hana ngadjeke ne gugumu hana ekpi inde li Ebhe asúno lie mbámabá me okukulu ongisi gba ni-e ngao dho. <sup>20</sup> Padhá de, anga ndu 'he inde li Ebhe abho e hana ati sakpa angu na padhá. A ko de me ohe bhomu-o akunda ngao-o de, a ko mangbo anga Ebhe ato uo sa angu bhomu-o ngae. Engú bini, ohe li Ebhe abho e ti da na'o nga matá 'to e 'to engú bini. <sup>21</sup> Engú ango-o me, ekpi akólo makolo li Ebhe tsía gbégbe bhú bali gba kuo ndu ohe inde ani abho e hana. U kpi matá-a de, u asía sangu maka ongisi gba Ebhe-o.

<sup>22</sup> Ní mbila hana me nayie nani aoo, nakolo pi mbia inde-e, ndu ohe li Ebhe abho e hana-a, ngazu likabhu, u di ngazu tate o maka olo inde li bhú 'bu e nde ngazu ka ezu. <sup>23</sup> Ohe inde li Ebhe abho e bha bini ngazu likabhu kpi e kpi ade, abana nganí okpála inde asía Bu Bhobua maka gina 'he inde li Ebhe aha e pi ní-e, ní di ngazu likabhu. Ní ngazu likabhu ali bua ní nedhinga ní ngadjeke lie me Ebhe mene me ní kolo ongisi gba ni, amba ani gbege la di ní libhomu bhú bali. <sup>24</sup> Ebhe akobho nani ní akobho, ní u nga la sangu ango-o de, ní bha nga'o 'to ní toto. Li ní du au ongú inde ní nga'o 'to ní 'to e ne djila ní-e, a bhomu-o matá na'o 'to o 'to 'ngú de, anga a nde sakpa ní. Padhá de, anga kpála 'o'o 'to e 'to ehe inde ani au e ne djila e au-o de. <sup>25</sup> Engú bini, i du me ní nde u nga ehe inde ní nga'o 'to ní

'to e de-e, ní dú nadjedjeke ne 'ndjá bua.

<sup>26</sup> Engú koko di ngae inde, Bu Bhobua ngateteke ní li kpadji gba Ebhe-o, anga angu nde bhú ní ade. Padhá de, anga ní mbila nayo Ebhe li lelele de. Bu Bhobua mangbo ngayo Ebhe mada ní ngae makpe. Aní ngayo Ebhe ne bua e hana da napa me u ti da napapa ne ebhe de. <sup>27</sup> Ebhe mbila ndu 'ngú hana inde bhú kpála. Aní ngambila di engú inde li Bu Bhobua ngakunda napa e hana. Padhá de, anga Bu Bhobua ngayo Ebhe mada omaha Ebhe maka li Ebhe akunda lie ngae.

<sup>28</sup> Ní mbila hana me ndu 'ngú li Bu Bhobua ngamene e hana-a, aní ngamemene ngubula me okpála bhende ne mukunda pi Ebhe-e sia bádha 'ngú. A ko okpála inde li Ebhe a'i nani o me u mene engú inde ni akunda e. <sup>29</sup> Padhá de, anga Ebhe abhu nani uo kalanu, aní atsia apa di kalanu me ni amene me u kolo maka Ndili gba ni, ngubula me Ndili gba ni-e du ne gina 'zu bhú ká ongisi bhelé. <sup>30</sup> Obhe li Ebhe amene engú bhomu-o pi o-o, aní a'i di uo. Obhe aní a'i o-o, aní amene di me u kolo bhú djila ni okpála na ngbingbili. Obhe aní amene me u kolo bhú djila ni okpála na ngbingbili-e, aní amene di me u sia sangu gba ni-o.

*Ehe bini gbó bhusu ní ne mukunda li Ebhe nde ne e pi ní-e de*

<sup>31</sup> Nakpata ndu 'ngú bhomu-o hana-a, ya ti da nabu tata-a me: «Li Ebhe nde lie pi ní-e, kpála bini ti da naha angu ní de.» <sup>32</sup> Ngaani Ebhe-e, aní gili Ndili gba e makpe pi ní de. Aní apu aní ngú napa me aní go kpi pi ndu ní hana. Maka aní apu Ndili gba e lie pi ní-e, aní ahá di ondu 'he koko-o hana pi ní bhú bádha bhú 'bu gba e-o. <sup>33</sup> Kpála bini ne engú napa mapa li okpála li Ebhe abhu o ade. Padhá de, anga Ebhe ngae makpe au uo me u bhú djila ni ngbingbili.

<sup>34</sup> Kpála bini ti da na'o 'ngú pí okpála li Ebhe abhu o de. Padhá de, anga Yesu Kilisito ngae makpe akpi pi ní. Pépé-e, aní azuku, aní ali li pá 'kpa na kokpa gba Ebhe. Aní di ngayo Ebhe ngubula ní. <sup>35</sup> A ti da nagbo bhusu ní ne mukunda li Yesu Kilisito nde ne e pi ní-e da? Abana ní du bhú likabhu, abana ní du bhú kpéke da 'ngú, abana li okpála du nato mbolo li ní, abana ní du bhú ndibhili, abana li kpéke 'ngú du nago ngú ní, abana li okpála du nakodho ngulu ní, abana li gumu du namene ní, ehe bini inde ayoko mukunda li Yesu Kilisito nde ne e pi ní-e belegu ade bini. <sup>36</sup> A maka u aye lie bhú bhuku gba Ebhe-e me:

«Okpála ngagili ndu 'kpi hana me o bhole ya kabula 'ngú gba mu-o.

Okpála ngau ya mugito me ya ne okandele inde u adji abhili o.†»

<sup>37</sup> La bhú ndu 'ngú bhomu-o hana-a, ya ngaha angu ndu ongu bhomu-o hana ka angu gba kpála inde ne mukunda pi ya-o. <sup>38</sup> Padhá de, anga ma ambila na paká me ehe bini inde agbo bhusu ní ne mukunda li Yesu Kilisito nde ne e pi ní-e ade. Abana i du me ní nde bhú mukobho, abana i du me ní nde amu, a viti bha bini. Abana i du oandjelu, abana i du di ongu na biti, abana ongu na naki, abana ongu inde ngago, bini bhú káká-a gbó bhusu ní ne mukunda gba Yesu Kilisito de. <sup>39</sup> Abana i du ohe inde ngadu abhúla, abana ohe bhende ngadu asa doto, abana ndu ohe koko hana inde li Ebhe abho e, ehe bini ade inde i ti da nagbo bhusu ní ne mukunda inde li Ebhe nde ne e pi ní li kpadji gba Yesu Kilisito, Ngámá gba ní-o.

## 9

*Ebhe ngamene ndu 'ngú hana bhú ngu e*

† 8:36 8:36 Tsia bhú Ets. 44:23.

1 Ma ne kpála gba Yesu Kilisito ! Engú ma adji apa e inde-e, a ko kùkùlù 'ngú, ma pa eu de. Bu Bhobua ngasuno m̀ma me 'li ma-a, a ko paká, bua nakpokpo kú 'ngú gba ma la bhadi ngaziziba moko me a ko paká. 2 A ko paká me bua ma ne likabhu naali, likabhu inde li bua ma-a ndjindjia di-i de. 3 Li kpadji dú uu-o, ngama makpe, ma de ayó me Ebhe t̀ p̀d̀j̀e li ma, amba ani gbo bh̀s̀u ya ne Yesu Kilisito i d̀ me a nde ti da nateteke ondaise ma omaYuda u-o, anga a ko ondaise ma na piga. 4 A ko okpála na piga gba Isalaele. Ebhe abh̀u uo me u kolo ongisi gba ni, ani aha pi uo me u u sangu gba ni-o, ani akodho gandja ne uo bh̀tsibh̀tsi, ani aha líli gba e pi uo, ani asuno lele nayo pi uo, ani apa me ni améne obabadha 'ngú pi uo. 5 A ko odi Abalahama ne ongisi gba e-o. La di-e Yesu Kilisito ngae makpe li pápá na k̀te-e, a ko kpála na piga gba uo. Ngaani, a ko Ebhe inde pí 'ndji nd̀ 'he hana-o. A ayo me okpála toko ani d̀d̀ma ne d̀d̀ma. A ad̀ moko.

6 Ma pa de me engú li Ebhe apa me ni améne e, aneke de. Ní mbila hana me a ko de me nd̀ odi Isalaele hana bha ne ongisi gba ani makpe-e de. 7 La di-e, nd̀ odi Abalahama hana bha ne nd̀ ongisi gba ani makpe ade. Padhá de, anga Ebhe apa pi Abalahama me: «Odi m̀ akóto li kpadji gba Isaka.†» 8 A akunda napa me nd̀ ongisi li Abalahama azu o hana ne ongisi gba Ebhe ade. Pi Ebhe-e, kùkùlù odi Abalahama bha bini ne ongisi inde ani azu o nakpata lele maka li Ebhe apa nani lie me ni ahá pi ani-o. 9 Padhá de, anga Ebhe apa nani engú na ongisi ango-o pi ani me: «Bhú kalanga na sidi-e, bhú ngua onedhinga inde-e, ma agié matá lima, ma abháka me Sala nde azu ndili na bhobhoko.†»

10 A viti bhadi bini ne bhe gba Lebeka-o. Nd̀ ongisi gba ani-e bhisi

hana, koli 'dyi uo bha bini, ogbi ní Isaka. 11-12 La-a, kala napa me u zu uo-o, Ebhe apa me: «Bhebhele-e adú kpála na kulu gba ndindilio.†» Ebhe apa 'ngú bhom̀-ò kala me s̀ka uo mene bádha 'ngú, i d̀ di-e siti 'ngú. Lebeka nde zu nga uo de. Ebhe amene mo-o ngú nasuno me ni memene bha bini engú maka ni akunda lie. Ani ngabh̀ okpála bha bhú ngu e. Ani tsia de me kpála ango-o amene bádha 'ngú ne me ani amene siti 'ngú-o de. 13 A maka u aye lie bhú bhuku gba Ebhe-e me Ebhe apa me:

«Ma ne mukunda pi Yakobho, ma ayala Esau.†»

14 I d̀ me a nde mo-o, ní pá me ngbili 'ngú bhú Ebhe adi? Beleg̀ de bini! 15 Padhá de, anga Ebhe apa pi Moidje me:

«Ma k̀nda namene bádha 'ngú pi kpála-a, ma méne.

I d̀ di me ma nde akunda nadjé ndjinga kpála-a, ma djé.†»

16 Bhobhom̀-ò akunda napa me, li Ebhe mene bádha 'ngú pi kpála-a, ani amene bha pi ani anga ani adje ndjinga ani. A ko de me ani amene pi ani anga kpála ango-o akunda ngae, ne me ani amene tété kulu-o de. 17 A maka engú inde ani apa nani e bhú Bhuku gba e pi 'ngbé ngámá na Edjipito me: «Ma a'o m̀ 'ngbé ngámá ngubula me ngama Ebhe-e ma pana angu gba ma bhú m̀, di ne ngubula me nd̀ okpála na p̀la doto libhomu mbila me ma ne da-ie.†» 18 Kaka-a, ní ngau me li Ebhe kunda nadjé ndjinga kpála-a, ani djé, ani k̀nda nato kpéke 'ndji bhú 'ndji kpála-a, ani tó.

*Ní ti da nadjidji 'ngú sa 'li Ebhe de*

† 9:7 9:7 Tsia bhú Dje. 21:12. † 9:9 9:9 Tsia bhú Dje. 18:10-14. † 9:11-12 9:11-12 Tsia bhú Dje. 25:23. † 9:13 9:13 Tsia bhú Mal. 1:2-3. † 9:15 9:15 Tsia bhú Eki. 33:19. † 9:17 9:17 Tsia bhú Eki. 9:16.

19 Nedhinga koko-o, kpála bini ti da nayi ma me: «Li Ebhe dú nabhu okpála maka ani akúnda lie, ka ni ani nde lie nga'o 'ngú pí okpála, u nde bha ngamene bhomu-o bhende ani akata uo me u mene e?» 20 Ngamu kpála inde ngayi ma mo-o, mu ne da ngú nadjidji 'ngú sa 'li Ebhe? Madakpa ti da nayi kpála inde apo ani-e uu me: «Mo omene ma me-e ka ni?» Belegu de binil†

21 Bhulu napo lusa ti da namene engú inde ani akúnda e ne doto na lusa-a hana. Ani ti da nagbo bhusu doto na lusa-a bhisi. Ani há bhe bini-e, ani méne tété lusa na kpéke mase, ani há bhe koko-o, ani méne tété lusa u amemene kulu ne e ndu 'kpí hana.

22 Li Ebhe kúnda nadu maka bhulu napo lusa-a, naamu bhúbhú ne ni? Ani amene mo-o ngubula nasuno ke 'ngú gba e, di ne me a bhú ni ne angu. La-a, ani akibila nani ne 'ndjá bua okpála inde a ayo nani me u sia ke 'ngú gba ani-o, inde adu nako masikpe de napa me ani bhili o-o. 23 Ebhe amene mo-o ngubula me okpála mbila me sangu abedhe bhú ni bedhe pí okpála inde ni nde ne ndjinga pí o-o. Ani aleke uo kalanu me u sia sangu gba ni-o. 24 Ní di ne okpála inde ani a'i o pí e. Ani bhú bha bini okpála ani a'i o pí e bhú ká omaYuda de, ani abhu di uo bhú ká opiga inde ne omaYuda ade-e uu. 25 A bhomu-o engú ani apa e bhú bhuku gba polofeta Oze me:

«Okpála inde nani i du okpála ka ma de-e,  
 ma a'í uo me a ko okpála ka ma.  
 Okpála inde nani ma du ne mukúnda pí o de-e,  
 ma apá me ma ne mukúnda pí uo.†

26 Li bili nako ma apa pí uo lie me:  
 «Ngayi-e, yi ne okpála ka ma ade-e»,  
 bha li bili bini bhomu-o, ma apá pí uo me:

«Yi ne ongisi gba ma, Ebhe na mukobho-o.†»

27 La pí okpála na Isalaele-e, polofeta Isaya agama di 'ngú li 'ngú gba uo-o. Ani atsia apa me: «Abana li omaIsalaele du bha bhelé maka sike abhú 'ngbé 'ngu-o, yi mbila me obhe li Ebhe akóbho o-o bhelé ade. 28 Padhá de, anga engú li Ebhe apa me ni améne e píla doto-o, ani améne bha hana má kpəkəbhə! Ani améne la di má gala!†» 29 A di maka polofeta Isaya apa matá nani lie me: «Li Ebhe Ngámá Apí 'Kpí bhili nani ongisi gba ní-e hana-a, ní de andjulu maka okpála na Sodomo ne Gomolo andjulu nani lie-o.†»

*Okpála koko bhú ká omaIsalaele bhuka de*

30 I du mo-o, ní ti da nabu tata pí? Engú inde ya akúnda nabu tata ne e ngae inde, okpála inde bhú piga gba omaIsalaele ade-e, gili nako nadu ngbingbili kala Ebhe de. La-a, Ebhe au uo me a ko okpála na ngbingbili bhú djila e ka u abhuka ni lie-o. 31 La-a, okpála na Isalaele inde adu agili me o kolo ngbingbili bhú djila Ebhe li kpadji namene líli-e, kolo nedi ali soso de. 32 U kolo nedi ali soso de ka ni? U kolo de, anga u adu abhundja me o kólo ngbingbili bhú djila Ebhe ka okulu gba o-o. U du abhuka de me kpála ngakolo ngbingbili bhú djila Ebhe ka nabhuka gba e de. U atsia ado 'dhu o li teme inde ngagbo 'i kpála-o. 33 Bhuku gba Ebhe-e ngapa 'ngú na teme ango-o me:

«Yi gbo 'dje yi!  
 Ma nga'o bhú gudhu na Siona teme bini inde li okpála ngado 'dhu o lie.  
 A ko teme inde ngagbo 'i kpála.  
 La-a, kpála abhuka ani-e,  
 ani djí 'ngbu e li ani 'kpí bini de.†»

† 9:20 9:20 Tsia bhú Isa. 29:16, 45:9. † 9:25 9:25 Tsia bhú Oz. 2:25. † 9:26 9:26 Tsia bhú Oz. 2:1. † 9:28 9:28 Tsia bhú Isa. 10:22-23. † 9:29 9:29 Tsia bhú Isa. 1:9. † 9:33 9:33 Tsia bhú Isa. 8:14-15, 28:16.

## 10

1 Ondaise ma, engú inde ma ngakunda e ne bua ma hana-a, a ko me omaIsalaele sia mukobho. Ma ngayo Ebhe pi uo ngánga. <sup>2</sup> Ma au me u akunda namene kulu lio pi Ebhe na paká. Engú bini, u mbila kpadji ango-o de. <sup>3</sup> U mbila kpadji li Ebhe ngau kpála li e bhú djila e ngbingbili-e de. U agili nade kpadji bhe gba o ngao makpe. Kaka-a, u ayala nakpata kpadji li Ebhe ngau kpála li e bhú djila e ngbingbili-o. <sup>4</sup> Padhá de, anga li Yesu Kilisito ago lie, ani andjia angu líli gba Moidje-o. Ani amene mo-o ngubula me ndu okpála hana inde abhuka ni-e kolo ngbingbili bhú djila Ebhe.

### *Ebhe ngakobho ndu okpála hana inde abhuka Yesu*

<sup>5</sup> Moidje aye engú pindji lele maka li Ebhe ngau okpála lie bhú djila e ngbingbili ka nakpata líli-o. Ani me: «Kpála inde akpáta ndu líli-e hana-a, adú bhadi bhú mukobho kaka.†» <sup>6</sup> Engú bini, u papa pindji lele maka li Ebhe ngau okpála lie bhú djila e ngbingbili ka nabhuka me: «Mo opá li bua mu de me: «A a'ú abhúlá da?†»» Padhá de, anga li mu pa mo-o, a akunda napa me, mu ngayi li bua mu me: «A a'ú abhúlá da ngú napa pi Yesu Kilisito me ani go bhaka ní kuto ei.» <sup>7</sup> Mo opá di li bua mu de me: «A aké asatə da?» Padhá de, anga li mu pa mo-o, a akunda napa me, mu ngayi li bua mu me: «A aké asatə da ngú nagbegbe Yesu Kilisito bhú ká okpála inde amu-o?†» <sup>8</sup> Bhuku gba Ebhe-e apa mangbo me: «'Li Ebhe dengo mu masikpe.

A bhú 'bhə mu, a di li bua mu.†» Engú ya ngakpokpo e-e, a pindji eli bhomu, a ayo me okpála bhuka eli ango-o. <sup>9</sup> Li mu pa ne 'bhə mu kala ndu okpála hana me Yesu ne Ngámá-a, li mu bhuka di ne bua bini me Ebhe azuku ani bhú ká okpála inde

amu-o, Ebhe kóbho mu. <sup>10</sup> Padhá de, anga ní bhuka Yesu Kilisito li bua ní-e, ní kólo ngbingbili bhú djila Ebhe. Ní pa ne 'bhə ní mbámbá me Yesu Kilisito ne Ngámá-a, Ebhe kóbho ní. <sup>11</sup> A maka u aye lie bhú Bhuku gba Ebhe-e me: «Ndu okpála hana inde abhuka ani-e, ani djí 'ngbu e li uo 'kpí bini de.†» <sup>12</sup> Ka 'ngú ango-o, abana omaYuda, abana di okpála bhende ne omaYuda ade-e, u viti bha bini. Koli Ngámá gba uo bha bini. Ani ngaha obabadha 'ngú gba e bhelé pi ndu okpála hana inde ngayo ka ani me ani teteke o-o. <sup>13</sup> A maka u aye lie bhú Bhuku gba Ebhe-e me: «Ndu okpála hana inde ayó ka Ebhe Ngámá me ani teteke o-o, ani akóbho uo makobho.†»

<sup>14</sup> A moko. Engú bini, li okpála bhuka ani de-e, u ayó ani lele pi? Li okpála dje engú gba ani-e de-e, u abhúka ani lele pi? Li kpála kpokpo 'ngú gba ani-e de-e, okpála adjé engú gba ani-e lele pi? <sup>15</sup> Li ani tima okpála de-e, u anú nakpokpo 'ngú gba ani-e lele pi? U aye di bhú Bhuku gba ani-e me: «Tsitsia nga, a ko djali nau okpála inde ngakpokpo obabadha ngali-e nago ne kpokpokpo!†» <sup>16</sup> Engú bini, a ko de me ndu okpála hana abhuka Bádha Ngali-e de. Padhá de, anga Isaya ayi nani belegu me: «Ngámá, a abhuka ongali ya akpokpo e pi okpála da?†» <sup>17</sup> Ní mbila me, kpála ngabhuka nedhinga inde ani adje ngali lie-o. Ngali bhomu-o, a ko bhende ngalu pí 'li Yesu Kilisito-o.

<sup>18</sup> I nde lie mo-o, ma ngayi me, a akunda napa me omaYuda dje nga ngali bhomu-o di? A mo-o ade, u adje! Bhuku gba Ebhe-e ngapa me:

«Ngbikpi ne sukpe u ngakpokpo 'li Ebhe ne ndu bili hana pála doto.

† **10:5** 10:5 Tsia bhú Lev. 18:5. † **10:6** 10:6 Tsia bhú Det. 30:13. † **10:7** 10:7 Tsia bhú Det. 30:13. † **10:8** 10:8 Tsia bhú Det. 30:14. † **10:11** 10:11 Tsia bhú Isa. 28:16. † **10:13** 10:13 Tsia bhú Djl. 3:5. † **10:15** 10:15 Tsia bhú Isa. 52:7. † **10:16** 10:16 Tsia bhú Isa. 53:1. † **10:18** 10:18 Tsia bhú Ets. 19:5.

'Li uo akolo ne li ndu 'dje doto badha hana.†»  
 19 Ma ngayi matá engú bini, okpála na Isalaele kè mboli engú u adje e di? A mo-o ade, u akè mbolimboli akè! Ngaiza kalanu-o, Moidje apa nani me:  
 «Ebhe apa me:  
 <Ma améne engú da napa me ngayi okpála gba ma-a yi kolo ne siti  
 bua pi okpála inde ne okpála gba ma ade-o.  
 Ma améne engú da napa me yi kolo ne ke 'ngú pi opiga inde li imbilangu nde bhú 'ndji o ade-o.†»  
 20 Pipita-a, polofeta Isaya apa belegu me:  
 «Ebhe apa me:  
 <Okpála inde i du agili ma de-e, au ma.  
 Ma asuno lima pi okpála inde i du ayo ma de-o.†»  
 21 La li 'ngú gba omaIsalaele-e, Ebhe apa me:  
 «Ekpí libhomu, ma ato 'kpa ma pi omaha ma me u gogo, engú bini, u amene kpéke 'ndji, u ayala engú inde ma adu napa e-o.†»

## 11

### *Ebhe ne ndjinga pi omaIsalaele*

1 Ma ngayi me, i nde lie mo-o, Ebhe abala omaha e abala? A mo-o ade! Padhá de, anga ngama makpe-e, ma ne maIsalaele. Abalahama ne ogbi ma, u azu ma bhú piga gba Bendjame. 2 Ebhe bala omaha e inde ani abhu nani o pi e bhutode-e de. Yi mbila engú inde li Bhuku gba Ebhe apa e hana li bili inde li polofeta Eliya adu alopole lie lie kala Ebhe li 'ngú gba okpála na Isalaele-o. 3 Eliya adu alopole lie me: «Ngámá, u abhili opolofeta gba mu-o. U atsia agugumu di odabili inde ya tsutsulu 'he pi mu pí e-o. Ma atigala bha koli

ma kpi ma kpi. U la bhadi ngagili nabhøle ma.†»

4 Ebhe atsia agie pi ani pi? Ebhe agie pi ani me: «A mo-o ade, mu kpi mu kpi ade. Ma alila okpála kete mananika pi ma makpe. U tutu lipuku o kala Bala inde li okpála ngau e maka Ebhe-e de.†» 5 Bhú okpí na naki inde-e, a bhadi moko. Dú omaIsalaele koko atigala, inde li Ebhe abhu o pi e ka bádha bhú 'bu gba e-o. 6 Ani bhú uo ka babadha okulu gba uo de, ani abhu uo ka bádha bhú 'bu gba e-o. Li Ebhe bhú uo ka obabadha okulu gba uo-o, ní de apá me bádha bhú 'bu gba ani-e, a ko bádha bhú 'bu de.

7 Bhobhomu-o akunda napa me okpála na Isalaele sia ehe inde u adu nagili e de. Okpála bini bini bhú ká uo inde li Ebhe abhu o-o asia ehe inde u adu nagili e bha bini ngao. La pi okpála koko-o, Ebhe ato kpéke 'ndji bhú uo. 8 A maka u aye lie bhú Bhuku gba Ebhe-e me:

«Ebhe amene me u aké mboli 'ngú bini de.

Ani ani djila uo me u aú kpí de. Ani atsia abuku di 'dje uo me u adjé 'kpí de nakolo pi naki.†»

9 Davidi atu di nani 'kpa e li uo me: «Oanokomia gba uo du pi uo maka ekú,

a adú pi uo maka ndjukudu li kpadji,

amba u sia mbini kulu inde u ngamene e-o.

10 A ayo me Ebhe dudu djila uo me u aú 'kpí de.

A ayo me Ebhe ha likabhu pi uo, me 'ngbu uo kodho.†»

11 Ma atsia ayi matá me, li okpála na Isalaele ati lie, u ati bha na paká-a? A mo-o ade! Engú bini, ka u ati lie, okpála inde ne omaIsalaele ade atsia asia mukobho. Ebhe amene mo-o ngubula napa me omaIsalaele du ne siti bua li

† 10:19 10:19 Tsia bhú Det. 32:21. † 10:20 10:20 Tsia bhú Isa. 65:1. † 10:21 10:21 Tsia bhú Isa. 65:1-2. † 11:3 11:3 Tsia bhú 1 Ong. 19:10, 14. † 11:4 11:4 Tsia bhú 1 Ong. 19:18. † 11:8 11:8 Tsia bhú Det. 29:3; di ne bhú Isa. 6:10, 29:10. † 11:10 11:9-10 Tsia bhú Ets. 69:23-24.

okpála inde ne omaɪsalaele ade-o. <sup>12</sup> Li omaɪsalaele amene siti 'ngú lie, Ebhe amene bádha 'ngú pi ndu okpála na doto hana. Li omaɪsalaele ati lie, Ebhe aha tia pi okpála inde ne omaɪsalaele ade-o. I du me Ebhe nde amene bádha 'ngú pi ndu okpála na doto hana nedhinga inde li omaɪsalaele andjo 'li ani lie, ani améne la matá bádha 'ngú pi uo ane mane, nedhinga li ndu omaɪsalaele hana agie lio lie li pápá gba ani-o.

*Lele maka li Ebhe akobho okpála inde ne omaYuda ade-e lie-o*

<sup>13</sup> Mbia inde-e, ma ngagama 'ngú inde-e pi yi okpála inde ne omaYuda ade-o. Ma ne bhulu titima inde li Ebhe atima e pi okpála inde ne omaYuda ade-o. Kaka-a, ma ngau kulu inde li Ebhe aha e muma ne tata. <sup>14</sup> Ka ma ngau kulu ango-o lie ne tata-a, ma abhundja me okpála na piga gba ma-a adjé siti bua li ma tété, li Ebhe tsia kóbho di bini bini bhú ká uo. <sup>15</sup> Li Ebhe abala omaYuda lie, okpála na opiga koko atsia apo bhúla o de ani. Li Ebhe ató guo 'ngú sunda o ne omaYuda lie, adú djali na ngbéngbé. A adú maka kpála inde akoto bhú kuo, ani atsia agie lie bhú mukobho!

<sup>16</sup> I du me u nde aha ndu mapa na kalanu-o pi Ebhe-e, a akunda napa me mapa bhomu-o libhomu ne naani. Li u ha sie ndula pi Ebhe-e, a akunda napa me oyáyá-a hana di ne naani. <sup>17</sup> Okpála na ɪsalaele maka 'lá ndula na olive. Ebhe ava oyáyá bini bini. Ani atsia ato yi, opiga koko inde ne omaYuda ade-e, bhú da oyáyá bhomu-o. Obabadha ohe inde li omaYuda adu asia e-e, ngayi omatobhukai-e, yi di ngasisia maka li oyáyá ndula asisia angu lie ka sie e-o.

<sup>18</sup> Kaka-a, a ayo de me yi u okpála inde maka oyáyá ndula inde u ava e padhá-a de. Yi nga'o liyi ne bhúla ka ni? Sie ndula-a dha bhú yá e de, yá ndula adha mangbo bhú sie ndula ko. <sup>19</sup> Eu ade. Mu ti da napa

me: «Ebhe ava nani oyáyá bhomu-o ngubula napa me, ngama-a, ani to ma mada uo-o.» <sup>20</sup> A ko paká me, Ebhe ava nani uo anga u bhuka nani ani de. Mo osia dabili bhomu-o anga mo obhuka ani. Engu bini, mo o'ó limu kaka abhúla naali de. Du mangbo ne tsulu Ebhe. <sup>21</sup> Padhá de, anga Ebhe va nani omaYuda padhá de, a asi la masi maka mu. OmaYuda la nani ne okukulu oyáyá ndula na olive ngao. Mu lila limu de-e, Ebhe akódho bhadi mu maka ani ava uo lie-o. <sup>22</sup> Mbila me Ebhe babadha, ani la di ngakodho 'ngú gba okpála ngbingbili. Ani ngakodho 'ngú gba okpála bhende nga'o ká kpadji gba ani-o. Ani la babadha li pápá gba mu-o. La-a, a ayo me nu bha li kpadji gba ani-e ne kalanu. I du mo-o de-e, ani akódho di mu maka ani ava oyáyá ndula koko lie-o.

<sup>23</sup> La pi omaYuda-a, i du me u nde a'o kpéke 'ndji gba o-o, Ebhe gie matá uo li bili u adu nako lie-o. Padhá de, anga Ebhe ne angu ngú nagie uo matá bhú da o ne toto. <sup>24</sup> Ngayi okpála inde ne omaYuda ade-e, yi maka oyáyá ndula na olive inde u lu e malu de. Ebhe atsia ava yi, ani ago a'o yi li kute 'lá olive bhende u alu e malu. U memene la mo-o de. La pi omaYuda-a, uo maka oyáyá ndula na olive bhe u a lu e malu. Kaka-a, dá napa me Ebhe gie uo bhú dá o-o kpekpeke ade.

*Ndjinga gba Ebhe-e pi ndu okpála hana*

<sup>25</sup> Ondaise ma, ma akunda me yi mbila engu inde li Ebhe awo e mawo-o, ngubula me yi aú liyi mugito de me yi ne obhulu imbilangu-o de. Yi mbila me té okpála na ɪsalaele adú nagbe kpéke 'ndji li 'ngú gba Ebhe-o, nakolo li 'kpí inde li ndu okpála inde ne omaYuda ade-e hana agie lio lie agba Ebhe-o. <sup>26</sup> Abhomu-o li 'kpí ango-o, li omaɪsalaele hana tsia kóbho maka li Bhuku gba Ebhe-e apa lie me:

«Kpála inde akóbho okpála ayíe bhú Siona .

Ani a'é osisiti 'ngú gba odi Yakobho.

<sup>27</sup> A bhomu-o gandja inde ya akódho e ne uo-o,

nedhinga ma a'é osisiti 'ngú gba uo lie-o.†»

<sup>28</sup> Li ní tsia maka li omaYuda ayala Bádha Ngali-e lie, a ko obhulú yala gba Ebhe. Engú bhomu-o amene lie lie mo-o, ngayi okpála inde ne omaYuda ade-e, yi atsia asia bádha 'ngú gba Ebhe-o. Engú bini, ní tsia maka li Ebhe abhu uo lie me u du bhú ngu ni-e, Ebhe ndu 'kpí hana ne mukunda pi uo ka gandja nani u akodho e ne onguo ogbi uo mo-o. <sup>29</sup> Padhá de, anga li Ebhe ha 'he pi kpála-a, ani gbúlú matá ka ani de. Ani 'i di kpála-a, ani dji matá mabhundja gba e li pabilí gba ani-e de. <sup>30</sup> Nani kalanu-o, ngayi di-e, yi andjo 'li Ebhe. Engú bini mbia inde-e, yi ambila ndjinga gba Ebhe anga omaYuda andjo di 'li ani. <sup>31</sup> A bhadi moko. U andjo bhadi 'li Ebhe mbia inde-e ngubula me Ebhe dje ndjinga yi. Ebhe amene mo-o ngubula me ngauo di-e ni dje ndjinga uo mbia inde. <sup>32</sup> Padhá de, anga ka li ndu okpála hana andjo 'li Ebhe lie, u akolo maka obhulú tikpu. Ebhe amene mo-o ngubula me ni dje ndjinga ndu uo hana.

*Ebhe ngbéngbé ane ndu 'he hana*

<sup>33</sup> A na paká me bádha bhú 'bu gba Ebhe ane ne engbé mane! Imbilangu gba ani-e ane ndu 'ngú hana! Ani mbila ndu 'ngú hana! Engú inde ani ngabhundja e li bua e, kpála bini ti da nakpokpo kúkú de. Kpála bini ti da nakə mboli okpadji gba ani-e de. <sup>34</sup> A maka u aye lie bhú Bhuku gba ani-e me:

«Kpála bini mbila mabhundja gba Ebhe Ngámá-a de.

Kpála bini ade inde i ti da nakpokpo pi Ebhe

lele engú inde ayo me ani mene e-o.†

<sup>35</sup> Kpála bini ade inde akpo naha 'he pi Ebhe

ngubula napa me ani du adjeke me Ebhe gie pi ni-o.†»

<sup>36</sup> Padhá de, anga ani abho ndu 'he hana ngae. Ani ngamene me ndu 'he ni abho e hana du bhú mukobho. Ndundu hana ngagie lie agba ani. A ayo me okpála dhogə Ebhe duduma ne duduma! A adu moko.

## 12

*Ebhe aha kulu pi okpála kpikpiki*

<sup>1</sup> Ondaise ma, i nde lie me Ebhe nde adje ndjinga ní mo-o, ma ayo ka yi me yi ha liyi ngayi makpe pi Ebhe maka makiso inde na uu. Yi du libhomu pi ani ngú nanga li ani. Pi yi-e, a bhomu-o kukulu lele nadhogə Ebhe-o. <sup>2</sup> Yi adú amene 'he maka okpála na doto inde-e de. Yi 'o mangbo me Ebhe dji yi, amba ani ha pi yi imbilangu na mbia. Yi mene mo-o, yi tsia mbila me Ebhe akunda ni i-e. A akunda napa me yi ambila engú inde na babadha, engú inde anga li ani, engú inde li kpadji.

<sup>3</sup> Kabula kulu inde li Ebhe aha e muma ka bádha bhú 'bu gba e-e, ma ngapa pi ndu yi hana me: yi aú liyi ne bhúlá nane mane de. Yi mbila mangbo lele yi makpe, maka yi nde lie-o. Yi tsia lele nabhuka li Ebhe aha e pi yi ngú nambila me da yi ngae dho-ie. <sup>4</sup> Koli 'lá kpála bha bini, engú bini oyáyá tété bhelé inde ngamene okulu kpikpiki. <sup>5</sup> A viti bhadi pi ní bini. Abana ní nde lie bhelé-e, ní akolo koli kpála bini bhú nakpətsə liní ne Yesu Kilisito-o . Ní atsia akpətsə liní maka oyá kpála-kuti akpətsə lie lie-o.

<sup>6</sup> Ebhe aha pi ní oangu ngangá ngu namene kulu nedi. Ani aha pi ní padhá bhú bádha bhú 'bu gba e, li lele maka anga li bua ani lie-o. Kaka-a, li saka ní sia angu nakpokpo eli

† 11:27 11:26-27 Tsia bhú Isa. 59:20-21, 27:9. 11:34-35 Tsia bhú Isa. 40:13; di ne bhú Djib. 41:3.

† 11:34 11:34 Tsia bhú Isa. 40:13. † 11:35



inde ayie ka Ebhe-e, a ayo me, ani kpokpo nakpata lele nabhuka gba e-o. <sup>7</sup> Li Ebhe ha pi kpála koko angu nateteke obi e, a ayo me ani teteke uo. Li Ebhe ha pi koko angu nasuno 'ngú pi okpála koko-o, a ayo me ani suno. <sup>8</sup> Li Ebhe ha pi kpála koko angu nato masi bhú obi e-e, a ayo me ani to masi bhú uo. Li Ebhe ha pi kpála koko angu napu 'he pi obi e-e, a ayo me ani pu ne bua e hana. Li Ebhe ha pi kpála koko angu nau pí 'ndji obi e-e, a ayo me ani mene kulu ango-o ne bádha bua. Li Ebhe ha pi kpála koko angu nateteke obhulu ndibhili-e, a ayo me ani mene ne djali.

### *Lele nakobho gba omabhuka*

<sup>9</sup> Yi du ne mukunda pi ndu okpála hana ne bua bini. Yi adú apa 'ngú na mukunda bha ne 'bhe yi de. Yi yala siti 'ngú, yi dhedhe li bádha 'ngú. <sup>10</sup> Yi du ne mukunda sunda yi maka a ayo lie me ondaise du ne mukunda sunda o. Yi du ne mazima sunda yi na paká paká. <sup>11</sup> Yi ha liyi pi kulu ne angu yi hana. Yi adú ne obhulu ipio de. Yi mene kulu liyi pi Ngámá ne bua yi hana. <sup>12</sup> Yi du bhú djali kabula yi nga'o 'to yi lie 'to ohe li Ebhe apa me ni ahá e pi yi-o. Yi kibila okpekpeke da 'ngú ne 'ndjá bua. Yi ayó Ebhe ne ndala tété de. <sup>13</sup> Yi teteke ondaise yi inde bhú ndibhili-o. Yi sia obhende ngago li yi-e ndjindji.

<sup>14</sup> Yi yo Ebhe me ani tuko bisagu pí okpála bhende ngato mbolo li yi-o. Yi ayó de me Ebhe tu pøjə li uo de. <sup>15</sup> Yi kpi djali bhú dabili bini ne obhende bhú djali-o. Yi ku 'gbá bhú dabili bini ne obhende bhú 'gbá-o. <sup>16</sup> Yi du nadje liyi sunda yi ne obi yi ndjindji. Yi adú ne 'ngbé 'ndji de, engú bini, yi ziba ndu kulu hana inde u ahá e pi yi-o, abana i du bha kulu li okpála ngau e padhá. Yi aú liyi de me ni ambila ndu 'ngú hana-a de.

<sup>17</sup> Yi agie siti pi siti de. Yi le ne kpéke me yi mene bádha 'ngú kala ndu okpála hana. <sup>18</sup> I du li naayi-e, yi mene ne kpéke me yi du bhú guo 'ngú ne ndu okpála hana. <sup>19</sup> Ngayi okpála na mukunda gba ma-a, yi agie siti pi okpála de, yi 'o mangbo me Ebhe gie siti pi uo ngae. Padhá de, anga Ngámá Ebhe apa bhú Bhuku gba e me:

«Ngama-a, ma agie siti 'ngú li okpála amene e li yi-e ngama. Ngama makpe, ma améne uo nakpata lele engú u amene e li yi-o.»

<sup>20</sup> Engú bini, pi yi-e, yi mene mangbo maka li Bhuku gba Ebhe-e apa lie me:

«I du me a nde li bhulu yala gba mu-o ne gumu-o, mu de ha ezu pi ani.

I du li ani ne gumu 'ngu-o, mu de ha engu nandji mandji pi ani.

Padhá de, anga mu mene mo-o, a adú mugito me mu ngabu ndjekedhe djua na dédé pí 'ndji ani.»

<sup>21</sup> Mo o'ó de me siti 'ngú ha angu ni-e de. Engú bini, ha mangbo angu siti 'ngú ne namene bádha 'ngú.

## 13

### *A ayo me ní manga ongámási mamaŋga*

<sup>1</sup> A ayo me ndu yi hana, yi manga ongámási inde pí 'ndji ní-e mamaŋga. Padhá de, anga ndu okpála hana inde ngau ngámá-a, u au ka Ebhe. Ani a'o okpála inde ngau ngámá-a ngae. <sup>2</sup> Kpála inde ngagbe kpéke 'ndji li ongámási-e ngagbe bhomu-o kpéke 'ndji li líli inde li Ebhe a'o e-o. Okpála inde ngamene mo-o agbéle ke 'ngú gba Ebhe-e pí o makpe. <sup>3</sup> Okpála inde ngamene ngbili 'ngú kpekpe ongámási de, engú bini, a kpekpe mangbo ongámási ne okpála inde ngamene siti 'ngú-o. Kaka-a, li mu kunda me ni adú

† 12:19 12:19 Tsia bhú Det. 32:35. † 12:20 12:20 Tsia bhú Gbt. 25:21, 22.

nakpe ongámási de-e, mene bádha 'ngú ngubula me mü dü nanga bhú djila ongámási manga.

<sup>4</sup> A mo-o. Padhá de, anga ongámási ngamene kulu inde li Ebhe aha e pi uo-o ngubula me u teteke yi, amba yi dü amene bádha 'ngú. † dü la me mü nde ngamene siti 'ngú-o, mü de kpe ongámási makpe! Padhá de, anga angu li Ebhe aha e pi uo-o, ani ha padhá de. Ani aha pi uo, anga ani a'o uo bhú kulu gba e ngú nasuno ke 'ngú gba e pi okpála inde ngamene siti 'ngú. <sup>5</sup> Kaka-a, a ayo me yi manga ongámási mamanga. Yi amánga bha bini uo ka nakpe ke 'ngú gba Ebhe-e de, engú bini, yi manga di uo ka anga yi ambila li bua nakpokpo kú 'ngú gba yi-e ndjindji me, a ko bádha 'ngú.

<sup>6</sup> A di bhomu-o ta 'ngú yi ngakala mandjandja ka e ko. Padhá de, anga Ebhe a'o ondombi na mandjandja ngubula me u mene kulu bhomu-o. <sup>7</sup> Yi ha pi kpála ne kpála ehe inde ati ne ani-o. Yi futa ndü mandjandja hana inde a ayo me yi futa e-o. Yi manga ongámási inde a ayo me yi manga o-o mamanga.

*Ndü líli hana agbite lie bhú mukunda*

<sup>8</sup> Yi adú ne bopulu gba kpála bini de. Yi dü bha bini ne koli bopulu bini na mukunda inde yi nde ne e sunda yi-o. Kpála inde ne mukunda pi obi e-e, ani amene bhomu-o ndü líli gba Ebhe-e hana má kpekèbhè! <sup>9</sup> Líli gba Ebhe-e apa me: «Mo okúnda èlè, i dü di-e bhoko gba kpála koko de, mo obhólè kpála de, mo ozí 'he de, mo odú ne gumu 'he gba kpála koko de.» Olíli bhomu-o ne ndü olíli koko hana agbite lie bhú koli líli bini inde me: «A ayo me kunda kilí mü maka mo okunda limu lie ngamu makpe.†» <sup>10</sup> Kpála inde ne mukunda pi kilí e, ani méne ani sisiti belegu de bini. Kaka-a, mü

dü ne mukunda pi kilí mü-o, mo omene bhomu-o ndü líli-e hana.

*A ayo me ní dü bedhe ndü nedhinga hana*

<sup>11</sup> Yi 'o 'ngú bhomu-o li bua yi, anga yi mbila nedhinga ní nde bhú e hana. A inde-e nedhinga ayo lie me yi dü li zaku. Nedhinga inde li Ebhe akóbho ní lie akolo masikpe, a matá tsutsu maka nedhinga nani ní abhuka lie ade. <sup>12</sup> Ekpí-e abi abhue, ngbikpi ibili masikpe. Kaka-a, ní adú matá namene engú na biti de. Ní dyi li kute ní otia 'gú inde u agúgu 'gú ne e ne ngbikpi-o. <sup>13</sup> Ní mene 'he liní ndjindji maka okpála inde ngamene 'he ne ngbikpi. Ní adú nadho osisiti 'bi de, ní adú nalangba ne pandi de. Ní adú nasi ne olisi, i dü di-e obhosi ngangá de. Ní adú nagbe bhayiki de, ní adú di ne 'ngbé bua li okpála koko de. <sup>14</sup> Yi dyi mangbo Ngamá Yesu Kilisito li kute yi maka tia 'gú. Yi adú nadhuku maka li kute yi akunda lie de.

## 14

*Yi aú okpála koko bhú djila yi padhá de*

<sup>1</sup> Yi sia kpála inde bhubhuku bhú 'bu nabhuka-o, yi abí bhayiki ne ani pindji engú bhende atsia mabhundja gba ani-e de. <sup>2</sup> Ní ha nga kukulu pindji engú na ezü. Okpála koko ngabhuka me o ti da nazü ndü 'he hana. La-a, okoko inde bhubhuku bhú nabhuka-a ngabhundja me a ndjindji bha bini ne nazü okpálá. <sup>3</sup> A ayo de me kpála bhende ngazü ndü 'he hana-a u kilí e inde i zü mbilika de-e padhá-a de. A ayo di de me kpála bhende i zü mbilika de-e u di bhende ngazü ndü 'he hana-a padhá-a de. Padhá de, anga Ebhe aziba di ani. <sup>4</sup> Ngamu-o, mü ne da ngú nakodho 'ngú gba kpála na kulu gba kpála koko-o? Ngamá na kulu ne angu nakodho

† 13:9 13:9 Tsia bhú Eki. 20:13-17; ne bhú Det. 5:17-21; di ne bhú Lev. 19:18.

'ngú gba kpála na kulu gba e ngae, abana ani mene babadha, ne me ani ti li kpadji na kulu gba e-o. Ma au la bhadi me ani alú kpekpeke, anga Ngámá Yesu ne angu ngú nali ani me ani atí-i de.

<sup>5</sup> Okpála koko ngabhundja me oekpí koko ane okoko ne tata. La pi okpála koko, ndu 'kpí hana viti bha bini. A ayo me kpála ne kpála kə mboli engú ani ngabhundja e li bua e ndjindji me a ko kukulu 'ngú. <sup>6</sup> Kpála inde ngau ekpí koko ngbéngbé-e, ngadhəgə Ngámá gba ní-o. Kpála inde ngazu ndu 'he hana-a, ngadhəgə di bhomu-o Ngámá gba ní-o. Padhá de, anga ani ngagie heni pi Ebhe pindji ezú inde ani ngazu e-o. Kpála inde i zu ndu 'he hana de-e ngamene mo-o ngú nadhəgə Ngámá gba ní-o. Ani di ngagie heni pi Ebhe pindji ezú inde ani ngazu e-o.

<sup>7</sup> Yi mbila ndjindji me kpála bini ade bhú ká ní inde ngakobho ka e makpe. Kpála bini la di ade inde ngakpi ka e makpe. <sup>8</sup> I du me ní nde bhú mukobho-o, ní ngakobho ngubula me ní toko Ngámá gba ní-o. I du me ní mu di-e, ní amu ngú naha sangu pi Ngámá gba ní-o. Kaka-a, belegu ní du bhú mukobho, belegu ní mu di mamu-o, ndu ní hana, ní ne okpála gba Ngámá Yesu. <sup>9</sup> Padhá de, anga Yesu Kilisito akpi, ani atsia azuku ngubula nadu ngámá gba okpála inde bhú mukobho bhú dabili bini ne obhende amu-o. <sup>10</sup> I nde lie mo-o, ngamu-o, mu ngakodho 'ngú gba ndai mu-o ka ni? Ngamu-o, mu ngau ndai mu bhú djila mu padhá ka ni? Ndu ní hana, ní alú kala Ebhe ngú napa me ani kodho 'ngú gba ní-o. <sup>11</sup> Padhá de, anga Bhuku gba Ebhe-e apa me:

«Ngama Ebhe Ngámá inde uu-o, ma apa pi yi na paká me ndu okpála hana atutu lipuku o kuto kala ma.

Ndu uo hana tsia pá me ma ne Ebhe.†»

<sup>12</sup> Bhobhomu-o akunda napa me kpála ne kpála bhú ká ní akpókpo engú inde ani amene e ngae makpe-e pi Ebhe.

*Mo otó kilí mu bhú siti 'ngú de*

<sup>13</sup> I nde lie mo-o, yi 'o nakodho 'ngú gba obi yi-e ma'o. Yi 'o mangbo li bua yi me a ayo de me ní mene engú inde li kilí ní asendele ka e de, ngú napa me ani li bhú siti 'ngú-o de. <sup>14</sup> Bhú makpetse gba ya ne Ngámá Yesu Kilisito-o, ma ambila na paká me ezú na ligina ade. Engú bini, li kpála bini bhundja me ezú inde-e sisiti-e, ezú bhomu-o akolo ligina pi ani. <sup>15</sup> I du me mu nde ngato likabhu li bua ndai mu pindji ezú inde mu ngazu e-e, bhobhomu-o a akunda napa me mu ne mukunda pi ani ade. Kaka-a, lila limu me ni ató kpála inde li Kilisito akpi pi e bhú ngita kabula 'ngú na ezú de. <sup>16</sup> Li ehe du bhú djila mu ndjindji-e, mo oméne de, i du me mu nde au me, li mu mene e li okpála koko pá 'ngú tété sisiti-o.

<sup>17</sup> Padhá de, anga Nau gba Ebhe-e , a ko engú na ezú, i du di-e engú na pandi de. Engú bini, Nau gba Ebhe-e mangbo ne engú inde atsia kulu li Bu Bhobua ngamene e bhú ní-o. Bu Bhobua ngaha pi ní engú inde ngbingbili, ani ngaha pi ní nadu ne guo 'ngú sunda ní, ne nadu bhú djali. <sup>18</sup> Kpála inde ngamene kulu gba Yesu Kilisito li kpadji bhomu-o nganga li Ebhe ngae. Okpála ngapa di li ani me ani ngamene badha 'ngú. <sup>19</sup> I nde lie mo-o, a ayo me ní gili namene engú inde ngato guo 'ngú sunda ní, engú inde ngamene me ní teteke liní li kpadji gba Ebhe-o.

<sup>20</sup> Mo obhólə kulu gba Ebhe-e ka engú na ezú de. A na paká me ndu ezú hana ndjindji ngú nazuzu. La-a, a ndjindji ade me ní du nazú 'he inde ngato kpála bhú siti 'ngú-o de.

† 14:11 14:11 Tsia bhú Isa. 45:23.

21 Engú inde ndjindji-e ngae inde: a ayo natse nazu mbilika, a ayo natse nandji pandi, a ayo natse ndu 'he hana inde i ti da nato kilí mu bhú siti 'ngú. 22 Lila engú inde li bua mu ngapa e pi mu pindji engú na ezu di ne bhe na pandi-e pi mu makpe. Mo opá pi kpála koko de, engú ango-o du bha sunda mu ne Ebhe. A ko djali pi kpála inde li bua e yoko e li 'ngú bini de bhú ká ongú inde li bua ani ngatima ani me ani mene e-o. 23 La-a, Ebhe a'ó 'ngú pí kpála inde ngazu 'he inde li bua nakpokpo kú 'ngú gba e ngayoko e li e-o. Padhá de, anga ani ngamene engú inde i lu pí nabhuka de. Yi mbila hana me, ndu 'ngú hana inde li kpála ngamene e me a nde lu pí nabhuka de-e, a ko siti 'ngú.

## 15

*A ayo me ní mene engú inde nganga li obi ní manga-o*

1 A ayo me nganí okpála inde alu kpekpeke bhú nabhuka-a , ní teteke di okpála bhende kpekpeke ade-o. A ayo de me ní du bha bini namene engú bhende nganga li ní-e de. 2 A ayo me ní mene engú inde nganga li obi ní ngubula nateteke uo, amba u nu li kpadji gba Ebhe-e ne kalanu. 3 Padhá de, anga Yesu Kilisito ngae makpe gili nani engú inde adu anga lie de. Engú bini, a akolo li ani maka u aye lie bhú Bhuku gba Ebhe-e me: «Okpála asobho mu, Ebhe, abhomu-o, sobho ango-o atsia aku li kute ma.†»

4 Ndu ongú hana inde u aye nani e bhú Bhuku gba Ebhe-e , u aye ngubula nasuno pi ní kukulu 'ngú, ngú napa me ní du na'o 'to ní 'to Ebhe. Padhá de, anga Bhuku ango-o ngato bhú ní masi, a la di ngaha pi ní nadu ne 'ndjá bua. 5 A ayo me

Ebhe inde ngato masi bhú okpála-a, inde di ngaha 'ndjá bua pi uo-o mene me yi du ne mabhundja bini, nakpata lele mukobho gba Yesu Kilisito. 6 Abhomu-o, ndu yi hana bhú dabili bini, ne koli eli bini, yi tsia dhogö Ebhe, 'Dyi Ngámá gba ní Yesu Kilisito-o.

*Ndu okpála hana atóko Ebhe*

7 Kaka-a, yi du nasia liyi sunda yi ne bua yi bini maka li Yesu Kilisito asia di yi lie-o. Yi mene mo-o ngubula me okpála dhogö Ebhe. 8 Ma apa pi yi na paká me, Yesu Kilisito akolo nani kpála na kulu gba omaYuda, ngubula me ani suno pi uo me Ebhe papa naae eu de. Ani ago nani ngú nabeledhe 'bhö engú inde li Ebhe apa nani me, ni améne e pi onguo ogbi uo-o. 9 A ayo nani di me okpála inde ne omaYuda ade-e, toko Ebhe kabula ndjinga gba ani-o. A maka u aye lie bhú Bhuku gba Ebhe-e me:

«Kaka-a, ma atóko mu bhú ká okpála inde ne omaYuda ade, ma alí oetsi pi mu.†»

10 Bhuku gba Ebhe-e apa matá di me: «Ngayi okpála inde ne omaYuda ade-e, a ayo me yi kpi djali bhú dabili bini ne okpála gba Ebhe-o.†»

11 A atsia apa matá di li bili koko me: «Ngayi, ndu yi hana okpála inde ne omaYuda ade-e, a ayo me yi toko Ngámá Ebhe. A ayo me ndu okpála hana toko ani.†»

12 Polofeta Isaya apa di me: «Kpála bini akóto bhú piga gba Yese, ani agó ngubula nau ngámá pí 'ndjí okpála inde ne omaYuda ade-o.

Okpála ango-o a'ó 'to o 'to ani.†»

13 A ayo me Ebhe inde amemene me okpála du na'o 'to o 'to ni-e bedhe yi ne djali bedhe di ne guo

† 15:3 15:3 Tsia bhú Ets. 69:10. † 15:9 15:9 Tsia bhú Ets. 18:50. † 15:10 15:10 Tsia bhú Det. 32:43. † 15:11 15:11 Tsia bhú Ets. 117:1. † 15:12 15:12 Tsia bhú Isa. 11:10.

'ngú , anga yi abhuka ani. Abhomu-o, yi tsia dú na'o 'to yi 'to ani na pakápaká bhú angu gba Bu Bhobua-o .

*Polo akpokpo 'ngú pindji kulu gba e*

<sup>14</sup> Ondaise ma, ma ambila mbámbá me yi abedhe ne bádha 'ngú bhú yi bedhe. Ma mbila di hana me yi ambila ndu 'ngú inde a ayo me yi mbila e hana, di ne me yi ti da nasusuno sunda yi. <sup>15</sup> Belegu inde lie mo-o, ongu bini bini bhú balua inde-e, ma alu pépé kpekpeke ngubula me 'ndji yi ayie tété de. Ma aye mo-o kabula bádha bhú 'bu inde li Ebhe asuno e muma-o. <sup>16</sup> Ebhe a'o ma kpála na kulu gba Yesu Kilisito bhú ká okpála inde ne omaYuda ade-o. Ma aha lima libhomu pi Ebhe ngubula nakpokpo Bádha Ngali gba ani-e pi uo ngubula me u bhuka ani, amba u du maka makiso inde ngangá li ani manga. Makiso angoo, Bu Bhobua a'o kpi pi ani.

<sup>17</sup> Inde lie mo-o, ma ne gindaginda bhú kulu inde ma ngamene e pi Ebhe-o, anga ya akpøtse liya ne Yesu Kilisito bhú dabili bini. <sup>18</sup> Ma ti da napa 'ngú koko bini de. Ma apá bha bini engú inde li Yesu Kilisito amene e li kpadji gba ma-o. Ani amene me ma gbele okpála inde ne omaYuda ade-e kala Ebhe ngubula me u du namanga ani. Ani amene mo-o bhú oeli inde ma akpokpo e-o, di ne bhú okulu inde ma amene e-o. <sup>19</sup> Ani amene di mo-o bhú ongamba 'ngú ngangá di ne bhú nau maka li Bu Bhobua gba ani-e adu nasuno angu gba e lie-o. Abhomu-o, ma atsia akpokpo Bádha Ngali gba Yesu Kilisito pi okpála ne ndu bili hana, nayie bhú Yelusalema nakolo makolo bhú ndu doto na Ilili. <sup>20</sup> Ma adu nakunda ndu 'kpí hana nakpokpo Bádha Ngali-e li bili inde li okpála dje nga engú gba Yesu Kilisito lie de-o. Ma du nakunda nakpokpokpo li bili inde u adje engú gba ani-e lie adje-e de, ngubula me

ma ayiki eti li bili li kpála koko abhu ka kulu lie abhu-o de. <sup>21</sup> Ma amene maka u aye lie bhú Bhuku gba Ebhe-e me:

«Obhende u kpokpo nga nani engú gba ani-e pi o de-e,  
u aú ani.

Obhende i dje nga nani engú gba ani-e de-e,

u aké mbolimboli.†»

<sup>22</sup> A bhomu-o engú inde ani kpadji muma bhutsibhutsi me, ma akólo li yi de-o.

*Gumu gba Polo ngú nanu bhú gudhu na Loma*

<sup>23</sup> Kalanga bhelé ane, ma adu ne gumu nakolo li yi, engú bini, kulu adu nani kpadji muma. La mbia inde-e, kulu gba ma bhú ondu doto angoo andjia. <sup>24</sup> Sunda 'kpí inde-e, ma adji bhú Esipanye. Li ma du nanu-o, ma apú bhú Loma ngubula me ní si mbo ne yi ekpí bhisi. Pipita-a, yi téteke ma me ma kodho 'kpí.

<sup>25</sup> La-a pi mbia inde-e, ma adji nga bhú Yelusalema ngubula nateteke okpála gba Ebhe inde oo-o. <sup>26</sup> Padhá de, anga omabhuka na Makedonia di ne Akai au ndjindji me o po bhúla tia ngubula nateteke omabhuka inde bhú ndibhili bhú Yelusalema ne di. <sup>27</sup> U abhundja engú angoo bhú ngu o, a ayo la bhadi nako me u mene moko. OmaYuda ateteke okpála bhende ne omaYuda ade-e ngubula me u sia bádha bhú 'bu gba Ebhe . Kaka-a, a ayo bhadi me okpála inde ne omaYuda ade-e teteke omaYuda ne oehe inde aneke ka uo-o. <sup>28</sup> Abhomu-o, i du me ma nde andjia kulu bhomu-o andjia-a, ma kóldho 'kpí bhú Esipanye. A akunda napa me pita nandjia nagapa tia u apo bhúla e li uo-o. Kala nakodho 'kpí ka ma-a, ma apú ngaiza agba yi. <sup>29</sup> Ma ambila me ma akólo lie agba yi-e, Yesu Kilisito asúno bádha bhú 'bu gba e pi ní na kuo kuo.

<sup>30</sup> Ondaise ma, ma ngayo ka yi ne 'li Ngámá gba ní Yesu Kilisito, di

† 15:21 15:21 Tsia bhú Isa. 52:15.

ne 'li mukunda inde li Bu Bhobua ngaha e me, yi kpɔtɔsɔ liyi ne ma bhú gbele inde ma ngagu e ne nayo Ebhe muma. <sup>31</sup> Yi yo Ebhe me nedhinga ma akólo lie bhú Yudaya-a, okpála inde i bhuka Yesu Kilisito de-e ató mbolo li ma de. Yi yo di Ebhe me, omabhuka inde bhú Yelusalema sia oehe inde ma adji ne e pi uo-o ne bádha bua. <sup>32</sup> Abhomu-o, i du me Ebhe nde akunda-a, ma kólo agba yi ne djali li bua ma, ní tsia dú ne yi bhú dabili bini. <sup>33</sup> A ayo me Ebhe inde ahaha guo 'ngú-o du bhú dabili bini ne ndu yi hana. A adu moko.

## 16

*Polo yi okpála bini bini na Loma mayi*

<sup>1</sup> Ma ngakpokpo 'ngú pi yi pindji ndai ní na ɔɔlɔ Foebe. Ani ngamene kulu bhú Dadjua gba Ebhe inde bhú Sekele-o. <sup>2</sup> Li ani akólo lie agba yi-e, yi de sia ani ndjindji kabula 'li Ngámá gba ní Yesu Kilisito . A ayo me okpála gba Ebhe-e du namene moko. Yi teteke ani ne ndu 'he hana inde ani nde ne gumu e-o, anga ani ateteke okpála bhelé, ani atsia ateteke belegu di ma.

<sup>3</sup> Ma yi Pilisila ne 'ko e Akuila mayi. Ngaya ne uo-o, ya amene kulu gba Yesu Kilisito bhú dabili bini. <sup>4</sup> U di me mu ngubula nakobho ma. Ma ngagie heni pi uo naali. A ko la bha bini ma kpi ma kpi de, engú bini, ndu oDadjua gba Ebhe hana inde bhú ndu doto gba omaYuda ade-e di ngagie heni pi uo. <sup>5</sup> Ma yi di okpála na Dadjua inde apɔpɔkɔbhe bhúla o ngubula nayo Ebhe bhú 'ti gba uo-o mayi.

Ma yi ndai ma na mukunda Epainete mayi. A ko kpála na kalanu inde abhuka Yesu Kilisito bhú ndu doto na Adjia-o. <sup>6</sup> Ma yi di Malia inde amene kulu pi yi naali-e mayi. <sup>7</sup> Ma yi di okpála gba ma, Adolonikasi ne uo ne Djuniasi\* mayi. Ngaya

ne uo-o, ya adu nako bhú tikpu bhú dabili bini. A ko obhulu titima inde li okpála mbila o ndjindji naali. U abhuka nani Yesu Kilisito muma kalanu.

<sup>8</sup> Ma yi di ndai ma na mukunda Apiliatusi mayi. Ya akpɔtɔsɔ liya ne ani bhú 'bu Ngámá gba ní-o. <sup>9</sup> Ma yi di Ulubano mayi. Ya ngamene kulu gba Yesu Kilisito ne ani bhú dabili bini. Ma yi di ndai ma na mukunda Sitakisi mayi. <sup>10</sup> Ma yi Apelesi mayi. Ani azu likabhu kabula Yesu Kilisito, ani atsia alu kpekpeke. Ma yi di okpála na piga gba Alisitobile mayi. <sup>11</sup> Ma yi di Elodiona mayi. A ko kpála na piga gba ma. Ma yi di okpála gba Ebhe inde bhú piga gba Nalasisi mayi. <sup>12</sup> Ma yi di Tilifene ne Tilifose† mayi. U aha lio ngú namene kulu gba Ngámá gba ní-e ne bua o bini. Ma yi di ndai ní na ɔɔlɔ na mukunda inde 'li e me Peleside mayi. Ani aha di lie ngú namene kulu gba Ngámá gba ní-e ne bua bini. <sup>13</sup> Ma yi Lufusi, kukulu bádha kpála na kulu gba Ngámá gba ní-e mayi. Ma yi di 'hi ani, inde ateteke ma maka kukulu ndili gba e makpe mayi.

<sup>14</sup> Ma yi di Asikilite ne Felegone ne Elemesi ne Patalobasi ne Elemasi di ne ndu ondaise ní hana inde bhú dabili bini ne uo-o mayi. <sup>15</sup> Ma yi di Filologe ne Djulie ne Nele di ne ndai e na ɔɔlɔ-o mayi. Ma yi di Olipasi di ne ndu okpála gba Ebhe-e hana inde ne uo-o mayi.

<sup>16</sup> Yi yi liyi sunda yi bhú dabili bini ne mukunda gba omabhuka-o . Ndu oDadjua gba Yesu Kilisito-o hana yi yi mayi.

*Polo aha olíli na soso pi omabhuka na Loma*

<sup>17</sup> Ondaise ma, ma ngagbele 'dje yi me: yi lila liyi ka okpála inde ngabi bhayiki li ongú inde u asuno e pi yi-e malila. Uo ngagbogbo bhusu okpála, u tsia mbá bhúla uo li osisiti kpadji. Yi gbe liyi de uo magbe.

\* **16:7** 16:7 Okpála bhelé ngabhundja me Adolonikasi nani ne 'ko Djuniasi. Okoko ngabhundja naao me a ko nani ondaise. † **16:12** 16:12 Tilifene ne Tilifose nani ne olisi.

18 Padhá de, anga ongua okpála bhomu-o ngamene kulu gba Ngámá gba ní Yesu Kilisito ade. Engú bini, uo mangbo ngamene engú bhende a nga li o makpe. U ngapite okpála inde i mbila kali de-e ne obabadha oeli di ne oeli ngú nabo kpála. <sup>19</sup> La pi yi-e, ndu omabhuka hana ambila me, yi ngamanga Ngámá gba ní-o. Abhomu-o, ma ngakpi djali naali kabula yi, ma akunda la di me yi mbila engú inde babadha ngubula namemene, di ne me yi améne siti 'ngú de. <sup>20</sup> Ebhe inde ahaha guo 'ngú-o teteke yi me yi dedele Satana ne 'dhu yi má gala! A ayo me Yesu Ngámá gba ní-e suno bádha bhú 'bu gba e pi yi!

<sup>21</sup> Timoté, inde ngamene kulu bhú dabili bini ne ma-a, yi yi mayi. Okpála gba ma, Lukiusi ne Djasone ne Sosipatele, yi di yi mayi.

<sup>22</sup> Ngama Teletiusi-e, Polo apa muma ngae me ma ye balua inde-e pi yi. Ma yi di yi mayi ne 'li Ngámá.

<sup>23</sup> Gayusi, inde ma ngadu gba e-e, yi di yi mayi. Okpála na Dadjua gba Ebhe inde ei-e ngapo bhúla o bhú 'ti gba ani. Elaste, inde alilila tia na gudhu-o bhú dabili bini ne ndai ní Kualatusi, yi di yi mayi. [ <sup>24</sup> A ayo me bádha bhú 'bu gba Ngámá gba ní Yesu Kilisito du bhú dabili bini ne ndu yi hana! A adu moko.]

<sup>25</sup> A ayo me ní dhogè Ebhe! Ani ti da naha angu pi yi ngubula me yi lu kpekpeke li kpadji gba ni-o, maka Bádha Ngali inde ma ngakpokpo e pi okpála pindji Yesu Kilisito apa lie-o. Ebhe mbamba nga nani ta Bádha Ngali ango-o pi okpála kalanu de. <sup>26</sup> La mbia inde-e, ani ambamba tata pi okpála. Okpála la bhadi ngakpokpokpo maka li opolofeta aye nani lie-o. Ebhe inde ngadu duduma ne duduma akata nani opolofeta me u ye me ndu opiga hana dje Bádha Ngali bhomu, ngubula me okpála bhuka ani, amba u manga di ani. <sup>27</sup> A ayo me ní dhogè Ebhe duduma ne duduma! Kukulu imbilangu

makpe bha ka ani kpi e kpi. A ayo me ní dhogè ani kabula Yesu Kilisito! A adu moko.

**Balua na bini  
gba Polo pi omabhuka  
na gudhu na  
Kolito  
Eli na kalanu**

Balua na bini inde li Polo aye nani e pi okpala na Kolito-o, ani aye nani pindji ongu atsia mukobho gba omakilisito di ne nabhuka inde ali bhú Piga gba Ebhe nani li Polo a'o e bhú gudhu na Kolito-o. Bhú nedhinga ango-o, Kolito nani ne gudhu na ngbéngbé gba oGiliki inde li okpala ngangá apo bhula o bhú e-o, a ko 'ngbé gudhu na ndu doto na Akayi inde bhú nau na Loma-o. 'Li gudhu na Kolito au nani naali ka oehe na mase inde adu bhúbhú bhele-o, ne ka dasundu gba okpala ango-o, ne engú na zabhe inde adu bhúbhú naali-o, a la di-e ongangá engú na ebhe inde abedhe nani bhúbhú bedhe-o. Engú na ngbéngbé inde li Polo adu agu gbele ne e, a ko engú nagbo bhusu o, engú na zabhe inde adu bhú Dadjua gba Ebhe-o, ne ongu inde u ayi e pindji bhoko ne ele, ne pindji naha li, pindji bua nakpokpo kú 'ngú, pindji namene 'ngú li kúku bhú Dadjua gba Ebhe, pindji ehe li Bu Bhobua ngaha e padhá, a la di-e pindji nazuku gba okpala-o. La, Polo atsia asuno imbilangu gba e ne nasuno lele maka li Bádha Ngali ngagama 'ngú li ongu ango-o lie-o.

Alo na (13) inde ngasuno mukunda maka ehe na babadha naali inde li Ebhe ngaha e pi omaha e padhá-a, okpala mbila 'ngú pindji alo (13) ndjikpa ne ká bata-a naali ane oalo koko hana bhú bhuku inde. A ko engú inde li okpala ambila e ane mane bhú bhuku inde ngae.

**Ongbengbe ongu inde bhú bhuku inde-e ngae inde:**

Eli na kalanu 1:1-9

Nagbogbo bhusu o bhú Dadjua gba Ebhe 1:10 - 4:21

Dasundu na ndjindji gba ele ne bhoko, di ne piga gba e 5:1 - 7:40

Omakilisito a la di-e omupagano 8:1 - 11:1

Mukobho na Dadjua gba Ebhe a la di-e engú na Ebhe 11:2 - 14:40

Nazuku gba Kilisito a la di-e nazuku gba omabhuka 15:1-58

Naha makiso pi omakilisito na Yudaya 16:1-4

Engú nayi mayi a la di-e engú bhe na soso 16:5-24

*Polo yi omabhuka na gudhu na Kolito mayi*

<sup>1</sup> Ngama Polo, Ebhe a'i ma bhú ngu e me ma kolo bhulu titima gba YesuKilisito. Ya aye balua inde bhú dabili bini ne ndai ní Sosotene. <sup>2</sup> Ya aye pi yi okpala na Dadjua gba Ebhe inde bhú gudhu na Kolito, ngayi okpala inde li Ebhe a'o o kpi pi e. Yi akolo okpala gba ani ka nabhuka Yesu Kilisito, bhú dabili bini ne ndu okpala hana inde ngabhu 'li Ngamá gba ní Yesu Kilisito ne ndu bili hana-o. Yesu ne Ngamá gba uo, a ko la di Ngamá gba ní-o. <sup>3</sup> Bádha bhú 'bu ne guo 'ngú gba 'Dyi ní Ebhe di ne Ngamá gba ní Yesu Kilisito-o du ne yi bhú dabili bini.

*Obabadha 'ngú inde li Ebhe aha e pi okpala na Kolito bhú bádha bhú 'bu gba e-o*

<sup>4</sup> Ma ngagie heni pi Ebhe ndu nedhinga hana ngubula yi kabula bádha bhú 'bu inde ani aha e pi yi li kpadji gba Yesu Kilisito-o. <sup>5</sup> Bhú makpetse gba yi ne Yesu Kilisito-o, Ebhe abedhe yi ne ndu obabadha ongu hana. Kaka-a, yi mbila nadi mabelu li eli gba ani-e ndjindji, a la di bhú 'ndji yi ne imbilangu bhú ndu 'ngú hana. <sup>6</sup> Ngali gba Yesu Kilisito inde ya akpokpo e pi yi-e, asia dabili li bua yi ndjindji. <sup>7</sup> Kaka-a, yi asia ndu 'he hana inde li Ebhe ngaha e pi okpala bhú bádha bhú 'bu gba e-o, ngayi okpala inde ngadjeke ekpi li Ngamá gba ní Yesu Kilisito asuno



matá lie lie pi okpála-o. <sup>8</sup> Ani atéteke yi ngae me yi la kpekpeke akólo li soso, amba kpála bini adú ne engú na sisiti napapa li yi de, li 'kpí li Ngámá gba ní Yesu Kilisito agó lie-o. <sup>9</sup> Ebhe gba ní-e djidji 'li e de. Ani a'i yi me yi kpòtse liyi ne Ndili gba ní Yesu Kilisito, Ngámá gba ní-o, ani djí 'li e bhomu-o de.

### *Omakilisito na Kolito agbogbo bhusu o*

<sup>10</sup> Ondaise ma, ma ngakikiliki lima pi yi ne 'li Ngámá gba ní Yesu Kilisito me, yi da nda yi hana ne koli bua bini, yi agbógbo bhusu yi de. Yi gbite 'ngbo yi bini ne nade ne mabhundja bini di ne nabhuka bini.

<sup>11</sup> Ondaise ma, ma pa mo-o padhá de, a ko anga okpála na piga gba Koloe apa muma me yi ngadje liyi ade. <sup>12</sup> Engú ma apa e bhomu-o, ma apa anga sunda yi-e, yi ngagbogbo bhusu yi. Okpála koko ngapa me o ngakpata Polo. Okoko ngapa me o ngakpata Apolosi.† Okoko ngapa me o ngakpata Piele. Okoko ngapa me o ngakpata Kilisito. <sup>13</sup> Engú yi ngamene e mana mugito me Kilisito agbo bhusu e magbo. Yi pa nga muma, u agi nani ma Polo li kulusi ngú nakobho yi uu? Yi asia nani batisimo ne 'li ma Polo? A mo-o ade.

<sup>14</sup> Ma ngagie heni pi Ebhe anga ma batisa kpála bini bhú ka yi de. Ma abatisa bha bini Kilisipusi ne uo ne Gayusi† <sup>15</sup> Kaka-a, kpála bini ti da napa de me u abatisa yi ne 'li ma-a de. <sup>16</sup> A ko paká! Ma abatisa di nani piga gba Setefanasi.† Engú bini, ma ziba de me ma abatisa kpála koko uu-o de. <sup>17</sup> Padhá de, anga Kilisito tima nani ma ngú nabatisa okpála de. Engú bini, ani atima ma ngú nakpokpo Bádha Ngali pi uo. Ma ngakpokpo Bádha Ngali ang-o ne mabelu má pua pua maka okpála koko ade. Li ma dú nakpokpokpo ne mabelu maka okpála koko-o, nakpi

gba Kilisito li kulusi-e de matá ne tata ade.

### *Yesu Kilisito pi ní ne angu di ne imbilangu inde ayie ka Ebhe*

<sup>18</sup> Padhá de, anga pi okpála bhende li kpadji na ngita-a, nakpokpo ngali pindji nakpi gba Yesu li kulusi-e, a ko 'ngú na pele. Engú bini, pi ní obhende li Ebhe ngakobho o-o, ní ngau angu gba Ebhe-e bhú ngali ang-o. <sup>19</sup> A maka u aye lie bhú Bhuku gba Ebhe-e me: «Ma améne me imbilangu gba obhulu imbilangu-o kolo padhá.

Ma aú imbilangu gba uo bhú djila ma maka ehe

na padhá.†»

<sup>20</sup> I da me Ebhe nde apa mo-o, a akunda napa me, okpála na imbilangu na doto inde-e, imbilangu gba uo bhú 'ngú de. Okpála inde ngasuno olíli gba omaYuda-a, tata li nasuno gba uo ade. La di-e, obhulu nadi mabelu na suku inde-e, mabelu gba uo-o, tata tété ade. Ebhe asuno bhomu-o me imbilangu na doto inde-e padhá. <sup>21</sup> Padhá de, anga okpála na doto ne imbilangu gba o na kpála-kuti-e ti da nani nambila imbilangu gba Ebhe-e de. Kaka-a, li kpadji na engú inde li okpála ngau e bhú djila o maka engú na pele-e, Ebhe au ndjindji me ni kobho okpála inde ngabhuka-o. Engú na pele ang-o, a ko Bádha Ngali inde ya ngakpokpo e-o.

<sup>22</sup> OmaYuda ngayo ongamba 'ngú kala me u bhuka, oGiliki naao ngagili imbilangu. <sup>23</sup> La pi ya-a, ya ngakpokpo 'ngú gba Kilisito inde u agi e li kulusi-o. Li omaYuda ngadje engú ang-o lie, a ngangbingi 'ndji uo mangbingi. Li okpála bhende ne omaYuda ade-e ngadjedje lie, a ngamene uo maka engú na pele.

<sup>24</sup> Engú bini, pi okpála bhende li Ebhe alo o-o, i da di-e omaYuda, i

† **1:12** 1:12 Tsia bhú 1 Kol. 16:12; di ne bhú Kul. 18:24-28. † **1:14** 1:14 Tsia bhú Kul. 18:8, 19:29.

† **1:16** 1:16 Tsia bhú 1 Kol. 16:15-17. † **1:19** 1:19 Tsia bhú Isa. 29:14.

dɔ di-e obhende ne omaYuda ade-e, u ngambila ndjindji me Yesu Kilisito akolo pi o angu di ne imbilangɔ inde ayie ka Ebhe-e ngae. <sup>25</sup> Okpála koko ngapa me engú li Ebhe amene e bhú nakpi ka Yesu-o, a ko 'ngú na pele. Engú bini, engú inde u a'i e me a ko 'ngú na pele bhomu-o ane imbilangɔ gba kpála-kuti mane. † dɔ me u nde ngabhundja me Ebhe bhɔbhuku-o, a mo-o ade. Padhá de, anga bhuku gba Ebhe-e ane angu gba okpála-kuti ne kpéke.

*Ebhe nga'o tata li ehe inde li okpála ngau e bhú djila o padhá*

<sup>26</sup> Ondaise ma, ngayi okpála li Ebhe a'i o-o, yi bhundja nga me yi ne oda-ie! Nakpata mabhundja gba okpála na doto-o, okpála na imbilangɔ, ne obhende na angu, ne obhende azu lio bhú piga na tia bhú ká yi bhelé ade. <sup>27</sup> Engú bini, Ebhe alo engú li okpála na doto nga'i e me a ko engú na pele-e ngubula me imbilangɔ gba obhulu imbilangɔ-o kolo ehe na padhá. Ani alo ongu bhende li okpála na doto ngau e me angu bhúbhú ade-e ngubula me angu gba bhulu angu-o kolo ehe na padhá. <sup>28</sup> Ani alo ohe inde li tata nde lie e ade, inde li okpála na doto ngamu e, inde u ngau e bhú djila o padhá-o. Ani alo ngubula me ni bhili ohe bhende li okpála ngau e me a tété ne tata-a ne di.

<sup>29</sup> Kaka-a, kpála bini ti da nadjé kute e kala Ebhe de. <sup>30</sup> La ngayi-e, Ebhe akpɔtɔ yi bhú dabili bini ne Yesu Kilisito. Ani amene me Yesu kolo pi ní imbilangɔ inde ayie ka ni-o. Yesu amene ngae me ní kolo ngbingbili bhú djila Ebhe. Ani amene me ní dɔ libhomu pi Ebhe. Ani atsia agbegbe di ní bhú bali gba siti. <sup>31</sup> Kaka-a, a maka u aye lie bhú Bhuku gba Ebhe-e me: «† dɔ me kpála nde akunda nau lie ngbéngbé-e, ani de u lie ngbéngbé bhú engú li Ngámá Ebhe amene e ko.†»

† 1:31 1:31 Tsia bhú Djlm. 9:22-23.

## 2

*Imbilangɔ li Polo adɔ akpokpo 'ngú pindji Yesu Kilisito ne e-o*

<sup>1</sup> Ondaise ma, ngama makpe-e, nedhinga ma anɔ nani lie agba yi ngubula nakpokpo engú inde li Ebhe ambamba ta e li kpadji gba Kilisito-o, ma di pi yi mabelu bhe nane mane de. Ma gama di 'ngú pi yi ne imbilangɔ naali de. <sup>2</sup> Padhá de, anga nedhinga ma adɔ lie agba yi-e, ma gili nambila engú koko bhú ka yi de. Ma agili bha bini nambila Yesu Kilisito, ma agili bha nambila makpe me-e Yesu Kilisito inde u agi nani e li kulusi-o. <sup>3</sup> Kaka-a, ma adɔ agba yi bhuku kpála, ma adɔ ne tsulu, ma atsia adɔ di naguku naali. <sup>4</sup> Bhú nasuno gba ma-a ne bhú nakpokpo Bádha Ngali-e, ma dɔ nagama 'ngú ne imbilangɔ gba kpála-kuti de, ma dɔ di nadi pi yi mabelu de. Engú bini, Bua gba Ebhe-e adɔ nani nasuno pi yi ne angu me engú ma adɔ akpokpo e adɔ kukulu 'ngú. <sup>5</sup> Ma adɔ akpokpo 'ngú pi yi mo-o ngubula me yi a'ó nabhuka gba yi-e bhú imbilangɔ gba okpála de, engú bini yi 'o mangbo bhú angu gba Ebhe-o.

*Imbilangɔ li Polo ngakpokpo 'ngú ne e ayie ka Ebhe*

<sup>6</sup> Nedhinga ya ngasuno lie pi okpála inde abhele li kpadji gba Ebhe-e abhele-e, ya ngasuno kukulu imbilangɔ, a ko imbilangɔ na doto inde-e de. A ko la di bhende gba ongámási na doto inde li 'bhe ngámá gba o andjia mandjia de. <sup>7</sup> Imbilangɔ ya ngakpokpo 'ngú ne e inde-e, a ko mangbo imbilangɔ gba Ebhe. A ko ehe inde awo lie mawo, inde li okpála dɔ nani nambila e de. Kala me Ebhe bho doto-o, Ebhe a'o nani imbilangɔ ango-o ngubula me ní sia té sangu gba ni-o. <sup>8</sup> Ongámási na doto inde-e mbila nani imbilangɔ ango-o de. † dú me u mbila nani uu-o, u de bhələ nani Ngámá gba

ní inde abedhe ne sangu bedhe li kulusi de. <sup>9</sup> Ehe li Ebhe amene e, a maka u aye lie bhú Bhuku gba ani-e me:

«Engú inde li djila okpála u nga nani e de-e,

li 'dje okpála dje nga nani e de-e, di ne bhende li okpála bhundja belegu

engú li e de-e, a la bhomu-o engú inde li Ebhe aleke nani e pi okpála inde

ne mukunda pi ani-o.†»

<sup>10</sup> Pi ní-e, Ebhe ambamba ta engú ango-o bhú angu gba Bhobua gba e-o. Bhobua ango-o mbila ndu 'ngú hana. Ani mbila belegu mabhundja gba Ebhe inde awo lie mawo-o.

<sup>11</sup> Bhú ká okpála-a, a ko da inde ambila engú inde bhú kilí e? A ambila bha bini ne bua inde bhú kpála ango-o. A bhadi moko, engú inde bhú Ebhe-e, ambila bha bini ne Bhobua gba Ebhe-o. <sup>12</sup> Pi ní-e, Bua inde bhú ní-e yie ka okpála na doto inde-e de, engú bini, a yie ka Ebhe. Ebhe aha pi ní ngubula me ní mbila ndu 'he inde ani aha e pi ní bhú bádha bhú 'bu gba e hana. <sup>13</sup> Nedhinga ya ngakpokpo 'ngú lie pi okpála-a, ya ngakpokpo ne imbilangu gba okpála ade. Engú bini, ya ngakpokpokpo ne imbilangu inde ayie ka Bhobua gba Ebhe-o. A akunda napa me, ya ngambamba ta ongú pindji Bhobua gba Ebhe-e pi okpála inde li Bua ango-o nde bhú o-o.\*

<sup>14</sup> Kpála bhende li Bhobua gba Ebhe-e nde bhú e ade-e ti da naziba obisagu inde li Bhobua ango-o ngaha e pi okpála-a de. Bisagu ango-o pi ani maka engú na pele. Imbilangu ngú nambila 'ngú ango-o bhú 'ndji ani ade. Padhá de, anga Bua gba Ebhe-e ti da nambamba ta 'ngú ango-o bha pi kpála ngae. <sup>15</sup> Kpála inde li Bua gba Ebhe-e nde bhú e mbila ndu 'ngú hana, bhende

na babadha, ne bhende na sisiti. Engú bini, ngaani-e, kpála bini ti da nambila 'ngú inde bhú ani-e má kpulukutu de. <sup>16</sup> A maka u ye lie bhú Bhuku gba Ebhe-e me:

«Kpála bini mbila engú inde li Ebhe Ngámá ngabhundja e de.

Kpála bini ti da naha líli pi ani de.†»

Engú bini, ngaya okpála li Bua gba Ebhe nde bhú o-o, nambhundja gba ya viti ne bhe gba Kilisito bini.

### 3

*Omabhuka na gudhu na Kolito maka okpála inde ngakpata Yesu na mbia*

<sup>1</sup> Ondaise ma, pi ma-a, nedhinga ma adu lie agba yi-e, ma ti nani da nagama 'ngú pi yi maka okpála li Bua gba Ebhe-e nde bhú o-o de. Engú bini, ma agama bha ibili 'ngú pi yi maka okpála na doto inde. Padhá de, anga yi adu maka okpála inde i ngakpata nga Yesu Kilisito na mbia. <sup>2</sup> Ongú inde ma asuno e pi yi-e adu maka miliki. A adu ezu na kpekpeke de. Belegu pi mbia inde-e, yi ti nga da nazu ezu na kpekpeke de. <sup>3</sup> Padhá de, anga yi nga bha ngakobho maka okpála na doto inde, anga yi ngamene 'he liyi sunda yi ne 'ngbé bua. Yi la di ngatsi sunda yi. I du me yi nde ngamene mo-o na paká-a, yi mbila de me bhobhomu-o ngasuno me yi nga bha ngadhuku maka li kute yi akunda lie di? <sup>4</sup> Nedhinga li kpála bini bhú ká yi ngapa lie me ni ngakpata Polo-o, li kpála koko pa me ni naani ngakpata Apolosi-e, asuno me yi ne okpála inde na doto. A mo-o adi?

*Ebhe ne Ngámá na kulu gba ní-e ngae*

<sup>5</sup> Apolosi ne da? Polo la di ne da? Ya bha ne obalise gba Ebhe inde ani atima o ngú nakpokpo eli gba e pi yi, ngubula me yi bhuka Ngámá

† 2:9 2:9 Tsia bhú Isa. 64:3, 52:15. \* 2:13 2:13 Li bili inde-e, u tí da di napa me: «Ya ngakpokpo engú pindji Bhobua gba Ebhe-e pi okpála ne oeli inde ayie ka Bhobua ango-o.» † 2:16 2:16 Tsia bhú Isa. 40:13.

Yesu Kilisito. Kpála ne kpála bhú ká ya bha ngamene kulu inde li Kilisito aha e pi ani-o. <sup>6</sup> Ya adu maka okpála nalu nguwa. Ngama-a, ma akpo lita nakpokpo eli gba Ebhe-e bhú ká yi maka kpála inde ngalu nguwa. Apolosi anu ne di ne kalanu maka kpála inde ngabolo 'ngu pí 'zu-o. Engú bini, Ebhe amene ngae me ezú ang-o bhele. <sup>7</sup> Bhobhomu-o asuno me, ne kpála inde ngalu nguwa, ne bhende ngatuko 'ngu pépé-e, tetele kpála bhú ká uo ade. Engú bini, kpála na tetele mangbo ne Ebhe, anga ani ngamene ngae me ezú-o bhele. <sup>8</sup> Ne kpála inde ngalu nguwa, ne bhende ngatuko 'ngu pépé-e, u viti bini. Ebhe ahá makalá na kulu gba kpála ne kpála-a pi e li lele kulu gba e-o. <sup>9</sup> Ndu ya bhisi hana, ya ngamene kulu gba Ebhe-e bhú dabili bini. Ngayi-e, yi maka edyi gba Ebhe.

Yi la di maka eti li Ebhe ngayiki e-o. <sup>10</sup> Bhú bádha bhú 'bu gba Ebhe-e, Ebhe aha angu muma, ma atsia aholo namene kulu gba ani. Ma adu maka kpála nayiki eti ne imbilangu, inde ambila di nabanga 'dhu 'ti-e ndjindji, kpála na kulu koko atsia ago ngú nadyudyo kulu ang-o ne kalanu. A ayo me kpála ne kpála inde nga'o biliki pí 'dhu 'ti ang-o, 'o li lelele. <sup>11</sup> 'Dhu 'ti ang-o, a ko Yesu Kilisito inde yi nga'o nabhuka gba yi-e bhú e-o. Kaka-a, kpála bini ti da na'o matá 'dhu 'ti koko de. <sup>12</sup> Pí 'dhu 'ti ang-o, okpála koko ngayiyiki ne tia kulu inde ngabhue mabhue maka olo, aladja di ne teme na mase naali. Okpála koko ngayiyiki ne tia kulu inde i bhúe de maka ndula, ulu di ne soli.

<sup>13</sup> La-a, li 'kpí li Ebhe akódho 'ngú gba okpála na doto lie-e, kulu gba musuno bini ne bini akóto bhú mbasu. Okpála aú kulu gba uo-o mbámábá. Padhá de, anga li kpí ang-o, Ebhe alé kulu gba kpála ne kpála bhú djua ngú nambila me ne

me a ndjindji, ne me a sisiti. <sup>14</sup> I du me kulu inde li kpála amene e nde tsi bhú djua de-e, li Ebhe há makalá pi kpála ang-o. <sup>15</sup> Engú bini, i du me kulu inde li kpála amene e nde atsi bhú djua-a, Ebhe há makalá pi ani de. Ebhe akóbho kpála ang-o makobho, engú bini, kpála ang-o avo kukuo, ani de atsi bhú djua atsi.

<sup>16</sup> Yi mbila de me yi maka Eti gba Ebhe, di ne me Bua gba ani-e ngadu bhú yi-e di? <sup>17</sup> I du me kpála nde abhelo Piga gba Ebhe-e, li Ebhe bhelo di kpála ang-o. Padhá de, anga Ebhe a'o Dadjua ang-o pi e. Piga inde ani ngadu bhú e-e, a ko yi.

*Imbilangu gba Ebhe-e kpi ne imbilangu gba okpála-kuti*

<sup>18</sup> Kpála bini apite lie de. I du me kpála bini bhú ka yi nde ngabhundja me ni ne imbilangu maka okpála na doto inde-e, ani de yala imbilangu gba e bhomu. Ani kolo mangbo bhú djila okpála na doto maka bhulu pele, amba ani sia imbilangu na kukulu. <sup>19</sup> Ma pa mo-o padhá de, a ko anga oehe li okpála na doto nga'i e me a ko imbilangu-o, a ko ongú na pele bhú djila Ebhe. A maka u aye bhú Bhuku gba Ebhe-e lie me:

«Ebhe ngaholo okpála i ngabhi 'kpa o pi mbulu o me

o ne obhulu imbilangu bhú oeli na kali gba o-o.†»

<sup>20</sup> U aye di matá bhú bhuku gba Ebhe-e me:

«Ebhe mbila mabhundja gba okpála inde ngabhi 'kpa o pi mbulu o me

o ne obhulu imbilangu-o hana.

Ani mbila hana me a padhá.†»

<sup>21</sup> Kaka-a, ma apa pi yi me kpála bini bhú ka yi abhi 'kpa e pi mbulu e bhú nakpata musuno de. Padhá de, anga ndu 'he hana ne naayi. <sup>22</sup> Ne ma Polo, ne Apolosi, di ne Piele-e, ya ndu ya hana ne naayi okpála. Belegu doto, ne mukobho di ne kuo ne naayi 'he. Ongú na naki inde di

† 3:19 3:19 Tsia bhú Djib. 5:13. † 3:20 3:20 Tsia bhú Ets. 94:11.

ne onǵú agó galikpe bhadi ne ndu naayi 'he. <sup>23</sup> Engú bini ngayi-e, yi ne okpála ka Yesu Kilisito, Yesu Kilisito ne kpála ka Ebhe.

#### 4

*A ayo namanga obhulú titima gba Yesu-o mamanga*

<sup>1</sup> A ayo me okpála mbila me, ngaya, obhulú titima gba Yesu Kilisito-o, ya ne okpála na kulu gba ani. Ebhe a'o onǵú inde nani awo lie mawo-o sakpa ya ngubula me ya suno pi okpála. <sup>2</sup> Yi mbila ndjindji me, engú inde u ngayo e ka kpála inde u a'o 'he sakpa e, a ko nadu ngbingbili. <sup>3</sup> La pi ma-a, belegu ngayi-e, yi pa me ma ne siti kpála, ne me ma ne siti kpála ade-e, a méne 'he bini ngú ma de. Abana li okpála nakodho 'ngú-o pa me nganda kulu gba ma-a a ndjindji, ne me a ndjindji ade-e, a méne 'he bini ngú ma de. Abana ngama makpe, ma pa de me nganda kulu gba ma-a ndjindji, ne me a sisiti-e de.

<sup>4</sup> Padhá de, anga pi ma-a, bua ma pa muma de me ma ngamene siti 'ngú-o de. Engú bini, bhobhomu-o kunda napa de me ma mene siti 'ngú de-e de. Ngámá Ebhe akódho mangbo engú gba ma-a ngae. A akódho ne kpála koko de. <sup>5</sup> Kaka-a, yi akódho 'ngú gba okpála koko de. Yi djeke mangbo me nedhinga li Ebhe a'o e ngú nakodho 'ngú gba okpála kolo paká. A ko okpá li Ngámá Yesu agie lie lie-o. Li 'kpí angó-o, ani apándja ondu 'ngú hana inde awo lie naki mawo-o bhú mbasú. Ani agbé engú inde li okpála nde ngabhundja e li bua o-o li zi 'kpí. Ekpí angó-o, li Ebhe tsia dhégo kpála ne kpála li lele kulu gba e-o.

<sup>6</sup> Ondaise ma, ma apa onǵú bhomu-o pi yi pindji ya ne Apolosi ngubula nateteke yi, amba yi mbila onǵú inde bhúbhú-o. Ma akunda me yi kpata nganda ya ngubula me yi kó mboli gbitaku inde-e me: «A ayo napise li kozie inde u a'o e-o.» A ayo

de me kpála bini bhú ká yi sia 'ngbé 'ndji ne 'ili me ni naani ne kpála ka tsipakala, amba ani u okpála koko bhú djila e padhá-a de. <sup>7</sup> Ngamu kpála inde ngabhundja me ni ane okpála koko mane-e, mu naamu ne da? Ebhe ha ndu 'he inde ka mu-o hana pi mu ngae di? I du la me Ebhe nde aha pi mu ngae, mu ngamene 'ngbé 'ndji tété mugito me mo osia ka angu gba mu-o ka ni?

*'Ngbé 'ndji gba omabhuka na Kolito*

<sup>8</sup> A ndjindji, anga yi asia naayi ndu 'he hana inde li Ebhe ngaha e asia. Yi ibili ne obhulú tia li kpadji na nabhuka. Yi ngapa me yi ndu yi hana ne ongámási, la ngaya obhulú titima gba Yesu Kilisito-o, ya naaya ne ongámási ade. I dú me yi du bhú djila Ebhe ne ongámási na paká-a, a de ndjindji ngubula me ni u ne yi bhú dabili bini. <sup>9</sup> Ya ne obhulú titima gba Yesu Kilisito. Engú bini, ma ngau mugito me Ebhe a'o ya asidi pita ndu okpála koko hana. Ya maka okpála bhende u akodho 'ngú gba o, inde u abhili o kala ndu okpála hana. A akunda napa me doto libhomu ne okpála-kuti la di ne oandjelu ngatu 'ue bhú 'ndji ya maka bhú da ngeme.

<sup>10</sup> Ngaya-a, ya ne obhulú pele kabula 'li Yesu Kilisito! La ngayi-e, yi ne obhulú imbilangu kabula ani! Ngaya-a, ya ne okpála li angu nde bhú o ade! Engú bini, ngayi-e, yi ne okpekpeke okpála! Ngaya-a, okpála ngau ya bhú djila o padhá, engú bini, ngayi-e u ngamanga yi mamanga! <sup>11</sup> Nakolo pi mbia inde-e, ya ngadje gamu di ne gamu 'ngu. Ya ngadyi obongo inde akadha. U ngato mbolo li ya. Ya sili kuti de. <sup>12</sup> Ya ngamene kulu ne 'kpa ya kpekpeke. Nedhinga li okpála ngasobho ya lie, ya ngayo Ebhe me ani tuko bisagu pi uo. Nedhinga li okpála ngato mbolo li ya lie, ya ngakikibila, ya gisila de. <sup>13</sup> Nedhinga li okpála ngapa 'ngú gba ya lie sisiti-e, ya ngagie pi uo bhuku

eli. Ya akolo maka oehe inde u abala e apí 'ká. Nakolo pí naki-e, ya akolo maka oehe inde lí tata nde lie ade.

*Polo asuno bua gba e na 'dyi ongisi-e pi omabhuka na Kolito*

<sup>14</sup> Ma ye engú inde-e de me yi sia namu ká engú inde yi ngamene e de. Ma aye mangbo ngubula me ma ha líli, anga yi ne ongisi gba ma na mukunda. <sup>15</sup> Padhá de, anga abana lí omusuno da bha ka yi bhelé-e lí kpadji gba Yesu Kilisito-o, koli 'dyi yi bha bini. 'Dyi yi ang-o, a ko ma. A akunda napa me ma akpo lita nakpokpo Bádha Ngali gba Yesu Kilisito pí yi ngama. <sup>16</sup> Ma nde lie ne 'dyi yi-e, ma gayo ka yi me yi mene engú inde ma ngamene e-o. <sup>17</sup> Ngubula nateteke yi-e, ma atima Timoté agba yi oo. Ma atima ani ngubula me ani nu suno pí yi ne toto lele maka ma ngadhuku lie lí kpadji gba Yesu Kilisito-o. Ongú inde ani asuno e pí yi-e, a bhomu-o ongú inde ma susuno e pí okpála gba Ebhe ne ndu bili hana-o. Yi dje Timoté, a ko ndili gba ma na mukunda-o. Ani la di ngadhuku ngbingbili lí kpadji gba Ngámá Yesu Kilisito.

<sup>18</sup> Okpála koko bhú ka yi ngabhi 'kpa o pí mbulu o anga u ngabhundja me ma agó matá gba yi oo de. <sup>19</sup> Engú bini, i da me Ngámá gba ní-e nde aziba-a, ma agó oo ne 'kpí bhisi inde. Lí ma kolo oo, ma ú obhulu 'ngbé 'ndji bhomu. Ma tsia mbila ne me u bha ngape 'lí o padhá, ne me abhú uo ne angu namene engú. <sup>20</sup> Padhá de, anga Nau gba Ebhe-e ne eli ade, a mangbo bhú angu gba Bu Bhobua. <sup>21</sup> Nedhinga ma agó lie agba yi-e, yi akunda me ma go ne mangua 'ngú dho? Yi akunda me ma ago sakpa ma ne fimbo? Ne me ma go ne bhuku bua ngú nasuno pí yi me ma kunda yi naali?

† 5:1 5:1 Tsia bhú Lev. 18:8; di ne bhú Det. 23:1. bili inde-e me nagbe kpála bhú Piga gba Ebhe.

## 5

*Polo apa pi omakilisito me u gbe kpála inde amene siti 'ngú bhú ka o magbe*

<sup>1</sup> Ma ngadje ngali gba yi-e ndu 'kpí hana. Okpála ngapa me bhú ká yi-e, okpála koko ngadhuku ne olisi, i da di-e ne obhosi ngangá. A ko engú inde belegu okpála i bhuka Ebhe de-e ti da namene e de. A mana mugito me suka yi bini ngadhuku ne wala 'dyi e.† <sup>2</sup> Ngayi-e, engú ang-o ngaha pí yi 'ngbé 'ndji. A ayo la igini me yi de aku 'gbá ngubula siti 'ngú ang-o. A ayo la di igini me yi gbe ngua makilisito bhomu-o bhú ká yi magbe.

<sup>3</sup> Ngama-a, belegu ma nde lie bhú ka yi ade-e, bua ma ne yi bhú dabili bini. Ma akodho engú gba kpála inde amene engú bhomu-o akodho mugito me ma ne yi bhú dabili bini. <sup>4</sup> Ma akodho 'ngú bhomu-o ne 'lí Ngámá gba ní Yesu. Ma ngapa pí yi me, yi po bhúla yi-e, lí bua ma dú ne yi bhú dabili bini. Lí angu gba Ngámá gba ní Yesu tsia suno di lie. <sup>5</sup> Nedhinga yi apó bhúla yi lie, yi pu kpála bhomu-o pí Satana\* ngubula me siti 'ngú inde bhú ani-e koto hana má kpokobho, amba Ebhe kobho bua ani lí 'kpí lí Ngámá gba ní Yesu agó lie ngú nakodho 'ngú gba okpála-o.

<sup>6</sup> A ndjindji ade me yi bhi 'kpa yi pí mbulu yi lí siti 'ngú bhomu-o de. Yi mbila de me mboye ku levile bedi-e ngamene ngae me faline libhому fuka di-i? <sup>7</sup> Yi 'e siti 'ngú bhomu-o bhú ka yi ma'e. I da me yi nde amene mo-o, yi kolo bubu maka faline inde u 'o levile bhú e de-o. Ma ambila ndjindji me Ebhe amene me yi kolo bubu lí kpadji nakpi ka Yesu Kilisito. Yesu maka ndili kandole inde u abhelo e ngubula me okpála zu bhú anokomia na Pasika. <sup>8</sup> Kaka-a, ní kpí djali kabula lí Ebhe agbegbe

\* 5:5 5:5 Napu kpála pí Satana: Ti da napa lí

ní lie bhú bali-o. Ní 'e osisiti 'ngú gba ní-e maka li omaYuda a'e nani dili levile gba o lie ngabula nazu anokomia nazu mapa inde li levile nde bhú e ade-o . Ní mene mo-o, ní dú bubu, di ngbingbili kala Ebhe.

<sup>9</sup> Bhú balua ma atima nako e pi yi kalanu-o, ma apa pi yi bhúbhú me yi adú bhú dabili bini ne okpála inde ngadhuku ne olisi, i du di-e ne obhosi ngangá-a de. <sup>10</sup> Ma pa engú bhomu-o pi yi pindji ndu okpála na doto inde-e hana de. Ma pa engú bhomu-o pindji okpála inde ngadhuku ne olisi, i du di-e obhosi ngangá-a de, ne pi obhende li gamu 'he gba okpála abedhe bhú o bedhe-e de. Ma pa la di engú bhomu-o pindji okpála inde ngazi 'he-e de, i du di-e obhende ngadhoge ebhe na eu-o de. Li kpála kunda nadu bhú dabili bini ne okpála bhomu-o de-e, kpála ango-o de yie pila doto mayie.

<sup>11</sup> Ma akunda mangbo nayoko yi me, yi akpótse liyi ne kpála inde ngapa me ni ne makilisito me ani nde ngadhuku ne olisi, i du di-e ne obhosi ngangá-a de. Yi akpótse liyi ne omakilisito bhende li gamu 'he gba okpála abedhe bhú o bedhe-e de. Yi akpótse liyi ne omakilisito bhende ngayo ebhe na eu-o de, i du di-e makilisito inde ngasobho okpála koko, ne obhende ngalangba ne pandi, i du di-e bhulu 'zi-e de. Yi akpótse liyi ne uo de. Yi azú 'he ne ngua kpála bhomu-o belegu de bini. <sup>12-13</sup> Padhá de, anga a ko 'ngú ka ma de me ma kodho 'ngú gba okpála inde ne omakilisito ade-o. Ebhe akódho 'ngú gba uo-o ngae. Engú bini ngayi-e, yi ti da nakodho 'ngú gba omakilisito yi nde ne o-o. Maka u aye lie bhú Bhuku gba Ebhe-e me: «Yi gbe kpála inde ngamene siti 'ngú bhú ká yi-e magbe.†»

## 6

### *Lele naleke 'ngú sunda omakilisito*

<sup>1</sup> I du me saka yi nde ne 'ngú sunda o ne ndai e-e, lele pi ani tí da nanu lie ne di kala ongámási na doto? A ayo mangbo igini me ani nu ne ani kala okpála gba Ebhe.

<sup>2</sup> Yi mbila de me okpála gba Ebhe-e akódho 'ngú gba okpála na doto li sokpí-e ngao di? I du la me yi nde akódho 'ngú gba okpála na doto-o, lele pi yi tí da nakodho odjedje ongú inde-e lie de-e? <sup>3</sup> Yi mbila de me ní akódho belegu engú gba oandjelu-o nganí-e di? Ka ni la ní tí da nakodho odjedje 'ngú na naki inde-e lie de?

<sup>4</sup> Li odjedje 'ngú du sunda yi-e, ka ni yi nganu lie ne di kala okpála inde bhú Piga gba Ebhe-e ade-e? <sup>5</sup> Ma ngapa 'ngú bhomu-o ngubula me yi sia numu. Kpála na imbilangu bini bhú ka yi adi ngubula me ani leke 'ngú sunda omakilisito-o? <sup>6</sup> A bha ndju ndjindji me li makilisito du ne engú sunda e ne makilisito-o, u de nu ne di kala okpála inde i bhuka Yesu di?

<sup>7</sup> A na paká me nadu ne engú sunda yi-e, a bhomu-o numu na ngbéngbé. I du me u nde mene ngbili 'ngú li pabili gba yi-e de-e, u nde ngazi 'he gba yi-e, ka ni yi tí da nakikibila lie ne 'ndjá bua de-e? <sup>8</sup> Engú bini, okpála inde i mene ngbili 'ngú pi okpála koko de-e ne yi! Yi la di ngazi 'he gba ondaise yi omakilisito!

<sup>9</sup> Yi mbila na paká me okpála inde ngamene osisiti 'ngú-o lí bhú Nau gba Ebhe-e de. Yi apíte liyi de, okpála inde ngakunda olisi, i du di-e ne obhosi ngangá-a, ne obhende ngadhoge oebhe na eu, ne obhende ngakunda olisi, i du di-e obhosi gba okpála koko, i du di-e obhende ngakunda lio sunda o maka elo ne bhoko, u li bhú Nau gba Ebhe-e de. <sup>10</sup> Yi apíte liyi de, obhulu 'zi, ne obhende li gamu 'he gba okpála abedhe bhú o bedhe,

† 5:12-13 5:12-13 Tsia bhú Det. 17:7.

ne obhende ngalangba ne pandi, ne obhende ngadi okpála koko, ne obhende ngagbulu 'he gba okpála ne kpéke djila-a, lí bhú Nau gba Ebhe-e de. <sup>11</sup> A na paká me bhú ká yi-e, okpála koko adu nani namene osisiti 'ngú bhomu. Engú bini, mbia inde-e, Ebhe avulu yi bhú siti 'ngú gba yi-e avulu. Aní a'o yi kpi pi e, aní atsia amene me yi kolo ngbingbili kala ni. Aní amene ndu 'ngú bhomu-o hana lí kpadji gba Ngámá gba ní Yesu Kilisito di ne bhe gba Bu Bhobua gba e-o.

### *Kute ní ne eti gba Bu Bhobua*

<sup>12</sup> Mú ti da napa me: «Ma nde lie ne makilisito-o, ma ti da namene ndu 'ngú hana.» A na paká moko, mú ti da namemene. Engú bini, ongu koko bhú ká ongu inde mú ngamene e bhomu-o ti da nateteke mú de. Ma aziba me, ma ti da namene ndu 'ngú hana. Engú bini ngama-a, ma kunda nadu bali na 'ngú bini de. <sup>13</sup> Mú ti da napa matá me: «Ebhe aha ezú ngubula nabadhe ebu ne di. Aní atsia amene di ebu ngubula ezú.» A na paká moko. Engú bini, lí sokpí-e, Ebhe abhólø ebu, aní tsia bhólø di ezú. Ndundu bhisi hana tsia ndjulu. Padhá de, anga Ebhe bho kute ní ngubula nadhuku ne olisi, i du di-e ne obhosi ngangá de. Aní amene mangbo kute ní ngubula nakpata Ngámá Yesu ne di. Padhá de, anga a ko Ngámá na kute ní ngae. <sup>14</sup> Ebhe azuku Ngámá gba ní Yesu Kilisito bhú kuo. Aní azúku bhadi kute ní bhú angu gba e-o.

<sup>15</sup> Yi mbila de me, kute yi ne saka yá Kilisito dí? Lele pi ma ahá kute ma inde saka yá Kilisito lie ngú nakpøkpøtø ne kute ølø na zabhe-e? Bhobhomu-o méne lie belegu de bini! <sup>16</sup> Yi mbila de me, i du me kpála nde akpøtø lie ne ølø na zabhe-e, ndu uo bhisi hana akolo koli kute bini-e dí? Padhá de, anga u aye bhú Bhuku gba Ebhe-e

me: «Ndu uo bhisi hana akólo koli kpála bini.\*» <sup>17</sup> La-a, kpála bhende akpøtø lie ne Ngámá-a, akolo ne aní ne koli bua bini. <sup>18</sup> Ka 'ngú ango-o, yi 'o nadhuku ne olisi, i du di-e ne obhosi ngangá ma'o. Ondu 'ngú na sisiti lí kpála amemene e hana-a, aní memene ne kute e de. Engú bini, kpála inde ngakpøtø lie ne ølø na zabhe-e ngamene siti 'ngú ne kute e makpe. <sup>19</sup> Yi mbila de me kute yi ne eti gba Bu Bhobua-a dí? Yi mbila la di de me Bu Bhobua ango-o ngadu bhú yi, Ebhe aha la di pi yi ngae dí? Kute yi ne ehe ka yi ade. A ko na Ebhe. <sup>20</sup> Ebhe akala yi bhú kpéke mase. Kaka-a, kute yi dhøgø Ebhe bhú ndu 'ngú hana inde yi ngamene e ne di-o.

## 7

### *Polo agie 'ngú pi omabhuka na gudhu na Kolito pindji 'ngú na kupa*

<sup>1</sup> Mbia inde-e, ma ngagie 'ngú pi yi lí ongu maka yi ayi ma lie bhú balua gba yi-o. Ngayi-e, yi ngapa me: «A ndjindji pi bhoko me aní abú 'kpa e lí ølø de.» <sup>2</sup> Abana mo-o, ma ngabhundja me, kabula nadu nadhuku ne olisi, i du di-e obhosi ngangá de-e maka okoko bhú ká yi ngamemene lie, a ndjindji me bhoko ha ølø gba e, amba ølø ha di bhoko gba e. <sup>3</sup> A ayo me bhoko mene pi ølø gba e ehe inde lí bhoko amemene e pi ølø maka a ayo lie-o. A ayo la di me ølø mene pi 'ko e engú inde lí ølø amemene e pi bhoko gba e ko.

<sup>4</sup> Ølø ti da namene ne kute e maka aní akunda lie de. Kute aní ne ehe ka 'ko aní. La di-e, bhoko ti da namene ne kute e maka aní akunda lie de. Kute aní ne ehe ka wala aní. <sup>5</sup> Kpála bini agbíte kute e pi kilí e de. Yi mene bha bini mo-o me yi nde adje liyi bhú dabili bini, ngú na'o mbo nedhinga ngubula nayo Ebhe. Pipita-a, amba yi gie liyi bhú dabili bini, anga yi mene mo-o de-e, yi tí bhú gamu kute, yi tsia tí bhú ekú

\* 6:16 6:16 Nakolo koli kpála bini inde si-e, a kpi ne nakolo koli kute bini. Tsia bhú Dje. 2:24.



gba Satana . <sup>6</sup> Engú nagbite kute o ngubula nedhinga bedi ma ngapa e pi yi inde-e, a ko líli de, a ko mangbo ngú napa pi yi me, i du me yi nde amene mo-o, a adú sisiti de.

<sup>7</sup> Ma akúnda naali me ndu okpála hana du olingbangi maka ma. La-a, a ti da namene lie mo-o de, anga Ebhe aha makalá pi ní kpi kpi kpi. Aní aha pi okoko naha lío. Aní atsia aha pi okoko nadu olingbangi.

<sup>8</sup> Engú ma ngapa e pi olingbangi ne oekesi-e ngae inde: a ndjindji pi yi nadu kpi yi kpi maka ma. <sup>9</sup> Engú bini, yi u me yi ti da nadu kpi yi kpi de-e, yi de ha liyi. A ndjindji me yi ha liyi nane me gumu kute ha angu yi.

*A ayo me omabhuka inde bhú kúva-a agbó bhusu o de*

<sup>10</sup> Pi okpála bhende bhú kúva-a, ma ngapa bhobhomu-o ngama Polo ade, a ko Ngámá Yesu Kilisito . Aní apa me, a ayo de me elo yie bhú kúva-a de. <sup>11</sup> I du me elo nde ayie bhú kúva-a, aní ahá matá bhoko koko de. I du me aní nde au me ni ti da nadu kpi ni kpi de-e, aní de gie lie bhú kúva gba e-o. Pi bhoko-o, a ayo de me aní gie wala e de.

<sup>12</sup> Pi okpála koko-o, ma ngapa 'ngú inde-e ngama, a ko Ngámá Yesu de. Ma ngapa me: i du me a nde ka makilisito na bhobhoko ne elo inde mupagano-o, i du me elo ang-o nde akúnda nadu ne 'ko e-e, 'ko aní de du ne aní. <sup>13</sup> A bhadi moko pi elo inde makilisito. I du me 'ko aní nde ne makilisito ade-e, li bhoko ang-o kúnda nadu ne wala e-e, u de du ne aní. Elo-o atsé aní de. <sup>14</sup> Padhá de, anga bhoko inde ne makilisito ade bhomu-o ti da nabhuka ka wala e inde ne makilisito-o. A bhadi moko pi elo inde ne makilisito ade-o. I du me 'ko aní nde ne makilisito-o, aní ti da nabhuka ka 'ko e inde makilisito-o. Padhá de, anga i du mo-o de-e, li ongisi gba uo-o dú maka ongisi gba okpála inde i bhuka de. Engú bini, u ti da nabhuka ka 'dyi o, i du di-e ka 'hi o inde abhuka-o.

<sup>15</sup> La-a, kpála bhende ne makilisito ade-e kúnda nagbo bhusu o ne makilisito-o, u de gbo bhusu o. A moko, kpála inde ne makilisito, i du bhoko, i du di-e elo-o sa líli bini ngú nadu bha bhú kúva bhomu ade. La-a, yi mbila me Ebhe a'i ní me ní du bhú kúva bhú guo 'ngú . <sup>16</sup> Mu ti da nambila lele pi, ngamu elo inde ne makilisito me ni ti da nakobho 'ko ni de-e? I du di-e ngamu bhoko inde makilisito-o, mu ti da nambila lele pi me ni ti da nakobho wala ni de-e?

*A ayo me kpála ne kpála du kala Ebhe lele maka aní adu nani lie-o*

<sup>17</sup> Engú na ngbéngbé inde bhú 'ngú bhomu-o, a ko me kpála ne kpála du maka li Ngámá Ebhe aha pi aní lie-o. A ayo la di me aní du maka aní adu nani lie nedhinga li Ebhe a'i aní lie-o. A bhomu-o líli inde ma aha e bhú ndu oDadjua gba Ebhe-e hana-o. <sup>18</sup> I du me Ebhe nde a'i kpála me aní nde ali gandja ali-e, a ayo de me aní wo gandja inde aní ali e bhomu-o de. I du la me Ebhe nde a'i kpála me aní nde li nga ngandja de-e, a ayo de me aní li gandja-a de. <sup>19</sup> Padhá de, anga li kpála li gandja-a, aní li di gandja de-e ne 'ngbé 'ngú ade. Engú na ngbéngbé-e, a ko namene líli gba Ebhe.

<sup>20</sup> A ayo me kpála ne kpála du lele maka aní adu nani lie li nedhinga li Ebhe a'i aní lie-o. <sup>21</sup> Mu du nani ne bali nedhinga li Ebhe a'i mu lie? Mo odjé tsulu de. Engú bini, i du me a nde pi mu nedhinga me mu koto bhú bali-e, mu de koto. <sup>22</sup> Kpála bhende adu nani bali li nedhinga li Ngámá a'i aní lie akoto mbia inde bhú bali-e akoto, anga aní akpøtsø lie ne Ngámá. La-a, kpála bhende ne bali bhú 'ngú na doto ade-e, inde li Ebhe a'i e-e, aní akolo mbia inde-e bali gba Kilisito. <sup>23</sup> Ebhe akala yi ne mase naali. Kaka-a, a ayo de me yi kolo obalise gba okpála na doto de. <sup>24</sup> Ondaise ma, a ayo me kpála ne kpála du kala Ebhe lele maka aní adu nani lie li nedhinga li Ebhe a'i aní lie-o.

### *Engú pindji olingbangi*

<sup>25</sup> Pi okpála bhende i ha nga olisi de-e, ma ngaha pi yi-e mabhundja gba ma maka kpála inde u ti da naziba e ka bádha bhú 'bu gba Ebhe-o. Ebhe kata ma ngae de. <sup>26</sup> Ka likabhu inde na nedhinga inde-e, ma abhundja me a ndjindji pi kpála me ani dɔ bha maka ani nde lie-o. <sup>27</sup> Mɔ ngakunda naha ɔlɔ? Mo oyála ani de. Mɔ kunda naha ɔlɔ di? Dɔ lingbangi. Mo ohá ɔlɔ de. <sup>28</sup> Engú bini, i dɔ me mɔ nde aha ɔlɔ-o, mɔ mene bhomɔ-o siti 'ngú de. I dɔ la di me tsa ɔlɔ nde aha bhoko-o, ani mene siti 'ngú de. La-a, yi mbila ndjindji me okpála bhende ngaha olisi ngazɔ likabhu pála doto naali. Ma akunda la de me yi zɔ likabhu bhomɔ-o de.

<sup>29</sup> Ondaise ma, ma akunda napa pi yi me, nedhinga inde atigala pi ní-e bedi. Nayie pi mbia inde ngú nanɔ ne kalanɔ-o, a ayo me okpála bhende ka o ne olisi dɔ mɔgito me olisi ka uo ade. <sup>30</sup> Okpála bhende ngaku 'gbá-a mene mɔgito me uo bhú likabhu ade. Obhende ngamɔ 'zo-o mene mɔgito me uo bhú djali ade. Obhende ngakala 'he mene mɔgito me ehe ka uo ade. <sup>31</sup> Obhende ngasia tia na doto inde-e mene mɔgito me tia ka o ade. Padhá de, anga doto maka i ngau lie lie mbia inde-e, bhúe matá nedhinga bhelé de.

<sup>32</sup> Ma akunda me yi adú ne likabhu de. Bhoko bhende i ha ɔlɔ de-e gbite lie li engú gba Ebhe, ani ngagili nanga li Ebhe. <sup>33</sup> Engú bini, bhoko bhende aha ɔlɔ-o, agbite lie li ongú na doto, ani ngagili namene engú inde anga li wala e. <sup>34</sup> Ani agbo la di bhusɔ e li di kulu bhisi. A bhadi moko pi ɔlɔ inde aha bhoko, ani ngagbite lie li 'ngú na doto. Ani ngagili namene engú inde ngangala li 'ko e. Engú bini, pi ɔlɔ, i dɔ di-e tsa ɔlɔ bhende i ha nga bhoko de-e, ani ngagbite lie li engú gba Ngámá. Padhá de, anga ani akunda naha lie pi ani bhú ndɔ 'ngú hana

inde ani ngamene e, ne bhende ani ngabhundja e-o.

<sup>35</sup> Ma ngapa 'ngú bhomɔ-o ngubula bádha 'ngú gba yi, ma pa ngubula na'o tili kili li 'ngbɔ yi de. Engú bini, a ko ngubula me yi mene engú inde ndjindji, amba yi kpata la di Ngámá Yesu ne bua yi hana.

<sup>36</sup> La mbia inde-e, i dɔ me makombi bini nde akpe namene siti 'ngú li pabili gba tsa ɔlɔ inde ani abedhe ne gumɔ naha e, ani bhundja me a ayo me engú angoo kpata kpadji na ndjindji-e, ani de mene maka ani au lie. Ani mene siti 'ngú de. U de ha lio maka li bhoko-o akunda lie-o. <sup>37</sup> Engú bini, i dɔ me makombi-e nde apa me ni ha tsa ɔlɔ bhomɔ-o de-e, i dɔ me engú angoo nde ayie li bua ani makpe me u nde kata ani tété gandji de-e, ani amene bhadi bádha 'ngú. <sup>38</sup> Bhoko bhende aha tsa ɔlɔ inde nako ani adɔ nakunda naha e amene bádha 'ngú. Engú bini, bhoko bhende apa naae me ni ha ani de-e, amene bádha 'ngú naali.

### *Engú pindji oøkəsi*

<sup>39</sup> ɔlɔ inde li 'ko e nde bhú ka-a ti da nadɔ ne bhoko koko de. Engú bini, i dɔ me bhoko angoo nde akpi-e, bhobhomɔ-o aha kpadji pi ani ngú naha bhoko koko maka ani akunda lie. La-a, a ayo me bhoko angoo dɔ ne makilisito. <sup>40</sup> Engú bini, ngama-a, ma abhundja me i dɔ me ani nde adɔ kpi e kpi-e, ani dɔ bhú djali nane me ani ha matá bhoko koko. Ma pa mo-o, ma abhundja me Bhobua gba Ebhe-e di bhú ma.

## 8

### *Kpadji na imbilangɔ di ne kpadji na mɔkunda*

<sup>1</sup> Mbia inde-e, ní tsia nga 'ngú pindji so 'nɔ inde u aha e pi oebhe na eu. A na paká me imbilangɔ bhú ndɔ ní hana, maka yi ngapapa lie-o. 'E-e! Imbilangɔ angoo ti da naha pi kpála 'ngbé 'ndji. Engú bini, mɔkunda naae ngadyudyo ní

bhú nabhuka ne kalanu. <sup>2</sup> Kpála bhende ngabhundja me ni ambila 'ngú-o mbila nga maka a ayo lie me ani mbila-a de. <sup>3</sup> Engú bini, kpála kunda Ebhe na paká paká-a, Ebhe ambila kpála ango-o.

*Yi ató ondaise yi bhú ngita de*

<sup>4</sup> Pindji 'ngú inde atsia so 'nu inde u aha e pi oebhe na eu-o, ní ti da nazuzu, ne me ní ti da nazuzu de? Ní mbila ndjindji me oebhe na eu ne oehe na kukulu ade. Ní ambila di me, Ebhe bha koli e bini kpi e kpi. <sup>5</sup> A na paká me a abhú lá di ne píla doto ne oehe inde li okpála ngadhögö o maka oebhe gba o. Ongua oebhe na eu bhomu-o bhelé, u di ngako pí okpála. <sup>6</sup> La pi ní-e, ní mbila ndjindji me koli Ebhe bha bini. A ko 'Dyi ní inde abho ndu 'he hana píla doto. Ani atsia abho di ní me ní du pi ni. Ní la bhadi ne koli Ngámá bini, a ko Yesu Kilisito . Ndu 'he hana ngayie ka ani, ní di ngasia mukobho ka ani.

<sup>7</sup> Engú bini, i du me ní nde ambila me mukobho bhú oebhe na eu ade-e, a ne okpála inde imbila nga kukulu 'ngú ango-o má kpulukutu de. Okpála koko bhú ká yi adu nadhögö oebhe na eu. La mbia inde-e, uo bha ngazu so 'nu ango-o ne nabhundja me oebhe na eu bhomu-o ne angu pépé. Okpála ango-o nga bha bhubhuku li kpadji gba Ebhe. Abhomu-o, u ngabhundja me so 'nu ango-o ngato o bhú siti 'ngú kala ani. <sup>8</sup> Ní mbila ndjindji me ezú bini ti da nadyudyo ní de Ebhe masikpe de. Belegu ní zu, belegu ní zu de-e, a méne 'ngú bini li ní de.

<sup>9</sup> 'E-e! Yi lila liyi me, kpadji inde u aha e pi yi ngú nazú ndu 'he hana-a, a tó okpála bhende bhubhuku bhú nabhuka bhú siti 'ngú de. <sup>10</sup> Padhá de, anga i du me kpála inde bhubhuku bhú nabhuka nde au mu, ngamu kpála inde ambila kukulu 'ngú ambila-a, mu nde ngazu so 'nu inde u abhelö e pi oebhe na eu bhú eti u adhedhögö

uo bhú e, mo ombhundja naamu me ani ti da di nazuzu di? <sup>11</sup> Kaka-a, kpála inde bhubhuku ango-o, ndai mu inde li Kilisito akpi pi e tsia ngita ka mu, kabula engú nasisiti inde mo omene e, ngamu kpála ambila kukulu 'ngú má kpulukutu-o ambila-o! <sup>12</sup> Namene ngua siti 'ngú bhomu-o li pabili gba ondaise yi-e, di ne na'o eka li bua uo inde nakpokpo kú 'ngú inde bhubhuku bhomu-o, a ko namene siti 'ngú li Kilisito ngae makpe. <sup>13</sup> Kaka-a, i du me ezú bini nde ngato ndai ma bhú siti 'ngú-o, ma zú matá ezú ango-o de, amba ndai ma atí bhú siti 'ngú ka ma de.

## 9

*Lele li Polo adu nakpokpo Bádha Ngali gba Yesu Kilisito lie-o*

<sup>1</sup> Ngama-a, ma ti da nasia ndu 'he hana maka suka obhulu titima gba Ngámá gba ní Yesu Kilisito di? Ngama-a, ma u ani ne djila ma makpe di? Ngayi-e, yi bhuka ani ka kulu gba ani inde ma amene e bhú ka yi-e di? <sup>2</sup> Belegu li okpála koko ziba de me ma ne suka obhulu titima gba Yesu-o di-e, la pi yi-e, ma ne bhulu titima gba ani. Padhá de, anga nau me yi akpötsö liyi ne Ngámá-a asuno na paká me, ma ne bhulu titima gba ani, anga ma akpokpo Bádha Ngali-e pi yi ngama.

<sup>3</sup> Eli inde ma agie e pi okpála inde ngapa 'ngú li ma sisiti-e ngae inde: <sup>4</sup> A ayo di de me ya sia ezú di ne ehe nandji mandji kabula kulu inde ya ngamene e di? <sup>5</sup> Yi abhundja naayi me li ya ha ölö inde makilisito me ya du nadhuku bhú dabili bini ne ani maka Piele ne obhulu titima koko gba Yesu, di ne ondaise Yesu-o, amba ko siti 'ngú? <sup>6</sup> Yi abhundja naayi me, okpála inde a ayo me u mene kulu ne 'kpa o ngú nakobho ka o-o bha ne ya ne Balabasi? <sup>7</sup> Kpála inde bhú kulu na sudha-a haha makalá gba e pi e ngae makpe uu? Belegu de bini. Li kpála lu edyi-e, ani zuzu ezú ango-o di, i du me kpála nde ngalila enu-o,

ani ndjindji miliki na 'ka 'nu ango-o di?

<sup>8</sup> Ongú inde ma apa e bhomu-o, a ko bha bini bhende li okpála ngabhundja e ngao-o de. U aye bhadi bhú líli gba Moidje-e moko. <sup>9</sup> Padhá de, anga u aye bhú líli ango-o me: «I du me bagala nde ngatu ngano-o, mo ogbíte 'bhè ani de. 'O me ani zu mbo té ngano ango-o uu.†» Yi abhundja naayi me Ebhe apa 'ngú bhomu-o bha bini pi obagala? A mo-o ade. <sup>10</sup> Ebhe apa 'ngú bhomu-o pi ní makpe adi? A na paká me ani apa pi ní. Padhá de, anga kpála inde ngalu 'dyi-e nga'o 'to e li ezú inde ani asía e-o. A bhadi ndjindji me kpála bhende nga'e nguwa abhiye-e sia té nguwa ango-o.

<sup>11</sup> Ya akpokpo Bádha Ngali pi yi maka u alulu nguwa lie abhiye-o. I du la me yi nde ateteke ya ne tia na doto-o, amba a ko siti 'ngú? <sup>12</sup> I du me okpála koko nde ngasia tia na doto ka yi-e, ka ni ngaya-a, ya ti da nasisia ka yi lie de-e? Engú bini, ya tsia yo ehe ka yi de. Ya ngakibila ndu likabhu hana inde ngakolo li kute ya-a, anga ya kunda namene engú inde i ní kpadji pi okpála me u adjé Bádha Ngali gba Yesu Kilisito-o de-e de.

<sup>13</sup> Yi mbila de me okpála inde ngamene kulu bhú 'ngbé 'ti Ebhe-e ngasia ezú gba o bhú kulu inde u ngamene e adi? Obhende ngat-sulu enu pi Ebhe-e ngasia tété ngú nazuzu adi? <sup>14</sup> A bhadi moko pi okpála bhende ngakpokpo Bádha Ngali-o. Ngámá gba ní-e apa me, okpála inde ngakpokpo Bádha Ngali-e, akóbho bhadi li Bádha Ngali.†

<sup>15</sup> Engú bini, belegu inde lie mo-o, ngama-a, ma yo ehe bini ka yi de. Ma pa pi yi de me, ma aye balua inde-e pi yi me yi tima 'he muma-a de. A ndjindji muma naali me ma kpi ne gumu! A ayo de me kpála bhele engú inde ma nde ne

gindaginda ka e de. <sup>16</sup> Nakpokpo Bádha Ngali ma ngakpokpo e-e ha kpadji muma de me 'ndji ma be-e de. Padhá de, anga Ebhe ngae makpe apa muma me ma kpokpo Bádha Ngali ango-o. A moko, a ko likabhu muma i du me ma nde kpokpo Bádha Ngali-e de ko. <sup>17</sup> I du nani me ma alo kulu ango-o ngama-a, a de adú ndjindji me u ha makalá muma tété. A la mo-o ade. Ma lo kulu ango-o ngama makpe de. Ma ngamemene anga Ebhe a'o kulu ango-o sakpa ma. <sup>18</sup> Makalá ma ngasia e li kulu ango-o ne ni? Makalá gba ma ne nakpokpo Bádha Ngali-e mandi nayo 'he. Maka kpála nakpokpo Bádha Ngali-e, ma ti da nayo 'he ka yi, la-a ma yó ehe bini de.

*Polo ateteke kpála ne kpála bhú dasundu gba e ngú nabhuka Ngámá Yesu*

<sup>19</sup> Ma bhú ngu ma, ma ne bali gba kpála bini ade. La-a, ma atsia a'o lima bali gba ndu okpála hana, ngubula me ma sia okpála bhelé ngú nabhuka Ngámá Yesu. <sup>20</sup> Li ma du bhú ká omaYuda-a, ma dú maka uo ngubula me ma teteke uo ngú nabhuka Ngámá Yesu. Ma ambila ndjindji me líli gba Moidje ne angu pí ma ade. Engú bini, i du me ma nde bhú ká okpála inde ngamene líli ango-o, ma améne mugito me ma sa líli ango-o ngubula me ma teteke uo ngú nabhuka Ngámá Yesu.

<sup>21</sup> Li ma du bhú ká okpála bhende i mbila líli gba Moidje de-e, ma adú bhadi maka uo ngubula me ma teteke uo ngú nabhuka di Ngámá Yesu. Bhobhomu-o kunda napa de me ma mene líli gba Ebhe de-e de. Ma ngamemene anga ma ngamene líli gba Ngámá Yesu Kilisito. <sup>22</sup> Li ma du bhú ka okpála inde bhubhuku li kpadji gba Ebhe-e, li ma 'ó di lima bhubhuku ngú nateteke uo ngubula me u kolo kpekpeke bhú nabhuka

† 9:9 9:9 Tsia bhú Det. 25:4; di ne bhú 1 Tim. 5:18. † 9:14 9:14 Tsia bhú Luk. 10:7; di ne bhú Mat. 10:10.

Ngámá Yesu. Belegu li okpála du lele pi-ie, i du me ma nde akolo bhú ká uo-o, ma dú bhadi maka uo ngubula me ma teteke okpála koko bhú ká uo ngú nabhuka Ngámá Yesu, amba u kobho. <sup>23</sup> Ma ngamene ndu 'ngú bhomu-o hana ngubula me Bádha Ngali-e nu ne kalanu, amba Ebhe tuko bisagu pí ma bhú kulu ango-o.

*A ayo natsia 'kpí lio ndjindji bhú nabhuka*

<sup>24</sup> Yi mbila de me, okpála inde agugu holo-o, u dudu okpála bhelé, engú bini kpála bhende akokoto kalanu-o sisia makalá ngae. Yi mene ne kpéke maka okpála inde ngagu holo, amba yi sia di makalá. <sup>25</sup> Ndu okpála hana inde agugu holo-o dudu sa líli nakpekpeke. U ngamene mo-o ngubula nasia makalá. La-a, makalá ango-o bhúe de. Engú bini nganí-e, ní ngamene ngubula nasia makalá inde adú duduama ne duduama. <sup>26</sup> Kaka-a ngama-a, ma ngagu holo ngangá ade. Ma la di maka kpála inde ngagu gbele me ani nde ngatsia 'kpí lie ndjindji. <sup>27</sup> Ma ngamene kute ma kpekpeke ngú napa me kute ma mene líli gba ma-o, amba li sokpí-e, Ebhe abhíke ma de, pita nakpokpo Bádha Ngali pí okpála koko-o.

## 10

*Yi lila liyi ka nale-e malila*

<sup>1</sup> Ondaise ma, ma ngagbele 'dje yi mo-o, ngubula me yi bhundja nga matá engú inde akolo nani li onguo ogbi ní bhú nedhinga u adu adhuku lie nganda Moidje-o. † Ebhe abuku nani ndu uo hana ne ndindi ngú nalila uo. Ndu uo hana agulu nani 'ngbé 'ngu na Mbembe. <sup>2</sup> Nabuku uo ne ndindi ne nakodho 'kpí ka uo bhú 'ngu-o amana mugito me Ebhe aha pí uo bhomu-o Batisimo,

ngubula me u kpötse lio bini ne Moidje. <sup>3</sup> Ndu uo hana azu ezu inde adu ayie ka Ebhe.† <sup>4</sup> Ndu uo hana andji engu inde adu akoto bhú teme. Teme ango-o, a ko kulu Yesu Kilisito inde adu adhuku ne uo bhú dabili bini-o. <sup>5</sup> La-a, belegu u au ongamba 'ngú bhomu-o lie hana-a, okpála bhelé bhú ká uo du amene engú inde anga li Ebhe-e de. Kaka-a, u amu, u atsia atigala bhú 'gu.†

<sup>6</sup> Ongú bhomu-o ngasuno pí ní me, ní adu ne gumu namene siti 'ngú maka onguo ogbi ní de.† <sup>7</sup> Yi ayó oebhe na eu maka okoko bhú ká uo amene nani lie de. Padhá de, anga u aye bhú Bhuku gba Ebhe-e me: «Okpála adulu kuto ngubula nazu anokomia. Pipita-a, u atsia ayie bhúlá ngú nadho 'bi kala kulu ebhe na eu.†» <sup>8</sup> Okpála koko bhú ká uo adu adhuku ne olisi ngangá. Kaka-a, okpála ketu ndjikpa bhisi ne ká bata atsia amu bhú koli 'kpí bini. Pí ní-e, ní améne maka uo de.† <sup>9</sup> Okpála koko bhú ká uo ale Ngámá. Kaka-a, okpulu adolo uo má bi bi bi, uo atsia amu. Pí ní-e, ní améne maka uo de.† <sup>10</sup> Okpála koko bhú ká uo adu adi mutokono li Ebhe. Kaka-a, andjelu gba Ebhe inde abhobhelo kpála-a, a atsia ago abhili uo. Pí yi-e, yi adí mutokono li Ebhe maka uo de.†

<sup>11</sup> Ndu ongú bhomu-o hana akolo li uo ngubula nateteke okpála koko me u améne maka uo de. U aye ongú ango-o bhú Bhuku gba Ebhe ngubula me asuno kpadji pí ní, nganí inde ngakobho li sokpí-o. <sup>12</sup> Kaka-a, kpála bhende ngabhundja me ni alu bhú nabhuka kpekpeke-e lila lie ndjindji me ni atí-i de. <sup>13</sup> Nale inde ngabhaka yi-e, a ko nale inde ngakolo bha li ndu okpála hana. Ebhe atéteke yi maka ani apa lie-o. Ani ti da naka kpadji de me engú inde akólo li yi-e ha angu yi-

† **10:1** 10:1 Tsia bhú Eki. 13:21-22, 14:19-29. † **10:3** 10:3 Tsia bhú Eki. 16:35. † **10:5** 10:5 Tsia bhú Nom. 14:16, 29-30. † **10:6** 10:6 Tsia bhú Nom. 11:4, 34. † **10:7** 10:7 Tsia bhú Eki. 32:6. † **10:8** 10:8 Tsia bhú Nom. 25:1-18. † **10:9** 10:9 Tsia bhú Nom. 21:5-6. † **10:10** 10:10 Tsia bhú Nom. 17:6-14.

e de. Engú bini, i du me nale nde akolo li yi-e, Ebhe há angu pi yi ngú nakikibila. Aní tsia téteke yi me yi atí-i de.

*Yi lila liyi ka oebhe na eu-o malila*

<sup>14</sup> Kaka-a, ondaise ma na mukunda, yi 'o nadhögø oebhe na eu ma'o. <sup>15</sup> Ma ngagama 'ngú pi yi maka okpála na imbilangu. Yi aló doto bhú 'ngú ma ngapa e ngayi makpe. <sup>16</sup> Nedhinga ní adulu lie pí misa gba Ngámá-a bhú dabili bini-e, ní ngandji vino inde ní ngagie heni pi Ebhe ngú e-o. Ní akpètse liní bhomu-o ne Yesu Kilisito bhú ngate e. Li ní gamu mapa-a ngú nazuzu-o, ní akpètse bhomu-o liní bhú kute Yesu Kilisito. <sup>17</sup> Koli mapa-a bha bini. Belegu ní nde lie bhelé-e, ndu ní hana ní ngazu koli mapa bini bhomu. Bhobhomu-o ngasuno me ní akpètse liní, ní akolo bini.

<sup>18</sup> Yi bhundja nga okpála na Isalaele. Nedhinga u ngazu enu inde u aha e pi Ebhe lie, u akpètse lio bhomu bhú dabili bini ne Ebhe inde u aha enu bhomu-o pi e-o. A mo-o adi? <sup>19</sup> Ma akunda napa bhomu-o pi? Ma akunda napa me, ebhe na eu di ne enu inde u ha e pi ani-e, a ne tata? <sup>20</sup> A mo-o ade. Ma apa mangbo me, li okpála bhende imbila Ebhe de-e du naha 'he bhú 'ti oebhe gba o-o, u haha pi odjabulu. U haha pi Ebhe de. La-a, ma kunda de me yi kpètse liyi ne odjabulu-o de. <sup>21</sup> Yi ti da nandji vino bhú kópo gba Ngámá Yesu, yi tsia ndjí di bhú bhende gba odjabulu-o de. Yi ti da nazu 'he pí misa gba Ngámá, yi tsia zu di pí misa gba odjabulu-o de. <sup>22</sup> Yi abhundja me ní kpekpeke ane Ngámá-a? Ní akunda me bua ani ke ne ní?

*Yi mene ndu 'ngú hana ngubula nadhögø Ebhe*

<sup>23</sup> Okpála koko bhú ká yi ngapa me: «Ya ne omakilisito, ya ti da namene ndu 'ngú hana.» A na paká,

engú bini, ongu koko ti da nateteke ní de. Yi ngapa me: «Ní ti da namene ndu 'ngú hana.» La-a, ongu koko ti da namene de me okpála koko bhele li kpadji gba Ebhe-e de. <sup>24</sup> A ayo de me kpála 'o bha 'to e 'to e makpe de, engú bini, a ayo me ani 'o di 'to e 'to okpála koko.

<sup>25</sup> Yi ti da nazu ndu enu hana inde u ngatsindji e bhú daposu me yi nde yi 'ngú tété de kabula bua nakpokpo ku 'ngú gba yi-o. <sup>26</sup> Padhá de, anga Bhuku gba Ebhe-e apa me: «Doto ne ndu 'he inde bhúbhú-o hana ne tia ka Ngámá.†»

<sup>27</sup> I du me mupagano nde a'i mu agba e ngú nazu 'he-e, i du me mu nde akunda nanu-o, li mu kolo-o, mu de zu ndu 'he hana u ahá e pi mu-o, mo oyí 'ngú bini de kabula bua nakpokpo ku 'ngú gba mu-o. <sup>28</sup> La-a, i du me kpála nde apa pi mu me enu inde mu ngazu e bhomu-o, a ko enu inde u aha e pi oebhe na eu-o, mo ozú-u de, amba bua nakpokpo kú 'ngú gba kpála inde apa 'ngú ango-o pi mu-o asiti de. <sup>29</sup> Ma ngapa 'ngú bhomu-o pindji 'ngú inde li kpála bhomu-o ti da nabhundja e li bua nakpokpo kú 'ngú gba e-o. Ma pa ngubula bua nakpokpo kú 'ngú gba mu-o de. Ka ni ma améne 'ngú lie li lele mabhundja gba kpála koko, ma nde mene mangbo maka ma ngabhundja lie ngama makpe-e di-e? <sup>30</sup> I du me ma nde agie heni pi Ebhe ngubula ezú-o, ka ni li kpála koko nga uu lie sisiti-e?

<sup>31</sup> Abhomu-o, i du me yi nde ngazu 'he, i du di-e me yi nde ngandji 'he nandji mandji, i du di-e me yi nde ngamene mangua 'ngú koko dho i-e, yi de mene ndu 'ngú bhomu-o hana ngú nadhögø 'li Ebhe. <sup>32</sup> Yi améne engú inde li okpála koko ti da nati ka e de, abana omaYuda, abana obhende ne omaYuda ade, abana okpála na Piga gba Ebhe. <sup>33</sup> Ngama-a, ma bhadi ngamene mo-o. Ndu 'ngú ma ngamene e hana, ma

† 10:26 10:26 Tsia bhú Ets. 24:1.

ngamemene me a nga li ndu okpála hana. Ma bha ngabhundja engú inde atéteke ma-a ade. Ma ngabhundja mangbo pindji engú inde i ti da nateteke okpála bhelé, amba Ebhe kobho uo.

## 11

<sup>1</sup> Yi kpata engú inde ma ngamene e maka ma ngakpata bhende gba Kilisito lie-o.

*Lele nadu ka obhosi di ne olisi bhú nedhinga nayo Ebhe*

<sup>2</sup> Ma ngaha apepe pi yi, anga yi ngabhundja ma bhú ndu 'ngú hana. Yi la di ngamene olíli gba omabhuka inde ma asuno e pi yi-o. <sup>3</sup> La-a, ma akunda me yi mbila engú inde: Kilisito ne Ngámá pí 'ndji bhoko. Bhoko ne ngámá pí 'ndji òlò. Ebhe ne Ngámá pí 'ndji Yesu Kilisito. <sup>4</sup> I du me bhú nedhinga nayo Ebhe, li bhoko du nayo Ebhe, ani du di-e nakpokpo eli inde ani asia e ka Ebhe me ani nde adyi ndata-a, amba ani ngaha bhomu-o numu pi Ngámá gba e-o. <sup>5</sup> Engú bini, i du me bhú nedhinga na mayo-o, li òlò 'o 'ndji e padhá li nedhinga ani ngayo Ebhe lie, i du di-e li nedhinga ani ngakpokpo eli inde ani asia e ka Ebhe-e lie-e, òlò ango-o ngaha numu pi ngámá gba e-o. Ani maka òlò inde aka 'ndji e maka. <sup>6</sup> I du me òlò nde ga kitambala bhú 'ndji e de-e, amana mugito bhomu-o me ani aka 'ndji e maka. I nde la lie me a nde numu pi òlò ngú naka 'ndji e ndundundu, i du di-e ma ngbidhidhi-e, a ayo me ani ga kitambala bhú 'ndji e.

<sup>7</sup> La pi bhoko nedhinga ani ngayo Ebhe lie-e, a ayo de me ani dyi ndata-a de, anga Ebhe abho ani li kulu e. Ani ngasuno sangu gba Ebhe. La pi òlò-o, ani ngasuno sangu gba bhoko. <sup>8</sup> Yi mbila ndjindji me, Ebhe bho gina bhoko li òlò de, engú bini ani abho mangbo gina òlò li bhoko. <sup>9</sup> La di-e, Ebhe bho

bhoko pi òlò de, ani abho mangbo òlò pi bhoko. <sup>10</sup> Kaka-a, i nde lie me Ebhe abho òlò mo-o, a ayo me ani ga kitambala bhú 'ndji e ngú nasuno me ani ti da nayo Ebhe, amba oandjelu mbila me ndu 'ngú hana li lelele.

<sup>11</sup> Ní mbila ndjindji me kala Ngámá-a, olisi ne gumu obhosi, obhosi la di ne gumu olisi. <sup>12</sup> Padhá de, anga maka u abho nani òlò lie li bhoko-o, a bhadi moko a ngazu bhoko ne òlò, la di-e, ndu 'he hana ngayie ka Ebhe.

<sup>13</sup> Yi pa nga ngayi, a pi òlò ndjindji nayo Ebhe me ani nde buku 'ndji e di? <sup>14</sup> Ndu okpála na píla doto hana mbila ndjindji me a ko numu pi bhoko ngú na'o sundjo e ndjandjandja. <sup>15</sup> La pi òlò-o, ndjandja sundjo-o, a ko bádha 'ngú naali. Padhá de, anga Ebhe aha nani sundjo pi òlò ngú nabuku 'ndji e ne di. <sup>16</sup> I du me kpála nde akunda nabi bhayiki li 'ngú bhomu-o, a ayo me ani mbila me lele dasundu gba ní-e ngae bhomu. Piga gba Ebhe-e alu la bhadi pí 'ngú bini bhomu.

*Polo agbele 'dje omabhuka li lele nazu komonyo*

*(Tsia bhú Mat. 26:26-29; ne bhú Mlk. 14:22-25; di ne bhú Luk. 22:15-20.)*

<sup>17</sup> Ní kodho 'kpí li 'ngú koko. Ma ti da nadhoge yi tété de. Padhá de, anga nedhinga yi ngakpotsò liyi lie ngú nayo Ebhe-e, engú yi ngamene e ngagie mangbo yi ne sidi. A dyudyo yi ne kalanu de. <sup>18</sup> Na bini-e, u apa muma me nedhinga yi ngakò liyi lie bhú dabili bini-e, yi ngagbogbo bhusu yi. Ma abhundja me a ti la bhadi nadu moko. <sup>19</sup> A ayo la bhadi me nagbo bhusu o du bhú ká yi, amba okpála mbila obhende ngakpata Yesu Kilisito ne bua o bini-o. A mo-o adi! <sup>20</sup> Nedhinga yi ngakpotsò liyi lie ngú nazu ezu gba Ngámá-a, yi ngabhundja ani bhúbhú ade. <sup>21</sup> Okpála koko bha bini ngagbene lio ngú nazu 'he gba o makpe. Ka 'ngú

ango-o, okoko ngalangba, okoko la ngadulu gumu. <sup>22</sup> Gbágbá li yi ade ngú nazu 'he di ne ngú nandji pandi tété-e? Ne me yi ngau Dadjua gba Ebhe-e padhá. Yi atsia akunda naha numu pi okpála inde li ehe nde ka o ade. Yi nga'o 'to yi me ma pá pi yi pi? Ma adhégo yi lele pi me yi ngamene bádha 'ngú-o? A mo-o ade. Ma adhégo yi tété de.

### *Lele nazu komonyo*

<sup>23</sup> Ongú inde ma asuno e pi yi ngama makpe-e, ma asia ka Ngámá Yesu. Engú ango-o me: sukpe inde u adji apú ani lie pi obhulu yala-a, Ngámá Yesu aha mapa, <sup>24</sup> ani agie heni pi Ebhe, ani agugumu, ani atsia apa me: «A inde-e kute ma inde ma aha e pi yi-o. Yi du amene me-e, ngú nakina ma.» <sup>25</sup> Pita u andjia nazu 'he-e lie, ani aha bhadi kópo na vino moko. Ani atsia apa me: «Vino inde-e, ngasuno gandja na mbia inde li Ebhe akodho e ne yi-o. Gandja ango-o alu pi ngute ma. Ndu nedhinga hana inde yi adú andjindji lie, yi du andjindji ngú nakina ma.» <sup>26</sup> Li bili bhomu-o, Ngámá Yesu akunda napa me: ndu nedhinga hana inde yi azú mapa lie di ne nedhinga inde yi andji vino lie mo-o, yi bhomu-o ngakpokpo pi okpála mbámbá nakpi ka ani akolo li 'kpí inde ani agie lie lie-o.

<sup>27</sup> Kaka-a, kpála inde azú mapa gba Ngámá Yesu, inde andji la di vino gba ani-e li lelele de-e, asia mangimbo anga ani andjo kute Ngámá Yesu, ani atsia andjo di ngute ani. <sup>28</sup> A ayo me kpála ne kpála tsia lie makpe ngae bhuhulu, amba pipita-a, ani tsia zu mapa, amba ani ndji di vino gba ani-o. <sup>29</sup> Padhá de, anga li kpála zu mapa gba Ngámá Yesu, ani tsia ndji di vino gba ani-e me ani nde ngauu maka i de ehe na padhá-a, ani bhomu-o ngagbele mangimbo pí e ngae makpe. <sup>30</sup> A bhomu-o, engú inde yi ngau ka e me okpála bhelé bhú ká yi ne

kuo, okoko bhuhuku, la di-e, okoko bhelé amu. <sup>31</sup> I dú me ní dú atsia bua ní nganí makpe kala nazuzu-o, Ngámá de kódho 'ngú gba ní-e de. <sup>32</sup> Engú bini, Ngámá ngakodho 'ngú gba ní-o, ani di ngalili ní ngubula me ani a'ó galikpe engú pí 'ndji ní bhú dabili bini ne pí 'ndji okpála koko de.

<sup>33</sup> Ka 'ngú ango-o, ondaise ma, nedhinga yi ngakpotsé liyi lie ngú nazu ezú gba Ngámá-a, yi dje liyi sunda yi. <sup>34</sup> I dú me saka yi nde ne gumu-o, a ayo me ani zu ngaiza 'he agba e, ngubula me yi agbéle mangimbo gba Ebhe-e pí yi de bhú nakpotsé lie gba yi-o. Pindji ongú koko inde yi ayi e-e, ma agie 'ngú pi yi pépé nedhinga ma akólo lie agba yi-o.

## 12

### *Angu inde li Bu Bhobua ngaha e pi kpála ne kpála ngú nateteke Piga gba Ebhe-o*

<sup>1</sup> Ondaise ma, pindji engú bhende atsia angu li Bu Bhobua ngaha e pi kpála ne kpála ngú nateteke Piga gba Ebhe-e, ma akunda me yi mbila 'ngú tété. <sup>2</sup> Yi mbila ndjindji me nedhinga yi adu nga lie ne omupagano-o, osisiti bua adu agbele yi li pápá gba oebhe na eu inde i gama 'ngú de-o. U atsia amba bhúla yi li okpadji ngangá. <sup>3</sup> Kaka-a, ma apa pi yi mbámbá lele nambila me kpála ngagama 'ngú bhú angu gba Bu Bhobua. Kpála du nagama 'ngú bhú angu gba Bu Bhobua-a, ani ti da napa de me a ayo me u tu pedje li Yesu-o de. Engú bini, li kpála pa me: «Yesu ne Ngámá-a», a akunda napa me Bu Bhobua akata ani ngae.

<sup>4</sup> Angu li Bu Bhobua ngaha e pi kpála ne kpála ngú nateteke Piga gba Ebhe-e kpi kpi kpi, la-a, ngaani Bu Bhobua inde ngaha angu ango-o, koli ani bha bini má kpikili! <sup>5</sup> Ní ti da namene kulu pi Ngámá Yesu li okpadji ngangá, la-a, ngaani Ngámá Yesu inde ní ngamene kulu



ango-o pi e-e, koli ani bha bini má kpikili! <sup>6</sup> Ebhe ngaha angu pi okpála kpikpikpi ngú namene kulu gba ani-e ne di. La-a, Ebhe bhulú naha angu bhomu-o pi okpála-a, koli ani bha bini má kpikili!

<sup>7</sup> Angu gba Bu Bhobua-a ngasuno lie bhú kpála ne kpála ngubula me ani teteke okpála koko ne angu ango-o. <sup>8</sup> Bu Bhobua ngaha pi okpála koko-o angu nagama 'ngú ne imbilangú. Pi okpála koko-o, Bu Bhobua bini bhomu-o ngaha angu nasuno 'ngú gba Ebhe-e pi okpála. <sup>9</sup> Bu Bhobua bini bhomu-o ngaha pi okpála koko angu nadu ne nabhuka na kpekpeke. Koli Bu Bhobua bini bhomu-o ngaha pi okpála koko angu nadu nakobho okuo li okpála. <sup>10</sup> Bu Bhobua ngaha pi okpála koko angu namene ongamba 'ngú . Pi okoko-o, ani ngaha angu nakpokpo engú maka opolofeta . Pi okoko-o, ani ngaha angu nambila nagbogbo bhusu osisiti bua ne Bu Bhobua. Pi okoko-o, ani ngaha angu nagama 'ngú bhú eli gba oandjelu. Pi okoko-o, ani ngaha angu nambamba tata. <sup>11</sup> Ndu 'ngú bhomu-o hana ngayie ka koli Bu Bhobua bini. Ani ngaha pi kpála bini ne bini angu maka ani akunda lie.

*Piga gba Ebhe-e maka kute kpála inde ne oyáyá lie bhelé*

<sup>12</sup> Kute Yesu Kilisito maka kute kpála-kuti inde li oyáyá nde lie bhelé. Mu tsia 'lá kpála-kuti-e, yáyá li ani bhelé, kute ani la bha koli e bini má kpikili! Abana li yá kpála nde lie bhelé-e, ndundu hana amene bha koli kute bini. <sup>13</sup> Ndu ní hana, abana omaYuda ne okpála inde ne omaYuda ade, abana okpála inde bhú bali ne obhende bhú ngu o, ndu ní hana ní asia nani batisimo ngú napa me ní kolo maka kute bini li kpadji gba Bu Bhobua bini. Ndu ní hana, ní atsia asia bhadi angu gba Bu Bhobua bhomu-o.

<sup>14</sup> Mu tsia kute kpála-kuti-e, oyáyá tété bhelé, a bha koli e bini ade. <sup>15</sup> Li

'dhu kpála pa me: «Ma ne yá kpála ade anga ma nde ne kpele kpála ade-e», a ko de me ani ayie yá kpála kaka-a de. <sup>16</sup> Li 'dje kpála pa me: «Ma ne yá kpála ade, anga ma ne djila kpála ade-e», a ko de me ani ayie yá kpála kaka-a de. <sup>17</sup> I du me 'lá kpála-kuti libhomu du bha ne djila-a, kpála de adú nadjé 'kpí lele pi? I du di me 'lá kpála-kuti libhomu nde bha ne edje-e, kpála de adú nadjé se 'he lele pi? <sup>18</sup> A na paká me Ebhe a'o nani oyá kpála-kuti maka ani akunda lie. <sup>19</sup> I du me Ebhe 'ó nani li kpála bha koli yáyá bini-e, u de 'í de me a ko kpála-kuti-e de. <sup>20</sup> Engú bini, a mo-o ade. Oyáyá li kute koli kpála bini-e bhelé.

<sup>21</sup> Kaka-a, djila ti da napa pi ekpa de me: «Ma ne gumu mu ade-e de.» La di-e, endji ti da napa pi odhu de me: «Ma ne gumu yi ade-e de.» <sup>22</sup> Engú bini, oyá kpála bhende ní ngau e me abhubhuku-o, pi ní ne tata. <sup>23</sup> Obhe ní ngau e me tata tété naali ade-e, ní ngalilila nane okoko mane. Obhe ní ngadje numu li napa 'ngú o-o, ní ngatsia 'kpí tété ndjindji. <sup>24</sup> Oyá ní bhe li numu nde li ní lie ade-e, ní nga'o 'to ní tété naali ade. Engú bini, Ebhe abho 'lá kpála-kuti da napa me ní du atsia 'kpí li oyá ní bhe nga'o numu li ní-e ndjindji. <sup>25</sup> Ani amene mo-o ngubula me nagbo bhusu o adú bhú kute ní de, engú bini, oyá ní hana du nateteke lio sunda o. <sup>26</sup> I du me yá kpála bini nde ngazu likabhu-o, ndu okoko hana ngazu likabhu bhú dabili bini ne ani. I du me u nde ngadhoge yá kpála-kuti bini-e, ndu okoko hana ngakpi ndjili ne ani bhú dabili bini.

<sup>27</sup> Pi yi-e, yi ndu yi hana ne kute Kilisito, akunda napa me, yi ne oyá ani. Kpála ne kpála ne da e bhú kute Yesu Kilisito. <sup>28</sup> Kaka-a, bhú Piga gba Ebhe-e, Ebhe a'o ngaiza na bini obhulu titima gba Yesu , na bhisie, ani a'o okpála bhende ngakpokpo 'ngú maka opolofeta, na

bata ani a'o omusuno. Pipita-a, ani a'o okpála inde ngamene ongamba 'ngú. Pipita-a, ani a'o okpála bhende ngakobho obhulú kuo. Ebhe atsia aha di angu pi okpála koko ngú natsia 'kpí li obi o di ne nateteke uo. Ani a'o okpála inde ngasuno kpadji pi okpála koko. Ani atsia aha di angu pi okpála ngú nagama 'ngú bhú oeli gba oandjelu.

<sup>29</sup> Ndú okpála hana ne obhulú titima gba Yesu? Ndú okpála hana ne okpála nakpokpo 'ngú maka opolofeta? Ndú okpála hana ne omusuno? Ndú okpála hana ne angu namene ngamba 'ngú? <sup>30</sup> Ndú okpála hana di ne angu ngú nakobho okpála na kuo? Ndú okpála hana di ne angu ngú nagama 'ngú bhú oeli gba oandjelu? Ndú okpála hana di ne angu ngú nambamba ta 'ngú? <sup>31</sup> Kaka-a, a ayo me yi bedhe ne gumu namene ongú inde lie ne tata ngú nateteke okpála koko.

Mbia inde-e, ma adji asuno pi yi kpadji inde ane okoko ne bádha ngubula me yi teteke Piga gba Ebhe-e tete.

## 13

### *Polo akpo 'ngú pindji mukunda bhú Piga gba Ebhe*

<sup>1</sup> Abana i dú me ma nde ne angu nadi ndú eli gba okpála hana, i dú di-e bhe gba oandjelu , i dú me mukunda nde bhú ma ade-e, ma bha bini maka mangbou inde li gili e ngau, i dú di-e mbulú ngbongbó inde li gili e ngau kpekpeke. <sup>2</sup> I dú me ma nde ne angu nakpokpo 'ngú maka polofeta , i dú me ma nde ne imbilangu na ndú ongú hana, i dú me ma nde ne angu naké mboli ndú ongú li Ebhe awo e mawo, i dú me ma nde di ne nabhuka inde i ti da napa me ma 'e ne di eta, i dú la me mukunda nde bhú ma ade-e, ma ne ehe na padhá. <sup>3</sup> I dú me ma nde apu ndú 'he gba ma-a hana pi obhulú ndibhili, i dú me ma nde atse belegu

kute ma me u tsulu bhú djua, i dú la me mukunda nde bhú ma ade-e, bhobhomu-o ne tata pi ma ade.

<sup>4</sup> Kpála inde ne mukunda pi obi e-e, bua ani ndjándjá, ani di ngamene babadha 'ngú pi obi e. Ani ne 'ngbé bua li 'he gba okpála koko ade, a ko pa 'li e de, ani di ne 'ngbé 'ndji ade. <sup>5</sup> Kpála inde ne mukunda pi obi e méne engú na numu de. Ani bhúndja bha bini engú gba e kpi e kpi de. Ani ké di 'ngú lie de. Ani gbíte di bua e pi obi e de. <sup>6</sup> Kpála inde ne mukunda pi obi e kpí djali li siti 'ngú de. Ani ngakpi mangbo djali li bádha 'ngú. <sup>7</sup> Kpála inde ne mukunda pi obi e ngakibila ndú 'ngú hana li okpála amene e li anio. Ani ngabhuka ndú 'ngú hana, ani nga'o 'to e ndú nedhinga hana 'to Ebhe, ani di ngagbite bua e ka ndú 'ngú hana magbite.

<sup>8</sup> Mukunda ndjía 'kpí bini de. La, nedhinga akolo makolo li ongú inde li okpála ngakpokpo e maka opolofeta andjía mandjia. Nagama 'ngú bhú oeli gba oandjelu-o andjía mandjia. Angu nasuno 'ngú gba Ebhe-e pi okpála-a andjía mandjia. <sup>9</sup> Padhá de, anga angu nasuno 'ngú gba Ebhe-e pi okpála píla doto akódho 'kpí makodho. La di-e, angu gba ní nakpokpo 'ngú maka opolofeta akódho 'kpí makodho. <sup>10</sup> Engú bini, ekpí li Ebhe ambámba ta ongú na babadha pi ní lie, li ongú bhende libhomu ade-e tsia ndjía.

<sup>11</sup> Nani ma adu lie bhú ndili-e, ma adu agama 'ngú maka ndili, ma adu abhundja maka ndili, ma adu di aké mboli 'ngú maka ndili. Engú bini, nedhinga ma abhele lie, ma a'o namene engú bhe na ndilio. <sup>12</sup> A la bhadi pi ní moko. Bhú mbia inde-e, ní ngau ohe bulusu bulusu mugito me ní ngatsia 'kpí bhú bitolobi bhende na didili. Engú bini, ekpí akólo makolo ní aú ndú 'he hana má ngilili ne djila ní! Bhú

mbia inde-e, imbilangu gba ma-a mbila ndu 'ngú hana de. Engú bini, ekpí akólo makolo ma tsia mbila ndu 'ngú hana má ngilili maka Ebhe ambila ma lie ngae makpe-o!

<sup>13</sup> Ngú nabu tata-a, ní mbila me ongú bata inde-e yíe bhú da o de. Ongú ango-o ngae inde: nabhuka Ebhe, na'o 'to o 'to ani, a la di-e nadu ne mukunda pi ani di ne pi obi o. La-a, bhú káká hana-a, nadu ne mukunda pi Ebhe di ne pi obi o, ane ndu obhe bhisi bhomu-o hana.

## 14

*Nakpokpo 'ngú maka polofeta ane nakpokpo 'ngú bhú oeli gba oandjelu*

<sup>1</sup> Yi mene ne kpéke me yi du ne mukunda pi obi yi. Yi du ne gumu angu li Bu Bhobua ngaha e pi kpála ne kpála ngú nateteke Piga gba Ebhe-o, ane la mane angu nakpokpo 'ngú maka polofeta . <sup>2</sup> Kpála inde ngakpokpo 'ngú bhú oeli gba oandjelu ngakpokpokpo pi Ebhe. Ani kpo pi okpála de, anga kpála bini kə mboli engú ani ngakpokpo e de. Ani ngakpokpo bhú angu gba Bu Bhobua ta ongú inde li Ebhe awo ta e mawo-o.

<sup>3</sup> Engú bini, kpála inde ngakpokpo 'ngú maka polofeta-a, ngakpokpokpo pi okpála ngabula nabe ndu nabhuka gba uo-o, ngú nato masi bhú uo di ne ngú nateteke bua uo. <sup>4</sup> Kpála inde ngagama 'ngú bhú eli gba oandjelu-o ngabe ndu nabhuka gba e kpi e kpi. Engú bini, kpála inde ngakpokpo 'ngú maka polofeta bhú oeli li ndu okpála hana ngadje e-e, ngabe ndu nabhuka gba okpála na Piga gba Ebhe-e libhomu.

<sup>5</sup> Ma ne gumu me ndu yi hana yi du nagama 'ngú bhú oeli u mbila e de. La-a, a nga matá li ma naali me yi du nakpokpo ongú maka opolofeta. Padhá de, anga kpála du nakpokpo 'ngú bhú oeli gba oandjelu-o, a ayo me kpála koko du ngú nambamba tata. I du mo-o de-e,

kpála bhende ngakpokpo 'ngú maka polofeta ngabe ndu nabhuka gba okpála na Piga gba Ebhe-e libhomu ane mane.

<sup>6</sup> Ondaise ma, ma yi nga yi: i du me ma nde ago agba yi, ma nde ngagama 'ngú pi yi bhú oeli gba oandjelu-o, tata pi yi tété ne ni? Tata bini ade. A ayo mangbo me ma go kpokpo 'ngú pi yi bhú eli inde yi ambila e, belegu i du engú li Ebhe ambamba ta e muma, i du di-e me ma go ha pi yi imbilangu na mbia, i du di-e me ma go kpokpo 'ngú pi yi maka polofeta, ne me ma go suno 'ngú pi yi, a ayo me yi mbila tata-a ndjindji.

<sup>7</sup> Yi bhundja nga pindji omavulu mbálá. U du na'u mbálá-a, u 'u li lelele de-e, mo ombila salisali-e lele pi? A bhadi moko pi dumu. <sup>8</sup> La di-e, i du me bhulu na'u mbala nde 'u li lelele de-e, okpála aléke lio ngú egú lele pi? <sup>9</sup> A bhadi pi yi moko. Okpála aké mboli engú yi ngapa e bhú eli na gandji gandji-e lele pi, i du me u nde mbila eli bhomu-o de-e? A mana me yi ngagama 'ngú pi anvi. <sup>10</sup> Oeli píla doto kpikpikpi. Engú bini, ndundu hana abhú 'ngú. <sup>11</sup> La-a, li kpála du nagama 'ngú bhú eli inde ma mbila e de-e, kpála bhomu muma ne gandji kpála , ma di pi ani ne gandji kpála. <sup>12</sup> A bhadi pi yi moko. Maka yi akunda lie ne bua yi hana nasia angu gba Bu Bhobua-a, yi gili naali nadu okpála inde ngabe ndu nabhuka gba okpála na Piga gba Ebhe-o.

<sup>13</sup> Kaka-a, kpála bhende ngagama 'ngú bhú eli gba oandjelu-o, a ayo me ani yo ka Ebhe angu nambamba ta eli ango-o. <sup>14</sup> Padhá de, anga i du me ma nde ngayo Ebhe bhú ngua eli bhomu-o, bua ma bhú mayo na paká paká, engú bini, imbilangu gba ma-a li kulu bini ade. <sup>15</sup> I du mo-o, a ayo me ma mene pi? A ayo me ma yo Ebhe bhú eli gba oandjelu, engú bini, ma ayó di ani ne imbilangu gba ma-o. A ayo me ma li 'tsi bhú eli gba oandjelu-o, engú bini, ma alí di

ne imbilangu gba ma-o. <sup>16</sup> Padhá de, anga i dũ me mũ nde ngagie heni pi Ebhe bha bhú oeli gba oandjelu-o, kpála bhe yi nde ne e bhú 'ti Ebhe-e apá me: «A adũ moko» li mayo gba mũ nagie heni-e lele pi me, ani nde mbila engú mũ ngapa e de-e? <sup>17</sup> A bana i dũ me mayo gba mũ nagie heni-e nde bha babadha naali-e, i dũ bhú oeli gba oandjelu-o, a be ndũ nabhuka gba kilí mũ yi nde ne e bhú 'ti Ebhe-e de.

<sup>18</sup> Ma ngagie heni pi Ebhe anga ma ngagama 'ngú bhú oeli gba oandjelu-o ane ndũ yi hana. <sup>19</sup> Engú bini, i dũ me ya nde apo bhúla ya ne omaha Ebhe-e, ma uu ndjindji me ma pa engú bhuluvue inde li okpála adjé e ne tata ngabula nasuno 'ngú pi uo, ane me ma pa engú kete ndjikpa bhú oeli gba oandjelu.

*Pindji nakpokpo 'ngú bhú eli gba oandjelu-o, yi dũ nabhundja maka obhelesi okpála*

<sup>20</sup> Ondaise ma, pindji ongú ma apa e pi yi bhomu-o, yi adú abhundja pépé maka ongisi de. Yi dũ ne odjedje ongisi li pápá na siti 'ngú. Engú bini, yi dũ ne obhelesi okpála li pápá na nabhundja 'ngú. <sup>21</sup> U aye bhú Bhuku gba Ebhe-e me, Ebhe Ngámá apa me:

«Li kpadji gba ogandji okpála ne bhú 'li uo-o, ma agáma 'ngú pi omaha ma.

Abana mo-o, u djé ma de.†»

<sup>22</sup> Kaka-a, nagama 'ngú bhú oeli na gandji gandji-e, a ko ehe inde ngasuno mangimbo gba Ebhe-e pi okpála inde i bhuka de-o. La-a, pi okpála bhende abhuka-a, a pi uo ade. Nakpokpo 'ngú maka polofeta-a, a pi omabhuka. La-a, pi obhende i bhuka de-e, a pi uo ade.

<sup>23</sup> I dũ me yi nde apo bhúla yi ngú nayo Ebhe-e, li ndũ yi hana holo nagama 'ngú bhú oeli gba oandjelu-o, i dũ me okpála bhende

i mbila 'ngú bhomu-o de-e, i dũ di-e obhende i bhuka de-e go oo, u pá de me yi ne obhulũ pele-e di?

<sup>24</sup> La-a, i dũ me yi nde ngakpokpo 'ngú maka opolofeta-a, li okpála bhe imbila engú bhomu-o de, i dũ di-e okpála bhe i bhuka de-e go li bhú ká yi-e, u tsia ké mboli siti 'ngú gba o-o. Engú inde u ngadje e hólo bua uo. <sup>25</sup> Ongú inde awo lie li bua uo-o zé li zi 'kpí. Abhomu-o, u tú 'ndji o ne kuto. U tsia dhégo Ebhe ne napa me: «Ebhe bhú ká yi na paká!»

*Yi dũ amene 'ngú bhú Piga gba Ebhe-e li lelele*

<sup>26</sup> Ondaise ma, ní abú tata-a lele pi? Nedhinga yi apo bhúla yi lie ngú nadhého Ebhe-e, kpála bini bhú ká yi ti da nali etsi, koko ti da nasuno eli gba Ebhe pi okpála, koko ti da nakpokpo engú li Ebhe ambamba ta e pi ani, koko ti da nagama 'ngú bhú oeli gba oandjelu, li koko tsia mbamba tata. A ayo me yi mene ndũ 'ngú bhomu-o hana da napa me abe ndũ nabhuka gba okpála gba Ebhe-o.

<sup>27</sup> I dũ me okpála holo nagama 'ngú bhú ká yi bhú oeli gba oandjelu-o, a ayo me a de dũ okpála bhisi, i dũ bhisi de-e, a de pise bhú bata. A ayo la di me u dũ agagama bini bini, kpála bini nde ngambamba ta 'ngú u ngagama e-o. <sup>28</sup> Li kpála nambamba ta 'ngú bhomu-o dũ de-e, a ayo me kpála inde i di me gama 'ngú bhomu-o ndjili bhú ká yi má bulu! Ani nũ gama bha bini pi Ebhe agba e. <sup>29</sup> Pi okpála bhe ngakpokpo 'ngú maka opolofeta-a, a ayo me okpála bhisi, i dũ di-e bata gama 'ngú, amba okpála koko lo doto bhú 'ngú u ngakpokpo e-o. <sup>30</sup> La-a, i dũ me Ebhe nde asuno engú koko na mbia pi sũka yi inde bhú ká yi oo, a ayo me kpála bhende ngagama 'ngú-o 'o nga nagagama, ngabula me kilí ani-e gama 'ngú.

† 14:21 14:21 Tsia bhú Iša. 28:11-12.

<sup>31</sup> Kaka-a, yi ðu nagama 'ngú maka opolofeta, a ayo me yi gama bini bini. Yi mene mo-o ngábula me ndu omaha Ebhe hana sia imbilangu, amba yi to di masi bhú ndu uo hana. <sup>32</sup> Okpála inde ngakpokpo 'ngú maka opolofeta-a, a di bhú uo ne angu ngú nagbite 'bhe o pí engú li Ebhe asuno e pi uo-o. <sup>33</sup> Padhá de, anga Ebhe kunda de me ní ðu amene 'ngú pupulu-o de. Engú bini, ani akunda mangbo me ní ðu amene 'ngú li kúkú. Maka u amemene lie bhú ndu oDadjua gba Ebhe-e hana, <sup>34</sup> nedhinga yi apokobhø bhúla yi lie ngú nayo Ebhe-e, a ayo me olisi\* ndjili má bulu! U ha kpadji pi uo ngú nagama 'ngú oo de. A ayo me u ndjili ma bulu ngú nadjè 'ngú u ngakpokpo e-o, maka li líli gba Moidje apa lie-o. <sup>35</sup> I ðu me u nde akunda nambila 'ngú pindji ongú bini bini-e, u de yi obhosi gba o-o akuti. A ndjindji ade me ølø gama 'ngú bhú makpøtse gba omabhuka.

<sup>36</sup> Aiya! Ne me yi ngabhundja me eli gba Ebhe-e ayie agba yi, ne me eli angoo, a ko bha bini na yi 'he kpi yi kpi? <sup>37</sup> Li kpála bhundja me ni ne polofeta-a, ne me ani bhundja me ni asia angu gba Bu Bhobua-a ngú nabe ndu nabhuka gba okpála gba Ebhe-e, a ayo me ani mbila me engú inde ma aye e pi yi inde-e, a ko líli ayie ka Ngámá. <sup>38</sup> Engú bini, ani bhuka mo-o de-e, Ngámá mbila di ani de.

<sup>39</sup> Kaka-a, ondaise ma, yi gili ne bua bini nadu nakpokpo 'ngú maka opolofeta. La-a, yi ayóko okpála de me u agáma 'ngú bhú oeli gba oandjelu-o de-e de. <sup>40</sup> A ayo mangbo me ndu 'ngú bhomu-o dhuku li lelele, yi améne bhú tolo de.

## 15

### *Nabhuka gba ní-e alu pí nazuku*

\* **14:34** 14:34 Abana li olisi nde lie ne angu ngú nayo Ebhe-e, di ne nagama 'ngú maka opolofeta-a bhú ká omabhuka-a, u ha nani kpadji pi uo ngú nalo doto bhú ongú li opolofeta adu apa e de. Tsia bhú 1 Kol. 1:11, 5. † **15:3** 15:3 Tsia bhú isa. 53:5-12. † **15:4** 15:4 Tsia bhú Oz. 6:2; di ne bhú Luk. 24:34-49.

### *gba Yesu Kilisito*

<sup>1</sup> Ondaise ma, ma akunda matá nakpokpo pi yi Bádha Ngali inde yi asia e, inde yi adhedhe di lie má kpakala-o! <sup>2</sup> Bádha Ngali angoo ngakobho yi, i ðu me yi nde ngalilila maka nako ma akpokpo pi yi lie-o. I ðu mo-o de-e, tata li nabhuka gba yi-e ade.

<sup>3</sup> Ma asuno pi yi ongú na ng-bengbengbe inde ma asia e ka Yesu Kilisito-o. Engú angoo me: Yesu Kilisito akpi pindji mugwe gba ní-o, maka u aye lie bhú Bhuku† gba Ebhe-o. <sup>4</sup> U azi ani, ani atsia azuku bhú 'kpi na bata maka li Bhuku gba Ebhe-e apa lie-o.† <sup>5</sup> Ani azuku lie, ani akoto li Piele. Pipita-a, ani akoto li obhulu titima ndjikpa ne ká bhisi gba e-o.

<sup>6</sup> Pipita-a, ani akoto li omukpata gba e nane kámá bhuluvue mane bhú nedhinga bini. Bhelé na uo nga bha bhúka, okoko amu. <sup>7</sup> Pipita-a, ani akoto li Djaki, ani atsia akoto di li ndu obhulu titima gba e hana.

<sup>8</sup> Pita ndu uo hana-a, ani akoto di li ma, belegu ma ðu lie ne tetele kpála de-o. <sup>9</sup> Ma ne bhulu titima na yeye ane mane bhú ká obhulu titima-o. A na paká me, ma ti belegu da napa de me kpála 'i ma me bhulu titima gba Yesu-o de. Padhá de, anga ma ato nani mbolo li Piga gba Ebhe-o. <sup>10</sup> Engú bini, bhú bádha bhú 'bu gba Ebhe-e, ma maka ma nde lie inde. Bádha bhú 'bu gba ani nani ani aha e muma bhomu-o padhá ade. La-a, ma amene kulu kaka naali nane obhulu titima koko hana. Angu angoo yie ka ma de, bádha bhú 'bu gba Ebhe-e adú mangbo namene kulu bhú ma ngae. <sup>11</sup> Kaka-a, abana ma, abana obhulu titima koko-o, a bhomu-o Bádha Ngali inde ya ngakpokpo e-o, a la bhadi bhomu-o Bádha Ngali inde yi abhuka e-o.

*A na paká me okpála azúku di mazuku*

<sup>12</sup> Bádha Ngali ya ngakpokpo e me Yesu Kilisito azuku. † *du* la me a nde mo-o, lele pi li okpála koko bhú ká yi ti da napa lie me okpála inde amu-o zúku de-e? <sup>13</sup> † *du* na paká me okpála inde amu-o nde zúku de-e, bhobhomu-o akúnda napa di me Yesu Kilisito zuku de. <sup>14</sup> † *du* la me Yesu Kilisito nde zuku de-e, akúnda napa me tata bini li Bádha Ngali ya ngakpokpo e ade, tata bini la di li nabhuka gba yi-e ade.

<sup>15</sup> † *du* me Yesu Kilisito nde zuku de-e, amba akúnda napa me ní ngapa eu li Ebhe. Padhá de, anga ní ngapa pi okpála me Ebhe azuku Yesu Kilisito bhú ka okpála inde amu-o. La-a, ani mene mo-o de, † *du* me okpála nde zúku di de-o. <sup>16</sup> Padhá de, anga † *du* me okpála nde zúku de-e, bhobhomu-o akúnda napa di me Yesu Kilisito zuku de. <sup>17</sup> † *du* me Yesu Kilisito nde zuku de-e, bhobhomu-o akúnda napa me tata bini li nabhuka gba yi-e ade, yi nga bha sa mangimbo gba Ebhe.† <sup>18</sup> A akúnda di napa me okpála bhende amu me u nde abhuka Kilisito-o, amu dáduma ne dáduma. <sup>19</sup> † *du* me nganí omabhuka ní nde a'o 'to ní 'to Kilisito bha bini ngubula mukobho inde-e, amba ní ne okpála na likabhu naali nane okpála kóko.

<sup>20</sup> La-a, a mo-o ade, a bha ndju na paká me Kilisito azuku bhú ka okpála inde amu-o! A ko kpála na gígina inde azuku bhú kuo. <sup>21</sup> Padhá de, anga koli kpála bini amene nani me kuo li píla doto, koli kpála bini koko atsia amene la bhadi me okpála amu-o zuku. <sup>22</sup> Ndu okpála hana ngamu, anga ní ne opiga gba Adamu . Ndu okpála hana inde abhuka Yesu Kilisito asía bhadi mukobho ka ani. <sup>23</sup> Engú bini, kpála ne kpála azúku li nedhinga gba e. Kilisito azuku nani kalanu. Li

nedhinga ani agó lie, li okpála gba ani-e tsia zúku di.

<sup>24-25</sup> Abhomu-o, Yesu Kilisito méne me ndu osisiti angu hana kolo padhá. Ani tsia kó angu e pi ndu okpála na angu hana inde ngagu ani-o. Padhá de, anga a ayo me ani u ngámá akólo bha makolo li Ebhe a'ó ndu obhulu yala gba ani-e lie hana sa 'dhu ani-o. Pipita-a, li 'ngú na doto ndjía. Ani tsia gíe nau-o pi Ebhe 'Dyi e.† <sup>26</sup> Bhulu yala na soso inde li Ebhe abhéle e-e, a ko kuo. <sup>27</sup> Padhá de, anga u aye bhú Bhuku gba Ebhe-e me: «Ebhe a'o ndu 'he hana má kpekobhe sa 'dhu ani!†» Engú bini, † *du* me u nde apa mo-o, a mbámbá me u to Ebhe bhúbhú de. Ani sa Ndili gba e ade. <sup>28</sup> Li ndu 'he hana a akólo lie sa angu gba Kilisito-o, li ngaani makpe Ndili-e, ani tsia 'ó lie makpe sa angu gba Ebhe, ngubula me Ebhe u ngámá pí 'ndji ndu 'he hana má da!

*Pindji 'ngú nazuku ka okpála inde amu-o, yi apite liyi de*

<sup>29</sup> Okpála koko bhú ká yi ngasia batisimo mada okpála inde amu-o. Uo ngasia ní? † *du* me okpála inde amu-o nde zúku de-e, uo la ngasia batisimo mada uo ka ní? <sup>30</sup> † *du* me okpála nde zúku de-e, ka ní ya ngazu likabhu lie ndu nedhinga hana-a? <sup>31</sup> Ondaise ma, a na paká me ndu 'kpi hana kuo de ma masikpe. A la bhadi paká me ma ne gindaginda kabula yi akpøtø liyi lie ne Ngámá gba ní Yesu Kilisito-o. <sup>32</sup> A bhú gudhu na Efeso-o, ma azu likabhu naali sakpa okpála. A mana mugito me ma adu agu gbele ne onu 'te. † *du* me ma nde ngabundja bha bini ndu ongu na doto-o, gbele angoo atéteke ma lele pi? † *du* me okpála inde amu-o nde zúku de-e, bhobhomu asuno me engú inde u apapa e me: «Ní zu 'he, amba ní ndji di vino, anga ní amú mambi-e!†» A ko kukulu 'ngú.

† 15:17 15:17 Tsia bhú Lom. 6:8-11. † 15:24-25 15:24-25 Tsia bhú Ets. 110:1. † 15:27 15:27 Tsia bhú Ets. 8:7. † 15:32 15:32 Tsia bhú Isa. 22:13.

<sup>33</sup> Yi apíte liyi de. Yi mbila me, mu kə dhuku ne kpála na siti 'ngú-o, mu tágba di siti 'ngú. <sup>34</sup> Yi gie liyi li ngbili kpadji, amba yi améne matá siti 'ngú de. Okpála koko bhú ka yi mbila Ebhe de. Ma ngapa mo-o, ngubula me yi sia namu.

*Bhú nazuku ka okpála-a, kute ní adjí lie na mbia*

<sup>35</sup> Kpála bini ti da nayi ma me: «Okpála inde amu-o, azúku lele pi? Kute u azúku ne e adú lele pi?»

<sup>36</sup> Ma gie pi ani me, ngamu-o, mu ne ngingi. Ngua inde mo olu e ti da nakə-ə de, i du me a nde zi de ko. <sup>37</sup> Ngua inde mo olu e, i du di-e dadha, i du di-e ngua koko-o, mu ngalu bha bini líli. Mu lu lálá bhende akə-o de. <sup>38</sup> Pita li ngua akə lie, li Ebhe há pipi lálá na mbia maka ani akunda lie. Ani ngaha pi ngua ne ngua 'lá e makpe.

<sup>39</sup> Kute ndu 'he hana inde bhú mukobho-o bhadi kpi kpi kpi. Kute kpála-kuti kpi ne bhende gba onu, bhende gba odhu di ne bhende gba osungu. <sup>40</sup> A ne oehe inde na abhúlá, a la di ne oehe na kuto ei. Bádha gba oehe na abhúlá-a kpi ne bhende gba oehe na kuto ei. <sup>41</sup> A li ela ne zi e, a li epe ne zi e, a la di li oikupala ne zi o. Belegu bhú ká oikupala-a, zi uo kpi kpi kpi.

<sup>42</sup> A adú bhadi moko li okpála amu-o azúku lie-o. Kute inde u azi e azi mazi. Kute inde azuku-o zí matá-a de. <sup>43</sup> U azi maka ehe li tata nde lie naali ade, li angu nde bhú e ade. Li azúku lie-e, a abédhe ne angu, i tsia dú di babadha. <sup>44</sup> Nedhinga nazizi-e, a ko kute na doto. Li azúku lie, a adú kute inde li Bu Bhobua ngaha mukobho pi e ngae. A ne kute na doto, a la di ne kute inde li Bu Bhobua ngaha mukobho pi e. <sup>45</sup> A maka u aye lie bhú Bhuku gba Ebhe-e me: «Adamu nani ne kpála-kuti na kalanu, ani asia mukobho ka Ebhe.†» La-a, Kilisito u a'i e me Adamu

na bhisi-e abedhe ne Bu Bhobua, ngaani-e, ani ngaha mukobho pi okpála.

<sup>46</sup> Ehe na kalanu inde u ngau e-e, a ko kute na doto. Pipita-a, u tsia ú la kute inde li Bu Bhobua ngaha mukobho pi e-o. <sup>47</sup> Adamu, kpála na kalanu li Ebhe abho e nani ne kpála-kuti, Ebhe abho ani li doto. Kilisito, Adamu na bhisi-e ayie nae abhúlá. <sup>48</sup> Kute okpála-kuti maka kute kpála li Ebhe abho nani e li doto-o. La-a, kute okpála inde azúku ngú nanu abhúlá-a, adú bhadi maka kute kpála inde ayie abhúlá. <sup>49</sup> Mbia inde-e, ní maka kpála inde li Ebhe abho e li doto. Kpi bini, ní adú bhadi maka kpála bhende ayie abhúlá-o.

*Ngámá Yesu Kilisito aha angu kuo*

<sup>50</sup> Ondaise ma, ma apa pi yi me kpála-kuti lí bhú Nau gba Ebhe-e ne kute na doto inde-e de. Kute inde nazi mazi-e ti da nadu duduma ne duduma de.

<sup>51</sup> Yi gbo nga dje yi, ma adjí nam-bamba pi yi inde ta 'ngú inde li Ebhe awo e nakolo pi mbia inde-o. Ní mú ndu ní hana de,† engú bini, ndu ní hana, kute ní adjí lie madji, i tsia kólo na mbia. <sup>52</sup> Engú angu-o améne lie bhú nedhinga bedi, maka nakopo ka djila, nedhinga u a'ú toti na soso lie-o. Li a aú lie, okpála inde amu-o azúku ne kute inde i kpi matá-a de. La nganí bhende bhú mukobho-o, kute ní adjí lie na mbia. <sup>53</sup> Padhá de, anga a ayo me kute ní inde nakpi makpi inde-e dji lie, akolo kute inde i kpi matá-a de, i tsia zí la di matá de.

<sup>54</sup> Nedhinga li kute nakpi makpi-e akólo lie kute i kpi-i de-e, li kute nazi mazi-e akólo lie kute i zí-i de-e, li engú inde u aye e bhú Bhuku gba Ebhe-e tsia kólo mbámbá. U aye bhúbhú me: «Ebhe aha angu kuo aha, kuo matá ade.†» <sup>55</sup> U aye mata di me:

† 15:45 15:45 Tsia bhú Dje. 2:7. † 15:51 15:51 Tsia bhú 1 Tes. 4:15. † 15:54 15:54 Tsia bhú Isa. 25:8. † 15:55 15:55 Tsia bhú Oz. 13:14.

«Oo kuo! Angu mu mo oko pi okpala ne e su?

Oo kuo! Angu mo obhibhili okpala ne e su?†»

<sup>56</sup> Angu li kuo ngabhili okpala ne e-e, ngayie ka siti 'ngu. Angu li siti 'ngu ngabhili okpala ne e-e, ngayie bhú líli gba Moidje . <sup>57</sup> La-a, a ayo me ní toko Ebhe inde amene me ní ha angu siti 'ngu di ne angu kuo kabula Ngámá gba ní Yesu Kilisito-o!

<sup>58</sup> Abhomu-o, ondaise ma na mukunda, yi lu kpekpeke, u apite yi de. Yi nu ndu kpi hana ne kulu gba Ngámá-a ne kalanu. Yi mbila hana me kulu inde yi ngamene e pi Ngámá-a, nu padhá de.

## 16

### *Tia inde ayo napo e pi omabhuka na Yelusalema*

<sup>1</sup> Ma adjí apa mbo engú inde-e pi yi pindji tia inde yi ngapo e pi omaha Ebhe inde bhú Yelusalema-o. Yi mene matá maka ma aha nako líli lie pi omabhuka na ndu doto na Galatia-o.† <sup>2</sup> Ndu 'kpi yinga hana, a ayo me kpála ne kpála 'o mbo té tia inde ani asia e li ngongo, nakpata lele bhende li Ebhe aha e pi ani-o. Yi wo tia bhomu-o nganda yi, ngu napa me ma gó lie, ní apó matá bhúla tia de. <sup>3</sup> Nedhinga ma kólo lie agba yi-e, ma ayé balua pindji tia bhomu, ma tsia tíma okpála bhende yi alo o bhú ka yi-e ne di ngu nanu na'o'o abhú Yelusalema. <sup>4</sup> I yo me ma nu di-e, ya anú ne uo bhú dabili bini.

### *Onú inde ayo me Polo nu e-o*

<sup>5</sup> Ma agó agba yi pita nakodho 'kpi ka ma bhú ndu doto na Makedonia, anga ma apú bhú ndu doto bhomu. <sup>6</sup> Nedhinga koko-o, ní adú mbo ne yi ngu nedhinga bedi. Koko-o, ní adú ne yi oo ngu nadjেকে me nedhinga na zini-e kodho 'kpi. I du me ní nde asi ekpi bhe ayo me ní si e ne yi-e asi-e, yi tsia teteke ma ngu nanu li obili bhe ma adjí lie-o. <sup>7</sup> Padhá de, anga mbia inde-e, ma kunda bha nau yi

ne nakodho 'kpi ka ma makodho de. Ma ngabundja me, i du me Ebhe nde akunda-a, ma de go sidi, amba ní bhue mbo ne yi ngengele.

<sup>8</sup> Mbía inde-e, ma ngabundja me ma du nga bha bhú Efeso si nakolo bhú 'kpi na Patekote. <sup>9</sup> Padhá de, anga Ebhe abhulu 'bho 'ti mama mbámá ngu namene kulu gba ani-e ne angu ma hana si, belegu li okpala bhelé nde lie ngagu kulu ma ngamene e lie-o.

<sup>10</sup> Kaka-a, li Timoté kolo-o, yi mene me ehe bini ato zini bhú ani agba yi oo de, anga ani ngamene kulu gba Ngámá-a maka ma ngamemene lie-o. <sup>11</sup> Kpála bini aú ani bhú djila e padhá de. Yi teteke mangbo ani me ani dhuku bhú guo 'ngu ngu nakolo li bili ma nde lie-o, anga ma ngadjeke ani ne ondaise ní inde u agó ne o-o.

<sup>12</sup> Li 'ngu bhende atsia ndai ní Apolosi-e, ma ayo ka ani bhutsibhutsi me ani nu agba yi bhú dabili bini ne ondaise ní koko ngu natsia yi. La-a, ani kunda nga nanu oo mbia inde-e de. Ani sia nedhinga-a, ani tsia nú.

### *Polo yi matá omabhuka na Kolito mayi*

<sup>13</sup> Yi du li zuku, yi lu kpekpeke bhú 'bu nabhuka, bua yi adú ne tsulu de, yi du ne angu. <sup>14</sup> Yi mene ndu 'ngu yi ngamene e hana ne mukunda.

<sup>15</sup> Ondaise ma, yi mbila Etieni ne uo ne piga gba e hana. Yi mbila hana me u adjí nani bua o bhú ndu doto na Akai kalanu ngao, u atsia aha lio ngabula nateteke omabhuka. Kaka-a, ma ayo ka yi me: <sup>16</sup> yi manga ongua okpála bhomu-o mamanga. Yi manga di okpála inde ngamene kulu ne kekele bhú dabili bini ne uo mamanga.

<sup>17</sup> Ma ne djali naali li nago nako ka Etieni, ne Folutunasi ne uo ne Akaikusi-o. Ma ngau uo lie, a mana mugito me ma ngau yi ndu yi hana.

† 16:1 16:1 Tsia bhú Lom. 15:25-26.



18 U ato masi bhú ma maka u ato di nako masi bhú yi lie-o. Ongua okpála bhom̄-o, a ayo bha ndj̄ namanga uo mamanga.

19 ODadjua gba Ebhe inde bhú ndu doto na Adjia yi yi ma yi. Akwila ne Pilisila bhú dabil̄i bini ne omabhuka inde ayoyo Ebhe agba uo-o, yi yi ne 'li Ngámá mayi. 20 Nd̄ ondaise ní inde ei hana yi yi ma yi. Yi yi li yi s̄nda yi ne nakama liyi li k̄te yi.

21 Ma yi yi ma yi. Engú inde ma aye e me ma yi yi mayi bhom̄-o, ma aye ne 'kpa ma makpe. 22 I d̄ me kpála nde k̄nda Ebhe de-e, u de tu p̄dj̄o li ani! Malanata: a ayo me Ngámá gba ní-e gógo! 23 A ayo me bádha bhú 'bu gba Ngámá Yesu-o d̄ bhú dabil̄i bini ne yi. 24 Ma k̄nda nd̄ yi hana naali ka ní akp̄ts̄o liní ne yi lie bhú 'bu Yesu Kilisito-o .

**Balua na bhisi  
gba Polo pi omabhuka  
na gudhu na  
Kolito  
Eli na kalanu**

Balua na bhisi inde li Polo aye nani e pi okpala na Kolito, ani aye bhú nedhinga inde u du adje lio lie ne omabhuka na Dadjua na gudhu na Kolito de-o. Omabhuka koko na Dadjua gba Ebhe adu nani nagu Polo naali. Engú bini, ani asuno 'ndjá bua gba e ngú nadjé lie ne uo, ani atsia adje djali naali li nedhinga li engú bhomu-o andjia lie sunda uo-o.

Engú na bini bhú balua inde-e, Polo ngakpo 'ngú pindji nadjé lio ne okpala na Dadjua na Kolito, ani akpo ta ani agie 'ngú lie kpekpeke li sobho inde adu bhú Dadjua gba Ebhe-o, ne nagu inde li okpala na Kolito adu agu Dadjua gba Ebhe-e ne e-o. Polo atsia asuno di djali gba e, padhá de, anga egú inde ani agu e, amene me okpala dji di bua o amba u tsia dje di lio. Pipita-a, ani atsia ayo ka okpala na Dadjua gba Ebhe-e me u ha makiso ne bádha bua, ngubula nateteke omabhuka inde bhú ndibhili bhú Dadjua na Yudaya ne di. Bhú oalo na soso-o, Polo ngakpokpo 'ngú pindji kulu gba e na bhulu titima pi okpala koko na Kolito inde ngau lio me ni ne obhulu titima na kukulu gba Yesu ngaani. Padhá de, anga okpala ango-o adu apa me Polo ne bhulu titima na eu.

**Ongbengbe ongú inde bhú bhuku inde-e ngae inde:**

Eli na kalanu 1:1-11

Polo a la di-e Dadjua gba Ebhe na Kolito 1:12 - 7:16

Makiso pi omabhuka na Yudaya 8:1 - 9:15

Nakpokpo 'ngú gba Polo ne angu maka bhulu titima gba Yesu 10:1

- 13:10

Eli na soso 13:11-13

*Polo yi omabhuka na gudhu na Kolito mayi*

<sup>1</sup> Ma aye balua inde-e ngama Polo bhú dabili bini ne ndai ní Timoté. Ma aye pi yi omabhuka na Dadjua gba Ebhe inde bhú gudhu na Kolito di ne pi yi obhende bhú ndu doto na Akai-e libhomu. Ebhe amene ngae me ma du ne bhulu titima gba Yesu Kilisito. <sup>2</sup> A ayo me Ebhe 'Dyi ní ne Ngámá Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

*Omabhuka na Kolito ngazu likabhu bhú dabili bini ne Polo*

<sup>3</sup> A ayo me u toko Ebhe. A ko 'dyi Ngámá gba ní Yesu Kilisito. A ko 'dyi ní inde abedhe ne ndjinga bedhe. A ko Ebhe inde ngateteke bua kpala bhú ndu 'ngú hana. <sup>4</sup> Ani ngateteke bua ní bhú ndu olikabhu gba ní-e hana, ngubula me ní teteke bua okpala bhende ngazu likabhu-o, li kpadji na angu inde, ngani makpe, ní asia e ka ani-o. <sup>5</sup> Maka ya nde lie ngazu likabhu ne Kilisito na paká paká-a, ani bhadi ngateteke bua ya na paká paká. <sup>6</sup> I du me ya nde bhú likabhu-o, a ko ngubula me yi sia angu di ne mukobho. I du me bua ya nde aké-o, a ko ngubula me yi sia di angu. Angu ango-o ngaha pi yi nakibila ngua olikabhu inde ya nde ngakibila e-o. <sup>7</sup> Ya nga'o to ya me Ebhe ateteke yi mateteke. Padhá de, anga ya ambila ndjindji me yi ngazu likabhu bhú dabili bini ne ya. Li Ebhe aké bua ya lie-e, bua yi aké bhadi moko.

<sup>8</sup> Ondaise ya, ya akunda me yi mbila ngua likabhu inde ya azu e bhú ndu doto na Adjia\* ndjindji. Ya azu likabhu naali, likabhu ango-o aha angu ya maha. Ya du abhundja de me ya akóto bhúbhú makoto de.

<sup>9</sup> Ya adu abhundja li bua ya me ekpi

\* 1:8 Adjia: A ko ndu doto adu nani bhú kuti na Tiliki na naki-o. Efeso du nani ne 'ngbé gudhu na kuti ango-o ngae.

gba ya-a ale. La-a, engú bhomu-o akolo li ya ngubula me ya a'ó nabhuka gba ya-a bhú ya makpe de, ya 'o bha bini bhú Ebhe kpi e kpi. Aní ngazuku okpála inde amu-o ngae. <sup>10</sup> Aní agbegbe ya bhú nakpi bhomu-o ngae. Aní agbégbé matá ya bhú okoko magbegbe. Ya la di nga'o 'to ya me aní agbégbé galikpe ya bhúbhú magbegbe. <sup>11</sup> Ebhe améne bhobhomu-o, i du me yi nde akpètse liyi ne ya bhú dabili bini bhú mayo-o. Abhomu-o, nedhinga li Ebhe adjé mayo gba yi-e lie, aní tsia há bádha bhú 'bu gba e pí ní padhá, li okpála bhelé tsia gie di heni pí aní.

*Polo apa me ni nú nga bhú Kolito mbia inde-e de*

<sup>12</sup> Ehe inde ya nde ka e bhú djali ngae inde: bua ya ngaziba me ya adhuku bhú ká okpála ne naké liya ne kuto bhú dabili bini ne nawo 'ngú de. Ebhe akunda me ya dhuku bhú ká yi moko. Ya dhuku bhú ka yi ne imbilangu inde i yie ka okpála de. Engú bini, ya ngadhuku ne bádha bhú 'bu li Ebhe ngaha e pí ya ngae. <sup>13-14</sup> A ayo me yi mbila engú bhomu, anga bhú obalua ya aye e pí yi-e, ya aye bha engú inde yi ti da natanga e, yi ti di da naké mboli e ndjindji. Nakolo pí mbia inde-e, yi dje nga ya má kpulakutu de! Engú bini, ma abhundja me yi ahólo nadjé ya má kpulakutu madje! Abhomu-o, li 'kpí li Ngámá Yesu agó lie, yi akpí djali li 'ngú gba ya maka ya nde di lie ngakpi djali li 'ngú gba yi-o.

<sup>15</sup> Ma adu nako ne nabhuka bhú 'ngú bhomu-o. Kaka-a, ma adu akunda me ma apu agba yi bhutsibhutsi bhisi, amba yi sia di bádha bhú 'bu bhutsibhutsi na bhisi. <sup>16</sup> A akunda napa me ma akunda nako nanu agba yi kala nanu bhú Makedonia.† Pipita-a, ma adu di akunda me ma gie matá lima

agba yi ngubula me yi teteke ma ngubula nanu bhú Yudaya.

<sup>17</sup> Nedhinga ma apa lie pí yi me ma améne mo-o, ma apa ne 'li ma bhisi bhisi? A mo-o ade. Nedhinga ma nga'o oekpa gba ma-a lie, ma'o li mabhundja inde ayie ka ma makpe de, ngú napa me ma aziba engú ne nayayala bhú dabili bini. <sup>18</sup> Ebhe apá li ma ngae me engú ma apa e pí yi inde-e, ma pa ne eli bhisi bhisi de. <sup>19</sup> Padhá de, anga Yesu Kilisito, Ndili gba Ebhe inde ya akpokpo engú gba e pí yi-e, ngama Polo, ne Sila bhú dabili bini ne Timoté, aní go nani ngú naziba 'ngú ne nayayala bhú dabili bini de. Engú bini, aní memene engú inde aní ngapa e-o.

<sup>20</sup> Ndu 'ngú li Ebhe apa me ni améne e pí ní-e, améne lie kabula Yesu. Kaka-a, ya ngaziba me adu moko ne 'li aní ngú nadhogé Ebhe. <sup>21</sup> Ebhe abhu ya ngae makpe, la di-e, ngaani makpe ngato angu bhú ya bhú dabili bini ne yi li kpadji gba Yesu Kilisito-o. <sup>22</sup> Aní a'o di Bu Bhobua gba e li bua ní ngú nasuno me ní ne naani okpála. Maka aní aha Bu Bhobua gba e lie pí ní-e, ní ambila bhadi me aní ahá di ndu ohe koko inde aní apana e pí ní-e maha.

<sup>23</sup> Ne 'li Ebhe, li ma pa eu-o, Ebhe de bhelo ma. Kabula nalila‡ yi-e, ma kunda nanu agba yi bhú Kolito mbia inde-e de. <sup>24</sup> A ko de me ya ngakunda nau ngámá pí nabhuka gba yi-e de ngú napa me yi bhuka bha bini bhende ya ngakunda e de. Padhá de, anga yi alu kpekpeke bhú nabhuka gba yi-o. Ya akunda mangbo namene kulu bhú dabili bini ne yi ngubula me bua yi du bhú djali.

## 2

<sup>1</sup> Abhomu-o, ngama-a, ma apa li bua ma me a ndjindji ade me ma nu

† 1:16 1:16 Makedonia: A ko ndu doto bhú kuti gba oGiliki. A li pápá na Abebe. ‡ 1:23 1:23 Nalila: Polo akunda me ni 'o nedhinga pí okpála na Kolito ngú nadjé bua o li 'ngú u amene e li aní-o.

nga agba yi-e de. Padhá de, anga ma asítí matá bua yi ne toto\* 2 Li ma ha siti pi bua yi-e, a há matá djali muma da? Padhá de, anga kpála inde li bua e asiti-e, tí matá da naha djali muma de. 3 Kaka-a, ma aye balua bhomu-o pi yi, maka ma aye nako lie bhú balua gba ma na kalanu-o.† Ma kunda nako de me ma kolo agba yi-e, bua ma de siti matá ka okpála inde ayo nako me u ha djali muma-a de. Ma ambila na paká me nedhinga ma nde lie bhú djali-e, ndu yi hana di bhú djali. 4 Nedhinga ma aye balua bhomu-o lie pi yi-e, bua ma adu me a nde abedhe ne likabhu di ne tsulu bedhe. Ma aku belegu egbá. Yi abhúndja de me ma aye balua bhomu-o pi yi ngú na siti bua yi-e de. Ma aye mangbo ngú nasuno pi yi lele mukunda ma nde pi yi ne e ko.

*Polo apa me u mbu li kpála inde amene siti 'ngú-o*

5 Li 'ngú bhende atsia kpála inde amene siti 'ngú-o, ani asiti bua ndu yi hana ane ma mane. Engú bini, ma kunda napa 'ngú tété ne na'e'e bhú da e ma'e de. Ani siti bua ndu yi hana de, la-a, ani asiti bua té okpála bedi bhú ká yi. 6 Okpála bhelé bhú ká yi ambe bhú 'ndji kpála bhomu-o ambe. Ma abhúndja me a pise moko. 7 A ayo ibili mangbo mbia inde-e me yi suno bádha bhú 'bu pi ani, amba yi to masi bhú ani, ngubula me likabhu ahá angu ani má tsitsidha de! 8 Kaka-a, ma ayo ka yi me yi suno mukunda gba yi-e pi ani. 9 Ta naye balua gba ma na kalanu-o pi yi-e, a ko ngubula nale yi, amba ma mbila me yi nani bedhe ngú namene ndu 'ngú inde ma apa e pi yi-e hana. 10 Yi suno

bádha bhú 'bu pi kpála-a, ma asúno bhadi bádha bhú 'bu pi ani. Li ma mbu li siti 'ngú-o, i du me engú na sisiti ngú nambu tété ka ma nde uu-o, ma ambú tété ka yi kala Yesu Kilisito. 11 Ma amene mo-o ngubula me Satana apíte ní li 'ngú bini de. Padhá de, anga ní mbila engú inde ani akunda namene e ndjindji.

*Polo adu akunda me Tito go bhaka ni bhú gudhu na Tuluasi ne ngali gba omabhuka na Kolito*

12 Nedhinga ma akolo lie bhú gudhu na Tuluasi ngú nakpokpo Bádha Ngali gba Yesu Kilisito-o, ma au me Ngámá abhulu 'bhe bhoti muma ngú nakpokpokpo abhulu. 13 Engú bini, ma azu likabhu li bua ma naali anga ma bhaka ndai ma Tito de. Kaka-a, ma abhana lima pi okpála na Tuluasi, ma atsia atapa bhú ndu doto na Makedonia.

*Polo ngadhogo Ebhe kabula kulu gba e-o*

14 Engú bini, a ayo me ya dhogo Ebhe, anga ani ngako pi ya ndu 'kpí hana kalanu bhú galasisi‡ inde ngasuno me Yesu Kilisito agboko 'gú pí 'ndji ndu 'he hana agboko. Ani ngatima ya ne ndu bili hana ngubula nasuno Yesu Kilisito pi okpála. Nambila ani-e, a maka bádha se 'he inde ngapu ne ndu bili hana. 15 A ko paká. Ya maka mungotsi inde li se e nde babadha, inde li Yesu Kilisito aha e pi Ebhe. Se mungotsi ango-o ngapu pi okpála inde li Ebhe ngakobho o di ne okpála bhende ngangita. 16 Pi okpála bhende bhú ngita-a, se mungotsi bhomu-o sisiti, pi uo-o, se mungotsi ango-o ngatima uo bhú kuo.§ Pi okpála bhende li Ebhe

\* 2:1 2:1 Ne toto: Polo anu nani bhú gudhu na Kolito, saka mabhuka bini na Dadjua gba Ebhe-e atsia asobho ani, engú bini Dadjua gba Ebhe-e tsia gama 'ngú tété de. † 2:3 2:3 Balua na kalanu: A ko bha ndju balua na bini gba Polo pi omabhuka na Kolito de. A ko balua inde angita pi ní-o. ‡ 2:14 2:14 Bhú galasisi: Polo ngabhúndja pindji 'ngb ngámá gba osudha inde ngagie lie bhú 'gú me ani agboko 'gú-o agboko. Okpála ngabhia kuo li ani ne natsulu mungotsi. § 2:16 2:16 Bhú kuo: Bhú galasisi-e, adu nani ne osudha inde agboko 'gú, adu la di ne obhende u agboko o bhú 'gú-o. Obhende u agboko-o, adu nani nadjeke kuo.

ngakobho o-o, se mungotsi bhomu-o babadha, a ngaha pi uo mukobho. A moko! A li nakpokpo Bádha Ngali-e ne tata na ngbéngbé. A ti da namemene da? <sup>17</sup> Ya maka okpála koko bhelé inde ngakpokpo eli gba Ebhe-e li nasia tia ade. Engú bini, ya mangbo ngakpokpo 'li Ebhe kala ani bhú ngbili 'ngú, bhú nakpøtse lio ne Yesu Kilisito.

### 3

#### *Omabhuka ne balua inde li Yesu Kilisito aye e-o*

<sup>1</sup> Engú inde ma aye e bhomu-o akunda napa me ya akunda matá na'o liya ngaya makpe abhúla? Ya ne gumu balua ngú nasuno pi yi me ya ne obhulu titima gba Yesu ade. Ya di ne gumu ade me yi ye balua pi ya ngú nadhuku ne di me ya du nasusuno pi okpála. La pi obhulu titima koko-o, a ayo balua. Ya maka uo ade! <sup>2</sup> Yi ne balua gba ya-a inde li Yesu Kilisito aye e li bua ya-a ngayi makpe. Ndu kpála hana ti da nambimbila ne natatanga. <sup>3</sup> A ko paká, a mbámhá me yi ne balua inde li Yesu Kilisito aye e ngae, ani atsia atima sakpa ya. Ani ye ne 'ngu balua de. Ani aye mangbo ne Bua gba Ebhe inde uu-o. Ani ye pi opapala teme† de, ani aye mangbo li bua okpála-kuti.†

#### *Polo ngamene kulu gba Ebhe-e li lele gandja na mbia*

<sup>4</sup> Ya ngabhuka bhú ongu bhomu-o anga Yesu Kilisito apana pi ya me Ebhe atima ya ngae. <sup>5</sup> A ko de me ya ngamene ngua kulu bhomu-o ne angu gba ya makpe-e de, ya mene bhú 'ndji ya de. Ebhe ngaha angu bhomu-o pi ya ngú namemene ngae. <sup>6</sup> Ebhe aha angu pi ya ngú nadu okpála na kulu na gandja na mbia-a ngae. Gandja angu-o lu pi líli inde u aye nani e maye-e de, alu mangbo pi Bu Bhobua. Líli inde u

aye nani e ngato kpála bhú kuo. La-a, Bu Bhobua naae ngaha pi okpála mukobho.

#### *Sangu na gandja na mbia ane bhende na didili-e mane*

<sup>7</sup> Nedhinga li Ebhe aye nani líli lie pi opapala teme ngú nahaha pi Moidje-e, sangu gba Ebhe-e adu asu bhúla ani. Abana li zizi adu andjia lie bhúla Moidje-e, a adu nga bha kpekpeke. Omaɽsalaele ti nani belegu da natsia bhúla ani de.† Ní au me belegu li gandja na didili adu ato kpála lie bhú kuo-o, adu bhadi ne sangu. <sup>8</sup> I du mo-o, gandja na mbia inde li Ebhe ngaha Bu Bhobua gba e pi ní bhú e asúno sangu gba Ebhe ane mane. A mo-o adi! <sup>9</sup> I du me kulu gba Moidje inde adu nato okpála bhú kuo nde nani ne sangu-o, asi la masi pi kulu na mbia gba Ebhe inde ngamene me okpála du ngbingbili-e, a asúno sangu gba ani-e ane mane di! <sup>10</sup> Ní ti belegu da napa me sangu inde akoto nani bhomu-o matá ngau lie ka sangu na naki inde-e ade, anga a ane bhe nani na kalanu-o mane. <sup>11</sup> Padhá de, anga i du me gandja na didili, inde akoto nani ngú nedhinga bedi-e nde akoto ne sangu-o, asi la masi maka gandja na mbia inde ngabhue duduma ne duduma-a?

<sup>12</sup> Ya ne nabhuka bhú gandja na mbia-o. Kaka-a, ya ti da napa 'ngú pi yi mbámhá. <sup>13</sup> Ya mene maka Moidje de. Padhá de, anga Moidje adu nani nabuku bhúla e ne bongo ngubula me omaɽsalaele au lele maka zi sangu gba Ebhe inde adu asu bhúla ani-e du abulu lie de-o. Zi sangu angu-o adu la bha nani ngú nedhinga bedi. <sup>14</sup> Omaɽsalaele angu-o, agbite nani bua o má ki! Ngú nakolo pi naki-e, li ongisi gba uo du natanga ongu inde u aye e bhú gandja na didili-e, u ke mbolimboli de. A mana mugito me bongo ngabuku tata-a pi uo. Bongo bhomu-o bha bini nga'e lie me kpála nde

† 3:3 3:3 Tsia bhú Eki. 24:12. † 3:3 3:3 Tsia bhú Djlm. 31:33. † 3:7 3:7 Tsia bhú Eki. 34:29.

akpɔtɔsɛ lie ne Yesu Kilisito. <sup>15</sup> Abana pi naki, ndu nedhinga hana inde li omaɪsalaele ngatanga obhuku gba Moidje lie, u kɛ mbolimboli de.

<sup>16</sup> Engú bini, maka u aye bhú bhuku gba Ebhe-e lie me, li kpála dji bhúla e li pápá gba Ngámá Ebhe-e, oehe inde li pála bongo abuku e ú lie mbámbá. <sup>17</sup> A ko paká, Ngámá Ebhe-e, a ko Bu Bhobua. La-a, bili li Bua gba Ngámá-a nde li e, okpála inde oo bhú ngu o, a ko matá obalise na líli gba Moidje de. <sup>18</sup> Ndu ní hana inde li bongo nabuku bhúla ní-e ayie bhúla o ayie, ní ngasuno sangu gba Ngámá maka bhú bitolobi. Abhomu-o, Ngámá inde di Bu Bhobua-a ngadji ní me ní kolo maka ni, ne sangu inde nganu bha ne kalanu.†

#### 4

*Ebhe ngasuno angu gba e bhú bhuku gba obalise gba e-o*

<sup>1</sup> Ebhe bhú bádha bhú 'bu gba e aha pi ya kulu nakpokpo Bádha Ngali . Kaka-a, ya gie liya ne sidi de. <sup>2</sup> Ya ayala ndu 'ngú na pepe, i du di-e bhe na numu-o hana. Ya mene ehe bhú kali de, ya kpɔtɔsɛ di 'li Ebhe bhú dabili bini ne engú na eu de. Ya mangbo ngasuno ngbili 'ngú pi okpála mbámbá. Ya ngamene mo-o kala Ebhe ngubula me okpála hana mbila me lele nadhuku gba ya-a ngbingbili. <sup>3</sup> La-a, i du me Bádha Ngali inde ya ngakpokpo e nde mbámbá ade-e, a mbámbá ade bha bini pi okpála inde ngangita-o. <sup>4</sup> U ngabhuka ade anga Satana , ebhe na doto inde-e angbingi imbilangu gba uo-o angbingi. Ngaani ebhe angoo amene me u aú zi 'kpí inde bhú Bádha Ngali-e de. A ko zi 'kpí na sangu gba Kilisito . Ngaani-e, ani mana Ebhe libhomu. <sup>5</sup> Nedhinga ya ngakpokpo Bádha Ngali-e lie, a ko de me ya ngakpokpo engú gba ya makpe-e de. Ya ngakpokpo me Yesu

Kilisito ne Ngámá ngae. La pi ya-a, ya bha naaya ne obalise gba yi kabula ani. <sup>6</sup> Padhá de, anga Ebhe apa nani me: «Zi 'kpí sɛ bhú bití!†» Ani amene ngae makpe me zi 'kpí gba ni-e sɛ li bua ya ngubula me ya mbila sangu gba ni inde ngasɛ bhúla Yesu Kilisito-o.

<sup>7</sup> Oehe na babadha bhomu-o, Ebhe a'o bhú ya. Engú bini, ya bhubhuku maka madakpa. Ebhe amene mo-o ngú nasuno me angu na ngangamba bhomu-o yie bhú ya de, ayie mangbo bhú ni. <sup>8</sup> Ya ngazɛ ndu ngua likabhu hana, engú bini, likabhu bini ha nga angu ya de. Bua ya angamba, engú bini, ya ngaholo bua ya. <sup>9</sup> Okpála ngato mbolo li ya, engú bini, Ebhe 'o ká ya de. U agbo 'i ya, engú bini, u bhɛlɛ ya de. <sup>10</sup> Ya ngadhuku ne kuo ndu 'kpí hana sa so ya maka Yesu, ngubula me makobho gba ani u di lie bhú lele nadhuku gba ní-o. <sup>11</sup> Ndu nedhinga hana ya nde lie bhú makobho-o, kuo de ya masikpe kabula Yesu. Abhomu-o, u tsia tí da di nau makobho gba ani-e bhú lele nadhuku gba ní píla doto-o. <sup>12</sup> Kaka-a, kuo ngamene kulu bhú ya ngubula me makobho du namene kulu bhú yi.

<sup>13</sup> Bhuku gba Ebhe-e ngapa me: «Ma abhuka mu Ngámá, kaka-a, ma atsia agama 'ngú.†» Ngaya di-e, ya abhuka Ngámá, kaka-a, ya atsia agama di 'ngú. <sup>14</sup> Ya ambila me Ebhe inde azuku Ngámá Yesu bhú ká okpála inde amu-o, azúku di ya bhú dabili bini ne ani. Ani tsia 'ó di ya bhú dabili bini ne yi de e. <sup>15</sup> Ndu 'ngú ya ngakibila e hana-a, a ngubula yi, amba ngayi okpála inde li Ebhe ngasuno bádha bhú 'bu gba e pi yi-e, yi du nabe ndu yi ane mane. Abhomu-o, mayo gba yi nagie heni pi ani-e tsia bé di ndu e. Bhobhomu-o tsia há sangu pi Ebhe.

<sup>16</sup> Kaka-a, ya gie liya ne sidi de. Abana li kute ya du nandala-

† 3:18 3:13-18 Tsia bhú Eki. 34:29-35. † 4:6 4:6 Tsia bhú Dje. 1:3. † 4:13 4:13 Tsia bhú Ets. 116:10.

a, ya ambila me bua ya ngasia angu na mbia ekpí bini ne bini hana. <sup>17</sup> Likabhu ya ngazua e mbia inde-e mbomboye, ní tsia sangu na ngbéngbé inde ngadjeke ní-o. Sangu ango-o ane ndu 'he hana, a la di ngabhue duduama ne duduama. Olikabhu ní ngazua e inde-e ngaleke ní ngú nasia sangu bhomu-o. <sup>18</sup> Padhá de, anga ní nga'o 'to ní 'to engú i u lie ne djila de-o. Ní 'o 'to ní 'to engú inde ngau lie ne djila de-e de. Ehe bhende ngau lie ne djila ngabhue naali ade, engú bini, ehe i u lie ne djila de-e, ngadu duduama ne duduama.

## 5

*Kute na mbia inde li omabhuka asia e abhúla-o*

<sup>1</sup> Ní mbila hana me li eti inde ní nde bhú e kpi-e, a ka ní ne eti koko abhúla a akunda napa me, ekpí bini, ní akpí makpi, ní tsia 'ó ka kute na doto inde. Eti li Ebhe aleke e pi ní-e, okpála yiki ngao de. Eti ango-o adú duduama ne duduama. <sup>2</sup> Nedhinga ní nde lie bhú kute inde-e, ní ngalopolo liní anga gumu gba ní na ngbéngbé-e me ní dyi kute na abhúla maka bongo na mbia. <sup>3</sup> Nedhinga ní a'ó ka kute na doto inde-e lie, ní dú abhúla mandi kute de. Ní asia kute na mbia. <sup>4</sup> Ní mbila hana me ní nde nga bha lie bhú kute na doto inde-e, ní ngalopolo liní mugito me ní abi tili 'he. A ko de me ní ngagili nadu mandi kute-e de. Ní mangbo ngagili me ní dyi kute na abhúla ngubula me mukobho ha angu ehe bhe na kukuo-o. <sup>5</sup> Ebhe aleke ní ngubula mukobho ango-o ngae makpe. Ani atsia aha ngaiza Bua gba e pi ní bhú ka ohe inde ani aleke e pi ní-o.

<sup>6</sup> Ní mbila hana me, nedhinga ní nde lie bhú kute na doto inde-e, ní nga bha tsutsu de bili li Ebhe Ngámá nde lie-o. Abana inde lie mo-o, ní abedhe ndu 'kpí hana ne masi. <sup>7</sup> Padhá de, anga ní ngadhuku li lele nabhuka makpe, ní dhuku li

lele nakpata engú ní ngau e ne djila ní-e de. <sup>8</sup> A moko, ya abedhe ne masi bedhe. Ya la di ne gumu nayie bhú kute inde-e ngú nanu nadu deno Ngámá gba ní-o. <sup>9</sup> Engú inde li bua ya ngae inde, a ayo me ya mene engú inde anga li Ebhe, abana ya du bhú kute inde, abana ya yie bhú kute ango-o. <sup>10</sup> Padhá de, anga a ayo me ndu ní hana ní ze bhú djila Yesu Kilisito ngú napa me ani kodho 'ngú gba ní-o. Abhomu-o, li kpála ne kpála tsia sia ehe inde ati ne engú li ani amene e li nedhinga ani adu lie bhú kute na doto-o. Kpála ne kpála asia makalá na bádha 'ngú, i du di-e bhe na siti 'ngú inde ani amene e-o.

*Ebhe nga'i okpála bhú 'li ya*

<sup>11</sup> Ya mbila hana me namanga Ebhe ne ni-ie. Kaka-a, ya ngagili me ya to bhú 'ndji okpála me u bhuka Bádha Ngali ya ngakpokpo e-o. Kala Ebhe-e, ní ti da nawo liní de. Ma ngabhundja la di me kala yi-e, ma wo lima de. <sup>12</sup> Ya kunda matá de me ya kpokpo 'ngú gba ya-a pi yi ngaya makpe de. Engú bini, ya ngakunda na'o yi me yi du ne gindaginda li 'ngú gba ya-o. Abhomu-o, yi ti da nagie 'ngú pi okpála inde ngau ngbengbe ongú bhende i ngau lie mbámá, inde i tsia 'kpí li 'ngú bhende li bua kpála de-o.

<sup>13</sup> I du me ya nde ne obhulu pele maka li okpála koko ngabhubhundja lie-e, a ko kabula Ebhe. I du me ya nde ne obhulu pele ade-e, a ko ngubula nateteke yi. <sup>14</sup> Engú inde ngatima ya me ya mene kulu inde-e ne kekele-e, a ko mukunda li Yesu Kilisito nde ne e pi ya-o. Ya ambila ndjindji me Yesu Kilisito akpi mada ndu okpála hana. Kaka-a, bhú djila Ebhe-e, ndu okpála hana amu bhú dabili bini ne ani. <sup>15</sup> Ani akpi ngubula ndu okpála hana, amba ndu obhende bhú mukobho adú matá akobho bhú ngu o de, engú bini, u du akobho pi kpála inde akpi, atsia azuku pi uo-o.

<sup>16</sup> Kaka-a, ya matá ngatsia kpála ne djila bhe na kpála-kuti ade. A ko paká ya adu nako natsia Yesu Kilisito ne djila bhe na kpála-kuti, la mbia inde-e, ya matá ngatsia ani mo-o ade. <sup>17</sup> Nedhinga li kpála akpètse lie lie ne Yesu Kilisito-o, ani akolo kpála na mbia. Lele dasundu gba ani na kalanu-o andjia. A ibili bhú ani ne lele dasundu na mbia. <sup>18</sup> Ebhe ngamene ndu 'ngú bhomu-o hana ngae. Ani atima Yesu Kilisito me ani go to guo 'ngú sunda ní ne o. Ani aha kulu bhomu-o pi ya ngae me ya nu gbele okpála koko de ni, amba ni to guo 'ngú sunda ni ne uo. <sup>19</sup> Padhá de, anga Ebhe adu namene kulu ngu nato guo 'ngú sunda o ne okpála-kuti li kpadji gba Kilisito. Ani tsia matá siti 'ngú gba uo de. Abhomu-o, Yesu Kilisito atima ya me ya kpokpo pi okpála lele maka a ayo lie me u sia guo 'ngú sunda o ne Ebhe-o.

<sup>20</sup> Bhobhomu-o akunda napa me Yesu Kilisito atima ya ngae makpe. A na paká me Ebhe nga'i okpála bhú 'li ya. Kaka-a, ya ngayo ka uo ne 'li Yesu Kilisito me, u 'o me Ebhe to guo 'ngú sunda o ne e. <sup>21</sup> Yesu Kilisito mene nani siti 'ngú belegu de bini. Engú bini, Ebhe a'o kili siti 'ngú gba ni-e li 'ngbu ani, ngubula me li kpadji gba ani-e, ní sia ngasa nakolo ngbingbili bhú djila Ebhe.

## 6

<sup>1</sup> Ya ngamene kulu bhú dabili bini ne Ebhe. Inde lie mo-o, ya ngayo ka yi me, yi aú bádha bhú 'bu li Ebhe apana e pi yi-e padhá de. <sup>2</sup> Padhá de, anga Ebhe apa bhú Bhuku gba e me:

«Nedhinga akolo lie me ma mene bádha 'ngú pi yi okpála gba ma-a, ma adje yi.

Nedhinga akolo lie me ma kobho yi-e, ma ateteke yi.†»

Ondaise ma, yi gbo 'dje yi, a ko mbia inde-e nedhinga na babadha, a ko nedhinga na makobho.

*Likabhu li Polo azu e asuno me a ko kukulu bali gba Ebhe*

<sup>3</sup> Ya kunda namene engú bini de inde amene me okpála ti ka e-o, anga i du mo-o de-e, u pá 'ngú li kulu gba ya-a sisiti. <sup>4</sup> Bhú ndu 'ngú ya ngamene e hana-a, ya akunda mangbo nasuno pi okpála me ya ne obalise na kukulu gba Ebhe. Abana ya du nasia mangua likabhu dhoie, abana u du nato mbolo li ya, ya bha ngakikibila makibila. <sup>5</sup> U abhi ya, u amba ya bhú tikpu, u ato kpéke ndji bhú 'ndji okpála me u mene ya sisiti. Ya abhele kuo ya ne kulu masikpe da napa me ya asia belegu nedhinga nala ne nazu 'he de. <sup>6</sup> Bua ya kala Ebhe bubu, ya ngasuno me ya ambila ongu gba Ebhe-e má kpulakutu! Ya ne 'ndja bua, ya ne bádha bua, Bu Bhobua bhú ya, ya la di ne mukunda na kukulu.

<sup>7</sup> Ya ngakpokpo kukulu 'ngú pi okpála bhú angu gba Ebhe. Lele bádha nadhuku gba ya-a pi ya maka tia 'gú ngú naha 'gú ne obhulu yala gba ya-o. A di pi ya maka kopí ngú nalila liya ne di sakpa obhulu yala gba ya-o. <sup>8</sup> Okpála koko ngamanga ya, okoko ngau ya bhú djila o padhá. Okpála koko ngatoko ya, okoko ngasobho ya. Okpála ngau ya mugito me ya ne obhulu eu, ya nde la ngapa kukulu 'ngú-o. <sup>9</sup> Okpála koko ziba de me ya ne obhulu titima gba Yesu-o de, engú bini, okpála bhelé ngaziba ya. Okpála koko ngau ya mugito me ya ne omakpiakolo, ya nde la bhú makobho-o. U ngato mbolo li ya, engú bini, ya mu de. <sup>10</sup> Abana li bua ya ngabi likabhu lie ka okpála naali-e, ya bha ndu 'kpi hana bhú djali. Ya bhú ndibhili, engú bini, ya ngamene me okpála bhelé kolo obhulu tia kala Ebhe. Ya

† 6:2 6:2 Tsia bhú Isa. 49:8.



ngau liya bhú djila okpála m̀gito me ehe bini ka ya p̀la doto inde-ade. La-a, bhú ngbingbili-e, ndu 'he hana ne naaya 'he.

<sup>11</sup> Ngayi ondaise ya na Kolito-o, ya agama 'ngú p̀i yi mbámá. Ya wo engú inde li bua ya-a belegu de bini.

<sup>12</sup> P̀i ya-a, ya gbite bua ya p̀i yi de, yi agbite mangbo bua yi p̀i ya ngayi.

<sup>13</sup> Ma ngagama 'ngú p̀i yi m̀gito me yi ne ongisi ka ma. Ma ngapa p̀i yi me: «Yi gie mukunda ya nde ne e p̀i yi-e p̀i ya. Yi awó engú inde li bua yi-e p̀i ya de.»

*Yi akpétse liyi ne omupagano de*

<sup>14</sup> Yi akpétse liyi bhú dabilì bini ne omupagano ngú namene ehe ne uo de. Ehe inde ngbingbili-e t̀i da nakpétse lie bhú dabilì bini ne ehe na sisiti-e lele p̀i? Zi 'kp̀i t̀i da nakpétse lie bhú dabilì bini ne bitì lele p̀i? <sup>15</sup> Yesu Kilisito t̀i da nadjè lio ne djabulu lele p̀i? Kpála inde abhuka Yesu-o t̀i da nadu ne mabhundja bini ne kpála bhende i bhuka de-e uu? <sup>16</sup> Nganí-e, ní ne 'ngbé 't̀i Ebhe inde uu. 'Ngbé 't̀i Ebhe t̀i da nakpétse lie ne 't̀i atolo belegu de bini. A maka li Ebhe apa lie li 'ngú gba omaha e me:

«Ma adú bhú ká uo,  
ma tsia dhuku bhú dabilì bini ne uo.

Ma adú ne Ebhe gba uo, u tsia dú ne omaha ma.†»

<sup>17</sup> Ka 'ngú ango-o, Ebhe Ngámá apa p̀i uo me:

«Yi ze bhú ká omupagano maze,  
yi adú ne uo bhú dabilì bini de.

Yi abú 'kpa yi li 'he inde kala ma sisiti-e de,  
abhomu-o ngama-a, ma tsia z̀iba yi.†

<sup>18</sup> Ma adú ne 'dyi yi,  
yi tsia dú ne ongisi gba ma.  
Ngámá Angbamili apa mo-o.†»

## 7

<sup>1</sup> Ondaise ma na mukunda, Ebhe apa me engú inde ni apa me ni améne e p̀i ní-e, ni améne mamene. I nde lie mo-o, a ayo me ní vulu liní bhú ndu osisiti 'ngú inde ngato zibotu li kute ní ne bua ní-e hana. Ní mene ne kpéke me ní du bubu kala Ebhe ne namanga ani mamanga.

*Polo akpi ndjili ka li omabhuka na gudhu na Kolito adji bua o lie-o*

<sup>2</sup> Ondaise ma, yi 'o ya li bua yi! Ya amene siti 'ngú li pabili gba kpála bini de. Ya a'e kpála bini li kpadji gba Ebhe-e de. Ya ha 'he ka kpála bini bhú napite ani de. <sup>3</sup> A ko de me ma ngapa 'ngú bhomu-o ngú na'o mangimbo p̀i yi-e de. A maka ma de apa lie-o, ya ne mukunda p̀i yi naali. Ehe bini gbó bhusu mukunda ya nde ne e p̀i yi-e de, abana i du nakpi, abana i du me ní nde bhú mukobho. <sup>4</sup> Yi ne kpákpú na bua ma. Ma ne gindaginda naali li 'ngú gba yi-o. Bhú ndu likabhu ya ngazu e hana, ya gie liya ne sidi de, ya abedhe mangbo ne djali bedhe.

<sup>5</sup> A ko paká, abana nedhinga ya akolo lie bhú Makedonia, ya sia belegu nedhinga bedi ngú nago de. Ya asia okpekpeke da 'ngú ne ndu pasu hana. Ya du ne guo 'ngú sunda ya ne okpála koko de, ya atsia adu ne tsulu. <sup>6</sup> Engú bini, Ebhe inde atoto masi bhú okpála inde andala-a, abedhe matá ya ne masi li nedhinga li Tito agie lie lie-o. <sup>7</sup> Ya bedhe bha ne masi ka nago ka ani-e de, engú bini, ngali ani akpokpo e p̀i ya-a ato di masi bhú ya ngae. Ani akpokpo p̀i ya lele maka yi ato masi bhú ani lie-o. Ani akpokpo p̀i ya me yi abedhe ne gumu nau ma bedhe. Ani apa me yi ngakina liyi ka osisiti 'ngú yi amene e-o. Ani apa me yi ne gumu nago nateteke ma bhú egú

† 6:16 6:16 Tsia bhú Lev. 26:11-12; ne bhú Edj. 37:27; di ne bhú Djlm. 32:28. † 6:17 6:17 Tsia bhú Isa. 52:11; di ne bhú Edj. 20:34, 41. † 6:18 6:18 Tsia bhú 2 Sam. 7:8, 14.

ma ngagu e ne obhulu yala gba ma-o. Ma adje lie mo-o, ma abedhe matá ne djali bedhe.

<sup>8</sup> Ma ambila me balua\* inde ma aye nako e pi yi-e aha babuma pi yi naali. Ma ti nako da nadge likabhu li bua ma tété, padhá de anga, ma ambila me balua bhomu-o aha likabhu pi yi ngú nedhinga bedi. Engú bini, bua ma ne likabhu tété mbia inde-e ade.

<sup>9</sup> A na paká me, ma mangbo ngakpi djali. Ma kpi djali ango-o ka babuma yi asia e ka ma-a de. Engú bini, ma ngakpi djali anga babuma yi asia e amene me yi dji bua yi. Babuma yi asia e bhomu-o, yi asia li lele maka li Ebhe akunda lie-o. Inde lie mo-o, ya mene yi sisiti de. <sup>10</sup> Padhá de, anga li kpála sia babuma li bua e li lele maka li Ebhe akunda lie-e, babuma ango-o há pi ani nadi bua e. Ani dji bua e-e, ani tsia kóbho. Ya ti da nadge likabhu li bua ya tété lele pi? Engú bini, li kpála sia babuma li bua e, i du me ani nde dji bua e de-e, bhobhomu-o ngagbele pi ani nakpi.

<sup>11</sup> Babuma yi asia e, yi asia li lele maka li Ebhe akunda lie-o. Yi tsia nga obabadha 'ngú inde li babuma ango-o azu e bhú yi-o: a ngaha pi yi me yi du ne bádha bua ngú naleke 'ngú sunda yi má gala! Yi asuno mbámbá me yi li bhú siti 'ngú de.† Yi ngake 'ngú liyi li siti 'ngú ango-o. Yi ne tsulu li 'ngú inde li siti 'ngú ango-o ti da nazu e-o. Yi abedhe ne gumu nau ma di ne namene engú li lele maka li Ebhe akunda lie bedhe. Yi bedhe ngú na'o 'ngú pi kpála inde amene siti 'ngú-o. Yi apana mbámbá me ngayi makpe-e, yi li bhú 'ngú bhomu-o de.

<sup>12</sup> Li ma ye balua pi yi-e, ma ye ka 'ngú gba kpála inde amene siti 'ngú-o de. Ma ye di ka 'ngú gba kpála bhe u amene siti 'ngú li e de. Ma aye mangbo ngú nasuno me

yi mbila mbámbá kala Ebhe me yi ne mukunda pi ya li bua yi naali. <sup>13</sup> Kaka-a, engú yi amene e akø bua ya kuto.

Bua ya kø bha kuto ngae de, ya akpi di djali naali ka nau me Tito adu ne djali naali ka li ndu yi hana ato masi bhú ani lie-o. <sup>14</sup> Nedhinga ma atima ani lie agba yi-e, ma akpo 'ngú yi pi ani ndjindji. Mbía inde-e, yi tsia ha numu muma de. Maka ya akpokpo nako lie pi yi kukulu 'ngú ndu 'kpi hana-a, ndu babadha 'ngú ya akpokpo e li 'ngú gba yi pi Tito asuno me a ko kukulu 'ngú. <sup>15</sup> Nedhinga ani akolo lie agba yi-e, yi asia ani ndjindji. Ndu yi hana, yi amanga ani naali, yi au ani ne tsulu, yi atsia adu amene engú maka ani akunda lie-o. Ani bhundja engú bhomu-o, ani bédhe matá ne mukunda pi yi bedhe. <sup>16</sup> Ma ne djali, anga yi ne kpákpú na bua ma bhú ndu 'ngú hana.

## 8

*Polo ato masi bhú omabhuka na gudhu na Kolito me u teteke ondaise o na Yelusalema*

<sup>1</sup> Ondaise ya, ya akunda me yi mbila engú inde li Ebhe amene e bhú bádha bhú 'bu gba e pi okpála na oDadjua gba Ebhe na Makedonia.\* <sup>2</sup> Omabhuka inde oo azu nani likabhu naali, engú bini, u abedhe ne djali bedhe. U adu nani bhú ndibhili naali, engú bini, u du atsia bhúla 'he pi okpála de. <sup>3</sup> Ma au ne djila ma makpe. U apu 'he nakpata lele ehe inde adu ka uo-o. U apu belegu 'he nane dada mane. U aha bhú ngu o, okpála kata uo tété gandji de. <sup>4</sup> U akikiliki lio pi ya naali me ya asuno bádha bhú 'bu pi o, ngubula me o to 'kpa o pi omabhuka na Yudaya ne natima tia pi uo. <sup>5</sup> Ehe inde u amene e ane bhende ya adu nabhundja e-o. U aha ngaiza lio

\* **7:8** 7:8 Balua: A ko balua na bini gba Polo pi omabhuka na Kolito de. A ko balua inde ani aye e atsia angita-o. † **7:11** 7:11 Tsia bhú 2 Kol. 2:5-11. \* **8:1** 8:1 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

libhomu ngubula kulu gba Ngámá Yesu. U atsia aha di lio ngú nateteke ya nakpata lele maka li Ebhe akúnda lie-o.

<sup>6</sup> Kaka-a, ya ayo ka Tito ne kekele me ani gie lie agba yi ngú nandjia dú kulu na bádha bhú 'bu inde ani akpo nani lita e ko. <sup>7</sup> Yi ne obhulú tia kala Ebhe nane okpála koko. Nabhuka gba yi-e kpekpeke. Yi ngakpokpo Bádha Ngali gba Ebhe-e ndjindji. Yi mbila 'ngú gba Ebhe-e ndjindji. Yi aha liyi libhomu ngú kulu gba Ebhe-o. Yi ne mukúnda naali li pabili gba ya. Ka 'ngú ango-o, yi mene ne kpéke me yi dú ne obhulú tia li kpadji na ngua bádha bhú 'bu bhomu-o.

<sup>8</sup> Engú inde ma apa e pi yi bhomu-o, a ko de me ma aha pi yi maka líli-e de. Ma apa mangbo pi yi, ngubula nasuno lele maka li oDadjua gba Ebhe koko amene lie-o. I dú me yi nde akpata lele maka u amene lie-e, yi súnó me mukúnda gba yi-e di kukulú. <sup>9</sup> Padhá de, anga yi mbila bádha bhú 'bu gba Ngámá gba ní Yesu Kilisito hana. Ngaani kpála inde adú bhulú tia, ani a'o lie bhulú ndibhili ngú nateteke yi. Ani amene mo-o ngú napa me, bhú ndibhili gba ni-e, yi kolo obhulú tia kala Ebhe.

<sup>10</sup> Ma ngaha pi yi mabhundja gba ma pindji napu 'he pi omabhuka inde bhú ndibhili-o. Bhú kalanga inde akodho 'kpi-e, yi adú nako okpála na kalanu ngú napu 'he. Yi dú bha bini kalanu bhú napu 'he de, yi adú di ne okpála na kalanu nabhundja 'ngú ango-o. <sup>11</sup> Kaka-a, mbia inde-e, yi ndjia kulu bhomu-o ndjindji. Yi 'o bua yi ngú nanu ne 'ngú ango-o ne kalanu akolo a li soso, ne mukúnda inde yi adú nani ne e ngú namemene, nakpata lele ehe inde ka yi-o.

<sup>12</sup> Padhá de, anga i dú me yi nde apu 'he pi Ebhe ne bua yi bini-e, Ebhe ngaziziba bha bini li lele bhende ka yi-o. A ko de me Ebhe

nga'o 'to e me yi pu pi ni ehe bhende ka yi ade-e de. <sup>13</sup> A ko de me ma akúnda na'o likabhu gba okpála koko pí 'ngbu yi ngú nato yi bhú ndibhili-e de. A ko mangbo me ndu yi hana yi dú ne 'he inde ati ne yi-o. <sup>14</sup> Mbía inde-e, ehe ka yi bhelé. Kaka-a, yi ti da nateteke okpála bhende bhú ndibhili-o. Ekpí koko-o, yi dú di bhú ndibhili me ehe nde ka uo bhelé-e, u ti da nateteke di yi. Li ndu yi hana tsia dú ne 'he inde ati ne yi-o. <sup>15</sup> A maka u aye lie bhú bhuku gba Ebhe-e me:

«Okpála anu ngú nalo mana.

Okpála bhende alo bhelé-e, u azu lie, ale ne uo.

Okpála bhende i lo bhelé de-e, u azu lie, ale bhadi ne uo.†»

*Polo atima Tito ne obi e nalo tia*

<sup>16</sup> A ayo me ní dhogé Ebhe inde a'o li bua Tito me ani nu teteke yi maka ya amemene lie-o. <sup>17</sup> Tito aziba engú inde ya ayo e ka ani-o. Ani ziba bha bini 'li ya de, engú bini, ani aziba ne bua e makpe me ni nu agba yi anga ani ne mukúnda pi yi. <sup>18</sup> Ya atima ani di bhú dabili bini ne ndai ní, inde li oDadjua gba Ebhe-e ngadhogé e kabula kulu inde ani ngamene e ngubula Bádha Ngali-o. <sup>19</sup> La matá di-e, oDadjua gba Ebhe abhu ani ngubula me ya anu ne uo bhú dabili bini ngú namene kulu na bádha bhú 'bu inde. A ko kulu inde a ayo me ní mene e ngú naha sangu pi Ngámá gba ní ngae makpe. Abhomu-o, i tsia súnó di pi okpála bádha bua gba ní-o. <sup>20</sup> Otia inde ya apo bhúla e-e bhelé. Kaka-a, ya ngalilila ndjindji ngubula me okpála apá 'ngú na sisiti li ya tété de. <sup>21</sup> Ya ngagili ne kpéke me ya mene engú inde babadha bhú djila Ngámá gba ní di ne bhú djila ndu okpála hana.

<sup>22</sup> Ya di ngatima suka ndai ní bini bhú dabili bini ne obhe bhisi bhomu. Ya ale ani bhutsibhutsi, ya atsia au me ani ngaha lie ndu 'kpí hana ngú kulu gba Ebhe-o. La mbia

† 8:15 8:15 Tsia bhú Eki. 16:18.

inde-e, ani matá ngaha lie ane mane anga ani ngambila ndjindji me yi ne kpákpá na bua ni. <sup>23</sup> La pi Tito-o, a ko kpála inde ya ngamene kulu ne e bhú dabili bini. Ya ngamene kulu ne ani bhú ká yi bhú dabili bini. Okpála bhe bhisi inde adhuku ne ani-e, okpála na oDadjua gba Ebhe-e atima uo ngao. U ngamene kulu ngú naha sangu pi Yesu Kilisito. <sup>24</sup> Kaka-a, yi suno mukunda gba yi-e pi uo ne bua bini. Li okpála na oDadjua gba Ebhe-e aú lie mo-o, bhobhomu-o suno pi uo me ya pa 'ngú gba yi-e bhú djila uo bhú eu de.

## 9

### *Ebhe ne mukunda naali pi okpála inde ngapu 'he ne djali-o*

<sup>1</sup> Tata ngú napa me ma ye 'ngú pi yi pindji kulu gba ní nateteke omabhuka inde bhú ndu doto na Yudaya ade. <sup>2</sup> Padhá de, anga ma mbila bádha bua yi nde ne e pi uo hana. Ma ngapa 'li ma tété de ondaise ní na Makedonia\* me, «ngayi ondaise ya na Akai, yi bedhe ngú nateteke omabhuka na Yudaya, nayie bha bini bhú kalanga inde akodho 'kpí-o.» Li okpála na Makedonia adje lie mo-o, okpála bhelé bhú ká uo asia di gumu nanu nateteke uo.

<sup>3</sup> La-a, ma ngatima ondaise ní bata agba yi ngú napa me yi po bhúla tia bhomu-o kalanu maka ma apa nako pi okpála koko lie me yi améne mamene-o. Abhomu-o, nedhinga ya akólo lie agba yi-e, engú ya apa e pindji yi pi uo-o, akóto eu de. <sup>4</sup> Ne ma ne okpála na Makedonia, li ya kolo agba yi, ya bhaka me yi nde nga bedhe ade-e, numu méne ya naali. Ma ambila la bhadi me numu bhe gba yi-e dú la matá bhe nane mane, anga ma apa pi uo me yi bedhe. <sup>5</sup> Kaka-a, ma au ndjindji me ma yo ka ondaise ní inde-e me, u nu pi ya agba yi kalanu ngú napa me u holo

napo bhúla tia inde yi apa nako me yi ahá e-o. Abhomu-o, tia bhomu-o adú bedhe ngú nadjeke nakolo ka ma-o. A tsia suno me yi ngahaha ne bádha bua, yi ha ne siti bua de.

<sup>6</sup> Yi mbila ndjindji me: kpála inde alu ezú bedi-e, ani asia bhadi bedi. Kpála inde alu ezú bhelé-e, asia bhadi bhelé! <sup>7</sup> Kaka-a, a ayo me kpála ne kpála ha maka ani abhundja lie-o. Ani apú ne bua na bhisi bhisi de, ani apú di de me anga u aholo ni tété ne kpéke-e de. Padhá de, anga Ebhe ne mukunda pi kpála inde ngapu 'he ne djali-o. <sup>8</sup> Yi mene mo-o, Ebhe ne angu ngú nabeledhe yi ne ndu bádha bhú 'bu hana, ngubula me yi du ndu 'kpí hana ne ndu 'he hana inde yi nde ne gumu e ngú mukobho gba yi-o. I du mo-o, yi du di ne 'he inde yi ti da na'o e li tula ndu obabadha kulu hana. <sup>9</sup> A maka u aye lie bhú Bhuku gba Ebhe-e li 'ngú gba kpála inde ngbingbili-e me:

«Kpála inde ngapu 'he pi obhulu ndibhili ne bua e bini-e, bádha 'ngú gba ani-e ngadu duduma ne duduma.†»

<sup>10</sup> Ebhe ngaha nguwa pi okpála ngú nalulu, di ne mapa ngú nazuzu. I nde lie mo-o, ani ahá ndu nguwa yi nde ne gumu e hana pi yi. Ani tsia méne di me a bhele ngubula me yi du napa 'he ne kalanu. <sup>11</sup> Ebhe améne me yi du ndu nedhinga hana ne obhulu tia ngubula me yi du napa 'he ndu 'kpí hana. Abhomu-o, li okpála bhelé gie heni pi Ebhe li ohe inde ya ahá e pi uo ne 'li yi-o. <sup>12</sup> Padhá de, anga ehe yi apú e téteke bha bini omabhuka inde bhú ndibhili-e de. A méne di me okpála bhelé gie heni pi Ebhe bhú mayo gba o-o. <sup>13</sup> U aú kulu yi ngamene e ne tata naali. Kaka-a, u agie heni pi Ebhe ngú nau me yi ngamanga Bádha Ngali gba Yesu Kilisito, di ne me yi ngagbo bhusu 'he gba yi-e ne

\* 9:2 9:2 ODadjua gba Ebhe na Makedonia: A ko obhende bhú Filipoí, Tesalonike ne Beloya-o.

† 9:9 9:9 Tsia bhú Ets. 112:9.

o, di ne okpála koko. <sup>14</sup> U asúno mukunda gba o-o pi yi bhú nayo Ebhe. U améne mo-o, anga bádha bhú 'bu gba Ebhe-e amene me yi bhulu 'kpa yi pi uo. <sup>15</sup> A ayo me ndu okpála hana dhogè Ebhe ngú bádha 'ngú gba e inde ane mane-o.

## 10

*Polo agie 'ngú pi okpála inde nga'o 'ngú pí ani-o*

<sup>1</sup> Ngama Polo-o, ma ngayo ka yi engú bini, ne 'li Yesu Kilisito kpála na bhuku 'ngú di ne bádha 'ngú-o. U ngapa li ma me ní du ne yi bhú dabili bini-e, ma ngakè lima ne kuto, i du la me ma nde tsutsu-o, ma ngagama okpekpeke 'ngú pi yi bhú obalua gba ma-o. <sup>2</sup> Engú inde ma ngayo e ka yi-e, ma ngayo ka yi me, yi atíma ma de me ma gama okpekpeke 'ngú pi yi nedhinga ma akólo lie agba yi-e de. Okpála koko bhú ká yi ngabhundja me ya ngamene 'ngú maka okpála na doto. La-a, pi okpála bhomu-o, ma asúno angu gba ma-a pi uo masuno.

<sup>3</sup> A na paká me ya ne okpála-kuti, engú bini, ya ngagu gbele maka okpála-kuti ade. <sup>4</sup> Bhú gbele ya ngagu e-e, otia 'gú ya ngagu gbele ne e-e, a ko obhende na píla doto inde-e de. A ko okpekpeke tia 'gú inde ayie ka Ebhe. Otia 'gú bhomu-o ne angu ngú nabhili okpála inde ngagu Ebhe-o. Ya ngani ne di 'bhè obhulu eu inde ngagbe kpekebhe-o. <sup>5</sup> Ya ngaha angu eu gba uo inde ngamene me u abhúka Ebhe de-o. Ya ngagili nadji mabhundja gba uo-o ngubula me u manga Yesu Kilisito. <sup>6</sup> Nedhinga yi apána lie me yi ngamanga ya maka a ayo lie-e, ya 'ó 'ngú pí ndu okpála koko hana inde i kunda namanga ya de-o.

<sup>7</sup> Yi tsia 'ngú maka inde lie-o. Li okpála koko bhú ká yi pa me o ne okpála ka Yesu Kilisito-o, a ayo me u mbila me ya di ne okpála ka Yesu Kilisito maka uo. <sup>8</sup> Angu li

Ngamá Yesu Kilisito aha e muma-a, a ngubula me ma teteke yi ne di. A ngubula nabhili yi ade. Nedhinga koko-o, ma ne gindaginda tété naali, ma dje numu tété de. <sup>9</sup> Ma kunda de me yi holo nabhundja me ma ngakunda nabu tsulu li yi, ne obalua gba ma, ma aye e pi yi-e de. <sup>10</sup> Padhá de, anga okpála bini bini ngapa me: «Li Polo ye balua pi ní-e, ani ngaye okpekpeke 'ngú, a ngandjia angu ní mandjia. Engú bini, ani kolo bhú ká ní ngae makpe-e, ani holo nagaku, ani lé nagama 'ngú pima.» <sup>11</sup> A ayo me okpála inde ngapa ngua 'ngú bhomu-o mbila me, engú inde ya ngaye e bhú obalua gba ya me ya nde de yi tsutsu-o, ya kolo gba yi-e, ya améne bha maka ya aye lie pi yi bhú obalua-o.

<sup>12</sup> Okpála bhomu-o ngau lio ne bhúlá naali. Ya pá de me ya viti ne uo bini-e de, ya kpó 'ndji ya ne uo de. A ko ongingi. U ngapima lio ngao makpe, u ngakpo 'ndji o li kute o makpe. <sup>13</sup> Li pápá gba ya-a, ya ti da napa 'li ya nane dada mane de. Nedhinga li Ebhe amba bhúla ya lie ne kulu agba yi-e, ani atsia akodho kozie tété. Ya apise bha ne kulu gba ya li kozie ango-o. <sup>14</sup> Ya gó nani ne Bádha Ngali gba Yesu Kilisito agba yi de-e, u de apá li ya me ya agulu kozie gba ya-a agulu. Engú bini, i nde la lie me ya nde ne okpála na kalanu ngú nanu ne Bádha Ngali pi yi-e, bhobhomu-o asuno me ya gulu nga kozie gba ya-a de.

<sup>15</sup> Kaka-a, ya pá 'li ya li kulu inde li okpála koko amene e de. Engú bini, ya ne gumu me nabhuka gba yi-e be ndu e, ngubula me kulu gba ya bhú ká yi-e be di ndu e. Ya abhundja me ya ne nga bili inde li Ebhe apa me ya pise lie de. <sup>16</sup> Pipita-a, ya ti da nasia kpadji ngú nanu ne Bádha Ngali-e bhú ondu doto koko. Ya kunda napa 'li ya li kulu li okpála koko amene e ngao li bili li Ebhe atima uo lie de.

<sup>17</sup> Padhá de, anga Bhuku gba Ebhe-e apa me: «Li kpála kunda

napa lie-e, a ayo me ani de pa bha bini li engú inde li Ebhe Ngámá amene e-o.†» 18 Padhá de, anga a ko de me Ebhe ngaziba okpála inde ngapa 'li o ngao makpe-e de. Engú bini, ani ngaziba obhende anga li ani-o.

## 11

*Polo akpo 'ndji e ne okpála inde ngabhi 'kpa o pí mbulu o me o ne obhulu titima-o*

1 Yi ti da nadu ne 'ndjá bua muma uu, ngubula me ma gama mbo 'ngú maka bhulu pele! A moko, yi du ne 'ndjá bua muma. 2 Padhá de, anga ma ne botolo ngú yi ndu nedhinga hana, maka li Ebhe nde di lie ne botolo ngú yi-o. Ma ngatsia 'kpí li yi ndjindji ngubula me yi du bubu ngú kava. Bhoko na kava angoo, a ko Yesu Kilisito . 3 Yi bhundja me kpulu apite nani Eva, ani atsia ayie li bádha kpadji. Kaka-a, ma ngakpe me kpála bini agó apíte yi de ngubula me mukunda gba yi pi Yesu Kilisito ndjia.

4 Ma ngapa mo-o, anga li kpála bini go agba yi-e, yi bedhe ngú nabhuka ani má gala! Engú la li kpála angoo ngakpo e li 'ngú gba Yesu, ne li 'ngú gba Bu Bhobua , la di ne li 'ngú na Bádha Ngali-e kpi ne bhende ya asuno e pi yi-o. 5 Yi ngabhundja me okpála bhomu-o ne ongbengbe obhulu titima. La ngama-a, ma bhundja de me u ane ma-a de. 6 A na paká me pi yi-e, ma mbila nagama 'ngú bhú ká okpála ndjindji de. Engú bini, li pápá nambila Ebhe-e, ma mbila ani ndjindji. Ya asuno engú angoo pi yi mbánbá bhutsibhutsi bhú ndu 'ngú hana inde ya amene e-o.

7 Nedhinga ma akpokpo Bádha Ngali gba Ebhe lie pi yi-e, ma dha bhú yi de. Ma aké lima ne kuto ngubula me yi 'u ne bhúlá. Bhobhomu-o apa me ma amene sisiti?

A mo-o ade. 8 Ma adu lie oo-o, ma aziba me oDadjua koko bi mukobho gba ma ngao. Ma abha otia na oDadjua angoo ngú nateteke yi nedi! 9 Oo-o, ma dha bhú kpála bini bhú ká yi de, li ma adu lie ne gumu tia-o. Engú bini, omabhuka na Makedonia ago muma ne ehe inde ma adu ne gumu e ngao. Ma alila lima bhú ndu 'ngú hana me ma adu pi yi maka tili kili de. Ma ayó la di galikpe ehe li yi de.

10 Ne 'li Yesu Kilisito inde bhú ma-a, ma ngapa pi yi kukulu 'ngú: ma ne gindaginda naali anga ma nde ha 'he ka yi de. Bhú ndu doto gba yi na Akai libhomu-o, kpála bini ti da nayoko ma de me ma adu ne gindaginda tété de-e de. 11 Ma kunda nadu tili kili pi yi de ka ni? A ko anga ma ne mukunda pi yi adi? Ebhe apa bhobhomu-o li ma ngae! 12 Ma adu bha maka ma nde lie inde. Ma ziba tia ka yi de, ngubula me okpála bhe i ngabhi 'kpa o pí mbulu o me o ne obhulu titima au kpadji ngú napa 'li o de me o bhadi ngamene kulu maka ya-a de. 13 Okpála angoo, ngapite okpála. U ngamene 'he mugito me a ko obhulu titima gba Yesu Kilisito. 14 Engú angoo ahá nangamba pi ní de, anga Satana ngae makpe ti bhadi da namene 'he mugito me a ko andjelu na zi 'kpí. 15 Kaka-a, li okpála na kulu gba ani-e mene 'he lio mugito me a ko kukulu okpála na kulu gba Ebhe inde ngbingbili-e, ní angamba tété de. Engú bini, li sokpi-e, u asia galikpe engú inde ati ne kulu inde u amene e-o.

*Polo apa 'li e li olikabhu ani azu e-o*

16 Ma matá ngapapa ne toto, kpála bini apa li ma de me ma ne bhulu pele-e de. I du me okpála nde abhundja me ma ne bhulu pele-e, yi de ziba me ma ne bhulu pele ngú napa me ngama di-e ma pa mbo 'li ma bedi. 17 Engú ma adjí apa inde-e, a ko de me ma adjí napapa maka li

† 10:17 10:17 Tsia bhú Djlm. 9:23; di ne bhú 1 Kol. 1:31.

Ngámá akunda lie de. Ma adji napa maka li bhulu pele agagama 'ngú lie-o. <sup>18</sup> Maka li okpála bhelé ngapa 'li o lie li ongu na doto-o, ngama di-e ma apá bhadi 'li ma tété moko. <sup>19</sup> Ngayi okpála na imbilangú-o, yi dje obhulu pele ngagama 'ngú-o, yi ngadje uo ne 'ndjá bua! <sup>20</sup> Yi ngakibila me okpála bhomu-o mene yi mugito me yi ne obalise. Yi ngakibila me u zi ohe gba yi-o. Yi ngakibila me u pite yi. Yi ngakibila me u u yi padhá. Yi ngakibila me u sù bhúla yi. <sup>21</sup> Yi mbu li ya, anga ya adu nani bhubhuku ngú namene mo-o! Ma ne numu naali ngú napapa!

Mbia inde-e, ma adji agáma 'ngú maka bhulu pele. Engú inde li okpála koko ngapa 'li o lie, ma apá nga bhadi 'li ma tété. <sup>22</sup> U ngapa me o ne omaYuda, ma di ne maYuda. U ngapa me o ne omaſalaele, ma di ne maſalaele. U ngapa me o ne odi Abalahama, ma di ne ye Abalahama. <sup>23</sup> U ngapa me o ne okpála na kulu gba Yesu Kilisito. Mbia inde-e, ma agama 'ngú maka bhulu pele. Ma belegu ngamemene ane uo mane. Ma mene kulu ango-o ne ndala de. Ma ali bhú tikpu ane uo mane. Ma azu bhikpa ane uo mane. Ma akolo masikpe de nakpi bhutsibhutsi bhelé.

<sup>24</sup> Ma adu azu fimbo ndjikpa bata ne ká odukpabini, bhutsibhutsi bhuluvue sakpa ongámási gba omaYuda-o. <sup>25</sup> Ongámási gba okpála na Loma abhi ma ne fimbo bhutsibhutsi bata. Okpála atutulu ma ne teme bhutsibhutsi bini ngú nabhele ma. 'Ngbé zabu alinda ne ma bhú 'ngu bhutsibhutsi bata. Ekpi bini, ma alipila bhú 'ngu, ma asi di bhúbhú.

<sup>26</sup> Bhú odhuku ma adu adhuku e naali-e, ma adu ne tsulu ka nasi ka engu. Ma adu ne tsulu ka obhulu nagbulu 'he gba okpála ne kpeke. Ma adu ne tsulu ka ondaise ma omaYuda, la di ka obhende ne

omaYuda ade-o. Ma adu ne tsulu bhú gudhu, di ne bhú omili bili. Ma adu ne tsulu pi 'ngbé 'ngu. Ma adu ne tsulu ka okpála inde ngapa me o ne omakilisito, a nde la mo-o ade-o. <sup>27</sup> Ma amene kulu kpekpeke. Ma asi ndi 'la bhutsibhutsi. Ma adje gamu bhú dabili bini ne gamu 'ngu. Bhutsibhutsi bhelé, ma sia kpadji nazu 'he de. Bongo du ka ma bhelé de, ma atsia adu adje zini. <sup>28</sup> Olikabhu ma azu e bhelé, ma ti da nakpokpokpo hana de. Engú bini, engú inde li bua ma ngalu pi e, a ko nabhundja oDadjua gba Ebhe-endu 'kpi hana. <sup>29</sup> Li kpála bini du bhubhuku li kpadji gba Yesu-o, a ngamene ma sisiti mugito me a ko ma. Li kpála bini ti bhú siti 'ngú-o, a ngamene bua ma sisiti naali.

<sup>30</sup> I du me a nde a ayo me ma pa 'li ma-a, ma apá bha bini li ongu inde ngasuno me ma bhubhuku-o. <sup>31</sup> A ayo me okpála dhogo Ebhe inde 'Dyi Ngámá Yesu-o duduma ne duduma. Ani mbila hana me engú inde ma adji apa e pi yi inde-e, a ko eu de. <sup>32</sup> Yi tsia nga engú inde ngasuno me ma bhubhuku-o. Ekpi bini, nedhinga ma adu lie bhú gudhu na Damasi-e, ngámá na kuti bhomu-o, adu 'li ani me Alitasi. A adu ka ani ne guvelenele bini inde adu atsia 'kpi li gudhu bhomu-o. Ani a'o nani okpála gba e li okpadji nali bhú gudhu bhomu-o ngú napa me u u ma-a, u de holo ma. <sup>33</sup> Engú bini, okpála gba Ebhe-e ato ma bhú baga, u agbite ekpu tété, u atsia ako ma ne di li malilisa na aga asa kuti libhому-o. Ma atsia akobho sakpa ani.†

## 12

*Polo apa 'li e pindji angu inde li Ebhe ngaha e pi ani bhú bhuku gba e-o*

<sup>1</sup> A ayo me ma pa matá 'li ma ne kalanu, abana li tata nde lie tété ade-o. Kaka-a, ma adji ngama 'ngú

† 11:33 11:32-33 Tsia bhú Kul. 9:23-25.

pindji onǵú li Ngámá Yesu asuno e muma, ani atsia ambamba di ta e muma-o. <sup>2</sup> Ma ambila kpála bini\* inde agbite lie li Yesu Kilisito . A ane nga kalanga ndjikpa ne ká badha, Ebhe a'e kpála bhomu-o abhúlá agba e, ani atsia agie ani kuto ei. Ma mbila de ne me ani aloto nani maloto, ne me Ebhe a'e ani abhúlá na paká. Ebhe ambila bha ngae, ma mbila naama de. <sup>3</sup> Ma apá matá ne toto, ne me ani aloto maloto, ne me Ebhe a'e ani abhúlá na paká. Ma mbila de, Ebhe ambila bha ngae.

<sup>4</sup> Ebhe a'e kpála bhomu-o abhú kuti na mundayi . Oo, ani atsia adje onǵú inde li kpála-kuti ti da nakpokpo kú e de. <sup>5</sup> Ma ti da napa 'li ma li 'ngú akolo li kpála bhomu-o. Engú bini, pindji onǵú bhe atsia ma makpe-e, ma ti da napa 'li ma bha bini li engú inde ngasuno me engú bhú ma ade. <sup>6</sup> La-a, i dú me ma kúnda napa 'li ma u-o, ma de dú ne bhulu pele de. Padhá de, anga ma de apá kukulu 'ngú. Engú bini, ma kúnda napa 'li ma de, anga ma kúnda de me okpála u ma mugito me ma ne 'ngbé kpála-a de. Ma akúnda mangbo me okpála manga ma ka onǵú inde u ngadje ma me ma ngapa e ko.

<sup>7</sup> A ayo nako me 'ndji ma be naali ka onǵú na ngangamba inde li Ebhe ambamba ta e muma-o. La-a, ngú napa me 'ndji ma abé naali de-e, Ebhe a'o ehe bini na ke make li kute ma. Ehe ang-o maka bhulu titima gba Satana . A ngabhi ma, a di ngayoko ma me ma abédhe ne 'ngbé 'ndji bedhe de. <sup>8</sup> Ma ayo ka Ngámá bhutsibhutsi bata me ani gbegbe ma bhú likabhu bhomu-o. <sup>9</sup> Ani agie muma me: «Ma ngaha bádha bhú 'bu gba ma-a pi mu ngubula me a teteke mu ngú nakibila likabhu bhomu-o. Padhá de, anga nedhinga li kpála nde lie bhubhuku-o, a bhomu-o nedhinga inde li angu gba ma-a ngamene kulu

lie bhú kpála bhomu libhomu-o.» I nde lie mo-o, ma akúnda mangbo me ma pa 'li ma li onǵú inde ngasuno me ma bhubhuku-o, ngubula me angu gba Yesu Kilisito mene kulu bhú ma.

<sup>10</sup> Kaka-a, ma tété ne djali li nedhinga ma nde lie bhubhuku-o. Abana li okpála sobho ma, abana ma zu likabhu, abana u to mbolo li ma, abana ma kibila olikabhu bhomu-o hana kabula 'li Yesu Kilisito-o, ma tété ne djali, anga nedhinga li angu nde lie bhú ma ade-e, a bhomu-o nedhinga ma nde lie kpekpeke-o.

*Polo alopola lie li 'ngú gba omabhuka na gúdhú na Kolito*

<sup>11</sup> Ma agama 'ngú bhomu-o mugito me ma ne bhulu pele. La-a, yi akata ma tété ngayi. A ayo me yi kpo 'ngú gba ma-a ngayi. Padhá de, anga abana ma du ne kpála na padhá-a, me obhende yi nga'i o me a ko ongbengbe obhulu titima bhomu-o, u ne ma ne 'ngbé de. <sup>12</sup> Okulu inde-e ngasuno me ma ne bhulu titima , ma amene bhú ká yi ne 'ndjá bua. Onǵú ang-o, a ko ongamba 'ngú inde li Ebhe amene e-o. <sup>13</sup> Onǵú bhende ma amene e pi obi yi omabhuka na Dadjua koko me ma nde mene agba yi de-e ngae dho? Belegu de bini! Ehe inde ma mene e agba yi de-e, a ko bha bini ma dha lie bhú yi de-o. Yi suno bádha bhú 'bu muma li siti 'ngú ma amene e li yi bhomu-o!

<sup>14</sup> Mbia inde-e, ma ngakúnda nanu agba yi bhutsibhutsi na bata. Abana ma nu agba yi bhú dhuku inde-e, ma dhá bhú yi de. Ma ngakpata mangbo yi, ma kpata tia gba yi-e de. Yi mbila ndjindji me a ayo de me ongisi po tia pi okpála azu o de. A ayo mangbo me odyi ongisi, ne ohi ongisi po tia pi ongisi gba o-o. <sup>15</sup> Li pápá gba ma-a, abana ma pu ndu 'he inde ka ma-a hana ngubula yi, abana ma pu mukobho gba ma-a ngubula yi-e,

\* 12:2 12:2 Ngú nambila kpála inde li Polo ngakpo 'ngú gba e si-e, tsia lukuluku 7.



ma dú bha tété bhú djali. Ma suno mukunda pi yi naali mo-o, yi tsia súno mukunda muma bedi?

<sup>16</sup> Ndu yi hana yi mbila ndjindji me ma dha nako bhú kpála bini bhú ká yi de. Engú bini, okpála koko bhú ká yi ngapa me: «Polo ne bhulu kali! Ani abha tia gba ní-e bhú nyali.»  
<sup>17</sup> Ma apite yi lele pi? Ma azi yi li kpadji gba suka okpála ma atima o agba yi-e? <sup>18</sup> Ma ayo ka Tito ne kekele me ani nu agba yi. Ma atima di bhú dabili bini ne ani ndai ní inde yi mbila e ndjindji-o. Tito akolo lie agba yi-e, ani aha 'he li yi bhú kali? A mo-o ade! Ehe inde li Tito amene e ne bhende ma amene e-e, aviti bha bini, bua ya ne ani bhú dabili bini.

<sup>19</sup> Nedhinga koko, nayie nani bhutode yi ngabhundja me ya ngagili nabubuku nganda ya bhú djila yi. A mo-o ade! Ya mangbo ngakpokpo 'ngú inde-e kala Ebhe maka li Yesu Kilisito akunda lie-o. Ondaise ya, ya apa ndu ongu bhomu-o hana pi yi, anga ya akunda nateteke yi me yi bhele li kpadji gba Yesu Kilisito-o. <sup>20</sup> Ma ngakpe me nedhinga koko, li ma akolo lie agba yi-e, ma bhaka me yi ngakobho maka ma akunda lie de. Ma ngakpe di me lele dasundu gba ma-a ngá li yi de. Ma ngakpe me nedhinga ma akolo lie agba yi-e, yi du nagbe bhayiki sunda yi, yi du nadge gumu 'he liyi sunda yi, yi du nake 'ngú liyi sisiti, yi du nagbo bhusu yi, yi du nasobho li yi sunda yi, yi du napadha liyi sunda yi, yi du nadge kute yi, yi tsia du la di namene engú ngangá.

<sup>21</sup> Ma ngakpe me nedhinga ma agó lie agba yi bhe na sidi-e, Ebhe gba ní-e ha numu muma bhú djila yi. Ma ngakpe me ma ku 'gbá ka okpála bhelé inde ngamene siti 'ngú ne kalanu maka nako u adu namemene lie kalanu-o. Okpála ango-o, u dji nga bua o ne toto li namene siti 'ngú de, u ngakunda olisi, i du di-e obhosi

ngangá, u ngamene ndu sisiti 'ngú hana.

## 13

*Polo agbele 'dje omabhuka na gudhu na Kolito ne toto*

<sup>1</sup> A inde-e bhutsibhutsi na bata me ma go agba yi. A maka u aye lie bhú Bhuku gba Ebhe-e me: «Li kpála pa 'ngú li kilí e, a ayo mbo me okpála bhisi, i du di-e okpála bata de lu pí 'ngú ango-o. I du mo-o de, u kódho 'ngú tété de.†» <sup>2</sup> Nako ma ago lie agba yi bhutsibhutsi na bhisi-e, ma agbele 'dje okpála inde adu namene siti 'ngú-o bhú dabili bini ne okpála koko hana. Mbia inde-e, ma nde lie tsutsu-o, ma matá ngagbele 'dje uo ne toto me nedhinga ma agó matá lie agba yi-e, ma djé ndjinga kpála bini bhú ká uo de.

<sup>3</sup> Yi ngagili me yi u ehe inde ngasuno me Yesu Kilisito ngagama 'ngú bhú ma ngae-o. Ma asuno pi yi masuno. Yesu Kilisito bhú ká yi bhubhuku ade. Engú bini, ani ngasuno angu gba e bhú ká yi. <sup>4</sup> A na paká me nedhinga u abhi ani ne nyeli lie li kulusi-e, angu du bhú ani de. Engú bini, mbia inde-e, ani bhú mukobho ka angu gba Ebhe. Maka ya akpetse liya lie ne ani-e, ngaya di-e, ya bhubhuku maka ani adu nani lie-o. Engú bini, ya akpetse liya lie ne ani bhú mukobho gba e-e, lele nalili okpála ka ya bhú ka yi adú bhadi ne angu gba ani-o.

<sup>5</sup> Yi tsia bua yi ngayi makpe ngú nambila me yi ngakobho maka omabhuka na paká. Yi mbila ndjindji me Yesu Kilisito bhú ka yi. A mo-o adi? I du mo-o de-e, u ú ehe inde ngasuno me yi abhuka de. La-a, a ko likabhu i du me ani nde bhú yi ade-o. <sup>6</sup> Engú bini, ma abhundja me yi mbila ndjindji me, pi ya-a, okpála ti da nau ehe inde asuno me ya ne kukulu obhulu titima gba Yesu Kilisito.

† 13:1 13:1 Tsia bhú Det. 19:15; ne bhú Mat. 18:16; ne bhú 1 Tim. 5:19; ne bhú Ebe. 10:28; di ne bhú 2 Kol. 12:14.

<sup>7</sup> Ya ngayo Ebhe me yi améne siti 'ngú bini de ne nayala me ya li yi. A ko de me ya ngakunda bhomu-o nasuno me angu ya akolo de. Engú bini, ya ngakunda mangbo me ya du nau yi namene bádha 'ngú, abana i du me a nde ngau lie me angu ya kolo de-o. <sup>8</sup> Padhá de, anga ya ti da nagu yi de, i du me yi nde ngakpata nasuno na kúkulu gba Ebhe-o. I du me yi nde amene mo-o, a ayo mangbo me ya teteke yi ngú nanu ne kalanu. <sup>9</sup> Ya ngakpi djali ndu 'kpí hana nedhinga li ngay-a, ya nde lie mandi angu, me a nde la bhú yi ne angu-o. Kaka-a, ya ngayo di bhú omayo gba ya-a me yi kolo ngbingbili ne ndu kpadji hana. <sup>10</sup> Ka 'ngú ang-o, ma ngaye ndu 'ngú bhomu-o hana pi yi nedhinga ma nde lie bhú ká yi ade-o. A ko ngubula me nedhinga ma akólo lie bhú ká yi-e, ma améne yi kpekpeke de ne angu li Ngámá Yesu aha e muma-o. Angu ang-o ngateteke yi me Dadjua gba yi-e be ndu e ne kalanu, a ngubula nabhøbhøle mabhøle ade.

<sup>11</sup> Ngú nabu tata-a, ondaise ma, yi bedhe ne djali bedhe. Yi mene kulu ngú napa me yi du ngbingbili ne ndu kpadji hana, yi to masi bhú yi sunda yi, yi du bhú nadjé liyi sunda yi, yi du ne guo 'ngú sunda yi. Yi mene mo-o, Ebhe inde ne Ebhe na mukunda di ne guo 'ngú-o tsia dú ne yi bhú dabili bini. <sup>12</sup> Yi yi liyi sunda yi ne nakama liyi maka ondaise. Ndu ondaise ní inde ei-e hana apa me o yi yi ma yi. <sup>13</sup> A ayo me bádha bhú 'bu gba Ngámá Yesu Kilisito, ne mukunda gba Ebhe, la di ne nakpetse lio gba Bu Bhobua-a du bhú dabili bini ne ndu yi hana.

**Balua gba Polo  
pi omabhuka na gudhu  
na  
Galate  
Eli na kalanu**

Li okpála inde ne omaYuda ade aholo aziba Bádha Ngali lie-e, abhomu-o, u atsia ayi ngú nambila me: ngú nakolo makilisito na kukulú-o, a ayo bha me kpála mene líli gba Moidje-e? Polo atsia apa me a mo-o ade. Padhá de, anga engú na ngbéngbé inde bhú mukobho gba makilisito, a ko nabhuka inde li ndu okpála hana akolo ngbingbili kala Ebhe ka e-o. La-a, okpála koko adu agu Polo, u atsia adu apa me, a ayo me u mene di líli gba Moidje ngubula me u kolo ngbingbili kala Ebhe. Balua inde li Polo aye e pi okpála na Galate-e, ani aye nani ngubula me okpála inde ambu li kpadji ka omusuno na eu bhomu-o, u sia nabhuka na kukulú, amba u kolo la di li bádha kpadji. Polo aholo nakpokpo lele maka a ayo lie me u 'i ani me bhulu titima gba YesuKilisito. Ani atsia agama 'ngú pindji ngú napa me e'i ango-o ngú napa me ni kolo bhulu titima gba Yesu-o, ayie ka Ebhe, ayie ka angu gba kpála na doto belegu de bini. Ani atsia apa me kulu gba ni-e atsia naali okpála inde ne omaYuda ade-o. Bhú oalo na soso-o, Polo ngasuno me nabhuka bhú Kilisito ngaha mukunda, mukunda ngaha la di nadholo ndjindji bhú mukobho gba makilisito.

**Ongbengbe ongú inde bhú bhuku inde-e ngae inde:**

Eli na kalanu 1:1-10

Angu gba Polo maka bhulu titima gba Yesu 1:11 - 2:21

Bádha Ngali na bádha bhú 'bu gba Ebhe 3:1 - 4:31

Nadu bhú ngu e gba makilisito a la di-e kulu gba ani 5:1 - 6:10

Eli na soso 6:11-18

*Polo yi omabhuka na ndu doto na Galatia mayi*

<sup>1</sup> Ma aye balua inde-e ngama Polo, ma ne bhulu titima gba YesuKilisito. Ma ne bhulu titima gba kpála koko ade. Yesu Kilisito atima ma ngae, a la di-e 'Dyi ani inde azuku ani bhú ká okpála inde amu-o. <sup>2</sup> Ngama bhú dabilí bini ne ndu ondaise ní hana inde ei-e, ya aye balua inde-e pi omabhuka na oDadjua gba Ebhe inde bhú ndu doto na Galatia. <sup>3</sup> A ayo me 'Dyi ní Ebhe bhú dabilí bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú pi yi. <sup>4</sup> Yesu Kilisito andala 'kpa lie ngae makpe, ngubula nagbegbe ní bhú siti 'ngú gba ní, amba osisiti 'ngú na doto améne matá ehe bini ngú ní de. Ani amene mo-o nakpata lele maka li Ebhe 'Dyi ní akunda lie-o. <sup>5</sup> A ayo me okpála dhogò Ebhe duduma ne duduma. A adu moko!

*Koli Bádha Ngali gba Yesu Kilisito-o bha bini*

<sup>6</sup> Ma ngangamba ka yi naali! Ebhe abhu yi me yi du ne okpála gba ni-e li kpadji gba Yesu Kilisito, ani atsia asuno bádha bhú 'bu gba e pi yi. La-a, belegu mo-o, yi akolo adji 'ngbu yi li ani má gala, yi atsia aholo nadge Bádha Ngali koko. <sup>7</sup> A la na paká me Bádha Ngali koko matá ade. Engú bini, okpála koko ngangbingi 'ndji yi. U ngakunda nasiti Bádha Ngali gba Kilisito-o. <sup>8</sup> I du me kpála koko, i du di-e ya, i du di-e saka andjelu bini ayie abhú lá nde akpokpo Bádha Ngali koko kpí ne bhende ya akpokpo e pi yi-e, Ebhe de tu pedje li ani. <sup>9</sup> Ya apa, ma la matá mbia inde-e ngapapa me, i du me kpála koko nde akpokpo Bádha Ngali kpí ne bhende yi asia e-e, Ebhe de tu pedje li ani.

<sup>10</sup> La-a, yi abhundja naayi me ma ngagili me okpála ziba ma? A mo-o ade, ma akunda mangbo me Ebhe ziba ma ngae. Yi abhundja naayi me ma akunda nanga li okpála? A mo-o

ade. I dú me ma kúnda matá nanga li okpála-a, ma de ne bali gba Kilisito ade.

*Polo akpokpo lele maka ani akolo lie bhulú titima gba Kilisito-o*

11 Ondaise ma, ma akúnda me yi mbíla me Bádha Ngali inde ma ngakpokpo e, yie ka kpála-kúti de. 12 Ma sia ka kpála-kúti de, kpála bini suno la di múma ngae de. Engú bini, Yesu Kilisito ambamba ta 'ngú inde awo lie mawo-o múma ngae. 13 Yi mbíla lele nadholo gba ma nani na kalanu-o, nedhinga ma adu nakpata dasundú na Ebhe gba omaYuda lie hana. Li nedhinga bhomu-o, ma adu nato mbolo li omabhuka na Dadjua gba Ebhe-e nane dada mane. Ma adu nakúnda nabhèbhèle mabhèle. 14 Ma ane nani omaYuda bhelé, inde adu ne kalanga maka ma bhú lele nakpata dasundú gba omaYuda-o. Ma aha nani lima libhomu ngabula dasundú gba onguo ogbi ní-o.

15-16 Belegu inde lie mo-o, Ebhe abhu nani ma. Ani abhu nani ma me ma nde ngabha bhú 'bu 'hi ma. Ani asuno nani bádha bhú 'bu gba e múma, ani atsia a'i ma me ma mene kulu gba ni-o. Li nedhinga ani a'o nani e akolo lie, ani atsia amene me ma mbíla Ndili gba ni-e, ngabula me ma kpokpo Bádha Ngali gba ani-e pi okpála inde ne omaYuda ade-o. Li nedhinga bhomu-o, ma nu bhaka kpála bini de. 17 Ma nu la di bhú Yelusalema ngú nabhaka okpála inde adu nani obhulú titima gba Yesu Kilisito múma kalanu-o de. Engú bini, ma anu bha kolo má gala bhú Alabia, pipita-a, ma agie lima bhú Damasi. 18 Pita kalanga bata-a, ma atsia anu bhú Yelusalema ngabula me ya u li ya ne Piele\* bhutsibhutsi na bini. Ma adu agba ani ngabula 'kpí ndjikpa ne ká bhuluvue. 19 Ma u bhulú titima koko bini de, ma au bha bini Djaki, ndai

Ngámá. 20 Engú inde ma aye e inde-e, a ko kukulú 'ngú, kala Ebhe-e, ma apa eu de.

21 Pipita-a, ma atsia anu bhú ndu doto na Silia di ne ndu doto na Silisia. 22 Omabhuka na oDadjua gba Kilisito na ndu doto na Yudaya u nga nani ma ne djila o de. 23 U adu bha nadje ongu inde li okpála koko adu napa e li 'ngú gba ma-o. U adu napa me: «Kpála inde adu nako nato mbolo li ya kalanu-o ayipa, ani ibili mbia inde-e ngakpokpo pi okpála Bádha Ngali inde ani adu nako nakúnda nabhèle e-o.» 24 Abhomu-o, u atsia adu nadhègè Ebhe kabula ma.

## 2

*Polo agama 'ngú ne obhelesi okpála bhú gudhu na Yelusalema*

1 Pita kalanga ndjikpa ne ká badha-a, ngaya ne Balanabasi, ya anu matá bhú gudhu na Yelusalema. Ma atsia aha di Tito bhú dabili bini ne ma. 2 Ma anu maka li Ebhe asuno múma lie mbámábá me ma nu-o. Ma akolo lie, ngama bhú dabili ne obhelesi okpála-a, ya apokèbhè bhúla ya li ngongo. Abhomu-o, ma atsia akpokpo kú Bádha Ngali inde ma ngakpokpo e-e pi omupagano-o pi uo. Ma du nakúnda de me kulu inde ma amene e ne bhe ma nde ngamane e-e du padhá-a de.

3 Tito ya adu ne e adu Giliki. La-a, u pa pi ani de me ani li gandja-a de. 4 Engú bini, omabhuka na eu ali bhú ká ya, u atsia adu napa me, a ayo me ani li gandja. Okpála ango-o ali bhú pepe ngú natsia lele maka ya nde lie matá sa líli ade-o, anga ya akpøtsø liya ne Yesu Kilisito . U ngakúnda me ya kolo matá obalise na líli gba Moidje-o . 5 Ya 'o belegu nedhinga pi uo bedi de ngabula me ya lila kukulú 'ngú na Bádha Ngali-e pi yi malila.

6 Engú bini, obhende li okpála ngau o bhú djila o maka ongámási

\* 1:18 1:18 Bhú eli na giliki-e, Sefasi-e: A ko 'ili koko gba Piele.

na Piga gba Ebhe-e, muma-a, a ko 'ngbé 'ngú naali de. Padhá de, anga Ebhe tsia bhúla kpála de. Ongbengbe okpála bhomu-o, nedhinga ma akpokpo Bádha Ngali inde ma ngakpokpo e pi okpála lie pi uo-o, u 'o 'ngú koko pépé de. <sup>7</sup> Engú bini, u au me Ebhe a'o mangbo kulu na nakpokpo Bádha Ngali-e pi okpála inde ne omaYuda ade-e pí madhaka ma, maka ani a'o nani bhende nakpokpo Bádha Ngali pi omaYuda lie pí madhaka Piele-o. <sup>8</sup> Padhá de, anga u atsia ambila me a ko bha koli Ebhe bini inde nani aha angu pi Piele, atsia atima ani agba omaYuda-o. Ebhe ango-o aha di angu muma, ani atsia atima di ma agba okpála inde naao ne omaYuda ade-o.

<sup>9</sup> Djaki ne Piele di ne Djaa inde li okpála adu nau o maka onepanda-a, ambila me Ebhe asuno bádha bhú 'bu ango-o muma na paká. Abhomu-o, u atsia aholo 'kpa ya ne Balanabasi. Bhobhomu-o asuno me ya akpètse liya ne uo bhú dabili bini. Ya atsia adje liya ne uo ndu ya hana me, ngaya-a, ya anu naaya namene kulu agba okpála inde naao ne omaYuda ade-o. La ngauo-o, u anu naao namene kulu agba omaYuda. <sup>10</sup> U apa bha pi ya koli engú bini. U apa pi ya me ya teteke obhulu ndibhili inde bhú ká omabhuka inde abhú Yelusalema-o. A la bhadi bhomu-o engú inde ma amene e ne bua ma bini-o.

*Polo ambe bhú 'ndji Piele bhú Atiokia kala okpála*

<sup>11</sup> Li Piele† ago bhú Atiokia lie, ma ambe bhú 'ndji ani kala okpála. Padhá de, anga ani amene pulu 'ngú. <sup>12</sup> Kala me okpála li Djaki atima o kolo-o, Piele adu nazu 'he ne okpála inde ne omaYuda ade-e bhú dabili bini. Li okpála ango-o akolo lie, Piele agbe lie bhú ká uo, ani zu matá 'he ne okpála bhende ne omaYuda ade-e de. Padhá de, anga

ani adu nakpe okpála inde adu akpata líli nali gandja-a makpe. <sup>13</sup> Ndu omaYuda koko hana adu di namene maka Piele. Abhomu-o ngaani Balanabasi, ani amene bhadi engú na kali maka uo. <sup>14</sup> Li ma u lie me u dhuku li kpadji na ngbingbili, na kukulu Bádha Ngali-e de-e, ma atsia apa pi Piele me: «Mu ne maYuda, mo omene la 'ngú maka kpála inde ne maYuda ade. † nde lie mo-o, lele pi mu ngagbite okpála bhende ne omaYuda ade-e lie ne kpéke me u du namene e lio maka omaYuda?»

*A ayo nabhuka Kilisito ngubula nasia mukobho*

<sup>15</sup> Ngani-e, ní azu liní omaYuda, ní ne okpála na kuti koko ade, inde i mbila líli gba Ebhe-e de-o. <sup>16</sup> Ní mbila ndjindji me kpála inde ngbingbili bhú djila Ebhe-e, a ko kpála bhende abhuka Yesu Kilisito, a ko bhende ngamene líli gba Moidje-e de. Ngani di-e, ní abhuka Yesu Kilisito ngubula me ní kolo ngbingbili kala Ebhe ka nabhuka gba ní bhú Yesu Kilisito-o. A ko ka de me ní ngamene líli gba Moidje-e de. Padhá de, anga kpála bini ti da nakolo ngbingbili kabula namene líli de.

<sup>17</sup> Engú bini ngani-e, ní ngagili nadu ngbingbili kala Ebhe, anga ní abhuka Yesu Kilisito. Ní ngamene lie mo-o, ní maka okpála na sisiti. Bhobhomu-o akunda napa me Kilisito ngato ní bhú siti? A mo-o ade!

<sup>18</sup> † du me ma nde akoto sa líli-e, pipita-a, ma gie matá lima sasa-a, ma akolo matá bhomu-o ngama makpe kpála inde i manga líli-e de.

<sup>19</sup> Li bhende atsia líli-e, ma akpi kuo inde ayie ka líli makpe ngubula me ma du bhú mukobho pi Ebhe. U agi nani ya bhú dabili bini ne Kilisito li kulusi. <sup>20</sup> Kaka-a, mukobho inde ma nde bhú e-e, a ko matá ma de, Kilisito ngakobho bhú ma ngae. Padhá de, anga mukobho ma nde ne e bhú kute inde-e, ma bhúbhú anga ma abhuka Ndili gba Ebhe inde

† 2:11 2:11 Tsia bhú Gal. 1:18, 2:9, 14.

akunda ma, ani atsia andala di kpa li mukobho gba e muma. <sup>21</sup> Ma yala badha bhú 'bu gba Ebhe-e de. I du me kpála nde ngbingbili kala Ebhe anga ani ngamene líli-e, bhobhomu-o akunda napa me tata li nakpi gba Kilisito-o ade.

### 3

#### *Ebhe ngakobho okpála li pápá na nabhuka*

<sup>1</sup> Ngayi okpála na Galatia, yi ne ongingi! Apite yi da? U akpokpo pi yi mbámhá lele maka li Yesu Kilisito akpi lie li kulusi-o. <sup>2</sup> Ma ngayi yi li koli engú bini. Bu Bhobua inde li Ebhe aha e pi yi-e, ani aha pi yi anga yi sa líli gba Moidje? Ne me ani aha pi yi anga yi adje, yi atsia abhuka la di Bádha Ngali-o. <sup>3</sup> Lele pi yi nde lie ne ongingi-e? Li lilita-a, yi akpo nani ne angu gba Bu Bhobua. Lele pi, yi ti da nabu tata lie ne angu gba kpála-kuti-e? <sup>4</sup> Engú apu pi yi bhelé. Yi abhundja naayi me a padhá? Ma abhundja naama me a padhá ade. <sup>5</sup> Ebhe ngaha Bua gba e pi yi, ani di ngamene ngamba 'ngú bhú ká yi. Ani ngamemene anga yi sa líli gba Moidje? Ani ngamemene anga yi adje, yi atsia abhuka la di Bádha Ngali-o?

<sup>6</sup> Abalahama abhuka nani Ebhe. Kaka-a, Ebhe atsia au ani bhú djila e me a ko ngbili kpála. † <sup>7</sup> A ayo me yi mbila ndjindji me, okpála abhuka Ebhe-e ne kukulu ongisi gba Abalahama-a ngao. <sup>8</sup> U aye nani didili bhú Bhuku gba Ebhe-e me, okpála inde ne omaYuda ade-e, Ebhe aú uo ngbingbili bhú djila e ka nabhuka gba o-o. Kaka-a, Ebhe akpokpo nani Bádha Ngali inde-e pi Abalahama didili me: «Ma atúko bisagu pí ndu okpála na pála doto hana kabula mu.†» <sup>9</sup> Abalahama abhuka nani Ebhe, abhomu-o, Ebhe atsia atuko bisagu pí ani. Okpála

inde abhuka Ebhe-e, ani atúko bhadi bisagu pí uo maka ani.

<sup>10</sup> La pi okpála bhende ngab-hundja me o du ngbingbili kala Ebhe anga o ngamene engú inde li líli ngapa e, mangimbo gba Ebhe-e pí uo. Padhá de, anga Bhuku gba Ebhe-e apa me: «Ndu kpála hana inde i lila líli inde u aye e bhú bhuku-o ndu nedhinga hana de-e, a ayo me u tu pedje li ani.†» <sup>11</sup> A mbámhá me, kpála ngakolo kala Ebhe ngbingbili anga ani ngamene líli-e de. Ní ambila bhobhomu-o anga Bhuku gba Ebhe-e apa me: «Kpála inde ngbingbili kala Ebhe ka nabhuka-a, a kóbho makobho.†» <sup>12</sup> La-a, líli dha bhú nabhuka de. A la di maka engú inde u aye e me: «Kpála inde ngamene ongú inde li líli-e ngapa e akóbho kaka.†»

<sup>13</sup> Kilisito agbegbe ní sa pedje na líli-o. Abhomu-o, pedje ango-o atsia ati pí ani bhú da ní. Padhá de, anga u aye bhú Bhuku gba Ebhe-e me: «Kpála inde u agi e li ndula-a, a ayo me pedje ti pí ani.†» <sup>14</sup> Amene lie mo-o ngubula me bisagu nani li Ebhe apa me ni ahá e pi Abalahama-a, okpála inde ne omaYuda ade-e sia di li kpadji gba Yesu Kilisito. A ko la di me li pápá na nabhuka-a, ní sia Bu Bhobua inde li Ebhe apa nani me ni ahá e-o.

#### *Ebhe ngakobho okpála bhú gandja ani akodho e ne Abalahama-o*

<sup>15</sup> Ondaise ma, ma ngaha kukulu pi yi li engú inde ní auu e piko piko-o. I du me kpála bini nde apa ne bua e hana me ni améne engú inde ni abhundja namene e-e, i du la di me ongámási nde aziba engú ango-o, kpála bini ti da nabhebhelo de, ani 'ó la di engú koko pépé de. <sup>16</sup> Ebhe apa nani me ni améne 'ngú pi Abalahama, di ne pi ndili inde akóto bhú piga gba ani. Bhuku gba Ebhe-e pa de me: «pi ongisi inde

† **3:6** 3:6 Tsia bhú Dje. 15:6. † **3:8** 3:8 Tsia bhú Dje. 12:3, 18:18, 22:18. † **3:10** 3:10 Tsia bhú Det. 27:26. † **3:11** 3:11 Tsia bhú Abk. 2:4. † **3:12** 3:12 Tsia bhú Lev. 18:5. † **3:13** 3:13 Tsia bhú Det. 21:23.

azé bhú piga gba mu», mugito me a ko okpála bhelé-e de. A apa me: «ne pi ndili inde akóto bhú piga gba mu†», ngú nasuno koli kpála bini inde Kilisito.

17 Engú inde ma ngakunda napa e ngae inde: Ebhe akodho nani gandja ne Abalahama, ani atsia apa me engú inde ni apa me ni améne e-e, ni améne mamene. Kalanga kámá badha ne ndjikpa bata pipita-a, líli gba Moidje atsia akoto. Líli ango-o ti da natu silika nani li Ebhe akodho e ne Abalahama de, a ti la di da nabhelo engú inde li Ebhe apa nani me ni améne e pi Abalahama de. 18 I du me Ebhe nde ngamene bádha 'ngú pi okpála anga u ngakpata líli-e, amba a kpata engú inde li Ebhe apa me ni améne e pi okpála-a de. La-a, Ebhe asuno bádha bhú 'bu gba e pi Abalahama, anga ani apa nani me ni améne pi ani mamene.

#### *Ta líli li Ebhe aha e ne ni?*

19 Ta líli-e ne ni? Ebhe aha nani líli-e ngubula me ní mbila me siti 'ngú ngae dho-ie. Ani aha nani ngú nadjeke nedhinga inde li Ndili gba Abalahama agó lie-o. A ko kpála inde li Ebhe apa nani me ni améne ehe pi e-o. Ebhe aha nani líli ango-o pi okpála li pápá gba oandjelu , u atsia akpokpo 'ngú tété pi okpála li pápá gba bhende adu maka ludu\* sunda Ebhe ne okpála-o. 20 U dudu ne gumu ludu ngubula koli kpála bini de. La-a, Ebhe bha ngae kpi e kpi.

21 A akunda napa me líli-e ngatu 'ndji e ne engú li Ebhe apa e? A mo-o ade. I dú ne líli inde i ti da naha mukobho na kukulu pi okpála-a, a de tí da namene me u kolo di ngbingbili kala Ebhe. 22 Engú bini, a maka u aye lie bhú Bhuku gba Ebhe-e me, siti 'ngú ako angu e pi ndu okpála na píla doto libhomu. Kaka-a, Ebhe aha ehe inde ani apa me ni

ahá e pi omabhuka kabula nabhuka gba o bhú Yesu Kilisito-o.

23 Nani kalanu me kpadji nde nga ade ngubula me okpála bhuka-a, ní adu maka okpála inde bhú tikpu sa líli, akolo li nedhinga li Ebhe asuno kpadji lie pi ní ngú nabhuka-o. 24 Líli-e adu nani pi ní maka mulila akolo li nedhinga li Yesu Kilisito ago lie-o. A adu mo-o ngubula me ní kolo ngbingbili bhú djila Ebhe, anga ní abhuka Yesu Kilisito. 25 Mbia inde-e, li kpadji abhulu lie lie me ní bhuka Yesu Kilisito-o, líli-e matá ne mulila gba ní ade. 26 Padhá de, anga ndu yi hana yi ne ongisi gba Ebhe, anga yi abhuka Yesu Kilisito. 27 Ndu yi hana inde asia batisimo bhú Kilisito-o, yi akolo maka ani. 28 Kaka-a, ndu yi hana, yi akolo kpála bini anga yi akpotsø liyi ne Yesu Kilisito, maYuda, i du di-e kpála inde ne maYuda ade-e ade. Bali, i du di-e kpála inde ne bali ade-e ade. Bhoko, i du di-e ølø ade. 29 I du me yi nde ne okpála gba Yesu Kilisito-o, amba yi ne odi Abalahama. Abhomu-o, yi asia ehe inde li Ebhe apa nani me ni ahá e pi Abalahama masia.

## 4

### *Omakilisito matá bhú bali ade, engú bini, u akolo ongisi gba Ebhe*

1 Engú inde ma akunda napa e ngae inde: a maka ndili inde asia tia gba 'dyi e-o. Nedhinga ani nde nga bha lie yeye-e, ani maka bali, belegu li ndu 'he hana nde lie naani-o. 2 Nedhinga ani nde nga bha lie yeye-e, okpála dú nalila ani, u tsia dú di natsia 'kpi li ongu gba ani-e akólo li ekpi li 'dyi ani a'o e-o. 3 A bhadi moko, li nedhinga ní adu nani lie maka ongisi-e, ní adu obalise gba osisiti bua inde ngau píla doto-o. 4 Nedhinga inde li Ebhe a'o nani e akolo lie, Ebhe atsia atima Ndili gba e-o. Ølø bini azu ani ngae.

† 3:16 3:16 Tsia bhú Dje. 12:7. \* 3:19 3:19 Ludu: A ko Moidje .

Ani adu nani sa lili gba omaYuda-a, <sup>5</sup> ngubula me ani kobho okpala bhende adu sa lili-o, amba ni kolo ongisi gba Ebhe.

<sup>6</sup> Ka yi nde lie ne ongisi gba Ebhe-e, ani atima Bua gba Ndili gba e li bua ni. Bua ango-o ngapa me: «Aba, 'Dyi ma!» <sup>7</sup> Bhobhomu-o, akunda napa me, mu mata ne bali na lili gba Moidje ade, engu bini, mo okolo ndili gba Ebhe. Mu nde lie ne ndili gba ani-e, ani aha obabadha 'ngu inde ani a'o e pi ongisi gba e pi mu maha.

*Omabhuka na Galatia masikpe de nagie mata lio bhu bali ne toto*

<sup>8</sup> Nani kalanu-o, yi mbila nga nani Ebhe de, yi atsia adu obalise gba oebhe na eu, inde ne okukulu Ebhe ade. <sup>9</sup> Engu bini, la mbia inde-e, yi ambila Ebhe, ne me ani ambila mangbo yi ngae. La-a, lele pi yi ti da mata lie nagie liyi li papa gba osisiti bua na padha, inde li angu nde bhu o ade-e, inde li tata nde la di li o ade-e? Ka ni yi akunda mata lie nakolo obalise gba uo-o? <sup>10</sup> Yi aholo mata namene olili inde atsia oekpi, ne oepe, ne onedhinga di ne okalanga. <sup>11</sup> Ma ngadje tsulu me ndala gba ma li ma amene kulu lie pi yi-e anu padha de.

<sup>12</sup> Ondaise ma, ma ngakilikili lima pi yi me, yi kolo maka ma, anga ma akolo di maka yi. Yi mene siti 'ngu li ma belegu de bini. <sup>13</sup> Yi ambila ndjindji me ma akpokpo Badha Ngali-e pi yi bhutsibhutsi na bini-e anga adu li ma ne kuo. <sup>14</sup> Kaka-a, a ayo nako me kuo ango-o bu tsulu li yi, amba yi tse la di ma. La-a, yi u ma padha de, yi tsia tse la di ma de. Yi asia ma maka andjelu gba Ebhe, mugito me yi asia Yesu Kilisito. <sup>15</sup> Li nedhinga bhomu-o, yi adu bhu djali. Akolo li yi ne mangua 'ngu dho? Ma ambila ndjindji me li kpadji du uu-o, yi de apandja odjila yi, yi tsia ha mu. <sup>16</sup> La mbia inde-e, ma akolo bhu yala gba yi, anga ma ngapa pi yi kukulu 'ngu?

<sup>17</sup> Obhulu eu bhomu-o ngakunda me o gbele yi li papa gba o, engu bini, ta namene ka uo mo-o ndjindji ade. U ngamene mo-o ngubula me yi dji 'ngbu yi li ma, amba yi gbite liyi li o. <sup>18</sup> A ndjindji ne nagbite lio ndu 'kpi hana li badha 'ngu. Yi amene bha bini de me ma nde bhu ka yi-e de. <sup>19</sup> Odi ma, ma mata ngazu likabhu kabula yi ne toto maka elo inde ngazu. Ma azu likabhu ango-o akolo li nedhinga inde yi akolo lie maka Kilisito-o. <sup>20</sup> Ma ne gumu me ma du de yi mbia inde-e ngubula me ma gama 'ngu pi yi kpi. Padha de, anga bua ma alu ngu yi abhula ma gba!

*Agala ne Sala ngasuno lele gandja bhisi gba Ebhe-o*

<sup>21</sup> Yi pa nga mu, ngayi okpala inde akunda nandu sa lili-o. Yi dje engu inde li lili ango-o ngapa e di? <sup>22</sup> U aye bhu Bhuku gba Ebhe-e me Abalahama azu nani ongisi na bhosibhosi bhisi. Ani azu bini li Agala, elo inde adu bhu bali, bhe koko-o, ani azu li Sala, elo inde i du naae bhu bali de ko. <sup>23</sup> Ndili bhende ani azu e li elo inde adu bali-e, ani azu ani maka u azuzu kpala-kuti lie-o. La-a, ndili bhende ani azu e li elo inde i du bhu bali de-e, ani azu ani maka li Ebhe apa nani lie-o.

<sup>24</sup> Engu inde akodho 'kpi li bili bhomu-o ngasuno pi ni engu inde na ngbengbe, li ta e awo di lie mawo. Olisi bhisi bhomu-o ngasuno gandja bhisi li Ebhe akodho nani e-o. Elo na kulu, Agala ngasuno gandja inde li Ebhe akodho nani e ne Moidje pi eta na Sinai-o. Ongisi gba Agala nani ne obalise. <sup>25</sup> Agala-a, a ko kulu eta u a'i e me Sinai bhu doto na Alabia. Eta ango-o mbia inde-e maka Yelusalema. Padha de, anga Yelusalema bhu bali ne ongisi gba e-e hana. <sup>26</sup> Engu bini, Yelusalema na abhula-a bhu ngu e. A ko 'hi ni ngae. <sup>27</sup> Padha de, anga u aye bhu Bhuku gba Ebhe-e me:



«Kpi djali, ngamɔ i zu de, ngamɔ ɔlɔ inde i zuzu de-o.

Sula ne djali, amba mɔ tɔ 'ue, ngamɔ ɔlɔ inde i dje likabhɔ nazu de-o!

Padhá de, anga ongisi gba ɔlɔ inde li 'ko e ngabhundja e ade-e, adú bhelé ane ongisi gba ɔlɔ inde bhú kɔva-o.†»

28 Ngayi ondaise ma, maka Isaka-a, yi ne ongisi inde u azu o maka li Ebhe apa nani lie-o. 29 Nani li nedhinga bhomɔ-o, ndili inde u azu e maka u azuzu kpála-kuti lie adu nato mbolo li ndili inde u azu e bhú angu gba Bu Bhobua-o . A bhadi li nedhinga na naki-e moko. 30 La-a, Bhuku gba Ebhe-e apa pi? A apa me: «To holo bhú 'dhu ɔlɔ na bali-e bhú dabili bini ne ndili gba e-o. Padhá de, anga a ayo de me ndili gba bali-e sia ohe gba 'dyi o-o bhú dabili bini ne ndili gba ɔlɔ inde bhú bali ade-e de.†» 31 Kaka-a ondaise ma, ní ne ongisi gba ɔlɔ na bali-e ade, ní mangbo ne ongisi gba ɔlɔ inde bhú bali ade ko.

## 5

### *Kilisito agbegbe ní bhú bali-e agbegbe*

1 Kilisito agbegbe ní bhú bali-e agbegbe ngubula me ní dɔ bha ndju bhú ngu ní. Kaka-a, yi lu kpekpeke, yi a'ó matá de me yi gie liyi bhú bali-e de.

2 Yi djedje! Ngama Polo-o, ma apa pi yi me, i dɔ me yi nde ali gandja-a, Kilisito dú pi yi ne tata de. 3 Ma ngapa matá na paká paká pi ndu obhosi hana inde ali gandja-a me, a ayo me u manga ndu líli-e hana. 4 Ngayi okpála bhende ngabhundja me Ebhe aú yi ngbingbili bhú djila e kabula namanga líli-e, yi agbo bhɔsu yi ne Kilisito agbo. Bádha bhú 'bu gba Ebhe-e aneke yi aneke. 5 La pi ya-a, ya nga'o 'to ya 'to Ebhe,

inde améne me ya dɔ bhú djila ni ngbingbili ko. A bhomɔ-o engú inde ya ngadjeke me amene lie má gala li papá na angu gba Bu Bhobua , inde ngau lie bhú nabhuka gba ya-o. 6 Padhá de, anga pi kpála bhende akpetse lie ne Yesu Kilisito-o, nali gandja , i dɔ di-e nali gandja de-e, a pi ani ne tata ade. Engú bini, ehe inde ne tata-a, a ko nabhuka inde ngamene kulu ne mukunda.

7 Yi akpo lilita ndjindji. A ani kpadji pi yi da me yi amánga kukulɔ 'ngú-o de-e? 8 Engú na sisiti inde u ato e bhú 'ndji yi bhomɔ-o yie ka Ebhe kpála inde a'i yi-e de. 9 Mboye ku levile\* bedi ngamene me ndu mapa hana fuka. 10 Ngama-a, ma nga'o 'to ma libhomu 'to Ngámá li 'ngú gba yi-o, anga ma ambila na paká me yi bhundja 'ngú koko kpí ne ma de. Engú bini, kpála bhende ngangbingi 'ndji yi bhomɔ-o abí mangimbo gba Ebhe, belegu i dɔ bha da-ie!

11 Muma-a ondaise ma, i dɔ me ma nde nga bha matá ngakpokpo 'ngú nali gandja-a, ka ni la u nde ngabha lie ngato mbolo li ma-a? † dɔ mo-o, amba tata li nakpokpo 'ngú pindji nakpi gba Kilisito li kulusi-e ade. 12 A ayo me okpála inde ngangbingi 'ndji yi-e kolo maka oenike.†

13 Pi yi-e ondaise ma, Ebhe a'i yi me yi adú matá obalise na líli gba Moidje de. Yi nde la lie bhú ngu yi-e, yi adú namene ogumɔ na sisiti gba yi na kalanɔ-o de. Engú bini, yi teteke liyi sɔnda yi ne mukunda. 14 Padhá de, anga ndu líli hana akpetse lie bhú koli líli bini inde me: «Kunda kilí mɔ maka mo okunda limɔ lie ngamɔ makpe ko.†» 15 Engú bini, i dɔ me yi nde ngamene liyi maka onu 'te inde nganɔnɔmɔ lio di ne na'o'o 'ka lio sɔnda o-o, 'e-e la-e, yi abhíli liyi sɔnda yi mabhili.

† 4:27 4:27 Tsia bhú Isa. 54:1. † 4:30 4:30 Tsia bhú Dje. 21:9, 10. \* 5:9 5:9 Levile: Ngasuno lele kulu okpála inde apite omabhuka na Galatia-o. † 5:12 5:12 Eniki: A ko bhoko inde i ti da nakunda ɔlɔ de, anga angu na bhoko bhú ani ade. Tsia bhú Mat. 19:12. † 5:14 5:14 Tsia bhú Lev. 19:18.

*Yi 'o me Bu Bhobua suno kpadji pi yi ngae*

<sup>16</sup> Ma apa pi yi me, yi 'o me Bu Bhobua suno kpadji pi yi ngae. I du me yi nde amene mo-o, yi kpáta matá ogumú na sisiti gba yi na kalanu-o de. <sup>17</sup> Padhá de, anga ogumú na sisiti gba yi ngagu bhende gba Bu Bhobua-o. Gumú gba Bu Bhobua di ngagu bhende gba ní makpe-o. Ogumú bhomu-o ngatu 'ndji o sunda o, masakpe de napa me yi ti da namene engú inde yi akunda namene e-e de. <sup>18</sup> I du me Bu Bhobua nde ngasuno kpadji pi yi ngae-e, yi matá sa líli ade.

<sup>19</sup> Okulu gba kute ní makpe ngau lie mbámbá. A ngau lie bhú nakunda olisi, i du di-e obhosi ngangá, di ne ogumú ongú koko hana na sisiti. <sup>20</sup> A ko nadhøge oebhe na eu, a ko namene engú na kobha. U ngayala lío sunda o, u ngatsi, u ne 'ngbé bua, u ngake 'ngú lío, u bha bini ngabhundja engú gba o makpe. U ngagbogbo bhúsu o, u dje lío de. <sup>21</sup> U abedhe ne gumú 'he gba okpála koko bhú o bedhe, u akolo obalíse na pandi, a ko obhulu kundu 'zu, u ngamene ongú koko bhelé bhelé maka ongú bhomu-o. Ma ngagbele 'dje yi mbia inde-e maka ma amene lie nako kalanu-o: okpála inde ngamene ongú mo-o, sía dabili bhú Nau gba Ebhe-e de.

<sup>22</sup> Engú bini nguwa gba Bu Bhobua-a, a ko mukunda, djali, guo 'ngú, 'ndjá bua, bádha bua, namene bádha 'ngú, nadu ne kpála inde u ti da na'o 'to o 'to e, <sup>23</sup> nake lío ne kuto, naholo bua o ka 'ngú maholo. Líli bini yala ongú bhomu-o de. <sup>24</sup> Okpála gba Yesu Kilisito agi ogumú na sisiti gba o-o li kulusi. <sup>25</sup> Bu Bhobua ngaha mukobho pi ní ngae, kaka-a, a ayo me ní 'o me ani suno kpadji pi ní ngae. <sup>26</sup> Ní adú ne 'ngbé 'ndji de. Ní adú nake 'ngú liní sunda ní de. Ní adú la di ne 'ngbé bua sunda ní de.

## 6

*Ní teteke liní sunda ní*

<sup>1</sup> Ondaise ma, i du me kpála bini nde ati bhú siti 'ngú-o, ngayi okpála bhende li Bua gba Ebhe-e nde bhú o-o, yi de gie ani li ngbili kpadji ne bádha bua. Kpála ne kpála lila la di lie me ni atí bhú nale de. <sup>2</sup> Yi teteke liyi sunda yi bhú otitili 'ngú inde sunda yi-o. I du me yi nde ngamene mo-o, yi méne líli gba Kilisito. <sup>3</sup> I du me kpála bini nde ngabhundja me ni ne 'ngbé kpála, a nde la kpála na padhá-a, amba ani ngapite lie ngae makpe. <sup>4</sup> A ayo me kpála ne kpála tsia lele nadhuku gba e ngae makpe. I du me a nde ndjindji-e, ani tsia kpi djali li kulu gba e-o. Ani kpi djali de me anga ni akpo 'ndji ni ne kpála koko de. <sup>5</sup> Padhá de, anga a ayo me kpála ne kpála bi titili 'ngú gba e-o.

<sup>6</sup> Kpála inde u asuno eli gba Ebhe-e pi e-e, a ayo me ani gbogbo bhusu tia gba e ne musuno gba e-o.

<sup>7</sup> Yi apite liyi de, u mumu Ebhe de. Kpála asia bha bini nguwa inde ani alu e-o. <sup>8</sup> I du me ani nde ngamene 'ngú maka li ogumú na sisiti ngatima ani lie-e, nguwa inde ani asia e-e, a dú kuo. Engú bini, ani mene engú inde nganga li Bu Bhobua-a, nguwa inde ani asia e-e, a dú mukobho na duduma. <sup>9</sup> Ní andála li namene babadha 'ngú de. Padhá de, anga ní zi kekele tété nakolo ali soso-o, ní sía nguwa gba ní-e li nedhinga ango-o. <sup>10</sup> Kaka-a, i du me kpadji nde u-o, a ayo me ní mene bádha 'ngú pi ndu okpála hana, a ne la mane pi ondaise ní bhende bhú 'bu nabhuka ko.

*Polo ngaha olíli na soso*

<sup>11</sup> Engú inde ma aye e pi yi mbia inde-e, ma aye ne 'kpa ma makpe, maka yi ngauu lie ne ngbengbe djila balua-o. <sup>12</sup> Okpála inde ngaholo yi ne kpeke me yi li gandja-a, a ko okpála inde ngakunda nanga li okpála. U ngamene mo-o ngubula me okpála ató mbolo lío kabula

kulusi gba Kilisito de. <sup>13</sup> Okpála inde ngali gandja bhomu-o ngamanga líli ade. Uo ngaholo yi ne kpéke me yi li gandja, amba u bhi 'kpa o pí mbulu o me o to yi bhú gandja ne kpéke.

<sup>14</sup> La muma-a, ma ngabhi bha bini 'kpa ma pí mbulu ma kabula kulusi gba Ngámá gba ní Yesu Kilisito-o. Padhá de, anga li pápá na kulusi-e, ma au ongú na doto maka ehe na kuku, la di-e, ma maka kpála inde akpi bhú ongú na doto akpi. <sup>15</sup> Kaka-a, nali gandja , i du di-e nali gandja de-e, tata tété ade. Engú inde ane mane-e, a ko mangbo me Ebhe dji kpála, amba ani kolo kpála na mbia.

<sup>16</sup> Pi ndu okpála hana inde ngakpata engú inde ma ngasuno e-e, a ayo me Ebhe ha guo 'ngú pi uo, amba ani dje di ndjinga uo bhú dabili bini ne omafalaale na kukulu, inde okpála gba Ebhe ko.

<sup>17</sup> Nayie pi mbia inde-e, a ayo de me kpála bini 'o matá lungalu kala ma li 'ngú bini-e de. Padhá de, anga opokoli inde li kute ma inde-e ngasuno me ma ne kpála ka Yesu.

<sup>18</sup> Ondaise ma, a ayo me bádha bhú 'bu gba Ngámá gba ní Yesu Kilisito du bhú dabili bini ne ndu yi hana. A adu moko!

**Balua gba Polo  
pi omabhuka na gudhu  
na  
Efeso  
Eli na kalanu**

Balua inde li Polo aye e pi omabhuka na Efeso-o, ngatsia ngaiza kalanu engu inde pindji mabhundja gba Ebhe, ngubula napo bhula ndu oehe hana inde ani abho e, ohe inde na abhula ne bhe na pala doto bhudabili bini ne Kilisito maka ndjindji-o (1:10). Ani nga'i okpala gba Ebhe me u du akobho li lele mabhundja na ngbengbe bhomu inde pi ndu okpala hana bhudakpetse lio ne Kilisito.

Bhudalua inde ane okulu oehe bhele inde ngasuno me, okpala gba Ebhe ngadu bini bhudakpetse bhudabili bini ne Kilisito: Piga gba Ebhe maka kute kpala inde li Kilisito nde ne 'ndji e. A di maka eti inde li Kilisito nde ne nepanda na e-o. A la mata di maka elo inde li Kilisito nde maka ko e-o. Bhudagama ongu gba Polo pindji mabhundja na badha bhudabu gba Ebhe inde bhudakpetse Kilisito-o, a ne oeli bhende ngatu kpala, a la di ne oeli inde nga'e bua kpala abhula ma gba! Ndu 'ngubhomu-o hana ngau lie li zi 'kpi na mukunda gba Kilisito, bhudakiso, bhudamambu, bhudabadha bhudabu, a la di-e bhudavulu lio.

**Ongbenge ongu inde bhudakpetse bhuku inde-e ngae inde:**

Eli na kalanu 1:1-2

Kilisito a la di-e Dadjua gba Ebhe 1:3 - 3:21

Mukobho na mbia bhudakpetse Kilisito 4:1 - 6:20

Eli na soso 6:21-24

*Polo yi omabhuka na Efeso mayi*

<sup>1</sup> Ngama Polo, ma ne bhulu titima gba YesuKilisito, anga Ebhe akunda mo-o. Ma aye balua inde-e pi okpala na bububu gba Ebhe inde bhudakpetse na Efeso, inde abhuka

la di Yesu Kilisito-o. <sup>2</sup> A ayo me Ebhe 'Dyi ni, ne Ngama gba ni Yesu Kilisito, suno badha bhudabu gba o-o pi yi, amba u ha di guo 'ngubi pi yi.

*Ebhe atuko bisagu pi ni bhudakpetse gba ni ne Yesu Kilisito*

<sup>3</sup> Ni dhogo Ebhe, 'Dyi Ngama gba ni Yesu Kilisito-o! Ani atuko bisagu pi ni bhudakpetse lini ne Yesu Kilisito, anga ani aha ndu bisagu hana na bhobua na abhula-a pi ni.

<sup>4</sup> Kala me Ebhe bho doto-o, ani bhudakpetse nani ni bhutode ngubula me ni du ne okpala gba ni li papa gba Kilisito, amba ni du ne okpala inde bubu, u ti da nau siti 'ngubi napapa li o de. Padha de, anga ani akunda ni.

<sup>5</sup> Kaka, nayie nani bhutode naali-e, ani amene me ni kolo ongisi gba ni li papa gba Yesu Kilisito. A bhomu-o engu inde ani amene e pi ni bhudabadha bhudabu gba e-o. <sup>6</sup> Ni toko sangu gba Ebhe ngubula badha 'ngubi inde ani amene e pi ni ne badha bua gba e, anga ani akunda me amene lie mo-o bhudakpetse Ndili gba e na mukunda-o.

<sup>7</sup> Padha de, anga bhudakpetse lini ne Yesu-o, Ebhe agbegbe ni bhudakpetse siti 'ngubi ka ngute ani. Ani atsia ambu li siti 'ngubi gba ni-o. Ebhe asuno pi ni bhomu-o tia inde bhudabadha bhudabu gba e, <sup>8</sup> inde ani aha e me a nde abedhe bedhe-o. Ani atsia aha di ndu imbilangu hana pi ni.

<sup>9</sup> Ani asuno engu gba e inde awo lie mawo-o pi ni. Engu inde bhudabadha bhudabu gba e inde ani apa nani bhutode me ni amene e bhudakpetse Kilisito-o. <sup>10</sup> Engu inde ani apa me ni amene e li nedhinga ani a'o e-e, a ko nakpetse ndu 'ngubi hana inde abhula, ne bhende pala doto-o sa koli Ngama bini, Kilisito.

<sup>11</sup> Bhudakpetse lini ne Kilisito-o, ni asia ehe inde li Ebhe apa nani me ni aha e pi ni-o. Padha de, anga Ebhe alo nani ni kalanu didili naali maka ani akunda lie-o. La di-e, ani ngamene ndu 'ngubi hana maka ani akunda nani lie, di ne maka ani apa

lie-o. <sup>12</sup> Kaka-a, a ayo me ní toko sangu gba Ebhe, nganí okpála inde a'o 'to o nani bhutode bhú Kilisito-o.

<sup>13</sup> Ngayi di-e, li yi adje ngali na kukulu 'ngú-o lie, Bádha Ngali inde aha mukobho pi yi-e, yi atsia abhuka Kilisito. Abhomu-o, Ebhe atsia atu kasé inde ngasuno me yi ne ongisi gba ni-e li kute yi, li ani aha Bu Bhobua inde ani apa nani me ni ahá e pi yi-e lie-o. <sup>14</sup> Bu Bhobua ango-o ne ehe na kalanu bhú ka obabadha 'ngú inde li Ebhe aleke e pi omaha e-o. Ani ngapa pi ní me ní asia ongú ango-o masia li nedhinga li Ebhe agbége ní lie bhú siti 'ngú gba ní hana-o. Kaka-a, ayo me ní toko sangu gba Ebhe.

#### *Polo ayo Ebhe ngú omabhuka*

<sup>15</sup> Kaka-a, mbia inde-e, li ma adje lie me yi abhuka Ngámá Yesu-o, di ne me yi ne mukunda pi ndu omabhuka hana-a, <sup>16</sup> ma'o nagie heni pi Ebhe li 'ngú gba yi-e de. Ma ngabundja yi bhú omayo gba ma-o. <sup>17</sup> Ma ngayo ka Ebhe gba Ngámá gba ní Yesu Kilisito, 'Dyi ní na asasaua me ani ha bua na imbilangu pi yi. Bua ango-o asúno Ebhe pi yi mbámá, ani tsia méne di me yi mbila ani na paká paká. <sup>18</sup> Ma ngayo me ani bhulu imbilangu gba yi ngú nambila obabadha 'ngú inde ani apa me ni ahá e pi okpála bhende ani a'i o-o. Ma la di ngakunda me yi mbila tia di ne sangu inde bhú obabadha 'ngú inde ani aleke e pi okpála gba e-o.

<sup>19</sup> Kaka-a, yi ambíla angu na kuo kuo inde ani nde ne e pi ní omabhuka-o. Angu ango-o, a ko bhende li Ebhe asuno e na paká paká, <sup>20</sup> nedhinga li ani azuku Yesu Kilisito lie, ani atsia a'o ani li pá 'kpa e na kokpa abhúlá-o. <sup>21</sup> Oo, ani a'o Kilisito pí 'ndji ndu obua hana, pí 'ndji ndu obua hana na angu, pí 'ndji ndu obua hana na kpekpeke ne pí 'ndji ndu o'ili hana inde u ti da na'i e bha bini naki de, engú bini,

inde u ti da di na'i e bhú oekpí inde ngago ko. <sup>22</sup> Ebhe a'o ndu 'he hana sa 'dhu Kilisito. Ani atsia a'o ani Ngámá pí 'ndji ndu 'he hana di ne pí 'ndji Dadjua gba e-o. <sup>23</sup> Piga gba Ebhe-e, a ko kute Yesu Kilisito. Angu gba ani-e ngadu bhú Dadjua ango-o, ngaani-e, ani ne ndu bili hana.

## 2

### *Ní azuku bhú dabili bini ne Yesu Kilisito*

<sup>1</sup> Nani kalanu-o, yi amu li bua yi kabula pulu 'ngú di ne kabula siti 'ngú gba yi-o. <sup>2</sup> Yi adu nakobho bhú siti 'ngú nakpata lele mukobho na doto inde. Yi adu namanga ngámá na angu gba osisiti bua inde atu 'kpí-o. Ngámá ango-o, a ko bua inde ngamene kulu bhú okpála inde ngagu Ebhe-o. <sup>3</sup> Ní adu bhadi nani ndu ní hana maka uo. Padhá de, anga ní adu nani nakobho bhú gumu na sisiti gba ní-o. Ní adu namene gumu na kute ní, di ne gumu na bua ní. Ka siti 'ngú gba ní-e, a ayo nani me ke 'ngú gba Ebhe-go pí ní maka okpála koko.

<sup>4</sup> Engú bini, ndjinga gba Ebhe-e ngbéngbé, mukunda gba ani pi ní-e ngbéngbé naali. <sup>5</sup> Kaka-a, ani aha matá mukobho pi ní li pápá gba Kilisito, nganí okpála inde amu nani ka siti 'ngú gba ní-o. A na paká me ní akobho ka bádha bhú 'bu gba Ebhe. <sup>6</sup> Bhú makpøtsø gba ní ne Yesu Kilisito-o, Ebhe azuku ní bhú kuo bhú dabili bini ne ani, ngubula me ní u bhú dabili bini ne ani abhúlá. <sup>7</sup> Bhú nasuno bádha bhú 'bu inde ani asuno e pi ní bhú Yesu Kilisito-o, Ebhe akunda nasuno bhomu-o ngubula ndu nedhinga hana inde ngago-o bádha bhú 'bu gba e na ngbéngbé ko. <sup>8</sup> Padhá de, anga yi akobho ka bádha bhú 'bu gba Ebhe kabula nabhuka. Mukobho ango-o yie ka yi de, a ko ehe inde li Ebhe aha e pi yi padhá. <sup>9</sup> Mukobho ango-o yie ka okulu gba yi-e de. Kaka-a,

a ayo de me kpála bini pa 'li e tété-e de. <sup>10</sup> A na paká me Ebhe abho ní ngae. Aní abho ní bhú nakpètse liní ne Yesu Kilisito ngubula me ní mene ongú na babadha. Obabadha 'ngú ango-o, Ebhe aleke nani pi ní bhútode me ní mene.

*Yesu akpètse omaYuda ne obhende ne omaYuda ade-e bhú nakpi gba e-o*

<sup>11</sup> Yi bhundja nga maka yi adu nani lie kalanu-o. Ngayi okpála inde li omaYuda adu na'i o me okpála inde i li gandja\* de, anga bhú nazu-o, yi ne omaYuda ade. U atsia adu na'i lio me o ne okpála inde ali gandja. A ko la ehe inde li okpála amene e li kute ne 'kpa o. <sup>12</sup> A na paká me bhú nedhinga bhomu-o, yi adu nani de Kilisito tsutsu. Yi adu ne ogandji okpála, yi du nani bhú piga gba omafosalaele de. Gandja inde li engú li Ebhe apa nani lie me ni améne e pi okpála gba ni-e alu pi e, du pi yi de. Yi adu nani nadu pila doto me yi nde 'o 'to yi 'to Ebhe de. Ebhe du la di bhú yi de. <sup>13</sup> La mbia inde-e, bhú nakpètse liyi ne Yesu Kilisito-o, ngayi okpála inde adu nani de ani tsutsu-o, yi adyudyo liyi de ani masakpe kabula ngute ani-o.

<sup>14</sup> Padhá de, anga Kilisito ngae makpe aha guo 'ngú pi ní ngae bhú namene me omaYuda, ne okpála bhende ne omaYuda ade-e kolo koli okpála bini. Bhú nakpi ka ani-e, ani agugumu kozie inde adu nani nagbo bhusu uo-o. Kozie ango-o adu nani nayala lio sunda o. <sup>15</sup> Ani abulu líli gba Moidje ne odapo ango-o hana. Ani amene me omaYuda, di ne okpála bhende ne omaYuda ade-e kolo koli piga bini na mbia bhú nakpètse lio ne ani. Abhomu-o, ani atsia agie guo 'ngú. <sup>16</sup> Bhú nakpi ka ani li kulusi-e, Kilisito akpètse uo bhú koli kute bini. Ani atsia agie makpolia sunda uo ne Ebhe. Li pápá na kulusi-e, ani a'e yala

sunda uo. <sup>17</sup> Kilisito ago ngubula nakpokpo Bádha Ngali na guo 'ngú pi yi okpála inde adu nani tsutsu de Ebhe, di pi okpála inde adu nani masakpe-o. <sup>18</sup> Li pápá gba Kilisito-o, ndu ní hana, omaYuda ne okpála bhende ne omaYuda ade-e, ní ti da nadyudyo liní de Ebhe, 'Dyi ní, ka koli Bu Bhobua bini.

<sup>19</sup> Kaka-a, ngayi okpála inde ne omaYuda ade-e, yi matá ne ogandji okpála ade, yi maka ogomago ade. Engú bini, yi mbia inde-e ne ongisi na kuti, yi bhú ká okpála gba Ebhe. Yi ne okpála na piga gba Ebhe. <sup>20</sup> Ngayi-e, yi akolo ndula na eti inde li 'dhu e nde ne obhulu titima gba Yesu, di ne opolofeta. Nepanda na eti ango-o, a ko Yesu Kilisito ngae makpe. <sup>21</sup> Ani ngamene ngae me eti-e lu kpekpeke. Ani la di ngamene me eti ango-o kolo 'ngbé 'ti Ebhe na bubu, inde u a'o e pi Ngámá. <sup>22</sup> Bhú nakpètse lio ne Kilisito-o, ngayi di-e, yi maka ndula na eti inde u ayiki e-o. Yi atsia akolo ne ndu okpála koko koli eti bini inde li Ebhe ngadu bhú e li pápá gba Bu Bhobua.

### 3

*Polo akpokpo 'ngú pindji engú inde awo lie mawo gba Kilisito*

<sup>1</sup> Kaka-a, ngama Polo-o, ma ne kpála na tikpu gba Yesu Kilisito kabula yi okpála inde ne omaYuda ade-o. <sup>2</sup> A na paká me yi adje engú pindji kulu inde li Ebhe aha e bhú bádha bhú 'bu gba e me, ma mene e pi yi ko. <sup>3</sup> Ebhe ambamba ta 'ngú gba e inde awo lie mawo mama, ngubula me ma mbila tata-a ndjindji. Ma aye mbo 'ngú pi yi pépé bedi. <sup>4</sup> Nedhinga yi ngatanga balua inde-e lie, yi ti da nambila imbilangú inde ma nde ne e li engú inde awo lie mawo gba Kilisito-o. <sup>5</sup> Nani kalanu-o, Ebhe mbamba nga nani ta engú ango-o pi okpála na kalanu-o de. Engú bini, ani asuno

\* 2:11 2:11 Gandja: A adu nani engú inde asuno me a inde-e kpála ka Ebhe.

mbia inde-e li pápá gba Bua gba e pi obhulú titima na bububu gba Yesu, di ne pi opolofeta . <sup>6</sup> Okpála inde ne omaYuda ade-e ngasia koli ehe bini ne omaYuda. Uo bhú koli kute bini. U asía la di ehe inde li Ebhe apa me ni améne e bhú Yesu Kilisito li pápá na Bádha Ngali-e masia.

<sup>7</sup> Ma akolo kpála na kulu na kpokpo Bádha Ngali ka bádha bhú 'bu gba Ebhe , inde ani aha e muma bhú angu gba e-o. <sup>8</sup> Ngama-a, ma ne mboye kpála bhú ká ndu okpála gba Ebhe-e hana. Engú bini, Ebhe atsia aha bádha bhú 'bu gba e muma ngabula me ma kpokpo Bádha Ngali pi okpála bhende ne omaYuda ade-e pindji tia na ngbéngbé gba Kilisito, inde ane mabhundja gba okpála mane-o.

<sup>9</sup> Ma ti da nasuno pi ndu okpála hana mbámbá maka li Ebhe ngamene engú gba e inde awo lie mawo lie-o. Ngaani-e, a ko kpála inde abho ndu 'he hana. Nayie nani didili naali-e, engú ang-o adu me a nde awo lie mawo, <sup>10</sup> ngabula me mbia inde-e, kabula engú li Ebhe amene e bhú Dadjua gba e-e, ndu obua hana, di ne ndu obua hana na angu inde abhúlá-a ti da nambila imbilangu gba Ebhe inde u ti da nambila alo na e de. <sup>11</sup> Ndu 'ngú bhomu-o amene lie li lele mabhundja li Ebhe adu nani ne e nayie li lilita, inde ani amene e bhú Yesu Kilisito, Ngámá gba ní-o. <sup>12</sup> Ní akpøtsø liní ne Kilisito, ní atsia abhuka la di ani. Kaka-a, li ndu kpadji hana ní adú ne tsulú de ngú nadyudyo liní de Ebhe. <sup>13</sup> Kaka-a, ma ngayo ka yi me, bua yi asía ndala ka likabhu inde ma ngazu e ngabula yi-e de. Likabhu ang-o mangbo ngaha pi yi sangu .

*A ayo me omabhuka mbila lele mukunda gba Kilisito inde ane ndu 'ngú hana-o*

<sup>14</sup> Kaka-a, ma ngatutu lipuku ma kuto kala 'Dyi ní Ebhe, <sup>15</sup> li ndu piga hana inde abhúlá ne píla doto adha

bhú e-o. <sup>16</sup> Ma ngayo ka ani me ani ha angu pi yi li pápá na Bhobua gba e, anga sangu gba ani-e ne 'ngbé tia na ngbéngbé. Abhomu-o, yi tsia sia angu li bua yi. <sup>17</sup> A ayo me Kilisito si kuti e li bhobua yi li pápá bhe nabhuka . Ma ngayo me sie yi li bhú mukunda mali, la di me a lu bhú mukunda ang-o malu. <sup>18</sup> Abhomu-o, yi kólo ne angu ngú nambila bhú dabili bini ne ndu okpála gba Ebhe-e hana me lele mukunda gba Kilisito pi ní-e, ane mane! <sup>19</sup> Yi mbila lele mukunda gba Kilisito inde ane ndu 'ngú hana u ti da nambila e-o. Yi abédhe ne ndu 'ngú hana inde bhú Ebhe-e bedhe.

<sup>20</sup> Ebhe ngamene kulu bhú ní ne angu gba e-o. Li ní yo 'he ka ani-e, ani ti da nahaha pi ní bhelé ane mane, anga angu gba ani-e ane ndu 'ngú hana inde ní ti da nabhundja e. <sup>21</sup> A ayo me sangu du ne ani bhú Piga gba Ebhe di ne bhú Yesu Kilisito, ndu nedhinga hana, duduma ne duduma. A adu moko.

## 4

*Yi gili ndu 'kpí hana nadu bhú makpøtsø ne Kilisito*

<sup>1</sup> Ngama kpála inde bhú tikpu anga ma ngamene kulu pi Ngámá-a, engú inde ma ngayo e ka yi kpékpéke-e ngae inde: ngayi okpála inde li Ebhe a'i o-o, kaka-a, yi dhuku maka li okpála inde li Ebhe a'i o-o adhudhuku lie-o. <sup>2</sup> Yi du ndu 'kpí hana nakø liyi ne kuto, yi du ne bhuku bua, di ne 'ndjá bua. Yi kibila liyi bhú ongú inde sunda yi-e ne bua na mukunda. <sup>3</sup> Yi gili ne angu hana nadu bhú makpøtsø inde li Bu Bhobua ngaha e bhú guo 'ngú inde ngagbite yi bhú dabili bini ko. <sup>4</sup> A ne koli kute bini, di ne koli Bu Bhobua bini. Ebhe a'i la bhadi ní me ní 'o 'to ní to koli 'he bini. <sup>5</sup> Koli Ngámá bha bini, ne koli nabhuka bini, di ne koli batisimo bini. <sup>6</sup> Koli Ebhe bha bini, inde 'Dyi ndu okpála hana. Ani ngau pí 'ndji ndu okpála hana. Ani

ngamene kulu bhú ndu okpála hana, ani la di ngadu bhú ndu omabhuka hana.

<sup>7</sup> La-a, Kilisito aha pi kpála ne kpála angu gba Bhobua ngú namene ehe. Ani atsia aha di bhe gba kpála ne kpála pi e ne bádha bua. <sup>8</sup> U aye me:

«Li ani a'ɔ lie abhúlá-a,  
ani abha okpála na tikpɔ ne angu,  
ani atsia aha angu gba Bhobua ngú namene ehe pi okpála.†»

<sup>9</sup> La-a, napa me «ani a'ɔ abhúlá-a», a akúnda napa pi? Bhobhomu-o akúnda napa me, kala na'ɔ abhúlá-a, Kilisito akɔ ngaiza a satɔ. <sup>10</sup> Kpála inde akɔ a satɔ-o, a ko di kpála inde a'ɔ abhúlá tsutsu ngubula me ani du bhú ndu 'he hana. <sup>11</sup> A ko ani inde aha kulu pi kpála ne kpála-o. Ani aha pi okoko nadu obhulu titima gba Yesu , okoko ne opolofeta . Okoko ne omusuno na Bádha Ngali , okoko ne odimandɔ, i du di-e omusuno. <sup>12</sup> Yesu amene me okpála gba Ebhe-e kolo bedhe ngú namene kulu gba ani, ne okulu inde li Kilisito aha e pi uo bhomu-o, ngubula me kute ni inde Piga gba Ebhe-e, kolo kpekpeke. <sup>13</sup> Ní mene mo-o, ndu ní hana ní kólo bhú makpɔtɔ bini bhú nabhuka ne nambila Ndili gba Ebhe-e ndjindji. Ní bhele bhú nabhuka ang-o, ní tsia kólo libhomu maka Kilisito.

<sup>14</sup> Abhomu-o, ní dú matá maka ongisi de. Ní dú la di maka zabu inde li anvi ngadyudyo e ne ndu pasu hana, di ne anvi na nasuno gba omusuno inde ngapite okpála-a de. <sup>15</sup> Engú bini, i du me ní nde ngapa kukulu 'ngú bhú mukunda-a, ní bhéle bhú ndu 'ngú hana li pápá gba Kilisito inde ne 'ndji Piga gba Ebhe-o. <sup>16</sup> Ani ngamene ngae me oyá ní du bini, ani atsia akpɔtɔ di lie bhú dabili bini ne ní. Kute ní inde Piga gba Ebhe-e bhadi moko. I du me nganí inde ne okpála na Piga gba Ebhe-e ní nde ngamene kulu gba

ní bhú dabili bini ne mukunda-a, li Dadjua ang-o bhéle.

*Yi koto bhú mukobho na kalanu, amba yi kolo okpála na mbia*

<sup>17</sup> Engú inde ma ngayo e ka yi ne kekele-e ne 'li Ngámá-a ngae inde: yi adú nadhuku matá maka omupagano de. Padhá de, anga mabhundja gba uo-o padhá. <sup>18</sup> Imbilangu gba uo-o bhú biti. Mukobho inde ngayie ka Ebhe-e pi uo ade. Padhá de, anga u mbila 'ngú bini de. U agbite la di bua o má ki! <sup>19</sup> U ngadje numu li 'ngú bini ade. U ngamene ndu 'ngú na sisiti hana inde u akúnda namene e. U la di ngakúnda olisi ne obhosi ngangá.

<sup>20</sup> Pi yi-e, a bhomu-o engú inde u apa e pi yi pindji Kilisito-o de. <sup>21</sup> A na paká me u apa ndu 'ngú gba Yesu-o pi yi hana. Maka omakilisito-o, u asuno pi yi kukulu 'ngú inde ní asia e ka ani-o. <sup>22</sup> Kaka-a, a ayo me yi tse mukobho gba yi na kalanu-o. Lele nani maka yi adu lie kalanu-o, yi koto bhúbhú makoto, anga ogumu ang-o ngapite okpála. A la di ngato okpála bhú kuo. <sup>23</sup> A ayo na'o me Bu Bhobua dji yi libhomu, amba yi kolo okpála na mbia li bua yi, di ne bhú mabhundja gba yi ko. <sup>24</sup> Yi kolo okpála na mbia, inde li Ebhe abho o maka e makpe, inde la di ngau lie bhú mukobho na ngbingbili, inde di bubu li kukulu 'ngú ngagbe e-o.

<sup>25</sup> Kaka-a, yi 'o napa eu ma'o. A ayo me kpála ne kpála pa pi kilí e kukulu 'ngú. Padhá de, anga ní ndu ní hana ne yá koli kute bini. <sup>26</sup> I du me bua yi nde ake-e, yi alí bhú siti 'ngú de. A ayo me bua yi kɔ kala me ela ti.† <sup>27</sup> Yi aká kpadji pi Djabulu de me ani ko pí yi-e de. <sup>28</sup> A ayo me kpála inde adu nako nazi 'he-e, 'o nazi 'he ma'o. A ayo mangbo me ani mene kulu ne 'kpa e makpe, amba ani sia ezu pi e li bádha kpadji. Ani du la di ne ehe ngú nateteke okpála inde li ehe aneke ka o-o. <sup>29</sup> Eli na

† 4:8 4:8 Tsia bhú Ets. 68:19. † 4:26 4:26 Tsia bhú Ets. 4:5.



sisiti bini akóto bhú 'bhø yi de. Yi pa bha bini eli na babadha inde i ti da nateteke okpála koko nakpata gumu gba uo-o, a la di ngamene bádha 'ngú pi obhende ngadjedje-o.

<sup>30</sup> Yi ahá likabhu pi Bu Bhobua inde li Ebhe aha e pi yi-e de. Padhá de, anga Bu Bhobua inde li Ebhe atu e li yi maka kasé-e ngapa pi yi ngae me bhú oekpi inde ngago-o, Ebhe agbége yi bhú siti 'ngú gba yi-e magbegbe. <sup>31</sup> Yi 'e ndu 'ngú hana na sisiti li bua yi ma'e. Yi 'e ndu bua bhú yi ma'e. Yi 'e ke 'ngú bhú yi ma'e. Yi 'o nasusula ma'o. Yi 'o la di nasobho sobho ma'o. Yi 'o namene ndu sisiti 'ngú hana má kpekøbhø! <sup>32</sup> Yi du sànda yi ndjindji, amba yi bedhe ne mukunda bedhe. Yi mbu li sisiti 'ngú inde sànda yi maka li Ebhe ambu la di li yi lie kabula Kilisito-o.

## 5

*Yi dhuku maka okpála inde bhú zi 'kpí*

<sup>1</sup> I nde lie me yi nde ne ongisi li Ebhe-e akunda o-o, yi mene ne kpéke me yi du maka ani. <sup>2</sup> A ayo me yi du ne mukunda maka Kilisito . Padhá de, anga ani akunda ní. Ani atsia andala 'kpa li mukobho gba e pi ní maka makiso, maka enu inde u atsutsulu e pi Ebhe, inde li se e ngapu ndjindji.

<sup>3</sup> Yi ne okpála na bububu gba Ebhe. Kaka-a, a ayo de me u dje ongú nakunda olisi, di ne obhosi ngangá, di ne namene ndu ongú na sisiti hana, i du di-e gumu 'he naali bhú ka yi-e de. <sup>4</sup> A ayo de me siti 'li, ne engú na ngingi, ne zibotu koto bhú 'bhø yi-e de. Engú bini, yi gie mangbo heni pi Ebhe. <sup>5</sup> Yi mbila ndjindji me, kpála bini na zabhe, kpála na zibotu, i du di-e kpála na endju (padhá de, anga endju-o, a ko nayo ebhe na eu), ani lí bhú Nau gba Kilisito di ne Ebhe-e belegu de bini.

<sup>6</sup> Kpála bini apíte yi ne 'li na padhá padhá de. Padhá de, anga

ngua osisiti 'ngú bhomu-o ngagbele ke 'ngú gba Ebhe-e pi okpála inde ngayala namene líli gba ani-e ngae. <sup>7</sup> Kaka-a, yi akpøtø liyi ne ngua okpála bhomu-o de. <sup>8</sup> Yi adu nani kalanu-o bhú biti. La mbia inde-e, li yi akpøtø liyi lie ne Ngámá-a, yi akolo bhú zi 'kpí. Kaka-a, yi dhuku maka okpála inde bhú zi 'kpí. <sup>9</sup> Padhá de, anga zi 'kpí ngazu ndu 'ngú na babadha hana. A la di ngazu ngbili 'ngú ne kukulu 'ngú. <sup>10</sup> Yi gili ne kpéke ngú nalo engú inde li Ngámá akunda e-o. <sup>11</sup> Yi akpøtø liyi ne okpála bhende ngamene ongú na padhá padhá na sukpe-e de. Engú bini, yi gbe engú ango-o mbámbá bhú djila okpála. <sup>12</sup> Padhá de, anga a ko numu naali ngú nagama 'ngú li 'ngú inde li okpála ango-o ngamene e bhú pepe. <sup>13</sup> La-a, engú inde u agbe e pi okpála-a, akolo mbámbá. <sup>14</sup> La di-e, ndu 'ngú hana inde u agbe e li zi 'kpí-e, a akolo bhadi li zi 'kpí. Kaka-a, u apa me:

«Ngamu kpála inde ngala-a, zuzuku,  
yie bhú ká okpála inde amu-o mayie,  
amba Kilisito suno zi 'kpí gba e pi mu.»

<sup>15</sup> Kaka-a, 'ee, yi lila liyi ndjindji bhú nakobho ka yi-o. Yi adu nakobho maka ongingi de. Engú bini, yi du nakobho maka okpála na imbilangu. <sup>16</sup> Yi djele onedhinga inde yi nde bhú e ndjindji. Padhá de, anga onedhinga inde ní nde bhú e sisiti. <sup>17</sup> Kaka-a, yi adu maka ongingi de. Engú bini, yi mene ne kpéke me yi mbila engú inde li Ngámá akunda me yi mene e-o.

<sup>18</sup> Yi alángba ne pandi de. Padhá de, anga pandi ngatima kpála bhú 'ngú na pupulu. Engú bini, yi bedhe mangbo ne Bu Bhobua . <sup>19</sup> Yi to masi bhú yi ne nali ndu odjua oetsi hana inde li Bu Bhobua ngaha e-o. Yi toko Ngámá ne bua yi hana. <sup>20</sup> Yi gie heni pi 'Dyi ní Ebhe ndu nedhinga

hana, di ne ngú ndu 'ngú hana ne 'li Ngámá gba ní Yesu Kilisito.

*A ayo me òlò ne bhoko manga lío sùnda o*

<sup>21</sup> Yi manga liyi sùnda yi kabula mazima yi nde ne e pí Kilisito ko.

<sup>22</sup> Ngayi olisi-e, yi manga obhosi gba yi-e maka yi ngamanga Ngámá lie-o. <sup>23</sup> Padhá de, anga bhoko ne ngámá pí 'ndji wala e, maka lí Kilisito nde lie ne Ngámá pí 'ndji Piga gba Ebhe-o. Kilisito ne Múkobho na Piga gba Ebhe. Piga ango-o maka kute ani. <sup>24</sup> A ayo me olisi manga obhosi gba o-o bhú ndu 'ngú hana, maka Piga gba Ebhe-e ngamanga Kilisito lie-o.

<sup>25</sup> Ngayi obhosi-e, yi du ne múkunda pí olisi gba yi, maka lí Kilisito akunda Piga gba Ebhe-e lie-o. Aní asuno múkunda ango-o lí nandala kpa lí múkobho gba e ngubula Dadjua ango-o. <sup>26</sup> Aní akunda nani namene me Piga gba Ebhe-e kolo bubu, aní atsia avulu ne engu\* di ne 'li e. <sup>27</sup> Padhá de, anga aní akunda nani me Piga gba Ebhe-e koto kala ní ne sangu gba e hana. A adú ne doto bhú e de, ne engú na sisiti napapa tété de, di ne zibotu de. Dadjua ango-o du la di bubu, inde u tí da nau siti 'ngú napapa lí e de.

<sup>28</sup> Kaka-a, a ayo me obhosi du ne múkunda pí olisi gba o maka u akunda kute o lie makpe-o. Padhá de, anga kpála inde ne múkunda pí wala e-e, aní ngakunda bhomu-o lí e makpe. <sup>29</sup> Padhá de, anga kpála bini inde ayala kute e makpe ade. Engú bini, kpála ne kpála ngaku kute e, di ne nalilila ndjindji, maka Kilisito ngamemene lie bhú Piga gba Ebhe-e ko. <sup>30</sup> Padhá de, anga ní ne tika kute ani. <sup>31</sup> A maka u aye lie bhú bhuku gba Ebhe-e me: «Kaka-a, bhoko a'ó ká 'dyi e ne 'hi e ngubula nakpètse lie ne wala e. U tsia kólo ndu o bhisi hana koli kute bini.†» <sup>32</sup> 'Ngbé 'ngú na kúkulu awo lie bhú engú

inde u apa e bhomu-o. Ngama-a, ma apa me u ngapa 'ngú bhomu-o lí 'ngú gba Kilisito di ne Piga gba Ebhe. <sup>33</sup> Engú bini, u la di ngapa 'ngú ango-o pí yi: a ayo me bhoko ne bhoko du ne múkunda pí òlò gba e maka aní akunda lí e lie makpe-o. A ayo la di me òlò ne òlò manga 'ko e.

## 6

*Lele dasundu gba ongisi ne okpála azu o-o*

<sup>1</sup> Ngayi ongisi, engú inde a ayo me yi mene e maka lí Ngámá akunda lie ngae inde: yi manga okpála azu yi-e mamanga, anga bhobhomu-o ndjindji. <sup>2</sup> Líli na kalanu inde lí Ebhe asuno e di ne napa me ní améne ehe bhú e ngae inde: «Manga 'dyi mu ne 'hi mu mamanga, <sup>3</sup> amba mu du ne kpála na djali, mu tsia bhúe la di ngengele píla doto.†»

<sup>4</sup> Ngayi odyi ongisi, yi améne de me ongisi gba yi-e kolo ne kpéke 'ndji-e de. Engú bini, yi ka uo ne nalili uo di ne naha líli inde ayie ka Ngámá-a pí uo.

*Lele dasundu gba obalise ne omakulasi o*

<sup>5</sup> Ngayi obalise, yi manga omakulasi yi píla doto mamanga ne nazi uo ndjindji, ne koli bua bini mugito me yi ngamanga Kilisito. <sup>6</sup> Yi améne bha bini mo-o lí nedhinga inde u ngatsia 'kpí lí yi lie de. Padhá de, anga yi mene mo-o, i mána mugito me yi amene ngubula me okpála ziba yi. Engú bini, yi mene engú inde lí Ebhe akunda e ne koli bua bini, maka obalise gba Kilisito. <sup>7</sup> Yi mene kulu pí omakulasi yi ne bádha bua mugito me, yi ngamemene pí Ngámá ngae makpe, anga yi mene pí kpála de. <sup>8</sup> Padhá de, anga yi ambila me, abana i du bali, i du di-e bali de-e, kpála ne kpála asia makalá sakpa Ngámá

\* **5:26** 5:26 Engu: A ko batisimo. Tsia bhú Tit. 3:5. † **5:31** 5:31 Tsia bhú Dje. 2:24. † **6:3** 6:2-3 Tsia bhú Eki. 20:12; di ne bhú Det. 5:16.

li lele bádha kulu li kpála ango-o amene e-o.

<sup>9</sup> Ngayi, omakulasi okpála, yi mene bhadi moko pi obalise gba yi-o. Yi abú tsulú bhú uo ne napa de me yi ató mbolo li uo de. Yi mbila ndjindji me ngayi ne obalise gba yi-e, a ka yi ne koli Ngámá bini abhúlá. Aní gbogbo bhúsú okpála de.

*Yi bi tia 'gú inde li Ebhe ngaha e pi yi-o*

<sup>10</sup> Ngú nabu tata-a, yi gili angu gba yi-e bhú nakpøtø liyi ne Ngámá, bhú angu na ngebéngbé gba ani-o. <sup>11</sup> Yi bi ndu tia 'gú hana inde li Ebhe ngaha e pi yi, ngubula me yi lu kpekpeke kala siti mabhundja gba djabulú-o. <sup>12</sup> Padhá de, anga ní ngagu gbele ne okpála-kuti ade. Engú bini, ní ngagu 'gú ne osisiti bua inde ne angu abhúlá. Ní ngagu 'gú ne ongámási na angu di ne obhende na sukpe. <sup>13</sup> Kaka-a, yi ha ndu tia 'gú gba Ebhe-e hana, amba li nedhinga na sisiti akólo lie, yi de lu kala bhulú yala gba yi-e kpekpeke. La di-e, pita nagu gbele akolo ali soso-o, yi tsia lú li bili yi nde li e kpekpeke.

<sup>14</sup> Ka 'ngú ango-o, yi lu kpekpeke. Yi gbite kukulú 'ngú ludu yi maka mukabha. Yi holo ngbili 'ngú maka bongo na kó 'nu inde ngalila mbulu kpála. <sup>15</sup> Yi dyi gumu na nakpokpo Bádha Ngali na guo 'ngú maka maløkø. <sup>16</sup> Yi holo nabhuka ndu 'kpi hana maka kopi. Bhobhomu-o ahá angu pi yi ngú nabulú ndu edji hana inde ne djua gba Satana. <sup>17</sup> Yi dyi mukobho maka ndata na kalase. Yi holo Eli gba Ebhe-e maka mbotia inde li Bu Bhobua ngaha e-o.† <sup>18</sup> Yi mene ndu 'ngú bhomu-o hana bhú mayo. A na paká, yi yo Ebhe bhú ndu 'ngú hana maka li Bu Bhobua atéteke yi lie-o. Kaka-a, yi alá-a de, yi yo Ebhe ndu 'kpi hana pi ndu okpála hana na bububu-o.

<sup>19</sup> Yi yo di Ebhe muma, amba Ebhe ha eli na ngbingbili muma nedhinga

ma akunda nagama 'ngú lie-o. La di-e, a ngubula me ma adú ne tsulú de nedhinga ma ngambamba ta ongu inde awo lie bhú Bádha Ngali-e lie-o. <sup>20</sup> Ma ne bhulú titima na Bádha Ngali inde ma nde bhú tikpu ngubula e-o. Kaka-a, yi yo Ebhe ngú ma, amba ma akpokpo Ngali ango-o ne tsulú de, ma kpokpo mangbo maka a ayo lie-o.

*Eli na soso*

<sup>21</sup> Tisiko, ndai ní na mukunda, kpála inde di ngamene kulu gba Ngámá ndjindji akpokpo ndu 'ngú hana inde atsia ma pi yi. Aní akpokpo pi yi ngubula me yi mbila lele maka ma nde lie di ne ehe inde ma ngamene e-o. <sup>22</sup> Ma atima aní ngubula nakpokpo pi yi lele maka ya nde lie, amba aní to di masi bhú yi.

<sup>23</sup> A ayo me Ebhe 'Dyi ní, di ne Ngámá Yesu Kilisito ha guo 'ngú, ne mukunda di ne nabhuka pi ndu ondaise ní hana. <sup>24</sup> A ayo me bádha bhú 'bu gba Ebhe du ne ndu okpála hana inde ne mukunda na duduma pi Ngámá gba ní Yesu Kilisito ko.

† 6:17 6:14-17 Tsia bhú Isa. 59:17, 11:5, 27:1, 34:5, 49:2; ne bhú Oz. 6:5; ne bhú Ebe. 4:12; di ne bhú Apok. 1:16, 19:15.

**Balua gba Polo  
pi omabhuka na gudhu  
na  
Filipoi  
Eli na kalanu**

Polo aye nani balua inde-e pi omabhuka na Dadjua na kalanu inde ani a'o nani e bhú putu-o, bhú ndu doto na ngámá gba okpála na Loma inde abhú Makedonia-o. Aní aye balua ango-o me ani nde bhú tikpu. Li nedhinga inde ani adu lie me bua ani nde angamba ka nagu inde li obhelesi okpála koko na Dadjua gba Ebhe adu agu ne e-o, la di bua ani atsia alu bhúlá má gba ka onasuno na eu inde adu bhú Dadjua gba Ebhe inde abhú Filipoi-o.

Engú inde i ti da nau lie má gala bhú balua inde-e, a ko nagie heni pi omakilisito na Filipoi ngubula makiso inde u atima nani e pi ani ngú nateteke ani bhú ongú gba e ko. Polo aha nedhinga bhomu ngú nato masi bhú omakilisito na Filipoi ngubula me u andala bhú kulu gba Ebhe-e de, abana u adu ato mbolo lie li ndu uo hana-o.

Balua inde-e agama 'ngú kpekpeke pindji djali, naziba, nadu bini di ne 'ndjá bua inde bhú nabhuka a la di-e mukobho gba makilisito. Aní atsia asuno la di mukunda na kpekpeke inde li Polo adu ne e pi Dadjua na Filipoi-o.

**Ongbengbe ongú inde bhú bhuku inde-e ngae inde:**

Eli na kalanu 1:1-11

Engú atsia Polo kpi e kpi 1:12-26

Mukobho inde bhú Kilisito-o 1:27  
- 2:18

Mabundja inde adu pi Timoté ngauo ne Epafolodite 2:19-30

Nalila lio ka obhulu yala di ne okpekpeke 'ngú inde ngago 3:1  
- 4:9

Polo ngauo ne obi e na Filipoi 4:10-20

Eli na soso 4:21-23

*Polo yi omabhuka na gudhu na Filipoi mayi*

<sup>1</sup> Ngama Polo, bhú dabili bini ne Timoté-e, ya yi yi mayi. Ya ne obalise gba Yesu Kilisito . Ma aye balua inde-e pi ndu yi omabhuka inde bhú gudhu na Filipoi hana, pi yi obhelesi okpála di ne pi yi okpála inde ngateteke kulu gba Ebhe, ndu yi hana inde akpøtse liyi bhú dabili bini ne Yesu Kilisito-o. <sup>2</sup> A ayo me Ebhe 'Dyi ní, bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú gba o-o pi yi.

*Polo agie heni, ani atsia ayo di Ebhe ngú omabhuka na gudhu na Filipoi*

<sup>3</sup> Ma ngagie heni pi Ebhe, ndu nedhinga hana ma ngabundja yi lie-o. <sup>4</sup> Ndu nedhinga hana ma ngayo Ebhe lie pi ndu yi hana-a, ma ngakpi djali. <sup>5</sup> Ma ngagie heni pi Ebhe anga yi akpøtse liyi ne ma bhú nakpokpo Bádha Ngali , nayie bha bini li 'kpí na kalanu yi abhuka lie, akolo makolo pi mbia inde. <sup>6</sup> Ma ambila ndjindji me Ebhe inde akpo nani lita bádha kulu li bua yi-e, anú bha ne di ne kalanu, ani tsia bú soso li 'kpí li Yesu Kilisito agó lie-o. <sup>7</sup> A ndjindji me ma bundja bha pindji ndu yi hana mo-o. Padhá de, anga bua ma abedhe ne djali ka yi, anga Ebhe asuno bádha bhú 'bu muma di ne pi ndu yi hana, ngubula me yi teteke ma nedhinga ma nde lie mbia inde-e bhú tikpu, di ne nedhinga inde ma ngakpokpo lie ne angu ma hana kukulu 'ngú pindji Bádha Ngali lie-e, kala okpála nakodho mangimbo-o. <sup>8</sup> Ebhe mbila hana me, ma ngapa kukulu 'ngú me ma ne mukunda pi yi naali. Mukunda inde ma akunda yi ne e, ayie ka Yesu Kilisito.

<sup>9</sup> Ehe inde ma ngayo Ebhe pi yi ngú e ngae inde: ma ngayo Ebhe me mukunda gba yi-e nu bha ne kalanu, amba ateteke yi me yi mbila

engú na kùkùlù ne lele maka yi ngadu lie sùnda yi-o. <sup>10</sup> Abhomu-o, yi tsia mbíla di nalo obabadha 'ngú. Ma ngayo ndu 'ngú bhomu-o hana ngubula me ekpí li Yesu Kilisito agíe lie lie, bua yi de du má ngilili di ne me ehe bini na sisiti adú bhú yi de. <sup>11</sup> Nakolo li 'kpí ang-o, nadhuku gba yi-e du ndjindji bhú angu gba Yesu Kilisito, amba okpála dhogè Ebhe, u toko di ani.

*Polo akpi djali anga u ngakpokpo Bádha Ngali gba Kilisito*

<sup>12</sup> Ondaise ma, ma akúnda me yi mbíla ndjindji me ongú inde akolo li ma-a, amene mangbo me Bádha Ngali-e yangba ne kalanu. <sup>13</sup> Ka 'ngú ang-o, ndu osudha hana inde ngalila eti gba guvelenele, di ne ndu okpála koko hana ambíla me ma bhú tikpu kabula kulu gba Kilisito ma ngamene e-o. <sup>14</sup> La matá di-e, nau ma me ma bhú tikpu-o, ato masi bhú omabhuka bhelé li kpadji gba Ngámá gba ní-o. Uo matá ne tsulú ngú nakpokpo Bádha Ngali-e ade.

<sup>15</sup> A na paká me okpála koko ngakpokpo Bádha Ngali gba Kilisito-o, anga u ne 'ngbé bua li kute ma, u ngakúnda nagu ma. La-a, okoko di ngakpokpo engú gba ani-e ne bua bini. <sup>16</sup> Obhe ngamene ne bua o bini bhomu-o, ngamemene anga u ne mukúnda li pabíli gba ma, u mbíla ndjindji me kulu gba ma li bíli inde-e, a ko ngubula me ma akpokpo Bádha Ngali, amba ma suno di pí okpála me a ko kùkùlù 'ngú. <sup>17</sup> Okpála ma de apa 'ngú gba o kalanu-o, ngakpokpo Bádha Ngali gba Kilisito anga u ngakúnda me ni du nagu ma. Engú inde u ngakpokpo e yie li bua uo de, u ngakúnda me ma zu matá líkabhu bhú tikpu ei ane mane.

<sup>18</sup> A mene 'he bini de. Belegu u du akpokpo Bádha Ngali gba Kilisito ne siti bua , i du di-e ne bádha bua, Bádha Ngali ang-o bha naae nganu ne kalanu. Kaka-a, ma ngakpi djali.

La matá-a, ma adú bha ne djali, <sup>19</sup> padhá de, anga ma ambíla me ndu okpekpeke da 'ngú bhomu-o hana améne me Ebhe kobho ma, anga yi ngayo ani ngú ma, Bu Bhobua inde nani li Yesu Kilisito atima e-e, la di ngateteke ma.

<sup>20</sup> Engú inde ma nga'o 'to ma 'to e naali-e, a ko me ma ahá galikpe numu pí Kilisito 'kpí bini de. La-a, mbíla inde-e, maka ne ndu nedhinga hana-a, ma abhuka ne bua bini me, ma adú bha bini nadhogè Kilisito belegu ma du bhú mukobho, belegu ma kpi makpi. <sup>21</sup> Padhá de, anga muma-a, ma du bhú mukobho-o, ehe inde ane ne engbé-e, a ko nadhogè Kilisito. Ma kpi makpi-e ane la matá ne bádha. <sup>22</sup> I du me nadu ka ma bhú mukobho píla doto ei nde ade kpadji muma na ateteke okpála-a, ma mbíla kpadji bhende ayo nalo e de. <sup>23</sup> Ma ngadho 'bi sùnda ongú bhisi bhomu. A nga lima naali ne nayie píla doto inde ngubula me ma nu du de Kilisito. <sup>24</sup> La-a, nadu ka ma bhú mukobho-o ndjindji kabula yi.

<sup>25</sup> Ma ambíla ndjindji me, a la bhadi moko, ma du nga matá bhú mukobho, ní tsia dú ne yi bhú dabíli bini ngubula me yi nu li kpadji gba Ebhe-e ne kalanu, amba yi tsia kpi di djali li kpadji ang-o. <sup>26</sup> Nedhinga ma akóto lie bhú tikpu-o, ní tsia dú matá ne yi bhú dabíli bini-e, yi atóko Yesu Kilisito naali ka engú inde ani amene e muma-o.

*Yi lu kpekpeke bhú nabhuka*

<sup>27</sup> Engú inde ane la mane-e ngae inde: a ayo me nadhuku gba yi du li lelele maka li Bádha Ngali gba Kilisito apa lie-o, ngubula me, belegu ma go natsia yi, belegu ma go de-e, ma de dje me yi alu kpekpeke ne mabhundja bini, ne me yi ngalila ndu yi hana nabhuka gba yi inde alu pí Bádha Ngali-o. <sup>28</sup> Yi adjé tsulu ka obhulu yala gba yi-e belegu de bini. Bhobhomu-o asúno pí uo mbámbá me, ngauo-o, u angita, la ngayi-e, yi

li kpadji na mukobho. Ebhe asuno pi uo ngae. <sup>29</sup> Padhá de, anga Ebhe suno bha bini bádha bhú 'bu gba e pi yi ngú nabhuka Kilisito de, engú bini, ani asuno bádha bhú 'bu gba e pi yi ngú nazu di likabhu kabula Bádha Ngali gba ani-o. <sup>30</sup> Yi ngagu bhomu-o ngua gbele inde nako yi au me, ngama-a, ma adu agu e-o. Yi la di ngadje me, mbia inde-e, ma nga bha ngagu 'gú.

## 2

### *Yi kə liyi ne kuto maka Yesu Kilisito*

<sup>1</sup> I nde lie me yi akpətse liyi bhú dabili bini ne Kilisito-o, bhobhomu-o ngaha angu pi yi. A mo-o adi! I nde lie me ani ne mukunda pi yi-e, bhobhomu-o ngaha angu pi yi ngú nakpata kpadji gba ani-o. A mo-o adi! A na paká me Bu Bhobua akpətse yi ngae. A mo-o adi! A na paká me Ebhe la di ngasuno bádha bhú 'bu pi yi ngae. A mo-o adi! <sup>2</sup> I nde lie mo-o, yi bedhe bua ma ne djali bedhe li kpadji nadu, ne li kpadji nadu ne mukunda sunda yi, di ne li kpadji nadu ne makpətse na kukulu sunda yi. <sup>3</sup> Yi adú amene engú na bhayiki bhayiki de. Yi adú nabhi 'kpa yi pí mbulu yi li engú de. Engú bini, yi kə liyi ne kuto, yi du nau okpála koko me u ane yi mane. <sup>4</sup> Kpála ne kpála adú bha bini natsia engú gba e makpe de, engú bini, a ayo di natsia engú gba okpála koko uu.

<sup>5</sup> Yi du bhú ka yi ne ngua mab-hundja li Yesu Kilisito adu nani ne e-o.

<sup>6</sup> Belegu u aviti nani lie ne Ebhe-e bhú dabili bini-e,  
ani kpo nani 'ndji e ne Ebhe de me ni du ndu 'kpí hana maka ani-e de.

<sup>7</sup> La-a, ani a'o ká ndu 'ngú bhomu-o hana,

ani akolo bali, u atsia azu ani kpála-kuti.

Ndu okpála hana au me a ko kpála-kuti.

<sup>8</sup> Ani akə matá lie ne kuto, ani amanga Ebhe akolo bha makolo bhú nakpi ka e,\* inde u agi ani lie li kulusi-o.

<sup>9</sup> Ka 'ngú ango-o, Ebhe ngae makpe a'e'e ani ne abhúlá nane ndu ohe hana.

Bhú bádha bhú 'bu gba e, ani atsia a'o 'ili li ani, inde ane ndu 'ili hana.

<sup>10</sup> Ani amene mo-o ngubula me ndu 'he hana inde abhúlá di ne píla doto di ne asa doto,†

kikita lipaku o kuto kala Yesu

ngú nadhogə ani ka 'li ani-o,

<sup>11</sup> amba ndu okpála hana kpokpo mbámhá me Yesu Kilisito ne Ngámá.

U mene mo-o, u tsia dhogə di Ebhe 'Dyi ani.

### *Yi du maka zi 'ke píla doto*

<sup>12</sup> Kaka-a, ondaise ma na mukunda, maka yi amemene lie gəmə gəmə-o, yi manga Ebhe mamanga. Yi amanga bha bini ani ka de djila ma de. Engú bini, yi manga ani la matá ane mane nedhinga ní nde lie ne yi bhú dabili bini ade ko. Yi mene kulu liyi pi Ebhe ngubula nasuno me yi akobho, yi mene kulu ango-o bhú dabili bini ne nakə liyi ne kuto. <sup>13</sup> Padhá de, anga Ebhe ngae makpe ngamene kulu li bua yi ngubula me yi du nakunda di ne namene ongú inde nganga li ni-o.

<sup>14</sup> Bhú ndu kulu hana inde yi ngamene e-e, yi adú nadi mutokono de, yi adú la di ne kpeke 'bhə de,

<sup>15</sup> ngubula me kpála bini aú engú na sisiti napapa li yi de, di ne me yi du libhomu hana ndjindji, amba yi du ne ongisi gba Ebhe, ongisi inde li siti 'ngú nde bhú o ade. Yi ngakobho bhú ká osisiti okpála na

\* **2:8** 2:8 Nakpi ka e: Nani bhú nedhinga gba omaYuda-a, u adu bha nani nagi li kulusi ongbenge obhulu 'zi. † **2:10** 2:10 Asa doto: A ngasuno kuti gba okpála inde amu.

doto inde. Yi du bhú ká uo maka zi 'ke inde ngasu masu, <sup>16</sup> padhá de, anga yi ngakpokpo pi uo eli na mukobho. Abhomu-o, li 'kpí li Kilisito agó lie, ma adú kala aní ne gindaginda kabula yi, anga bhobhomu-o asuno mbámhá me kpéke kulu inde ma amene e bhú ka yi-e, ma mene padhá de. <sup>17</sup> Engú bini, nabhuka gba yi-e, a ko makiso inde yi ngaha e pi Ebhe-o. I du me u nde abhøø ma-a, bhobhomu-o dú maka makiso gba ma inde ma a'o e pi bhende gba yi-o. I du mo-o, ma adú ne djali, ní tsia kpí djali ne ndu yi hana bhú dabili bini. <sup>18</sup> A ayo me ngayi di-e, yi du ne djali, amba yi kpi djali ne ma bhú dabili bini.

#### *Polo atima Timoté bhú Filipino*

<sup>19</sup> I du me Ngámá Yesu nde akunda-a, ma ne 'to ma me ma tima Timoté agba yi sánda 'kpí inde, ngubula me aní gie lie-e, aní de kpokpo ngali gba yi-e muma, amba aní teteke bua ma maka aní adji di nateteke bua yi lie-o. <sup>20</sup> Kpála koko ka ma ei ade inde ngabhundja maka ma, a ko bha bini aní. Aní a'o bua e kukulu li 'ngú gba yi-o. <sup>21</sup> Ndu okpála koko hana bha bini nga'o bua o li ongu gba o makpe, u bhundja bhende gba Yesu Kilisito-o de. <sup>22</sup> Timoté makpe, yi mbila ndjindji me a ko bádha kpála. Ne ma ne aní-e, ya amene kulu nakpokpo Bádha Ngali . Aní ateteke ma bhú kulu ango-o maka li ndili ateteke 'dyi e lie-o. <sup>23</sup> Ma nga'o 'to ma me ma tima aní agba yi má gala, i du me u nde akodho 'ngú gba ma-a akodho-o. <sup>24</sup> Ma ne nabhuka me, i du me Ngámá nde akunda-a, ngama di-e, ma anú agba yi oo má gala!

#### *Polo agie Epafalodite bhú Filipino*

<sup>25</sup> Ndai ma Epafalodite inde yi atima nako e me aní go teteke ma li ndu ongu bhende aneke ka ma-a, ya amene kulu ne aní bhú dabili bini. Ya agú egú ne aní bhú dabili bini. La mbia inde-e, ma abhundja me a

ndjindji me ma gie aní pi yi. <sup>26</sup> Aní ne gumu naali me ni u matá ndu yi hana. Bua aní adu nako abhúlá, anga aní adje me yi ambila me adu nako li ni ne kuo. <sup>27</sup> A na paká me a adu nako li aní ne kuo masikpe de nakpi. La-a, Ebhe asuno bádha bhú 'bu gba e pi aní. Ebhe suno bha bini bádha bhú 'bu gba e pi aní de, aní asuno di muma ngubula me ma asia matá likabhu pí koko nane mane de.

<sup>28</sup> Kaka-a, bua ma alu abhúlá má gba me ma gie aní pi yi, yi u matá aní, yi tsia kpi djali, amba muma-a, bua ma tsia ke. <sup>29</sup> Li aní akólo lie oo, yi de sia aní ne djali anga a ko ndai yi bhú 'bu Ngámá. A ayo me yi manga ngua okpála bhende maka aní-e mamanga, <sup>30</sup> anga aní di me kpi nako li tula kulu gba Kilisito-o. Aní kpe kuo de, aní ateteke ma bhú da yi, maka a ayo nako lie me yi mene ngayi makpe, i dú me yi dú nako sii-o.

## 3

#### *Lele nandu ngbingbili kala Ebhe*

<sup>1</sup> Ondaise ma, 'li ma na soso pi yi-e ngae inde. Yi kpi djali anga yi ne okpála gba Ngámá. Ongú nako ma aye e pi yi kalanu-o, ma matá bha ngayeye ne toto. Ndala li ma tété ade, la pi yi-e, a ngubula nato masi bhú yi ne kalanu. <sup>2</sup> Ma apa pi yi me, yi lila liyi ka okpála inde ngamene sisiti kulu-o malila. A ko obulu. U bha bini ngau ngbéngbé engú nato okpála bhú gandja. <sup>3</sup> Nganí-e, ní ne okpála inde ngakodho kukulu gandja-a nganí, anga ní ngamene kulu liní pi Ebhe ne angu gba Bu Bhobua . Ní ne gindaginda anga ní ne okpála ka Yesu Kilisito . Ní 'o bua ní li ongu inde ngayie ka okpála-a de.

<sup>4</sup> I dú me adu li ongu ango-o ne tata-a, ma de a'ó di bua ma tété. I du me kpála bini nde abhundja me ni ti da na'o bua ni li ongu ango-o, ngama-a, ma ambila me ta na'o

buwa ma tété ane bhende gba anie mane. <sup>5</sup> Ngama-a, ma ne kukulu Ebele, azu ma ne oEbele. Ma ne mafsalaele, bhú piga gba Bendjame. U azu ma lie, u ato ma bhú gandja pita 'kpí madjina.\* Li 'ngú bhende atsia líli gba omaYuda-a, ma nako ne muFalisai . <sup>6</sup> Li 'ngú bhende atsia nakpata líli gba ní-e li lelele-e, ma adu nako nato mbolo li omakilisito. Li 'ngú bhende atsia nadu ngbingbili inde li u aye e bhú olíli gba ní omaYuda-a, ma akpata ndundu hana má kpəkəbhə, ma ti belegu li susuka de bini.

<sup>7</sup> Ma adu nako abhundja me ongu bhomu-o ti da nateteke ma. La-a, kabula Kilisito, ma au ndundu hana padhá. <sup>8</sup> Ma au ndu oehe inde adu ka ma-a hana me tata tété ade. Padhá de, anga i du me ma nde ambila Ngámá gba ma Yesu Kilisito ndjindji-e, bhobhomu-o ane muma ne bádha ngae. Ma atse ndu 'he hana kabula ani. Ma ngau ongu bhomu-o bhú djila ma maka zibotu ngubula me ma sia Kilisito, <sup>9</sup> di ne me ma du libhomu hana pi ani. Ma pá matá de me ma ngbingbili kala Ebhe anga ma ngakpata líli gba omaYuda-a de. Ehe inde nga'o ma ngbingbili kala anie, a ko mangbo ma abhuka Kilisito lie-o. Ebhe amene ngae me ma kolo ngbingbili anga ma abhuka ani. <sup>10</sup> Ma akunda bha koli 'he bini. Ma akunda me ma mbila Kilisito, a la di-e me ma mbila angu inde azuku ani-o. Ma akunda la di me ma zu likabhu maka ani azu nani lie-o. Ma tsia du bedhe ngu nakpi pi ani maka ani akpi nani lie muma-o, <sup>11</sup> ngubula me i du me Ebhe nde akunda-a, ma de zuku di maka ani.

<sup>12</sup> Ma abhi 'kpa ma pí mbulu ma de me ma asia oehe bhomu-o asia, di ne me ma akolo ali soso akolo-o de. Engu bini, ma ngamene ne kpeke me ma sia oehe bhomu, anga Yesu Kilisito aholo 'kpa ma makpe ngae. <sup>13</sup> Ondaise ma, ngama-a, ma

pa de me ma asia oehe bhomu-o asia de. Koli 'he bini inde ma ngamene e-e, a ko napa me ma 'ili 'to ma li ongu bhende akodho 'kpí akodho-o, amba ma mene ne kpeke me ma nu ne kalanu. <sup>14</sup> Ma ngagu holo ne kalanu ngubula me ma kolo li bili inde ma a'o buwa ma lie-o, amba ma sia makalá li Ebhe nga'i ní ngu e abhulá, kabula engu inde li Yesu Kilisito amene e pi ní-o. <sup>15</sup> A ayo me, nganí obhende inde abhele li kpadji gba Ebhe-e abhele-e, ní du nabhundja moko. I du la me kpála koko nde ngabhundja kpi-e, Ebhe ambamba tata pi ani mambamba. <sup>16</sup> Belegu i du bha pi-ie, ní kpata bha kpadji inde ní akpata e nakolo pi mbia inde-e ko.

<sup>17</sup> Ondaise ma, ndu yi hana yi kpata nganda ma. Yi banga djila yi li okpála bhende ngadhuku maka ya apana lie pi yi ko. <sup>18</sup> Ma pa mo-o padhá de, anga okpála bhelé ngadholo maka obhulu yala gba Kilisito kabula nakpi ka ani li kulusi-o. Ma apa 'ngu bhomu-o pi yi bhutsibhutsi. La mbia inde-e, ma matá ngapapa ne ngula bhú djila ma. <sup>19</sup> Li 'so 'kpí-e, u anu bhú djua. Padhá de, anga ebhe gba uo-o, a ko 'bu uo. Uo ne gindaginda li ongu inde a ayo me u dje namu li e-o. U bha bini ngabhundja ongu na doto. <sup>20</sup> La pi ní-e, kuti gba ní-e abhulá. Ní ngadjeke Ngámá gba ní Yesu Kilisito, inde di mukobho gba ní-e me ani yie abhulá, amba ani go. <sup>21</sup> Ani agó lie, ani ayipa kute ní na mbolo inde-e me akolo maka kute ni na angu. Ani améne mo-o ne angu inde ani di ngako angu e pí ndu 'he hana ne e-o.

## 4

<sup>1</sup> I du mo-o, ondaise ma na mukunda, yi lu kpekepeke bhú Ngámá. Ma kunda yi naali, ma ne gumu me ma u matá yi. Ma

\* 3:5 3:5 Pita 'kpí madjina: A akunda napa me pita 'kpí mananika u azu ndili lie.



ngakpi djali kabula yi, ma la di ne gindaginda kabula yi.

*Polo aha olíli na soso*

<sup>2</sup> Kikiliako, Evodia ne Sitika, ma ayo ka yi me yi dɔ ne guo 'ngú sunda yi, anga yi ne okpála gba Ngámá. <sup>3</sup> Ma ayo di ka mɔ ndai ma na mukunda, teteke olisi bhisi bhomɔ-o mateteke, anga ya amene kulu ne uo kpekpeke, ya atsia azu di likabhu ne uo bhú dabilí bini ngubula Bádha Ngali, di ne Kelema, a la di-e ndɔ ondaise ma koko hana inde ya amene kulu gba Ngámá ne o ko. U aye ndɔ 'li uo hana bhú bhuku na mukobho.

<sup>4</sup> A ayo me yi kpi djali ndɔ 'kpí hana anga yi ne okpála gba Ngámá. Ma matá ngapapa ne toto me, a ayo me yi 'kpi djali. <sup>5</sup> A ayo me yi dɔ ne bhuku bua pí ndɔ okpála hana. Yi mbila hana me Ngámá agó mbia. <sup>6</sup> Bua yi agúku belegu ka 'ngú bini de, engú bini, yi yo mangbo ka Ebhe ndɔ 'he hana yi nde ne gumu e-o. Yi yo ani bhú nedhinga hana. Yi yo ani, amba yi gie heni pí ani. <sup>7</sup> I dɔ me yi nde amene mo-o, li Ebhe há guo 'ngú gba e inde ane ndɔ imbilangu hana-pí yi. Guo 'ngú ango-o alíla bhobua yi bhú dabilí bini di ne mabhundja gba yi-e, anga yi ne okpála gba Yesu Kilisito.

<sup>8</sup> Ondaise ma, 'li ma na soso pí yi-e ngae inde: a ayo me yi mbila líyi ne nabhundja píndji obabadha ongú, li okpála atotoko e-o. A ko 'ngú inde li eu nde bhú e ade, engú inde ngbingbili, engú inde li zibotu nde bhú e ade. A ko 'ngú inde nganga li okpála, engú inde li lelele. <sup>9</sup> Ongú inde ma akpokpo e pí yi, inde yi aziba e, ongú inde yi adje e bhú 'bhø ma, yi au ma ngamene e-e, yi mene ongú bhomɔ. Abhomɔ-o, Ebhe inde ahaha guo 'ngú pí ní-e dɔ bhú dabilí bini ne yi.

*Polo agie heni ngubula oehe inde u atima e pí ani-o*

<sup>10</sup> Ma ngakpi djali naali bhú Ngámá anga yi amata abhundja ma.

A na paká me yi adɔ nako nabhundja ma kalanɔ. Engú bini, kpadji dɔ nako de me yi teteke ma-a de. Nedhinga ane la bhadi naali me yi nde teteke ma de. <sup>11</sup> Ma pa mo-o ka 'ili de me ma bhú ndibhili-e de. Padhá de, anga ma ambila lima ne nagili nganda ma bhú ndɔ nedhinga hana. <sup>12</sup> Ma ambila lima ne nakobho bhú ndibhili, ma ambila di lima ne nakobho bhú nedhinga li ehe nde lie ka ma bhelé. Ma ambila lima ne nadɔ ndjindji ne ndɔ bili hana, ne bhú onedhinga hana, belegu li ehe nazɔ mazɔ dɔ ka ma, belegu li nedhinga na gumu, belegu li ehe dɔ ka ma bhelé, belegu ma dɔ bhú ndibhili. <sup>13</sup> Ma ti da nakibila ndɔ ongú bhomɔ-o hana ka angu gba Yesu Kilisito inde bhú ma-o. <sup>14</sup> Belegu inde lie mo-o, yi amene ndjindji ngubula nateteke ma li nedhinga ma ngazɔ likabhu lie-o.

<sup>15</sup> Ondaise ma na gudhu na Filipoi, yi mbila hana me nedhinga ma abhuka nakpokpo Bádha Ngali lie bhú ndu doto gba yi na Makedonia-a, ateteke bha bini ma ne Dadjua gba yi-o. Dadjua koko bini ade inde ya amata 'kpa ya ne e. <sup>16</sup> Padhá de, anga ma adɔ lie bhú Tesalonike-e, yi atima ehe inde ma adɔ ne gumu e muma bhutsibhutsi. <sup>17</sup> A ko de me ma ngagili makalá-a de. Engú bini, ma ngagili mangbo me Ebhe suno bádha bhú 'bu gba e pí yi ane mane ka ohe yi ngapɔ e muma-o. <sup>18</sup> Ma asia ndɔ 'he hana inde yi atima e muma-a, ane belegu bhende ma adɔ ne gumu e-o. Li ma au oehe li Epafolodite ago muma ne e lie, ehe bini neke matá ka ma de. Oehe ango-o maka makiso inde u ahaha e pí Ebhe, inde li se e nde li Ebhe ndjindji, inde di nganga li Ebhe manga. <sup>19</sup> A ka Ebhe gba ma-a ne bhiti ehe na bhibhiti. Ani ahá pí yi ndɔ 'he hana yi nde ne gumu e-o. Ani ahá pí yi li kpadji gba Yesu Kilisito. <sup>20</sup> A ayo me u dhøgø Ebhe 'Dyi ní dɔdɔma ne dɔdɔma. A adɔ

moko!

*Polo abhana lie pi omabhuka na  
Filipo*

<sup>21</sup> Yi yi ndu okpála hana inde li Yesu Kilisito abhu o me u du ne okpála gba ni-o. Ondaise ni ya nde ne o ei-e, yi di yi mayi.

<sup>22</sup> Ndu omabhuka koko hana inde ei yi yi mayi, ane la mane obhende ngamene kulu bhú 'ti gba 'ngbé ngámá na LomaKaisala-o .

<sup>23</sup> A ayo me Ngámá Yesu Kilisito suno bádha bhú 'bu gba e pi yi.

**Balua gba Polo  
pi omabhuka na gudhu  
na  
Kolosai  
Eli na kalanu**

Polo aye nani balua inde pi okpala na Dadjua na Kolosai, gudhu na Adji Minele ne Efeso. Dadjua ango-o, Polo 'o nani ngae de, la-a, adu nani bhú ndu doto inde li Polo adu atsia 'kpí lie ngae. Abhomu-o, ani atsia atima okpala na kulu nayie bhú Efeso, 'ngbé gudhu na ndu doto na ngámá gba okpala na Loma inde bhú Adji-o. Padhá de, anga Polo adje nani me omusuno na eu abhú Dadjua na Kolosai. Ta ngú nasuno ango-o adu me ngubula nambila Ebhe ne nandu ne mukobho na kukulu-o, a ayo nadhoge obhelesi okpala koko di ne ongámási na Ebhe. La-a, omusuno bhomu-o apa me, a ayo naziba namene ongu koko maka nakodho gandja, amba u kpata li lelele ongu pindji oehe nazu mazú, ne pindji ongu koko.

Polo aye balua pindji nasuno na kukulu gba makilisito ngubula naboyo onasuno na eu ango-o ko. Engu na ngbéngbé ani agie e, a ko me Yesu Kilisito ne angu ngu naha mukobho na kukulu. La-a, omabhuka koko ne ndu ongu u ngamene e ngato bha kpala bhú ngita. Li papá gba Kilisito, Ebhe abho doto. La di li papá gba ani-e, Ebhe atsia agie ndu oehe na doto hana pi ani. Yi du bhú makpetse ne Kilisito de-e, mukobho dú pi okpala na doto de. Pipita-a, Polo ngapana mbámabá nasuno inde ngbéngbé inde pi omabhuka ngubula mukobho gba o-o.

Tisike inde anu ne balua gba Polo abhú Kolosai-e, adholo bhú dabili bini ne Onezime inde bali li Polo aye balua li 'ngu gba e pi Filemo-o.

**Ongbengbe ongu inde bhú bhuku inde-e ngae inde:**

Eli na kalanu 1:1-8

Mukobho gba Kilisito ne kulu gba e-o 1:9 - 2:19

Mukobho na mbia bhú Kilisito 2:20 - 4:6

Eli na soso 4:7-18

*Polo yi omabhuka na gudhu na Kolosai mayi*

<sup>1</sup> Ngama Polo, ma ne bhulu titima gba YesuKilisito . Padhá de, anga Ebhe akunda ngae, a la die-e Timoté, ndai ní. Ya aye balua inde-e <sup>2</sup> pi okpala na bububu di na ngbingbili gba Ebhe inde bhú gudhu na Kolosai, ondaise ní na mukunda inde abhuka Kilisito. A ayo me Ebhe 'Dyi ní tuko bisagu pi yi, amba ani ha di guo 'ngu pi yi.

*Polo agie heni pi Ebhe*

<sup>3</sup> Ya ngagie heni pi Ebhe, 'Dyi Ngámá gba ní Yesu Kilisito ndu nedhinga hana ya ngayo Ebhe pi yi lie-o. <sup>4</sup> Padhá de, anga ya adje engu pindji nabhuka gba yi bhú Yesu Kilisito, di ne mukunda yi nde ne e pi ndu obubu okpala gba Ebhe-e hana-o. <sup>5</sup> Li ngali na kukulu 'ngu, inde Bádha Ngali akolo lie bhutsibhutsi na kalanu agba yi-e, yi atsia ambila 'ngu li engu inde li Ebhe awo e pi yi abhúla-o. Abhomu-o, nabhuka gba yi ne mukunda gba yi-e atsia alu pi engu inde yi nga'o 'to yi 'to e ango-o. <sup>6</sup> Bádha Ngali ango-o ngayangba, a la di ngazu nguwa pila doto libhomu. A amene bhadi pi yi moko li 'kpí inde yi adje engu lie pindji bádha bhú 'bu gba Ebhe-e lie-o, di ne yi ambila lie me bádha bhú 'bu ango-o kukulu-o. <sup>7</sup> Epafaladje, ndai ní na mukunda bhú kulu apa engu ango-o pi yi ngae. Ani ngamene kulu pi yi maka kpala na kulu na kukulu gba Kilisito. <sup>8</sup> Ani akpokpo 'ngu pi ya pindji mukunda inde li Bu Bhobua aha e pi yi-o.

<sup>9</sup> Kaka-a, nayie li ekpi ya adje engu gba yi-e lie-e, ya ndala li nayo Ebhe pi yi de. Ya la di ngayo ka Ebhe me ani ha imbilangú na kpokpo kú 'ngu inde ngayie ka Bu Bhobua gba

ani-e pi yi. Abhomu-o, yi tsia mbila 'ngú inde ani akunda me yi mene e-o. <sup>10</sup> Yi tsia kóbho maka li Ngámá akunda lie-o. Yi tsia méne di ndu 'ngú hana inde ani akunda e-o. Yi méne ndu 'ngú na babadha hana, yi tsia mbila Ebhe ndjindji. <sup>11</sup> Ya ngayo ka Ebhe me ani bedhe yi ne angu na asasaua gba e bhú ndu 'ngú hana, ngubula me yi kibila ndu 'ngú hana ne 'ndjá bua. <sup>12</sup> Yi gie heni pi 'Dyi ní Ebhe ne djali hana. Padhá de, anga ani aha angu pi yi ngú nasia tia inde ani awo e pi okpála gba e bhú kuti na munde yi na zi 'ke-o. <sup>13</sup> Ani agbegbe ní bhú angu na biti, ani atsia a'o ní bhú kuti gba e na munde yi gba Ndili gba e na mukunda-o. <sup>14</sup> Li pápá gba ani-e, Ebhe agbegbe ní bhú bali. Ani atsia ambu di li siti 'ngú gba ní-o.

*Lele maka li Yesu Kilisito nde lie, la di ne kulu gba e-o*

<sup>15</sup> Ebhe inde u ti da nau e de-e ngau lie bhú Kilisito.

A ko Ndili na kalanu,\* inde di pí 'ndji ndu 'he hana li Ebhe abho e-o.

<sup>16</sup> Padhá de, anga Ebhe abho ndu 'he inde abhúlá ne bhende akuto-o hana li pápá gba ani:

oehe inde u ngau e,  
ne bhende u uu e de,  
osisiti bua inde ngau abhúlá, ne píla doto, inde la di ne angu.

Ebhe abho ndu 'he hana li pápá gba ani.

Ani abho la di ndu 'he ango-o hana pi ani.

<sup>17</sup> Kilisito bhú mukobho kala ndu 'he hana.

La di-e, ndu 'he hana inde bhú mukobho-o ala li kute ani.

<sup>18</sup> Ngaani-e, a ko 'ndji kute, inde Piga gba Ebhe-o.

Mukobho na mbia-a akpo lita e bhú ani, ani ne Ndili na kalanu-o ngae.

A ko kpála na kalanu inde u azuku e bhú ká okpála inde amu,

ngubula me ani du kpála na kalanu bhú ndu 'he hana ngae.

<sup>19</sup> Padhá de, anga Ebhe apa me ni adú ndu 'kpí hana bedhe má kpaka bhú Ndili gba ni-o.

<sup>20</sup> La di-e, ani agie nadjé lio ne ndu 'he hana li pápá gba Ndili gba e-o.

A na paká me li Kilisito atuko ngute e lie li kulusi-e,  
ani agie nadjé lio ka Ebhe ne ndu 'he hana inde abhúlá,  
di ne bhende píla doto-o.

<sup>21</sup> La ngayi-e, yi adu nani de Ebhe tsutsu. Yi adu obhulu yala gba ani ka ndu sisiti 'ngú hana inde yi adu abhundja e, di ne bhe yi adu amene e-o. <sup>22</sup> Engú bini, kabula nakpi inde li Ndili gba ani akpi e li kute e-e, Ebhe aholo matá nadjé lie ne yi. Ani amene mo-o ngubula me yi kolo kala ni bubu, amba yi adú bhú zibotu de, yi adú la di bhú siti 'ngú de. <sup>23</sup> Kaka-a, a ayo me yi lu kpekpeke bhú nabhuka. Yi ayie li kpadji na Bádha Ngali-e de, anga a ko ehe inde ní nga 'o 'to ní 'to e ko. Yi adje Ngali ango-o, u atsia akpokpo di pi ndu okpála hana. Ngama Polo, ma akolo kpála na kulu na Bádha Ngali ango-o.

*Polo ngadje likabhu, ani di ngagu gbele ngú omabhuka*

<sup>24</sup> Mbia inde-e, ma ngakpi djali ngú likabhu inde ma ngazu e ngubula yi ko. Padhá de, anga bhú kute ma-a, ma ngabedhe bhomu-o bhe likabhu inde li Kilisito a neke e ngubula kute e, inde Piga gba Ebhe-o. <sup>25</sup> Ma akolo kpála na kulu na Piga gba Ebhe, nakpata lele kulu inde li Ebhe aha e muma ngubula yi-o. Ani aha muma kulu nakpokpo ngali gba e hana. <sup>26</sup> Ngali ango-o, a ko engú gba ani inde ani awo nani e bhutode pi ndu okpála hana. Engú

\* **1:15** 1:15 Ndili na kalanu: A akunda napa me: ani adu nani bhú mukobho kala ndu 'he hana inde li Ebhe abho e-o.

bini, mbia inde-e, ani ambamba tata pi omabhuka gba e-o.

<sup>27</sup> Padhá de, anga Ebhe akunda nambamba ta engú gba e inde ani awo nani e mawo-o pi uo. A ko engú inde ndjindji naali, ne asasaua, inde ani aleke e pi ndu okpála hana. Engú ang-o ngae inde: Kilisito bhú yi, ani atsia apa pi yi ndjindji me yi alí bhú Asasaua gba Ebhe inde yi nga'o 'to yi 'to e-o. <sup>28</sup> Kaka-a, ya ngakpokpo ngali gba Kilisito pi ndu okpála hana. Ya ngagbele 'dje okpála ne naha líli pi uo ne imbilangu hana, amba kpála ne kpála bhele bhú nabhuka bhú nakpotsè lio ne Kilisito. <sup>29</sup> Kaka-a, ma ngamene kulu, ma la di ngagu gbele ne angu inde ayie ka Kilisito, inde la di ngamene kulu bhú ma ne angu hana-o.

## 2

<sup>1</sup> Ma akunda me yi mbila ndjindji me gbele inde ma ngagu e ngú yi-e kpekpeke. Ma ngagu gbele ang-o pi okpála na Laodikia, la di pi okpála koko inde i u nga ma de-o. <sup>2</sup> Ma akunda me bua uo bedhe ne masi bedhe. U du bini bhú mukunda, u du la di ne djali hana bhú engú li imbilangu na kukulu-o ngaha e-o. U tsia ti da nambila engú gba Ebhe inde awo li e mawo-o. A akunda napa me, a ko Kilisito ngae makpe. <sup>3</sup> Ndu otia na imbilangu hana inde ayie ka Ebhe-e awo lie bhú ani. <sup>4</sup> Ma ngapa 'ngú bhomu-o, amba kpála bini apite yi ne babadha eli na eu de. <sup>5</sup> Abana ma nde lie de yi tsutsu bhú kute-e, ma ne yi bhú dabili bini li bhobua. Ma la di ne djali ngú nau me agba yi-e, ndu 'ngú hana ngadholo li kúkú, yi ala la di kpekpeke bhú nabhuka bhú Kilisito.

*Yi la kpekpeke bhú nabhuka inde u asuno e pi yi-o*

<sup>6</sup> A na paká me yi asia Yesu Kilisito maka Ngámá. Kaka-a, yi du bhú makpotsè ne ani. <sup>7</sup> Yi to sie yi bhú

ani, mukobho gba yi du la di me a nde ala bhú ani. Yi du ndu 'kpí hana me yi nde ala kpekpeke bhú nabhuka, nakpata lele nasuno inde yi asia e-o. Yi bedhe ne nagie heni pi Ebhe.

<sup>8</sup> 'Ee! Yi lila liyi me kpála bini aholo yi li ekú ne obabadha oeli na eu, di ne imbilangu gba kpálakuti de. Padhá de, anga a ngalu pí nasuno gba okpála, a di ngalu pí angu na obua na doto inde. A ala pí Kilisito de. <sup>9</sup> Padhá de, anga ndu 'ngú hana inde bhú Ebhe-e asia kute bhú Kilisito. A la di ngadu hana libhomu bhú ani. <sup>10</sup> Yi asia la di ndu 'ngú hana má kpəkəbhə bhú Kilisito. Ngaani-e, ani ne angu pí 'ndji osisiti bua inde ngau, inde la di ne angu-o.

<sup>11</sup> Bhú nakpotsè liyi ne ani-e, yi ali gandja. Gandja ang-o, akodho ne 'kpa kpála de. Engú bini, gandja ang-o ayie ka Kilisito, ngubula nagbegbe yi bhú 'ngú inde adu ato yi bhú siti 'ngú-o. <sup>12</sup> Padhá de, anga li yi asia batisimo lie-e, u azi yi bhú dabili bini ne Kilisito. Yi atsia azuku la di bhú dabili bini ne ani. Padhá de, anga yi abhuka angu gba Ebhe inde azuku ani bhú ká okpála inde amu-o.

<sup>13</sup> Nani kalanu-o, yi adu me yi nde amu li bhobua yi amu kabula siti 'ngú gba yi-o. Padhá de, anga yi adu me yi nde li gandja de. Yi adu la di omupagano. Engú bini, mbia inde-e, Ebhe amene me yi du bhú mukobho ne Kilisito. Ani ambu li sisiti 'ngú gba ní-e hana. <sup>14</sup> Ani abulu balua inde adu na'o 'ngú pí ní, inde adu di napa 'ngú li ní sisiti ka ongu inde u aye e bhúbhú-o. Ani abhele engú ang-o li u abhi ani lie li kulusi-o. <sup>15</sup> Ka kulusi gba Kilisito-o, Ebhe a'e angu gba osisiti bua inde ngau, inde la di ne angu-o. Ani atsia asuno nayie ka uo mbámá maka okpála na 'kpú inde ngadhuku bhú galasisi li Ndili gba ani aha angu uo lie-o.

<sup>16</sup> Kaka-a, yi a'ó kpála bini de me

ani 'o 'ngú pí yi pindji ezú inde yi nde ngazú e, di ne engu inde yi ngandji e, i dū di-e pindji engú na anokomia , i dū di-e ne epe inde akoto na mbia, di ne ekpí naguo de. <sup>17</sup> Ndū ongú bhomū-o hana ne kulu ongú na babadha inde ngago-o. Engú bini, engú na kukulū-o ne Kilisito. <sup>18</sup> Yi a'ó de me kpála bini 'o 'ngú pí yi-e de, okpála inde ngakpi djali bhú nakə lio ne kuto bhú namene ongú inde ngau lie mau-o de. La di ne bhú nayo oandjelu maka Ebhe-e, u ngaha lio pi ongú inde u ngau e-o. U abedhe ne 'ngbé 'ndji li tata nde lie ade, li mabhundja gba o na kpála-kuti ngatima me u mene e-o. <sup>19</sup> U ngayala nagbite lio li Kilisito inde maka endji na kute. Padhá de, anga kute ang-o libhomu ngasia angu ka Kilisito, a ngagbite la di lie bhú dabili bini maka li Ebhe akanda lie-o.

*Yi amu bhú dabili bini ne Kilisito, yi la di ngakobho bhú dabili bini ne ani*

<sup>20</sup> Li yi akpi lie bhú dabili bini ne Kilisito, yi atsia akoto bhú bali sakpa obua inde ngau pí doto-o, la ka ni yi ngamene 'ngú lie maka okpála na doto? Ka ni yi aziba lie me u ha olíli pi yi me: <sup>21</sup> mo ohá ehe inde-e de. Mo olé ehe inde-e de. Mo obú 'kpa mū tété de. <sup>22</sup> Angu na ndū 'he bhomū-o ngandjia hana má kpəkəbhə nedhinga li okpála ngamene kulu lie ne di-o. A bhomū-o olíli di ne nasuno gba okpála. <sup>23</sup> A na paká me olíli bhomū-o ngau lie maka bhende na imbilangū. Padhá de, anga a ngagama 'ngú pindji mayo gba okpála, di ne nakə lio ne kuto di ne namene kute o kpekpeke. Engú bini, olíli ang-o ne angu bini ade ngubula naha angu gumū na sisiti gba kute ní-o.

### 3

*Yi gili ongú inde abhúlá*

<sup>1</sup> Yi azuku bhú dabili bini ne Kilisito . Kaka-a, yi gili ongú inde

abhúlá li bili li Kilisito adū lie li pá 'kpa na kokpa gba Ebhe-o. <sup>2</sup> Yi ha liyi libhomu ngubula engú na abhúlá. Yi adú ne naha liyi ngubula engú na píla doto inde-e de. <sup>3</sup> Padhá de, anga yi amu, mukobho gba yi atsia awo lie bhú dabili bini ne Kilisito bhú Ebhe. <sup>4</sup> Mukobho gba yi na kukulū-o ne Kilisito. La di-e, li ani asúno lie lie, yi azé bhadi ne uo bhú sangu-o bhú dabili bini.

<sup>5</sup> Kaka-a, yi bhələ ogumū na doto inde li bhobua yi-e mabhele: a ko zabhe, zibotū, gumū kute, gumū na sisiti, gumū 'he inde maka nayo ebhe na eu-o. <sup>6</sup> Ongua ongú bhomū ngagbele ke 'ngú gba Ebhe-e pí okpála inde ngandjo 'li ani-e ngae. <sup>7</sup> A bhomū-o lele maka yi adū nani lie li nedhinga yi adū amene siti 'ngú lie-o.

<sup>8</sup> La mbia inde-e, yi bala ndū ongú bhomū-o hana: ndu bua, nake 'ngú lio, ne siti bua . Sobho ne siti 'li akóto bhú 'bhə yi de. <sup>9</sup> Yi apá eu sūnda yi de, anga yi a'o ká mukobho gba yi na didili-e ne ndū 'ngú ang-o hana. <sup>10</sup> La di-e, yi akolo bhú mukobho na mbia, anga yi akolo okpála na mbia inde li Ebhe ngamene lie me u kolo maka ni Ebhe gba yi, amba u mbila ni ndjindji. <sup>11</sup> Kaka-a, mbia inde-e, angu napa me: a inde-e omaYuda, obhende ne omaYuda ade, a inde-e okpála ali gandja, obhende i li gandja de-e matá ade. Ogandji okpála , di ne obhende i mbila lio ne nakobho ne okpála bhende bhú bali ade-e matá di ade. Obalise, ne okpála bhende bhú bali ade-e matá di ade. Engú inde pi ní ngbéngbé-e, a ko Kilisito, inde ale pi ní bhú ndū 'ngú hana.

<sup>12</sup> Yi ne okpála gba Ebhe. Ani abhu yi, ani la di ne mukunda pi yi. Kaka-a, a ayo me yi dū ne ndjinga. Yi dū ne bádha bua. Yi kə liyi ne kuto. Yi dū ne guo 'ngú di ne 'ndjá bua. <sup>13</sup> Yi kibila liyi sūnda yi makibila, amba yi dū di ne mambu. Li kpála dū ne engú ne kilí e-e, ani de mbu li

ani maka Ngámá ambu nani li yi lie-o. <sup>14</sup> Bhú ndu 'ngú bhomu-o hana-a, yi du ne mukunda sunda yi, anga mukunda ne ekpú inde ngagbite yi bhú dabili bini. <sup>15</sup> A ayo me guo 'ngú gba Ebhe-e si kuti e li bua yi. Ebhe a'i yi kabula guo 'ngú ango-o me yi du bhú koli kute bini. Yi du okpála inde ngagie heni pi Ebhe. <sup>16</sup> A ayo me eli gba Kilisito ne obabadha ndu 'ngú gba ani-e hana adu li bua yi. Yi suno ongu sunda yi, amba yi ha la di líli sunda yi ne imbilangu hana. Yi li ndu oetsi hana pi Ebhe ne bua yi hana, di ne nagie heni pi ani. <sup>17</sup> Ndu 'ngú hana inde yi ngamene e, i du bhú nagama 'ngú, i du di-e bhú namene ehe-e, yi mene ne 'li ngámá Yesu, ne nagie heni pi 'Dyi ní Ebhe li pápá gba ani.

*Engú inde a ayo me omabhuka kpata e bhú mukobho na mbia-o*

<sup>18</sup> Ngayi olisi-e, yi manga obhosi gba yi-e mamanga maka a ayo lie me yi mene kala Ngámá-o. <sup>19</sup> Ngayi obhosi-e, yi du ne mukunda pi olisi gba yi-o. Yi aná bhúla yi pi uo de. <sup>20</sup> Ngayi ongisi-e, yi mene líli gba okpála inde azu yi-e bhú ndu 'ngú hana. Padhá de, anga a bhomu-o engú inde li Ngámá akunda e-o. <sup>21</sup> Ngayi odyi ongisi-e, yi adú nambembe bhú 'ndji ongisi gba yi-e de, amba bua uo asía ndala de.

<sup>22</sup> Ngayi obalise-e, yi mene líli gba omakulasi yi píla doto bhú ndu 'ngú hana. Yi améne bha bini li nedhinga u nde ngalila yi lie ngubula me u ziba yi-e de. Engú bini, yi mene líli gba uo-o ne bua bini kabula yi ngamanga Ngámá lie-o. <sup>23</sup> Bhú ndu 'ngú hana yi nde ngamene e, yi mene ne bádha bua mugito me yi ngamemene pi Ngámá. A aú lie de me yi amene pi kpála de. <sup>24</sup> Yi mbila ndjindji me Ngámá ahá makalá pi yi maha. Yi asía bádha 'ngú inde ani a'o e pi okpála gba e masia.

Padhá de, anga Músuno na kukulu inde yi ngamene kulu pi e-e, a ko Kilisito. <sup>25</sup> Engú bini, kpála inde amemene siti 'ngú-o, asía makalá na siti 'ngú gba e-o. Padhá de, anga Ebhe gbogbo bhusu okpála de.

## 4

<sup>1</sup> Ngayi omakulasi okpála-a, yi mene obalise gba yi-e ndjindji. Yi du di pi uo ne ngbili 'ngú . Yi mbila ndjindji me ngayi-e, a di ka yi ne Makula yi inde abhúlá.

*Líli pi omabhuka*

<sup>2</sup> Yi gbite liyi li mayo. Yi du li zuku bhú nayo Ebhe ne nagie heni pi ani. <sup>3</sup> Bhú mayo gba yi-e, yi yo Ebhe di pi ya, amba ani ha kpadji pi ya ngú nakpokpo eli gba ani, di ne nakpokpo engú inde awo\* lie bhú Kilisito-o . Padhá de, anga ma mbia inde bhú tikpu kabula 'ngú ango-o. <sup>4</sup> Yi yo ka Ebhe me ma kpokpo 'ngú li 'ngú inde awo lie bhomu, di ne me ma suno mbámbá maka a ayo lie-o.

<sup>5</sup> Yi dhuku bhú ká okpála inde ne omakilisito ade-e ne imbilangu, ne namene kulu ndjindji bhú ndu nedhinga gba yi-e hana. <sup>6</sup> A ayo me 'li yi du ndu 'kpí hana ndjindji, ati la di li bua okpála. Yi mbila liyi ne nagie bádha 'li pi ndu okpála hana.

*Polo bhú dabili bini ne obi e yi omabhuka mayi*

<sup>7</sup> Tisiko akpokpo ngali gba ma pi yi ngae. A ko ndai ní na mukunda, a ko bádha kpála na kulu. A ko kpála na kulu na kukulu bhú dabili bini ne ma bhú kulu gba Ngámá-o. <sup>8</sup> Kaka-a, ma atima ani ngaani makpe agba yi ngú nakpokpo lele maka ya nde lie pi yi, di me ani to masi bhú yi. <sup>9</sup> U adhuku bhú dabili bini ne ndai ní na mukunda inde la di ngbingbili, Onezime inde suka yi-o. U akpokpo ndu 'ngú inde ngakodho 'kpí ei-e pi yi hana.

\* **4:3** 4:3 Engú inde awo lie: A ko ngali gba Ebhe inde u mbila nga nani e kalanu de-o. Ngali ango-o, a ko Kilisito.

<sup>10</sup> Alisitaluko inde bhú dabili bini ne ma bhú tikpɔ-o, yi yi mayi. A la di-e Maloko, dhongba gba Balan-abasi-o. Yi adje engú pindji Maloko adje, i dɔ me anɔ nde anɔ agba yi oo, yi de sia anɔ ndjindji. <sup>11</sup> Yesu, inde u agisila 'li e me Djusitusi-e, yi di yi mayi. Bhú ká omaYuda inde abhuka-a, a ko bha bini okpála bata bhomɔ, inde ngamene kulu bhú dabili bini ne ma ngubula Nau gba Ebhe-o . U ateteke ma naali.

<sup>12</sup> Epafalasi, inde di ne sɔka yi-e, yi yi mayi. Ngaani inde kpála na kulu gba Yesu Kilisito-o, ndala li nayo Ebhe pi yi de. Anɔ ngayo Ebhe me yi dɔ omakilisito na kukulɔ, amba yi mene la di ndɔ 'kpí hana engú inde li Ebhe akunda e-o. <sup>13</sup> Ma ti da napa li anɔ pi yi me, anɔ ngadje likabhu naali pi yi, pi okpála na gudhu na Laodikia di ne pi obhende na Yelapolisi.† <sup>14</sup> Luka, mutia gba ní na mukunda, di ne Demasi yi yi mayi.

<sup>15</sup> Yi yi ondaise ní na Laodikia di ne obhende na Nimifia bhú dabili bini ne Dadjua gba Ebhe inde bhú 'ti gba ani-o. <sup>16</sup> I dɔ me yi nde atanga balua inde-e, yi de tima pi omabhuka na Dadjua na Laodikia, amba yi tanga di balua inde ayie ka uo oo-o. <sup>17</sup> Yi pa pi Alukipo me: «Mene kulu gba Ngámá inde u a'o e sakpa mɔ-o ndjindji.»

<sup>18</sup> Ma aye engú nayi yi bhomɔ-o ngama ne 'kpa ma makpe. Ma ayi yi mayi. Yi a'li 'to yi de me ma bhú tikpɔ-o de. A ayo me bádha bhú 'bu gba Ebhe-e dɔ bhú dabili bini ne yi.

† 4:13 4:13 Ogudhu bhisi inde-e, a de gudhu na Kolosai.



**Balua na bini  
gba Polo pi omabhuka  
na gudhu na  
Tesalonike  
Eli na kalanu**

Tesalonike ne 'ngbé gudhu ngámá gba okpála na Loma na Makedonia-o. Polo a'o nani Dadjua gba Ebhe oo pita nayie ka ani bhú Filipoi-o. Má gala kolo me-e, omaYuda adu ne botolo u atsia adu agu ani. Padhá de, anga engú gba Kilisito inde li Polo adu akpokpo e adu anu bha ne kalanu bhú ká okpála inde ne omaYuda ade inde aziba engú na Ebhe gba omaYuda-o. Kaka-a, Polo ayie bhú gudhu na Tesalonike ani akodho 'kpí bhú gudhu na Beloya. Pita ani akolo lie bhú gudhu na Kolito-o, Polo asia ngali ka kilí e Timoté inde u adu amene kulu ne e-e, pindji mukobho na Dadjua gba Ebhe inde abhú gudhu na Tesalonike-o.

Polo aye balua na kalanu pi omabhuka na Tesalonike ngú nato masi di ngú nakø bua omakilisito kuto. Polo atsia asia nedhinga bhomu ngú napa pi uo me u du bha namene kulu me u nde a'o bua o kuto me u nde ne 'to o 'to nago gba Kilisito-o.

**Ongbengbe ongú inde bhú bhuku inde-e ngae inde:**

Eli na kalanu 1:1

Nagie heni ne natoko 1:2 - 3:13

Lili ngú mukobho gba makilisito 4:1-12

Olili pindji nago gba Kilisito 4:13 - 5:11

Nato masi na soso 5:12-22

Eli na soso 5:23-28

*Polo ne obi e yi omabhuka na gudhu na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe, di ne Ngámá gba ní Yesu Kilisito na gudhu na Tesalonike-e, ya yi yi mayi. Ma aye balua inde-e ngama Polo bhú dabili bini ne Silivano di ne Timoté. A ayo

me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

*Mukobho di ne nabhuka gba okpála na Tesalonike*

<sup>2</sup> Ya ngagie heni pi Ebhe piko ngubula ndu yi hana. Ya la di ngabhu 'li yi ndu nedhinga hana ya ngayo Ebhe lie-o. <sup>3</sup> Nedhinga ya ngayo Ebhe lie, ya ngagie heni pi Ebhe 'Dyi ní ndu nedhinga hana li ongú inde: yi ngamene kulu pi Ebhe anga yi abhuka Yesu, yi ngateteke okpála anga yi ne mukunda pi uo, yi ala kpekpeke bhú nabhuka gba yi nedhinga u ngato mbolo li yi lie, anga yi ngabhuka me Ngámá gba ní Yesu Kilisito agie lie magie.

<sup>4</sup> Ondaise ya, ya di ngagie heni pi Ebhe, anga ya ambila ndjindji me Ebhe akunda yi, ani atsia abhu di yi ngú nadu piga gba e makpe. <sup>5</sup> Padhá de, anga nedhinga ya adu lie agba yi-e, ya kpokpo bha bini Bádha Ngali pi yi ne 'li ya de, engú bini, ya akpokpo Bádha Ngali ango-o bhú dabili bini ne angu di ne Bu Bhobua . Ya adu ambila di ndjindji me engú inde ya adu apa e adu kukulu 'ngú. Yi mbila ndjindji lele maka ya adu nadu lie bhú ká yi ngubula me yi du ndjindji-o.

<sup>6</sup> Ngayi-e, yi asia Eli gba Ebhe-e ne djali inde ngayie ka Bu Bhobua, abana u adu ato mbolo li yi lie-o. Abhomu-o, yi amene 'ngú maka ya amene lie di ne maka li Ngámá gba ní Yesu Kilisito amene lie-o.

<sup>7</sup> Kaka-a, yi akolo pi ndu omabhuka hana na ndu doto na Makedonia di ne Akai okpála inde li okpála koko ngakpata nganda o.

<sup>8</sup> Mbia inde-e, Eli gba Ngámá-a yangba bha bini nayie agba yi bhú ndu doto na Makedonia ne Akai de, engú bini, ngali pindji nabhuka gba yi bhú Ebhe-e ayangba di ne ndu bili hana. Kaka-a, ya matá ne gumu napa 'ngú gba yi-e pi okpála ade. <sup>9</sup> Padhá de, anga ndu uo hana

ngakpokpo 'ngú pindji maka yi asia ya lie nedhinga ya akolo lie agba yi-o. U di ngakpokpo maka yi a'o nakpata oebhe na eu lie ngubula naha liyi pi Ebhe na kukulu inde na mukobho-o. Mbia inde-e, yi ngamene kulu liyi pi ani. <sup>10</sup> U di ngakpokpo me yi ngadjeke me Yesu, Ndili gba Ebhe-e yie abhúla, go pila doto. A ko kpála inde li Ebhe azuku e bhú ká okpála inde amu, ani ngagbegbe ní bhú mangimbo li Ebhe akódho 'ngú lie-o. Ekpi nakodho 'ngú ango-o akolo masikpe.

## 2

### *Kulu gba Polo bhú gudhu na Tesalonike*

<sup>1</sup> Ondaise ya, ngayi makpe-e, yi mbila ndjindji me enú ya anu e agba yi-e, adu enú na padhá padhá de. <sup>2</sup> Yi mbila la di ndjindji me, kalanu-o, u ato ngaiza mbolo li ya, ya atsia azu di likabhu bhú gudhu na Filipoi. Engú bini, Ebhe gba ní e atsia ato masi bhú ya ngubula me ya kpokpo Bádha Ngali gba ni-e pi yi, belegu u adu ale nani kpadji pi ya lie-o. <sup>3</sup> Padhá de, anga e'i inde ya nga'i okpála lie me u ziba Bádha Ngali-e, a ko eu de, a ko di kabula gumu na sisiti de, ya gili la di napite kpála bini de. <sup>4</sup> Engú bini, ya ngakpokpo Bádha Ngali anga Ebhe ale ya, ani atsia au me ya ti da nakpokpokpo li lelele. Abhomu-o, ani atsia aha Bádha Ngali ango-o pi ya me ya kpokpo pi okpála koko. Ya gili nanga li okpála de, ya ngagili mangbo nanga li Ebhe inde ngale bua ní ngú nambila engú inde bhúbhú-o.

<sup>5</sup> Yi mbila ndjindji me ya du apa 'ngú ka djila kpála 'kpi bini de. Ya pa di obabadha 'li ngú nasia ehe bini de. Ebhe apa bhobhomu-o li ya ngae. <sup>6</sup> Ya gili de me okpála dhoge ya-a de, abana i du yi, abana i du di okpála koko. <sup>7</sup> A ayo nako me ya du bhú ká yi maka ongbengbe okpála, anga ya ne obhulu titima gba Kilisito

. Engú bini, ya adu bhú ká yi me ya nde abedhe ne bhuku 'ngú maka 'hi ongisi inde ngaku ongisi gba e.

<sup>8</sup> Ya kunda yi naali. Kaka-a, ya du bha bini bedhe de ngú nakpokpo pi yi Bádha Ngali gba Ebhe, engú bini ya adu bedhe ngú nateteke yi ne ndu kpadji hana, anga yi akolo kpukpú na bua ya. <sup>9</sup> Ondaise ya, yi bhundja nga kulu di ne ndala gba ya-o. Nedhinga ya adu akpokpo Bádha Ngali gba Ebhe-e lie pi yi-e, ya amene kulu ngbikpi ne sukpe ngubula me ya adhá bhú kpála bini bhú ká yi de. <sup>10</sup> Yi apa li ya ngayi, li Ebhe tsia pá di li ya ngae me, nedhinga ya adu lie bhú ká yi omabhuka-a , ya amene engú inde nganga li Ebhe, engú na ngbingbili, engú inde li okpála pá siti 'ngú li ya ka e de. <sup>11</sup> Yi mbila la di ndjindji me ya amene pi kpála bini bini bhú ká yi maka li 'dyi ongisi amemene pi ongisi gba e makpe lie-o. <sup>12</sup> Ya ato masi bhú yi, ya atsia apa di pi yi ne kekele me yi dholo maka li Ebhe akunda lie. Ngaani-e, ani nga'i yi me yi li bhú Nau gba ni, di me yi sia sangu gba ni-o.

<sup>13</sup> La di-e, ya ngagie heni pi Ebhe ndu 'kpi hana, anga yi asia eli gba Ebhe inde ya akpokpo e pi yi-e lie, yi aziba me a ko 'li okpála de. Engú bini, yi aziba me a ko eli gba Ebhe na paká, eli inde di ngamene kulu bhú yi okpála inde abhuka-o. <sup>14</sup> Ondaise ya, engú inde akolo li yi-e maka engú inde akolo li okpála abhuka Yesu Kilisito bhú oDadjua gba Ebhe bhú ndu doto na Yudaya-o. Padhá de, anga yi azu likabhu bhomu-o sakpa ondaise yi makpe na kuti bini maka u azu di lie sakpa omaYuda-o. <sup>15</sup> Ngauo-o, u abhelo Ngamá Yesu di ne opolofeta gba Ebhe, u atsia ato di mbolo li ya. U nga li Ebhe di ne li okpála de. <sup>16</sup> Padhá de, anga u ngamene ne kpeke me o ni kpadji pi ya me ya akpokpo Bádha Ngali pi okpála inde ne omaYuda ade-e de, ngubula me u akóbho de. U

ngamene lie mo-o, u ngabe ndu siti 'ngú gba o ndu 'kpí hana. La ali soso-o, ke 'ngú gba Ebhe-e atí pí uo.

*Gumú gba Polo ngú nau omabhuka na Tesalonike*

<sup>17</sup> Ondaise ya, pí ya-a, pita nedhinga bedi ní agbo bhusu ní lie ne yi bhú kute, bua ní nde bha ne yi bhú dabili bini-e, ya amene ne kpéke hana me ya nu u yi, anga ya adu ne gumu naali me ya u matá yi. <sup>18</sup> Ya adu ne gumu me ya gie liya agba yi. Ngama Polo, ma ale bhutsibhutsi. La-a, Satana ani kpadji pí ya. <sup>19</sup> A ko paká. Ta na'o 'to ya 'to Ngámá-a, a ko yi. Ta djali gba ya-a, a ko yi. Nedhinga li Ngámá gba ní Yesu Kilisito agó lie, yi adú pí ya maka ndata na ngámá inde uahaha e pí okpála inde agboko 'gú-o. Ya tsia dú kala ani ne gindaginda. <sup>20</sup> A moko, ya ne gindaginda kabula yi, ya la di ngakpi djali kabula yi.

### 3

<sup>1</sup> Abhomu-o, i nde lie me ya nde ti da nako nakibila nagbo bhusu ní ne yi de-e, ya au ndjindji me ya tigala bhú gudhu na Atene títi ya, <sup>2</sup> amba ya tima ndai ní Timoté agba yi mada ya. Ani ngamene kulu bhú dabili bini ne Ebhe ngú nakpokpo Bádha Ngali gba Kilisito-o. Ya atima ani me ani be ndu nabhuka gba yi, amba ani tsia to di masi bhú yi, <sup>3</sup> ngabula me suka yi bini a'ó ká nabhuka gba e ka olikabhu yi ngazu e mbia inde-e de. Padhá de, anga ngayi makpe-e, yi mbila ndjindji me Ebhe aziba ngae me ní zu ngua likabhu bhomu. <sup>4</sup> A na paká me, nedhinga ya adu lie agba yi-e, ya adu apa pí yi me okpála ató mbolo li ní. Yi mbila me, a la bhadi ngae inde akolo li yi inde. <sup>5</sup> Li ma au lie me ma ti matá da nagbite bua ma de-e, ma atsia atima Timoté me ani nu tsia lele nabhuka gba yi-o. Ma atima ani, anga ma adu akpe me djabulu alé yi de, di me kulu gba ya

inde ya amene e bhú ká yi-e, akólo padhá de.

*Polo asia angu li bua e ka nabhuka gba okpála na Tesalonike*

<sup>6</sup> Engú bini, Timoté akolo li ya mbia inde-e bhú 'nu ani ayie lie agba yi-o. Ani apa pí ya bádha ngali me yi alu kpekpeke bhú nabhuka di me yi ne mukunda sunda yi. Ani apa di pí ya me yi ngabhundja ya ndu 'kpí hana ne bádha bua, yi la di ngakunda me yi u matá ya maka ya ngakunda di lie me ya u yi-o. <sup>7</sup> Ondaise ya, ka nadjé engú li Timoté apa e pí ya-a, abana ya ngazu likabhu di ne u ngato mbolo li ya lie, ya asia angu li bua ya ka yi. Padhá de, anga ya adje me yi ngalila nabhuka gba yi bhú Yesu-o ndjindji. <sup>8</sup> Mbila inde-e, ya abi matá angu, anga yi alu kpekpeke bhú nabhuka Ngámá. <sup>9</sup> Ya ti da nagie heni pí Ebhe lele pí ka ngua djali ya abedhe ne e li 'ngú gba yi kala ani-e? <sup>10</sup> Ngbikpi ne sukpe, ya ngazi kekele li nayo Ebhe me ani mene me ní u matá liní ne yi, amba ya bedhe 'bhø 'he inde aneke bhú nabhuka gba yi-o.

<sup>11</sup> A ayo me Ebhe 'Dyi ní ngae makpe, di ne Ngámá gba ní Yesu bhulu kpadji pí ya li pápá gba yi. <sup>12</sup> A ayo me Ngámá be ndu mukunda yi nde ne e sunda yi di ne bhe yi nde ne e pí ndu okpála hana li lele mukunda ya nde di ne e pí yi ko. <sup>13</sup> A ayo me ani ha di angu pí yi li bua yi, amba yi du bubu, amba 'Dyi ní Ebhe aú siti 'ngú napapa li yi de, bhú nedhinga li Ngámá gba ní Yesu agó lie bhú dabili bini ne okpála na bububu gba e hana-o. [A adu moko.]

### 4

*Nadu bhú mukobho inde ngaha djali pí Ebhe*

<sup>1</sup> Ngú nabu tata-a, ondaise ya, ya asuno pí yi lele maka ayo lie me mukobho gba yi-e ha djali pí Ebhe-o. A na paká me yi la bhadi ngamemene moko. Ya la ngayo ka

yi di ne nakikiliki liya pi yi ne 'li Ngámá Yesu me, yi nu matá ne di ne kalanu ane bhende yi ngamene e ko. <sup>2</sup> Padhá de, anga yi mbila olíli inde ya aha e pi yi bhú nasuno inde ya asuno e pi yi ne 'li Ngámá Yesu-o hana. <sup>3</sup> Ebhe akunda me yi du bubu ngu nasuno me yi libhomu pi ni. A akunda napa me, yi adú akunda olisi di ne obhosi ngangá de, <sup>4</sup> kpála bini ne bini bhú ká yi mbila nalila kute e\* me adu bubu da napa me u manga yi.

<sup>5</sup> Yi a'ó de me gumu kute ha angu yi maka li omupagano inde i mbila Ebhe de-e ngamemene lie de. <sup>6</sup> Bhú engú bhomu-o, a ayo de me kpála bini mene siti 'ngú li pá bili gba kilí e de. Ani apíte la di ani de. Ya agbele nako 'dje yi tété kpekpeke me, Ngámá a'ó 'ngú pí okpála inde ngamene ngua 'ngú bhomu. <sup>7</sup> Padhá de, anga Ebhe 'i ní ngu nadu bhú zibotu de, ani a'i mangbo ní ngu nadu bubu kala ni. <sup>8</sup> Kaka-a, kpála inde ngandjo líli bhomu-o, ani ndjo kpála bini de, ani ngandjo mangbo Ebhe inde ngaha Bu Bhobua gba e pi yi-o.

<sup>9</sup> Pindji 'ngú bhe atsia mukunda sunda yi-e, yi ne gumu ade me ya ye engú pi yi pépé-e de. Padhá de, anga ngayi makpe-e, Ebhe asuno pi yi lele maka a ayo lie me yi kunda liyi-o. <sup>10</sup> A ko la bhadi koli mukunda bini inde yi ngasuno e pi ondaise ní hana na ndu doto na Makedonia-o. La-a, ya ngayo ka yi me yi nu ne di ne kalanu. <sup>11</sup> La di-e, yi du nadu ne guo 'ngú sunda yi. Yi adú ali bhú 'ngú bhe i tsia yi de-e de. Yi du amene kulu ne 'kpa yi makpe ngubula mukobho gba yi-e maka ya apa nako pi yi lie ko. <sup>12</sup> Yi mene mo-o, li omupagano mánga yi, yi dhá la di bhú kpála bini de.

### *Nagie lie ka Ngámá Yesu*

\* **4:4** 4:4 Nambila nalila kute o: A akunda napa me u manga yi. U ti da napa di li bili inde-e me: «Naha lio li lelele.»

<sup>13</sup> Ondaise ya, ya akunda me yi mbila kukulu 'ngú pindji engú gba okpála inde amu, ngubula me yi adú ne likabhu maka okpála bhende i bhuka de-e de. Padhá de, anga pi uo-o, pita nakpi-e, okpála amu-o zúku de. <sup>14</sup> Ní abhuka me Yesu akpi, ani atsia azuku. Ní abhuka bhadi moko me Ebhe apó bhúla okpála inde amu me u nde abhuka Yesu-o bhú dabili bini ne ani.

<sup>15</sup> A inde-e engú ya ngapa e pi yi maka li Ngámá asuno lie me, li 'kpí nago ka ni-e, nganí okpála bhende adú nga uu-o, ní kódho 'kpí kala okpála inde amu-o de. <sup>16</sup> Padhá de, anga Ngámá ayie abhúla ngae makpe ngu nako pála doto. Li nedhinga ango-o, ani há líli kpekpeke, li ngámá gba oandjelu-o bini tsia súla, li toti gba Ebhe 'ú lie. Abhomu-o, li okpála inde amu me u nde abhuka Kilisito tsia zúku ngaiza kalanu ngao. <sup>17</sup> Pipita-a, nganí okpála bhende adú bhú mukobho li nedhinga bhomu-o, Ebhe a'é ní bhú ndindi bhú dabili bini ne obhende azuku-o ngubula me ní nu kó liní ne Ngámá abhú 'kpí. Abhomu-o, ní tsia dú bhú dabili bini ne Ngámá duduma ne duduma. <sup>18</sup> Kaka-a, yi teteke liyi sunda yi ne oeli bhomu.

## 5

<sup>1</sup> Ondaise ya, li bhende atsia ekpi li Yesu agie lie lie, yi ne gumu ade me u ye 'ngú pi yi pépé-e de. <sup>2</sup> Padhá de, anga yi mbila ndjindji me ekpi nago ka Ngámá-a akoto li ní bhú gbilikiti maka bhulu 'zi agogo lie sukpe me 'to kpála nde 'to ani ade-o. <sup>3</sup> Nedhinga li okpála apa lie me: «Egú ade, ní bhú guo 'ngú-o», a la bhomu-o nedhinga li likabhu atí pí uo lie má kii-o. A atí pí uo maka kuo nazu ká bhú 'bu ele na 'bhi adhidhika lie-o. Likabhu ango-o néke uo de.

<sup>4</sup> Engú bini, ngayi ondaise ya-a, yi bhú bití ade. Kaka-a, ekpí ango-o kóto li yi bhú gbilikiti maka bhulú 'zi agógo lie de. <sup>5</sup> Ma apa pi yi mo-o, anga ndu yi hana yi ne okpála na zi 'kpí, yi la di ne okpála na ngbikpi. Ní ne okpála na sukpe ade, ní la di ne okpála na bití ade. <sup>6</sup> Kaka-a, a ayo de me ní du tila maka okpála koko-o de. Engú bini, a ayo me ní du li zuku, amba ní du bedhe ndu nedhinga hana. <sup>7</sup> Padhá de, anga obhulú nala ela, lala sukpe, obhulú nalangba, lalangba sukpe.

<sup>8</sup> Engú bini, nganí okpála na ngbikpi-e, a ayo me ní du bedhe ndu nedhinga hana. Ní ha nabhuka ne mukunda maka kopí. Ní abhuka me Yesu akóbho ní makobho. Kaka-a, ní lila mabhundja bhomu-o maka ndata li osudha atoto e\* ngú nalila lie bhú 'gú-o. <sup>9</sup> Padhá de, anga Ebhe 'i ní ngú nasia ke 'ngú gba e de. Engú bini, aní a'i ní me ní sia mukobho li kpadji gba Ngámá gba ní Yesu Kilisito. <sup>10</sup> Yesu akpi pi ní ngubula me abana i du me ní nde nga bha tété, ne me ní mu-o, nedhinga aní agie lie lie, ní de du bhú mukobho bhú dabili bini ne ni. <sup>11</sup> Kaka-a, yi to masi bhú yi sunda yi, amba yi tsia teteke liyi bhú nabhuka maka yi nde ngamemene lie-o.

#### *Polo aha olíli na soso*

<sup>12</sup> Ondaise ya, ya ngayo ka yi me yi du ne mazima pi obhende ngamene kpeke kulu bhú ká yi, inde li Ebhe a'o o me u du alu kala yi, inde di ngaha líli pi yi-o. <sup>13</sup> Yi du pi uo ne mazima di ne mukunda naali ka kulu gba uo-o. Yi du ne guo 'ngú sunda yi.

<sup>14</sup> Ondaise ya, ya ngayo ka yi me yi gbele 'dje okpála bhe na ipio-o. Yi to masi bhú obhende ne tsulu-o. Yi teteke obhende bhubhuku-o. Yi du ne 'ndjá bua pi ndu okpála hana.

<sup>15</sup> Yi lila liyi me kpála bini agie siti pi siti de. Engú bini, yi gili namene

bádha 'ngú sunda yi ndu 'kpí hana, di ne pi ndu okpála hana.

<sup>16</sup> Yi du ne djali ndu 'kpí hana. <sup>17</sup> Yi zi kekele li nayo Ebhe. <sup>18</sup> Yi gie heni pi Ebhe li ndu 'ngú hana, anga a bhomu-o engú inde li Ebhe akunda me yi mene e bhú mukobho gba yi bhú Yesu Kilisito-o.

<sup>19</sup> Yi aní kpadji li kulu gba Bu Bhobua-a de. <sup>20</sup> Yi andjó 'li opolofeta de. <sup>21</sup> Engú bini, yi gili 'ngú pindji ndu 'ngú hana, amba yi dhedhe li bhe na babadha-o. <sup>22</sup> Yi lila liyi ka ndu osisiti 'ngú hana.

<sup>23</sup> A ayo me Ebhe ngae makpe inde bhulú guo 'ngú-o mene me yi du libhomu pi ni. Aní lila 'lá yi libhomu, ne bua yi, ne mukobho gba yi, ne kute yi me okpála aú engú na sisiti napapa li yi de, akólo li 'kpí li Ngámá gba ní Yesu Kilisito agie lie lie-o. <sup>24</sup> Ebhe inde nga'i yi-e améne me yi du libhomu pi ni, anga aní memene ndu 'ngú hana inde aní apapa e-o.

<sup>25</sup> Ondaise ya, yi yo di Ebhe ngú ya.

<sup>26</sup> Yi yi ndu ondaise ní hana ne nakama uo li kute yi.

<sup>27</sup> Ma ayo ka yi ne 'li Ngámá me, yi tanga balua inde-e pi ndu ondaise ní hana.

<sup>28</sup> A ayo me bádha bhú 'bu gba Ngámá gba ní Yesu Kilisito-o du ne yi bhú dabili bini.

\* **5:8** 5:8 Ndata li osudha atoto e: A ko ndata na kalase inde li osudha atoto e ngú nalila 'ndji o bhú 'gú-o.

## **Balua na bhisi gba Polo pi omabhuka na gudhu na Tesalonike Eli na kalanu**

Li nadge lio de-e pindji nago gba Kilisito adu lie agbe tolo bhú Dadjua gba Ebhe na Tesalonike-e, Polo atsia aye balua na bhisi gba e inde-e pindji nabhuka inde me ekpi nago gba ngamá-a akolo. Ani atsia apa me a mo-o ade, do ani de-e, kala nago ka Kilisito-o, engú nasisiti di ne bhe nato mbolo li okpála-a, inde ayie ka kpála na tsulutsulu u a'i me «Bhulu yala» adú naali ané mane (2:3). Kpála ango-o adú naga Kilisito.

Polo ngapa pi okpála i ngatanga balua inde-e me, u lu bha kpekpeke bhú nabhuka, abana okpekpeke da 'ngú ne olikabhu du bha pi-ie, u du bha namene kulu ngubula nasia mukobho maka li Polo ne obi e ngamemene lie-o, amba u du ne 'ndjá bua ne namene bádha 'ngú.

### **Ongbenge ongú inde bhú bhuku inde-e ngae inde:**

Eli na kalanu 1:1-2

Natoko ne nadhege 1:3-12

Lili pindji nago gba Kilisito 2:1-17

Engú inde a ayo ngubula mukobho gba makilisito 3:1-15

Eli na soso 3:16-18

### *Polo ne obi e yi omabhuka na gudhu na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe di ne Ngámá gba ní Yesu Kilisito na gudhu na Tesalonike-e, ya yi yi mayi. Ma aye balua inde-e ngama Polo, bhú dabili bini ne Silivano di ne Timoté. <sup>2</sup> A ayo me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

### *Polo agie heni pi Ebhe, ani atsia ato masi bhú omabhuka*

<sup>3</sup> A ayo me ya gie heni pi Ebhe ndu 'kpi hana ngubula yi ondaise ya. A la bhadi ndjindji me ya mene moko, anga nabhuka gba yi-e nganu ne kalanu naali. La di-e, mukunda li ndu yi hana nde ne e sunda yi-e nganu ne kalanu. <sup>4</sup> Kaka-a, ya ngapa 'ngú gba yi-e ne gindaginda bhú oDadjua gba Ebhe kabula kekele di ne nabhuka gba yi, abana u ngato mbolo li yi lie di ne yi ngazu likabhu lie ne ndu kpadji hana-o.

<sup>5</sup> Bhobhomu-o ngasuno me Ebhe ngakodho 'ngú ngbingbili. Padhá de, anga ka olikabhu inde yi ngazu e-e, Ebhe aú me yi ati ne nali bhú Nau gba ni inde yi ngazu likabhu ngú e ko. <sup>6</sup> Li Ebhe nde lie ne ngbili kpála-a, ani agie olikabhu pi okpála inde i ngaha likabhu pi yi ko. <sup>7</sup> La di-e, ani ahá guo 'ngú pi yi okpála inde ngadje likabhu, ani tsia há di guo 'ngú pi ya. Ani améne ongú bhomu-o li 'kpi li Ngámá gba ní Yesu ayie lie abhúla, ani tsia gó bhú dabili bini ne oandjelu na angu gba e-o.

<sup>8</sup> Ani agó bhú dingidhi djua ngubula na'o 'ngú pi okpála inde i kunda nambila Ebhe de, inde ngayala di naziba Bádha Ngali gba Ngámá gba ní Yesu-o. <sup>9</sup> Makalá na siti 'ngú gba uo-o, adú likabhu na duduma, li bili inde u adú lie de Ngámá Yesu ne Nau na sangu di ne angu gba e tsutsu-o. <sup>10</sup> Engú ango-o akódho 'kpi li 'kpi ani agó lie ngubula me ndu okpála gba ni hana inde abhuka ni-e, dhege ni, amba u toko di ni. Ngayi di-e, yi adú bhú ká okpála bhomu. Padhá de, anga yi abhuka ngali inde ya akpokpo e pi yi-o.

<sup>11</sup> Kaka-a, ya di ngayo Ebhe ndu 'kpi hana ngubula yi me Ebhe gba ni-e mene me yi dhuku li lele maka ani a'i yi lie-o. Ya ngayo ka ani me bhú angu gba ani-e, ani ha angu pi yi ngú namene obabadha kulu inde yi akunda namene e akólo li soso,

kabula nabhuka gba yi bhú Yesu-o. <sup>12</sup> Ya la di ngayo Ebhe ngubula me, okpála dhөгө 'li Ngámá gba ní Yesu kabula yi, amba u dhөгө di yi kabula ani. Bhobhomu-o améne lie ka bádha bhú 'bu inde li 'Dyi ní Ebhe di ne Ngámá gba ní Yesu Kilisito asuno e pi yi-o.

## 2

*Bhulu Nayala líli gba Ebhe-e agó ngaiza kalanu*

<sup>1</sup> Ondaise ya, Ngámá gba ní Yesu Kilisito agó mago, ní tsia pékөbhө bhúla ní de ani. Li 'ngú ang-o, ya ngayo ka yi me, <sup>2</sup> bua yi angamba má gala de, 'ndji yi angb́ngi di-i de. Yi dje ka kpála bini me Bu Bhobua apa pi ni me: «Ekpí nago ka Ngámá akolo», ne me ya apa pi ni mo-o, i du di-e me ya aye bhú balua mo-o, yi azíba de. <sup>3</sup> Kpála bini apíte belegu yi de má kpó! Padhá de, anga kala nago ka Ngámá Yesu-o, agó ngaiza ne nedhinga na kpéke 'ndji li 'ngú gba Ebhe. Pipita-a, li Bhulu Nayala líli gba Ebhe-e kóto. Kpála ang-o ngakpata kpadji na djua na duduama. Ebhe andjia engú gba ani-e mandjia. <sup>4</sup> Kpála ang-o ayie bhúlá, ani há 'gú ne Ebhe di ne ndu oehе koko hana inde li okpála ngau e maka oebhe, inde u nde la di ngadhөгө o-o. Ani tsia pá me ni ane ndu uo hana. Ani anú nadu belegu bhú 'ngbé 'ti Ebhe gba omaYuda, ani tsia pá me ni ne Ebhe.

<sup>5</sup> 'To yi a'li de me nedhinga ní adu nga bha lie ne yi-e, ma adu apa engú inde-e pi yi uu-o de. <sup>6</sup> Yi mbila la bhadi hana me ehe inde ngani kpadji pi kpála ang-o me ani akóto mbia inde-e de-e ne ni-ie, amba ani koto bha bini li nedhinga inde li Ebhe a'o e pi ani-o. <sup>7</sup> Padhá de, anga angu inde awo lie mawo gba kpéke 'ndji bhomu-o akpo lita kulu akpo. Engú bini, kpála inde ngani kpadji pi ani-e adu nga bha o-o akólo li nedhinga u a'é ani lie-o.

<sup>8</sup> Abhomu-o, li Bhulu Nayala líli gba Ebhe-e tsia kóto. Ngámá Yesu bhóle ani bha ne mbulu 'wo e, ani tsia ndjia angu ani ne sangu inde ani agó ne e-o. <sup>9</sup> Bhulu Nayala líli ang-o agó bhú angu gba Satana , ani tsia méne ndu djua ongamba 'ngú , ne ndu okiaka 'ngú hana, di ne ongbengbe 'ngú ngú napite okpála. <sup>10</sup> Ani améne ndu djua osisiti 'ngú hana ngubula napite okpála bhende ngakpata kpadji na djua na duduama-o. Ebhe andjia engú gba uo-o mandjia, anga u kunda kukulu 'ngú inde i tí da nako nakobho uo-o de, u tsia bhuka di kukulu 'ngú ang-o de. <sup>11</sup> Kaka-a, Ebhe ató siti mabhundja bhú uo, i tsia pite uo ngubula me u bhuka ongú na eu, <sup>12</sup> amba Ebhe 'o 'ngú pí ndu okpála hana inde i bhuka kukulu 'ngú de-o, inde adu akpi mangbo ndjili li siti 'ngú-o.

*Yi lu kpekpeke bhú 'bu nabhuka*

<sup>13</sup> Ondaise ya inde li Ngámá akunda o, pi ya-a, a ayo me ya gie heni pi Ebhe ndu 'kpí hana li 'ngú gba yi-o. Padhá de, anga Ebhe abhu nani yi nayie li lilita ngubula me yi sia mukobho li kpadji gba Bu Bhobua inde ngamene me yi du bubu, di ne li kpadji na nabhuka inde yi nde ne e bhú kukulu 'ngú-o. <sup>14</sup> Ebhe a'i yi me yi sia mukobho bhomu-o li kpadji na Bádha Ngali inde ya akpokpo e pi yi-o. Ani a'i yi me yi sia di sangu gba Ngámá gba ní Yesu Kilisito-o. <sup>15</sup> Kaka-a, ondaise ya, yi lu kpekpeke bhú 'bu nabhuka gba yi-o. Yi lila kpekpeke ongú inde ya asuno e pi yi nedhinga ya adu lie agba yi di ne bhe ya aye e pi yi bhú balua-o.

<sup>16-17</sup> A ayo me Ngámá gba ní Yesu Kilisito ngae makpe di ne 'Dyi ní Ebhe, bedhe bua yi ne masi. A ayo me u ha angu pi yi ngubula me yi du namene ndu 'kpí hana bádha 'ngú, abana i du bhú nagama 'ngú, abana i du bhú namene kulu. Padhá de, anga Ebhe akunda ní, ani aha

di kpéke bua na duduma pi ní ka bádha bhú 'bu gba e-o. Aní atsia amene di me ní 'o 'to ní 'to ní na paká paká.

### 3

*Polo apa pi omabhuka me u yo Ebhe ngú ní*

<sup>1</sup> Ngú nabu tata-a, ondaise ya, yi yo Ebhe ngú ya, amba eli gba Ngámá-a yangba má gala, amba okpála inde ngadjedje-e, mene engú inde li eli ango-o ngapa e maka yi ngamemene lie-o. <sup>2</sup> Yi yo di Ebhe me aní kobho ya sakpa osisiti okpála na mbedhembedhe-o. Padhá de, anga a ko de me ndu okpála hana akunda nabhuka Bádha Ngali-e de. <sup>3</sup> Engú bini, Ngámá Yesu ne kpála inde amemene engú maka aní apa lie-o. Aní ahá angu pi yi bhú nabhuka, aní tsia líla yi sakpa Siti. <sup>4</sup> Ya abhuka ne 'li Ngámá Yesu me, engú inde ya ngapa e pi yi-e, yi ngamemene moko, yi améne la bhadi mo-o ne kalanu. <sup>5</sup> A ayo me Ngámá leke bua yi ngú nambila lele maka li Ebhe akunda yi lie, di ne lele maka li Kilisito ngaha kpéke bua pi yi lie bhú nabhuka-o.

*Polo agbele 'dje omabhuka li 'ngú na ipio*

<sup>6</sup> Ondaise ya, ya apa pi yi ne 'li Ngámá gba ní Yesu Kilisito me, yi akpétse liyi bhú dabili bini ne ondaise ní na ipio, inde i kpata líli inde ya aha e pi yi de-e de. <sup>7</sup> Padhá de, anga ngayi makpe-e, yi mbila maka a ayo lie me yi kpata lele mukobho gba ya-a ndjindji. Nedhinga ya adu lie agba yi-e, ya du ne ipio de. <sup>8</sup> Ya yo ka kpála bini de me aní ha 'zu pi ya padhá-a de. Engú bini, ya aziba ndala ne likabhu, ya atsia amene kulu ngbikpi ne sukpe ngú napa me ya adhá bhú kpála bini bhú ká yi de. <sup>9</sup> A ayo nako me ya sia 'he ka yi padhá, engú bini, ya mene nako mo-o de, anga ya akunda me yi kpata lele mukobho gba ya-o.

<sup>10</sup> Nedhinga ya adu lie agba yi-e, ya aha líli inde-e pi yi me: «Lí kpála kunda namene kulu de-e, a ayo di de me aní zu 'he-e de.»

<sup>11</sup> Ya ngapa mo-o, anga ya adje me okpála koko bhú ká yi ne ipio. U memene kulu de. U bha bini nga'o 'to o li 'ngú bhe i tsia o de. <sup>12</sup> Pi okpála bhomu-o, ya ngagbele 'dje uo, ya di ngayo ka uo ne 'li Ngámá Yesu Kilisito me, a ayo me u mene kulu maka ayo lie, amba u sia ezu inde akoto li 'kpa o makpe.

<sup>13</sup> La pi yi ondaise ya-a, yi andála li namene bádha 'ngú de. <sup>14</sup> Lí kpála kpata engú inde ya aye e pi yi bhú balua inde-e de-e, yi de bhele djila yi li aní. Yi améne 'he bhú dabili bini ne aní de, ngubula me aní dje namu. <sup>15</sup> Engú bini, yi aú aní maka bhulu yala ka yi de. Yi gbele mangbo 'dje aní maka saka yi.

*Polo ayo bisagu pi omabhuka na gudhu na Tesalonike*

<sup>16</sup> A ayo me Ngámá na guo 'ngú-o, ha guo 'ngú pi yi ngae makpe ndu, ha kpí hana ne bhú ndu 'ngú hana. A ayo me Ngámá du ne ndu yi hana bhú dabili bini.

<sup>17</sup> Ngama Polo, ma aye engú na soso inde apa me ma yi yi mayi inde-e ne 'kpa ma makpe. A bhomu-o lele nadele 'kpa ma bhú balua gba ma-o.

<sup>18</sup> A ayo me bádha bhú 'bu gba Ngámá gba ní Yesu Kilisito-o du bhú dabili bini ne ndu yi hana.



## Balua na bini gba Polo pi Timoté Eli na kalanu

Timoté ne makombi bini inde adu nani makilisito bhú Adji Minele. 'Hi aní nani ne maYuda, 'dyi aní atsia adu nani ne Giliki. Aní akolo nani kpála nateteke Polo bhú dholo gba e nakpokpo Bádha Ngali gba Yesu Kilisito . Balua na bini gba Polo pi Timoté-o, ngakpokpo 'ngú pindji ongbengbe 'ngú bata.

Balua ango-o ngakpo ngaiza 'ngú pindji nalila lio ka omusuno na eu inde bhú Piga gba Ebhe-o. Nasuno ango-o a ko nakpetse mabhundja pindji omaYuda ne okpála inde ne omaYuda ade inde adu nani pindji napa me bádha 'ngú pila doto ade. A la di ngapa me, u ti da bha nasia mukobho ka imbila 'ngú inde awo lie mawo, a la di ne nakpe nazu oehe koko, di ne naha lio maka olo ne bhoko de.

### **Ongbengbe ongú inde bhú bhuku inde-e ngae inde:**

Eli na kalanu 1:1-2

Lili pindji Piga gba Ebhe ne okpála inde ngadjedjele-o 1:3 - 3:16

Lili pi Timoté pindji kulu gba e-o 4:1 - 6:21

### *Polo yi Timoté mayi*

1-2 Timoté, kukulu ndili gba ma bhú 'bu nabhuka-a , a ayo me bádha bhú 'bu ne ndjinga di ne guo 'ngú gba 'Dyi ní Ebhe ne Yesu Kilisito , Ngámá gba ní-e du bhú dabili bini ne mu. Ma aye balua inde-e pi mu ngama Polo. Ma ne bhulu titima gba Yesu Kilisito maka li Ebhe, Mukobho gba ní, ngauo ne Yesu Kilisito inde ní nga'o 'to ní 'to e aha líli muma lie ngú nakpokpo Bádha Ngali ko.

### *Polo apa me a ayo nayoko omusuno na eu-o mayoko*

<sup>3</sup> Maka ma aha nako líli pi mu lie li nedhinga ma adu anu lie bhú ndu

doto na Makedonia-a, du bha bhú gudhu na Efeso oo, amba mu pa pi omusuno na eu inde oo me, u 'o nasuno bhomu-o ma'o. <sup>4</sup> Pa pi uo me, u 'o nakpokpo ongú na padhá padhá inde li okpála ngagbe e bhú 'ndji o ma'o. U 'o di nakpokpo ndjandja okpokpodumu ma'o. Padhá de, anga ongú bhomu-o ngagbe okpekebhe na padhá padhá inde i dyudyo kulu inde li Ebhe ngamene e bhú mukobho gba okpála de. Kulu ango-o ngadyudyo lie ne kalanu ka nabhuka.

<sup>5</sup> Olili ma aha e pi mu bhomu-o, a ngubula me okpála du ne mukunda sunda o. Mukunda ango-o ngayie li bádha bua, li bua nakpokpo kú 'ngú ndjindji, la di ne bhú nabhuka na kukulu. <sup>6</sup> Okpála koko ayie li ngbili kpadji bhomu-o ayie, u atsia azi 'ndji o bhú namene okpekebhe na padhá padhá. <sup>7</sup> U ngapa me o ne omusuno na líli gba Ebhe, engú bini, ngauo makpe-e, u ko mboli engú inde u ngasuno e pi okpála koko ne angu o hana-a belegu de bini.

### *Ebhe aha líli gba e pi ní ngubula ní?*

<sup>8</sup> Ní mbila hana me líli gba Ebhe-e ndjindji, i du me u nde ngakpakpata maka a ayo lie ko. <sup>9</sup> Ní mbila la di hana me, Ebhe 'o líli pi okpála bhende ngadhuku ngbingbili-e de. Engú bini, aní a'o pi obhende ngau líli gba aní-e padhá di ne pi okpála na kpekpeke 'ndji. Aní a'o pi okpála bhende ngandjo 'li aní, di ne pi obhende ngamene siti 'ngú-o. Aní a'o pi okpála inde i manga aní de, i manga la di ohe na bububu gba aní-e de-o. Aní a'o pi okpála bhende ngabhili odyi o, i du di-e ohi o-o. Aní a'o pi okpála bhende ngabhili obi o bhú gandji.

<sup>10</sup> Aní a'o pi obhosi bhende ngakunda olisi di ne pi olisi bhende ngakunda obhosi ngangá-o. Aní a'o pi obhosi bhende ngakunda lio ne obi o obhosi, i du di-e olisi bhende ngakunda lio ne obi o olisi. Aní a'o

pi okpála bhende ngatsindji obalise. Aní a'o pi obhulú eu di ne pi okpála bhende ngatú silika pí eu. Aní a'o pi ndú okpála hana inde ngamene engú kpi ne bhende na kúkulu ní ngasuno e ko. <sup>11</sup> Nasuno angoo bhú Bádha Ngali inde li Ebhe aha e muma-o. Bádha Ngali angoo ngasuno sangu gba Ebhe inde ngaha bádha 'ngú pi okpála-o.

### *Polo agie heni pi Ebhe*

<sup>12</sup> Ma ngagie heni pi Yesu Kilisito, Ngámá gba ní inde aha angu muma ngú namene kulu gba e-o. Ma ngagie heni pi aní, anga aní au me ma ti da namemene. Abhomú-o, aní atsia abhú ma ngánga. <sup>13</sup> La nani kalanú-o, ma adú apa osisiti 'ngú li aní, ma adú ato mbolo li okpála koko ka u abhuka aní lie-o, ma adú la di asosobho aní. Abana ma adú amene lie mo-o, aní adje ndjinga ma. Padhá de, anga ma bhuka nga nani aní de. Ma mbila la di nani de me Yesu ne Masiya-a de.

<sup>14</sup> Engú bini, Ngámá gba ní-e atsia asuno bádha bhú 'bu gba e muma ane mane. Aní aha nabhuka muma, di ne mukunda inde bhú nakpòtse liní ne Yesu Kilisito-o. <sup>15</sup> Engú inde ma adji apa e inde-e, a ko kúkulu 'ngú inde a ayo me ndú okpála hana bhuka e ne bua o bini. Engú angoo me, Yesu Kilisito ago nani píla doto ngú nakobho okpála na sisiti. Yi mbila la me ngámá ngámá bhú ká uo ne ma. <sup>16</sup> Abana ma adú lie ne ngámá ngámá bhú ká uo ngama-a, Ebhe adje ndjinga ma. Ebhe amene muma mo-o ngubula me ndú okpála hana inde abhúka Yesu Kilisito-o, u u lele 'ndjá bua gba ni-o, amba u bhuka-a, u de sia mukobho na dudu-ma. <sup>17</sup> A ayo me ndú okpála hana dhogè Ebhe, amba u toko aní dudu-ma ne dudu-ma. A adú moko. A ko 'Ngbé Ngámá na dudu-ma, i kpikpi de, li kpála uu di-e de. A ko bha koli Ebhe bha ngae kpi e kpi!

<sup>18</sup> Timoté, ndika ma, ma ngaha olíli bhomú-o pi mú nakpata oeli inde li opolofeta akpokpo nani e li 'ngú gba mú-o. A ayo me oeli angoo teteke mú ngubula nakpokpo Bádha Ngali-e ne angu, abana li okpála dú nayaya mú. <sup>19</sup> A ayo me mú gú egú angoo ne nabhuka bhú dabilí bini ne bua nakpokpo kú 'ngú ndjindji. Okpála koko a'o ká bua nakpokpo kú 'ngú gba o a'o. Kaka-a, u ayie li kpadji na nabhuka ayie. <sup>20</sup> Imene ne uo ne Alekidjandele bhú ká ongua okpála bhomú. Ma atsia apú uo pi Satana ,\* amba u mbila lio ne napa me a ayo nasobho Ebhe de.

## 2

### *A ayo nayo Ebhe ngubula ndú okpála hana*

<sup>1</sup> Kala ndú 'ngú hana-a, ma ngayo ka yi me yi 'o gumú gba ndú okpála hana kala Ebhe, yi yo Ebhe pi uo, yi kikaliki liyi pi aní ngubula uo, amba yi gie la di heni pi aní ngubula ndú uo hana. <sup>2</sup> Yi yo Ebhe pi ongbengbe ongámási, di ne pi ndú ongámási hana ngubula me kpéke 'ngú adú-ú de, amba ní dú bhú guo 'ngú , ní dú namanga Ebhe ne nagbite liní li aní na paká paká. <sup>3</sup> A bhomú-o engú inde ndjindji, inde la di nganga li Ebhe, Mukobho gba ní-o.

<sup>4</sup> Aní akunda me ndú okpála hana kobho, amba u mbila la di kúkulu 'ngú. <sup>5</sup> Padhá de, anga koli Ebhe bha bini, a la bhadi ne koli kpála bini inde ludú sunda Ebhe ne okpálakuti. Kpála angoo, a ko Yesu Kilisito , <sup>6</sup> inde apú mukobho gba e ngubula nagbegbe ndú okpála hana bhú balio. Aní amene mo-o bhú nedhinga nani li Ebhe a'o e ngú nasuno me Ebhe akunda me ndú okpála hana kobho. <sup>7</sup> Ka 'ngú angoo, Ebhe abhú ma bhulú titima gba Yesu di ne bhulú nakpokpo Bádha Ngali . Aní abhú ma me ma suno nabhuka di ne kúkulu 'ngú pi okpála inde ne

\* **1:20** 1:20 Napú kpála pi Satana: Ti da napa li bili inde-e me nagbe kpála bhú Piga gba Ebhe.

omaYuda ade-o, amba u bhuka. Ma ngapa kukulu 'ngú, ma pa eu de.

<sup>8</sup> Kaka-a, ma akunda me obhosi yo Ebhe ne ndu bili hana. U yo Ebhe me u nde a'e'e 'kpa o ne abhúlá ne naha lio libhomu pi Ebhe. U adú ne engú sunda o de, u adú la di ne kpekebhe de.

<sup>9</sup> Pi olisi-e, ma akunda me u du adyi bongo maka a ayo lie. U adú adyi bongo bhe a'é bua kpála bhú da e ma'e-e de. U du adyi bongo li lelele. U adú apulu sundjo o nane dada mane de. U adú adyi omayaka ne omagege na olo di ne ohe na zizi de. U adú di nadyi obongo na mase naali de. <sup>10</sup> Engú bini, u suno mangbo bádha gba o bhú obabadha kulu inde u ngamene e-o. A bhomu-o engú inde ati ne olisi inde ngasuno me o ngamanga Ebhe-o.

<sup>11</sup> Nedhinga li bhoko ngaha olíli lie bhú Piga gba Ebhe-e, a ayo me elo ndjili má bulu, ani ke lie ne kuto. <sup>12</sup> Ma ha kpadji pi elo ngu nasuno di ne nau pi 'ndji bhoko de. Engú bini, a ayo me ani ndjili má bulu! <sup>13</sup> Padhá de, anga Ebhe abho ngaiza nani kalanu-o Adamu , pipita-a ani atsia abho Eva. <sup>14</sup> La di-e, Satana pite nani Adamu de, engú bini, ani apite mangbo nani elo-o. Abhomu-o, elo-o atsia andjo 'li Ebhe. <sup>15</sup> Abana i nde lie mo-o, Ebhe akóbho elo ka ezu gba e-o. Ebhe akóbho ani i du me ani nde alu kpekpeke bhú 'bu nabhuka, ne mukunda, ne na'o lie bubu kala Ebhe, di ne na'o lie bhú da e.

### 3

*Líli pi okpála natsia 'kpí li Piga gba Ebhe*

<sup>1</sup> Engú ma adji apa e inde-e, a ko kukulu 'ngú: i du me kpála nde akunda natsia 'kpí li Piga gba Ebhe-e, ani akunda namene bhomu-o bádha kulu. <sup>2</sup> Kaka-a, a ayo de me u u kpála inde ngatsia 'kpí li Piga gba Ebhe-e ne siti 'ngú-o de. A ayo me ani du ne koli elo bini. Ani du

naholo bua e ka 'ngú maholo. A ayo me ani du namene 'ngú li lelele, ani du la di namene babadha 'ngú. Ani du nasia ogomago ndjindji, ani mbila la di nasuno 'ngú pi okpála. <sup>3</sup> Ani ahá lie pi pandi de, adú la di kpála nagu gbele de. Engú bini, a ayo me adu kpála na bhuku 'ngú. Adú kpála nagbe bhayiki ne okpála koko de, adú la di kpála na gumu tia naali de.

<sup>4</sup> A ayo me adu kpála inde ngatsia 'kpí li piga gba e makpe-e ndjindji, inde li ongisi gba e ngamanga e ne ndu kpadji hana. <sup>5</sup> Padhá de, anga i du me kpála nde mbila natsia 'kpí li piga gba e makpe ndjindji de-e, ani ti da nalila Piga gba Ebhe-e lele pi? <sup>6</sup> A ayo de me kpála natsia 'kpí li Piga gba Ebhe-e du kpála inde adji bua e na mbia de. Padhá de, anga i du me a nde kpála inde adji bua e na mbia-a, 'ngbé 'ndji ti da nali bhú ani, ani tsia li bhú mangimbo maka Djabulu ali nani lie-o. <sup>7</sup> La matá di-e, a ayo me adu kpála inde li okpála bhe i bhuka de-e ngakpo 'ngú gba e ndjindji, ka napa me okpála aú ani bhú djila o padhá de-o, la di ngubula me ani atí bhú oekú gba Djabulu-o de.

*Líli pi okpála nateteke kulu bhú Piga gba Ebhe*

<sup>8</sup> A bhadi moko, a ayo me okpála nateteke kulu bhú Piga gba Ebhe-e du okpála inde ngamene 'ngú inde li okpála ti da namanga o ka e. U adú la di ne eli bhisi bhisi de, u ahá lio pi pandi de, u adú di nagili tia li siti kpadji de. <sup>9</sup> A ayo me u gbite lio ne bua bini li kukulu 'ngú inde li Ebhe ambamba ta e-o. U gbite lio tété ne bua nakpokpo kú 'ngú inde ndjindji.

<sup>10</sup> Kala me u bhú uo me u kolo okpála nateteke kulu bhú Piga gba Ebhe-e, a ayo ngaiza me okpála tsia uo ndjindji, pipita-a, i du me u nde u uo ne engú na sisiti de-e, u de bhú uo ngú namene kulu ango-o. <sup>11</sup> A ayo me, olisi gba uo-o du bhadi namene

engú inde li okpála ti da namanga uo ka e. U adú napa sisiti 'ngú li okpála koko de. U dɔ naholo bua o ka 'ngú maholo. U dɔ okpála inde li okpála koko ngaziba o bhú ndɔ 'ngú hana. <sup>12</sup> A ayo me, kpála nateteke kulu bhú Piga gba Ebhe-e dɔ bha ne koli ɔlɔ bini. Adɔ kpála inde ngatsia 'kpí li ongisi gba e di ne piga gba e makpe-e ndjindji. <sup>13</sup> Padhá de, anga okpála inde ngamene kulu nateteke kulu bhú Piga gba Ebhe-e ndjindji-e, ndɔ okpála hana ngamanga uo mamanga, u gáma la di engú pindji nabhuka gba o inde bhú Yesu Kilisito-o ne tsulɔ belegɔ de bini.

*Engú na ngbéngbé inde li Ebhe asuno e*

<sup>14</sup> Ma ngaye balua inde-e pi mɔ ne nabhundja me ma akólo li mɔ oo má gala! <sup>15</sup> La-a, i dɔ me ma nde kolo li mɔ oo má gala de-e, balua inde-e de suno pi mɔ lele maka a ayo lie me okpála dhukɔ bhú piga gba Ebhe-o. Piga angoo, a ko Piga gba Ebhe inde ɔ-o. Dadjua angoo ngabi kɔkɔli eli-e maka nepanda abibi eti lie-o. <sup>16</sup> A na paká me, engú inde li Ebhe ambamba ta e pi ní pindji nabhuka gba ní-e ngbéngbé. Engú angoo me: Kilisito ago pála doto bhú kute maka kpála-kuti,

Bu Bhobua asuno me, ani ngbingbili,  
oandjelu atsia au ani.

U akpokpo engú gba ani-e pi okpála inde  
ne omaYuda ade,  
okpála na pála doto libhomu  
abhuka ani,  
Ebhe atsia a'e ani abhúlá bhú sangu  
gba e-o.

#### 4

*Omɔsuno na eu*

<sup>1</sup> Bu Bhobua apa mbámbá me bhú onedhinga na soso-o, okpála koko a'ó ká nabhuka gba o, u tsia kpáta osisiti bua na eu, u kpáta di ongú inde li osisiti bua ngato e bhú okpála

me u suno e-o. <sup>2</sup> Obhulɔ kali inde ngapa eu-o apíte uo me u yie li ngbili kpadji-e mayie. Bua nakpokpo kú 'ngú gba obhulɔ kali angoo asiti mɔgito me u atsulu ne kalase inde u ato e bhú djua. <sup>3</sup> Okpála angoo ngasuno me a ayo de me obhosi ne olisi dɔ naha lio-o de. U di ngapa me a ayo de me okpála dɔ nazɔ ozɔ koko de. Ebhe abho la nani ozɔ bhomɔ-o ngae. Omabhuka inde ambila kɔkɔli 'ngú-o ti da nazɔ ne nagie heni pi ani. <sup>4</sup> Padhá de, anga ndɔ 'he hana inde li Ebhe abho e ndjindji. A ayo de me ní tse ehe bini bhú káká-a de. Engú bini, a ayo nahaha ne nagie heni pi Ebhe, <sup>5</sup> anga eli gba ani bhú dabili bini ne mayo ngamene me ndɔ 'he hana kolo bubu kala ani.

*Bádha kpála na kulu gba Yesu Kilisito*

<sup>6</sup> Suno ongú bhomɔ-o pi ondaise ní omabhuka. Li mɔ mene mo-o, mɔ dú bádha kpála na kulu gba Yesu Kilisito. Mɔ tsia suno di me mɔ ngakɔ bua mɔ ne oeli na nabhuka, di ne nasuno na kɔkɔli mo okpata e ko. <sup>7</sup> Engú bini, gbe limɔ li otodɔ na padhá padhá inde i ti ne nabhuka de-e magbe. Mene mangbo ne kpéke me mɔ gbite limɔ li namene engú inde anga li Ebhe. <sup>8</sup> Namene ngeme ngú nakpekpeke kute-e, a ndjindji ngú ongú masudha. Engú bini, a ndjindji nane mane pi kpála ne nadhukɔ maka li Ebhe akunda lie-o. Padhá de, anga namene mo-o, kpála angoo ambila me ni asia inde-e mɔkobho na mbia, mɔkobho angoo adú dɔdɔma ne dɔdɔma. <sup>9</sup> Eli inde ma apa e bhomɔ-o, a ko kɔkɔli 'ngú inde ayo me ndɔ okpála hana ziba e ne bua bini. <sup>10</sup> Kaka-a, i dɔ me ní nde ngamene kulu kpekpeke di ne angu ní hana-a, a ko anga ní nga'o 'to ní li Ebhe inde ɔ-o. A ko Mɔkobho gba ndɔ okpála hana, a ane la mane pi okpála bhende abhuka ani-o.

<sup>11</sup> A bhomɔ-o ongú inde a ayo me mɔ gbele 'dje okpála lie, amba mɔ

suno di-e pi uo-o. <sup>12</sup> Mo oká kpadji pi kpála bini de me ani u mu padhá ka mu nde lie ne makombi-e de. Engú bini, du mangbo ne kpála inde ngasuno kpadji pi omabhuka. Du nasuno kpadji pi uo bhú eli inde mu ngapa e, ne bhú lele namene 'ngú gba mu, ne bhú mukunda gba mu, ne bhú nabhuka, di ne bhú nadu ka mu bubu kala Ebhe.

<sup>13</sup> Nedhinga mu ngadjeke nago ka ma lie-e, ha limu ngú natanga 'li Ebhe-e kala ndu okpála hana. To masi bhú uo, amba mu suno ta eli gba Ebhe-e pi uo. <sup>14</sup> Mo ou kulu li Ebhe aha e pi mu-o bhú bádha bhú 'bu gba e-e padhá de, kulu inde mo osia e nedhinga li opolofeta akpokpo 'ngú gba mu-o lie, la di ne li nedhinga li obhelesi okpála a'o 'kpa o pi 'ndji mu lie-o. <sup>15</sup> A bhomu-o kulu inde a ayo me mu 'o bua mu li e ko. Ha limu ngú namemene ne bua mu hana, amba ndu okpála hana u me mu nganu li kpadji gba Ebhe-e ne kalanu. <sup>16</sup> Lila limu ngamu makpe ndjindji bhú ongu inde mu ngamene e di ne bhende mu ngasuno e pi okpála koko-o. Nu ne di ne kalanu, anga i du me mu nde amene mo-o, mu kóbho limu ngamu makpe, mu tsia kóbho di okpála bhende ngadje mu-o.

## 5

### *Lili pi ndu omabhuka hana*

<sup>1</sup> I du me mu nde ngali bhele kpála li 'ngú-o, mo ombembe bhú 'ndji ani mambembe de, engú bini, gama 'ngú pi ani bhubhuku mugito me a ko 'dyi mu. Gama 'ngú pi omakombise maka ondaise mu na obhosibhosi. <sup>2</sup> Pi olisi na obhelesibhelesi-e, gama 'ngú pi uo mugito me a ko ohi mu. Pi otsalisi-e, gama 'ngú pi uo maka ondaise mu

na olisilisi me bua mu nde tuko li uo de.

### *Engú pindji oekesi na olisilisi*

<sup>3</sup> Teteke oekesi na olisilisi bhende li kpála nde ngú nateteke o ade-e mateteke. <sup>4</sup> Engú bini, i du me a nde ka eké na eelé bini ne ongisi, i du di-e odi ye e, ngú nasuno me ongisi ango-o ngamene engú inde li Ebhe akunda e, a ayo me u teteke ngaiza opiga gba o makpe. U mene mo-o, u gie bádha 'ngú pi okpála inde azu o, di ne pi onguo ogbi o bhú da bhende u amene nani e pi uo-o. Abhomu-o engú inde li Ebhe aziba e ko. <sup>5</sup> Eké inde ngadu bha ndju kpi e kpi, li kpála bini nde ka e ngú nateteke e ade-e, ani nga'o 'to e 'to Ebhe. Ani ngazi kekele li nayo Ebhe sukpe ne ngbikpi ngubula me Ebhe teteke ni. <sup>6</sup> La-a, pi eké bhende akunda bha naae odjali na doto-o, ani akpi li bua e akpi, abana ani nde lie mu-o. <sup>7</sup> A bhomu-o engú inde a ayo me mu pa e pi uo ngubula me kpála bini apa 'ngú li uo sisiti de-o. <sup>8</sup> I du me kpála nde teteke omaha e de-e, a ane la mane piga gba e makpe-e, ani abala 'kpa li nabhuka gba e abala, ani ane belegu mupagano ne siti.

<sup>9</sup> La di-e, ngú napa me u ye 'li eké bini bhú ká obhende li Piga gba Ebhe-e ngabi o-o, a ayo me ani du mbo ne kalanga ndjikpa madhia. Adu la bhadi elé inde i kunda bhoko sa 'ku 'ko e de.\* <sup>10</sup> A ayo la di me okpála mbila ani ka obabadha kulu inde ani amene e-o. A akunda napa me, ani aku ongisi gba e ndjindji, ani asia ogomago, ani avulu 'dhu omabhuka, † ani ateteke okpála inde adu bhú mbolo. Adu la di kpála inde amene ndu babadha kulu hana.

<sup>11</sup> Engú bini, pi oekesi bhende na otsalisi tsalisi-e, mo oyé 'li uo bhú ká obhende li Piga gba Ebhe-e ngabi o-o de. Padhá de, anga nedhinga

\* **5:9** 5:9 Elé inde i kunda bhoko sa 'ku 'ko e de: A akunda napa me nedhinga li 'ko ani adu lie tété-e, ani kunda bhoko koko de. † **5:10** 5:10 Ani avulu 'dhu omabhuka: Nani agba omaYuda-a, kulu nagbe maléké bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá. A di ngú nasuno mukunda ne naké lio ne kuto. Tsia bhú Dja. 13:1-17.

li gümü naha bhoko koko alí bhú uo lie, i méne me u dji 'ngbú o li Kilisito . <sup>12</sup> Li u mene mo-o, u lí bhú mangimbo. Padhá de, anga u apa nani me o oha lio pí Kilisito, la mbia bhomu-o, u mene maka u apa lie de. <sup>13</sup> La di-e, mü ye 'li uo-o, u kólo obhulu ipio, u hóló nadjakadha gba okpála ngangá. U kólo bha bini obhulu ipio de, engú bini, u hóló nagama 'ngú naali, u hóló nali bhú ongú bhe i tsia o de, u tsia dú di nagama 'ngú gbèlòngè. <sup>14</sup> Kaka-a, ma akunda me, oekesi bhende na otsalisi tsalisi-e ha matá obhosi, u zu ongisi, u tsia 'kpí li opiga gba o-o, amba u aká kpadji pí obhulu yala gba ní-e napa 'ngú li ní sisiti de. <sup>15</sup> Ma pa mo-o padhá de, a ko anga oekesi koko ayie li ngbili kpadji-e ayie, u atsia agbida nganda Satana .

<sup>16</sup> I dü me mabhuka bini na øelø nde ne oekesi na olisilisi bhú piga gba e-e, a ayo me ani teteke uo. Ani a'ó de me Piga gba Ebhe-e bi uo ngae de, amba Piga gba Ebhe-e bi obhende li okpála nde ka o ngubula nateteke o ade ko.

### *Engú pindji obhelesi okpála na Piga gba Ebhe*

<sup>17</sup> Obhelesi okpála inde ngatsia 'kpí li Piga gba Ebhe ndjindji-e, a ayo me u manga uo, amba u tsia ha di makalá na kulu gba uo-o pí uo li lelele. A ane la mane pí obhende ngatse kute o ngú nakpokpo di ne nasuno 'li Ebhe-o. <sup>18</sup> Padhá de, anga Bhuku gba Ebhe-e ngapa me: «Nedhinga li bagala ngatü ngano lie, mo ogbíte 'bhø ani de.» A apa matá di me: «Kpála na kulu ati ne makalá na kulu gba e-o.†»

<sup>19</sup> I dü me, kpála bini nde apa 'ngú li bhele kpála na Piga gba Ebhe-e sisiti-e, mo obhúka de. Ziba bha bini me okpála bhisi nde alü pí engú ango-o, i dü okpála bhisi de-e, a de dü okpála bata. <sup>20</sup> Mbe bhú 'ndji obhelesi okpála inde ngamene siti

'ngú-o bhú djila ndü okpála hana, amba okoko dje tsulü.

<sup>21</sup> Ma ngaha líli pí mü kala Ebhe, ne kala Yesu Kilisito, di ne kala oandjelu gba Ebhe inde ani abhü o me, mene olíli inde-e hana bhú ngbili 'ngú , mü nde kunda kpála bini ane okoko mane de. <sup>22</sup> Mo o'ó 'kpa mü pí 'ndji kpála má gala de ngú naha kulu pí ani bhú Piga gba Ebhe-o. Mü 'o 'kpa mü pí 'ndji ani má gala-a, li okpála u sidi me ani bhú siti 'ngú-o, akunda napa bhomu-o me yi akpøtse liyi ne ani bhú siti 'ngú gba e-o. Lila limü me ni dü bubu kala Ebhe.

<sup>23</sup> Mo odú bha bini nandji engu de, engú bini, ndji mbo di vino bedi uu ka kuo na bhú 'bu inde ngaha bhükü kute pí mü piko-o.

<sup>24</sup> Okpála koko ngamene siti 'ngú bhú mbasü, li okpála mbíla kala nakpata 'ngú tété. Pí okoko-o, a ayo ngaiza nakpata 'ngú tété kalanü ngú nambimbíla. <sup>25</sup> A bhadi moko pí obabadha kulu, a ngau lie li zi 'kpí, belegü obhende u u e gbülü de-e, a tí da nadü ndü 'kpí hana de me a nde awo lie mawo-o de.

## 6

### *Líli pí obalise*

<sup>1</sup> A ayo me omabhuka inde bhú bali-e manga omakulasi o ne ndü kpadji hana. U manga uo, amba kpála bini asóbho 'li Ebhe de, amba u asóbho la di nasuno gba ní-e de.

<sup>2</sup> I dü me, omakulasi uo nde ne omabhuka-a, u apá de me o mánga uo de-e de, anga a ko ondaise o-o de. Engú bini, a ayo me, u mene kulu pí omakulasi o ndjindji naali, anga okpála inde u ngamene kulu pí o bhomu-o, a ko omabhuka, a ko la di ondaise uo na mukunda. A bhomu-o líli inde ayo me mü suno e pí okpála ne nato masi bhú uo me u mene e ko.

### *Engú pindji gümü tia*

† 5:18 5:18 Tsia bhú Det. 25:4; ne bhú 1 Kol. 9:9; ne bhú Mat. 10:10; di ne bhú Luk. 10:7.

<sup>3</sup> I dũ me kpála bini nde ngasuno engú koko kpi, ani dhika li okukulu oeli gba Ngámá gba ní Yesu Kilisito di ne ongú inde ní ngasuno e pindji namanga Ebhe de-e, <sup>4</sup> a ko kpála na 'ngbé 'ndji, ani mbila la di 'ngú belegu de bini. Ani ambila lie bha bini ne namene kpekebhe di ne natsi pindji oeli. Ongú bhomu-o ngagbe gumu 'he, ne natsi, ne nasobho lio, ne nabhundja siti 'ngú pindji obi o, <sup>5</sup> di ne bhayiki inde i ndjindjia de-e sũnda okpála inde li 'ndji o asiti-o. Okpála ango-o mbila la di matá kukulu 'ngú belegu de bini. U ngabhundja me nabhuka Ebhe-e, a ko kpadji nasia tia.

<sup>6</sup> A moko, nabhuka Ebhe-e, a ko tia na ngbéngbé, i dũ me kpála nde ngakpi djali li ehe inde ka e-o. <sup>7</sup> Padhá de, anga ní go nani pĩla doto inde-e ne ehe bini de, ní gie la di liní ne 'he bini na doto inde-e de. <sup>8</sup> Kaka-a, i dũ me a nde ka ní ne ehe nazũ mazũ di ne bongo ngú nadyidi-e, amba bhobhomu-o ale pi ní ale. <sup>9</sup> Engú bini, okpála bhende ngakũnda nakpo-o, u ngali bhú nale ne bhú ogumu 'he bhelé na padhá padhá di na sisiti inde li okpála ngasiti ka e, inde li okpála nde di ngamu ka e-o. <sup>10</sup> Padhá de, anga gumu tia ngazu ndũ ongú na sisiti hana. Okpála koko ka nakũnda tia naali-e, u ayie li kpadji na nabhuka ayie, u atsia ali bhú likabhu naali ka o makpe.

*Bádha gbele ní nde bhú e kabula nabhuka gba ní-o*

<sup>11</sup> Engú bini, ngamu kpála gba Ebhe-e, kpe ndũ sisiti 'ngú bhomu-o hana makpe. Gbite limu li ngbili 'ngú, ha limu pi Ebhe, dũ ne nabhuka, ne mukũnda, ne 'ndjá bua, di ne bhuku 'ngú. <sup>12</sup> Gũ bádha gbele inde ní nde bhú e ka nabhuka gba ní-o. Lila mukobho na dũdũma ndjindji, anga Ebhe a'i nani mu ngú mukobho ango-o, mo otsia apa ne djali kala okpála bhelé

me ni abhuka. <sup>13</sup> Ma ngaha líli pi mu kala Ebhe inde ngaha mukobho pi ndũ 'he hana, di ne kala Yesu Kilisito inde akpokpo nani kukulu 'ngú pindji nabhuka kala Pose Pilatũ ndjindji-e me, <sup>14</sup> lila líli inde ma aha e pi mu-o ndjindji, mene ndũndũ hana maka ma apa pi mu lie. Mene me kpála bini agú líli ango-o de, akólo li ekpi li Ngámá gba ní Yesu Kilisito agie lie lie-o.

<sup>15</sup> Ekpi ango-o, Ebhe a'o ngae. A ko Ebhe inde ngaha bádha 'ngú pi okpála, a ko koli Ngámá bini inde ngau pi 'ndji ndũ 'he hana. A ko 'ngbé Ngámá pi 'ndji ongbenge ongámási, a ko la di Ngámá gba ongámási. <sup>16</sup> Ani kpikpi de, ani ngadu bhú zi 'kpi inde li kpála bini ti da nakolo li e de. Kpála bini u nga ani de, kpála bini tí la di da nau ani de. A ayo me okpála dhẽgẽ ani! A ayo me ani u dũdũma ne dũdũma! A adũ moko.

*Líli pi obhulu tia*

<sup>17</sup> Pa pi obhulu tia na doto inde-e me, 'ndji uo abé kaka de, u a'ó la di 'to o 'to tia na doto inde-e de, anga tia ango-o ngakodho 'kpi makodho. Engú bini, u 'o mangbo 'to o 'to Ebhe inde ngaha ndũ 'he hana pi ní bhibhiti, ngubula me ní kpi djali ne di ko. <sup>18</sup> Pa pi uo me, u mene bádha 'ngú, u dũ mangbo obhulu tia bhú namene obabadha 'ngú. U dũ okpála napu 'he pi obi o ne bádha bua, u dũ bedhe ngú naha 'he pi okpála koko. <sup>19</sup> U mene mo-o, u pó bhúla ohe na babadha inde di ngabhue mabhue pi o ngú okpi inde ngago-o. Abhomu-o, u tsia tí da nasia kukulu mukobho.

<sup>20</sup> Timoté, lila kulu inde li Ebhe aha e pi mu-o ndjindji. Kpe agelũ na padhá padhá inde i ti ne nabhuka de-e makpe. Kpe di obhayiki li okpála koko nga'i e ne eu me a ko imbilangu-o makpe. <sup>21</sup> Okpála koko abhundja me o ne ngua imbilangu ango-o, u atsia ayie li kpadji na nabhuka-o.

A ayo me, bádha bhú 'bu gba  
Ebhe-e da ne yi bhú dabilì bini.



## Balua na bhisi gba Polo pi Timoté Eli na kalanu

Bhú balua na bhisi gba Polo pi Timoté-e, ani aha líli pi Timoté maka kilí e na kulu inde la di ngateteke ani. Engú na ngebéngbé a ko bua nakibila 'ngú. Polo aha líli pi Timoté ne nato masi bhú ani ngabula nakpokpo 'ngú gba Yesu Kilisito ngbingbili ne nasuno Bádha Ngali na Gandja na Didili di ne bhe na Mbia ndjindji. Pí bhobhomu-o, a ayo di me ani suno eli gba Ebhe-e ndjindji abana likabhu ani ngazu e di ne li okpála ngagu ani lie-o.

Polo atsia agbele 'dje Timoté pindji okpekepeke da 'ngú inde i ti da nakolo li ani ka nali bhú okpekebhe na ngingi inde li tata nde lie ade (2:23) i zu la di ngua ade, a la nga'e okpála inde ngadjedje li ngbili kpadji.

Bhú ndu 'ngú bhomu-o hana-a, Polo ngayo ka Timoté me ani kpata nganda ni di ne namene ongú inde li Polo ngamene e maka nabhuka gba Polo, ne ndja bua gba ani, ne mukunda gba ani, ne nakibila 'ngú gba ani la di ne likabhu ani ngasia bhú mbolo u ngato e li ani-o.

### **Ongbengbe ongú inde bhú bhuku inde-e nga'e inde:**

Eli na kalanu 1:1-2

Natoko ne 'he inde a ayo me u mene e 1:3 - 2:13

Líli ne nagbele 'dje ngú nalila li e 2:14 - 4:5

Ongú inde atsia bha Polo kpi e kpi 4:6-18

Eli na soso 4:19-22

### *Polo yi Timoté mayi*

<sup>1-2</sup> Timoté ndika ma na mukunda, ma aye balua inde-e pi mu ngama Polo. Ebhe abhu nani ma me ma

du ne bhulu titima gba YesuKilisito ngú nakpokpo engú na mukobho na duduma. Ani apa nani me ni ahá mukobho ang-o pi ní li kpadji gba Yesu Kilisito ko. A ayo me 'Dyi ní Ebhe ne Ngámá gba ní Yesu Kilisito suno bádha bhú 'bu gba o-o pi mu, u dje ndjinga mu, amba u ha di guo 'ngú pi mu.

### *Polo agie heni pi Ebhe, ani atsia ato di masi bhú Timoté*

<sup>3</sup> Ma ngagie heni pi Ebhe li 'ngú gba mu-o. Ma ngamene kulu lima pi ani maka onguo ogbi ma adu nani amemene lie-o. Ma ngamemene ne bua nakpokpo kú 'ngú ndjindji. Ma nga'o mu kala Ebhe ndu 'kpi hana. Ngbikpi ne sukpe, nedhinga ma ngayo Ebhe lie, ma nga'o mu kala ani. <sup>4</sup> Ma bhundja egba\* nani mo oku e, gumu nau mu má gala bédhe ma bedhe, amba ma bedhe ne djali bedhe. <sup>5</sup> 'To ma 'ili 'to nabhuka na kukulu inde bhú mu-o de. 'Hi mu Enise ne bhe azu ani na eole, Loisi abhuka ngaiza nani pi mu kalanu. Ma abhuka na paká me ngamu di-e, mu ne nabhuka ang-o-o.

<sup>6</sup> Kaka-a, ma matá ngapa engú inde-e pi mu ne toto: kpo djua bhú angu inde li Ebhe aha e pi mu-o bhú bádha bhú 'bu gba e-e ne kalanu. Ebhe aha nani angu ang-o-o pi mu nedhinga ma a'o 'kpa ma pi 'ndji mu lie ko. <sup>7</sup> Padhá de, anga Bua li Ebhe aha e pi ní-e, a ko bua na tsulu de. Engú bini, Bua ang-o-o ngabedhe mangbo ní ne angu, ne mukunda di ne namene 'ngú li lelele.

<sup>8</sup> Kaka-a, mo odjé numu li nakpokpo 'ngú gba Ngámá gba ní-e de. Abana ma nde lie bhú tikpu li 'ngú gba ani-e, mo odjé di numu ka bhobhomu-o de. Engú bini, ziba mangbo nazu likabhu ne ma bhú dabili bini ngabula Bádha Ngali ní ngakpokpo e-o. Zu likabhu ang-o me mu nde alu ne angu inde li

\* 1:4 1:4 Egbá: Polo a'o nani ká Timoté bhú gudhu na Efeso, ani atsia atapa bhú ndu doto na Makedonia. Ekpí ang-o-o, Timoté aku nani egba naali. Tsia bhú 1 Tim. 1:3.

Ebhe ahaha e ko. <sup>9</sup> Ebhe akobho ní ngae, ani atsia a'i ní me ní dū ne piga gba ni-o. Ani kobho ní ka bádha 'ngú gba ní-e de, engú bini, ani akobho ní ka bádha bhú 'bu gba e di ne ka anga ani akúnda nani me a adu moko. Kala me ani bho kokpí ne doto-o, ani atima Yesu Kilisito pí ní maka ani abhundja lie, amba ní sia bádha bhú 'bu ang-o. <sup>10</sup> Bádha bhú 'bu bhomu-o akoto mbia inde-e bhú mbasu, anga Ngámá gba ní Yesu Kilisito ago. Ani andjia angu kuo ngae. Ani asuno pí ní bhú Bádha Ngali-e me ní asía mukobho na duduma masia.

<sup>11</sup> Ngama-a, Ebhe abhu ma me ma du bhulu titima, ma du di ne bhulu nakpokpo Bádha Ngali ang-o pí okpála, amba ma suno di pí uo. <sup>12</sup> Ma bhadi ngazu likabhu inde-e kabula nakpokpo Bádha Ngali ang-o. Engú bini, ma tété ne numu ade, anga ma mbila kpála inde ma a'o 'to ma 'to e hana. Ma abhuka la bhadi na paká me ani ne angu ngú nalila kulu inde ani aha e muma-a nakolo li 'kpí ani agó lie-o. <sup>13</sup> Ongú inde mo odje me ma nde ngasuno e-e, a ko ongú na kukulu inde a ayo me mu kpata e-o. Lu kpekpeke bhú nabhuka, ne bhú mukúnda inde ní nde ne e bhú nakpøtø liní ne Yesu Kilisito-o. <sup>14</sup> Lila bádha nasuno inde li Ebhe aha e pí mu-o ndjindji. Lila nasuno ang-o ne angu gba Bu Bhobua inde ngadu bhú ní-o.

<sup>15</sup> Mu mbila hana me omabhuka bhelé na ndu doto na Adjia hana a'o ka ma a'o. Fidjele ne Elemodjene di bhú ká uo. <sup>16</sup> A ayo me Ngámá dje ndjinga piga gba Onesifole-o, anga ani ateteke ma bhøtsibhøtsi, ani dje di numu li naama 'ngú ka ma nde lie bhú tikpu-o de. <sup>17</sup> Engú bini, nedhinga ani akolo lie bhú gudhu na Loma-a , ani agili ma ne kekele hana nakolo bha bini li nedhinga ani au ma lie-o. <sup>18</sup> Mu mbila ndjindji me nedhinga ma adu lie bhú Efeso-o, ani ateteke ma naali. A ayo me, Ngámá gba ní-e gie bádha 'ngú pí

ani li 'kpí inde ani akódho 'ngú gba okpála lie-o.

## 2

### *Líli pí sudha gba Yesu Kilisito*

<sup>1</sup> Ngamu Timoté ndika ma, sia angu bhú bádha bhú 'bu inde li Yesu Kilisito ngaha e pí ní-o. <sup>2</sup> Ongú inde mo odje ma me ma nde ngakpokpo e kala bhiti okpála inde adu adje ma-a, suno pí okpála li okpála koko ngaziba o, inde i ti da nasusuno di pí okpála koko.

<sup>3</sup> Kibila likabhu maka sudha na babadha gba Yesu Kilisito. <sup>4</sup> Kpála inde bhú kulu na sudha-a líli bhú ongú ngangá na doto inde-e de, i du me ani kúnda me ni mene engú inde anga li ngámá gba ni-o. Mene bhadi moko. <sup>5</sup> Bhundja la di me, i du me okpála nde ngamene ngeme nagu holo-o, li kpála gu maka li líli na ngeme aziba lie de-e, ani sía makalá de. <sup>6</sup> Kpála inde ngamene kpéke kulu nalu edyi-e, asía ngaiza ezu na edyi ang-o kalanu ngae. <sup>7</sup> Bhundja pindji ongú ma ngapa e pí mu inde-e ndjindji, mu mene mo-o, li Ngámá gba ní-e há angu pí mu ngú nake mboli ndu ongú hana.

<sup>8</sup> Bádha Ngali inde ma ngakpokpo e pí okpála-a, a me Yesu Kilisito ne ndili gba Davidi, Ebhe azuku ani bhú ká okpála inde amu-o. Mo o'li 'to mu li ani de. <sup>9</sup> Ma ngazu likabhu inde-e kabula Bádha Ngali ang-o. U ato belegu ma bhú tikpu mugito me ma amene siti 'ngú. Engú bini, u to eli gba Ebhe-e bhú tikpu de, eli ang-o nganu bha bini ne kalanu. <sup>10</sup> Kaka-a, ma ngakibila ndu likabhu inde ma ngazu e hana ngubula nateteke okpála li Ebhe abhu o-o, amba ngauo di-e, u sia mukobho di ne sangu inde ngadu duduma ne duduma ka Yesu Kilisito-o. <sup>11</sup> Engú inde ma adjia apa e inde-e, a ko kukulu 'ngú. Engú ang-o ngae inde:

«I du me ní nde amu bhú dabili bini ne Yesu-o,

ní dú bhadi bhú mukobho bhú dabili bini ne aní.  
 12 † dú me ní nde alú kpekpeke bhú likabhu ní ngazú e kabula Bádha Ngali-e,  
 ní ú bhadi ne aní bhú dabili bini.  
 Engú bini, i dú me ní nde apa me ní mbila aní de-e,  
 ngaani di-e, aní pá bhadi me ní mbila ní de.  
 13 † dú me ní nde ngamene engú inde i nga li aní de-e,  
 ngaani-e, aní djidji lie de,  
 aní améne ndú 'ngú inde aní apa me ní améne e hana.  
 Padhá de, anga aní tí da namene 'ngú kpi ne bhende aní ngapa e de.»

*Kpála na kulu inde li Ebhe abhuka e*

14 Ongú inde ma apa e pi mú bhomú-o, kpokpo pí omabhuka ngubula me u bhundja pépé. Gbele 'dje uo li 'ngú inde-e ne 'li Ebhe me u atsí pindji oeli de. Padhá de, anga tata tété ade, a mangbo ngasiti bua okpála inde ngadjedje-o. 15 La ngamú makpe-e, mene ne kpéke ngú nadú maka li Ebhe akúnda lie-o. Dú maka kpála na kulu inde ne numú li kulu gba e ade, a akúnda napa me, kpokpo eli na kukulú-o pí okpála koko li lelele.

16 Kpe agələ na padhá padhá inde i tí ne nabhuka de-e makpe. Padhá de, anga okpála inde adhika li ngua ongú bhomú-o ngayie li kpadji gba Ebhe-e bhúbhuku. 17 La di-e, 'li uo ngayangba bhú ká okpála maka eka inde ngazidhaka mazidhaka. Imene ne Filete bhú ká okpála ango-o. 18 U ayie li kpadji na kukulú 'ngú ayie. U ngapa eu pí okpála me nedhinga nazuku ka okpála akodho 'kpí akodho. Kaka-a, okpála koko ayie ka uo li kpadji na nabhuka ayie. 19 Engú bini, kukulú eli gba Ebhe-e yíe bhú da e de. Eli ango-o maka nepanda inde alú kpekpeke. U atsia aye balú tété me: «Ngámá mbila

okpála gba e hana.†» U atsia aye di me: «A ayo me ndú okpála hana inde ngapa me ní ne okpála gba Ngámá-a, 'o namene siti 'ngú ma'o.»  
 20 Adudú bhú 'ngbé 'ti ne limbi osaani bhelé. U abho osaani koko li olo, u abho okoko li aladja, u agolo okoko li ndula. A pise bha bini li obhobhomú-o de, u abho matá okoko li doto. Osaani bhomú-o li okulu kpikpikpi. U nga'o obhende na babadha-a ngú okpí na anokomia, okoko-o, u ngamene kulu ne di ndú 'kpí hana. 21 A bhadi pí ní moko. Li kpála 'o namene ndú sisiti 'ngú inde ma ngapa 'ngú lie bhomú-o hana-a, li Ebhe 'ó aní kpi pí e. Aní dú maka saani na olo, anga ngaani-e, aní bedhe ngú namene ndú obabadha kulu hana.

*Líli pí bádha kpála na kulu gba Ngámá*

22 Timoté, gbe limú li osisiti 'ngú inde li omakombise koko ngamene e magbe. Ngamú bhú dabili bini ne okpála bhende ngayo Ngámá ne bua o bini-e, yi gili namene ngbili 'ngú , ne nadú ne nabhuka, ne mukúnda di ne guo 'ngú sùnda yi. 23 Gbe limú li otodú na padhá padhá li tata nde lie ade-e magbe. Padhá de, anga mú mbila ndjindji me ndú 'ngú bhomú-o hana ngagbe tolo. 24 A ayo de me kpála na kulu gba Ngámá-a dú natsi-e de, a ayo mangbo me aní dú ne guo 'ngú pí ndú okpála hana. Aní dú kpála inde ngasuno 'ngú pí okpála ndjindji. Aní dú la di kpála nakibila 'ngú nedhinga li okpála ziba engú aní ngapa e lie de ko. 25 A ayo me, aní suno 'ngú pí okpála bhende nga'o bhayiki li engú inde aní ngapa e ne bhuku bua. Padhá de, anga nedhinga koko-o, li Ebhe há kpadji pí uo ngú nadjí mabhundja gba o ngubula me u mbila eli na kukulú-o. 26 Abhomú-o, u hólo matá nabhundja 'ngú ndjindji. U tsia zé bhú ekú gba Djabulú inde aholo uo, a atsia a'o di uo sa líli gba aní-o.

† 2:19 2:19 Tsia bhú Nom. 16:5.

### 3

#### *Engú inde akódho 'kpí lí sokpí-o*

<sup>1</sup> Mbila ndjindji me bhú onedhinga na sokpí-e, kpekpeke da 'ngú adú naali. <sup>2</sup> Padhá de, anga okpála adú nambila bha engú gba o makpe, u adú akúnda tia naali, u adú apa 'lí o, u adú obhulú 'ngbé 'ndji, u adú nasobho Ebhe, u dú nadjé okpála inde azu o-o de. U gíe heni pí okpála inde amene bádha 'ngú pí o-o de, u mánga ehe gba Ebhe-e de. <sup>3</sup> U dú ne mukúnda pí okpála koko de, u djé ndjinga obi o de, u adú apa 'ngú lí okpála koko sisiti. U hólo bua o ka 'ngú de, u akúnda bha bini namene obi o sisiti, u kúnda bádha 'ngú de. <sup>4</sup> U apú obi o pí obhulú yala gba o, bua uo adú ape má pupupu, u tsia dú na'o lío ne abhúlá. U akúnda mangbo engú inde a nga lí o, u kúnda Ebhe de. <sup>5</sup> U adú namene mugito me o ne okpála gba Ebhe, engú bini, u zíba angu gba ani-e de. Gbe límú de okpála bhomu-o magbe!

<sup>6</sup> Okpála koko bhú ká okpála bhomu-o ngali bhú okúti, u tsia hólo lí ekú gba o-o olisi na padhá padhá 'ngú inde oo. Olisi angoo abedhe ne gumú 'he ngangá, u atsia abedhe dí ne sisiti 'ngú bedhe. <sup>7</sup> U ngagili ndú 'kpí hana nambila 'ngú, engú bini, angu uo kolo lí nambila kúkúlu 'ngú-o belegu de bini. <sup>8</sup> Okpála bhomu-o ngayala nakpata kúkúlu 'ngú maka Djanesi ne Djambesi ayala nani nadjé 'lí Moidje líe-o. A ko okpála lí 'ndji o asiti, u bhuka Ebhe na paká paká de. <sup>9</sup> La-a, u lúka matá ne dí tsutsu de, anga ngingi 'ngú u ngamene e akóto bhú djila ndú okpála hana ngbadha, maka bhe nani í mene Djanesi ne Djambesi-o.

#### *Engú inde a ayo nabhundja pindji e*

<sup>10</sup> La ngamu-o, mo okpata ma ndjindji bhú nasuno gba ma-o, mo ou lele nadhukú gba ma-o, mú

mbila mabhundja gba ma-a hana, mú mbila nabhuka gba ma-a hana, mú mbila 'ndjá bua gba ma-a hana, mú mbila mukúnda gba ma-a hana, mú mbila kpéke bua gba ma-a hana. <sup>11</sup> Mú mbila líkabhu ma azu e ne mbolo u ato e lí ma-a hana. Mú mbila ndú 'ngú inde apú pí ma bhú Atiokia, ne bhú Ikoniomu dí ne bhú Lisitele hana. Ma azu líkabhu na paká paká, engú bini, Ngámá agbegbe ma bhú ndú líkabhu bhomu-o hana. <sup>12</sup> A ne okpála koko inde akúnda nakobho maka lí Ebhe akúnda líe, bhú makpètso gba ní ne Yesu Kilisito-o. A na paká me u ató mbolo lí ndú uo hana. <sup>13</sup> La-a, obhulú nazi 'gú, inde dí ngapite okpála-a, anú bhú siti 'ngú ne kalanu. U ngapite okpála, lí okpála koko píte dí uo.

<sup>14</sup> Engú bini ngamu-o, lú kpekpeke bhú 'ngú inde mo okpata e, mo osia dí-e ne bua mú hana ko. Mú mbila okpála asuno pí mú-o hana. <sup>15</sup> Nayie bhú ndíli lí mú-o, mú mbila Bhuku gba Ebhe-e ndjindji. Bhuku angoo tí da naha pí mú ímbilangu inde ngato kpála bhú mukobho na duduma ka nabhuka Yesu Kilisito-o. <sup>16</sup> Ndú 'ngú inde u aye e bhú Bhuku gba Ebhe-e hana ayie ka Ebhe. A ne tata ngú nasuno ngbili 'ngú pí kpála, ngú napana pulú 'ngú gba kpála pí e, ngú nali kpála, dí ne ngú nasuno pí kpála namene 'ngú maka lí Ebhe akúnda líe-o. <sup>17</sup> Ebhe amene mo-o ngubula me kpála gba ní-e dú bedhe na paká paká ngú namene ndú babadha 'ngú hana.

### 4

#### *Kpokpo 'lí Ebhe*

<sup>1</sup> Yesu Kilisito agó galikpe mago, ani tsia ú ngámá píla doto. Ani akódho 'ngú gba okpála inde mú ne obhende amu-o. Kaka-a, ma ngaha líli inde-e pí mú kala ani ne kala Ebhe me: <sup>2</sup> kpokpo 'lí Ebhe, lú pépé kpekpeke bhú bádha nedhinga abana bhú siti nedhinga. Mbe bhú

'ndji okpála inde ngamene siti 'ngú-o, pa pi uo me u 'o namene siti 'ngú ma'o. To masi bhú okpála koko ngú namene bádha 'ngú. Suno ndu ongu bhomu-o pi uo hana li lelele di ne 'ndjá bua. <sup>3</sup> Padhá de, anga ekpí akólo makolo, okpála kúnda matá nadije nasuno pindji kúkulu 'ngú de. Engú bini, u adú nakpata gumu gba o makpe, u tsia pó bhúla omusuno na eu de o. Omusuno ango-o adú apa pi uo ongu inde anga li uo-o. <sup>4</sup> U anini 'dje o li nadije kúkulu 'ngú, u tsia kpáta ongu na padhá padhá inde li okpála ngagbe e bhú 'ndji o-o. <sup>5</sup> Engú bini ngamu-o, du naholo bua mu bhú ndu 'ngú hana maholo. Kibila nazu likabhu makibila. Mene kulu nakpokpo Bádha Ngali-e ndjindji. Ndjia kulu li Ebhe aha e pi mu-o.

<sup>6</sup> Muma-a, nedhinga nandala 'kpa li mukobho gba ma-a ngubula me u bhelə ma-a akolo masikpe. Nedhinga nabhana lima pi doto inde-e ale. <sup>7</sup> Ma agu bádha gbele, ma agu holo akolo ali soso. Ma ndala 'kpa li nabhuka de. <sup>8</sup> Mbia inde-e, Ebhe aleke makalá muma abhúla. A ko ndata na 'ngbe ndua inde li Ngámá ahá e muma li 'kpí ani akódho 'ngú gba okpála lie-o. Ndata ango-o, a ko ndata na mukobho. Ngámá gba ní-e, a ko Ngámá inde ngakodho 'ngú gba okpála ngbingbili. Ani há bha ndata ango-o muma kpi ma kpi de, engú bini, ani ahá di pi ndu okpála hana inde ne djali li nago ka ani-o.

*Polo apa pi Timoté me ani go bhaka ni*

<sup>9</sup> Mene ne kpéke me mu go bhaka ma má gala! <sup>10</sup> Padhá de, anga Demasi a'o ká ma ka gumu 'he na doto na naki inde-e a'o. Ani atapa bhú gudhu na Tesalonike. Kelesasi atapa bhú gudhu na Galatia. Tito atapa bhú gudhu na Dalamatia. <sup>11</sup> Luka atigala ne ma si ngae kpi e kpi. Mu du ago-o, ha Maloko, mu go ne ani bhú dabili bini, anga ani

tí da nateteke ma li kulu ma nde ne e ko. <sup>12</sup> Ma atima Tisike bhú gudhu na Efeso. <sup>13</sup> Li mu du nago-o, mu de go muma ne koti gba ma inde ma 'o nako ká e bhú gudhu na Tuluasi agba Kalipusi ko. Go di muma ne obhuku gba ma-o, ane la mane obhende u amene e li kó 'nu-o. <sup>14</sup> Alekidjandele, bhulu nabho bolo-o amene ma sisiti naali. Ngámá agie pi ani nakpata lele siti 'ngú ani amene e li ma-a ngae. <sup>15</sup> Lila di limu ka ani malila, anga ani ngagu nasuno gba ní-e kpekpeke.

<sup>16</sup> Nedhinga ma akpokpo 'ngú gba ma-a lie bhutsibhutsi na bini kala okpála nakodho 'ngú-o, kpála bini teteke ma de. Ndu uo hana a'o ká ma. Ebhe mbu li uo tété. <sup>17</sup> Engú bini, Ngámá ateteke ma ngae, ani aha angu muma ngubula me ma kpokpo eli gba ni-e ndjindji. Ndu omupagano hana inde adu oo adje. Ani atsia agbegbe ma sakpa kuo. <sup>18</sup> Ngámá agbégbe matá ma sakpa ndu egú li okpála ngagu ma ne e hana, ani tsia tó ma bhú Nau gba e na abhúla-o. A ayo me u dhege Ngámá duduma ne duduma! A adu moko.

*Oeli na soso*

<sup>19</sup> Pa pi Pilisila ne Akuila, a la di-e piga gba Onesifole me ma yi uo mayi. <sup>20</sup> Elaste atigala bhú gudhu na Kolito. Ma a'o ká Tolofime bhú gudhu na Milete, anga adu li ani ne kuo. <sup>21</sup> Mene ne kpéke me mu go ei kala nedhinga na zini. Ebulosi, ne Pudene, ne Line ne uo ne Kolodia, a la di-e ondaise ní inde ei-e hana apa me o yi mu mayi.

<sup>22</sup> Ngámá du ne mu. A ayo me, bádha bhú 'bu gba Ebhe-e du ne yi.

## Balua gba Polo pi Tito Eli na kalanu

Tito inde akolo nani kpála na kulu bhú dabili bini ne Polo, ani atsia adu di ateteke ani bhú kulu gba e na Ebhe inde ani adu adholo ne e, ani adu nani mapagano inde adji bua e, ani atsia aziba Kilisito . Polo aye balua inde pi Tito, makombi inde adu ateteke ani bhú Dadjua gba Ebhe na Kelete-o. Polo a'o nani ká ani oo ngubula natsia 'kpi li kulu na Dadjua gba Ebhe ango-o. Ngbengbe 'ngú bhú balua inde bata.

Engú na kalanu u aye bhú balua inde-e, ko nasuno pi Tito dasundu inde a ayo me obhelesi okpála na Dadjua gba Ebhe du ne e, adu kpi ne bhe na sisiti inde li okpála na Kelete nde ne e ko. Pipita-a, Polo ngaha líli pi Tito me ani du masuno pi limbi okpála ngangá na Dadjua gba Ebhe-o. Limbi okpála maka: obhosi na bhelesibhelesi, omakombise, obalise ne olisi bhe na bhelesibhelesi (inde a ayo me u ha líli pi otsalisi). Li soso-o, Polo ngaha líli pi Tito pindji lele nadholo gba makilisito, ne nadu ne mukunda, ne nadu ne guo 'ngú ngubula nakpe yala, ne nakpe tolo, a la di na gbogbo bhusu bhú Piga gba Ebhe.

### **Ongbengbe ongú inde bhú bhuku inde-e ngae inde:**

Eli na kalanu 1:1-4

Obhelesi okpála na Piga gba Ebhe 1:5-16

Engú a ayo me limbi okpála mene e bhú Piga gba Ebhe 2:1-15

Naha líli gba Ebhe ne napa me kpála du ne nalila li e 3:1-11

Eli na soso 3:12-15

### *Polo yi Tito mayi*

<sup>1</sup> Ma aye balua inde-e ngama Polo, bali gba Ebhe, la di bhulu titima gba YesuKilisito . Ebhe aha kulu napana kpadji na nabhuka pi okpála inde ani abhu o-o mama ngubula

me u bhuka ni, amba u ko di mboli kukulu nasuno inde ati ne mukobho inde ngadhogo ani-o. <sup>2</sup> Abhomu-o, u ti da nadu ne 'to o me o osia mukobho na duduma masia. Ebhe inde i papa eu de-e, apana nani mukobho ango-o pi omaha e bhutode kala me ani bho kokpi ne doto. <sup>3</sup> Nedhinga inde li Ebhe a'o e akolo lie, Ebhe, Mukobho gba ní-e amene me omaha ni mbila 'li ni li kpadji nakpokpo Bádha Ngali . A bhomu-o kulu inde ani aha líli me ma mene e-o.

<sup>4</sup> Ma ngaye balua inde-e pi mu Tito. Mu maka kukulu ndili gba ma bhú 'bu nabhuka inde ngakpotsø ní ko. A ayo me bádha bhú 'bu ne guo 'ngú gba 'Dyi ní Ebhe, di ne Yesu Kilisito Mukobho gba ní-e du ne mu bhú dabili bini.

### *Lele mukobho gba obhelesi okpála na Piga gba Ebhe*

<sup>5</sup> Ma a'o ka mu bhú kpemø na Kelete, amba mu ndjia naleke ndu 'ngú hana inde atigala-o. A ayo me mu bhú obhelesi okpála na Piga gba Ebhe-e bhú ndu gudhu hana bini ne bini nakpata olili nako ma aha e pi mu-o moko me, <sup>6</sup> a ayo de me u u bhele kpála na Piga gba Ebhe-e ne siti 'ngú-o de. Ani du ne koli ølo bini. A ayo me ongisi gba ani-e du omabhuka . U amene engú bini de inde u 'í uo ka e me, a ko ongisi na sisiti, di ne me, a ko ongisi na ndjondjo.

<sup>7</sup> Bhele kpála na Piga gba Ebhe-e ngalila kulu gba Ebhe-e ngae. Kaka-a, a ayo de me u u ani ne siti 'ngú-o de. A adú kpála na 'ngbé 'ndji de. Ani adú nake 'ngú lie má gala de. Ani ahá lie pi pandi de. A adú bhulu nagu gbele de. Ani adú nagili tia li siti kpadji de. <sup>8</sup> Engú bini, ani du nasia ogomago ndjindji. Ani kanda bádha 'ngú. Ani du nabhundja 'ngú ndjindji. Ani du ngbingbili. Ani du bubu kala okpála di ne kala Ebhe. Ani du kpála naholo bua e ka 'ngú maholo. <sup>9</sup> A ayo me ani

gbite lie kpekpeke li Eli na kukulu inde ati ne engú inde ní asuno e pi ani-o. Abhomu-o, ani tí da nato masi bhú okpála koko ne nasuno na ngbingbili-o. Ani tsia tí la di da nasuno pi okpála inde nga'o bhayiki li nasuno gba ani-e me uo li pulu kpadji.

*Polo agbele 'dje Tito pindji nasuno na eu*

<sup>10</sup> Okpála bhelé ne kpéke 'ndji, a ane la mane bhú ká okpála inde ngasuno me a ayo me omakilisito kpata líli gba omaYuda li kpadji nali gandja-o . U ngapite okpála koko, u di ngapa ongú na padhá padhá. <sup>11</sup> A ayo nagbite 'bhø uo, anga u ngangbingi 'ndji opiga libhomu ne nasuno ongú inde a ayo nasuno e de, ngabula nasia tia li siti kpadji.

<sup>12</sup> Suka kpála bini na kpømø na Kelete-e, adu nani bhulu imbilangu. Ani apa nani ne 'bhø e me: «Okpála na Kelete-e, a ko odidili obhulu eu, uo maka onu na 'gú. A ko obhulu ipio, u ngabhundja bha bini bula 'ngú na 'zu.» <sup>13</sup> Engú inde ani apa e bhomu-o, a ko kukulu 'ngú. Kaka-a, mbe bhú 'ndji uo tété kpekpeke, ngabula me u lu kpekpeke bhú nabhuka, <sup>14</sup> u a'ó la di 'ndji o li ongú na padhá padhá inde li omaYuda ngagbe e bhú 'ndji o de. U adu di namene líli gba okpála bhende ngayala kukulu 'ngú-o de. <sup>15</sup> Pi okpála bhende kala Ebhe bubu-o, ndu 'he hana bhadi bubu. La-a, pi okpála bhende kala Ebhe bubu ade-e, inde ayala nabhuka-a, ehe bini pi uo bubu belegu ade bini. Padhá de, anga imbilangu di ne bua nakpokpo kú 'ngú gba uo-o asiti. <sup>16</sup> U ngapa me, o mbila Ebhe hana, engú bini ongú inde u ngamene e ngasuno me u mbila ani de. Engú inde u ngamene e nga li okpála de, a nga la di li Ebhe de. A ko okpála na kpekpeke 'ndji. Uo la di ne angu namene bádha 'ngú belegu ade bini.

## 2

*Polo aha líli pi omabhuka*

<sup>1</sup> Engú bini, ngamu Tito-o, pa engú inde ati ne nasuno na ngbingbili-o. <sup>2</sup> Pa pi obhosi bhende na gbegegbe-e me, u du naholo bua o ka 'ngú maholo. U du ne okpála inde u ngamanga o mamanga. U du nabhundja 'ngú ndjindji. U lu la di ne angu bhú nabhuka , ne mukunda, di ne 'ndjá bua. <sup>3</sup> Ha di líli pi olisi bhe na obhelesibhelesi-o. Pa pi uo me mukobho gba uo-o du bubu kala Ebhe. U adu napa osisiti 'ngú li okpála koko de. La di-e, u adu obalise na pandi de. A ayo me u suno pi okpála koko ongú na ndjindji. <sup>4</sup> U mene mo-o, i tsia suno pi otsalisi me, u du ne mukunda pi obhosi gba o, di ne pi ongisi gba o, <sup>5</sup> u du nabhundja 'ngú ndjindji, u adu akunda obhosi ngangá de, u 'o 'to o 'to piga gba o, u du ndjindji. U mene la di olili gba obhosi gba o makpe, ngabula me kpála bini asóbho eli gba Ebhe-e de.

<sup>6</sup> Ha di líli pi omakombise me, u du namene ndu 'ngú hana li lelele. <sup>7</sup> Ngamu makpe-e, a ayo me mu suno bhú okulu gba mu-o ongú na ndjindji, inde li okpála ti da nakpata nganda e. A ayo me nasuno gba mu-o du ngbingbili, amba adu di bhe li okpála ti da namanga e. <sup>8</sup> A ayo me 'li mu du ngbingbili, eli inde li okpála tí da naboyo e de, amba obhulu yala gba ní-e asia engú na sisiti napapa li ní de. Abhomu-o, u tsia djé numu na paká paká.

<sup>9</sup> A ayo me, obalise mene líli gba omakulasi o bhú ndu 'ngú hana. A ayo me u du amene engú inde anga li omakulasi o. U adu adjidji 'ngú sa 'li uo de. <sup>10</sup> U azi 'he gba omakulasi o de. Engú bini, u du ndu 'kpí hana ngbingbili li pápá gba uo-o. U mene mo-o, li okpála tsia ú me nasuno inde pindji Ebhe, Mukobho gba ní-e ndjindji ka nau lele maka u ngakobho lie-o.

*Yesu akunda me ní dū piga gba ní*

<sup>11</sup> A moko, Ebhe asuno bádha bhú 'bu gba e inde ngakobho ndu okpála hana bhú siti 'ngú-o asuno. I dú kaka de-e, kpála bini de kóbho de. <sup>12</sup> Bádha bhú 'bu ango-o ngasuno pi ní nayala siti 'ngú. A la di ngasuno pi ní nayala ogummu ongú na doto, amba nedhinga ní nde nga lie pí doto inde-e, a ayo me ní dū nabundja 'ngú ndjindji, ní dū namene engú inde ngbingbili, di ne bhende ngangá li Ebhe manga. <sup>13</sup> Ní dū namene moko ngubula nadjeke ekpí na djali inde ní nga'o 'to ní 'to e-o. Li 'kpí ango-o, Yesu Kilisito inde Ebhe gba ní na ngbéngbé, di ne Mükobho gba ní-e, agie lie píla doto bhú sangu gba e ko. <sup>14</sup> Aní aha mükobho gba e makpe pi ní ngubula nagbegbe ní bhú ndu osisiti 'ngú hana. Aní abhú ní me ní kolo piga gba ní makpe, piga inde bubu kala ní-o, amba ní dū piga inde abedhe ne gummu namene babadha 'ngú.

<sup>15</sup> A bhomu-o engú inde ayo me mu suno e ne angu mu hana, nedhinga inde mu ngato masi lie bhú okpála inde ngadje mu, di ne nedhinga inde mu ngambe lie bhú 'ndji obhende i dje mu de ko. Mo oká kpadji pi kpála bini de me aní u mu padhá-a de.

### 3

*Lele nadu ka omabhuka bhú ká omupagano*

<sup>1</sup> Bhundja pi ndu omabhuka hana me, a ayo me u manga ongámási, di ne okpála bhende ngau pí 'ndji uo-o. A ayo me u mene líli gba uo-o, amba u dū bedhe ngú namene ndu ongú na babadha hana. <sup>2</sup> A ayo de me u di kpála-a de. U adu obhulu gbele de. A ayo me u dū okpála na guo 'ngú. A ayo me u dū ndu 'kpí hana ne bhuku bua pi ndu okpála hana. <sup>3</sup> Padhá de, anga nganí di-e, ní adu nani ongingi. Ní adu nani okpála na kpekpeke 'ndji. Ní adu nani li

pulu kpadji. Ondu ngangá gummu 'he, di ne oehe nanga li ní manga a'o nani ní obalise. Mükobho gba ní-e adu nani sisiti. Ní abedhe di nani ne ogummu 'he bedhe. Ní adu ayala okpála koko, u atsia adu di ayala ní.

<sup>4</sup> Engú bini, nedhinga li Ebhe, Mükobho gba ní-e asuno bádha 'ngú di ne mukunda gba e lie pi okpála-a, <sup>5</sup> aní atsia akobho ní. Aní kobho ní ka ongú na ngbingbili inde ní amene e-e de. Engú bini, aní akobho ní ka aní adje ndjinga ní lie ko. Aní akobho ní li kpadji naha Bu Bhobua pi ní. Bu Bhobua ango-o a'e osisiti 'ngú gba ní-o, aní atsia aha mükobho na mbia pi ní, ne lele nadu na mbia. <sup>6</sup> Ebhe atuko Bu Bhobua ango-o pi ní bhelé li kpadji na okulu inde li Yesu Kilisito, Mükobho gba ní-e amene e ko. <sup>7</sup> Abhomu-o, Ebhe atsia amene me ní kolo ngbingbili ka bádha bhú 'bu gba ní ko, amba ní ti la di da nasia mükobho na duduma, inde ní nde ne 'to ní 'to e-o. <sup>8</sup> Eli bhomu-o, a ko eli na kukulu. Ma akunda la di me, mu lu pépé kpekpeke, amba okpála hana inde abhuka Ebhe-e, ha lío ngú namene ongú na babadha. A bhomu-o engú inde ndjindji, inde di ne tata pi ndu okpála hana ko.

<sup>9</sup> Engú bini, mo odú namene obhayiki na ngingi de. Mo odú namene kpekebhe li nakpokpo ndjándjá kpokpodumu de. Mo odú namene otolo di ne bhayiki pindji líli gba Moidje-e de. Padhá de, anga ndu ongú bhomu-o hana padhá, tata la di tété ade. <sup>10</sup> Mbe bhú 'ndji bhulu nagbogbo bhusu omabhuka bhutsibhutsi na bini, mu mbe bhú 'ndji aní bhutsibhutsi na bhisi, amba pipita aní dje mu de-e, mu de gbe aní bhú ká uo magbe. <sup>11</sup> Mu mbila ndjindji me, ngua kpála bhomu-o ayie li ngbili kpadji ayie. Aní atsia a'o lie bhú mangimbo ngae makpe, ka aní azi 'ndji e lie bhú namene siti 'ngú-o.

*Polo aha olíli na soso pi Tito*



<sup>12</sup> Ma ngatima Alatemasi pi mụ. I dụ ani de-e, li ma atíma Tisike. Nedhinga ani akólo lie, mụ de mene ne kpéke ngú nago nabhaka ma bhú gụdhu na Nikopolisi. Padhá de, anga ma apa me nedhinga na zini-e ané ma me, ma nde oo ko. <sup>13</sup> Tsia 'kpí li 'ngú na dhụkụ gba avụka Djenasi, ngauo ne Apolosi-e ndjindji, amba u adú bhú ndibhili 'he bini de. <sup>14</sup> A ayo di me okpála gba ní-e mbila lio ne namene ongú na babadha ngubula me u dụ ne oehe ngubula nateteke okpála inde ne gụgumụ-o ne di. U mene mo-o, kulu gba uo-o tsia zú nguwa.

<sup>15</sup> Ndụ okpála hana inde bhú dabili bini ne ma-a apa me, o yi mụ mayi. Pa pi ondaise ní na mụkunda, inde ní nde ne o bhú 'bu nabhuka me, ya yi uo mayi. A ayo me, Ebhe tuko bisagu pí ndụ yi hana!

## Balua gba Polo pi Filemo Eli na kalanu

Filemo nani ne makilisito na kpekpeke, a mana me a ko nani suka okpala na Dadjua gba Ebhe na Kolosai. La die, adu nani ka ani ne bali bini inde adu 'li e me Onedjime. Bali ango-o, akpe nani makula e, ani anu au li e ne Polo me ani nde bhú tikpu. Ani adje Bádha Ngali gba Kilisito ka Polo, ani atsia akolo makilisito. Abhomu-o, Polo atsia aye balua pi Filemo ne nayo ka ani me, a ayo me u dje lio ne bali gba e-o. Polo atsia atima Onedjime agba Filemo ne nakikiliki li e pi Filemo me, ani sia ani ne bádha bua, ani asia bha ani maka bali inde u ambu li e de. Engú bini, ani sia ani maka ndai e inde makilisito.

### **Ongbengbe ongu inde bhú bhuku inde-e ngae inde:**

Eli na kalanu 1-3

Napa 'ngú ndjindji li kate Filemo 4-7

Nakikiliki lie ngubula Onedjime 8-22

Eli na soso 23-25

### *Polo ne Timoté yi Filemo ne obi e mayi*

<sup>1</sup> Ma aye balua inde-e pi mu ngama Polo. Ngama-a, ma bhú tikpu kabula 'li Yesu Kilisito . Ya aye pi mu ngaya bhú dabili bini ne ndai ní na mukunda Timoté. Ya aye pi mu ndai ya Filemo, ngamu kpala inde ngakpokpo Bádha Ngali bhú dabili bini ne ya-o. <sup>2</sup> Ya aye di balua ango-o pi ndai ní na eole Apia, ne pi Alisipe inde ngagu gbele bhú dabili bini ne ní-o. Ya aye di pi ondaise ní inde ayoyo Ebhe bhú 'ti gba mu-o. <sup>3</sup> A ayo me Ebhe 'Dyi ní, bhú dabili bini ne Ngámá Yesu Kilisito suno bádha bhú 'bu pi yi, amba u ha di guo 'ngú pi yi.

*Polo agie heni pi Ebhe ngubula Filemo, ani atsia ayo di Ebhe pi ani*

<sup>4</sup> Ndu nedhinga hana ma ngayo Ebhe lie-e, ma ngabhundja mu Filemo. Ma la di ngagie heni pi ani ngubula mu ndu 'kpi hana. <sup>5</sup> Padhá de, anga ma ngadje me mu ne mukunda naali pi ndu omabhuka hana, mu la di ne nabhuka bhú Ngámá Yesu. <sup>6</sup> Ma ngayo Ebhe ngubula me nabhuka inde ní akpøtø liní ne mu bhú e-e, zu obabadha nguwa, amba mu ke mboli obabadha ndu 'ngú hana inde li Ebhe aha e pi ní-e má kpulukatú! Li mu mene mo-o, ndu okpala hana dhégø Kilisito. <sup>7</sup> Ndai ma, mukunda mu nde ne e pi ondaise ní-e aha djali muma naali, atsia ato di masi bhú ma, anga mo oke bua omabhuka koko-o.

### *Polo ayo ka Filemo me ani sia Onezime ndjindji*

<sup>8</sup> Kaka-a, abana ma nde lie ne angu nayo 'he ka mu maka li bua ma akunda lie bhú 'bu nabhuka ní nde ne mu bhú e, <sup>9</sup> ma ayó ka mu mo-o de. La-a, ma ayó mangbo 'he ka mu kabula mukunda ní nde ne mu bhú e ko. Ma ngapa 'ngú bhomu pi mu ngama bhele kpala Polo, ma la di mbia inde-e bhú tikpu kabula Yesu Kilisito. <sup>10</sup> Ma ngakikiliki lima pi mu ngubula Onezime, ndili gba ma bhú 'bu nabhuka. Ani abhuka Yesu sa 'kpa ma ei, nedhinga ma nde lie bhú tikpu-o. Kaka-a, ani maka ndili gba ma, ma maka 'dyi ani. <sup>11</sup> Nako kalanu-o, ani du pi mu li kulu bini de, engú bini mbia inde-e, ani akolo pi ndu ní bhisi hana li kulu.

<sup>12</sup> Ngaani-e, a ko kpukpu na bua ma. Mbia inde-e, ma ngagie ani pi mu. <sup>13</sup> Ma nde lie bhú tikpu ei kabula Bádha Ngali-e, bua ma apa muma me ani du de ma si ngú nateteke ma mada mu. <sup>14</sup> Engú bini, ma kunda nako namene mo-o padhá de me mu nde ziba de-e de. Padhá de, anga ma kunda nagbite mu li namene mo-o ne ekpu de. Ma akunda mangbo me mu mene engú ango-o ne bádha bua.

<sup>15</sup> Nedhinga koko-o, Ebhe amene me Onezime nũ li bĩli koko ngubula nedhinga bedi, amba pipita-a, ani gie lie agba mũ, ngũ nadũ ne mũ bhũ dabili bini ndũ 'kpĩ hana. <sup>16</sup> Padhá de, anga mbia inde-e, a ko matá bali de, engũ bini ani ane bali mane. A ko ndai ní na mukũnda. Ngama Polo-o, ma kũnda ani naali. La ngamũ-o, mukũnda gba mũ pi ani-e ané la matá mane, anga a ko kpála-kuti, a ko la di ndai mũ makilisito.

<sup>17</sup> Kaka-a, i dũ me mũ nde ngau ma maka ndai mũ-o, mũ de sia ani mugito me mo osia ma makpe. <sup>18</sup> Li ani mene mũ sisiti-e, i dũ di me ani nde ne bopulu nagigie pi mũ-o, ma agie pi mũ ngama. <sup>19</sup> Ngama Polo-o, ma aye pi mũ ne 'kpa ma makpe me: «Ma agie pi mũ ngama.» La-a, mũ ti da nayo ehe bini li ma de, anga mukobho na dudũma inde mo osia e-e, mo odje 'ngũ ango-o ka ma. <sup>20</sup> A moko ndai ma, mene engũ bhomũ-o mũma kabula mukũnda gba Ngámá gba ní-o. Teteke bua ma, anga ní akpõtø linĩ bhũ 'bu Kilisito.

<sup>21</sup> Nedhinga ma ngaye balua inde-e pi mũ lie, ma aziba na paká me mo oméne engũ ma ngayo e ka mũ-o mamene. Ma ambila la di me mo oméne belegũ ané bhende ma ngayo e ka mũ-o mane. <sup>22</sup> Nedhinga inde mo osia Onezime lie agba mũ-o, mũ de leke di dabili mũma ngũ nasi ka ma tété. Padhá de, anga ma abhundja me Ebhe asũno bádha bhũ 'bu bhũ mayo gba yi-e masuno. Ani tsia bhũlu kpadji mũma me ma kolo li yi oo ko.

### *Oeli na soso*

<sup>23</sup> Epafalasi, inde bhũ tikpu bhũ dabili bini ne ma kabula Yesu Kilisito-o yi mũ mayi. <sup>24</sup> Maloko, ne Alisitaluka, ne Demasi di ne Luka ndũ uo hana ngamene kulu ne ma bhũ dabili bini. U apa di me o yi mũ mayi. <sup>25</sup> A ayo me bádha bhũ 'bu gba Ngámá gba ní Yesu Kilisito-o dũ ne yi.

## Balua u aye e pi omaEbele Eli na kalanu

Balua inde u aye nani e pi omaEbele, u aye nani pi limbi omakilisito inde akolo masakpe de na'o ka nabhuka gba o bhú Kilisito ka nato mbolo li uo adu anu bha ne kalanu-o. Kpala inde aye balua ango-o, adu ato masi bhú uo ane mane bhú nabhuka ne nasuno pi uo me, Yesu Kilisito ne polofeta na kukulú, a ko la di polofeta na soso inde li Ebhe apana lie bhú e pi okpala gba e-o.

Bhú 'ngú na Ebhe gba omaYuda-a, odimandø adu amene mayo ne natsulu onu ngubula me Ebhe mbu li siti 'ngú gba okpala. Engú inde u adu amene bhomu-o, adu kulu Yesu inde Ndili na duduma gba Ebhe, inde aha lie ngae makpe maka enu inde natsulu matsulu. Kaka-a, Ebhe a'o ani ngbéngbé ane opolofeta, ane oandjelu, ane Moidje ngae makpe, Ebhe atsia pa me a ko dimandø na duduma. Li papá gba ani-e, ndu omabhuka hana asia mukobho li tsulu u adu ne e li papá na siti 'ngú gba o ne li papá na kuo.

### Ongbengbe ongu inde bhú bhuku inde-e ngae inde:

Eli na kalanu: Ebhe ngasuno li e mbámbá bhú Kilisito 1:1-3

Kilisito ngbéngbé ane opolofeta, ane oandjelu, ane Moidje, ane Djodjue, ane odimandø, ane gandja a la di-e makiso 1:4 - 10:39

Engú na ngbéngbé a ko nabhuka 11:1 - 12:29

Nanga li Ebhe 13:1-19

Mayo na soso 13:20-21

Eli na soso 13:22-25

*Yesu Kilisito ne Ndili gba Ebhe makpe*

<sup>1</sup> Nani kalanu-o, Ebhe akpokpo 'ngú pi onguo ogbi ní bhútsibhútsi di

ne li okpadji bhelé bhú 'li opolofeta . <sup>2</sup> La bhú oekpi na soso inde-e, ani akpokpo 'ngú pi ní bhú 'li Ndili gba e inde ani a'o e ngámá pi 'ndji ndu 'he hana, di u abho nani ndu 'he hana bhú dabili bini ne e-o. <sup>3</sup> Ani aha bha 'Dyi e hana, kaka-a, kpala bhende au sangu gba Ndili-e au bhomu-o sangu gba Ebhe makpe. Ani abi ndu 'he hana ne 'li e na angu-o. Pita ani agbegbe okpala lie bhú siti 'ngú gba o-o, ani atsia atapa abhúla ngú nadu li bili na ngámá li pá 'kpa na kokpa gba Ebhe Angbamili.

*Ndili gba Ebhe-e ane oandjelu mane*

<sup>4</sup> Ndili gba Ebhe-e ane oandjelu mane, kaka Ebhe agisila 'ili li ani inde ane bhende gba uo-o mane.

<sup>5</sup> Padhá de, anga Ebhe pa nga pi andjelu bini de me:

«Ngamu-o, mu ne Ndili gba ma, naki inde-e, ma asuno 'ngú ango-o mbámbá.» †

Ani pa di li 'ngú gba andjelu bini de me:

«Ma adú ne 'dyi ani, ani tsia dú ne Ndili gba ma-o.» †

<sup>6</sup> Li nedhinga li Ebhe adu natima gina Ndili gba e lie pila doto-o, ani apa me:

«A ayo me ndu oandjelu gba ma-a hana dhøø ani.» †

<sup>7</sup> Ani atsia apa li 'ngú gba oandjelu-o me:

«Oandjelu gba ma-a ngamene kulu muma maka anvi, u ngateteke ma maka djua inde ngatsi matsi.» †

<sup>8</sup> La-a, ani atsia apa li 'ngú gba Ndili-e me:

«Mu ne Ebhe! Nau gba mu-o adu duduma ne duduma. Mu ngau pi 'ndji okpala gba mu-o ne ngbili 'ngú .

<sup>9</sup> Mu kunda ngbili 'ngú, mo oyala engú na sisiti.

Kaka-a, Ebhe gba mu-o, a'o mu kpi pi e,

ani abhu mu bhú ka obi mu,

† 1:5 1:5 Tsia bhú Ets. 2:7. † 1:5 1:5 Tsia bhú 2 Sam. 7:14. † 1:6 1:6 Tsia bhú Det. 32:43.

† 1:7 1:7 Tsia bhú Ets. 104:4. † 1:9 1:9 Tsia bhú Ets. 45:7-8.

- ani atsia atuko emu na djali pi 'ndji mu.†»
- 10 Ebhe atsia apa matá me:  
«Ngámá, mo obho doto nayie li lilita ngamu,  
kokpi ne nganda 'kpa mu.
- 11 Ndu 'ngú bhomu-o hana angíta mangita, la ngamu-o,  
mo otigala matigala.  
Ndundu hana akádha maka bongo .
- 12 Mo onúnu uo maka u anunu koti lie,  
u tsia yípa di maka li bongo ayiyipa lie.
- La ngamu-o, mu yiyipa de, kalanga gba mu-o ndjia la di-i de.†»
- 13 Ebhe pa nga belegu pi andjelu bini de me:  
«Ngamu-o, go du kuto li pa 'kpa ma na kokpa,  
ma abú obhulu yala gba mu-o dabili na sa 'dhu mu.†»
- 14 Oandjelu bha ne obua inde ngamene kulu pi Ebhe. Ani ngatima uo me u nu nateteke okpála inde ayo me u sia mukobho-o.

## 2

### *Mukobho inde u akpokpo 'ngú na e-e, a ko kukulu mukobho*

- 1 Kaka-a, a ayo me ní gbite liní kpekpeke li kukulu 'ngú inde ní adje e-o, amba ní ambú li kpadji-e de. 2 Engú inde li Ebhe akpokpo e bhú 'li oandjelu-o , asuno lie me a ko kukulu 'ngú. Okpála bhende i lila eli ango-o de-e, inde agamu líli-e, u asia ke 'ngú inde ati ne uo-o. 3 La nganí-e, ní ti da naneke ke 'ngú-o lele pi, i du me ní nde 'o 'to ní 'to kukulu mukobho-o de-e? Ngámá ngae makpe akpokpo 'ngú na mukobho ango-o kalanu ngae. Pipita-a, okpála bhende adje-e atsia apa pi ní me a ko kukulu 'ngú. 4 Abhomu-o, Ebhe atsia asuno me engú u akpokpo e-e, a ko kukulu 'ngú ne ongu na ngangamba, di ne

ndu okiaka 'ngú hana. Ebhe apana ongu ango-o bhú naha Bu Bhobua maka ani akunda lie-o.

### *Yesu akpi ngubula nakobho ndu okpála hana*

- 5 Ebhe ha angu pi oandjelu ngú nako pi doto inde ngago ya ngakpokpo 'ngú na e inde-e de. 6 Engú bini, bhú Bhuku gba Ebhe-e , kpála bini apa me:  
«Kpála-kuti ne da, ngubula me mu bhundja engú gba ani-e?  
Ndili gba kpála-kuti ne da me mo 'o 'to mu 'to ani-e?
- 7 Mo o'o nani ani sa oandjelu ngubula nedhinga bedi.  
Mo otsia ato ndata na asasaua ne mazima bhú 'ndji ani.

8 Mo otsia a'o ndu 'he hana sa ani.†» Ebhe a'o nani kpála-kuti ngámá pi 'ndji ndu 'he hana. A kunda napa me, ani 'o nani ehe bini de me aneke nadu sa ani-e de. La mbia inde-e, ní u de me kpála ne ngámá pi 'ndji ndu 'he hana-a de.† 9 Engú bini, ní ngau me Yesu adu nani sa oandjelu ngubula nedhinga bedi, amba ka bádha bhú 'bu gba Ebhe-e , ani ti da nakpi pi ndu okpála hana. Ní ngau mbia inde-e me, ani adyi ndata na asasaua ne mazima, anga ani asia nani likabhu bhú nakpi ka e. 10 Padhá de, anga Ebhe abho ndu 'he hana ngae, ndu 'he hana la di ne naani. Ani akunda me ongisi gba ni-e bhelé sia di sangu gba ni-o. I nde lie me Yesu Kilisito ngasuno kpadji na mukobho pi uo ngae, a ayo nani me ani du bedhe hana li kpadji nazu likabhu.

- 11 Yesu ngagbegbe okpála bhú siti 'ngú gba o-o ngae. La di-e, 'dyi ndu okpála hana inde ani agbegbe o bhú siti 'ngú-o bha bini. Kaka-a, numu li ani ade ngú na'i uo me ondaise ni. 12 Ani apa pi Ebhe me:  
«Ho Ebhe! Ma apa engú gba mu-o pi ondaise ma.

† 1:12 1:12 Tsia bhú Ets. 102:26, 28. † 1:13 1:13 Tsia bhú Ets. 110:1. † 2:8 2:8 Tsia bhú Ets. 8:5-7. † 2:8 2:8 Tsia bhú Ets. 8:5-7. † 2:12 2:12 Tsia bhú Ets. 22:23.

Ma atóko mụ kala ndụ okpála hana.†»

13 Aní apa di me:

«Ma a'ó nabhuka gba ma-a bhú Ebhe†.»

La di me:

«Tsia ya bhú dabilí bini ne ongisi inde lí Ebhe aha o mụma-o.†»

14 La di-e, ongisi gba Ebhe-e, a ko okpála-kuti inde bhú kute, a la di bhú uo ne ngute. Yesu ngae makpe akolo bhadi maka uo, aní asia di kute ne ngute maka uo. Abhomu-o, bhú nakpi ka aní-e, aní atsia aha angu djabulu inde lí angu na kuo nde ka e-o. 15 Yesu amene di mo-o ngubula nakobho okpála inde akolo maka obalise gba kuo bhú mukobho gba o libhomu. 16 Padhá de, anga a na paká me aní go nani nateteke oandjelu de. Engú bini, aní ago mangbo ngú nateteke piga gba Abalahama. 17 Kaka-a, a ayo nani me aní kolo bhú ndụ 'ngú hana maka ondaise e, amba aní dụ 'ngbé dimandø . A ayo nani me aní kolo 'ngbé dimandø inde abedhe ne ndjinga, inde di ngamene kulu gba Ebhe-e lí lelele, ngubula mambu na siti 'ngú gba okpála-o. 18 Mbía inde-e, aní tí da nateteke okpála inde ngali bhú nale-o, anga ngaani makpe-e, aní apụ bhú nale, aní atsia azụ di likabhu.

### 3

#### *Yesu ane Moidje mane*

1 Kaka-a, ondaise ma omakilisito, ngayi okpála inde lí Ebhe a'i o-o, yi 'o mabhundja gba yi-e pí Yesu. Padhá de, anga Ebhe atima aní ngubula me aní dụ bhulu titima di ne 'ngbé dimandø gba ní-o, ní atsia abhuka la bhadi ka aní. 2 Aní amene kulu kala Ebhe inde abhu aní ngú kulu ango-o ndjindji. Aní amene kulu ango-o lí lelele maka lí Moidje amene nani lie bhú Piga gba Ebhe-e libhomu-o.† 3 Kpála inde ayiki eti-e, sisia

nadhøgø nane eti inde aní ayiki e-o. A moko, a ayo me u dhøgø Yesu nane Moidje mane. 4 Ayiyiki eti hana ne kpála bini. La-a, kpála inde abho ndụ 'he hana-a ne Ebhe. 5 Moidje ngae makpe amene nani kulu lí lelele bhú Piga gba Ebhe-e libhomu. Aní adụ nani kpála na kulu inde adụ nakpokpo 'ngú lí Ebhe adụ nakunda napa e sidi-o. 6 Engú bini, Kilisito ne Ndili inde ngamene kulu lí lelele. Aní maka nepanda lí Ebhe a'o e lí eti gba e-o. Eti ango-o, a ko ní, i dụ me ní nde abhuka na paká paká, i dụ la di me ní nde ne gindaginda lí 'ngú ní nga'o 'to ní 'to e-o.

*Bili naguo inde lí Ebhe aleke e pí okpála inde ngamanga aní-o*

7 Kaka-a, a maka lí Bu Bhobua apa lie me:

«Í dụ me yi nde adje 'lí Ebhe naki inde-e,

8 yi agbíte bua yi de,

maka yi agbe nani kpéke 'ndji lie lí aní,

ekpí inde yi ale aní lie abhú mili bíli-o.

9 Bhú 'gu oo, onguo ogbi yi ale nani ma ngubula nambila 'ndjá bua gba ma-o,

abana u au ndụ 'ngú ma amene e, ngubula kalanga ndjikpa badha lie hana-o.

10 Kaka-a, bua ma atsia ake ne uo.

Abhomu-o, ma atsia apa me:

«Uo ngadji 'ngbu o lí ma ndụ nedhinga hana bhú mabhundja gba o.

U mbila engú inde ma akunda e pí uo-o belegu de bini.»

11 Lí bua ma ake lie, ma atsia atu silika me:

«U lí lí bíli ma aleke e ngú naguo pí uo-o belegu de bini!†»

12 Ondaise ma, yi lila liyi ngubula me kpála bini bhú ká yi adú ne siti bua de. Aní adú di ne bua na nabhuka de-e de, inde nga'e okpála lí kpadji gba Ebhe na mukobho-o.

† 2:13 2:13 Tsia bhú Isa. 8:17. † 2:13 2:13 Tsia bhú Isa. 8:18. † 3:2 3:2 Tsia bhú Nom. 12:7.

† 3:11 3:7-11 Tsia bhú Ets. 95:7-11.

13 Aní ngá'í yí ndu 'kpí hana. Ka 'ngú angó-o, lí ekpí na naki inde lí Bhuku ngapa 'ngú e nde nga bha ngabhue lie, yí teteke liyi sùnda yí nedhinga yí ngadje e'í angó-o lie-o. † du mo-o, sítí 'ngú píte yí de, kpála bini bhú ka yí yála la dí namanga Ebhe de. 14 Padhá de, anga ní ne okpála gba Kilisito, í du me ní nde alíla nabhuka inde ní asia nani e lí lilita kpekepeke akoló alí soso-o.

15 Bhuku gba Ebhe-e apa me: «† du me yí nde adje 'lí Ebhe naki inde-e, yí agbíte bua yí de, maka yí agbe nani kpéke 'ndjì lie lí aní-o.†»

16 La-a, a kó okpála bhedho inde adje 'lí Ebhe, atsia agbe nani kpéke 'ndjì lí aní-e? A kó ndu okpála hana inde lí Moidje agbe o bhú Edjipeto-o. 17 La-a, Ebhe ake 'ngú lie pí oda ngubula kalanga ndjikpa badha-a? Aní ake 'ngú lie pí okpála inde amene sítí 'ngú, u atsia amu abhú 'gu. 18 Ebhe atú nani sílika me: «U lí lí bìli ma aleke e ngú naguo pí uo-o belegu de bini.†» Aní atú nani pí oda? Aní atú pí okpála inde agbe nani kpéke 'ndjì lí aní-o. 19 Ní au me, u lí nani lí bìli naguo bhomu-o de, anga u bhuka nani-í de.

#### 4

1 Ebhe apa nani me ní alí lí bìli naguo inde ní aleke e malí. Kaka-a, 'e-e! Yí lila liyi, amba kpála bini bhú ka yí anéke nali lí bìli angó-o de. 2 Ní asia eli gba Ebhe-e bhadi maka okpála bhende adu nani abhú 'gu-o. La-a, u sia eli angó-o ne tata de. Padhá de, anga lí u adje eli angó-o lie, u sia ne nabhuka de. 3 Nganí okpála bhende abhuka-a, ní alí lí bìli naguo bhomu-o malí, lí Ebhe apa 'ngú e me:

«Lí bua ma ake lie,  
ma atsia atú sílika me:  
<U lí lí bìli inde ma aleke e

pí uo ngú naguo belegu de bini!†»

Abhomu-o, kulu gba ní-e atsia andjia nayie lí aní abho doto lie-o. 4 Padhá de, anga bhú Bhuku gba Ebhe-e , u apa píndjì ekpí na mananika-a me: «Ebhe aguo bhú 'kpí na mananika, lí aní amene ndu kulu gba e lie hana-o.†» 5 Ebhe atsia apa matá dí me: «U lí lí bìli inde ma aleke e pí uo ngú naguo belegu de bini.†»

6 Okpála bhende asia nani Bádha Ngali gba Ebhe-e kalanu-o, lí nani lí bìli naguo angó-o de. Padhá de, anga u ayala nani namene líli gba Ebhe. Abhomu-o, Ebhe atsia ade kpadjì pí okpála kóko ngú nali lí bìli angó-o. 7 Kaka-a, Ebhe a'o matá ekpí kóko, ekpí inde u a'í e me: «Naki inde.» Aní apa nani engú na ekpí angó-o sídì naali bhú 'lí Davidi, bhú lukuluku inde u apa 'ngú lí e kalanu-o me:

«† du me yí nde adje 'lí Ebhe naki inde-e,  
yí agbíte bua yí de.†»

8 Padhá de, anga í dú me Djodjue dhúku nani ne okpála lí bìli naguo angó-o, Ebhe de pa matá 'ngú na 'kpí kóko naguo de. 9 Kaka-a, naguo maka ekpí naguo na mananika-a, atigala pí okpála gba Ebhe-o. 10 Padhá de, anga kpála bhende alí lí bìli naguo inde lí Ebhe aleke e, ngaguo lí okulu gba e maka lí Ebhe aguo lie lí obhe gba e-o. 11 Kaka-a, ní mene ne kpéke me ní lí lí bìli naguo angó-o. Ní mene me kpála bini bhú ká ní atí ka kpéke 'ndjì de maka onguo ogbí ní inde adu nani ne kpéke 'ndjì-e, lí lie lí bìli angó-o de-o.

12 Padhá de, anga eli gba Ebhe-e bhú mukobho, a la dí ne angu. A dhédhé ane mbotia inde u adyí 'te e ne pasu bhisi hana. A adudu kpála, í tsia kólo makoló lí bhobua aní. A ngadu kpála akólo makoló

† 3:15 3:15 Tsia bhú Ets. 95:7-8. † 3:18 3:18 Tsia bhú Nom. 14:1-35; dí ne bhú Ets. 95:11. † 4:3 4:3 Tsia bhú Ets. 95:11. † 4:4 4:4 Tsia bhú Dje. 2:2. † 4:5 4:5 Tsia bhú Ets. 95:11. † 4:7 4:7 Tsia bhú Ets. 95:7-8.

li bili li biki di ne mbilika akø lio lie-o. Eli ango-o ngasuno engú inde awo lie li bua kpála ne bhende ani ngabhundja e-o. <sup>13</sup> Ehe bini nabho mabho inde awo lie kala Ebhe-e ade. Ndu 'he hana inde ani abho e ngau lie mbámhá kala ani. La di-e, ní akpókpo ndu 'ngú gba ní-e hana kala ani.

### *Yesu ne 'ngbé dimandø gba Ebhe*

<sup>14</sup> Kaka-a, ní lu kpekpeke bhú nabhuka inde ní ngakpokpo 'ngú na e-o. Padhá de, anga a ka ní ne 'ngbé dimandø na angu inde anu akolo makolo abhúhá kala Ebhe. A ko Yesu, Ndili gba Ebhe. <sup>15</sup> 'Ngbé dimandø gba ní-e ne angu ngú nadjé likabhu bhú dabili bini ne ní bhú bhuku gba ní-o. Ani ali bhú nale ne ndu kpadji hana maka ní, engú bini, ngaani-e, ani mene siti 'ngú belegu de bini. <sup>16</sup> Kaka-a, ní dyudyo liní de kiti na ngámá gba Ebhe-o, li bili na bádha bhú 'bu gba ani-o. Oo, ní asía mambu, ani tsia súno bádha bhú 'bu gba e pi ní ngubula nateteke ní bhú nedhinga ayo lie-o.

## 5

<sup>1</sup> U bhubhu 'ngbé dimandø gba Ebhe-e bhú ká okpála ngubula me ani mene kulu gba Ebhe-e bhú ka uo. Ani tsutsulu enu maka makiso pi Ebhe ngubula siti 'ngú gba uo-o. <sup>2</sup> 'Ngbé dimandø gba Ebhe-e ngae makpe di bhubhuku. Kaka-a, ani ti da nadjé ndjinga okpála inde li imbilangu nde bhú 'ndji o ade, inde di ambu li kpadji-o. <sup>3</sup> Li 'ngbé dimandø gba Ebhe-e ngae makpe nde lie bhubhuku-o, ani tsutsulu enu na makiso pi Ebhe bha bini ngubula siti 'ngú gba okpála de. Engú bini, ani tsutsulu di ngubula siti 'ngú gba e makpe. <sup>4</sup> Kpála bini ti da nato ndata na 'ngbé dimandø gba Ebhe-e bhú 'ndji e ngae makpe de. Kpála kokolo bha 'ngbé dimandø gba Ebhe-e me

Ebhe nde a'i ani ngae, maka ani a'i nani Alona lie-o.

<sup>5</sup> A bhadi pi Kilisito moko. Ani to nani ndata na 'ngbé dimandø gba Ebhe bhú 'ndji e ngae makpe de. Engú bini, Ebhe aha nani pi ani ngae, Ebhe atsia apa pi ani me:

«Ngamu-o, mu ne Ndili gba ma, nayie pi naki inde-e, ma ne 'Dyi mu.†»

<sup>6</sup> Ani atsia apa di li bili koko me:

«Mu ne dimandø gba ma duduma ne duduma, maka Malekisedeke.†»

<sup>7</sup> Nedhinga li Yesu adu lie píla doto-o, ani adu nayo Ebhe di ne nakikiliki lie pi ani ne nasusula kpekpeke la di ne ngala bhú djila e. Ani ayo Ebhe inde i ti da nani nakobho ani bhú kuo-o. Abhomu-o, Ebhe atsia adje ani, anga ani a'o nani lie ne kuto kala Ebhe. <sup>8</sup> Abana ani adu nani lie Ndili gba Ebhe-e, ani ambila lie ne namanga Ebhe bhú likabhu inde ani azu e-o. <sup>9</sup> Pita ani andjia kulu gba e lie hana ndjindji kala Ebhe-e, ani atsia akolo kpongu na mukobho na duduma pi ndu okpála hana inde ngamanga ani-o. <sup>10</sup> A moko, Ebhe a'o ani 'ngbé dimandø gba e maka Malekisedeke.

### *A ayo me yi bhele bhú nabhuka gba yi-o*

<sup>11</sup> Ya ne engú bhelé napapa pindji 'ngú bhomu-o. Engú bini, da nam-bamba tata-a kpekpeke, anga yi ti da nakpokpo kúkú má gala de. <sup>12</sup> Yi adu nako ne nedhinga bhelé ngubula me yi kolo omusuno. Engú bini, yi matá ne gumu me u suno ongú na kalanu na eli gba Ebhe-e pi yi ne toto. Yi nga bha ne gumu nandji miliki bhú da nazu ezu na kpekpeke. <sup>13</sup> Padhá de, anga kpála bhende nga bha ngandji miliki-e ne ndili. Ani mbila nga nag-bogbo bhusu bádha 'ngú ne siti 'ngú de. <sup>14</sup> La-a, ezu bhe na kpekpeke pi obhelesi okpála. A ko okpála inde ambila lio ne nagbogbo bhusu

† 5:5 5:5 Tsia bhú Ets. 2:7. † 5:6 5:6 Tsia bhú Ets. 110:4.



siti 'ngú di ne bádha 'ngú ka okulu inde u amene e-o.

## 6

<sup>1</sup> Kaka-a, ní kodho 'kpí li nasuno bhende ati ne obhelesi okpála-o. Ní dji 'ngbú ní li nasuno na lilita gba omakilisito. Ní a'ó matá 'dhú nasuno inde-e ne toto de: nadji bua o di ne na'o okulu inde ngato kpála bhú kuo, <sup>2</sup> nasuno pindji obatisimo di ne na'o 'kpa o pí 'ndji kpála, nakpokpo 'ngú pindji nazuku ka okpála inde amu, di ne nakodho 'ngú na duduuma. <sup>3</sup> A bhomu-o ongú inde a ayo me ní 'o e-o, i dú me Ebhe nde akunda-o.

<sup>4-6</sup> Padhá de, anga engú gba okpála bhende ngagie lio bhú siti 'ngú gba o-o, lele pí? U asia nani zi 'ke gba Ebhe-e asia. U ale bádha 'ngú inde li Ebhe ngaha e pí omaha e pí 'mi o. U atsia asia di Bu Bhobua bhú dabili bini ne okpála koko. U ambila ndjindji me eli gba Ebhe-e babadha. U ambila angu na doto inde ngago-o. Pipita-a, u atsia a'o ká nabhuka gba o-o! U ti da matá namene de me u dji bhobua o bhutsibhutsi na bhisi-e de. Padhá de, anga u ngagie matá Ndili gba Ebhe-e li kulusi ne toto. U la di ngaka kpadji pí okpála me u dú nasobho ani.

<sup>7</sup> Li doto dú nandji ngubha inde ngadhi pépé ndu nedhinga hana-a, li i dú la di me a nde ngagbe ezú pí okpála inde alu edyi angoo ndjindji-e, li Ebhe túko bisagu pí doto angoo. <sup>8</sup> La-a, i dú me doto angoo nde azu ulu na eti ne bhe na sisiti-e, tata dú tété de. Doto angoo masikpe me Ebhe tú pedje tété. Pipita-a, u tsia bú bhú djua.

<sup>9</sup> Abana ya pa mo-o, ondaise ma na mukunda, ya ambila ndjindji me yi li bádha kpadji, kpadji na mukobho. <sup>10</sup> Ebhe ne kpála na ngbingbili. Ani 'fli 'to e li kulu gba yi-e de. Ani 'fli la di 'to e li mukunda yi asuno e pí ani li kulu inde yi

amene e, inde la di yi matá ngamene e pí omakilisito koko de. <sup>11</sup> Gumú gba ya-a me ndu yi hana bini ne bini, yi suno ngua mukunda bhomu-o nakolo makolo ali soso, ngubula me ndu 'ngú hana inde yi nde ne 'to yi 'to e-e, tsia mene lie hana. <sup>12</sup> Yi andála de. Engú bini, yi kpata nganda okpála bhende ngabhuka ne kekele, inde la di ngasia ehe inde li Ebhe apa me ni ahá e-o.

*Ní 'o 'to ní 'to ehe inde li Ebhe apa me ni ahá e pí ní-o*

<sup>13</sup> Li Ebhe apa nani lie pí Abalahama me ni ahá ehe pí ani-e, ani apa 'ngú angoo ne natu silika ne 'li e makpe. Ani amene mo-o, anga kpála koko inde ngbéngbé ane ani ade. <sup>14</sup> Ani apa nani me:

«Ma atu silika me ma atúko bisagu pí m̄,

ma tsia méne me odi m̄ kolo bhelé.†»

<sup>15</sup> Abalahama adjeke ne 'ndjá bua, ani atsia asia ehe inde li Ebhe apa nani me ni ahá e pí ani-o. <sup>16</sup> Li okpála dú natu silika-a, u tutu ne 'li okpála inde ane uo mane. La di-e, natu silika ngandjia kpekebhe sunda okpála. <sup>17</sup> Ebhe asuno bhomu mbámhá pí okpála inde ayo me u sia ehe inde ani apa me ni ahá e-e, a anéke belegu de bini. Kaka-a, ani atsia atu silika pí 'ngú angoo.

<sup>18</sup> A ne ongú bhisi inde u ti da nadji e de, a ko natu silika di ne ehe inde li Ebhe apa me ni ahá e-o. Bhú ongú bhisi angoo, Ebhe ti da napa eu belegu de bini. Ngani okpála inde awo liní bhú Ebhe-e, ní alu kpekpeke, ní a'o la di 'to ní na paká paká 'to ehe inde ani apa me ni ahá e pí ní-o. <sup>19</sup> 'To ní inde ní nga'o e angoo ngamene me ní lu kpekpeke maka kalase inde ahoholo zabu-o. 'To ní angoo kukulu, a la di kpekpeke. A ngamene me ní gulu 'ngbé pála bongo inde ngabuku tina 'ti na bubu na 'ngbé 'ti Ebhe

† 6:14 6:14 Tsia bhú Dje. 22:16-17.

gba omaYuda inde abhúlá-o, amba ní kolo makolo bhú tina 'ti ango-o. <sup>20</sup> Oo, Yesu ali nani pi ní kalanu, la di ngubula ní. Aní akolo 'ngbé dimandø gba Ebhe-e pi ní duduama ne duduama maka Malekisedeke.

## 7

### *Malekisedeke adu nani ne dimandø gba Ebhe*

<sup>1</sup> Malekisedeke ango-o adu nani 'ngbé ngámá na Saleme, aní atsia adu di nani dimandø gba Ebhe Apí 'Kpí. Li Abalahama adu agie lie lie bhú egú inde aní agboko ongbengbe ongámási bhú e lie, Malekisedeke anu nakø lio ne aní, aní atsia atuko bisagu pí aní. <sup>2</sup> Abalahama atsia aha bini bhú ká ndjikpa bhú ndu 'he hana inde aní agbulu e-e pi aní. Ta 'ili na Malekisedeke apa ngaiza kalanu me: «'Ngbé ngámá na ngbili 'ngú.» La di-e, aní adu nani ngámá na Saleme, inde akunda napa me: «'Ngbé ngámá na guo 'ngú.» <sup>3</sup> U mbila 'dyi aní ne 'hi aní de. U mbila la di onguo ogbi aní de. U kpo belegu engú bini pindji ekpí u azu aní lie ne ekpí aní akpi lie de. Aní maka Ndili gba Ebhe, kulu gba aní na dimandø gba Ebhe-e duduama ne duduama.

<sup>4</sup> Yi tsia nga maka li Malekisedeke nde lie ngbéngbé-o! Abalahama ogbi omafalaale aha nani bini bhú ká ndjikpa na ndu 'he hana inde aní asia nani e bhú egú-o pi aní. <sup>5</sup> La-a, okpála na piga gba Levi-e, inde ne odimandø gba Ebhe-e, ne angu ngú nayo bini bhú ká ndjikpa na ndu 'he hana inde ka ongisi na Isalaele, maka li líli apa lie-o. A kunda napa me u ngayoyo li ondaise o makpe, inde la di ne odi Abalahama. <sup>6</sup> Malekisedeke du nani bhú piga gba Levi de. Engú bini, aní asia bini bhú ká ndjikpa sakpa Abalahama bhú ndu 'he hana inde aní agbulu e bhú 'gú-o. La di-e, Malekisedeke atuko bisagu pí Abalahama, kpála inde li Ebhe apa nani me ni ahá oehe pi e-o.

<sup>7</sup> Kpekebhe belegu ade bini me kpála bhende ngatuko bisagu pi kpála-a ngbéngbé ane kpála bhende ngasisia-o. <sup>8</sup> Okpála inde na piga gba Levi-e, inde ngasia bini bhú ká ndjikpa-a, a ko okpála-kuti inde amú mamu. Engú bini, pi Malekisedeke inde u aha bini bhú ká ndjikpa pi e ne kpála inde i kpikpi de, maka li Bhuku gba Ebhe-e apa lie-o. <sup>9</sup> Ngú nabu tata-a, u ti da napa me, li Abalahama aha nani bini bhú ká ndjikpa na ohe gba e lie, Levi inde li odi e ngasia bini bhú ká ndjikpa na ndu 'he hana-a, atsia aha di. <sup>10</sup> Padhá de, anga Levi inde u zu nga nani e de-e, adu bhú 'bu ogbi e Abalahama, nedhinga inde u akø lio lie ne Malekisedeke-o. Bhobhomu-o asuno me Malekisedeke ane Levi mane.

<sup>11</sup> Ebhe aha nani líli pi omafalaale me, u du nabhu odimandø gba ni-e bhú piga gba Levi. U adu odimandø gba Ebhe maka Alona. Engú bini, kulu na dimandø gba Ebhe bhú piga gba Levi-e ti nani da nabedhe 'bhø kulu gba Ebhe-e de. Padhá de, anga li kulu gba uo-o tí nani da nabedhe 'bhø kulu gba Ebhe-e uu-o, u de du nani ne gumu dimandø koko maka Malekisedeke de. <sup>12</sup> La di-e, li u yipa dimandø gba Ebhe-e, a ayo bhadi me líli-e yipa. <sup>13</sup> Padhá de, anga Ngámá gba ní inde u ngakpokpo ongu inde-e pindji e-e, naae bhú piga koko kpi. Bhú piga ango-o, kpála bini mene nga belegu kulu na dimandø gba Ebhe li bili u atsutsulu 'he lie pi Ebhe-e de. <sup>14</sup> Ní mbila ndjindji me Ngámá gba ní-e adu nani bhú piga gba Yuda. Piga ango-o, Moidje gama 'ngú tété de, nedhinga aní agama 'ngú lie pindji odimandø gba Ebhe-o.

### *Yesu ne dimandø gba Ebhe maka Malekisedeke*

<sup>15</sup> Engú inde ngasuno nayipa ka dimandø la matá mbámá-a ngae inde: dimandø koko akoto, aní maka Malekisedeke. <sup>16</sup> Aní kolo dimandø

gba Ebhe li lele líli gba okpála-kuti de. Aní akolo mo-o bhú angu na mukobho inde i ndjía de. <sup>17</sup> A maka li Bhuku gba Ebhe-e apa li me:

«Mú ne dimandø gba ma dũdũma ne dũdũma, maka Malekisedeke.†»

<sup>18</sup> Kaka-a, u atsia a'e líli na kalanũ-o, anga líli ang-o adũ bhũbhũkũ, tata tsia dũ la di tété de. <sup>19</sup> Padhá de, anga líli gba Moidje ti nani da namene de me okpála kolo ngbingbili kala Ebhe-e de. Engú bini, ní asia engú bini inde ane ne bádha naali, inde ní nga'o 'to ní 'to e-o. Padhá de, anga engú ang-o ngamene me ní dyudyo liní de Ebhe masikpe.

<sup>20</sup> La di-e, Ebhe atũ nani silika. Engú bini, okpála koko akolo nani odimandø me u nde tũ silika de.

<sup>21</sup> La pi Yesu-o, Ebhe atũ nani silika nedhinga li aní apa lie pi aní me:

«Ngámá atũ silika-a, aní djí 'li e de: <Mú ne dimandø gba ma Ebhe Ngámá, dũdũma ne dũdũma.†>»

<sup>22</sup> Kaka-a, Yesu di ne kpála inde ngamene me ní dũ bhú gandja na babadha naali.

<sup>23</sup> Engú koko inde kpi-e ngae inde: odimandø koko adũ nani bhelé naali, anga kuo adũ nani kpadji pi uo me u adú odimandø dũdũma de. <sup>24</sup> Engú bini, Yesu bhú mukobho dũdũma ne dũdũma, kulu gba aní na dimandø-o ti da nandjia de. <sup>25</sup> Kaka-a, aní ti da nakobho okpála inde ngadyudyo lio de Ebhe li kpadji gba aní-e ngubula dũdũma ne dũdũma. Padhá de, anga aní ndũ 'kpí hana bhú mukobho ngú nayo Ebhe pi uo.

<sup>26</sup> Kaka-a, Yesu ne 'ngbé dimandø inde atí ne ní-o. Aní bubu, pulũ 'ngú bhú aní ade, siti 'ngú la di bhú aní ade. Aní agbo bhũsũ e ne obhũlũ mũgwe. Ebhe atsia a'e'e aní tsutsu abhũlá. <sup>27</sup> Aní maka ongbengbe odimandø koko ade. Aní ne gũmũ natsulu 'he pi Ebhe ndũ

'kpí hana ngaiza ngubula siti 'ngú gba e makpe, pipita ngubula bhende gba okpála koko ade. Aní amene nani bhũtsibhũtsi bini má kpíkili, li aní aha lie lie ngae makpe-o. <sup>28</sup> Líli gba Moidje adũ nani na'o maka ongbengbe odimandø li okpála-kuti inde i dũ ngbingbili hana ade-o. Engú bini silika li Ebhe atũ e-e, líli-e atsia a'o maka 'ngbé dimandø Ndili inde adũ ndjindji hana libhomu maka li Ebhe akũnda lie, ngubula dũdũma ne dũdũma.

## 8

*Yesu ne 'ngbé dimandø gba ní-e ngae*

<sup>1</sup> Engú na ngbéngbé bhú ká ongú inde ní ngapa e ngae inde: a bhomũ-o ngua 'ngbé dimandø gba Ebhe inde ka ní-o. Aní adũ abhũlá li pápá na kokpa de kiti na ngámá gba Ebhe na angu na ngbéngbé-o.

<sup>2</sup> Aní ngamene kulu na 'ngbé dimandø gba e bhú tina 'ti na bubu, a akũnda napa me bhú 'ti ngbangbali na kukulũ. Ayiki ne Ngámá, ayiki ne kpála-kuti de.

<sup>3</sup> U bhũbhũ ongbengbe odimandø gba Ebhe-e hana ngubula natsulu enũ maka makiso pi Ebhe. Kaka-a, a ayo me adũ di ka 'ngbé dimandø gba ní-e ne ehe natsutsulu maka makiso pi Ebhe. <sup>4</sup> I dú nani me aní dú píla doto-o, aní de ne dimandø gba Ebhe-e ade. Padhá de, anga a ne odimandø gba Ebhe koko inde ngatsulu ehe maka makiso pi Ebhe maka li líli gba omaYuda apa lie-o. <sup>5</sup> Kulu inde li odimandø ang-o ngamene e-e, a ko lele kulu ongú inde ngamene lie abhũlá-o. Engú ang-o viti bini ne ehe inde li Ebhe apana nani e pi Moidje-o. Li Moidje adũ akũnda nayiki 'ti ngbangbali lie, Ebhe apa pi aní me: «Tsia ndjindji ngubula me mũ mene ndũ 'ngú hana li lele bhende ma asuno e pi mũ apí 'ta-o.†»

<sup>6</sup> Engú bini, mbia inde-e, Yesu asia kulu inde kpi, ane bhende gba odimandø koko gba Ebhe-e mane. A ko luda sũnda ní ne Ebhe bhú gandja na babadha naali. Gandja ango-o ala di pí oehe na babadha naali inde ní nga'o 'to ní 'to e-o.

*Ebhe apa me ni akódho gandja na mbia ne okpála gba ni*

<sup>7</sup> † dú nani me gandja na kalanu-o mene me okpála kolo ngbingbili kala Ebhe-e, u de yipa ne koko de. <sup>8</sup> Engú bini, li Ebhe au lie me gandja na kalanu-o du ndjindji hana de-e, ani atsia ambembe bhú 'ndji okpála gba e me:

«Ngámá apa me: oekpí akólo makolo,  
li 'kpí ma akódho gandja na mbia lie  
bhú dabili bini ne piga gba Isalaele di ne bhende gba Yuda-o.

<sup>9</sup> A adú maka bhende ma akodho nani e ne onguo ogbi uo-o de, li 'kpí inde ma agbe uo lie bhú doto na Edjipito-o.

Bhú gandja ya akodho e ne uo-o, u kpata líli ango-o de.

Kaka-a, ma adji 'ngbu ma li uo, Ngámá apa mo-o.

<sup>10</sup> Ngámá atsia apa matá me:

a bhomu-o gandja inde ma akódho e ne ongisi na Isalaele pita oekpí bhomu-o.

Ma ató olíli gba ma-a bhú imbilangu gba uo-o.

Ma ayé olíli ango-o li bua uo.

Ma adú ne Ebhe gba uo, u tsia dú okpála gba ma.

<sup>11</sup> Kpála bini bhú ká uo dú matá ne gumu nasuno 'ngú pi ndili na kuti gba e,

di ne pi ndai e de me ani mbila ma-a de-e de.

Padhá de, anga ndu okpála hana ambila ma,

nayie li okpála na padhá nakolo makolo li okpála na kukula.

<sup>12</sup> Ma ambú li ndanda 'ngú gba uo-o. Ma abhúndja matá osisiti 'ngú gba uo-o de.†»

<sup>13</sup> Li nedhinga li Ebhe ngagama 'ngú lie pindji gandja na mbia-a, ani a'o bhe na kalanu-o me akolo didili. A na paká me, li ehe de akolo didili akolo-o, i du la di me a nde akadh-a, ehe ango-o masikpe de nangita.

## 9

*Olíli na gandja na kalanu*

<sup>1</sup> A adu nani bhú gandja na kalanu-o ne olíli ngú nayo Ebhe. La di-e, bili nayo Ebhe atsia adu di píla doto. <sup>2</sup> U ayiki nani 'ti ngbangbali bini ne tina 'ti bhúbhú bhisi. Bhú titina na kalanu-o, u a'i e me dabili na bubu-o, u a'o misa u a'o'o tala pí e bhúbhú. U atsia a'o di misa ne mapa inde u aha e pi Ebhe-e bhúbhú. <sup>3</sup> Kele 'ngbé pála bongo-o, adu tina 'ti bhe u a'i e me bili na bubu naali-o.

<sup>4</sup> Li bili ango-o, u a'o nani misa na olo inde u adu atsulu mungotsi pí e, di ne sanduku na gandja\* inde u abuku nani kate e ne olo libhomu-o. Bhú sanduku ango-o, adu bhúbhú ne lusa inde u amene e li olo, mana atsia adu bhúbhú. Bhú sanduku ango-o, adu di bhúbhú ne ndula gba Alona inde agbe nani felele, a la di-e opapala teme inde li u aye nani líli na gandja-a pí e-o. <sup>5</sup> Pí sanduku ango-o, u a'o nani okulu kelube. Okelube ango-o adu asuno me Ebhe li bili bhomu-o. Kulu zini na mbudha uo adu abuku bili inde li 'ngbé dimandø gba Ebhe-e aha ngute maka makiso pi Ebhe lie ngú nambu li siti 'ngú gba okpála-o. La mbia inde-e, a ko nedhinga nagama 'ngú li 'ngú ango-o bini bini de.

<sup>6</sup> U aleke nani bili bhú 'ti ngbangbali ango-o me, bhú tina 'ti na kalanu, odimandø gba Ebhe-e du nali ndu 'kpí hana ngú namene kulu gba o-o. <sup>7</sup> La-a, bhú titina bhe na bhisi-e, a adu bha bini nali ne 'ngbé

† 8:12 8:8-12 Tsia bhú Djlm. 31:31-34. \* 9:4 9:4 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

dimandø gba Ebhe-e ngae kpi e kpi. Sunda kalanga bini-e, ani adu nali bhatsibhatsi bini. A ayo di nani me ani li bhú dabili bini ne ngute enu, inde ani adu aha e pi Ebhe ngubula siti 'ngú gba e, di ngubula siti 'ngú li okpála amene e me u nde mbila de-o. <sup>8</sup> Bu Bhobua asuno me kpadji na tina 'ti bhe u a'i e me bili na bubu naali bhulu nga nani lie de, i du me 'ti ngbangbali na kalanu-o nde ngabha u-o.

<sup>9</sup> 'Ti ngbangbali ango-o ne kulu ongu inde ngamene lie bhú onedhinga inde-o. Bhobhomu-o asuno me oehe natsulu matsulu maka makiso pi Ebhe-e ti da navulu bhobua kpála inde ngamemene-e de. <sup>10</sup> Omakiso ango-o, a ko bha bini ongu nazu 'he, ne nandji 'he di ne ngangá mayo navulu lio ngu nakolo bubu kala Ebhe. Ndu olili bhomu-o hana nani ne bhe gba okpála-kuti, atsia adu la bhadi ngubula nedhinga bedi nakolo li nedhinga li Ebhe ayipa ndu 'ngú hana lie ndjindji-o.

*Kilisito agbegbe ní bhú siti 'ngú gba ní-e ne ngute e makpe*

<sup>11</sup> Engú bini, Kilisito ago maka 'ngbé dimandø gba Ebhe ngubula naha obabadha 'ngú inde ngago-o. 'Ti ngbangbali inde ani amene kulu gba e bhú e ngebéngbé naali, a la di babadha naali ane bhende na kalanu-o mane. A yiki 'ti ngbangbali ango-o ne okpála-kuti de, a akunda napa me, a ko 'ti ngbangbali na doto inde-e de. <sup>12</sup> Kilisito ali nani bhatsibhatsi bini má kpikili li bili na bubu naali ango-o. Ani ha nani ngute meme de, ani ha la di ngute ndili bagala de. Engú bini, ani aha nani ngute e makpe. Kaka-a, ani atsia agbegbe ní bhú siti 'ngú gba ní-e duduma ne duduma.

<sup>13</sup> Ngute meme, i du di-e ngute bhoko bagala di ne mbi bagala inde u atsutsulu e, u tsia bála e pí okpála

bhende bubu kala Ebhe ade-e ti da namene me u kolo bubu kala ani li pápá na kute. <sup>14</sup> I nde lie mo-o, ngute Kilisito ane la matá ne angu! Ani aha lie pi Ebhe kabula Bu Bhobua na duduma maka makiso inde ndjindji libhomu. Ngute ani avulu bua nakpokpo kú 'ngú gba ní-e bhú ndu 'ngú hana inde ngato kpála bhú kuo-o, ngubula me ní mene kulu pi Ebhe inde bhú mukobho-o.

*Kilisito ne ludu sunda ní ne Ebhe bhú gandja na mbia*

<sup>15</sup> Kaka-a, Kilisito ne ludu sunda ní ne Ebhe bhú gandja na mbia, amba okpála inde li Ebhe a'i o-o, ti da nasia babadha 'ngú na duduma inde li Ebhe asuno nani e pi okpála gba e-o. U ti da nasisia anga Kilisito akpi ngubula nagbegbe uo bhú siti 'ngú inde u amene e-o. U amene nani siti 'ngú ango-o li nedhinga u adu lie bhú gandja na kalanu-o.

<sup>16</sup> Ní mbila ndjindji me li kpála ziba me u gbogbo bhusu ohe gba ni-e pita nakpi ka ni-e, kala me u gbogbo bhusu ohe ango-o, a ayo ngaiza me u u mbámbá me kpála ango-o akpi. <sup>17</sup> Padhá de, anga i du me kpála inde aziba nagbogbo bhusu ohe gba e nde nga bha u-o, tata li nagbogbo bhusu ohe inde ani aziba me u gbogbo bhusu e ade. Tata li nagbogbo bhusu ohe bha bini me kpála ango-o nde akpi. <sup>18</sup> Kaka-a, gandja na kalanu-o asia bha bini angu li ngute atuko lie-o.

<sup>19</sup> Moidje atanga ngaiza nani olili kala ndu okpála hana maka u aye lie-o. Pipita-a, ani atsia aha ngute ndili bagala di ne ngute meme bhú dabili bini ne engu, ani ato ndjiga inde u agbite e ne mbe bongo bhú ngute ne engu-o. A adu ndjiga ndula inde u a'i e me idjope.† Pipita-a, ani abobolo pí bhuku na líli-o, di ne pí ndu okpála hana. <sup>20</sup> Ani atsia apa me: «A inde-e ngute na

† 9:19 9:19 Idjope: A ko saka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope.

† 9:20 9:20 Tsia bhú Eki. 24:8.

gandja li Ebhe apa me yi manga e-o.†» 21 Abhomu-o, Moidje abolo di ngute-e pí 'ti ngbangbali di ne pí ndu ohe hana inde u adhødhøgø Ebhe ne e-o. 22 Maka li líli apa lie, masikpe de ndu 'he hana kokolo bubu kala Ebhe bha ka ngute. La di-e, Ebhe mbumbu bha li siti 'ngú me ngute nde atuko bha ngae.

*Kilisito aha lie ngae makpe maka makiso ngú na'e siti 'ngú gba ní-o*

23 Ma apa pí yi me ndu 'ngú hana inde na kukulú li Moidje asuno nani e pí okpála-a, a ko okulu okukulú 'ngú na abhúlá. Kaka-a, a ayo la bhadi me ongú ango-o kolo bubu kala Ebhe bhú ngute onu. Engú bini, ongú na kukulú na abhúlá makpe ne gumu enu natsulu matsulu inde ane ne bádha. 24 Padhá de, anga Kilisito li nani bhú 'ti ngbangbali inde li okpála amene e ne kpa o-o de. 'Ti ngbangbali ango-o ne kulu 'ti ngbangbali na kukulú-o. Ani ali abhúlá makpe, li bili inde ani ngagama 'ngú lie mbia inde-e kala Ebhe ngubula ní-o.

25 'Ngbé dimandø gba Ebhe gba omaYuda líli nani li bili na bubu naali-e ndu kalanga hana bhú dabili bini ne ngute 'nu. Engú bini, Kilisito li nani ngú naha lie ngae makpe bhutsibhutsi bhelé de. 26 † dú nani mo-o, ani de azu likabhu bhutsibhutsi, nayie maka li Ebhe abho nani doto lie-o. Engú bini, ani akoto bhutsibhutsi bini má kpikili li nedhinga na sokpí ngú na'e siti 'ngú gba ní li kpadji naha lie ngae makpe maka makiso pí Ebhe. 27 Ndu okpála-kuti hana kpikpi bha bhutsibhutsi bini. Pipita-a, li Ebhe tsia kódho 'ngú gba uo-o. 28 A bhadi moko, Kilisito aha lie maka makiso bhutsibhutsi bini, ngubula na'e siti 'ngú gba okpála bhelé. Ani akoto lie bhutsibhutsi na bhisi-e, a adú matá ngubula na'e siti 'ngú de. Engú bini, a adú ngubula me okpála inde ngadjeke nago ka ani-e sia mukobho.

## 10

*Makiso gba Yesu Kilisito ane ndu omakiso na kalanu-o hana*

1 Líli gba Moidje ngasuno kukulú 'ngú hana má kpulukutu ade. A ko mangbo kulu ongú na babadha inde ngago-o. Lele pí li makiso inde li ngua e nde bha ndu 'kpí hana bini, inde u ngaha e ndu kalanga hana ti da lie namene me, okpála bhende ngadyudyo lio dengo Ebhe-e kolo ndjindji kala ani-e? 2 † dú me okpála inde ngaha ngua makiso bhomu-o pí Ebhe-e dú bubu kala ani-e, u de 'ó nabhundja siti 'ngú gba o-o. U tsia 'ó la di naha makiso ango-o. 3 Engú bini, naha makiso ngamene me okpála du nabhundja siti 'ngú gba o-o ndu kalanga hana. 4 Padhá de, anga ngute bhoko bagala ne ngute meme ti da na'e siti 'ngú belegu de bini.

5 Kaka-a, li Kilisito adu ago lie píla doto-o, ani apa pí Ebhe me:

«Mu kunda nani ehe natsulu matsulu,  
i du di-e makiso de,  
engú bini, mo oha kate muma  
ngubula me ma mene kulu gba  
mu-o nedi.

6 Enu inde u atsulu e pí misa inde u atsutsulu 'he pí e,  
di ne ehe natsulu matsulu koko  
inde  
u aha e ngubula na'e siti 'ngú-o  
nga nani li mu de.

7 Abhomu-o, ma atsia apa me:  
«O Ebhe! Tsitsia,  
ma ngago ngama makpe  
ngú namene engú inde mo  
okunda e-o,  
maka u aye engú gba ma-a lie bhú  
bhuku na líli-o.†»

8 Kilisito apa ngaiza pí Ebhe me:  
«Mu kunda nani ehe natsutsulu  
matsulu de, i du di-e makiso de. Enu  
u atsulu e pí misa inde u atsutsulu  
ehe pí e, di ehe koko inde u atsulu  
e ngú na'e siti 'ngú-o nga nani li  
mu de.» Engú bini, u haha makiso  
bhomu-o nakpata lele maka li líli

† 10:7 10:5-7 Tsia bhú Ets. 40:7-9.

apa lie ko. <sup>9</sup> Pipita-a, ani atsia apa me: «Ma ngago ngama makpe ngú namene engú inde mo okúnda e-o.» Kilisito a'e omakiso na kalanu-o hana, ani atsia ayipa ne bhe gba e-o. <sup>10</sup> Yesu Kilisito amene mukúnda gba Ebhe-o. Ani atse kute e ngae makpe maka makiso bhútsibhútsi bini má kpikili, abhomu-o, ní atsia aze bhú siti 'ngú gba ní-o.

<sup>11</sup> Dimandø gba Ebhe-e bini ne bini lulu ndu 'kpí hana ngabula namene kulu gba e-o. Ani ngaha piko piko koli ngua omakiso bini. La-a, omakiso ango-o ti da na'e osisiti 'ngú belegu de bini. <sup>12</sup> Engú bini, Kilisito aha koli makiso bini má kpikili ngú osisiti 'ngú gba okpála duduma ne duduma. Pipita-a, ani atsia anu adu li pá 'kpa na kokpa gba Ebhe. <sup>13</sup> Mbia inde-e, ani ngadjeke me Ebhe 'o obhulu yala gba ni-e dabili na sa 'dhu ni. <sup>14</sup> Abhomu-o, ne koli makiso bini inde ani aha e, ani adji okpála inde ani avulu o bhú siti 'ngú-o me, u kolo bubu kala Ebhe ngabula duduma ne duduma.

<sup>15</sup> Bu Bhobua la bhadi ngapapa pi ya moko, ani apa ngaiza lie me:

<sup>16</sup> «Yi tsia nga gandja inde ma akódho e ne uo pita oekpí bhomu-o,  
Ngámá apa mo-o.

Ma ayé olíli gba ma-a li bua uo,  
ma tsia tó olíli ango-o bhú imbilangú gba uo-o. †»

<sup>17</sup> Pipita-a, ani atsia apa matá me: «Ma abhúndja matá opupulu 'ngú di ne osisiti 'ngú gba uo-o de.†» <sup>18</sup> La-a, i du me Ebhe nde ambu li siti 'ngú ambu-o, gumu naha makiso matá ngú na'e'e ade.

*Ní a'ó ká nabhuka gba ní-e de*

<sup>19</sup> Kaka-a, ondaise ma, ní ambila ndjindji me ní alí li bili na bubu naali-e kabula ngute Yesu inde atuko-o. <sup>20</sup> Ani abhulu kpadji na mbia pi ní, inde di na mukobho li pápá na kpadji na 'ngbé pála bongo

na 'ngbé 'ti Ebhe gba omaYuda, akúnda napa me, bhú kute e makpe.

<sup>21</sup> A ka ní ne 'ngbé dimandø inde ngatsia 'kpí li eti gba Ebhe-o.

<sup>22</sup> Kaka-a, ní dyudyo liní de Ebhe ne bua ní bini di ne nabhuka hana. Padhá de, anga osisiti bua nakpokpo ku 'ngú adji lie akolo bubu kala Ebhe, kute ní atsia avulu lie bhú engu inde li siti 'he nde bhú e ade. Ndu 'ngú bhomu-o hana amene lie bhú ngute Yesu.

<sup>23</sup> Ní lila engú inde ní nga'o 'to ní 'to e, inde ní nde ngakpokpo e kpekpeke-o. Padhá de, anga Ebhe améne engú inde ani apa me ni améne e mamene. <sup>24</sup> Ní tsia 'kpí liní sunda ní ngú nadu ne mukúnda na kukulu di ne namene obabadha kulu. <sup>25</sup> Ní a'ó ka dadjua gba ni-e de maka li okpála koko ambila lio lie ne namemene-o. A ayo mangbo me ní to masi bhú ní sunda ní. Padhá de, anga yi ngau me ekpí gba Ngámá-a akolo bha ndju masikpe.

<sup>26</sup> Padhá de, anga pita nambila kukulu 'ngú-o, i du me ní nde ngamene siti 'ngú bhú gandji-e, makiso inde u ti da naha e ngabula na'e osisiti 'ngú-o matá ade. <sup>27</sup> Engú bini, ehe inde atigala pi ní-e, a ko bha nadjেকে ne tsulu hana nakodho 'ngú gba Ebhe di ne dingidhi djua inde atsulu obhulu yala gba ani-o.

<sup>28</sup> Ndu okpála hana inde adu agumu líli gba Moidje-e, u adu abhili uo. U du nadjেকে ndjinga uo de, i du me okpála bhisi, i du di-e okpála bata nde apa me a ko kukulu 'ngú-o.

<sup>29</sup> La-a, kpála bhende ngau Ndili gba Ebhe-e bhú djila e padhá-a, ani asia ke 'ngú inde ane la matá mane. A mo-o adi? Padhá de, anga kpála ango-o manga ngute na gandja na mbia inde avulu ani bhú siti 'ngú-o de. Ani ngasobho Bu Bhobua inde ngasuno bádha bhú 'bu gba Ebhe-e pi ní-o. <sup>30</sup> A na paká me ní mbila ndjindji me, a ko kpála inde apa me:

† 10:16 10:16 Tsia bhú Djlm. 31:33. † 10:17 10:17 Tsia bhú Djlm. 31:34.

«Ma agie siti 'ngú inde u amene e ngama.

Ma ahá pi kpála ne kpála ehe inde

ati ne ani-o. †»

Ani atsia apa di me:

«Ngámá akódho 'ngú gba okpála gba e makodho.†»

<sup>31</sup> A ko siti 'ngú na kuo kuo ngú nati bhú 'kpa Ebhe na mukobho.

<sup>32</sup> Yi bhundja nga engú inde akolo nani li yi li nedhinga inde yi asia zi 'kpí gba Ebhe-e lie-o. Bha kolo pipita-a, yi azu likabhu naali. Engú bini, yi alu kpekpeke bhú nagu egú ang-o. <sup>33</sup> U asobho okpála koko bhú ka yi, u atsia amene uo sisiti kala ndu okpála hana. Engú bini, okpála koko adu bedhe ngú nateteke okpála inde u adu ato mboho lio bhomu-o.

<sup>34</sup> Yi azu likabhu bhú dabili bini ne okpála inde adu bhú tikpu-o. Li u agbulu ohe gba yi-e lie, yi aziba ne djali hana me u nu nedi. Padhá de, anga yi ambila ndjindji me a ka yi ne tia inde ndjindji naali, inde ngadu duduma ne duduma. <sup>35</sup> Kaka-a, yi adu ne tsulu de. Padhá de, anga yi asia makala na ngbengbe kaka.

<sup>36</sup> A ayo me yi du ne kekele ngubula namene engú inde li Ebhe akunda e, di ne nasia ehe inde ani apa me ni ahá e-o. <sup>37</sup> Padhá de, anga u aye bhú Bhuku gba Ebhe-e me:

«A tigala nedhinga bedi, belegu bedi naali,

li kpála inde a ayo me ani go-o tsia gó.

Ani bhúe de.

<sup>38</sup> La-a, kpála inde ngbingbili bhú djila ma-a

tsia sía mukobho na duduma kabula nabhuka.

Engú bini, i du me ani nde agie lie ne sidi-e,

bua ma ngá matá ne ani de.†»

<sup>39</sup> Nganí-e, ní bhú ká okpála bhende ngagie lio ne sidi, inde di ngangita-a ade. Engú bini, ní ne okpála

bhende ngabhuka, inde di li kpadji na mukobho-o.

## 11

*Ní le nadu ne ngua nabhuka gba onguo ogbi ní-o*

<sup>1</sup> Na'o nabhuka gba o bhú Ebhe-e, a ko naziba me ní asia ehe inde ní nde nga'o 'to ní 'to e asia. A ko nadu ne nabhuka me ehe inde ní u e ne djila ní de-e uu. <sup>2</sup> Ebhe aziba nani okpála na kalanu-o ka nabhuka gba o-o.

<sup>3</sup> Ka nabhuka-a, ní ambila me Ebhe abho nani doto ne 'li e. Abhomu-o, ohe inde ní ngau e ne djila-a, abho lie li ohe inde ní u e ne djila de-o.

<sup>4</sup> Ka nabhuka-a, Abele aha makiso na babadha naali pi Ebhe, inde ane bhe gba Kaina mane. Ka nabhuka ang-o, Ebhe au ani bhú djila e ngbingbili. Padhá de, anga Ebhe ngae makpe aziba makiso gba ani-o. Ka nabhuka gba Abele-e, ani bha bini ngagama 'ngú, abana ani akpi lie-o.

<sup>5</sup> Ka nabhuka-a, Enoka kpi nani-i de. Engú bini, Ebhe aha ani abhúla. Kpála bini ti da nani nau ani de, anga Ebhe aha nani ani ngú na'o ani de e. Bhuku gba Ebhe-e apa me, kala me Ebhe ha ani abhúla-a, ani amene nani engú inde anga li Ebhe. <sup>6</sup> La-a, i du me nabhuka nde bhú kpála ade-e, ani ti da namene engú inde anga li Ebhe-e de. Padhá de, anga kpála inde ngadyudyo lie de Ebhe-e, a ayo me ani bhuka me: Ebhe uu, ani la di ngaha makala pi okpála inde ngagili ani-o.

<sup>7</sup> Ka nabhuka-a, Nua adje engú inde li Ebhe apa nani e pi ani pindji ongu inde agó, inde u u nga nani e de. Ani au me Ebhe pa eu de, ani atsia abho 'ngbé zabu inde ani akobho piga gba e bhú e-o. Namene ka ani mo-o, ani a'o mangimbo pí 'ndji okpála na píla doto. Ka nabhuka gba

† 10:30 10:30 Tsia bhú Det. 32:35. † 10:30 10:30 Tsia bhú Det. 32:36. † 10:38 10:37-38 Tsia bhú Abk. 2:3-4.



ani-e, Ebhe atsia au ani bhú djila e me a ko kpála na ngbingbili.

8 Ka nabhuka-a, Abalahama amene líli gba Ebhe li nedhinga inde ani a'i nani ani lie-o. Ani anu bhú doto inde li Ebhe apa nani lie me ni ahá e pi ani, amba akolo naani-o. Ani ayie bhú doto gba e padhá me ani nde mbila de me, ni adjí bhú doto bhedho-ie de. 9 Ka nabhuka-a, ani anu adu maka gandji kpála bhú doto inde li Ebhe apa nani me ni ahá e pi ani-o. Ani adu nadu bhú 'ti ngbangbali, Isaka ne Yakobho atsia adu di nadu bhú 'ti ngbangbali. A bhomu-o okpála inde li Ebhe apa di nani pi o me ni ahá di doto ango-o pi o-o. 10 Padhá de, anga Abalahama adu nadjeke gudhu inde li 'dhu e alu kpekpeke. Ebhe amene lele maka li gudhu ango-o adu lie ngae, ani atsia ayiki bhadi ngae.

11 Ka nabhuka-a, Abalahama asia nani angu ngubula nazu ndili bhú nedhinga ani akolo lie ne kalanga bhelé, belegu li Sala adu lie ne i zu de-o. Ani adu ne nabhuka me engú li Ebhe apa me ni améne e-e, ani améne mamene. 12 Kaka-a, koli ogbi ní bini Abalahama, inde adu de kuo masikpe-e, azu opiga bhelé. Ongisi inde li opiga ango-o azu o-o bhelé maka ikupala inde abhúlá. Uo bhelé di maka sike inde lingo 'ngbé 'ngu, inde li kpála ti da natanga e de.

13 Ndu okpála bhomu-o hana amu bhú nabhuka me, u nde sia oehe inde li Ebhe apa nani me ni ahá e pi uo-o de. Engú bini, u au oehe ango-o tsutsu, u atsia akpi djali. Abhomu-o, u atsia ambila ma kpulukutu me o ne ogomago, o la di ne okpála na dhuku pila doto ei. 14 Okpála inde ngapa ngua engú bhomu-o ngasuno mbámbá me o ngagili doto gba o makpe. 15 I dú me u du nakina doto inde u aze nani bhú e-e, u de agie lio bhú doto ango-o agie. 16 A na paká me, u adu ne gumu doto inde babadha naali. A akunda napa me

doto inde abhúlá ko. Kaka-a, Ebhe ne numu ade me, u 'i ni me ni ne Ebhe gba uo-o. Padhá de, anga ani aleke gudhu bini pi uo.

17 Ka nabhuka-a, Abalahama aha Isaka maka makiso, li Ebhe ale ani lie-o. Abalahama li Ebhe apa nani me ni ahá 'he pi e-e, adu bedhe ngú naha koli ndili gba e bini-e maka makiso. 18 Ebhe apa nani pi ani me: «Li kpadji gba Isaka-a, mo osia opiga inde ma apa nani me ma ahá o pi mu-o.†» 19 Engú bini, Abalahama adu abhundja me Ebhe ne angu nazuku Isaka. Kaka-a, Ebhe atsia agie ndili gba ani-e pi ani maka kpála inde u azuku e me ani nde akpi.

20 Ka nabhuka-a, Isaka atuko bisagu pi ongisi gba e bhisi-o, Yakobho ne Esau, natsia lele ongú inde abháka uo sidi-o.

21 Ka nabhuka-a, Yakobho atuko bisagu pi ongisi bhisi gba Djodjefu-o, kala me ani kpi. Ani ateke lie li duku gba e, ani atsia adhogo Ebhe.

22 Ka nabhuka-a, Djodjefu apa li ani akolo lie masikpe de nakpi ka e me, omafalaeele azé bhú Edjipeto maze. Ani atsia asuno engú inde a ayo me u mene e ne biki ni-o.

23 Ka nabhuka-a, li u azu Moidje lie, okpála inde azu ani-e awo ndje ani ngubula epe bata. U au nani me ani babadha naali, u tsia dje tsulu ka líli gba 'ngbé ngámá-a de.

24 Ka nabhuka-a, li Moidje abhele lie-e, ani ayala me okpála 'i ni me ndili gba ndili na olo gba Falao. 25 Ani aziba nazu likabhu bhú dabili bini ne piga gba Ebhe-o. Ani atsia ayala nakpi djali inde ngubula nedhinga bedi-e bhú siti 'ngú. 26 Padhá de, anga ani adu abhundja me li kpála zu likabhu kabula Masiya-a, bhobhomu-o pi ani ne tia na ngbéngbé ane bhende na Edjipeto mane. Kaka-a, ani a'o nani djila e li makalá inde ani asia e bhú oekpi inde ngago-o.

† 11:18 11:18 Tsia bhú Dje. 21:12.

<sup>27</sup> Ka nabhuka-a, Moidje ayie nani bhú Edjipeto me ani nde kpe ke 'ngú gba 'ngbé ngámá-a de. Aní atsia alá kpekpeke mágito me ani ngau Ebhe inde u uu e de-o. <sup>28</sup> Ka nabhuka-a, Moidje aha nani líli me u leke anokomia na Pasika . Aní atsia aha líli me u pulu ngáte lí obhè bhoti, amba andjelu na kuo abhíli ongisi na kalanu gba omafosalaele de.

<sup>29</sup> Ka nabhuka-a, omafosalaele agulu nani 'ngbé 'ngu na Mbembe-e mágito me u ngadholo pí doto inde a'ulú má kekele! Engú bini, lí omaEdjipeto ale di lie me ogulu 'ngu-o maka uo-o, engu-o atsia abuka uo. <sup>30</sup> Ka nabhuka gba omafosalaele, aga inde asa nani gúdhú na Djeliko-o agumú pita nadjí ngongo ngúbula 'kpí mananika. <sup>31</sup> Ka nabhuka-a, Lahaba, eò na zabhe-e akobho nani. Aní kpi bhú dabili bini ne okpála inde adu agu Ebhe-e de. Padhá de, anga ani asia nani omafosalaele, inde u atima nani o ngú natsia lele gúdhú-o ne guo 'ngú .

<sup>32</sup> Ma ti da napa matá pí? Nedhinga ka ma ade ngú nakpokpo 'ngú gba Djedeo, gba Balaka, gba Samisona, gba Djefete, gba Davidi, gba Samuele, di ne bhe gba opolofeta-o . <sup>33</sup> Ka nabhuka-a, u agboko ongbengbe ongámási na okúti bhelé bhú 'gú. U amene ongú inde adu ngbingbili, u asia 'he inde lí Ebhe apa nani me ní ahá e pí uo-o, u atsia agbite 'bhè okingbi. <sup>34</sup> U abulú odjua inde adu nade má ka ka ka! U akobho bhú nakpi sakpa mbotia. U adu bhúbhuku, la-a, u atsia akolo kpekpeke. U adu kpekpeke bhú egú, u atsia aha angu osudha na gandji gandji. <sup>35</sup> Ka nabhuka-a, olisi au matá okpála gba o inde amu-o. Padhá de, anga okpála ango-o azuku.

U ato mbolo lí okoko nakolo masikpe de nakpi. U ayala me u gbegbe o sakpa okpála adu ato mbolo lí o-o. U amene mo-o ngúbula me o zuku ngú nasia mukobho na

ndjindji naali. <sup>36</sup> U amú okoko, u atsia abhi di uo ne fimbo. U agbigbite okoko ne gbíndjili, u atsia amba di uo bhú tikpu. <sup>37</sup> U abhili okoko ne teme. U akokodho bhúsu okoko bhisi ne sii. U atsia abhili okoko ne mbotia. Okoko adu anu ne ndu bili hana me u nde ato ko kandelè, i du di-e ko meme. U adu obhulu ndibhili. U adu nato mbolo lí uo, u atsia adu namene uo kpekpeke. <sup>38</sup> U ti nani da nalu píla doto inde-e de. U adu nadjakadha abhú 'gu, di ne apí oeta. U adu nalu bhú oedú di ne bhú ogudho teme.

<sup>39</sup> Ebhe aziba nani ndu okpála bhomu-o hana ka nabhuka gba o-o. La-a, u sia ehe inde lí Ebhe apa nani me ní ahá e pí u-o de. <sup>40</sup> Padhá de, anga Ebhe aleke nani ehe na babadha naali pí ní. Aní kunda nani de me u kolo ndjindji hana mandí ní-e de.

## 12

*Yi lu kpekpeke bhú olikabhu inde yi ngazu e-o*

<sup>1</sup> Pí ní-e, ndu ndindi okpála bhomu-o hana inde abhuka nani Ebhe-e, asa denko ní ngbalina u ngau 'ngú inde ní ngamene e ne djila o. Kaka-a, ní gbe liní lí ongú bhende ngagbigbite ní me ní adhuku ndjindji de-e magbe. A ane la mane pí siti 'ngú bhende ní ngali bhú e má gala gala-o! Holo inde lí Ebhe apa me ní gu e-e, ní gu akólo makolo alí soso. <sup>2</sup> Ní banga djila ní lí Yesu inde lí nabhuka gba ní-e alu pí e, nayie lí lilita akólo makolo alí soso-o. Aní aziba nakpi lí kulusi. Nakpi lí kulusi-e, a ko nakpi na numu. Engú bini, aní dje numu tété de. Padhá de, anga aní adu nau djali inde aní asia e-o. Mbia inde-e, aní adu lí pá 'kpa na kokpa denko kiti na ngámá gba Ebhe-o.

<sup>3</sup> Yi bhundja nga Yesu maka aní akibila yala inde lí okpála namene siti 'ngú-o adu nayala aní ne e-o. Kaka-a, yi a'ó de me ndala ha angu yi-e de. <sup>4</sup> Padhá de, anga bhú gbele

inde yi ngagu e ne siti 'ngú-o, yi gu nga nakolo bhú nakpi ka yi-e de. <sup>5</sup> 'To yi a'ili li líli inde li Ebhe aha e pi yi maka ongisi gba e-e a'ili? Líli ango-o me:

«Ndiá ma, i dũ me Ngámá nde ngali mũ-o,  
mo obóyo de.

† dũ me ani nde ngambembe bhú 'ndji mũ-o,

bua mũ abí la di ndala de.

<sup>6</sup> Padhá de, anga Ngámá ngali kpála inde ani akũnda e-o.

Ani ngabhi kpála inde ani ambila me a ko ndili gba ni-o.†»

<sup>7</sup> Kaka-a, yi kibila okpekpeke da 'ngú inde li Ebhe ngali yi ne e-o. Ani ngamene yi maka ongisi gba e. A ko ndili bhedho li 'dyi e líli e de-e? <sup>8</sup> † dũ me Ebhe nde li yi maka ndũ ongisi koko gba e hana de-e, a akũnda napa me yi ne kukulũ ongisi gba ani-e ade. Yi ne ongisi inde u mbila 'dyi o de. <sup>9</sup> A li ní píla doto inde-e ne odyidi. U adũ nani nali ní. Ní atsia adũ di namanga uo. A ane la matá mane me ní manga 'Dyi ní inde abhúlá, ngubula me ní sia mukobho. <sup>10</sup> Odyi ní adũ nali ní ngubula nedhinga bedi, maka u adũ abhubhundja lie-o. Engú bini, Ebhe ngali ní ngubula bádha 'ngú gba ní-o. Ani akũnda me ní dũ bubu maka ni. <sup>11</sup> Nedhinga u ngali ní lie mbia inde-e, a ngau lie maka u de ngaha pi ní likabhu, a ha djali pi ní de. La-a, pipita-a, okpála inde akodho 'kpí li ngua kpadji bhomu-o ngasia nguwa na guo 'ngú inde akpetse lie ne mukobho na ngbingbili-o.

<sup>12</sup> Kaka-a, yi 'e 'kpa yi inde andala-a ne bhúlá. Yi mene la di me 'dhũ yi inde andala-a, a kolo kpekpeke! <sup>13</sup> Yi dhũku li okpadji inde ngbingbili, amba 'dhũ kpála bhende ndjindji ade-e agũmũ de. Ani kobho mangbo makobho.†

*Yi dũ nagbo 'dje yi ndũ 'kpí hana li Ebhe*

<sup>14</sup> Yi gili nadũ ne guo 'ngú ne ndũ okpála hana. Yi dũ la di bubu. Padhá de, anga li kpála dũ bubu de-e, ani ú Ngámá de. <sup>15</sup> Yi lila liyi me kpála bini ayie sa bádha bhú 'bu gba Ebhe-e de. Kpála bini akólo la di bhú ká yi maka ndula inde sũsũ-o de. Ndula ango-o akø lie, a asiti mukobho gba okpála bhelé ne sengø inde bhúbhũ-o. <sup>16</sup> Kpála bini bhú ká yi adũ nakũnda olisi, i dũ di-e obhosi ngangá de. Kpála bini bhú ká yi aú oehe gba Ebhe-e bhú djila e padhá de, maka Esau. Ani atcindji nani nadũ ka e ndili na kalanũ ngubula koli sani 'zũ bini. <sup>17</sup> Yi ambila ndjindji me sidi-e, ani adũ ne gũmũ me 'dyi ní tuko bisagu pí ni. Engú bini, 'dyi ani abebe ani. Padhá de, anga abana nani ani ale nadjí engú inde ani amene e lie ne naku 'gbá-a, ani sia kpadji de.

*Nau inde i ti da nadyiki de*

<sup>18</sup> Yi kolo nga dengo eta bini de inde u ti da nabu 'kpa lie maka eta na Sinai, inde adũ nani ne dingidhi djua-o. A adũ ne biti, di ne anvi na kpekpeke naali. <sup>19</sup> Eta ango-o adũ di ne tolo toti, di ne tolo nagama 'ngú. Li omaIsalaele adje eli bhomu-o lie, u ayo me Ebhe agáma matá engú koko pí bhobhomũ-o de. <sup>20</sup> U ti nani da nakibila líli inde-e de. Líli ango-o me: «Kpála inde abú 'kpa e li kũte eta-a, abana i dũ di-e enũ-o, u abhéle ani ne teme.†» <sup>21</sup> Engú inde u adũ nau e adũ na tsulũ tsulũ. Belegũ Moidje atsia apa kaka me: «Ma ngadje tsulũ naali, ma la di ngagũku magũku.†»

<sup>22</sup> Engú bini, yi akolo dengo eta na Siona , dengo gũdhũ gba Ebhe na mukobho-o. A ko Yelusalema na abhúlá bhú dabili bini ne oandjelu gba e inde kètø ne kètø apo bhúla o bhú anokomia-o. <sup>23</sup> Yi akolo dengo ongisi na gigina inde apo bhúla o, inde u aye 'li o abhúlá-o. Yi

† 12:6 12:5-6 Tsia bhú Gbt. 3:11-12. † 12:13 12:13 Tsia bhú Isa. 35:3; di ne bhú Gbt. 4:26.

† 12:20 12:20 Tsia bhú Eki. 19:12, 13. † 12:21 12:21 Tsia bhú Det. 9:19.

akolo denngo Ebhe, kpála nakodho 'ngú gba ndu okpála hana-o. Yi akolo denngo okpála inde ngbingbili, li Ebhe amene me u kolo ndjindji hana kala ni-o. <sup>24</sup> Yi akolo denngo Yesu, kpála inde ne ludu sunda ní ne Ebhe bhú gandja na mbia inde li Ebhe akodho e ne ní-o. Yi akolo denngo ngute ani inde atuko, inde ngaha bádha 'ngú pi ní inde ane bhe gba Abele mane-o.

<sup>25</sup> Yi lila liyi! Yi ayála nadjé kpála inde ngagama 'ngú pi yi-e de. Padhá de, anga okpála inde ayala nani nadjé kpála inde adu naha líli pi o píla doto-o, neke nasia ke 'ngú de. A adú bhadi pi ní moko. A ne la matá mane, i du me ní nde ayala nadjé kpála inde ngagama 'ngú pi ní nayie abhúlá-o. <sup>26</sup> 'Li ani adyiki nani doto. Engú bini, mbia inde-e, ani apa pi ní me: «Ma adyiki matá doto bhatsibhatsi bini. A dú bha bini doto de, ma adyiki di ne abhúlá hana.†» <sup>27</sup> Eli inde me «matá bhatsibhatsi bini», akunda napa me oehe inde u abho e mabho-o adyiki, i tsia ngíta, amba ehe bhende i ti da nadyiki de-e tígala bha ngae.

<sup>28</sup> Ní ngasia nau inde i ti da nadyiki de. Kaka-a, a ayo me ní gie heni pi Ebhe. Ní mene la di pi ani kulu inde anga li ani ne tsulu hana di ne namanga ani. <sup>29</sup> Padhá de, anga Ebhe gba ní-e, a ko djua inde ngade made.†

### 13

#### *Yi mene engú inde nganga li Ebhe*

<sup>1</sup> Mukunda inde sunda yi-e nu bha ne kalanu maka ondaise . <sup>2</sup> 'To yi a'ili nasia ogomago de. Padhá de, anga bhú namene mo-o, okpála koko asia nani oandjelu me u nde mbila de. <sup>3</sup> Yi bhundja okpála bhende bhú tikpu-o mugito me, yi ne uo bhú tikpu bhú dabili bini. Yi bhundja okpála bhende u ngato mbolo lio-o,

mugito me u ngato mbolo ango-o li yi.

<sup>4</sup> A ayo me ndu okpála hana manga kuva mamanga. A ayo me bhoko lila kute e pi wala e, amba elo lila di kute e pi 'ko e. Padhá de, anga Ebhe akódho 'ngú gba okpála inde ngakunda olisi, i du di-e obhosi ngangá-a makodho. Ani akódho di engú gba okpála inde ngakunda olisi di ne obhosi ngangá, a la di-e okpála inde ngakunda olisi, i du di-e obhosi koko.

<sup>5</sup> Gumu tia ahá angu yi bhú mukobho gba yi-e de. Yi kpi djali li ehe bhende ka yi-o. Padhá de, anga Ebhe apa me:

«Ma 'ó ka mu de,  
ma bála 'kpa li mu  
belegu de bini.†»

<sup>6</sup> Kaka-a, ní ti da napa ne nabhuka hana me:

«Ngámá ne kpála inde ngateteke  
ma,

ma djé tsulu li 'ngú bini de.

Okpála ti da namene ngú ma  
mangua 'ngú dho?†»

<sup>7</sup> Yi bhundja nga okpála inde adu nani pi 'ndji yi kalanu-o, inde akpokpo eli gba Ebhe-e pi yi-o. Yi bhundja nga lele maka u akpata nani Ebhe lie, di ne maka u amu lie-o. Yi bhuka maka u abhuka nani lie ko. <sup>8</sup> Yesu Kilisito yiyipa de, lili, naki, duduma ne duduma. <sup>9</sup> Yi a'ó de me nasuno na gandji gandji 'e yi li kpadji-e de. A ndjindji me bua ní sia angu ka bádha bhú 'bu gba Ebhe , a alú pi olili inde atsia ezu-o de. Padhá de, anga okpála bhende ngamene ngua olili bhomu-o sia bádha 'ngú tété belegu de bini.

<sup>10</sup> Odimandé gba Ebhe inde ngamene kulu bhú 'ti ngbangbali-e ti nani da nazu enu inde u atsutsulu e pi misa gba ní natsulu enu-o \* de.

<sup>11</sup> 'Ngbé dimandé gba Ebhe nganu ne ngute onu li bili na bubu naali, ngabula nahaha maka makiso ngú

† 12:26 12:26 Tsia bhú Adj. 2:6. † 12:29 12:29 Tsia bhú Det. 4:24. † 13:5 13:5 Tsia bhú Det. 31:6, 8. † 13:6 13:6 Tsia bhú Ets. 118:6. \* 13:10 13:10 Enu inde u atsulu e pi misa si-e, a ko makiso inde u apa 'ngú e bhú olukuluku 15-16.

na'e siti 'ngú. Engú bini, u tsutsulu kuo onu ang-o li ngongo, a adudu bhú ká okpála de. <sup>12</sup> Kaka-a, Yesu akpi di lingo gudhu na Yelusalema ngubula na'e siti 'ngú gba okpála ne ngute e makpe. <sup>13</sup> A ayo me ní nu kò liní ne aní alí ngongo, ní kibila ngua pádha inde u apadha aní ne e-o. <sup>14</sup> Padhá de, anga pílá doto ei-e, gudhu inde ní ngadu bhú e duduma ne duduma ade. Engú bini, ní mangbo ngagili gudhu inde adú galikpe ko. <sup>15</sup> La li kpadji gba Yesu-o, ní dhөгө Ebhe ndu nedhinga hana maka makiso, a akunda napa me, ní dhөгө 'li aní ne 'bhө ní. <sup>16</sup> 'To yi a'fli li namene bádha 'ngú, di ne nateteke liyi sùnda yi de. Padhá de, anga ngua makiso bhomu-o nganga li Ebhe ngae.

<sup>17</sup> Yi manga okpála inde pí 'ndji yi-e mamanga. Yi mene la di líli gba uo-o. Padhá de, anga u ngatsia 'kpí li yi ndu nedhinga hana ne nambila ndjindji me ekpí bini, o kpókpo kú kulu inde o amene e kala Ebhe. Yi 'o me u mene kulu gba o-o ne djali hana. U améne ne nalopolo lío de, anga u mene ne nalopolo lío-o, bhobhomu-o téteke yi de.

<sup>18</sup> Yi yo Ebhe pí ya. Ya ambila me bua nakpokpo kú 'ngú gba ya-a ndjindji. Padhá de, anga ya ngagili ndu 'kpí hana namene engú inde li lelele. <sup>19</sup> Ma ngayo ka yi ne kekele me yi yo Ebhe ngú ma, amba aní bhulu kpadji me ma gie líma de yi má gala!

<sup>20</sup> Ebhe inde li guo 'ngú ngayie ka e, azuku Ngámá gba ní Yesu bhú ká okpála inde amu-o.

Ani akolo 'ngbé málila gba okandele ne ngute e  
i nde aní aha e maka makiso.  
Aní amene me gandja na  
duduma-a lu pí ngute ang-o.

<sup>21</sup> A ayo me Ebhe ang-o mene me yi kolo ne angu  
ngú namene 'ngú

inde ndjindji ngubula namene mukunda gba aní-o.

A ayo me Ebhe 'o bhú ní engú inde ndjindji kala e

li pápá gba Yesu Kilisito.

A ayo me u dhөгө aní duduma ne duduma.

A adu moko!

### *Engú na soso*

<sup>22</sup> Ondaise ma, ma ngayo ka yi me yi dje eli inde ma ngato masi bhú yi ne e bhomu-o ne 'ndjá bua. La di-e, balua ma aye e pí yi inde-e ndjándjá ade. <sup>23</sup> Ma akunda napa pí yi me u atse 'kpa li ndai ní Timoté atse. I du me aní nde akolo má gala-a, ya anú natsia yi bhú dabili bini ne aní.

<sup>24</sup> Yi yi ndu okpála hana inde pí 'ndji yi-e mayi. Yi yi la di ndu okpála gba Ebhe-e hana mayi. Ondaise ní na Itali yi yi mayi. <sup>25</sup> A ayo me bádha bhú 'bu gba Ebhe-e du bhú dabili bini ne ndu yi hana.

## Balua gba Djaki Eli na kalanu

Balua gba Djaki-e, apo bhulá ongu inde a ayo me u mene e. Aní aye pi ndu okpála gba Ebhe inde atsambala pila doto libhomu. Djaki agama 'ngú ne bádha 'li pindji ongu inde atsia imbilangu, engú inde a ayo me u mene e bhú dasundu gba omakilisito.

Balua ango-o ngalu kpekpeke pindji bádha 'ngú inde bhú okulu di ne nabhuka, ne pindji namene 'ngú na Ebhe maka makilisito.

### **Ongbengbe ongu inde bhú bhuku inde-e ngae inde:**

Eli na kalanu 1:1

Nabhuka, a la di-e imbilangu 1:2-8

Nadu bhú ndibhili ne nadu ne tia bhelé 1:9-11

Nali bhú nale 1:12-18

Nadje 'kpí, a la di-e okulu 1:19-27

Nagbele 'dje kpála pindji nagbogbo bhusu o 2:1-13

Nabhuka, a la di-e okulu 2:14-26

Makilisito ne 'mi e 3:1-18

Makilisito, a la di-e ongu na doto 4:1 - 5:6

Olíli ngangá 5:7-20

### *Djaki yi okpála gba Ebhe-e mayi*

<sup>1</sup> Ngama, Djaki, bali gba Ebhe, bali di gba Ngámá Yesu Kilisito-o, ma yi ndu okpála gba Ebhe hana inde atsambala pila doto libhomu-o mayi.

### *Yi du ne kpéke bua bhú okpekpeke da 'ngú*

<sup>2</sup> Ondaise ma, li okpekpeke da 'ngú du abhaka yi ne li okpadji ngangá-a, yi de du bhúbhú ne djali naali. <sup>3</sup> Padhá de, anga yi mbila ndjindji me, i du me nabhuka gba yi-e nde alu kpekpeke bhú okpekpeke da 'ngú-o, nabhuka ango-o tsia há pi yi kpéke bua. <sup>4</sup> Kaka-a, yi lila liyi uu! Padhá de, anga a ayo me kpéke

bua gba yi-e kolo bha bini ali soso, ngubula me yi bhele li bua yi, amba yi a'ó ká saka bádha 'ngú bini de.

<sup>5</sup> I du la me kpála bini bhú ká yi nde aneke imbilangu-o, a ayo me aní yo ka Ebhe, amba Ebhe ha pi aní. Padhá de, anga Ebhe ngahaha pi ndu okpála hana ne bádha bua, la di ne bua na keke de. <sup>6</sup> Engú bini, a ayo me aní yo ne nabhuka. Aní adú ne bua na bhisi bhisi de. Padhá de, anga kpála inde ne bua na bhisi bhisi-e, aní maka ngbo 'ngu inde li anvi ngatumba e pí djila 'ngbé 'ngu. <sup>7</sup> Kpála ango-o a'ó 'to e de me ni asía 'he ka Ebhe Ngámá-a de, <sup>8</sup> anga aní ne bua na bhisi bhisi. Aní mbila la di de me bhú ká ondu 'ngú gba ni-e hana-a, ni améne pi-ie de.

### *Engú inde akólo li obhulu ndibhili ne obhulu tia*

<sup>9</sup> A ayo me mabhuka inde bhú ndibhili-e kpi djali. Padhá de, anga Ebhe nga'e'e aní abhulá. <sup>10</sup> La di-e, mabhuka inde ne bhulu tia-a, a ayo me aní kpi djali, anga Ebhe ngaké aní ne kuto. Padhá de, anga aní akódho 'kpí maka felele na ulu inde abhú bili. <sup>11</sup> Ela ngakoto ne kpéke djua gba e, i tsúlu ulu, li ulu-o 'úlú. Li ulu a'ulú lie, li felele felele tí kuto. Abhomu-o, li bádha gba ulu ango-o tsia kólo padhá. A bhadi moko pi bhulu tia. Padhá de, anga kpála ango-o akólo padhá bhú ká ondu 'he gba e hana inde aní ngamene e-o.

### *Ebhe ti da nato kpála bhú nale de*

<sup>12</sup> A ko djali pi kpála inde ne kpéke bua bhú okpekpeke da 'ngú. Padhá de, anga pita aní ane okpekpeke da 'ngú lie, aní tsia sía makalá inde li Ebhe apa nani me ni ahá e pi okpála bhende akunda ni ko. Makalá ango-o, a ko mukobho na duduma. <sup>13</sup> Li nale\* bhaka kpála-a, aní apá de me: «Ebhe ngato ma bhú nale-e ngae» de. Padhá de, anga mabhundja nale kpála bhú Ebhe ade. La di-e, Ebhe ngae makpe-e, ti da nale kpála bini

\* 1:13 1:13 Bhú eli na giliki-e, kpéke da 'ngú ne nale-e, a ko bha koli 'he bini.

de. <sup>14</sup> Kpála ngali bhú nale ka gumu na sisiti inde li bua e-o. Gumu na sisiti ango-o gbéle ani, i tsia tó ani bhú nale. <sup>15</sup> Pipita-a, gumu na sisiti-e bí 'bhi, i zú siti 'ngú. Siti 'ngú ango-o bhele-e, i tsia zú nakpi.

<sup>16</sup> Ondaise ma na mukunda, yi apíte liyi de. <sup>17</sup> Ndu 'ngú na babadha hana, la di ne ndu tia inde ane ne bádha hana ngayie ka Ebhe, inde abho ndu 'he na zizi inde abhúlá-a† hana ngae-o. La pi ani-e, zi ani djidji lie de, ani yíe la di bhú da e 'kpí bini de. <sup>18</sup> Ebhe akunda nani ngae makpe naha mukobho pi ní li kpadji na eli gba e na kukulu-o. A ko ngubula napa me ní du ogina nguwa bhú ká ondu 'he hana inde ani abho e-o.

*Nadje eli gba Ebhe, di ne namene maka li eli ango-o apa lie-o*

<sup>19</sup> Ondaise ma na mukunda, yi mbila engú inde-e ndjindji: kpála ne kpála du adje 'ngú má gala! La-a, ani adu agama 'ngú má gala gala de! Ani adú di ake 'ngú lie má gala gala de! <sup>20</sup> Padhá de, anga ke 'ngú gba kpála-a, ngagbe ngbili 'ngú kala Ebhe ade. <sup>21</sup> Kaka-a, yi yala ndu 'ngú bhende na sisiti-e hana. Yi yala di ndu kulu na sisiti-e hana. Yi sia eli inde li Ebhe ngalu e li bua yi-e ne nakø liyi ne kuto. Padhá de, anga eli ango-o ne angu ngú nakobho yi.

<sup>22</sup> Yi mene engú inde li 'li Ebhe ngapa me yi mene e ko. Yi adú bha nadjedje madje de. I du mo-o de-e, amba yi ngapite bhomu-o liyi ngayi makpe. <sup>23</sup> Padhá de, anga kpála bhende ngadje eli, ani tsia mene maka li eli ango-o ngapapa lie de-e, ani maka kpála bhende ngatsia bhúla e bhú bitolobi. Ani ú maka ani nde lie-o. <sup>24</sup> Pita ani atsia bhúla e lie, ani há lie, ani tsia tápa. La-a, bha kolo má gala, ani mbila matá de me bhúla ni de iginí pi-ie de. <sup>25</sup> Engú bini, kpála koko ngazi 'ndji e bhú líli inde babadha na kuo kuo inde ngagbegbe kpála bhú bali-e ndjindji.

Ani la di ngadhedhe tété. Ani ngadje eli-e lie, ani 'líli 'to e tété de. Bhú namene maka li eli-e ngapapa lie, kpála bhomu-o adú ne djali.

<sup>26</sup> I du me kpála nde ngabhundja me ni ngamene engú na Ebhe, engú bini, ani mbila nalila 'mi e de-e, kpála ango-o ngapite lie ngae makpe. Engú na Ebhe inde li kpála ango-o ngamene e, a padhá. <sup>27</sup> Engú na Ebhe inde kukulu-o, inde la di babadha bhú djila 'Dyi ní Ebhe-e, a ngae inde: a ko nanu nateteke otsulosi di ne oekesi bhú likabhu gba o-o, a la di-e nalila lie, amba engú na doto inde-e asíti ni de.

## 2

*Yi aú okpála koko ngbéngbé ane okoko de*

<sup>1</sup> Ondaise ma, yi abhuka Ngámá gba ní Yesu Kilisito, inde abedhe ne sangu bedhe-o. Kaka-a, yi aú okpála koko ngbéngbé ane okoko de. <sup>2</sup> Ní pa nga me: bhulu tia bini inde adyi kati na olo, di ne obabadha bongo na kuo kuo, ali li bili inde yi apøkøbhø bhúla yi lie-o. Pipita-a, li bhulu ndibhili inde adyi naae okakadha bongo lí di oo. <sup>3</sup> Yi tsia ú bhulu tia inde adyi obabadha bongo na kuo kuo ngbéngbé ane mane. Kaka-a, yi tsia pá pi ani me: «Ngamu-o, du si, li bádha bili inde!» Yi tsia pá la naae pi bhulu ndibhili-e me: «Ngamu-o, lu malu», ne me: «Du kuto bhú doto bhú li 'dhu ma si!» <sup>4</sup> I du me yi nde amene mo-o, amba yi ngau okpála koko ngbéngbé ane okoko mane. Yi la di ngakodho 'ngú ne mabhundja na sisiti.

<sup>5</sup> Ondaise ma na mukunda, yi djedje nga: Ebhe alo okpála bhende naao ne obhulu ndibhili bhú djila okpála na doto-o. Ani akunda me u du ne nabhuka naali, ngubula me u li bhú Nau gba ni inde ni apa me ni ahá e pi okpála bhende ngakunda ni ko. <sup>6</sup> Engú bini, yi ngau obhulu ndibhili-e bhú djila yi padhá! La-a,

† 1:17 1:17 Ndu 'he na zizi inde abhúlá: A akunda napa me ela, epe ne oikupala.

a ngato mbolo li yi-e da? A la di ngagbe yi bhú ngbanga da? A ko obhulú tia di? <sup>7</sup> A ko matá bhadi uo di inde ngasobho 'ili na babadha inde li Ebhe aha e pi yi-e?

<sup>8</sup> Bhuku gba Ebhe-e apa me: «Kúnda kilí mú maka mo okúnda límú lie ngamú makpe ko.†» A bhomú-o líli inde bhú Náu gba Ebhe ko. † dū me yi nde ngalila líli ango-o, amba yi ngamene bhomú-o ndjindji. <sup>9</sup> Engú bini, † dū me yi nde ngau okpála koko ngbéngbé ane okoko mane-e, amba yi ngamene siti 'ngú. La di-e, líli-e agbite yi, anga yi ngagumú bhomú-o líli. <sup>10</sup> Padhá de, anga † dū me kpála bini nde agumú té líli-e, ani nde la ngamene dudu-o hana ndjindji-e, amba ani agumú bhomú-o líli-e libhomu. <sup>11</sup> Padhá de, anga Ebhe inde apa me: «Mo okúnda bhoko, † dū di-e òlò gba kpála koko de», ani apa di ngae me: «Mo obhólò kpála de.» Kaka-a, † dū me mú nde kúnda bhoko, † dū di-e òlò gba kpála koko de-e, engú la bini, mú bhólò kpála-a, amba mo ogumú líli-e agumú.†

<sup>12</sup> Ka 'ngú bhomú-o, yi gama 'ngú, yi mene di 'he me yi nde ngambila ndjindji me líli akódho 'ngú gba yi-e makodho, líli ango-o, a ko bhende ngagbegbe kpála bhú bali-o. <sup>13</sup> Padhá de, anga bhú nedhinga nakodho 'ngú-o, pi kpála bhende † dje nani ndjinga okpála koko de-e, Ebhe djé di ndjinga ani de. Engú bini, kpála bhende ngadje ndjinga okpála koko-o, ekpí nakodho 'ngú gba okpála-a 'ó tsulú li ani de.

### *Nabhuka inde ne kulu ade-e, a kukuo*

<sup>14</sup> Ondaise ma, kpála bini ti da napa me ni ne nabhuka. Engú bini, † dū la me ani nde suno kulu kulu-o de-e, nabhuka ango-o ti da nakobho ani uu? <sup>15</sup> Ní pa nga me: ndai yi bini na bhobhoko, † dū di-e bhe na òlò, u ne bongo ade, u di ne ezú ngú ekpí

bini bini ade. <sup>16</sup> Li kpála bini bhú ká yi pa pi uo me: «Yi nū ne guo 'ngú ! Yi nū dyi bongo, amba yi zú 'he, yi 'u'u ma'u'u!» Oeli bhomú-o améne pi uo mangua bádha 'ngú dho, † dū me yi nde ha ehe inde u nde bhú ndibhili e pi uo de-e? <sup>17</sup> A si maka nabhuka. † dū me mú nde abhuka-a, engú bini, mú suno kulu kulu-o de-e, amba nabhuka gba mú-o kukuo.

<sup>18</sup> Engú bini, kpála ti da napa me: «Okpála koko aha lío pi nabhuka, okoko aha lío pi kulu.» Li kpála pa mo-o, ma gíe pi ani me: «Sunu muma, lele pi mú ti da nadu lie ne nabhuka me mú nde mene kulu kulu-o de-e! Ngama la di-e, ma asúno nabhuka gba ma-a pi mú bhú namene kulu ango-o.» <sup>19</sup> Ngayi-e, yi ngabhuka me koli Ebhe bha bini. A ndjindji naali. Osisiti bua ngabhuka bhadi moko. La di-e, u ngagukú ne tsulú.

<sup>20</sup> Yi ne ongingi! Yi akúnda me u suno pi yi me nabhuka inde li kulu kulu nde lie ade-e padhá-a? <sup>21</sup> Lele pi li ogbi ní Abalahama akolo nani lie ngbingbili bhú djila Ebhe-e? A ko nani li pápá na okulu gba ani-e di? Li nedhinga inde ani aha ndili gba e Isaka lie, ani atsia a'o ani li bili natsulu enu pi Ebhe-e? <sup>22</sup> Yi ngau me nabhuka, di ne okulu gba ani-e, adu nani adholo bhú dabili bini. Ka okulu gba ani-e, Ebhe atsia au me nabhuka gba ani-e abhele. <sup>23</sup> Abhomú-o, eli inde li Bhuku gba Ebhe-e apa e-e, atsia amene lie. A ko eli inde apa me: «Abalahama abhuka Ebhe. Kaka-a, Ebhe atsia au ani me, a ko ngbili kpála .†» Ebhe atsia a'i la di ani me olia ni. <sup>24</sup> Yi ngau me Ebhe ngaziba me kpála inde-e ngbingbili li pápá na okulu gba e-o. A ko bha bini ka nabhuka kpi e kpi de.

<sup>25</sup> A bhadi si maka Lahaba, òlò inde adu akúnda obhosi ngangá-o. Ebhe aziba nani me a ko kpála na ngbingbili ka okulu gba ani-o.

† 2:8 2:8 Tsia bhú Lev. 19:18. † 2:11 2:11 Tsia bhú Eki. 20:13, 14; di ne bhú Det. 5:17, 18. † 2:23 2:23 Tsia bhú Dje. 15:6.



Padhá de, anga ani asia nani okpála inde li omaɪsalaeele atima nani o agba e. Ani atsia amene la di me u gie lio li kpadji koko.

<sup>26</sup> A moko. Maka li ewo dɔ lie bhú kute de-e, amba kute bhomɔ-o kukuo, a bhadi moko, li nabhuka dɔ ne kulu bhú e de-e, amba nabhuka ango-o kukuo.

### 3

#### *Ní lila 'mi ní malila*

<sup>1</sup> Ondaise ma, bhelé na okpála bhú ká yi agíli nadɔ omɔsuno de. Padhá de, anga a ayo me yi mbíla ndjindji me Ebhe akódho 'ngú gba ní omɔsuno-o kpekpeke naali ané okpála koko mane. <sup>2</sup> Ndɔ ní hana ní ngati bhú ongú bhelé. I dɔ me kpála nde ti bhú engú inde ani ngagama e de-e, amba kpála ango-o abhele. Ani ti da nadɔ ne angu pí 'ndji kute e libhomu. <sup>3</sup> I dɔ me ní nde ato mboye kalase bhú 'bhø opunda ngabula me ní to bhúla uo li pápá inde ní ngakunda e, ní ti da namene di ne kute uo libhomu maka ní akunda lie. <sup>4</sup> Yi tsia nga ongbengbe zabɔ. A ngbengbengbe. Anvi na kpekpeke ngatɔtɔmba ngae. La-a, mboye 'he masudha inde ngalili bhúla 'ngbé zabɔ-o ngadjidji ngae. Li zabɔ-o tsia nú li pápá inde li kpála nadjedjele ngakunda e ko. <sup>5</sup> A bhadi moko pí emi. A ko mboye ehe masudha bhú kute. Engú bini, a ngabhi 'kpa e pí 'ka e li ongú na ngbengbengbe.

Yi tsia nga me ne mboye dhegu djua masudha, u ti da natsulu 'ngbé gbøndø na ngbéngbé! <sup>6</sup> Emi bhadi maka djua, a ko dabíli gba siti-o. A ko saka yá ní, a la di ngasiti kute ní libhomu. Djua na likabhu na dɔdɔma pí 'mi ní. 'Mi ní la di ngatsulu mukobho gba ní-e libhomu ne djua ango-o. <sup>7</sup> Kpála-kuti ne angu ngú na'o mboli li ndɔ djua oenɔ na bíli hana, abana oedhu, onɔ inde ngagbele lio ne 'bu o, abana osungu. Ani a'o la bhadi mboli li uo a'o. <sup>8</sup> Engú bini, kpála-kuti ne angu ade

ngú na'o mboli li 'mi e. Emi ne ehe na sisiti. A tili naali. A abedhe la di ne síli na bhølø kpála bhú e bedhe!

<sup>9</sup> Bha ne emi bini bhomɔ-o, ní ngadhøgø Ngámá inde 'Dyi ní-o. La bhadi ne emi bini bhomɔ-o, ní sosobho okpála inde li Ebhe abho o maka e makpe ko. <sup>10</sup> Oeli na dhøgø di ne oeli natɔ pødjø-o, a ngaze bha bhú koli ebhø bini. Ondaise ma, a ayo mo-o de. <sup>11</sup> Koli kpongu bini ti da nagbe engu na babadha, di ne engu na sɔsɔ de. <sup>12</sup> Ondaise ma, ndula na figi ti da nali lí ndula na olive uu? Ne me 'lá ndula na vino ti da nali lí ndula na figi uu? Kpongu na 'ngu ngɔtɔ ti da nagbe engu na babadha de.

#### *Imbilangu inde ayie abhúla*

<sup>13</sup> Kpála bhende na imbilangu, inde di akø mboli 'ngú bhú ká yi uu? A ayo me ani suno bhú dasundɔ gba e na babadha. Ani suno di bhú kulu inde ani ngamene e ne nakø lie ne kuto di ne imbilangu. <sup>14</sup> Engú bini, i dɔ me yi nde ne 'ngbé bua naali-e, di ne bua me o one okpála koko mane-e, yi 'o nabhi 'kpa yi pí 'ka yi ma'o. Yi asiti engú na kukulɔ-o ne eu gba yi-e de. <sup>15</sup> Ngua imbilangu bhomɔ-o yie abhúla de, a ko bhe na doto. A ko bhe na kute, a ko bhe gba kpála inde bhú e ne siti bua. <sup>16</sup> Padhá de, anga bíli inde li okpála nde lie ne 'ngbé bua-a, bíli u nde lie ne gumu nane okpála koko mane-e, oo-o, nadjø lio dú-ɔ de. A adú bha bini oo ne ondɔ 'ngú hana bhe na sisiti.

<sup>17</sup> Engú bini, imbilangu inde ayie abhúla-a, a nae kpi hana. La di-e, a ne guo 'ngú, a ne bua na bhøbhuku, di ne namanga kpála. A abedhe di ne nadjø ndjinga okpála koko, a ngazu obabadha nguwa. A ngau okpála koko ngbéngbé ane okoko mane ade, a la di ne kali bhú e ade. <sup>18</sup> Okpála bhende akunda guo 'ngú-o, maka okpála alulu 'dyi. Nguwa inde u alulu e, a ko guo 'ngú, a ngazu pí uo ngbili 'ngú.

## 4

*Mu kunda engu na doto-o, amba mu ne bhulu yala gba Ebhe*

<sup>1</sup> Okpekebhe di ne ogbele-e ngayie bhú ká yi su? A ngayie bhú osisiti gumu na ndu 'ngú ngangá inde ngagu gbele bhú kute yi-o. <sup>2</sup> Yi kukunda nasia ehe bini, engú bini, yi ti da nasisia de. Kaka-a, yi bedhe ngú nabhili okpála. Yi dudu ne gumu na sisiti ngú nasia ehe bini, engú bini, yi ti da nasisia de. Kaka-a, yi ngamene kpekebhe, yi la di ngagu gbele. Yi sisia ehe inde yi akukunda e de. Padhá de, anga yi yoyo ka Ebhe de. <sup>3</sup> Belegu yi ayoyo lie, yi sisia de anga yi yoyo maka ayo lie de. Yi yoyo bha bini ehe inde i ngangá li yi-o. <sup>4</sup> Ngayi obambakuya inde-e! Yi mbila de me nakunda engu na doto-o, a ko nandu bhulu yala gba Ebhe-e di? Kpála bhende akunda engu na doto-o, ani nga'o lie bhulu yala gba Ebhe. <sup>5</sup> A aye nani lie padhá de me: «Ebhe akunda bua gba e inde ani a'o nani e bhú ní-e naali.»\* <sup>6</sup> Engú bini, bádha bhú 'bu inde li Ebhe nde ne e pi ní-e, ane ne engbé. Kaka-a, u aye bhú Bhuku gba ani-e me:

«Ebhe ne bhulu yala gba okpála na 'ngbé 'ndji, engú bini, ani ne bádha bhú 'bu pi obhende ngakø lio ne kuto ko.†»

<sup>7</sup> Kaka-a, yi manga Ebhe. Yi holo bhú 'dhu yi ka Djabulu kpekpeke, amba ani kpe yi tsutsu. <sup>8</sup> Yi dyudyo liyi de Ebhe masakpe, amba ani dyudyo di lie de yi masakpe. Ngayi okpála na siti 'ngú, yi vulu 'kpa yi! Ngayi okpála li bua o agbolo ngangá-a, yi vulu bua yi! <sup>9</sup> Yi mbila ndjindji me yi bhú likabhu. Yi ku 'gbá, amba yi lopolo liyi. A ayo me ezo gba yi-e dji lie, a akolo egbá, amba djali gba yi-e dji lie, a akolo likabhu. <sup>10</sup> Yi kø liyi bhú djila Ngámá ne kuto, amba ani tsia 'e'e yi ne abhúlá.

\* **4:5** 4:5 Ebhe akunda bua gba e inde ani a'o nani e bhú ní-e naali: U ti da napa matá me: «Bua inde li Ebhe a'o e bhú ní-e abedhe ne osisiti gumu 'he.» † **4:6** 4:6 Tsia bhú Gbt. 3:34.

*Mo okódho 'ngú gba kpála koko de*

<sup>11</sup> Ondaise ma, yi adú apa siti 'ngú li yi sunda yi de. Kpála bhende ngapa siti 'ngú li ndai e, i du di-e nakodho 'ngú gba ani-e, ani ngapa siti 'ngú bhomu-o li líli gba Ebhe, di ne nakodho 'ngú tété. Bhú nedhinga bhomu-o, ani ngamene líli ade, ani mangbo ngakodho 'ngú tété. <sup>12</sup> La-a, Ebhe aha líli ngae makpe. Ani tí la bhadi da nakodho 'ngú tété ngae kpi e kpi. Ngaani kpi e kpi, ani tí da nakobho kpála, di ne na'o me kpála kpi. Ngamu-o, mu la naamu ne da, mu ngakodho 'ngú gba kpála koko lie?

*Yi adú ne 'ngbé 'ndji de*

<sup>13</sup> Yi dje nga ma mbia inde, ngayi okpála bhende ngapa me: «Naki, i du di-e mambi, ya anú bhú gudhu bhe. Ya así oo kalanga bini. Ya atsindji 'he, ya tsia sía falanga.» <sup>14</sup> La-a, yi mbila de me mukobho gba yi-e adú mambi pi-ie de! Padhá de, anga yi maka nguwa inde ngau lie ngabula nedhinga bedi, pipita-a, u u matá-a de ko! <sup>15</sup> A ayo mangbo me yi pa me: «† du me Ngámá nde akunda-a, ya adú bhú mukobho. Ya tsia méne engú inde, i du mo-o de-e, ya méne engú koko.» <sup>16</sup> Engú bini, mbia inde-e, yi ne okpála na 'ngbé 'ndji. Yi la di ngabhi 'kpa yi pí 'ka yi. Ndu ngua ongbengbe 'ndji bhomu-o hana sisiti. <sup>17</sup> Kaka-a, li kpála mbila namene bádha 'ngú-o, engú bini, ani mene la bádha 'ngú ango-o de-e, amba ani amene siti 'ngú.

## 5

*Ngayi obhulu tia-a, yi ku 'gbá*

<sup>1</sup> Ngayi obhulu tia-a, yi dje nga ma mbia inde! Yi ku 'gbá, amba yi tu di 'ue ka olikabhu inde akólo li kute yi ko! <sup>2</sup> Tia gba yi-e azi. Okokó azu la di obongo gba yi-e azu.

<sup>3</sup> Olo gba yi, la di ne aladja gba yi-e agba mbelende. Mbelende ango-o a'ó 'ngú pí yi ngae. Mbelende azú la di kúte yi maka djua. Yi apo ibili bhúla tia gba yi-e mbia inde-e ali sokpí! <sup>4</sup> Yi ayala naha tia pí okpála na kulu inde ngamene kulu bhú 'dyi gba yi-o. Kaka-a, u ngalopolo lio. La di-e, Ngámá na abhúlá, Angbamili adje nalopolo lie gba uo-o adje. <sup>5</sup> Píla doto-o, yi adu bhú ká tia, yi atsia adu akobho ndjindji naali. Yi akolo ne tsikpa maka oenu inde akolo ne tsikpa ngubula ekpí inde u abhéle uo lie ko. <sup>6</sup> Yi a'o mangimbo pí kpála na ngbingbili-o. Yi atsia abhéle la di ani. La-a, ani lu kala yi ne gbele de.

*Yi du ne 'ndjá bua, anga Ngámá ngago*

<sup>7</sup> Kaka-a, ondaise ma, yi du ne 'ndjá bua akólo bha bini li 'kpí inde li Ngámá agó lie ko. Yi tsia nga kpála inde ngalu 'dyi-o. Ani ngadjeke nguwa inde ane ne bádha-a ne 'ndjá bua. Ani ngadjeke bhadi nedhinga inde li ebha na kalanu, di ne bhende na soso-o adhi lie-o. <sup>8</sup> Ngayi di-e, yi du ne 'ndjá bua. Yi du ne masi. Padhá de, anga nago gba Ngámá-a akolo masikpe. <sup>9</sup> Ondaise ma, yi apá siti 'ngú li yi sánda yi de, amba u akódho 'ngú gba yi-e de. Padhá de, anga kpála nakodho 'ngú-o alu li obhehoti. <sup>10</sup> Ondaise ma, opolofeta inde akpokpo nani 'ngú ne 'li Ngámá-a, abi nani likabhu ne 'ndjá bua. Yi kpata engú inde u amene e-o. <sup>11</sup> Ní ngapa me okpála bhomu-o, a ko okpála na djali. Padhá de, anga u adu bhú likabhu ne kpéke bua. Yi adje maka li Djobe abi nani likabhu lie ne kpéke bua-o. Yi atsia au la di ehe inde li Ngámá aha e pí ani ali soso-o. Padhá de, anga Ngámá abedhe ne ndjinga, la di ne bua na babadha.

<sup>12</sup> A ane la mane ondaise ma, yi atú silika de. Yi atú silika ne 'li kokpí de. Yi atú silika ne 'li doto de. Yi atú di silika ne 'li 'he koko belegu de bini. I du me a nde mo-o, yi de

pa bha me: «A moko.» I du la di me a nde mo-o ade-e, yi de pa bha me: «A mo-o ade», ngubula me yi asia mangimbo ka Ebhe de.

*Nayo gba kpála na ngbingbili-e, a ne angu naali*

<sup>13</sup> Bhú ká yi-e, kpála bini bhú likabhu uu? A ayo me ani yo Ebhe. Bhú ká yi-e, kpála bini ne djali uu? A ayo me ani dhogò Ngámá bhú oetsi. <sup>14</sup> A li kpála bini bhú ká yi ne kuo uu? A ayo me ani 'li obhelesi okpála na Piga gba Ebhe. U yo Ebhe ngubula ani, amba u tuko la di emu pí 'ndji ani ne 'li Ngámá. <sup>15</sup> I du me u nde ayo bhú dabili bini ne nabhuka-a, li nayo ango-o kóbho kpála na kuo-o, li Ngámá 'é ani bhúlá. I du me ani nde amene siti 'ngú-o, li Ebhe tsia 'é siti 'ngú ango-o. <sup>16</sup> Kaka-a, yi mbamba ta osisiti 'ngú gba yi-e sánda yi. Yi yo Ebhe ngú yi sánda yi, amba okuo gba yi-e yie. Nayo gba kpála na ngbingbili-e, a ne angu naali. <sup>17</sup> Eliya nani ne kpála-kuti maka ní. Ani ayo nani Ebhe ne bua e hana ngubula me ebha adhi de. Ebha tu píla doto belegu de bini, ngubula kalanga bata ne epe madhia. <sup>18</sup> Pipita-a, ani ayo matá Ebhe. Abhomu-o, ekpí atse 'kpa li ebha kuto, doto atsia aholo di nazu nguwa gba e-o.

*Yi gie kpála inde a'o ká ngbili kpadji-e li kpadji na kukulu*

<sup>19</sup> Ondaise ma, kpála bini bhú ká yi ti da na'o ká ngbili kpadji. Pipita-a, li kpála koko tsia gie matá ani li kpadji na kukulu. <sup>20</sup> Yi mbila ndjindji me kpála inde agie kpála bini na siti 'ngú, inde a'o ká ngbili kpadji li kpadji na kukulu-o, ani akóbho bua kpála bhomu-o bhú kuo, ani tsia méne me u mbu li bhiti osisiti 'ngú gba kpála bhomu-o.

## Balua na bini gba Piele Eli na kalanu

Piele aye nani balua na bini gba e pi omakilisito inde u a'i o li bili inde me okpala inde nani li Ebhe abhu o. Okpala ang-o atsambala nani bhú Adji Minele, ali pápá na abebe. Engú na ngbéngbé inde bhú balua inde-e, a ko nato masi bhú okpala inde ngatanga. Padhá de, anga u adu nani ato mbolo li uo, kabula nabhuka gba o-o. Ani aye balua ang-o ngubula naha Bádha Ngali gba Yesu Kilisito pi uo, inde nakpi, ne nazuku gba e ngaha pi okpala na'o 'to o 'to engú inde ani apa me ni améne e nedhinga nago ka ni ko. Nau ongú bhomu-o, uo ne kpadji koko ade, a ayo bha me u ziba nakibila olikabhu ne nambila ndjindji me, a ko nale inde u ngale uo ne e bhú nabhuka gba uo na kukulu-o. A ko la di me, u asía makalá li 'kpí inde li Yesu Kilisito ago lie (1:7).

Bhú nato masi inde li Piele ato e bhú okpala bhú nedhinga na likabhu-o, ani aha di líli pi okpala inde ngatanga balua inde me: u kobho maka okpala gba Kilisito.

### **Ongbengbe ongú inde bhú bhuku inde-e ngae inde:**

Eli na kalanu 1:1-2

Nagama matá 'ngú ne toto pindji mukobho inde li Ebhe ngaha e 1:3-12

Líli pindji mukobho na bubu 1:13 - 2:10

Ongú inde a ayo me makilisito mene e bhú nedhinga na likabhu 2:11 - 4:19

Namene kulu ne nakø li o ne kuto ka makilisito 5:1-11

Eli na soso 5:12-14

*Piele yi omabhuka inde agbong-bolo ne bili-e mayi*

<sup>1</sup> Ma aye balua inde-e pi yi ngama Piele, ma ne bhulu titima gba Yesu-Kilisito . Ma aye pi yi okpala inde li Ebhe abhu o, ngayi okpala inde ngadu maka ogandji okpala bhú kuti koko, ngayi inde atsambala bhú ondu doto na Pote, ne Galatia, ne Kapadose, ne Adjia di ne Bitinia-o. <sup>2</sup> Ebhe 'Dyi ní abhu nani yi bhutode maka ani aleke nani engú ang-o-o lie-o. Ani alo yi li kpadji gba Bu Bhobua , ani a'o yi kpi ngú nadu piga gba e, ngubula me yi du namanga Yesu Kilisito, amba ngute ani vala yi ngú nadu bubu kala ni. A ayo me bádha bhú 'bu gba Ebhe-e du ne yi, amba ani ha di guo 'ngú pi yi ane mane.

*Piele adhøge Ebhe, anga ani akóbho omabhuka makobho*

<sup>3</sup> A ayo me ní dhøge Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pi ní bedhe, ani atsia aha mukobho na mbia pi ní bhú nazuku Yesu Kilisito bhú ká okpala inde amu-o. Kaka-a, ní abhele djila ní li ani me ní azúku di mazuku. <sup>4</sup> Ní ti la di da na'o 'to ní 'to tia inde li Ebhe awo e pi ní opiga gba e-o. Ani awo tia ang-o-o pi ní abhúlá. Tia ang-o-o zizi de, a sisiti de, a pádha la di-i de. <sup>5</sup> Nganí okpala inde abhuka Ebhe-e, ani ngalila ní ne angu gba e, ngubula me ní sia mukobho na duduma ang-o-o. Mukobho ang-o-o asúno lie li sokpi.

<sup>6</sup> Ka ongú ang-o-o, yi kpi djali, abana ayo lie me yi zu olikabhu mbia inde-e li okpadji ngangá ngú nedhinga bedi-o. <sup>7</sup> Belegu olo inde asisiti masiti-e, okpala tsutsulu ngaiza bhú djua ngú naleleke me a kolo ndjindji. A si la masi maka nabhuka gba yi-e ane olo lie mane-e? Yi ngazu olikabhu bhomu-o ngubula me okpala mbila me a li nabhuka gba yi-e ne tata. A bhadi moko ne nabhuka gba yi-o. Ebhe améne mo-o ngú namene me, kabula nabhuka gba yi-e, ani toko yi, ani dhøge di yi, ani mene di me 'li yi kolo ngbéngbé

li 'kpí li Yesu Kilisito asúno lie lie bhú sangu gba e-o. <sup>8</sup> Belegu yi u ani lie de-e, yi ne mukunda pi ani. Abana yi nde lie ngau ani ade-e, yi ngabhuka ani. Kaka-a, yi ngakpi djali naali, djali inde li kpála ti da nakpokpo lele e de, <sup>9</sup> anga yi asia makalá na nabhuka gba yi-e masia. Makalá ang-o, a ko li bua yi akóbho lie-o.

<sup>10</sup> Nani kalanu-o, opolofeta agili má bhotobhoto me o mbila kpadji li Ebhe akóbho okpála lie-o. U adu akpokpo 'ngú kalanu pi okpála pindji bádha bhú 'bu inde li Ebhe a'o nani e pi yi-o. <sup>11</sup> Bua gba Kilisito inde adu bhú uo-o apa pi uo kalanu me, Kilisito azú likabhu. Pipita-a, ani tsia sía sangu gba Ebhe-o. Opolofeta ang-o agili nambila me ongu bhomu-o akódho 'kpí nadho. U atsia agili di nambila me a adú lele pi. <sup>12</sup> Ebhe atsia asuno pi opolofeta bhomu-o me ongu ang-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo Bádha Ngali-e, akpokpo ongu bhomu-o pi yi akpokpo. U akpokpo pi yi ne angu gba Bu Bhobua inde li Ebhe atima e-o. Belegu oandjelu, u akunda nau ongu ang-o.

*Piele apa pi omabhuka me u du bubu kala Ebhe*

<sup>13</sup> Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde li Ebhe ahá e pi yi li 'kpí li Yesu Kilisito asúno lie lie bhú sangu gba e-o. <sup>14</sup> Yi manga Ebhe maka ongisi na babadha. Yi akpáta matá kpadji na sisiti inde nani yi adu nakpata e kala me yi nde mbila Yesu Kilisito de-e de. <sup>15</sup> Engú bini, yi du bubu bhú mukobho gba yi-e libhomu, maka li Ebhe inde a'i yi-e nde lie bubu-o. <sup>16</sup> Padhá de, anga u aye bhú Bhuku

gba Ebhe-e me: «Yi du bubu, anga ma bubu.†»

<sup>17</sup> Nedhinga yi ngayo Ebhe lie, yi nga'i ani me «'Dyi ní». Padhá de, anga ani ngakodho 'ngú gba okpála nakpata lele kulu gba kpála ne kpála. Ani tsia la di bhúla kpála bini de. Kaka-a, nedhinga yi nde nga bha lie píla doto-o, yi manga ani bhú ndu 'ngú hana inde yi ngamene e-o. <sup>18</sup> Yi mbila ndjindji maka li Ebhe agbegbe yi lie li kpadji ndu ongu hana na padhá padhá inde li odyi yi apana e pi yi-o. Ebhe kala yi ne ehe inde ngasiti masiti maka aladja, i du di-e olo de. <sup>19</sup> Engú bini, ani akala yi ne ngate Kilisito inde ane ndu 'he hana-o. Kilisito maka ndili kandole inde aha mukobho gba e, u atsia abhelo e-o. Ani bubu kala Ebhe, ehe na sisiti bhú ani belegu ade bini. <sup>20</sup> Ebhe abhu nani ani ngú nakpi li 'ngú gba okpála kala me ani bho doto, la mbia inde-e, ani atsia asuno ani bhú onedhinga na soso inde-e mbámabá ngabula me ani kobho yi. <sup>21</sup> Kabula Kilisito-o, yi abhuka Ebhe inde azuku ani bhú ká okpála inde amu-o, ani atsia aha sangu pi ani. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to ani.

<sup>22</sup> Yi avulu bua yi avulu ngú nandu ne mukunda na kukulu sunda yi. Yi avulu bua yi ang-o li kpadji nakpata ongu na kukulu inde li Ebhe asuno e pi yi-o. Ka 'ngú ang-o, ma apa pi yi me, yi du ndu 'kpí hana ne mukunda na kukulu sunda yi di ne bádha bua. <sup>23</sup> Yi mbila ndjindji me Ebhe aha mukobho na mbia pi yi li kpadji na eli gba e na duduma, inde di ngaha mukobho pi okpálo. Ebhe inde i kpikpi de-e aha mukobho ang-o pi yi ngae makpe. Yi sia mukobho ang-o ka odyi yi inde amú mamu-o de. <sup>24</sup> Padhá de, anga u aye bhú Bhuku gba Ebhe-e me:

«Ndu okpála hana ngamu maka ulu a'u'ulu lie-o.

† 1:16 1:16 Tsia bhú Lev. 19:2.

Bádha gba kpála-kuti ngandjia  
maka bádha gba felele and-  
jindjia lie,  
i du me a nde anuku-o.

<sup>25</sup> Engú bini, eli gba Ngámá-a  
ngadu duduma ne duduma.†»  
Eli ango-o, a ko Bádha Ngali inde u  
akpokpo e pi yi-o.

## 2

*Piele apa me omabhuka du maka  
teme na mukobho*

<sup>1</sup> Yi bala ndu sisiti 'ngú hana kab-  
ula mukobho na mbia inde li Ebhe  
aha e pi yi-o. Yi apite kpála bini de,  
yi adú amene engú na kali de, yi adú  
ne gumu 'he gba kpála de, yi adú  
di apa 'ngú li okpála koko sisiti de.  
<sup>2</sup> Yi du maka ongisi u azu o na mbia,  
inde ndu 'kpi hana ne gumu nandji  
'ka. Yi du bhadi ne gumu Eli gba  
Ebhe-e moko ngubula me yi bhele,  
akólo li ekpi li Ebhe akóbho yi lie  
libhomu-o. <sup>3</sup> Yi du bha ne gumu eli  
ango-o na paká paká, anga yi ambila  
bádha 'ngú inde li Ngámá ngaha e li  
bua yi ambila.

<sup>4</sup> Yi dyudyo liyi de Ngámá Yesu  
Kilisito masakpe, a ko teme na  
mukobho, inde li okpála abhike nani  
e ne 'ili me a li kulu ade-o. La-a,  
bhú djila Ebhe inde alo nani teme  
ango-o, ani atsia au me a li kulu  
ane ndu oteme koko hana. <sup>5</sup> Ngayi  
makpe-e di-e, yi du maka teme inde  
na mukobho, amba Ebhe ha yi, ani  
tsia yiki eti gba Bu Bhobua ne yi  
maka 'ngbé 'ti Ebhe gba omaYuda-  
o. Bhú 'ti ango-o, yi akólo piga  
gba odimandé inde aha lio pi Ebhe,  
ngubula naha makiso na Bu Bhobua,  
inde ndjindji pi Ebhe li kpadji gba  
Yesu Kilisito. <sup>6</sup> Padhá de, anga u aye  
bhú Bhuku gba Ebhe-e me:

«Yi gbo nga 'dje yi, ma alo teme bini  
na masé,  
ma a'ó bhú gudhu na Siona  
maka teme inde abi eti-e libhomu.  
Kpála inde aziba teme ango-o  
sia numu belegu de bini.†»

<sup>7</sup> Pi yi okpála inde abhuka-a, teme  
ango-o pi yi li kulu ane ndu oteme  
koko hana. Engú bini, pi okpála  
bhende i bhuka de-e, a mo-o ade.  
Padhá de, anga u aye bhú Bhuku gba  
Ebhe-e me:

«Teme inde li okpála nayiki eti-e  
abhike e-e,  
akolo teme inde abi eti-e lib-  
homu ngae.†»

<sup>8</sup> U aye matá di bhú Bhuku gba Ebhe-  
e me:

«Okpála ngado 'dhu o li teme ango-  
o,

i tsia méne me u gu 'i o kuto.†»  
U ngado 'dhu o tété, anga u ayala  
nakpata 'li Ebhe, Ebhe apa nani  
bhutode me a méne lie mo-o.

<sup>9</sup> La pi yi-e, yi ne piga inde li Ebhe  
abhú o-o. Yi ne piga gba odimandé  
inde ngamene kulu pi 'ngbé Ngámá  
Ebhe. Yi ne piga okpála inde li Ebhe  
a'o o kpi pi e. Ani abhu yi ngubula  
me yi kpokpo ongbengbe 'ngú inde  
ni amene e pi okpála. Ani a 'i yi me  
yi ze bhú biti, amba yi go li zi 'ke gba  
ni inde ngatsi ane ndu 'he hana-o.

<sup>10</sup> Nani kalanu-o, yi du ne okpála gba  
Ebhe de, engú bini mbia inde-e, yi  
akolo okpála gba ani. Nani kalanu-  
o, yi sia ndjinga gba Ebhe-e de, engú  
bini mbia inde-e, yi asia ndjinga gba  
ani asia.

*Piele aha líli pi omabhuka pindji  
lele namanga lio, di ne namanga  
Ebhe*

<sup>11</sup> Ondaise ma na mukunda, yi  
mbila ndjindji me yi píla doto ei ne  
ogomago. Kuti gba yi-e píla doto  
inde-e ade. Kaka-a, ma ayo ka yi me,  
yi adú améne osisiti 'ngú li gumu e  
nde li bua yi-e de, anga ongu bhomu-  
o ngazu bili li bhobua yi ngae. <sup>12</sup> Yi  
mene ehe liyi bhú ká omupagano  
ndjindji ngubula me, abana u du apa  
'ngú li yi sisiti-e, u de u obabadha  
'ngú inde yi ngamene e-o, amba ekpi  
li Ebhe asúno lie pi uo lie, u de  
dhogé ani.

† 1:25 1:25 Tsia bhú Isa. 40:6-8. † 2:6 2:6 Tsia bhú Isa. 28:16. † 2:7 2:7 Tsia bhú Ets. 118:22.

† 2:8 2:8 Tsia bhú Isa. 8:14.

13 Yi kɛ liyi ne kuto kala ndu okpála hana inde ngau píla doto, kabula Ngámá gba ní Yesu Kilisito inde yi ngakpata nganda e-o. Yi kɛ liyi ne kuto kala ongbengbe ongámási na doto inde ngau pí ndu okpála hana-o. 14 Yi kɛ liyi ne kuto kala oguvelenele inde li 'ngbé ngámá a'o o-o. Aní a'o uo ngubula me u mene okpála inde ngamene siti 'ngú-o kpekpeke, di ne me u dhogè obhende ngamene bádha 'ngú-o. 15 Padhá de, anga Ebhe akúnda me yi gbite 'bhè ngingi 'ngú gba okpála inde ayala nambila Ebhe-e ne namene bádha 'ngú. 16 Yi mene ehe liyi maka okpála inde bhú bali ade. Engú bini, yi apá de me, o nde lie bhú bali ade-e, o mene siti 'ngú bhú gandji-e de. Yi mene mangbo liyi maka obalise gba Ebhe. 17 Yi manga ndu okpála hana. Yi du ne mukúnda pí ondaise yi bhú 'bu nabhuka . Yi manga ongbengbe ongámási mamanga. Yi dhogè Ebhe.

18 Ngayi obalise-e, yi kɛ liyi kala omakulasi yi ne kuto. Yi manga uo ndjindji. Yi amánga bha bini obhende na bhuku 'ngú-o de, inde ngamene yi ndjindji-e de, yi manga di obhende ngamene yi sisiti-o. 19 Padhá de, anga Ebhe ngasuno bádha bhú 'bu pí kpála inde ngazu líkabhu sakpa okpála koko padhá me aní nde mene siti 'ngú de, lí aní tsia kíbila líkabhu ango-o kabula 'li Ebhe. 20 Yi du azu bhikpa ka siti 'ngú yi amene e, a dhogè yi tété da? Engú bini, i du me yi nde ngazu líkabhu sakpa okpála koko kabula bádha 'ngú inde yi amene e, lí yi kíbila líkabhu ango-o, a ko bádha 'ngú bhú djila Ebhe. 21 Aní a'i yi me yi mene moko, anga Kilisito azu bhadi líkabhu pí yi moko. Aní apana kpadji pí yi, amba yi mene bhadi maka ní.

22 Ngaani-e, aní mene siti 'ngú de.

Aní pa eu belegu de bini.†

† 2:22 2:22 Tsia bhú Isa. 53:9.

23 Li okpála asobho aní lie, aní gie sobho pí uo de.

Abana u ato mbolo lí aní lie, aní gu okpála ango-o de.

Aní a'o mangbo lie sakpa Ebhe inde ngakodho 'ngú ngbingbili-o.

24 Aní abha sisiti 'ngú gba ní-e, aní atsia abí lí kúte e.

Aní abí siti 'ngú ango-o nedhinga u abhèlè aní lie lí kulusi ngubula me,

ní du maka okpála inde amu lí pápá na siti 'ngú amu,

di ne me ní du mangbo bhú mukobho inde ngbingbili.

Yi akobho ka oeka lí aní abí e-o.

25 Padhá de, anga yi du nani maka okandèlè inde angita.

Engú bini, mbia inde-e, yi agie liyi agba mulila, inde ngalila bua yi-o.

### 3

*Lele dasundu sunda olisi ne obhosi*

1 Ma ngapa di pí yi olisi moko, yi kɛ liyi kala obhosi gba yi-e ne kuto da napa me abana lí bini bini bhú ká uo bhuka 'li Ebhe de-e, u de dji bua o ka nau lele mukobho gba yi, abana yi pa 'ngú pí uo píndji eli gba Ebhe-e de-e, 2 u de bhuka kabula nau me lele dasundu gba yi-e ndjindji, yi la di ngamanga uo. 3 Yi adú bha bini aleke kúte yi akilidjo de, abana i du bhú napulu sundjo yi, abana i du nadyi omagege na olo, abana i du di-e bhú nadyi obongo bhe na mase naali. 4 Engú bini, yi leke mangbo liyi bhú naleke bua yi. Yi kɛ liyi ne kuto, yi du di ne guo 'ngú . Padhá de, anga a bhomu-o bádha bhe i zizi de-o, a nganga lí Ebhe naali. 5 Olisi na kalanu inde adu akpata Ebhe-e, inde adu di na'o 'to o 'to aní-e, adu nani aleke lío ne ngua bádha kulu bhomu. U adu la di namene líli gba obhosi gba o-o. 6 Yi bhundja nga píndji Sala. Aní adu amene nani líli

gba 'ko e Abalahama ndjindji. Ani adu a'i ani me ngamá gba ni. Yi ne ongisi na olisilisi gba Sala na paká paká, i du me yi nde ngamene bádha 'ngú, yi nde 'o la di de me tsulu ha angu yi de-o.

<sup>7</sup> A bhadi moko pi yi obhosi, a ayo me dasundu gba yi ne olisi gba yi-e du ndjindji. Yi mbila ndjindji me uo bhuhuku ane yi. Yi manga uo mamanga, anga mukobho inde li Ebhe ahá e pi yi bhú bádha bhú 'bu gba e-e, ani ahá pi ndu yi ne uo hana. Yi mene mo-o, ehe bini ní kpadji kala mayo gba yi-e de.

### *Lele dasundu gba omabhuka*

<sup>8</sup> Ngú nabu tata-a, yi du ndu yi hana ne bua bini, yi du amene bádha 'ngú li yi sunda yi, yi du ne mukunda sunda yi maka ondaise . Yi du ne ndjinga sunda yi, yi ko la di liyi sunda yi ne kuto. <sup>9</sup> Yi agie siti pi siti de, i du di-e sobho pi sobho de. Li kpála sobho yi-e, yi agie sobho pi ani de, engú bini, yi yo mangbo Ebhe me ani tuko bisagu pi ani. Padhá de, anga nedhinga li Ebhe a'i yi lie me yi du piga gba ni-e, ani apa nani pi yi me ni atúko bisagu pi yi. <sup>10</sup> A maka u aye lie bhú Bhuku gba Ebhe-e me:

«Li kpála kunda me mukobho gba ni-e du ndjindji-e,  
ani kunda la di me ni du bhú djali-e,  
a ayo de me ani du apa siti 'ngú-o de,  
a ayo la di de me ani du apa eu-o de.

<sup>11</sup> A ayo me ani dji 'ngbu e li siti 'ngú, ani mene mangbo bádha 'ngú. Ani gili guo 'ngú ne kekele hana.

<sup>12</sup> Padhá de, anga Ngámá ne djila e li okpála inde ngamene ngbili 'ngú , ani bedhe ngú nadje mayo gba uo.

Engú bini, ani ngadji 'ngbu e li okpála bhende ngamene osisiti 'ngú-o.†»

### *Piele apa me omabhuka kibila likabhu me u nde ngamene bádha 'ngú*

<sup>13</sup> I du me yi nde nga'o bua yi hana li namene bádha 'ngú-o, a ko da inde améne yi sisiti-e? <sup>14</sup> Yi du ne djali nedhinga yi ngazu likabhu lie ka bádha 'ngú inde yi ngamene e-o. Ka 'ngú ango-o, yi adú ne tsulu okpála inde ngakunda namene yi sisiti-e de, bua yi abáka di-i de. <sup>15</sup> Yi dhogə mangbo Kilisito li bua yi maka Ngámá gba yi. Yi du bedhe ndu 'kpi hana ngú nakpokpo 'ta yi nga'o 'to yi lie 'to Kilisito pi okpála bhende ngayi yi tété-o. <sup>16</sup> Engú bini, yi kpokpo ne bhuku bua, amba yi manga la di uo mamanga. Yi mene ndu 'kpi hana engú inde yi au e li bua yi me a ndjindji-o, amba okpála bhende ngapa 'ngú li yi sisiti-e, sia numu nedhinga u ngasobho bádha kulu yi ngamene e kabula 'li Kilisito lie-o. <sup>17</sup> Padhá de, anga yi sia likabhu ka siti 'ngú inde yi ngamene e, engú tété ade. La-a, yi sia likabhu kabula bádha 'ngú inde yi ngamene e, i du me Ebhe nde aziba mo-o, bhobhomu-o ane ne bádha ngae.

<sup>18</sup> Padhá de, anga Kilisito adje di likabhu kabula siti 'ngú gba ní-e bhutsibhutsi bini má ngbi! Ngaani kpála inde i mene siti 'ngú de-e, ani akpi ngubula nakobho ní okpála inde ngamene siti 'ngú-o, ngubula me ani mba bhúla ní agba Ebhe. Okpála abhelo ani bhú kute, engú bini Ebhe atsia azuku ani li kpadji gba Bu Bhobua .

<sup>19</sup> Ka angu gba Bu Bhobua bhomu-o, ani atsia anu belegu di nakpokpo Bádha Ngali gba Ebhe-e pi obua inde amu inde bhú tikpu-o. <sup>20</sup> A ko bua okpála inde ayala nani nadi bua o nedhinga li Nua adu abho 'ngbé zabu lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u du bhelé de. A adu bha nani okpála madjina

† 3:12 3:10-12 Tsia bhú Ets. 34:13-17.



padhá inde a'ụ'ụ nani bhú zabụ-o. <sup>21</sup> Engu bhomụ-o, a ko kulu batisimo. Ebhe ngakobho yi mbia inde-e li kpadji na batisimo bhomụ. Batisimo ango-o ngubula na'e zibotu na kute ade, engú bini, a ngubula naha lio libhomu pi Ebhe ne bua nambila ngbili 'ngú. Ebhe ngakobho yi li kpadji na batisimo ango-o ka li Yesu Kilisito azuku lie-o. <sup>22</sup> Aní atapa abhúlá, aní adu de Ebhe li pápá na kokpa. Aní ngau pí 'ndji oandjelu di ne pí 'ndji ndu obua hana inde ne angu abhúlá oo-o.

#### 4

*A ayo me omabhuka mene engú li lele mukobho na mbia*

<sup>1</sup> Ní mbila ndjindji me Kilisito adje likabhu bhú kute. Kaka-a, ngayi di-e, yi du bedhe ngú likabhu maka aní. Padhá de, anga kpála inde adje likabhu bhú kute-e, a'o namene siti 'ngú a'o. <sup>2</sup> Nayie pi mbia inde-e, nedhinga hana inde yi améne e píla doto-o, a ayo me yi mene bhú mukobho gba yi-e engú inde li Ebhe akunda e-o. Yi améne engú na sisiti inde li bua yi ngakunda e de. <sup>3</sup> Padhá de, anga yi abala nako nedhinga gba yi-e bhelé bhú namene engú li omupagano amemene e-o. Yi améne matá mo-o de. Yi adu nani akunda olisi di ne obhosi ngangá, gumu kute aha di nani angu yi maha. Yi adu abhelo kuo yi ne pandi, yi adu apo bhúla yi ngú nandji pandi, yi adu adho 'bi na sisiti. Yi adu di amene engú inde ayo la ndju nako de me yi mene e de-o, anga yi adu adhogè oebhe na eu.

<sup>4</sup> La mbia inde-e, omupagano ngangamba, u la di ngasobho yi, anga yi kè matá nganda uo bhú siti 'ngú inde u ngamene e na mugwe mugwe-e de. <sup>5</sup> Engú bini, ekpí akólo makolo. Li 'kpí ango-o, u akpókpo 'ngú gba o-o kala Ebhe inde bedhe ngú nakodho 'ngú gba okpála inde ụ, di ne okpála bhende amu-o. <sup>6</sup> Ka 'ngú ango-o, Kilisito anu nani belegu

nakpokpo Bádha Ngali pi okpála inde amu-o. Aní akpokpo pi uo ngubula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata lele maka u adu nani lie píla doto, amba u du bhú mukobho maka Ebhe li kpadji gba Bu Bhobua .

*Piele apa me omabhuka mene kulu ne makalá u asia e ka Ebhe-o*

<sup>7</sup> Sokpí akolo masikpe. Kaka-a, yi du ne bádha mabhundja, yi bhulu djila yi, amba yi du nayo Ebhe. <sup>8</sup> Kala ndu 'ngú hana-a, yi du ne mukunda na paká paká sunda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. <sup>9</sup> Yi sia okpála inde ngago agba yi-e ndjindji. Yi asia uo ne nadi mutokono de. <sup>10</sup> A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi dú maka obabadha okpála inde ambila namene kulu ne makalá li Ebhe aha e pi yi kpi kpi kpi-o. <sup>11</sup> A ayo me kpála inde asia makalá nagama 'ngú-o, kpokpo oeli gba Ebhe-o . A ayo me kpála inde asia makalá namene kulu pi okpála koko-o, mene ne angu li Ebhe aha e pi aní-e hana, amba bhú ndu 'ngú hana-a, okpála dhogè Ebhe ka Yesu Kilisito. Padhá de, anga ndu okpála hana ngadhogè Ebhe, ndu angu hana sakpa aní duduma ne duduma. A adu moko!

*Piele apa me omabhuka kibila likabhu ka 'li Kilisito*

<sup>12</sup> Ondaise ma na mukunda, yi angamba ka okpekpeke da 'ngú yi ngali bhú e de. Ongú bhomu-o ngakolo li yi ngubula nambila lele nabhuka gba yi-e nde lie-o. Yi abhúndja de me a ko ongu koko kpi-e de. <sup>13</sup> Engú bini, yi kpi djali, anga yi ngabi bhomu-o té likabhu inde li Kilisito adje e, amba li 'kpí aní asúno sangu gba e lie pi ndu okpála hana-a, yi de bedhe di ne djali na kuo

kuo. <sup>14</sup> Yi ðu ne djali nedhinga li okpála nde ngasobho yi lie kabula 'li Kilisito-o. Padhá de, anga Bua na asasaua gba Ebhe-e ngadũ bhú dabili bini ne yi. <sup>15</sup> I ðu me sũka yi nde ngazũ likabhu-o, adũ de me ani amene siti 'ngũ-o de. A ayo di de me ani zũ likabhu anga ani abhẽle kpála de, ne me ani azi 'he-e de, i ðu di-e me ani ali bhú 'ngũ gba kpála koko-o de. <sup>16</sup> Engũ bini, i ðu me kpála nde ngadje likabhu anga a ko makilisito-o, a ayo de me ani dje numũ tété-e de. Ani gie mangbo heni pi Ebhe, anga a ko kpála ka Kilisito.

<sup>17</sup> Nedhinga akolo, nedhinga inde li Ebhe akódho 'ngũ gba okpála lie-o. Yi mbila la me, ani akpó lita nakodho 'ngũ ang-o li okpála gba e makpe. I ðu la mo-o, bhende gba okpála inde ngayala naziba Bádha Ngali gba Ebhe-e adũ la ibili naae lele pi? <sup>18</sup> U aye bhú Bhuku gba Ebhe-e me:

«I ðu me da nakobho ka okpála inde ngbingbili-e nde kpekpeke-e, engũ bhe gba okpála inde ngayala Ebhe, inde la di ngamene siti 'ngũ-o,

adũ la ibili lele pi?†»

<sup>19</sup> Kaka-a, okpála bhende ngadje likabhu anga Ebhe aziba mo-o, nu ne namene bádha 'ngũ ne kalanũ. U 'o la di lio makpe sakpa kpála inde abho ní, inde amemene 'ngũ maka ani apa lie-o.

## 5

### *A ayo nalila okandẽle gba Ebhe-e malila*

<sup>1</sup> Ma ngagama 'ngũ mbia inde-e pi okpála bhende bhú ká yi ne obhelesi okpála na Piga gba Ebhe-o . Ma di ne bhele kpála na Dadjua gba Ebhe maka uo. Ma au likabhu li Kilisito azũ e ne djila ma. Ma asía la di té sangu gba Kilisito inde li Ebhe asúno e pi ní-o. Kaka-a, ma ngayo ka yi me: <sup>2</sup> yi lila okpála inde li Ebhe

a'o o sakpa yi-e malila. Yi lila uo maka li kpála nalila okandẽle alilila okandẽle gba e lie-o. Yi alíla uo ka napa de me u agbite yi tété ne kpéke-e de. Engũ bini, yi lila uo ne bádha bua maka li Ebhe akũnda lie-o. Yi améne kulu ngũbula nasia tia de, engũ bini yi mene me yi nde abedhe ne makũnda bedhe. <sup>3</sup> Yi alíla okpála li Ebhe a'o o sakpa yi-e de me yi nde ako angu yi pi uo mako-o de. Engũ bini, yi mene me okpála kpata lele dasũdu gba yi-o. <sup>4</sup> Li yi mene mo-o, ekpi li Yesu Kilisito inde ngalila ní-e agó lie-e, yi sía makalá na sangu ka ani. Makalá ang-o ngadũ dũdũma ne dũdũma.

### *Yi kẽ liyi kala Ebhe ne kuto*

<sup>5</sup> A bhadi moko pi yi omakombise, yi kẽ liyi ne kuto kala obhelesi okpála gba yi-o. Ma ngapa pi ndũ yi omabhuka hana me, yi kẽ liyi ne kuto sũnda yi. Yi teteke liyi sũnda yi, padhá de, anga u aye bhú Bhuku gba Ebhe-e me:

«Ebhe ngadji 'ngbũ e li obhũũ 'ngbé 'ndji, engũ bini, ani ngaha bádha bhú 'bu pi okpála inde ngakẽ lio ne kuto.†»

<sup>6</sup> Kaka-a, ma ngapa pi yi me yi kẽ liyi ne kuto kala Ebhe inde ne angu, amba ani 'e'e yi ne abhũlá li nedhinga ani akũnda lie-o. <sup>7</sup> Yi 'o ndũ 'ngũ hana inde ngato mbolo li yi-e sakpa ani, anga ani ngalila yi.

<sup>8</sup> Yi ðu bedhe, yi lila liyi, padhá de, anga djabũũ bhũũ yala gba ní-e ngadji bili maka kingbi inde ngangulumba. Ani ngagili me ni azũ da-ie. <sup>9</sup> Yi lũ kala ani kpekpeke bhú nabhuka . Yi mbila ndjindji me omabhuka koko pĩla doto libhomu-o bhadi ngadje likabhu maka yi. <sup>10</sup> Yi adjé nga matá likabhu ngũbula nedhinga bedi. Engũ bini, Ebhe inde bhũũ bádha bhú 'bu-o, a'i yi ngũ nali bhú sangu na dũdũma gba e bhú nakpõtse liyi bhú dabili ne

† 4:18 4:18 Tsia bhú Gbt. 11:31. † 5:5 5:5 Tsia bhú Gbt. 3:34.

Kilisito. Aní aléke yi ngae makpe, aní tsía méne me yi lú kpekpeke bhú ndu 'ngú hana má kpəkəbhə! <sup>11</sup> A ayo me aní ɹ dɹdɹma ne dɹdɹma. A adɹ moko.

*Oeli na soso*

<sup>12</sup> Silivano ateteke ma li naye mbo ndu balua inde-e pi yi ngae. Ma ambila me a ko ndai ní makilisito inde ngamene 'ngú li lelele. Ma aye balua inde-e ngubula nato masi bhú yi, di ne napa pi yi me a inde-e bádha bhú 'bu na kukulú gba Ebhe, yi gbite liyi tété.

<sup>13</sup> Omabhuka inde bhú Babilona\* ei, inde li Ebhe abhɹ o maka aní abhɹ di yi lie-e, yi yi mayi. Ndili gba ma Maloko yi di yi mayi. <sup>14</sup> Yi yi liyi sɹnda yi, yi kama liyi sɹnda yi ngú nasuno me yi ne makɹnda sɹnda yi. A ayo me guo 'ngú dɹ bhú dabili bini ne yi okpála inde bhú 'bu Kilisito hana.

---

\* **5:13** 5:13 Babilona: Okpála bhelé ngabhundja me li bili inde-e, a akɹnda nasuno gudhɹ na Loma

## Balua na bhisi gba Piele Eli na kalanu

Piele aye balua gba e na bhisi pi 'ngbé limbi omakilisito na kalanu. Engú na ngbéngbé inde bhúbhú-o, a ko ngubula nagu kulu gba omusuno na eu di ne ongu na zabhe inde ngayie bhú ongu ang-o. Ngú naha angu engú bhomu-o, a ayo nagbite lio li nambila Ebhe na kukulu di ne Ngámá Yesu Kilisito, ne nasuno inde li okpála inde au Yesu ne djila o akpokpo e-o. Piele alu kpekpeke li nasuno na eu inde li okpála adu apa lie me Yesu go matá de-o. Ani atsia apa me nabhue inde li Yesu ngabhue lie, a ko anga Ebhe kunda de me kpála bini kpi-e de. Engú bini, ani ngakunda me okpála hana koto bhú siti 'ngú (3:9).

### **Ongbengbe ongu inde bhú bhuku inde-e ngae inde:**

Eli na kalanu 1:1-2

Na'i inde li Ebhe a'i makilisito ne e-o 1:3-21

Omusuno na eu 2:1-22

Nago na soso gba Kilisito 3:1-18

### *Simo Piele yi omabhuka mayi*

<sup>1</sup> Ma aye balua inde-e ngama Simo Piele. Ma ne bali gba Yesu Kilisito, ma la di ne bhulu titima gba ani-o. Ma aye balua inde-e pi okpála bhende asia nabhuka ka ngbili 'ngú gba Yesu Kilisito-o. A ko Ebhe gba ní, a ko di Mukobho gba ní-o. Nabhuka ang-o viti bini ne bhe gba ya-o. <sup>2</sup> A ayo me bádha bhú 'bu gba Ebhe di ne Ngámá gba ní Yesu Kilisito-o, du bhú dabili bini ne yi, amba u ha di guo 'ngú pi yi ane mane ka yi ambila uo lie ndjindji-o.

### *Lele nadhuku ka omakilisito*

<sup>3</sup> Yesu Kilisito bhú angu gba e aha ndu 'he hana ní nde ne gumu e ngú nakobho di ne nadu ka ní

libhomu pi Ebhe. Ani amene me ní mbila Ebhe inde a'i ní bhú sangu gba e di ne bhú ngamba kulu gba e na paká paká. <sup>4</sup> Ebhe amene mo-o ngubula me ní sia oehe na mase naali di na ngbengbengbe inde nani ani apa me ní ahá e pi ní-o. Ani aha oehe bhomu-o ngubula me yi kpe osisiti gumu 'he na doto inde ngabhili okpála-o, di ne ngubula me yi kpetsə liyi bhú dabili bini ne ní.

<sup>5</sup> Ka 'ngú ang-o, yi mene ne kpéke me nabhuka gba yi-e be ndu e ne nadhuku ngbingbili, pi nadhuku ngbingbili-e, yi 'o nambila Ebhe na paká paká, <sup>6</sup> pi nambila Ebhe na paká paká-a, yi 'o naholo bua yi, pi naholo bua yi-e, yi 'o kekele, pi kekele-e, yi 'o naholo lio li Ebhe, <sup>7</sup> pi naholo lio li Ebhe-e, yi 'o nadu ne mukunda sunda yi. Pi nadu ne mukunda sunda yi-e, yi 'o mukunda pi ndu okpála hana. <sup>8</sup> I du me yi nde nganu ne namene ndu ongu bhomu-o hana ne kalanu-o, i tsia méne me yi mene kulu, i méne di me yi zu nguwa bhú nambila Ngámá gba ní Yesu Kilisito-o.

<sup>9</sup> La-a, kpála bhende i mene oehe bhomu-o de-e u 'kpi tsutsu de, ani maka kpála inde i u 'kpi de. Ani a'ili 'to e me Ebhe avulu osisiti 'ngú gba ní nani ní amene e-o. <sup>10</sup> Kaka-a, ondaise ma, yi mene la matá ne kpéke me yi lu ne angu bhú e'i li Ebhe a'i yi lie, di ne maka ani abhu yi lie-o. Li yi mene mo-o, yi li bhú siti 'ngú 'kpi bini de. <sup>11</sup> Abhomu-o, li Ebhe ká kpadji pi yi ne bua e bini me yi li bhú Nau na duduma gba Ngámá gba ní Yesu Kilisito, inde di Mukobho gba ní-o.

### *Piele apa pi omabhuka me u 'o 'to o li 'li Ebhe*

<sup>12</sup> Kaka-a, a ayo me ma 'o 'ngú bhomu-o bhú 'dje yi ndu 'kpi hana belegu yi ambila nani lie bhutode, yi atsia agbite liyi li kukulu 'ngú inde yi asia e-o. <sup>13</sup> Ma abhundja me nedhinga ma nde nga bha lie u-o, a

ndjindji me ma du na'o 'ngú bhomu-o bhú 'dje yi ngubula me yi alá-a de. <sup>14</sup> Padhá de, anga ma ambila me nedhinga nakpi ka ma-a akolo masikpe maka li Ngámá gba ní Yesu Kilisito apa muma lie-o. <sup>15</sup> Kaka-a, ma améne di ne kpéke me, pita ma akpí lie, 'to yi a'fli 'to ongu bhomu-o de.

<sup>16</sup> Nani ya akpokpo 'ngú lie pi yi pindji nago gba Ngámá gba ní Yesu Kilisito bhú angu gba e-e, ya kpokpo pi yi ongu na padhá padhá inde li okpála ngapandja e bhú o-o de. Engú bini ya au ani bhú zi e ne djila ya makpe. <sup>17</sup> Padhá de, anga Ebhe 'Dyi ani adhege ani nane mane. Abhomu-o, eli ayie agba Ebhe na angu di na asasaua atsia apa me: «Kpála inde-e, a ko Ndili gba ma, ma kunda ani naali, bua ma nga ne ani naali.» <sup>18</sup> Ya adje eli inde ayie abhulá-a ne 'dje ya makpe, nedhinga ya adu lie ne Ngámá Yesu Kilisito apí 'ta li Ebhe asuno lie pi ya pí e-o.

<sup>19</sup> Ka 'ngú ango-o, ya abhuka na paká paká ngali inde li opolofeta akpokpo nani e bhú Bhuku gba Ebhe-o . A ayo me yi gbo 'dje yi tété ndjindji, anga a maka zi 'ke inde ngatsi bhú biti. Yi gbo 'dje yi tété akólo li ekpí ahólo naseke lie-o, ekpí inde li Yesu Kilisito asúno lie lie li bua yi maka zi ikupala na kékpi asusu lie-o. <sup>20</sup> Kala ndu 'ngú hana-a, yi mbila ndjindji me kpála bini ade inde i ti da nakpokpo ne imbilangu gba e makpe kú oeli inde nani li opolofeta akpokpo e, inde u aye di-e bhú Bhuku gba Ebhe-o. <sup>21</sup> Padhá de, anga 'li opolofeta yiyie ka kpála bini de. Engú bini, Bu Bhobua apa pi okpála ngae makpe me u kpokpo 'ngú ne 'li Ebhe.

## 2

*Piele agbele 'dje omabhuka li 'ngú gba omusunu na eu*

<sup>1</sup> Nani kalanu-o, opolofeta na eu adu bhú ká omafalaele. Omusunu na eu azé bhadi bhú ká yi moko. U agó ne kali, u tsia súno ongu na eu inde a'é okpála li kpadji na mukobho-o. U ayála belegu Yesu Kilisito , Musunu gba ní inde agbegbe o bhú bali gba siti 'ngú-o. U améne lie mo-o, u ngagili bhomu-o me kpéke 'ngú na kpekpeke go ti pí o má gala! <sup>2</sup> Okpála bhelé akpáta kpadji na numu gba uo-o. Kaka-a, li okpála tsia sóbho kpadji na kukulu 'ngú inde li Yesu Kilisito asuno e ka uo. <sup>3</sup> Ka gumu 'he-e, omusunu na eu ango-o apite yi ne oeli na eu, u tsia gbulu oehe gba yi-o. La-a, Ebhe akodho 'ngú gba uo-o nani didili, kpéke 'ngú na kpekpeke atí pí uo mbia.

*Engú inde akodho 'kpí bhú nedhinga gba okpála na kalanu*

<sup>4</sup> Padhá de, anga belegu oandjelu inde amene nani siti 'ngú-o, Ebhe dje ndjinga uo de. Engú bini, ani abala uo bhú tsu 'dú má ngbon-gobho, inde bhú e ne biti má ndundulundu me, u nde agbigbite uo ne gbindjili akólo li 'kpí ani akódho 'ngú gba okpála lie-o. <sup>5</sup> Abana okpála nani di amene siti 'ngú-o, Ebhe dje di nani ndjinga uo de, engú bini, ani amene me engu si píla doto, amba a bhili okpála inde andjo 'li ni-o. Ani akobho bha bini Nua, inde adu apa pi okpála me u dji bua o, a la di-e okpála mananika koko.

<sup>6</sup> Ngubula nasuno ongu inde akólo galikpe li okpála inde ngandjo 'li Ebhe-e, Ebhe atsulu ogadhú na Sodomo ne Gomolo hana má kpekobhò! <sup>7</sup> Engú bini, Ebhe akobho Loto. A adu nani ngbili kpála . Bua ani adu nani ake ne siti 'ngú li okpála bhomu-o adu amene e bhú poli-e naali. <sup>8</sup> Ani adu nadu bhú ká obhulu poli bhomu. Ndu 'kpí hana, ani adu nau di ne nadje osisiti 'ngú gba uo-o. Ongú ango-o atsia

† 1:17 1:17 Tsia bhú Mat. 17:5; ne bhú Mlk. 9:7; di ne bhú Luk. 9:35.

adu nake bua ani na kuo kuo. Padhá de, anga adu ngbili kpála. <sup>9</sup> I du me a nde mo-o, Ngámá mbíla kpadji inde ani akóbho okpála inde ngakpata 'li e bhú okpekpeke da 'ngú-o ndjindji. Ani mbíla la di kpadji inde ani ahólo okpála inde ngandjo 'li e ngubula me u zu likabhu li 'kpí ani akódho 'ngú gba okpála lie ndjindji. <sup>10</sup> Ebhe ahá likabhu ango-o, ane mane pi okpála inde ambíla lio ne nakpata osisiti gumu na kute, inde di ngau angu gba Ebhe-e bhú djila o padhá-o.

### *Engú inde akólo li omusuno na eu*

Tsulú 'ngú li omusuno na eu-o ade. U dje kpála de, u manga la di oandjelu inde li o ne zizi-e\* de. Engú bini, u ngasobho uo. <sup>11</sup> Belegu li oandjelu ane omusuno na eu-o lie ne angu-o, u sobho oandjelu na ndjondjo bhomu-o kala Ngámá de. <sup>12</sup> Omusuno na eu bhomu-o ngamene 'ngú bhú 'ndji o maka onu inde u azu o ngubula me okpála dhe o li 'kú. U ngasobho oehe inde u mbíla e de. U amú maka onu.

<sup>13</sup> U azú likabhu bhomu-o mada siti 'ngú inde u amene e li okpála koko-o. U ne gumu namene siti 'ngú belegu ne ngbikpi. Nedhinga yi nde ne uo lie bhú anokomia, u ngapite yi. Engú ango-o ngaha pi uo djali naali, la-a, a ko 'ngú na numu. <sup>14</sup> U abedhe ne gumu nakunda olisi gba okpála koko bhú o bedhe. U ndandala li namene siti 'ngú de. U ngadhe okpála bhende ne kpéke bua ade-e li 'kú gba o-o. U ngapite uo masikpe de nato uo bhú siti 'ngú. U abedhe ne gumu 'he bedhe. Ebhe atu nani pedje li uo bhutode. <sup>15</sup> U ayie li kpadji na ngbingbili-e ayie, u angita. U ngakpata kpadji gba Balama, ndili gba Bosolo, inde akunda nani namene siti 'ngú ngubula nasia tia-o. <sup>16</sup> Engú bini, Ebhe ambe bhú 'ndji ani kabula siti

'ngú gba e-o. Li nedhinga bhomu-o, punda, enu i gagama 'ngú de-e, agama 'ngú maka kpála-kuti. Ani atsia ani kpadji pi polofeta bhomu-o me ani amene matá engú na pele bhomu-o de.

<sup>17</sup> Omusuno na eu-o maka okpongu li engu a'ulu bhú e hana, di maka ndindi inde li anvi ngandjindjimba e. Ebhe aleke dabili gba uo-o bhú biti má ndundulundu! <sup>18</sup> U ngatolo bha bini ne ongbengbe 'ngú na padhá padhá inde li tata nde li e ade. La di-e, u ngato okpála bhende aze nga bha na mbia bhú ká okpála inde ngamene siti 'ngú-o bhú ngita. U ngato uo bhú ngita li kpadji na gumu na kute gba o-o. <sup>19</sup> U ngapa pi okpála ango-o me u azé bhú bali maze, engú bini, ngauo omusuno na eu bhomu-o bhú bali na siti 'ngú. Padhá de, anga kpála ne bali pi engú inde ako pi ani-o.

<sup>20</sup> A ne okpála koko inde a'o osisiti 'ngú na doto anga u ambíla Ngámá Yesu Kilisito, inde di ne Mukobho gba ní-o. I du me u nde agie matá lio bhú namene osisiti 'ngú bhomu-o, li siti 'ngú bhomu-o gaga uo, i ko angu e pi uo-o, u kólo la matá sisiti nane da bhe na kalanu-o mane. <sup>21</sup> Padhá de, anga nako me u nde mbíla ngbili kpadji-e de-e, engú du tété de. La mbia inde-e, u ambíla, u atsia adji 'ngbu o li líli inde li Ebhe aha e-o. Bhobhomu-o la matá pi uo sisiti ane mane ngae. <sup>22</sup> Engú inde ngakolo li uo-o ngasuno me engú li gbitaku ngapa e-e, a ko paká. Gbitaku apa me: «Búlu gie bha lie ngú nazu zie e.†» U papa di matá me: «Pame inde u avulu kute e mbia inde-e, gie matá bha lie nato lie ne ngbedhe.»

## 3

*Ngámá Yesu Kilisito agie galikpe lie magie*

\* **2:10** 2:10 Oandjelu inde li o ne zizi: A akunda napa me oandjelu inde ngamanga 'li Ebhe. † **2:22** 2:22 Tsia bhú Gbt. 26:11.

<sup>1</sup> Ondaise ma na mukunda, a inde e balua na bhisi li ma aye e pi yi-o. Bhú ndu balua bhisi bhomu-o hana-a, ma aye matá pi yi ongu yi ambila e ne toto ngubula nakpo djua li bua yi li kpadji na ngbili 'ngú .

<sup>2</sup> Ma akunda me 'to yi a'li de li ongu li opolofeta gba Ebhe, di ne líli li Ngámá gba ní, inde di Mukobho gba ní-e apa nani e pi yi bhú 'bhø obhulu titima inde ani atima o pi yi-o. <sup>3</sup> Kala ndu 'ngú hana-a, yi mbila me li sokpi-e, okpála inde adú namene 'ngú li gumu gba o makpe akunda e azé pila doto. U adú amu yi. <sup>4</sup> U adú napa me: «Mugito me Yesu Kilisito apa nani me ni agie lini magie, ani la dho? Padhá de, anga maka nani li onguo ogbi ya amu lie, ndu 'ngú hana bha bhú da e maka li lilita nani li Ebhe abho kokpi ne doto lie-o!»

<sup>5</sup> Okpála inde ngapa 'ngú bhomu-o ngamemene bhú gandji. U ngamene 'he mugito me u a'li 'to o li 'ngú bini. Engú ango-o me, Ebhe abho nani kokpi ne 'li e. Ani abho doto li kate engu. Ani atsia asa dengo doto ne engu ngbalina. <sup>6</sup> Ani atsia abhøle la bhadi doto na kalanu-o ne engu, engu inde asi nani pila doto libhomu-o. <sup>7</sup> Ani apa di ne 'li e makpe me kokpi ne doto na naki inde-e, a adudu tété, nakolo li 'kpi ni akódho 'ngú gba okpála lie-o. Ni tsia tsulu okpála bhende ngamene siti 'ngú-o.

<sup>8</sup> Ondaise ma na mukunda, a ne koli 'ngú bini inde a ayo me 'to yi a'li lie de. Pi Ebhe-e, ekpi bini maka kalanga kutu bini, kalanga kutu bini maka ekpi bini. <sup>9</sup> Okpála koko bhundja naao me, Ebhe ngamene engú inde ani apa me ni améne e má gala ade! A mo-o ade. Ebhe mangbo ne 'ndjá bua pi yi, anga ani kunda de me suka kpála bini ngita-a de. <sup>10</sup> Ngámá Yesu agó galikpe bhú

gbilikiti, maka li bhulu 'zi agógo lie me 'to kpála nde 'to ani ade-o. Ekpi ango-o, okpála adjé tolo na mugwe mugwe, li djua gó tsulu kokpi ne ndu 'he inde abhúla-a hana, li doto tsámبالa ka djua má mbu.\*

<sup>11</sup> I nde lie me ndu ohe hana nde andjia mo-o, a ayo me lele nadhuku gba yi-e du ndjindji, yi du di libhomu hana pi Ebhe. <sup>12</sup> Yi 'o 'dje yi li 'kpi li Ebhe a'o e ngu ongu ango-o, amba yi mene ne kpeke me ekpi ango-o go má gala! Li 'kpi ango-o, djua atsulu kokpi, li ohe na abhúla tsulu hana má kpekøbhø! <sup>13</sup> La-a, Ebhe apa pi ní me ni abhø kokpi di ne doto na mbia. Oo-o, adú bha ne engú na ngbingbili. A bhomu-o engú inde ní ngadjeke e-o.

<sup>14</sup> Kaka-a, ondaise ma na mukunda, i nde lie me yi ngadjeke ongu bhomu-o, yi mene ne kpeke me lele nadhuku gba yi-e du ndjindji, di ne me Ebhe au engú na sisiti napa mapa li yi de. Yi mene di me bua yi du ne guo 'ngú kala ani. <sup>15</sup> Yi mbila me 'ndjá bua gba Ebhe-e ngubula me yi sia nedhinga ngu ndji bua yi, amba yi kobho. Ndai ní na mukunda Polo aye bhadi pi yi moko, ne imbilangu maka li Ebhe aha pi ani lie ko. <sup>16</sup> Ani aye bhú ndu obalua gba e hana nedhinga ani ngakpokpo 'ngú lie pindji ongu bhomu-o. Da nambila ta ongu koko inde ani aye e kpekpeke. Okpála inde li imbilangu nde bhú 'ndji o ade, inde di ne kpeke bua ade-e ngakpødhøle tata-a makpødhøle. U di ngamemene li oli koko inde bhú Bhuku gba Ebhe-e moko. U bhomu-o ngagili kuo ngu o ngao.

### *Oeli na soso*

<sup>17</sup> Pi yi ondaise ma na mukunda, yi ambila ongu bhomu-o ambila. Kaka-a, ma apa pi yi me yi bhulu djila yi ngubula me okpála inde

\* **3:10** 3:10 Doto tsámبالa má mbu: Bhú obhuku koko-o, u aye me: doto tsia tsulu hana. Bhú okoko-o, u aye me: Ebhe tsia kódho 'ngú gba okpála na doto ne ndu 'he inde bhúbhú-o hana. Bhú okoko-o, u aye me: doto dú matá tété de.

ngayala Ebhe-e apíte yi ngú nato bhúla yi li pulu kpadji gba o-o de. Yi kpata uo-o, amba yi ayie li kpadji li yi alu lie kpekpeke-e ayie. <sup>18</sup>La-a, yi dhika bha li nakpata Yesu Kilisito inde Ngámá, inde di ne Mükobho gba ní-o, ngubula me ani suno bádha bhú 'bu gba e pi yi ane mane, di ne me yi mbila ani ane mane. A ayo me ndu okpála hana dhogè ani duduuma ne duduuma. A adu moko.



## Balua na bini gba Djaa Eli na kalanu

Ngbengbe ongu inde li Djaa aye e bhú balua inde-e bhisi: Engú na bini ani aye e, a pindji nato masi bhú okpála inde ngatanga balua gba ani, ngubula me u du bhú makpøtse na kukulu bhú dabili bini ne Ebhe, di ne Ndili gba ani Yesu Kilisito, la di ne napa me u lila lio ka nasuno nasisiti inde i ti da nabhøle makpøtse angoo. Nasuno angoo, alu pi engú inde u ngapa lie me, i du me kpála nde abu 'kpa e li ndu 'ngú hana inde atsia kate kpála-a, ani kólo sisiti. Kaka-a, a ayo nani de me Yesu Ndili gba Ebhe kolo kpálakuti-e de. Omusuno bhomu adu apa me, a ayo me kpála koto bhú ndu 'ngú hana inde atsia kate-e makoto. U atsia asuno di me, mukobho na duduma tsia engú napa de me kpála du amene bádha 'ngú, ne me ani du ne mukunda pi okpála koko de.

La-a, ngubula napa me engú li okpála bhomu apa e a ko eu-o, Djaa atsia apa mbámhá me, Yesu Kilisito nani ne kpálakuti. Ani atsia apa di me, ndu okpála hana inde abhuka Yesu-o, inde la di ne mukunda pi Ebhe-e, a ayo me u du ne mukunda sunda o.

### **Ongbengbe ongu inde bhú bhuku inde-e ngae inde:**

Eli na kalanu 1:1-4

Zi 'kpí, a la di-e biti 1:5 - 2:29

Ongisi gba Ebhe, a la di-e ongisi gba Djabulu 3:1-24

Ngbili 'ngú, ne pulu 'ngú 4:1-6

Ongú inde a ayo me u ue bhú mukunda 4:7-21

Nabhuka na kpekpeke 5:1-21

*Eli inde ayie agba Ebhe-e, a ko Eli na mukobho*

<sup>1</sup> Ya ngaye balua inde-e pi yi pindji Eli na mukobho. Eli angoo adu nani kala ndu 'ngú hana nayie li lilita. Ya adje Eli angoo. Ya au Eli angoo ne djila ya makpe. Ya atsia ne kpéke djila, ya atsia abu di 'kpa ya tété. <sup>2</sup> Li mukobho angoo apana lie lie, ya au ne djila ya. Kaka-a, ya ngakpokpo 'ngú pi yi tété. Ya la di ngasuno pi yi mukobho na duduma angoo, inde adu nani agba 'Dyi ní, inde apana la di lie pi ya ko. <sup>3</sup> Ya au engú inde-e ne djila ya, ya atsia adje di ne 'dje ya. Ya ngasusuno pi yi, amba ngayi di-e, yi kpøtse liyi ne ya bhú dabili bini, bhú makpøtse inde ya nde bhú e ne 'Dyi ní, la di ne Ndili gba e, Yesu Kilisito ko. <sup>4</sup> Ya ngaye la di engú angoo pi yi, ngubula me ní\* bedhe ne djali.

### *Ebhe ne zi 'kpí*

<sup>5</sup> Ngali inde ya adje e ka Yesu Kilisito-o, inde ya asuno la di e pi yi-e ngae inde: Ebhe ne zi 'kpí, biti la di bhú ani belegu ade bini. <sup>6</sup> I du me ní nde apa me: «Ya akpøtse liya ne ani bhú dabili bini» me ní nde ngadholo bhú biti-e, amba ní ngapa eu, ní mene la di engú na kukulu de. <sup>7</sup> Engú bini, i du la me ní nde ngadholo li zi 'kpí maka ngaani Ebhe makpe nde lie li zi 'kpí-e, amba ní akpøtse liní bhú dabili bini ne ondaise ní akpøtse. La di-e, ngute gba Yesu, Ndili gba ani-e, ngavulu ní ne ndu siti 'ngú hana.

<sup>8</sup> I du me ní nde apa me ní mene siti 'ngú de-e, amba ní ngapite liní ngani makpe, kukulu 'ngú la di bhú ní ade. <sup>9</sup> Engú bini, i du me ní nde apandja osisiti 'ngú gba ní-e kala Ebhe-e, ka ani nde lie ne kpála na ngbingbili-e, inde amemene di engú ani apa e-e, ani 'é osisiti 'ngú angoo, ani tsia vulu ní bhú ndu 'ngú hana inde ngbingbili bhú djila ani ade-o. <sup>10</sup> I du me ní nde apa me ní mene siti

\* 1:4 1:4 Ní: Bhú obhuku koko-o, u a aye me: «Djali gba yi.»

'ngú de-e, amba ní nga'o Ebhe kpála na eu, eli gba ani-e la di bhú ní ade.

## 2

<sup>1</sup> Odi ma, ma ngaye engú inde-e pi yi, amba yi améne siti 'ngú de. Engú bini, i du la me kpála bini nde amene siti 'ngú-o, a ka ní ne kpála inde ngakpokpo 'ngú gba ní-e pi 'Dyi ní. A ko Yesu Kilisito, kpála na ngbingbili-o. <sup>2</sup> Ngaani makpe-e, ani aha nani mukobho gba e ngabula me Ebhe 'e osisiti 'ngú gba ní ko. La-a, a ko bha bini ngabula osisiti 'ngú bhe gba ní-e de. Engú bini, a ko di ngabula osisiti 'ngú gba okpála na pila doto libhomu.

### *Yi lila olíli gba Ebhe-e malila*

<sup>3</sup> I du la me ní nde ngalila olíli gba Ebhe-e, ní tsia mbíla me ní mbíla Ebhe hana. <sup>4</sup> Li kpála pa me ní mbíla Ebhe hana, engú bini, i du la me kpála ango-o nde lila olíli gba ani-e de-e, amba a ko kpála na eu, kukulú 'ngú la di bhú ani ade. <sup>5</sup> Engú bini, kpála bhende ngalila 'li Ebhe ndjindji-e, a ko kpála bhende akúnda Ebhe kukulú. A bhomu-o engú inde ní ambíla ka e me ní akpètse líní bhú dabilí bini ne Ebhe-o. <sup>6</sup> Kpála bhende ngapa me ní akpètse líní bhú dabilí bini ne Ebhe-e, a ayo me mukobho gba kpála ango-o du di maka bhende gba Yesu adu nani lie ko.

<sup>7</sup> Ondaise ma na mukúnda, líli inde ma ngaye e pi yi inde-e, a ko líli na mbia de. Engú bini, a ko líli na didili. Yi asia nani líli ango-o nayie li lilita.\* Líli na didili ango-o, a ko eli inde yi adje e-o. <sup>8</sup> La-a, ma ngaye pi yi inde-e líli na mbia. Kukulú 'ngú na líli ango-o ngau lie bhú Yesu, la di ne bhú yi. Padhá de, anga bití aholo nandjia aholo, zi 'kpí na kukulú-o aholo la di nasu aholo.

\* **2:7** 2:7 Nayie li lilita: A ko nayie li nedhinga inde u adje nani 'li Ebhe lie ko. Tsia bhú 1 Dja. 2:24, 3:11, di ne bhú 2 Dja. 1:5.

<sup>9</sup> Kpála bhende ngapa me ní bha ndju li zi 'kpí me ani nde ngayala ndai e-e, kpála ango-o nga bha ngadu bhú bití. <sup>10</sup> Kpála bhende ngakúnda ndai e-e, kpála ango-o ngadu li zi 'kpí. Kaka-a, engú inde i ti da nato kpála koko bhú siti 'ngú-o bhú ani belegu ade bini. <sup>11</sup> Engú bini, kpála bhende ngayala ndai e-e, kpála ango-o ngadu bhú bití. Ani ngadholo bhú bití, ani mbíla la di de me ní adji ne su-oie de, anga bití anini djila ani manini.

### *Yi lila liyi ka ongu na doto malila*

<sup>12</sup> Odi ma, ma ngaye engú inde-e pi yi, anga ka 'li Kilisito-o, Ebhe a'e siti 'ngú gba yi-e a'e.

<sup>13</sup> Odyi ma, ma ngaye engú inde-e pi yi, anga kpála inde adu nani kala ndu 'ngú hana nayie li lilita-a, yi mbíla ani hana.

Omakombise, ma ngaye engú inde-e pi yi, anga yi aha angu Siti aha.

<sup>14</sup> Odi ma, ma aye engú inde-e pi yi. Padhá de, anga yi mbíla 'Dyi ní hana.

Odyi ma, ma aye engú inde-e pi yi, anga kpála inde adu nani kala ndu 'ngú hana nayie li lilita-a, yi mbíla ani hana.

Omakombise, ma aye engú inde-e pi yi, anga yi ne angu bhú nabhuka.

La di-e, 'li Ebhe ngadu bhú yi, yi atsia aha la di angu Siti.

<sup>15</sup> Kaka-a, yi akúnda doto inde-e de. Yi akúnda di oehe inde bhúbhú-o belegu de bini. Li kpála kúnda doto-o, amba ani kúnda 'Dyi ní Ebhe de. <sup>16</sup> Padhá de, anga ndu oehe na doto-o hana maka: gumu na sisiti inde bhú kpála, gumu nasia ndu 'he hana inde li djila ngau e, a la di-e, nandu ne 'ngbé 'ndji ka otia na doto, ndu 'he bhomu-o hana ngayie ka 'Dyi ní Ebhe ade. Engú

bini, a ko ndu 'he na doto. <sup>17</sup> La-a, doto ngakodho 'kpí, di ne ndu 'he inde bhúbhú-o hana. Engú la bini, kpála bhende ngamene engú li Ebhe akúnda e, ani ngadu bhú mukobho dudu ma ne dudu ma.

*Yi lila liyi ka obhulu yala gba Kilisito malila*

<sup>18</sup> Odi ma, sokpí-e akolo masikpe! Yi adje nani engú inde u apa e adje. U apa nani me: «A ayo me bhulu yala gba Kilisito-o go.» Mbia inde-e, obhulu yala gba Kilisito aze bhibhiti. Kaka-a, ní ngambila me sokpí-e akolo masikpe. <sup>19</sup> Okpála ango-o ayie bhú ká ní. Padhá de, anga a ko nani okpála ka ní de. I dú me u dú nani ne okpála ka ní-e, u de adu ne ní bhú dabili bini. Engú bini, u ayie bhú ká ní, mbia inde-e, a au lie mbámbá me ndu okpála bhomu-o hana, a ko nani naao okpála ka ní de.

<sup>20</sup> La pi yi-e, yi asia nani naayi Bua gba Ebhe. A atuko Bua ango-o pí yi ne Kpála na bubu. Kaka-a, yi ambila engú na kukulu-o ndu yi hana. <sup>21</sup> Engú inde ma aye e pi yi-e, a ko de ka me yi mbila engú na kukulu de-e de. Engú bini, ma aye pi yi anga yi mbila engú na kukulu-o hana. La di-e, eu ti da nakoto bhú engú inde kukulu-o belegu de bini.

<sup>22</sup> Kpála na eu-o, a ko da? A ko kpála bhende ngapa me Yesu ne Kilisito ade ko. Kpála ango-o, a ko bhulu yala gba Kilisito. Ani ayala Ebhe, ani atsia ayala di Ndili gba ani-o. <sup>23</sup> Padhá de, anga kpála bhende ayala Ndili-e, ani ayala di bhomu-o 'Dyi ani. Kpála bhende ngapa 'ngú gba Ndili-e mbámbá-a, ani ngapa di bhomu-o engú gba 'Dyi ani.

<sup>24</sup> Kaka-a, eli inde yi adje nani e nayie li lilita-a, a ayo me asi kuti e li bua yi. Padhá de, anga i du me eli inde yi adje nani e nayie li lilita-a nde asi kuti e li bua yi-e, ngayi di-e, yi dú ne Ndili-e kpála bini, yi tsia dú la di ne 'Dyi ani kpála bini. <sup>25</sup> A bhomu-o ehe inde li Kilisito apa nani

me ni ahá e pi ní-e, a ko mukobho na dudu ma.

<sup>26</sup> Ma aye engú inde-e pi yi pindji obhende ngagili napite yi ko.

<sup>27</sup> Engú bini ngayi-e, Kilisito atuko Bua gba e pí yi. Bua ango-o ngadu bhú yi. Kaka-a, yi matá ne gumu masuno koko ade. Padhá de, anga Bu Bhobua ngasuno ndu 'ngú pi yi hana. La di-e, engú inde ani ngasuno e, a ko kukulu 'ngú, a ko eu de. Kaka-a, yi du bhú Kilisito maka li Bu Bhobua asuno lie pi yi ko.

<sup>28</sup> A moko odi ma, yi du bhú Kilisito, amba nedhinga inde ani akóto lie, ní adú ne tsulu de, ní adú kala ani ne numu de. <sup>29</sup> Yi mbila ndjindji me Kilisito ngbingbili. Kaka-a, ayo me yi mbila la di me ndu kpála hana inde ngamene engú na ngbingbili-e, kpála ango-o, Ebhe azu ani ngae.

### 3

*Engú inde asuno me ongisi gba Ebhe-e kpi ne obhende gba Djabulo*

<sup>1</sup> Yi tsia nga maka li 'Dyi ní asuno mukunda gba e pi ní lie-o. Mukunda ango-o, a ko me ní asia 'ili me ní ne ongisi gba Ebhe. Ní la bhadi mo-o na paká! Kaka-a, okpála na doto mbila ní de, anga u mbila di nani Ebhe de. <sup>2</sup> Ondaise ma na mukunda, mbia inde-e, ní ne ongisi gba Ebhe. Engú la bini, lele maka ní adú lie, asuno nga lie mbámbá de. La-a, ní ngambila me, nedhinga inde li Kilisito akóto lie, ní adú maka ani. Padhá de, anga ní aú ani maka ani nde lie-o. <sup>3</sup> Kaka-a, kpála ne kpála inde nga'o 'to e 'to ani-e, nga'o lie bubu maka ani nde lie bubu ko.

<sup>4</sup> Ndu okpála hana inde ngamene siti 'ngú-o, ngagumu líli gba Ebhe. Padhá de, anga siti 'ngú, a ko nagumu líli. <sup>5</sup> Engú bini, yi mbila hana me Yesu Kilisito ago ngubula na'e ongú na sisiti. La di-e, siti 'ngú bhú ani belegu ade bini. <sup>6</sup> A moko, kpála inde ngadu me ani nde bhú

Yesu-o, ani memene siti 'ngú de. La-a, kpála inde amemene siti 'ngú-o, kpála ang-o u nga ani de. Ani mbíla la di ani de.

<sup>7</sup> Odi ma, a ayo de me kpála bini pite yi-e de! Kpála inde ngamene ngbili 'ngú, ngaani makpe-e, ani ngbingbili maka li Yesu Kilisito nde lie ngbingbili ko. <sup>8</sup> Kpála bhende adhedhe li namene siti 'ngú-o, a ko kpála ka Djabulú. Padhá de, anga nayie bha bini ali lilita-a, Djabulú bha naae ne kpála na siti 'ngú. Ta nago ka Ndili gba Ebhe-e ngae inde: ani ago ngabula nabhølo okulu gba Djabulú-o.

<sup>9</sup> Kpála bhende li Ebhe azu e ngae, ani dhédhe matá li siti 'ngú belegu de bini. Padhá de, anga nguwa\* inde ngayie ka Ebhe-e, ngadu bhú kpála ang-o ko. Ani ti da nadhedhe matá li siti 'ngú belegu de bini, anga Ebhe azu ani ngae. <sup>10</sup> Engú inde-e ngagbogbo bhusu ongisi gba Ebhe ne obhende gba Djabulú-o ngae inde: ndu kpála hana inde i mene 'ngú na ngbingbili de-e, inde i kunda la di ndai e de-e, a ko ndili ka Ebhe de.

#### *Ní du ne mukunda sunda ní*

<sup>11</sup> Engú inde yi adje nani e nayie li lilita-a, ngae inde: a ayo me ní du ne mukunda sunda ní. <sup>12</sup> Ní adú maka Kaina de, inde adu nani kpála gba Siti-o. La di-e, ani abhølo ndai e. Ani abhølo la nani ani ngabula ní? Ani abhølo ani anga okulu bhende gba ani-e adu nani sisiti. Engú bini, obhende gba ndai ani atsia adu nani ngbingbili. <sup>13</sup> Ondaise ma, i du me okpála na doto inde-e nde ngayala yi-e, yi angamba de. <sup>14</sup> Engú bini nganí-e, ní ambíla me ní ayie bhú kuo, ngú nali bhú mukobho, anga ní ngakunda ondaise ní. Kpála bhende li mukunda nde bhú e ade-e, ani ngadu nga bha bhú kuo.

<sup>15</sup> Ndu kpála hana inde ngayala ndai e-e, a ko bhulú nabhølo kpála. Yi mbíla la di ndjindji me

bhulú nabhølo kpála bini ade inde ne mukobho na daduma bhú e. <sup>16</sup> Mukunda-a, a ko ní? Ní ngambíla mukunda li ehe inde: Yesu Kilisito aha nani mukobho gba e pi ní. Kaka-a, nganí di-e, a ayo me ní ha mukobho gba ní-e pi ondaise ní. <sup>17</sup> Ní pa nga me, kpála bini inde ka e ne oehe, ani au ndai e inde li ehe nde ka e ade, la-a, ani dje ndjinga ani de. Lele pi u ti da napa lie me kpála ang-o akunda Ebhe-e? <sup>18</sup> Odi ma, a ayo de me ní du bha napa 'ngú na mukunda ne babadha eli-e de. Engú bini, a ayo me ní suno bhú kulu, di ne bhú engú na kukulú.

#### *Ní adú kala Ebhe ne tsulú de*

<sup>19</sup> A bhomu-o engú inde ní ambíla ka e me ní bhú kukulú 'ngú ko. La di-e, li bua ní tsia dú guguo kala Ebhe. <sup>20</sup> Padhá de, anga i du me bua ní nde ngapa pi ní me ní ne engú-o, ní ngambíla ndjindji me Ebhe-e, ani ngbéngbé ane bua ní mane. La di-e, ani ambíla ndu 'ngú hana má kpøkøbhø! <sup>21</sup> Ondaise ma na mukunda, i du me bua ní nde apa me ní ne engú ade-e, ní dú kala Ebhe ne tsulú de. <sup>22</sup> Ní ngasia 'he inde ní ngayo e ka ani-e, anga ní ngalila olíli gba ani, ní la di ngamene engú inde ani akunda e-o. <sup>23</sup> Líli gba ani inde ani aha e pi ní-e ngae inde: a ayo me ní bhuka 'li Ndili gba ani Yesu Kilisito. A ayo la di me ní du ne mukunda sunda ní maka li Kilisito aha líli lie pi ní ko. <sup>24</sup> Kpála bhende ngalila olíli gba Ebhe-e, kpála ang-o ngadu bhú Ebhe, Ebhe ngadu la di bhú ani. A inde-e engú inde ní ngambíla ka e me Ebhe ngadu bhú ní-o: ní ngambímbíla li Bu Bhobua inde li Ebhe aha e pi ní-o.

## 4

#### *Yi gbo bhusu Bua na kukulú 'ngú ne bua na eu*

<sup>1</sup> Ondaise ma na mukunda, yi abhúka ndu okpála hana bhende

\* 3:9 3:9 Nguwa: Nguwa gba Ebhe-e, a ko Bu Bhobua.

ngapa me a bhú o ne Bua gba Ebhe-e de. Engú bini, yi le ngaiza uo kalanu-o male, amba yi mbila ne me bua inde bhú uo-o, ayie ka Ebhe na paká. Padhá de, anga opolofeta na eu, aya naali pála doto. <sup>2</sup> Ehe inde yi ambila Bua gba Ebhe-e ka e, a ngae inde: kpála ne kpála bhende ngapa me Yesu Kilisito ago nani bhú kute na kpála-kuti na paká-a, kpála ango-o, a bhú ani ne Bua bhende ayie ka Ebhe. <sup>3</sup> La-a, kpála bhende ngapa me Yesu Kilisito go bhú kute na kpála-kuti de-e, kpála ango-o, bua bhende bhú ani-e, ayie ka Ebhe de. Engú bini, bua bhende bhú kpála ango-o, a ko mangbo bhende gba bhulu yala gba Kilisito ko. Yi adje nani adje me, a ayo me bhulu yala gba Kilisito go. Mbía inde-e, ani pála doto.

<sup>4</sup> Engú bini, odi ma, ngayi-e, yi naayi ne okpála gba Ebhe. Yi aha angu opolofeta na eu-o aha. Padhá de, anga Bua bhende bhú yi-e ne angu naali ane bua bhende bhú okpála na doto-o mane. <sup>5</sup> Opolofeta ango-o, a ko okpála na doto. U ngakpo la bhadi engú na doto. Kaka-a, okpála na doto ngadje uo ndjindji. <sup>6</sup> Engú bini, nganí-e, ní ne okpála gba Ebhe. Kpála bhende ambila Ebhe-e ngadje ní ndjindji. Kpála bhende naae ne kpála gba Ebhe ade-e, ani djé ní de. A bhomu-o engú inde ní ngambila Bua na kakulu 'ngú di ne bua na eu-o ka e ko.

#### *Ebhe-e, a ko mukunda*

<sup>7</sup> Ondaise ma na mukunda, ní du ne mukunda sunda ní, anga mukunda ayie ka Ebhe. Kpála bhende ne mukunda bhú e-e, Ebhe azu ani ngae, ani mbila la di Ebhe hana. <sup>8</sup> Kpála bhende li mukunda nde bhú e ade-e, ani mbila Ebhe de, anga Ebhe-e, a ko mukunda. <sup>9</sup> Lele maka li Ebhe asuno mukunda gba e lie pi ní-e ngae inde: ani atima koli Ndili gba e bini pála doto, ngubula me ní du bhú mukobho ka ani. <sup>10</sup> Lele maka li mukunda nde

lie ngae inde: ní kunda nani Ebhe nganí de, engú bini, ani akunda mangbo nani ní ngae, ani atsia atima Ndili gba e pi ní maka tia mangimbo, ngubula na'e osisiti 'ngú gba ní ko.

<sup>11</sup> Ondaise ma na mukunda, i du me Ebhe nde akunda ní naali mo-o, nganí di-e, a ayo me ní du ne mukunda sunda ní. <sup>12</sup> Kpála u nga Ebhe belegu de bini. I du me ní nde ne mukunda sunda ní-e, amba Ebhe ngadu bhú ní. La di-e, mukunda gba ani inde bhú ní-e bedhe má kpambi!

<sup>13</sup> Ehe inde ní ngambila ka e me ní ngadu bhú Ebhe, Ebhe la di ngadu bhú ní-e, a ngae inde: Ebhe aha Bua gba e pi ní. <sup>14</sup> 'Dyi ní atima Ndili gba e ngubula nadu Mukobho gba okpála. Ní au, ní la di ngakpokpo 'ngú tété. <sup>15</sup> Kpála ne kpála inde apa mbámbá me Yesu ne Ndili gba Ebhe-e, Ebhe ngadu bhú kpála ango-o. Kpála ango-o la di ngadu bhú Ebhe. <sup>16</sup> La di nganí-e, ní ngambila mukunda inde li Ebhe nde ne e pi ní-o. Ní atsia abhuka la di mukunda ango-o ko. Ebhe-e, a ko mukunda. Kpála bhende ngadu bhú mukunda-a, ngadu bhú Ebhe, Ebhe la di ngadu bhú ani.

<sup>17</sup> I du me mukunda inde bhú ní-e nde bedhe-e, ní dú ne tsulu li ekpi inde li Ebhe akódho 'ngú gba okpála lie de. Padhá de, anga pála doto inde-e, mukobho gba ní-e mana lie ne bhende gba Ebhe ko. <sup>18</sup> Tsulu bhú mukunda ade, anga li mukunda du bedhe-e, a nga'e tsulu hana. A moko, kpála bhende ngadje tsulu-o, a pa me mukunda gba ani-e kolo nga bedhe de. Padhá de, anga kpála bhende ngadje tsulu-o, abhú ani ne mabundja me u améne ni sisiti.

<sup>19</sup> Engú bini, nganí-e, ní sunda ní ne mukunda, anga Ebhe akunda ngaiza ní kalanu ngae. <sup>20</sup> I du me kpála bini nde apa me: «Ma akunda Ebhe», ani nde la ngayala ndai e-e, amba kpála ango-o ne bhulu eu. Padhá de, anga ani ti da nakunda

Ebhe inde ani u e de-e de, i du me ani nde kunda ngaiza ndai e inde ani nde ngau e mau-o de ko. <sup>21</sup> Lili inde li Kilisito aha e pi ni-e ngae inde: kpala inde akunda Ebhe-e, a ayo me ani kunda di ndai e.

## 5

*A ti da naha angu engu na doto da?*

<sup>1</sup> Ndu kpala hana inde ngabhuka me Yesu ne Kilisito-o, Ebhe azu kpala ang-o ngae. La di-e, kpala inde ngakunda Ebhe inde azu kpala bhomu-o, ani ngakunda bhadi ongisi inde li Ebhe azu o moko. <sup>2</sup> Ehe inde ni ambila ka e me ni ngakunda ongisi gba Ebhe-e ngae inde: a ko nakunda Ebhe, di ne namene olili gba ani ko. <sup>3</sup> A moko, lele nakunda Ebhe-e ngae inde: a ko namene olili gba ani-o. La di-e, olili gba ani-e pi ni kpekpeke ade. <sup>4</sup> Padha de, anga ndu kpala hana inde li Ebhe azu e, ani aha angu engu na doto aha. Nabhuka gba ni-e ngaha angu pi ni ngu naha angu engu na doto ngae. <sup>5</sup> A ti da naha angu engu na doto da? A ko bha bini kpala bhende abhuka me Yesu ne Ndili gba Ebhe.

*Nakpokpo 'ngu pindji Yesu Kilisito*

<sup>6</sup> Yesu Kilisito, a ko kpala inde nani ago-o. Ani ago nani ne engu di ne ngute\* Ani go bha bini ne engu de, engu bini, ani ago ne engu di ne ngute. La di-e, Bua gba Ebhe-e ngakpokpo 'ngu gba ani-e ngae, anga Bua gba Ebhe-e, a ko kukulu 'ngu. <sup>7</sup> A ngakpokpo 'ngu tete ne oehe bata: <sup>8</sup> a ko Bu Bhobua, a ko engu, a la di-e ngute. Ndundu bata hana aziba ne bua bini.

<sup>9</sup> Ni ziziba engu inde li okpala ngakpokpo e ndjindji. La-a, engu bhende li Ebhe akpokpo e ngae-e, ane bhende gba okpala-a mane. A bhomu-o engu bhende li Ebhe akpokpo e pindji Ndili gba e-o. <sup>10</sup> A

na paká me kpála bhende abhuka Ndili gba Ebhe-e, kpála ang-o asia engu inde akpokpo lie bhomu-o li bua e makpe asia. Engu bini, kpála bhende i bhuka Ebhe de-e, kpála ang-o nga'o Ebhe bhulu eu. Padha de, anga engu inde li Ebhe akpo e pindji Ndili gba e, kpála ang-o bhuka naae de. <sup>11</sup> Engu ang-o ngae inde: Ebhe aha nani mukobho na duduma pi ni, mukobho ang-o la bhú Ndili gba ani ko. <sup>12</sup> Kpála bhende li Ndili-e nde bhú e, abhú kpála ang-o ne mukobho. Engu bini, kpála bhende li Ndili gba Ebhe-e nde bhú e ade-e, mukobho bhú kpála ang-o ade.

*Engu pindji mukobho na duduma*

<sup>13</sup> Ma aye balua inde-e pi yi, ngayi okpala bhende abhuka 'li Ndili gba Ebhe-o. Ma aye pi yi, amba yi mbila me yi asia mukobho na duduma asia. <sup>14</sup> Engu ni nde lie ne tsulu kala Ebhe belegu ade bini-e ngae inde: ni ngambila ndjindji me, i du me ni nde ayo 'he ka ani maka ani ngakukunda lie, ani dje ni. <sup>15</sup> I du la me ni nde ambila me ani ngadje ni bhú ndu mayo gba ni-e hana-a, ni ambila di ndjindji me ni asia 'he inde ni ayo e ka ani-e asia.

<sup>16</sup> I du me kpala bini nde au ndai e ngamene siti 'ngu-o, li siti 'ngu ang-o du bhende i to ani bhú kuo de-e, a ayo me ani yo Ebhe ngu ani, amba kpala na siti 'ngu ang-o sia mukobho. Bhobhomu ndjindji pi kpala bhende ngamene siti 'ngu inde i to ani bhú kuo de ko. Engu bini, a ne siti 'ngu inde ato kpala bhú kuo, ma pa de me u yo Ebhe ngu bhende bhomu-o de. <sup>17</sup> Ndu 'ngu hana inde ngbingbili bhú djila Ebhe ade-e, a ko siti 'ngu. La-a, ndu 'ngu hana toto kpala bhú kuo de.

<sup>18</sup> Ni ngambila ndjindji me kpala inde li Ebhe azu e ngae dhedhedhe li namene siti 'ngu belegu de bini.

\* 5:6 5:6 Engu di ne ngute: Bhele na okpala ngabhundja me engu-o, a ko batisimo gba Yesu-o, ngute-e, a ko nakpi gba ani-o.

Padhá de, anga Yesu Ndili gba Ebhe-e ngalila ani ngae, la di-e, Siti ti da namene 'he ngú ani belegu de bini.

<sup>19</sup> Ní ambila me ní naaní ne okpála gba Ebhe, engú la bini, doto libhomu sa 'kpa Siti.

<sup>20</sup> Ní ambila me Ndili gba Ebhe-e ago, ani atsia aha imbilangu pi ní, amba ní mbila Ebhe na kukulú-o. Ní akpètse liní ne Ebhe na kukulú-o, li pápá gba Ndili gba ani Yesu Kilisito. Ngaani-e, a ko Ebhe na kukulú, a ko la di mukobho na duduama.

<sup>21</sup> Odi ma, yi lila liyi ka oebhe na eu-o ndjindji.

## Balua na bhisi gba Djaa Eli na kalanu

Bhele kpála Djaa , aye nani balua gba e na bhisi pi elə bini ne ongisi gba e. A mana mugito me, u aye pi Dadjua gba Ebhe inde u adu ayo Ebhe bhú e ne okpála inde bhúbhú. Engú na ndundu inde adu bhúbhú-o, a ko bha me u du ne mukunda sunda o. Ani atsia apa me u lila lio ka omusuno na eu, ne nasuno gba o-o.

**Ongbengbe ongú inde bhú bhuku inde-e ngae inde:**

Eli na kalanu 1-3

Engú na kalanu inde a ayo me mukunda mene e 4-6

Nalila lio ka nasuno na eu 7-11

Eli na soso 12-13

*Djaa yi okpála inde li Ebhe abhu o-o mayi*

<sup>1</sup> Ngama, Bhele Kpála , ma ngaye balua inde-e pi yi, Ohi ní,\* ngamu kpála inde li Ebhe abhu e di ne ongisi gba e inde ma ngakunda o na kukulu-o. Ma ngakunda bha yi ngama kpi ma kpi ade, ndu okpála hana inde ambila kukulu 'ngú-o akunda bhadi yi moko. <sup>2</sup> Padhá de, anga a ngadu bhú ní ne engú na kukulu. La di-e, kukulu 'ngú angoo adú bhú dabili bini ne ní ndu 'kpí hana.

<sup>3</sup> A ayo me Ebhe 'Dyi ní, di ne Yesu Kilisito , Ndili gba 'Dyi ní-e, bhú mukunda di ne kukulu 'ngú gba o-o, suno bádha bhú 'bu pi ní, u dje ndjinga ní, amba u ha la di guo 'ngú pi ní.

*Engú pindji engú na kukulu di ne mukunda*

<sup>4</sup> Ma akpi djali naali, anga ma abhaka ongisi koko gba mu-o ngadhola bhú engú na kukulu, maka líli inde ní asia e ka 'Dyi ní ko. <sup>5</sup> Pi mbia inde-e, Ohi ní, engú inde ma ngayo e ka mu-o, a ngae inde: ní du ne mukunda sunda ní. A ko de me ma ngaye pi mu líli na mbia de, a ko líli inde ní asia e nayie bha bini li lilita† ko. <sup>6</sup> Lele li mukunda nde lie ngae inde: a ko namene olíli gba Ebhe-o. La di-e, líli angoo, a ko bha bhende yi adje nani e nayie li lilita me, a ayo me yi du bhú mukunda.

*Yi lila liyi ka okpála napite okpála-a malila*

<sup>7</sup> Okpála bhelé inde ngapite okpála atsambala ne bili ngangá pía doto. U ziba naao de me Yesu Kilisito ago nani bhú kate na kpála-kuti-e de. Kpála inde ngapa mo-o, a ko bhulu napite okpála, a ko la di bhulu yala gba Kilisito. <sup>8</sup> 'E-e! Yi lila liyi ngayi makpe-e ndjindji, ngubula me yi anéke makalá na kulu gba ya-a de. Engú bini, a ayo me yi sia makalá-a libhomu.

<sup>9</sup> Kpála ne kpála inde i lila nasuno inde u aha e pi yi pindji Kilisito de-e, inde i nga'o la di engú koko pépé-e, kpála angoo bhú Ebhe ade. Kpála inde la ngalila nasuno angoo, kpála angoo ngadu bhú 'Dyi Ndili-o, di ne Ndili-o. <sup>10</sup> I du me kpála nde ago, ani suno la di pi yi engú koko kpi-e, yi asia ani agba yi de, yi abhia di kúo li ani de. <sup>11</sup> Padhá de, anga kpála inde abhia kúo li ani-e, a asuno bhomu-o me u akpetse lio ne ani bhú osisiti 'ngú gba ani-o.

<sup>12</sup> Ma ne engú bhelé ngú napapa pi yi. La-a, ma kunda nayeye maye de, anga ma ne 'to ma 'to nanu agba yi oo, ngubula me ní gama 'ngú ne yi me ní nde ngau liní mau, amba ní kpi djali ndjindji.

\* **1:1** 1:1 Ohi ní: Okpála bhelé ngabhundja me Ohi ní inde si-e, a ko Piga gba Ebhe, ongisi gba ani-e, a ko omabhuka . † **1:5** 1:5 Nayie li lilita: A ko nayie li nedhinga inde u adje nani 'li Ebhe lie ko. Tsia bhú lukuluku 6, di ne bhú 1 Dja. 2:7, 24, 3:11. ‡ **1:13** 1:13 Ongisi gba Ndai mu na Oelə li Ebhe abhu e-o: A akunda napa me omabhuka na Dadjua na Ebhe li Djaa adu nadu lie-o.



13 Ongisi gba Ndai mụ na Өөө,  
kpála inde li Ebhe abhụ e-e# apa me,  
o yi mụ mayi.

## Balua na bata gba Djaa Eli na kalanu

Bhele kpála Djaa , aye balua inde-e pi bhele kpála natsia 'kpí li Dadjua gba Ebhe inde 'li e me Gaiusi. Djaa adu agama 'ngú gba ani-e ndjindji, anga ani adu asia omakilisito inde adu ago agba ani-e ndjindji-e naali. Ani atsia a ayo ka ani me, ani lila li e ka bhoko bini inde a du 'li e me Diotelefe malila.

### **Ongbengbe ongú inde bhú bhuku inde-e ngae inde:**

Eli na kalanu 1-4

Nakpo 'ngú ndjindji li kute Gaiusi 5-8

Na'o 'ngú pindji Diotelefe 9-10

Na'o 'ngú pindji Demetiliusi 11-12

Eli na soso 13-15

### *Djaa yi Gaiusi mayi*

<sup>1</sup> Ngama, Bhele Kpála , ma ngaye balua inde-e pi mu Gaiusi, ngamu ndai ma na mukunda, inde ma kunda e kukulu-o.

<sup>2</sup> Ndai ma na mukunda, gumu gba ma me ndu 'ngú gba mu-o hana dholo ndjindji, mu du ne kute na angu, maka mu nde lie ne angu li bua mu ko.

### *Gaiusi ngadholo bhú engú na kukulu*

<sup>3</sup> Ma akpi nako djali naali, anga li nedhinga inde li ondaise ní ago lie, u akpokpo mu ma me mu ngamene engú na kukulu. A moko, mu ngadholo bhú engú na kukulu. <sup>4</sup> Ehe inde la ngaha djali mu ma ane ndu ongú koko hana-a, a ko nadjé me ongisi gba ma-a ngadholo bhú engú na kukulu.

<sup>5</sup> Ndai ma na mukunda, mu ngamene engú inde na babadha pi ondaise ní, belegu di ne pi obhende mu mbila o de-o. <sup>6</sup> U akpokpo engú na mukunda gba mu-o kala okpála na Piga gba Ebhe. Mene

'he inde ndjindji bhú djila Ebhe, ne naha ehe inde atéteke uo li kpadji-e pi uo. <sup>7</sup> Padhá de, anga u ngadholo ngabula 'li Kilisito . La di-e, u ti da nasia 'he ka omupagano belegu de bini. <sup>8</sup> Kaka-a, a ayo me nganí makpe-e, ní teteke ngua okpála bhomu-o nganí, amba ní kpetsé di liní ne uo ngú nakpokpo 'ngú na kukulu.

### *Engú pindji Diotelefe ngauo ne Demetiliusi*

<sup>9</sup> Ma aye nako mboye balua pi okpála na Dadjua gba Ebhe. Engú bini, Diotelefe, kpála inde akunda naae me bhú ndu 'ngú hana u dje bha ni-e, atsia au engú ango-o bhú djila e padhá. <sup>10</sup> Kaka-a, ma agó lie, ma ambamba ta engú na sisiti inde ani ngamene e-o. Ani ngapa ongú na sisiti di ne eu li kute ya. Engú bini, ani pise bha bini li bhende bhomu-o de, ani ngayala nasia ondaise ní. Ani ngapa la di pi obhende ngakunda nasia uo me u mene mo-o, ní pándja uo bhú Piga gba Ebhe-o.

<sup>11</sup> Ndai ma na mukunda, mo oméne 'ngú maka okpála na sisiti de. Engú bini, mene mangbo engú maka okpála na babadha. Kpála bhende ngamene bádha 'ngú-o, a ko kpála gba Ebhe. Kpála bhende ngamene siti 'ngú-o, kpála bhomu-o mbila Ebhe de.

<sup>12</sup> Ndu okpála hana ngakpo 'ngú pindji Demetiliusi ndjindji. La di-e, engú na kukulu ngae makpe ngakpokpo 'ngú gba ani-o. Nganí di-e, ní bhadi ngakpokpo 'ngú gba ani-e moko. Mu ngambila la di me engú inde ní ngakpokpo e, a ko kukulu 'ngú.

<sup>13</sup> Ma ne ongú bhelé napapa pi mu. La-a, ma kunda nayeye maye de, <sup>14</sup> anga ma akunda nau mu má gala, amba ní gama 'ngú me ní nde ngau liní mau.

<sup>15</sup> A ayo me guo 'ngú du bhú dabili bini ne mu! Ondaise ní inde ei-e apa me, o yi mu mayi. Pa la di pi ondaise

ní inde oo me, ya yi kpála bini ne  
bini mayi.

## Balua gba Djude Eli na kalanu

Djude aye nani balua inde-e ngubula napa me, omabhuka lila lio ka omusuno na eu inde adu apa me ni ne omabhuka-a malila. Bhu ndu balua inde-e, ongu inde bhuhbu-o, maka bhende bhu balua na bhisi gba Piele-o. Djude ngato masi bhu okpala inde ngatatanga me, u gu gbele ngubula nabhuka inde li Ebhe aha nani e pi okpala gba e ngubula ndu 'kpi hana-o.

### Ongbenge ongu inde bhu bhuku inde-e ngae inde:

Eli na kalanu 1-2

Dasundu, ne nasuno, a la di-e likabhu gba omusuno na eu 3-16

Lili ngubula nalila nabhuka 17-23  
Bisagu 24-25

### *Djude yi omabhuka mayi*

<sup>1</sup> Ma aye balua inde-e ngama Djude. Ma ne bali gba Yesu Kilisito, ma la di ne ndai Djaki. Ma aye balua inde-e pi okpala inde li Ebhe, 'Dyi ni a'i o-o. Ani ne mukunda pi uo, ani di ngalila uo bhu 'bu Yesu Kilisito. <sup>2</sup> A ayo me Ebhe dje ndjinga yi, ani ha guo 'ngu pi yi, amba ani bedhe yi ne mukunda gba e ane mane.

### *Yi lila liyi ka omusuno na eu-o malila*

<sup>3</sup> Ondaise ma na mukunda, ma adu nako ne gumu naali me ma ye balua pi yi pindji mukobho inde ngakpetse ndu ni hana-o. La mbia inde-e, ma au ndjindji me ma ye balua pi yi ngu nato masi bhu yi me yi gu gbele ngu nabhuka inde li Ebhe aha e pi omaha e-o. Nabhuka ango-o dji galikpe lie belegu de bini. <sup>4</sup> Padha de, anga okpala koko bhu

ka yi sisiti, u ali bhu ka yi bhu pepe. U ngadji ta badha bhu 'bu gba Ebhe gba ni-e ngu nasia kpadji me o mene ndu osisiti 'ngu inde u akunda e hana. U bhomu-o ngayala koli Musuno inde di Ngama gba ni Yesu Kilisito-o. Okpala ango-o, u aye nani mangimbo gba uo-o bhu Bhuku gba Ebhe-e bhutode.

<sup>5</sup> Belegu yi ambila nani ndu ongu inde-e lie hana didili-e, ma akunda mata napapa pi yi ne toto me, Ebhe Ngama gba ni-e agbegbe nani okpala na Isalaele bhu bali bhu doto na Edjipeto agbegbe. Ani atsia abhili obhende i bhuka ani de-o. <sup>6</sup> Yi kina nga me oandjelu inde i lila nani kulu gba o-o de-e, inde a'o ka dabili gba o-o, Ebhe agbigbite uo ne gbindjili na duduma, ani atsia abu uo li bili na biti bhe ma ndundulundu ngu nadjeké 'ngbé 'kpi nakodho mangimbo gba okpala-o. <sup>7</sup> Yi kina nga me okpala na Sodomu ne Gomolo di ne ogudhu koko na ngo ogudhu bhomu-o amene bhadi nani siti 'ngu maka oandjelu bhomu. U adu amene 'ngu na sisiti inde li kpala-kuti ti da namene e de. Kaka-a, u naki ngazu likabhu bhu djua na duduma ngu nasuno pi okpala me, a ayo namene ngua siti 'ngu bhomu-o de.

<sup>8</sup> Okpala na sisiti inde ali bhu ka yi bhomu-o bhadi ngamene ngua siti 'ngu bhomu-o moko. Ka 'ngu na ngingi inde bhu 'ndji uo-o, u ngasiti kute o. U kunda de me Ebhe u ngama pi 'dji o-o de. U manga la di oandjelu inde li o ne zizi-e\* de. <sup>9</sup> La-a, belegu Mikaele ngama gba oandjelu-o mene nani mo-o de. Bhu nagbe bhayiki gba uo ne Djabulu-o, u adu amene kpeke 'bhe lie ngubula kuo Moidje-e, Mikaele pa 'ngu na numu li kute djabulu de. Engu bini ani apa bha pi ani me: «Ebhe mene bhado mu sisiti!»† <sup>10</sup> Engu

\* **1:8** 1:8 Oandjelu inde li o ne zizi: A akunda napa me oandjelu inde ngamanga 'li Ebhe. † **1:9** 1:9 Ongu koko inde bhu lukuluku inde-e, a bhu obhuku koko na gandja na didili-e ade. A ko ongu inde li omaYuda adu nani akpokpo e maka tsinga. A viti bini ne bhende bhu lukuluku 14-15.

bini, okpála na sisiti inde bhú ká yi-e, ngagama 'ngú sisiti li kute engú bhende u mbila e de. Uo maka onú abhú bili, u ngabhubhundja ade. U ngamene bha bini engú bhende akoto bhú 'ndji o. Engú ango-o la ngabhili uo ngae. <sup>11</sup> A ko likabhu pi uo! Padhá de, anga u akpata kpadji li Kaina akpata nani e-o. U akpata nganda Balama ka gumu tia gba o-o. U amu anga u ngamene kpéke 'ndji pi Ebhe maka li Kole amene nani lie-o.

<sup>12</sup> Uo ngaha numu pi yi bhú obili li yi apópokèbhè bhúla yi li e ngú nazú 'he na mukunda sunda yi-o. U ngabedhe 'bu o ne ezú má kpambi! Numu li uo ade, uo bha bini ngabhundja engú gba o makpe. Uo maka ndindi inde li anvi ngandjindjimba e, li ebha nde bhú e ade-o. Uo maka ndula inde i li lílì de bhú nedhinga nali lílì-o, inde u agbe dú e, a tsia akpi hana má kpèkèbhè-o! <sup>13</sup> Uo maka ongbengbe 'ngbo 'ngu na ngade 'ngu. U ngapandja ongu na numu gba o-o maka li ngade 'ngu agbegbe efu lie. Uo maka oikupala inde ambu li kpadji o. Ebhe aleke dabili na duduma ne duduma pi uo bhú biti má ndundulundu!

<sup>14</sup> Enoka, nani ne ogbi ní na mananika nayie li Adamu . Aní akpokpo nani maka polofeta li 'ngú gba okpála ango-o me: «Yi tsitsia nga Ngámá ngago bhú dabili bini ne bhiti obubu okpála gba e na bhibhiti-o, <sup>15</sup> ngú nakodho 'ngú gba ndu okpála hana. Aní a'ó mangimbo pí ndu okpála na sisiti hana ngubula ndu osisiti 'ngú inde u amene e, nedhinga li u agbe kpéke 'ndji lie li Ebhe, di ne ngubula sisiti oeli inde li okpála na mugwe apa e li kute ani-o.» <sup>16</sup> Okpála ango-o ngadi mutokono di ne nalopolo lio ndu 'kpí hana, uo ngadhuku bha bini maka li gumu gba uo makpe apa lie. U ngapa bha bini ongu inde ane dada mane, u la di ngapa 'li okpála koko ngubula me o sia 'he ka uo.

### *Dapo pi omakilisito*

<sup>17</sup> La pi yi ondaise ma na mukunda-a, yi bhundja oeli inde li obhulu titima gba Ngámá gba ní Yesu Kilisito apa nani e pi yi-o. <sup>18</sup> U apa nani pi yi me: «Li sokpi-e, adú ne okpála inde amú yi, u tsia dú akpata osisiti gumu gba o makpe.» <sup>19</sup> Okpála ango-o, a ko okpála inde ngagbo bhusu okpála. A bha bini bhú 'ndji uo ne imbilangu bhe na kute, Bua gba Ebhe-e bhú uo ade. <sup>20</sup> La pi yi ondaise ma na mukunda-a, yi mene ne kpéke me yi teteke liyi sunda yi ngubula me ndu yi hana yi lu kpekpeke bhú nabhuka inde bubu naali-o. Yi yo Ebhe ne angu gba Bu Bhobua . <sup>21</sup> Yi du nadhuku li lele da napa me Ebhe du nasuno mukunda gba e pi yi. Yi 'o 'to yi li nedhinga li Ngámá gba ní Yesu Kilisito apána ndjinga gba e lie pi yi, ani tsia há mukobho na duduma pi yi-o. <sup>22</sup> Yi dje ndjinga okpála bhende ne bua na bhisi bhisi bhú ká yi-o. <sup>23</sup> Yi kobho uo, amba u atsulu bhú djua de. Yi dje ndjinga okpála koko, la-a, yi lila liyi me, belegu bongo gba uo inde asiti ne osisiti 'ngú gba uo inde u ngamene e, atunu lie li kute yi de.

<sup>24-25</sup> Sangu pi koli Ebhe bini inde akobho ní li kpadji gba Yesu Kilisito, Ngámá gba ní-o. Aní ti da nayoko me yi atí bhú siti 'ngú de, ani ti da namene me yi koto kala ni me engú na sisiti nde bhú yi ade, di ne me yi nde abedhe ne djali bedhe. A ayo me okpála dhogè ani, a ayo me ani u, a ayo me angu di ne ngámá du bhú dabili bini ne ani mbia inde, duduma ne duduma. A adu moko!

## Apokalipisi Ongú inde u ambamba ta e Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulú nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámábá. A ko ongú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhúlá na mbia di ne doto na mbia inde ani ako angu e pí ndu 'ngú lie hana-o.

### Ongbengbe ongú inde bhú bhuku inde-e ngae inde:

Eli na kalanu 1:1-20

Balua pi oDadjua mananika gba

Ebhe 2 - 3

Malika 4:1 - 8:5

Ototi mananika 8:6 - 11:19

Nau ongú mananika maka loto 12:1 - 15:8

Okópo mananika na ke 'ngú gba Ebhe 16:1-21

Ongú mananika u apa e pindji babilona 17:1 - 19:10

Nabu ta 'ngú pindji nau ongú mananika maka loto 19:11 - 21:8

Yelusalema na mbia, ele gba Ndili Kandele 21:9 - 22:21

Lita 'ngú-o

<sup>1</sup> Bhuku inde-e ngakpokpo 'ngú pindji engú inde li Ebhe ambamba ta e pi Yesu Kilisito-o . Ebhe ambamba tata pi ani ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú ango-o pi bali gba ni Djaa . <sup>2</sup> Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulú 'ngú inde li Yesu Kilisito ambamba ta e pi ani-o. <sup>3</sup> A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú ango-o akolo masikpe.

### *Djaa yi okpála na oDadjua mananika gba Ebhe-e mayi*

<sup>4-5</sup> Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. <sup>6</sup> Ani amene me ní kolo okpála na Nau gba Ebhe . Ani amene di me ní kolo odimande ngubula namene kulu liní pi Ebhe, 'Dyi ni. A ayo me sangu di ne angu du pi ani duduma ne duduma! A adu moko.

<sup>7</sup> Yi tsitsia, ani ngago bhú ndindi!

Ndu okpála hana aú ani, belegu obhende adu nani kala ani ne mandambi-o.

Ndu opiga inde pála doto libhomu adú bhú

'gbá li 'ngú gba ani-o.

Heni, a adu moko!

<sup>8</sup> Ebhe Ngámá Apí 'Kpí apa me: «Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.» Ebhe ne Kpála inde u, Kpála inde adu nani u, Kpála inde di ngago.

*Djaa au Kilisito bhú 'he maka loto*

<sup>9</sup> Ngama Djaa, ma ne ndai yi inde ngakobho bhú dabili bini ne yi bhú likabhu, ne bhú Nau ne nazi kekele bhú nabhuka Yesu. Ngama-a, ma du nako bhú kpata bhú kpomø inde u a'i e me Patemosi kabula 'li Ebhe, la di anga ma ngakpokpo kukulu 'ngú inde li Yesu ambamba ta e-o. <sup>10</sup> Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. <sup>11</sup> Eli ango-o apa me: «Ehe inde mu ngau e-e, ye bhú bhuku bini, amba mu tima bhú oDadjua mananika gba Ebhe inde bhú Efeso, bhú Similine, bhú Pelegame, bhú Tiatile, bhú Salade, bhú Filadelefi ne bhú Laodisé.»

<sup>12</sup> Abhomu-o, ma adji lima ngú natsia kpála inde adu nagama 'ngú muma-o. Ma adji lima lie, ma au otala na olo mananika. <sup>13</sup> Bhú ka otala ango-o, ehe bini adu maka kpála-kuti. Ani adyi 'ndjá bongo akolo bhú 'dhu e, ani atsia agbite mbulu e ne mukabha inde u amene e li olo.† <sup>14</sup> 'Ndji ani ne sundjo ani avu má tuu, maka kato! Djila ani adu nade maka zi djua. <sup>15</sup> 'Dhu ani adu nasu maka kalase na kpéke mase inde u ato e bhú djua, zizi atsia aholo nasu. 'Li ani adu maka tolo wowo 'ngu. <sup>16</sup> Ani aholo ikupala mananika ne 'kpa e na kokpa. A adu akoto bhú 'bhø ani ne mbotia inde adhe ne ndu pasu bhisi hana. Bhúla ani adu asu maka kpéke zindjila na tulukpe.

<sup>17</sup> Ma au ani lie, ma ati bhú li 'dhu ani maka kpála inde akpi. Pipita-a, ani a'o 'kpa e na kokpa-a pí ma,

ani atsia apa muma me: «Mo okpé-e de! Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. <sup>18</sup> Ma la di bhú mukobho. Ma adu nako me ma nde akpi, la mbia inde-e, ma bhú mukobho na duduma. Ma ne angu pí 'ndji kuo di ne pí 'ndji bili gba okpála inde amu. <sup>19</sup> Kaka-a, ye ongu inde mo ou e inde. A ko ongu inde ngakodho 'kpí, di ne ongu inde a ayo me ago pipita ko. <sup>20</sup> Pindji oikupala mananika inde mo ou e sa 'kpa ma na kokpa, di ne otala mananika na olo-o, gbo nga 'dje mu, ma mbamba kukulu tata-a pí mu. Mbila me, oikupala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

## 2

*Balua pi okpála na Dadjua na Efeso*

<sup>1</sup> Kpála inde ma au e apa matá muma me: «Ye balua pi andjelu na Dadjua na kuti na Efeso me:

«Kpála inde aholo oikupala mananika sa 'kpa e na kokpa, inde ngadholo bhú ká otala mananika na olo-o apa me: <sup>2</sup> Ma mbila okulu gba mu-o hana. Ma mbila hana me mo omene kulu kpekpeke, me mu di ne bua na kekele. Ma mbila hana me mu tí da naziba osisiti okpála de. Ma mbila hana me mo ole okpála inde ngapa me o ne obhulu titima gba ma-a me u nde la mo-o ade-e, mo atsia au me a ko obhulu eu. <sup>3</sup> Ma mbila hana me a bhú mu ne kekele, mo osia likabhu ngubula 'li ma, mu tsia ndala de.

<sup>4</sup> La-a, siti 'ngú inde ma au e li pabili gba mu-o, a ko me mo o'o ká mukunda inde mo okunda nani ma ne e a'o. <sup>5</sup> Kaka-a, bhundja nga bili inde mo oti li e-o. Dji bua mu, amba mu mene okulu maka mo odu nako namemene lie kalanu ko. † du mo-o de-e, ma agó li pabili

† 1:13 1:13 Tsia bhú Dan. 7:13.

gba mụ, ma a'é tala gba mụ li bili i nde li e-o, i dū me mụ nde dji bua mụ de ko. <sup>6</sup> Engú bini, bádha 'ngú inde bhú mụ-o ngae inde: mụ ngayala okulu inde li oNikolaite ngasuno e, maka ngama makpe di-e, ma ngayayala lie-o.

<sup>7</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomụ-o, ma ahá lí ndula na mukobho inde bhú edyi gba Ebhe-e pi ani me ani dū nazuzụ. Edyi ango-o bhú kuti na mundayi gba Ebhe-o.»

### *Balua pi okpála na Dadjua na Similine*

<sup>8</sup> Kpála inde ma au e apa matá mụma me: «Ye balua pi andjelu na Dadjua na Similine me:

«Kpála inde akpo lita ndū 'ngú hana, inde di abú ta ndū ongú hana, Kpála inde akpi nani, engú bini atsia azuku-o apa me: <sup>9</sup> Ma mbila likabhu gba mụ di ne ndibhili gba mụ-o hana, engú bini, kụkụlụ tia mangbo ngae inde ka mụ-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi mụ lie hana. La ngauo-o, a ko omaYuda de, a ko okpála gba Satana ! <sup>10</sup> Mo odjé tsulụ ka likabhu inde mo osía e de. Djedje nga, djabulụ andí okpála bini bini bhú ká yi bhú tikpụ ngú nale yi. U ató mbolo li yi ngubula ekpí ndjikpa. Mo oyála ma de, abana i yo bha me u bhөлө mụ. Pipita-a, ma ahá ndata na 'ngbө ndua pi mụ maka makalá gba mụ-o. Ndata na 'ngbө ndua ango-o, a ko mukobho na dūduma.

<sup>11</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomụ-o, ani sía likabhu gba nakpi na bhisi-e belegụ de bini.»

### *Balua pi okpála na Dadjua na Pelegame*

<sup>12</sup> Kpála inde ma au e apa matá mụma me: «Ye balua pi andjelu na Dadjua na Pelegame me:

«Kpála inde ka e ne mbotia inde ngadhe ne ndū pasụ bhisi hana-a, apa me: <sup>13</sup> Ma mbila bili inde mụ ngadụ li e hana, bili ango-o, Satana ne ngámá oo ngae. Mụ ngalila 'li ma. Mụ ndala 'kpa li nabhuka gba mụ bhú ma-a de, abana bha li nedhinga u abhөлө Atipasi lie agba yi, li bili li Satana ngadụ li e-o. Atipasi adū nani nakpokpo 'ngú gba ma mbámhá kala okpála.

<sup>14</sup> La-a, siti 'ngú inde ma au e li pabili gba mụ-o, a ko me, a agba mụ ne okpála koko inde ngadhedhe li 'ngú li Balama adū nani nasuno e pi Balaka-o. Balama adū nani nasuno pi Balaka me ani to omaIsalaele bhú siti 'ngú. Ani adū apite uo me u zụ oenụ inde u aha o pi oebhe na eu, amba u dū di nakunda olisi, i dū di-e obhosi ngangá. <sup>15</sup> A bhadi moko, a di bhú ká okpála gba mụ-o ne obhende adhedhe li nasuno siti líli maka oNikolaite ngasusuno lie-o. <sup>16</sup> Kaka-a, dji bua mụ. Padhá de, anga i dū mo-o de-e, ma ngago agba mụ má gala, ma tsia gú okpála ango-o ne mbotia inde ngakoto bhú 'bhө ma-o.

<sup>17</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomụ-o, ma ahá mana inde awo lie mawo-o pi ani. Ma ahá la di linga pi ani. U aye pí linga ango-o 'ili na mbia inde li kpála bini mbila ta e de, bha bini kpála inde asia linga ango-o ko!»

### *Balua pi okpála na Dadjua na Tiatile*



18 Kpála inde ma au e apa matá muma me: «Ye balua pi andjelu na Dadjua na Tiatile me:

«Ndili gba Ebhe inde li Djila e ngade maka djua, li zi 'dhu e nde ngasɔ maka kalase na kpéke mase, apa me: 19 Ma mbila okulu gba mɔ-o hana. Ma mbila mukunda gba mɔ-o hana. Ma mbila nabhuka gba mɔ-o hana. Ma mbila kulu mo omemene e pi okpála di ne kekele gba mɔ-o hana. Ma mbila hana me kulu mɔ ngamene e mbia inde-e ane bhe na kalanɔ-o ne bhelé. 20 La-a, siti 'ngú inde ma au e li pabili gba mɔ-o, a ko me, mɔ ngaziba Djedjabele, eɔ inde ngapa me ni ne polofeta gba Ebhe-o. Ani ngapite obalise gba ma-a ne nasuno pi uo engú na zabhe, di ne nazɔ onɔ inde u aha o pi oebhe na eu-o. 21 Ma a'o nako nedhinga pi ani me ani dji bua e. Engú bini, ani kunda nadjibua e de me ni 'o nakunda obhosi ngangá ma'o-o de.

22 Kaka-a, ma agú 'i ani pí polo na 'ngbé likabhu bhú dabili bini ne obhende ngakunda obhosi, i dɔ di-e olisi gba okpála koko bhú dabili bini ne ani-o, i dɔ me okpála ango-o nde dji 'ngbɔ o li sisiti kulu gba ani de-o. 23 Ma abhili okpála inde ngakpata nganda ani-o, li ndɔ okpála na oDadjua gba Ebhe-e hana mbila me ma ne kpála inde i ngambila mabhundja di ne gumɔ gba okpála hana. Ma ahá pi kpála ne kpála bhú ká yi makalá nakpata bha lele siti 'ngú inde ani amene e ko. 24 La ngayi okpála na Dadjua na Tiatile, inde i dhedhe li nasuno na sisiti bhomɔ-o de-e, inde i kpata di engú li okpála bhomɔ-o nga'i e me, "Engú nawo mawo gba Satana" de-e, ma ne líli koko na'o'o pí yi ade. 25 Engú bini, yi dhedhe bha li engú inde ka yi akólo bha bini li 'kpí inde ma agó lie ko.

26-28 Kpála inde agbóko 'gú

bhomɔ-o, inde alíla okulu gba ma nakolo ali soso-o, ma ahá pi ani angu inde ma asia e ngama makpe ka 'Dyi ma-o. Ma a'ó ani ngámá pí 'ndji opiga. Ani aú ngámá pí 'ndji uo. Ani ahólo kalase sa 'kpa e, ani tsia dú agugumɔ uo maka u agugumɔ omadakpa lie ko.† Ma ahá di ikupala inde asusɔ kɔkpí-e pi kpála ango-o ngú nasuno me ani agboko 'gú-o agboko.

29 A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

### 3

#### *Balua pi okpála na Dadjua na Salade*

1 Kpála inde ma au e apa matá muma me: «Ye balua pi andjelu na Dadjua na Salade me:

«Kpála inde li obua mananika gba Ebhe, di ne oikupala mananika nde ka e apa me: Ma mbila okulu gba mɔ-o hana. Okpála ngapa me mɔ ɔɔ, engú bini, mo okpi. 2 Zuzukɔ, mene ne kpéke me mo obúlɔ bha má pii de! Padhá de, anga ma au me kulu gba mɔ-o kolo nga li lelele de. 3 Kaka-a, bhundja nasuno inde mo osia nani e-o ne lele maka mo odje nani lie-o. Dji bua mɔ, amba mɔ lila nasuno ango-o malila! I dɔ la me mɔ nde zukɔ de-e, ma gó maka bhulɔ 'zi, ma kóto li mɔ bhú gbilikiti, me mɔ nde mbila nedhinga ango-o de.

4 Engú bini, a bhú ka yi okpála na Salade ne okpála bini bini inde i siti obongo gba o-o de. U adyí obongo na bububu, ngaya ne uo-o, ya tsia dhólo bhú dabili bini. Padhá de, anga u atí ne nadhukɔ ne ma bhú dabili bini ngao. 5 A moko, kpála inde agbóko 'gú bhomɔ-o, adyí obubu bongo. Ma búlɔ 'li ani bhú bhuku na mukobho-o de. La di-e, ma aziba

† 2:26-28 2:26-28 Tsia bhú Ets. 2:8-9.

kala 'Dyi ma, di ne kala oandjelu gba ani-e me, a ko kpála ka ma.

<sup>6</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!>>

*Balua pi okpála na Dadjua na Filadelefi*

<sup>7</sup> Kpála inde ma au e apa matá muma me: «Ye balua pi andjelu na Dadjua na Filadelefi me:

«Kpála inde bubu, inde i papa eu de, inde li fungula gba Davidi nde ka e-e, inde i 'u bhoti-e, kpála bini ti da nanini de, inde i ni la di bhoti-e, kpála bini ti da na 'u 'u de-e, apa me: <sup>8</sup> Ma mbila okulu gba mu-o hana. Ma mbila hana me mu kpékpéke ade. La-a, mo olila 'li ma ndjindji. Mo opa mbámbá me mu ne kpála ka ma. Kaka-a, ma a 'u bhoti kala mu, bhoti ango-o, kpála bini ti da nanini de. <sup>9</sup> Tsia nga engú inde ma améne e li okpála gba Satana , obhulu eu inde ngapa me o ne omaYuda me a nde omaYuda ade-o: ma agbéle uo kala mu, u tutu lipuku o kuto kala mu ngu nadhogu mu, amba u mbila me ma ngakunda mu. <sup>10</sup> Mo olila lili gba ma pindji naholo bua o ndjindji. Kaka-a, ngama di-e, ma alila bhadi mu moko li nedhinga na kpéke da 'ngú inde agó pila doto libhomu ngu nale okpála na doto ko. <sup>11</sup> Ma agó mbia! Dhedhe li nasuno inde mo odje e ndjindji, ngubula me kpála bini adhépe ndata na 'ngbè ndua gba mu-o de.

<sup>12</sup> Kpála inde agbóko 'gú bhomu-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegu de bini. Ma ayé 'li Ebhe gba ma-a li kute ani, bhú dabili bini ne 'li gudhu gba Ebhe gba ma-o. Gudhu ango-o, a ko Yelusalema na mbia inde ayie abhúla, inde li Ebhe atíma galikpe e-o. La di-e, ma ayé 'li gba ma na mbia li kute ani.

<sup>13</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!>>

*Balua pi okpála na Dadjua na Laodisé*

<sup>14</sup> Kpála inde ma au e bhomu-o atsia apa muma li soso me: «Ye balua pi andjelu na Dadjua na Laodisé-e me:

«Kpála inde 'li e me "A du moko", kukulu kpála inde ngakpokpo 'ngú me ani nde 'o koko pépé de-e, inde lita ndu 'he li Ebhe abho e hana-a apa me: <sup>15</sup> Ma mbila okulu gba mu-o hana. Mu kpikpina ade, mu di kpákpá ade. A ayo igini me mu de adu kpikpina, i du mo-o de-e, mu du kpákpá. <sup>16</sup> I nde lie me mu nde yapayapa-a, mu nde kpikpina adie, mu la di kpákpá adie, ma azie mu mazie!

<sup>17</sup> Mu ngapa me: "Ma ne bhulu tia, ma asia tia bhelé, ma ne gumu 'he belegu ade bini." Engú la bini, mu mbila de me ni bhú likabhu-o de. Mu mbila de me ni nga'o li ma ndjinga-a de. Mu mbila de me ni ne bhulu ndibhili-e de. Mu mbila de me ni u 'kpí de-e de. Mu mbila la di de me ni ndumbu-o de. <sup>18</sup> Kaka-a, ma ngayo ka mu me, a ayo nakala olo inde li djua aleke e ndjindji-e ka ma, ngubula me mu kolo bhulu tia. Ma ngayo ka mu me, a ayo nakala di obongo na bububu ka ma ngu nadyidi li kute mu, amba numu améne mu ka ndumbu gba mu-o de. Ma ngayo ka mu me, a ayo nakala la di elá ngu nasese bhú djila mu, amba mu du au 'kpí ndjindji.

<sup>19</sup> La pi ma-a, ndu okpála inde ma akukunda o hana, ma ngambe bhú 'ndji uo, ma di ngasuno oehe inde u mene e ndjindji de-e pi uo. Kaka-a, a ayo me mu dji bua mu, amba mu du kpákpá. <sup>20</sup> Djedje nga, ma alu li 'bhé bhoti-o, ma ngabhibhi. Li kpála dje 'li ma, ani 'u 'bhé bhoti-e, ma li agba ani, li

ngaya ne ani-e, ya tsia zú 'he ne ani bhú dabili bini.

<sup>21</sup> Kpála inde agbóko 'gú bhomu-o, ma azíba pí ani nadu bhú dabili bini ne ma pí kiti na ngámá gba ma maka ngama di ma agboko 'gú lie, ma atsia adu bhú dabili bini ne 'Dyi ma pí kiti gba e na ngámá ko.

<sup>22</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

## 4

### *Abhúlá-a, ndu okpála hana ngadhögø Ebhe*

<sup>1</sup> Pipita-a, ma au engú koko bhú 'he maka loto. Ma au bhoti inde adu baba abhúlá.

Eli ma adje igini e kalanu mugito me u nga'u toti-e, apa muma me: «'F ei, amba ma suno engú inde ngago sisi-e pí mu.»

<sup>2</sup> Kolo me-e, Bu Bhobua abedhe ma. Abhúlá oo, kiti bini na ngámá adu oo, kpála bini atsia adu pépé.

<sup>3</sup> Zi kpála ango-o adu nasu maka oteme\* na zizi. Makilima asa dengo kiti na ngámá inde ani adu pí e ne zi e ngbalina. Zizi adu di maka zi teme na zizi. <sup>4</sup> Okiti na ngámá ndjikpa bhisi ne ká badha asa dengo kiti na ngámá ango-o ngbalina. Obhelesi okpála ndjikpa bhisi ne ká badha atsia adulu pépé. U adyidyí obubu bongo , u atsia adyidyí ondata na ngámá inde u amene e li olo-o bhú 'ndji o. <sup>5</sup> Li bili li kiti ango-o adu lie, ekpí adu andjendjengene, mugbálá adu asusula. O'i 'ke mananika inde adu atsi matsi adu kala kiti ango-o. O'i 'ke ango-o, a ko obua mananika gba Ebhe-o. <sup>6</sup> Kala kiti ango-o, ma au 'he bini maka 'ngbé 'ngu inde li píla e adu nasu má ngingingí maka bitolobi. A adu má ngilili maka teme† na zizi.

\* **4:3** 4:3 Oteme: Bhú eli na giliki-e, u aye limbi oteme bata: djasepe, saladuane ne emelode.

† **4:6** 4:6 Teme: Bhú eli na giliki-e, u aye me «Teme na kilisitale.» ‡ **4:6** 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

Lingo kiti na ngámá ango-o, okpála badha na ngangamba‡ adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di ne li 'ngbu uo bedhe. <sup>7</sup> Kpála bhe na bini-e, adu maka kingbi. Bhende na bhisi-e, adu maka folo bagala na bhobhoko. Bhende na bata-a, bhúla ani adu maka kpála-kuti. Bhende na badha-a atsia adu maka ndua inde bhú holo. <sup>8</sup> Ndu uo badha hana, u adu ne mbumbudha madhia madhia. Djidjila atsia abedhe tété bedhe bedhe, ali ngbungbu di ne asabusabu. U ngali 'tsi sukpe ne ngbikpi mandi nago me:

«Ebhe Ngámá Apí 'Kpí, Bubu, ani Bubu, ani Bubu.

A ko Kpála inde adu nani uu, inde uu, inde di ngago!»

<sup>9</sup> Ndu nedhinga hana li okpála badha bhomu-o ngali 'tsi ngú nadhögø kpála inde adu pí kiti na ngámá, kpála inde la di bhú mukobho duduma ne duduma, u ngaha sangu di ne nagie heni pí e lie, <sup>10</sup> obhelesi okpála ndjikpa bhisi ne ká badha-a ngatutu lipaku o kuto kala kpála ango-o. U ngadhögø kpála inde bhú mukobho duduma ne duduma-o. U ngapandja ndata na ngámá gba o-o, u ngabubu kala kiti na ngámá-a ne napa me:

<sup>11</sup> «Ebhe Ngámá gba ya, mo oti ne napa me okpála toko mu, u dhögø mu, amba mu sia sangu kabula ngámá gba mu-o.

Padhá de, anga mo obho ndu 'he hana ngamu.

A atsia amene lie,

anga mo okunda nani me a amene lie moko.»

## 5

*Ndili Kandøle-o abhulu 'kpá balua inde agagala lie magagala-o*

<sup>1</sup> Pipita-a, ma au 'kpá balua bini sakpa kpála inde adu pí kiti na ngámá-o, ani aholo li pá 'kpa e na kokpa. U aye 'he pépé ne ndu pasu bhisi hana. U agagala, u atsia ayele ne malika li obili mananika. <sup>2</sup> Abhomu-o, ma au andjelu bini na angu inde adu asusula me: «A ti da nasosoko malika li kute 'kpá balua inde-e ngu nabhubhulu-o da?» <sup>3</sup> Engú bini, kpála bini inde ati da nabhubhulu di ne natsia 'kpí bhúbhú-o du de, abana abhúlá, abana píla doto, abana asa doto. <sup>4</sup> Kaka-a, ma aku 'gbá naali, anga kpála inde ati da nabhubhulu di ne natsia 'kpí bhúbhú-o du de. <sup>5</sup> Engú bini, saka obhelesi okpála apa muma me: «Mo okú 'gbá de. Tsitsia nga, kingbi na piga gba Yuda, ndili gba 'ngbé ngámá Davidi-e agboko egú-o agboko. Ani ti da nasosoko malika mananika bhomu-o, ani tsia bhulu di 'kpá balua ang-o.»

<sup>6</sup> Abhomu-o, ma au Ndili Kandøle bini alu tutu, li bili na kiti na ngámá-o. Okpála badha na ngangamba bhú dabili bini ne obhelesi okpála-a asa ani ngbalina. Ani adu mugito me u akodho ngulu ani makodho. A adu bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhomu-o. <sup>7</sup> Ndili Kandøle-o ago, ani atsia aha 'kpá balua sakpa kpála inde adu pí kiti na ngámá-o. 'Kpá balua ang-o adu sakpa ani li pápá na kokpa. <sup>8</sup> Nedhinga ani aha 'kpá balua lie, okpála badha na ngangamba di ne obhelesi okpála ndjikpa bhisi ne ká badha-a, atuko ne lipuku o kuto kala Ndili Kandøle-o. A adu sakpa ndu uo bini ne bini hana ne dumu di ne kopo na olo inde abedhe ne bandele bedhe. Bandele ang-o, a ko mayo

gba okpála gba Ebhe-o. <sup>9</sup> U adu nali etsi na mbia me:

«Mu ti da naha 'kpá balua-o ne nasosoko malika ang-o, anga u abhøle nani mu, mo otsia agbegbe okpála inde adu bhú bali-e ne ngute mu pi Ebhe.

A ko okpála na ndu bili hana, ne ndu opiga hana, ne ndu okongú hana.

<sup>10</sup> Mo otsia amene me u kolo pi Ebhe gba ní-e okpála na kuti-ngámá gba ani, u kolo di odimandø pi ani, u tsia u píla doto.»

<sup>11</sup> Pipita-a, ma au, ma atsia adje 'li bhiti oandjelu. U adu nani okøtø ne køtø. U alulu dengo kiti na ngámá-o, ne dengo okulu 'he badha-o, di ne dengo obhelesi okpála-o. <sup>12</sup> U adu asusula kpekpeke me:

«Ndili Kandøle nani inde u abhøle e ati ne nasia sangu, ani ati ne nasia tia, ne imbilangú, di ne ngámá.

A ayo me okpála toko ani, u manga ani.

A ko kpála na angu.»

<sup>13</sup> Ma atsia adje di ndu ohe na píla doto libhomu ne ohe na abhúlá ne obhe na sa doto, ne obhe na abhú 'ngu-o hana aholo nali etsi me:

«A ayo me duduma ne duduma ní toko,

ní dhøgø, amba ní ha di sangu ne ngámá pi kpála inde

ngadu pí kiti na ngámá-a bhú dabili bini ne Ndili Kandøle-o.»

<sup>14</sup> Okpála badha na ngangamba-a adu abhuka engú u adu apa e bhomu-o me: «A adu moko!» Obhelesi okpála atsia adu atutu lipuku-o kuto kala kiti na ngámá ne nadhøgø Ebhe bhú dabili bini ne Ndili Kandøle-o.

## 6

*Ndili Kandøle-o aholo nasosoko omalika mananika li kute 'kpá balua-o*

<sup>1</sup> Abhomu-o, ma atsia 'kpí, ma au Ndili Kandөлө-o asoko suka omalika mananika li 'kpá balua-o. Aní asoko lie, ma adje suka okpála badha na ngangamba-a ngagama 'ngú kpékpéke mụgito me mụgbálá ngasusula ngae. Aní me: «Gogo!»  
<sup>2</sup> Ma me ma tsia 'kpí me-e, ma au punda bini na bubu akoto. A adu sakpa kpála inde adu pí ani-e ne adili. U ato ndata na ngámá bhú 'ndji ani. Aní anu maka kpála inde agboko 'gú ngú nagboko matá egú koko.

<sup>3</sup> Nedhinga aní asoko malika na bhisi-e lie, ma adje kulu 'he na bhisi-e apa me: «Gogo!»  
<sup>4</sup> Abhomu-o, li punda koko akoto lie-e, kute aní ambe maka djua. U aha pí kpála inde adu pí ani-e angu na'e guo 'ngú píla doto ngubula me okpála bhili lio. U atsia aha di pí aní mbotia na ndjándjá.

<sup>5</sup> Li Ndili Kandөлө-o asoko malika na bata lie, ma adje kulu 'he na bata-a apa me: «Gogo!» Ma me ma tsia 'kpí me-e, ma au punda na bibili. A adu sakpa kpála inde adu pí ani-e ne kilo. <sup>6</sup> Ma adje 'he mụgito me kpála agama 'ngú bhú ká okpála badha na ngangamba-a me: «Li kpála mene kulu ekpí bini libhomu-o, aní de sia tia inde i ti da nakala bha bini koli kilo na ngano bini, i du mo-o de-e, aní de sia tia inde i ti da nakala bha bini koli kilo na olodje bata.\* Engú bini, vino ne emu-o adúla lie de.»

<sup>7</sup> Li Ndili Kandөлө-o asoko malika na badha-a lie, ma adje kulu 'he na badha-a apa me: «Gogo!»  
<sup>8</sup> Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu aní. U aha nani angu pí uo ngubula nabhili té okpála na píla doto. I du me okpála nde badha-a, u bhéle kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

<sup>9</sup> Li Ndili Kandөлө-o asoko malika na bhuluvue lie, ma au bua okpála inde u abhili nani o sa misa nat-sulu enu pí Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámhá.  
<sup>10</sup> U adu asusula kpekpeke me: «Ngámá na bubu, mu ne kukulu ngámá ngamu. Mu ngadjeke ni ngú nakodho 'ngú sunda ya ne okpála na doto-o? Ngauo, u abhili nani ya. Kodho 'ngú bhomu-o kokodho, amba mu 'o 'ngú pí uo.»  
<sup>11</sup> Abhomu-o, u aha pí ndu uo hana bini ne bini lobe na bubu. U atsia apa pí uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódho 'ngú gba yi ne uo bhú dabili bini.»

<sup>12</sup> Pipita-a, ma au Ndili Kandөлө-o asoko malika na madhia-o. Abhomu-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute.  
<sup>13</sup> Oikupala ayie abhúla, abala kuto maka lí 'lá bhe i mbe de-e ababala lie ka kpéke anvi-o.  
<sup>14</sup> Kokpí angita maka 'kpá balua inde u agagala e magagala. Ndu oeta hana ne okpeme hana ayie bhú dá o.  
<sup>15</sup> Ongbengbe ongámási na doto, ne ongbengbe okpála, ne ongbengbe ongámási na sudha, ne obhulu tia, ne okpála na angu di ne ndu okpála koko hana, obalise ne okpála inde bhú bali ade, ndu uo hana awowo lio bhú ogudho teme ne bhú oeta.  
<sup>16</sup> U aholo apa pí oeta di ne pí ongbengbe teme me: «Yi bala pí ya, amba yi wo ya tsutsu. Yi wo ya me kpála inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandөлө-o.  
<sup>17</sup> Padhá de, anga 'ngbé 'kpí na ke 'ngú gba uo akolo. A ti da nalu kakala da?»

\* **6:6** 6:6 Bili inde si-e akunda napa me adyindi adu naali. Mase ezu akpéke na kuo kuo.

## 7

*Okpála kutu kámá bini ne ndjikpa badha ne ká badha*

<sup>1</sup> Pipita-a, ma au oandjelu badha, u nde alulu li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de. <sup>2</sup> Abhomu-o, ma au andjelu koko bini ayie ne andjongu. A adu sakpa ani ne kasé gba Ebhe na u-o. Ani asula ne angu hana pí oandjelu badha inde li Ebhe aha nani angu nabhili doto pí o bhú dabili bini ne angu nasiti 'ngbé 'ngu-o pí o me: <sup>3</sup> «Yi abhili nga doto ne ondula padhá de. Yi asiti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

<sup>4</sup> Ma atsia adje alo gba okpála inde u atu kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omafalaale hana. <sup>5</sup> Bhú piga gba Yuda, okpála bhe u atu kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a, okpála adu kutu ndjikpa ne ká bhisi. <sup>6</sup> Bhú piga gba Asela-a, okpála adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. <sup>7</sup> Bhú piga gba Simeona-a, okpála adu kutu ndjikpa ne ká bhisi. Bhú piga gba Levi-e, okpála adu kutu ndjikpa ne ká bhisi. Bhú piga gba Isakala-a, okpála adu kutu ndjikpa ne ká bhisi. <sup>8</sup> Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o, okpála adu kutu ndjikpa ne ká bhisi. Bhú piga gba Bendjame-e, okpála adu kutu ndjikpa ne ká bhisi. U atu kasé li ndu okpála bhomu-o hana.

*Libi okpála inde li Ebhe alo o-o*

<sup>9</sup> Pipita-a, ma atsia matá 'kpí, ma au bhiti okpála na bhibhiti inde li

kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandøø-o. U adyidyí olobe na bububu, adu sakpa uo ne okpá ngulu. <sup>10</sup> U adu asusula ne angu o hana me:

«Mukobho ngayie ka Ebhe gba ní inde adu pí kiti na ngámá-o, di ne ka Ndili Kandøø-o!»

<sup>11</sup> Ndu oandjelu hana alulu denge kiti na ngámá-o, ne denge obhelesi okpála di ne denge okpála badha na ngangamba-o. U atutu bhúla o ne kuto kala kiti na ngámá-o, u atsia adhøø Ebhe. <sup>12</sup> U adu apa me:

«A adu moko!

A ayo me okpála toko Ebhe gba ní-o.

A ko Ebhe na sangu, a bhú ani ne imbilangú.

A ayo me okpála gie heni pí ani, u manga ani.

A ko Ebhe na angu.

Ani kpekpeke, dudu ma ne dudu ma! A adu moko!»

<sup>13</sup> Saka obhelesi okpála bhomu-o ayi ma me: «Okpála inde adyí obubu lobe-e, a ko oda? U ayie la di su?» <sup>14</sup> Ma agie pí ani me: «Bhele kpála-a, mu mbila hana.» Ani atsia apa mu ma me: «A ko okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandøø-o ngubula me akolo bubu.

<sup>15</sup> Ka 'ngú ango-o, u alulu kala kiti na ngámá gba Ebhe-o.

U ngamene kulu lio pí ani sukpe ne ngbikpi hana bhú 'ngbé 'ti gba ani-o.

Kpála inde adu pí kiti na ngámá-a adú bhú dabili bini ne uo ngú nalila uo.

<sup>16</sup> U djé matá gumu belegu de bini, u djé di matá gumu 'ngu belegu de bini.

Ela, i du di-e mangua kpá bili dho-ie tsulu matá uo de.

<sup>17</sup> Padhá de, anga Ndili Kandøø inde alu kala kiti na ngámá-a adú

maka m̀lila gba uo ngae.  
Ani ató bhúla uo li bili li okpongu na  
m̀kobho nde lie-o.  
Ebhe tsia kúo ng̀la sala uo  
hana.»

## 8

### *Ndili Kand̀l̀o-o asoko malika na mananika-o*

<sup>1</sup> Nedhinga li Ndili Kand̀l̀o-o asoko malika na mananika-a lie, sukpe andjili abhúla má bulu, masikpe de miniti ndjikpa bata.  
<sup>2</sup> Pipita-a, ma au oandjelu mananika inde alulu kala Ebhe-o. U aha ototi pí uo mananika.

<sup>3</sup> Andjelu koko bini ago alu dengo misa natsulu m̀ngotsi pí Ebhe-o. A adu sakpa ani ne saani na olo ngu natsulu bandele. U aha bandele pí ani bhelé ngu napa me ani tsulu pí Ebhe bhú dabili bini ne omayo gba okpála gba Ebhe-o. Ani tsulu pí misa inde u abho e li olo-o. Misa angoo adu kala kiti na ngámá-o. <sup>4</sup> Ngúwa bandele li andjelu-o adu atsulu e-e, a'e'e lie abhúla bhú dabili bini ne omayo gba okpála gba Ebhe, anu a'u kala Ebhe. <sup>5</sup> Pipita-a, andjelu-o aha saani natsulu bandele-o. Ani abedhe ne djua inde adu oo-o, ani atsia abhike píla doto. Ekpí andjengene, mugbalá asula, adjigidjo adhika.

### *Ototi badha na kalanu-o asula*

<sup>6</sup> Abhomu-o, oandjelu mananika inde aholo ototi mananika-a aleke lio ngu na'u'u.

<sup>7</sup> Andjelu na bini-e a'u toti gba e-o. Itimeli, ne djua bhú dabili bini ne ngute abala píla doto. A tsia atsulu té doto di ne ondula. I du me u nde agbo bhusu doto di ne ondula hana bata-a, akunda napa me bini bhú káká atsulu bhomu-o ngae.

<sup>8</sup> Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhusu e bata, bhe bini-e atsia adji lie ngute. <sup>9</sup> Té ndu 'he li Ebhe abho e hana inde ngadu abhú 'ngbé 'ngu, bhú dabili bini ne ozabu-o

atsia amu. U po bhúla ndu 'he inde li Ebhe abho e bhú 'ngbé 'ngu, u po di bhúla ozabu hana-a, u tsia gbo bhusu bhusu bata-a akunda napa me akpi bhomu-o ne bini bhú káká.

<sup>10</sup> Abhomu-o, andjelu bhe na bata a'u toti gba e-o. 'Ngbé ikupala bini inde li zi e adu atsi maka zi 'ké na ngbéngbé ayie abhúla, ati kuto. A atsia ati pí té ongade 'ngu di ne okpongu-o. I du me u nde apo bhúla ongade 'ngu di ne ondjingu hana-a, u tsia gbo bhusu bhusu bata-a, akunda napa me ati bhomu-o pí bini bhú káká. <sup>11</sup> A adu 'li ikupala angoo me «Ehe na susu.» Abhomu-o, té oengu-o akolo susu. Bhelé na okpála inde andji-e atsia amu, anga akolo susu.

<sup>12</sup> Pipita-a, andjelu na badha-a a'u toti gba e-o. A asu té ela ne té epe di ne té oikupala. I du me u nde agbo bhusu ela ne epe di ne oikupala ne ndundundu bata-a, akunda napa me a asu bhomu-o bini bhú ká ndundu hana. A atsia abili bhúla uo hana li pápá bini bini. Zi ngbikpi du matá nasu libhomu de, abana di zi epe. I du me u nde agbo bhusu zi ngbikpi ne ndundundu bata, u gbo di bhusu zi epe ne ndundundu bata-a, akunda napa me bini bhú ká ndu uo bini bini hana du matá nasu-u de.

<sup>13</sup> Pipita-a, ma atsia matá 'kpí, ma adje ndua bini me ani nde ngakodho 'kpí abhúla tsutsu naali. Ani adu nasusula me: «A ko likabhu! A ko likabhu! A ko likabhu pí okpála na doto li oandjelu bata bhe koko a'ú toti gba o-o lie ko.»

## 9

### *Andjelu na bhuluvue a'u toti gba e-o*

<sup>1</sup> Abhomu-o, andjelu na bhuluvue a'u toti gba e-o. Ma au ikupala bini ayie abhúla, ati píla doto. U atsia aha lifangula na 'bhø tsu 'dú-o\* pí ikupala angoo. <sup>2</sup> Ikupala bhomu-o abhulu bhøbhø. Ngúwa bini akoto bhúbhú maka ngúwa na

\* 9:1 9:1 Tsu 'dú: A ko bili inde li osisiti bua ngadu li e.

ndingidhi djua. Bhúla ela ne bhúla 'kpí atsia abili ka ngúwa ango-o má pi! <sup>3</sup> Omakilingbo aze bhú ngúwa bhomɔ, u atsia ayangba píla doto. U aha nani pí uo sili maka bhende gba oapekebhe. <sup>4</sup> U aha líli pí uo me u améne ulu sisiti de, u améne ondula sisiti de, u améne di ohe inde ngakɔ bhú doto sisiti de. Engú bini, u mene mangbo sisiti bha bini okpála bhende li kasé gba Ebhe-ende pidi o ade-o. <sup>5</sup> U ha kpadji pí uo ngú nabhili okpála bhomɔ-o de, engú bini, u to mbolo li uo ngú epe bhuluvue. Mbolo ango-o adú ami li uo maka ngabhɔ apekebhe amimi lie me a nde adho kpála-o. <sup>6</sup> Bhú epe bhuluvue bhomɔ-o, okpála agíli kuo, engú bini, u úu de. U adú ne gumɔ namu, engú bini, kuo akpé de uo tsutsu.

<sup>7</sup> Omakilingbo bhomɔ-o adu maka opunda inde bedhe ngú egú. A adu pí 'ndji uo ne ehe maka ndata na ngámá inde u abho e li olo. Bhúla uo adu maka bhúla okpálakuti. <sup>8</sup> Sundjo adu bhú 'ndji uo ndjandjandja maka sundjo olisi. 'Te uo adu maka ote okingbi. <sup>9</sup> Mbulu uo adu mɔgito me u adyi tété bongo na kalase. Gili mbudha uo adu a mɔgito me a ko gili bhiti opunda inde adji bhú 'gú. <sup>10</sup> A adu li uo ne soso maka 'so apekebhe, atsia adu bhúbhú ne sili inde u adu ato mbolo li okpála ne e ngubula epe bhuluvue-o. <sup>11</sup> Ngámá gba uo adu ne andjelu na tsu 'dú. A adu 'li ani bhú eli gba omaYuda me: «Abadona.» Bhú eli gba oGiliki-e, a adu 'li ani me: «Apoliona.» A akunda napa me bhulɔ nabhɔlɔ kuti.

<sup>12</sup> Likabhu na bini-e akodho 'kpí akodho. 'E-e! Likabhu koko bhisi matá ngago pipita.

### *Andjelu na madhia a'u toti gba e-o*

<sup>13</sup> Pipita-a, andjelu na madhia a'u toti gba e-o. Ma adje eli ayie ne li odje misa natsulu bandele pí Ebhe-badha hana. Misa ango-o adu kala Ebhe, u amene li olo. <sup>14</sup> Eli ma adje

e apa pí andjelu na madhia inde adu ne toti sakpa e me: «Bhulu oandjelu badha inde u agbigbite o ne ekpí dengo ngade 'ngu na Efalate-o.» <sup>15</sup> U atsia abhulu oandjelu badha-o. Li nedhinga bhomɔ-o, bhú ekpí bhomɔ, bhú epe bhomɔ di ne kalanga bhomɔ-o, oandjelu bhomɔ-o adu nani bedhe ngú nabhili té okpála na doto. A akunda napa me, i bhaka okpála bata-a, u bhéle bini bhú ká uo.

<sup>16</sup> U atsia apa di alo na osudha inde adu agu 'gú me u nde ne punda-a mɔma. A adu osudha kɔtɔ ne kɔtɔ. <sup>17</sup> Lele li opunda di ne osudha inde adu pí uo akoto li ma lie bhú 'he maka loto-o adu me: u adyidi ombulu bongo na kalase me a nde andjundju maka djua, bibili maka kokpí, a adu di ndjendje maka 'kpá bhugɔ. 'Ndji opunda ango-o adu maka ondji kingbi. Adu naze bhú 'bhɔ uo ne djua, ne ngúwa di ne baluti. <sup>18</sup> Té okpála na doto atsia amu ka olikabhu bata inde adu aze bhú 'bhɔ opunda bhomɔ-o. A akunda napa me okpála adu amu ka djua, ne ngúwa di ne baluti. I bhaka okpála bata-a, akunda napa me a bhéle kpála bini bhú ká uo. <sup>19</sup> Padhá de, anga angu opunda bhomɔ-o bhú 'bhɔ o di ne bhú 'so o, anga 'so uo mana kpulɔ. A tété ne 'ndji 'ndji inde u ngamene okpála ne e sisiti-o.

<sup>20</sup> Dú okpála bhe atigala-a, inde i mu ka olikabhu bata bhomɔ-o de, u dji bua o li nadhɔgɔ ohe inde u amene e ne 'kpa o-o de. U 'o nadhɔgɔ osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i du di-e obhe na ndula-a de. Okulu 'he ango-o u 'kpí de, u dje 'kpí de, u dhukɔ di-i de. <sup>21</sup> Okpála ango-o dji bua o li nabhili okpála de. U dji di bua o li kobha gba o-o de. U dji di bua o li namene zabhe gba o-o de. U dji di bua o li ezi gba o-o de.



*Andjelu inde adu sakpa e ne mboye 'kpá balua-o*

<sup>1</sup> Pipita-a, ma au andjelu koko bini na angu ayie abhúlá. Bongo gba ani-e adu maka ndindi, atsia abuku ani má bhelele! Makilima aga 'ndji ani ngbalina, bhúla ani adu maka ela. 'Dhu ani adu maka dingidhi djua. <sup>2</sup> A adu sakpa ani ne mboye 'kpá balua inde u abhulu e mabhulu. Ani a'o 'dhu e na kokpa-a pí 'ngbé 'ngu, ani atsia a'o bhe na gali-e pí doto. <sup>3</sup> Ani asula kpekpeke maka kingbi inde ngangulumba. Ani asula lie, mughalá mananika atsia asula. <sup>4</sup> Ma di me ye engú inde li omughalá mananika bhomu-o apa e bhú nasula ka o-o. Engú bini, ma adje eli bini ayie abhúlá, atsia apa muma me: «Wo engú inde li omughalá mananika bhomu-o apa e mawo. Mo oyé-e de.»

<sup>5</sup> Abhomu-o, andjelu inde ma de au e me ani nde a'o 'dhu e bini pí 'ngbé 'ngu, koko pí doto-o a'e 'kpa e na kokpa-a ne bhúlá. <sup>6</sup> Ani atsia atu silika ne 'li Ebhe inde bhú mukobho duduma ne duduma-o, Ebhe inde abho kokpí di ne ndu 'he hana inde bhúbhú-o, abho doto di ne ndu 'he hana inde bhúbhú-o, inde abho 'ngbé 'ngu di ne ndu 'he hana inde bhúbhú-o. Andjelu ango-o apa me: «Nedhinga matá-a ade! <sup>7</sup> Engú bini, nedhinga li andjelu na mananika-a ahólo na'u toti gba e lie, abhomu-o Ebhe tsia méne engú inde ani awo nani e ko. Ani améne maka ani apa nani pi obalise gba e opolofeta lie ko.»

<sup>8</sup> Abhomu-o eli ma de adje igini e ayie abhúlá-a apa matá muma me: «Nu ha mboye 'kpá balua inde abhulu lie mabhulu-o sakpa andjelu alu me ani nde a'o 'dhu e bini pí 'ngbé 'ngu, ne koko pí doto ko.» <sup>9</sup> Ma atuto lima de andjelu-o. Ma atsia ayo ka ani me ani ha mboye 'kpá balua-a muma. Ani agie muma me: «Haha, amba mu zu. A adú bhú 'bhø mu kpikpili maka 'mu eú, la mo obhí lie, a adú bhú 'ndja mu

susu.» <sup>10</sup> Ma aha mboye 'kpá balua sakpa andjelu-o, ma atsia azu. A adu bhú 'bhø ma kpikpili maka 'mu eú. Engú bini, ma azu lie, a adu bhú 'ndja ma susu. <sup>11</sup> Abhomu-o, u atsia apa muma me: «A ayo matá me mu kpokpo 'ngú li Ebhe apa me ni améne e pi bhiti okpála na ndu bili hana-o, engú ani apa me ni améne e pi bhiti okongú, di ne pi bhiti ongbengbe ongámási-o.»

## 11

*Ebhe atima opolofeta bhisi*

<sup>1</sup> Pipita-a, u aha mbamba muma bini. A adu maka ndula u apipima 'he ne e-o. U atsia apa muma me: «Nu pima 'ngbé 'ti Ebhe di ne misa natsulu enu pi Ebhe-o. Mu tsia ko di alo gba okpála inde ngadhøø Ebhe bhú 'ngbé 'ti gba ani-o. <sup>2</sup> Engú bini, 'o mbadhasu na 'ngbé 'ti Ebhe-e li ngongo. Mo opíma de, anga Ebhe apu nani bhobhomu-o pi okpála inde ne omaYuda ade-o. U adédele gudhu na bubu gba Ebhe-e ngubula epe ndjikpa badha ne ká bhisi. <sup>3</sup> Ma atíma obhulu nakpo 'ngú gba ma bhisi-e me u nde adyi bongo na talia. Ma atíma uo ngú nakpokpo engú gba Ebhe. U akpókpó 'ngú ango-o ngubula ekpi ketø bini, kámá bhisi ne ndjikpa madhia.»

<sup>4</sup> Obhulu nakpokpo 'ngú bhisi bhomu-o, a ko ondula na olive bhisi di ne otala bhisi inde ngalu kala Ngámá na doto-o. <sup>5</sup> Li kpála le namene uo sisiti-e, djua kóto bhú 'bhø uo, i tsia bhíli obhulu yala gba uo-o. A bhomu-o lele maka u abhøle bhulu yala gba o lie-o. <sup>6</sup> A bhú uo ne angu nagbite kokpí ngubula me ebha adhi-i de, nakolo li 'kpí inde u andjia nakpokpo engú gba Ebhe-e lie-o. A di bhú uo ne angu nadi engu me akolo ngute. A bhú uo ne angu natu pedje pí doto me ndu olikabhu ngangá mene doto li ndu nedhinga hana inde u akunda lie.

<sup>7</sup> Nedhinga u andjia nakpokpo 'ngú li Ebhe atima uo ne e lie, enu

inde adu bhú tsu 'dú-o há 'gú ne uo. Aní há angu uo, aní tsia bhíli uo. <sup>8</sup> Kuo uo atígala lí 'ngbé 'hi kpadji na 'ngbé gúdhú inde u agí nani Ngámá gba uo lie lí kulusi-o. U agisila lí gúdhú ango-o 'ilí. U agisila líli me Sodomó, í dū di-e Edjipeto. <sup>9</sup> U zíba de me okpála zí kuo uo-o de. Okpála na ndu bíli hana, ne ndu opiga hana, ne ndu okongú hana adú ago natsia okuo uo ngú okpí bata ne ndundu. <sup>10</sup> Okpála na doto akpí djali lí nakpi ka uo-o. U améne anokomia na djali, u tsia dú apu 'he sūnda o. U améne mo-o anga opolofeta bhisi bhomu-o amene uo kpékpéke naali.

<sup>11</sup> Engú bini, píta ekpí bata ne ndundu bhomu-o, ewo bini na mukobho ayie agba Ebhe ali bhú uo, u atsia ayie bhúlá. Abhomu-o, 'ngbé tsulú na ngbéngbé atí pí okpála bhende adu natsia uo-o. <sup>12</sup> Opolofeta bhisi bhomu-o atsia adje eli na kpékpéke inde ayie abhúlá. Eli ango-o apa pí uo me: «Yi 'u ei!» U atsia a'u'u abhúlá bhú ndindi me obhulú yala gba uo nde ngatsia uo. <sup>13</sup> Bha bhú nedhinga bhomu-o, kpéke adjigidjo adyiki bíli, té gúdhú-o atuko. Í dū me u nde agbo bhusu gúdhú-o ne ndundundu ndjikpa-a, akanda napa me adjigidjo bhomu-o adyiki bini bhú káká. Abhomu-o, okpála kèthé mananika amu ka adjigidjo ango-o. Obhe atígala-a, tsulú abedhe uo bedhe. U atsia adhègè Ebhe inde abhúlá-o.

<sup>14</sup> Likabhu bhe na bhisi-e akodho 'kpí akodho. 'E-e! Bhe na bata agó mbia inde?

### *Andjelu na mananika-a a'u toti gba e-o*

<sup>15</sup> Abhomu-o, andjelu na mananika-a a'u toti gba e-o. Oandjelu atsia asula abhúlá kpekpeke me: «Nau na doto íbili sakpa ngámá gba ya, ne Masiya gba e-o.

\* **11:19** 11:19 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

Ngámá gba ya-a aú duduma ne duduma!»

<sup>16</sup> Obhelesi okpála ndjikpa bhisi ne ká badha inde adulu pí odabili na ngámá gba o kala Ebhe-e atutu bhúla o ne kuto. U atsia adhègè Ebhe, <sup>17</sup> u apa me:

«Ebhe Ngámá Apí 'Kpí, ngamu kpála inde uu,  
inde adu di nani uu,  
ya ngatoko mu,  
anga mo opana angu gba mu,  
ndu 'ngú hana agie lie sakpa mu.  
Mo otsia au ngámá pépé.

<sup>18</sup> Opiga na doto azi nani mbutu lí mu naali,  
la mbia inde-e,  
ke 'ngú gba mu-o ago pí uo ago. Nedhinga nakodho 'ngú gba okpála inde amu-o akolo.  
A ko nedhinga inde mo ogie bádha 'ngú lie  
pí obalise gba mu opolofeta  
di ne ndu okpála gba mu-o hana,  
inde di ngamanga mu,  
ongbengbengbe ne odjedjedje-o.  
A ko nedhinga ngú nabhili obhe ngabhèlè doto-o.»

<sup>19</sup> Abhomu-o, 'ngbé 'ti Ebhe inde abhúlá-a abhulu lie, u atsia au sanduku na gandja-o.\* Ekpí andjengene, mugbálá asula, adjigidjo di ne ítimeli na kpekpeke adhika.

## 12

### *Engú na ngangamba inde abhaka èlè inde adu nazu*

<sup>1</sup> Pipita-a, ma au engú bini na ngangamba ngamene lie abhúlá: a adu èlè bini inde adyi lí kute e ela. Epe adu sa 'dhu ani. A adu bhú 'ndji ani ne ndata na ngámá inde lí e ne oikupala ndjikpa ne ká bhisi. <sup>2</sup> Èlè ango-o adu ne ebhi. Nedhinga ani adu adjeke nazu lie, ani adu natu 'ue ka nazu ka bhú 'bu e-o.

<sup>3</sup> Engú na ngangamba koko amene matá lie abhúlá: a adu 'ngbé kpulu

na ngbéngbé. Kute ani adu mbembe má ngua! A adu li ani ne ondji 'ndji mananika, di ne odidi ndjikpa. A adu pí ndu ondji ani hana ne ndata na ngámá. <sup>4</sup> Ani apo té oikupala ne 'so e, ani atsia abala uo kuto. A akunda napa me u po bhúla ndu oikupala hana-a, u tsia gbo bhusu bhusu bata-a, ani abala kuto bhomu-o bini bhú káká. Ani atsia anu ala kala elo inde adu akunda nazu-o ngubula me, ni zu ndili li elo bhomu-o azú e bha li nedhinga nakoto ka ani-o. <sup>5</sup> Abhomu-o, elo-o azu ndili na bhobhoko. Ani au pí 'ndji ndu opiga hana ne angu. Kolo me-e, u atsia a'e ndili bhomu-o anu ne ani denge Ebhe, di ne denge kiti na ngámá gba ani-o. <sup>6</sup> Elo-o atsia akpe abhú 'gu li bili inde li Ebhe aleke nani e pi ani, ngu napa me ni ku ani ngubula ekpi koto bini, kama bhisi ne ndjikpa madhia-o.

<sup>7</sup> Abhomu-o, gbele aka abhúla. Mikaele ne oandjelu gba e agu 'ngbé kpulu-o. Kpulu ango-o atsia aholo di gbele bhú dabili bini ne oandjelu gba e-o. <sup>8</sup> Engú bini, Mikaele ne oandjelu gba e agboko egú-o. Kaka-a, 'ngbé kpulu-o ne oandjelu gba e sia matá bili da nadu abhúla de. <sup>9</sup> U atsia abhike 'ngbé kpulu-o kilidjo. A ko kpulu na didili, inde u nga'i e me Djabulu, i du di-e Satana, bhulu napite okpála na doto libhomu-o. U abhike ani kuto bhú dabili bini ne oandjelu gba e-o.

<sup>10</sup> Pipita-a, ma adje kpéke eli bini ayie abhúla. Eli ango-o adu apa me: «Nedhinga li Ebhe gba ní-e ngakobho okpála lie akolo!

Mbia inde-e, Ebhe gba ní-e asuno angu gba e me ni ne ngbé Ngámá-a asuno!

Mbia inde-e, angu sakpa Masiya gba ani-o.

Padhá de, anga u abhike bhulu napa 'ngú li ondaise ní-e akilidjo,

ngaani kpála inde adu apa 'ngú li uo pi Ebhe gba ní-e ngbikpi ne sukpe-o.

<sup>11</sup> Ondaise ní aha angu ani ka ngute gba Ndili Kandele di ne ka nakpokpo 'li Ebhe pi okpála.

U kpe kuo de, u atsia atse 'kpa li mukobho gba o ngubula me o mumu.

<sup>12</sup> Kaka-a, ne kokpi ne yi okpála inde ngadulu bhúbhú hana-a, yi du bhú djali!

A ko la mangua likabhu dho pi yi okpála inde ngadulu píla doto ne yi obhe ngadulu bhú 'ngbé 'ngu-o, anga djabulu aké agba yi aké.

Ani abedhe ne egú bedhe, anga ani mbila hana me nedhinga atigala pi ni bedi.»

<sup>13</sup> Li 'ngbé kpulu-o au lie me u abhike ni kuto abhike-e, ani aholo nabhike elo inde azu igini ndili na bhobhoko bhomu-o. <sup>14</sup> Engú bini, u aha mbudha 'ngbé ndua pi elo bhomu-o ngu napa me ani 'ulu, amba ani nu du li bili inde u aleke e pi ani abhú 'gu-o. U atsia adu aku ani oo ngubula kalanga bata ne ndundu me 'ngbé kpulu-o nde to mbolo li ani de. <sup>15</sup> Abhomu-o, kpulu-o atsia azie engu bhelé nganda elo-o maka ngade 'ngu, da napa me akpe ne ani. <sup>16</sup> Engú bini, doto ago ateteke elo-o. Doto abhulu 'bhe e, atsia abhi engu li 'ngbé kpulu-o azie e-o. <sup>17</sup> Li bua kpulu-o ake lie ne elo-o, ani anu aha 'gu ne dú ongisi gba elo-o, obhende ngamanga Ebhe inde di ngalila kukulu 'ngú inde li Yesu ambamba ta e-o. <sup>18</sup> Pipita-a, 'ngbé kpulu-o anu adu pí sike lingo 'ngbé 'ngu.

## 13

*'Ngbé kpulu-o aha angu gba e pi nute koko*

<sup>1</sup> Pipita-a, ma au enu bini ngakoto abhú 'ngbé 'ngu. 'Di ani adu ndjikpa, 'ndji ani adu mananika. Ani adyi ndata na ngámá ne ndu odi e hana. Ani atsia adyi di o'ili nasobho Ebhe ne pí 'ndji e

hana. <sup>2</sup> Enu inde ma au e adu maka sia. Odhu ani adu maka bhe gba onute, 'bhø ani adu maka 'bhø kingbi. 'Ngbé kpulu-o aha angu na ngbéngbé gba e pi enu-o. Enu-o atsia adu pí kiti na ngámá gba ani-o. <sup>3</sup> Suka ondji ani adu mugo me u abi eka bhe na mugwe mugwe, engú bini eka na mugwe mugwe angoo atsia ambe. Engú bhomu-o atsia angamba okpála na doto libhому. Kaka-a, u atsia akpata enu bhomu-o. <sup>4</sup> Ndu okpála hana atsia aholo nadhogø 'ngbé kpulu-o, anga ani aha angu pi enu-o. Ndu okpála hana adhogø di enu-o ne napa me: «A ko da inde maka enu inde? Ati da nagu ani da?»

<sup>5</sup> U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani ngu namene engú bhomu-o ngu epe ndjikpa badha ne ká bhisi. <sup>6</sup> Ani aholo napa osisiti 'ngu li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhulá-o. <sup>7</sup> U aha kpadji pi ani me ani gu okpála gba Ebhe di ne naha angu uo. U aha angu pi ani pí 'ndji okpála na ndu bili hana, ne ndu opiga hana, ne ndu okongú hana. <sup>8</sup> Ndu okpála na píla doto hana inde u ye nani 'li o bhú bhuku na mukobho-o de-e, adhogø ani. Bhuku angoo, a ko bhe gba Ndili Kandølo inde u abhølo e-o. U ye nani 'li uo bhúbhú de, nayie maka li Ebhe abho doto lie-o.

<sup>9</sup> Yi dje ndjindji, i du me a nde li yi ne djedje nadje 'kpí ko.

<sup>10</sup> Kpála inde ayo me ani nu bhú tikpu-o,  
anú bha bhú tikpu.

Kpála inde ayo me ani kpi li mbotia-a,

akpí bha li mbotia.

Kaka-a, a ayo me okpála gba Ebhe-e du ne 'ndjá bua,

di ne nabhuka .

*Enu koko akoto bhú doto*

<sup>11</sup> Pipita-a, ma au enu koko ngakoto bhú doto. Adu bhú 'ndji

ani ne didi bhisi maka ndili kandølo. Ani atsia adu agama 'ngu maka 'ngbé kpulu. <sup>12</sup> A adu di bhú ani ne angu maka angu inde adu bhú enu bhende akoto bhú 'ngbé 'ngu-o. Ani adu amene 'he ne di kala enu bhe na 'ngbé 'ngu-o. Ani adu apa pi ndu okpála na doto hana me, u dhogø enu na 'ngbé 'ngu li eka na mugwe mugwe gba e ambe-o.

<sup>13</sup> Enu bhe na bhisi inde-e adu amene ongamba 'ngu na ngbengbengbe. Ani adu belegu nagbele djua nayie abhulá nakø pí doto. Ani adu amemene li djila ndu okpála hana. <sup>14</sup> Ani adu apipite ndu okpála na píla doto hana inde u ye nani 'li o bhú bhuku na mokobho-o de-o. Ani adu apipite uo ne ongamba 'ngu inde ani adu amene e li djila enu na 'ngbé 'ngu-o. Ani adu akata uo me u bho kulu enu inde abi nako eka na mugwe mugwe li mbotia, eka angoo atsia ambe-o.

<sup>15</sup> Enu na bhisi-e asia angu ngu nato ewo bhú kulu enu na bini-o, ngubula me a du nagama 'ngu, amba a du nabhili ndu okpála hana inde i dhogø ni de-o. <sup>16</sup> Enu angoo aye tele li ndu okpála hana. Ani aye li okpála koko li 'kpa o na kokpa, ani aye li okpála koko pidi o, abana i du mboye ndili, abana i du bhele kpála, abana i du bhulu tia, abana i du bhulu ndibhili, abana i du bali, abana i du kpála inde bhú bali ade. <sup>17</sup> Kpála bini ti da nakala 'he de, i du di-e natsindji 'he de, i du me tele nde li kute ani ade-o. Tele angoo, a ko 'li enu bhomu, i du di-e alo na 'li ani-o. <sup>18</sup> A inde-e nedhinga inde ayo ne imbilangu. Kpála inde ne imbilangu-o tí da nambila ta alo gba enu-o, anga alo angoo viti bini ne 'li kpála-kuti. Alo angoo kámá madhia, ndjikpa madhia ne ká madhia.

## 14

*Okpála inde li Ndili Kandølo-o akala o*

<sup>1</sup> Ma atsia matá 'kpí, ma au Ndili Kandələ-o me ani nde alu pí eta na Siona . Okpála kətə kámá bini, ndjikpa badha ne ká badha inde u aye 'li Ndili Kandələ di ne 'li 'Dyi ani pidi o alulu de ani. <sup>2</sup> Pipita-a, ma adje eli ayie abhúlá. Eli ango-o adu mugoito me a ko gili wowo 'ngu, maka gili mugbálá na kpekpeke. Eli inde ma adje e adu maka gili dumu, nedhinga li obhubhulu-o abhibhi lie-o. <sup>3</sup> Bhati okpála bhomu-o adu ali etsi na mbia kala kiti na ngámá, di ne kala okpála badha na ngangamba ne obhelesi okpála-o . Kpála bini ti da nale etsi ango-o de, bha bini okpála kətə kámá bini, ndjikpa badha ne ká badha li Ndili Kandələ-o akala o píla doto-o. <sup>4</sup> Ngauo-o, u siti lio ne olisi de. U alila lio bubu kala Ebhe. U ngakpata Ndili Kandələ-o ne ndu bili hana ani nganu li e-o. Ani akala nani uo bhú ká okpála-kuti ngubula napu uo pi Ebhe di ne pi e bhubhulu maka gina ngua. <sup>5</sup> Eu koto nani bhú 'bhə uo belegu de bini. Engú na sisiti napapa li uo ade.

*Oandjelu bata akpokpo 'ngú pindji lele maka li Ebhe akódho 'ngú lie-o*

<sup>6</sup> Pipita-a, ma au andjelu koko. Ani adu akodho 'kpí abhúlá tsutsu naali maka edhu. Adu ka ani ne Bádha Ngali na duduma inde ani adu akpokpo e pi okpála na píla doto, okpála na ndu bili hana, ne ndu opiga hana, ne ndu okongú hana. <sup>7</sup> Ani adu nasusula kpekpeke me: «Yi kpe Ebhe, amba yi dhəgə di ani! Padhá de, anga nedhinga me ani kodho 'ngú gba okpála na doto akolo. Yi dhəgə kpála inde abho kokpí ne doto ne 'ngbé 'ngu di ne okpongu-o.»

<sup>8</sup> Pipita-a, andjelu na bhisi-e akpata bhe na kalanu-o. Ani adu apa me: «Babilona na ngbéngbé-e ati! A ati na paká paká! Ani ase ndu opiga

hana ne siti vino gba e-o. Vino ango-o, a ko zabhe inde ani ngamene e-o!»

<sup>9</sup> Pipita-a, andjelu na bata akpata obhe bhisi bhomu-o. Ani adu asusula me: «Li kpála dhəgə enu-o, ne kulu ani-e, li u aye di tele gba enu-o pidi e, i du di-e li 'kpa e, <sup>10</sup> kpála ango-o ndji bhadi vino na ke 'ngú gba Ebhe-o! Ebhe atúko ngili vino ango-o bhú kópo na ke 'ngú gba e-o! Ngua kpála bhomu-o asia likabhu bhú djua na baluti kala oandjelu na bububu di ne kala Ndili Kandələ-o. <sup>11</sup> Ngúwa na djua inde ngato mbolo li uo-o nga'u abhúlá ndu 'kpí hana. Ndu okpála hana inde ngadhəgə enu, inde di ngadhəgə kulu ani, inde u aye tele gba ani-e li o-o, ngazu likabhu ngbikpi ne sukpe. U guguo de.» <sup>12</sup> Kaka-a, a ayo me okpála gba Ebhe inde ngakpata líli gba ani-e, inde di ngalila nabhuka gba o bhú Yesu-o du ne 'ndjá bua.

<sup>13</sup> Pipita-a, ma adje eli bini ayie abhúlá, a atsia apa muma me: «Ye me: <A ko djali pi okpála inde amu nayie pi mbia inde-e me u nde abhuka Ngámá-o!> Bu Bhobua apa me: <A na paká, u guo ka bhiti kulu u amene e guguo. Padhá de, anga kulu gba uo-o ngakpata uo.>»

*Nedhinga na'e nguwa na píla doto*

<sup>14</sup> Pipita-a, ma atsia matá 'kpí, ma au ndindi bini na bubu. A adu pí ndindi ango-o ne ehe maka kpála. A adu pí 'ndji ani ne ndata na ngámá inde u abho e li olo. A adu sakpa ani ne dhádha bini na dhedhe.† <sup>15</sup> Abhomu-o, andjelu koko bini akoto bhú 'ngbé 'ti Ebhe inde abhúlá-o. Ani atsia asula pi kpála inde adu pí ndindi-e me: «Ha dhádha gba mu-o, amba mu holo na'e nguwa abhiye. Padhá de, anga nedhinga na'e-e-e akolo. Nguwa na píla doto abhele ngú nakoko abhele!» <sup>16</sup> Abhomu-o, kpála inde adu pí ndindi-e apu ne dhádha gba

† 14:14 14:14 Tsia bhú Dan. 7:13.

e pɪla doto. Nguwa na pɪla doto atsia a'e lie.

<sup>17</sup> Pipita-a, andjelu koko akoto bhú 'ngbé 'ti Ebhe inde abhúlá-o. A adu di ka ani ne dhádha na dhédhé.

<sup>18</sup> Pipita-a, andjelu koko akoto li bili natsulu enu pi Ebhe-o. A adu bhú ani ne angu pí djua. Ani asula pi bhe adu ne dhé dhádha sakpa e me: «Ha dhé dhádha gba mɛ-o, amba mɛ ko vino inde pɪla doto-o nedi. Lílí-e ambe.» <sup>19</sup> Andjelu-o atsia apɛ ne dhádha gba e pɪla doto. Ani atsia ako vino na pɪla doto-o. Ani atsia abu bhú 'ngbé ngbengələ na ke 'ngú gba Ebhe-o. <sup>20</sup> U agbe ngbengələ-o bhú gɔdhu-o kilidjo, u atsia api lí vino-o. Abhomɛ-o, ngute atsia aze bhú ngbengələ-o. Ngute ango-o anɛ a'u nakolo li 'bhə opunda. A atsia ayangba masakpe de kilometele kámá bata.

## 15

*Oandjelu mananika ago ne olikabhu mananika*

<sup>1</sup> Pipita-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulu tsulu. Ma au oandjelu mananika, a adu sakpa uo ne gba olikabhu mananika. Pipita-a, likabhu koko matá ade, anga a ngasuno ke 'ngú inde li Ebhe apana e li soso-o ngae.

<sup>2</sup> Pipita-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu ani bhú dabili bini ne alo inde ngasuno 'li ani-e, alulu pí 'ngbé 'ngu ango-o. A adu sakpa uo ne odumɛ li Ebhe aha e pi uo-o. <sup>3</sup> U adu ali etsi gba Moidje, bali gba Ebhe-o, di ne etsi gba Ndili Kandələ-o. Etsi ango-o adu me:

«Ebhe Ngámá Apí 'Kpí,  
okulu gba mɛ-o ngbengbengbe.  
A di na ngangamba.  
'Ngbé Ngámá gba okpála,

okpadji gba mɛ-o ne okukulu kpadji, a la di ngbingbili.

<sup>4</sup> A mánga mɛ de da, Ngámá?  
A adhógə mɛ de da?

Padhá de, anga mɛ bubu ngamɛ kpi mɛ kpi.

Ndu opiga hana agó atutu lipaku o kala mɛ.

Padhá de, anga mo opana ngbili 'ngú gba mɛ-o pi uo apana.»

<sup>5</sup> Pipita-a, ma atsia 'kpí, ma au 'ngbé 'ti Ebhe inde abhúlá-a abhulu lie. A adu bhúbhú ne 'ti ngbangbali li Ebhe adu asuno lie bhú e-o. <sup>6</sup> Abhomɛ-o, oandjelu mananika inde adu ne gba olikabhu mananika sakpa o-o akoto bhú 'ngbé 'ti Ebhe-o. U adyidi obongo inde na kpéke mase,\* inde avuvu má tuu tuu! U agbigbite di mbulu o ne mukabha na olo. <sup>7</sup> Suka okpála badha na ngangamba-a aha kópo na olo mananika pi oandjelu mananika-o. Okópo ango-o adu bedhe bedhe ne oke 'ngú gba Ebhe inde bhú mukobho duduma ne duduma-o. <sup>8</sup> Abhomɛ-o, 'ngbé 'ti Ebhe-e abedhe ne ngúwa bedhe ka zi Ebhe di ne angu gba ani-o. Kaka-a, kpála bini ti da nali bhú 'ngbé 'ti Ebhe-e de, nakolo li nedhinga li olikabhu mananika li oandjelu-o adu ne e amene lie lie-o.

## 16

*Okópo na ke 'ngú gba Ebhe*

<sup>1</sup> Pipita-a, ma adje kpéke eli ayie ne bhú 'ngbé 'ti Ebhe. Eli ango-o apa pi oandjelu mananika-a me: «Yi nɛnɛ, amba yi tuko okópo na ke 'ngú mananika gba Ebhe-e pɪla doto!»

<sup>2</sup> Andjelu na bini-e anɛ, ani atsia atuko ke 'ngú inde adu bhú kópo gba e pɪla doto. Abhomɛ-o, oeka na sisiti, inde di nake make atsia aze li kute ndu okpála hana inde adu ne tele gba enu-o, inde adu di natoko kulu ani-o.

\* 15:6 15:6 Bongo na kpéke mase: U abho nani bongo ango-o li lene.

<sup>3</sup> Andjelu na bhisi-e atuko ke 'ngú inde adu bhú kópo gba e pí 'ngbé 'ngu. 'Ngbé 'ngu-o akolo maka ngute kpála inde akpi. Abhomu-o, ndu ohe hana inde adu bhú 'ngbé 'ngu-o me a nde uu-o atsia amu.

<sup>4</sup> Andjelu na bata-a atuko ke 'ngú inde adu bhú kópo gba e bhú ongade 'ngu, ne bhú okpongu. A atsia adji lie ngute. <sup>5</sup> Ma atsia adje andjelu inde adu ne angu pí ongu-o ngapa me:

«Ngamu kpála na bubu, inde uu, inde adu di nani uu-o, mu ne ngbili kpála ,

anga mo opana ngbili 'ngú gba mu-o.

<sup>6</sup> Padhá de, anga okpála abhili okpála gba mu-o di ne opolofeta .

Mo oha bhadi pi uo ngute me u ndji.

U asia engú inde ati ne uo-o!»

<sup>7</sup> Pipita-a, ma adje eli akoto pí misa natsulu mungotsi pi Ebhe-o. Eli ang-o adu apa me:

«A ko paká, Ebhe Ngámá Apí 'Kpí, ndu 'ngú mo okodho e hana-a, mo okodho li lelele, a la bhadi ngbingbili.»

<sup>8</sup> Andjelu na badha-a atuko ke 'ngú inde adu bhú kópo gba e pí ela. Aní atsia aha kpadji pi ela me a atsulu okpála ne djua gba e-o. <sup>9</sup> Abhomu-o, bili akpa na mugwe mugwe, okpála atsia atsulu kaka. U asobho 'li Ebhe inde adu bhú e ne angu ngú natima ngua oke 'ngú bhomu-o. Engú bini, u dji bua o ngú nadhege Ebhe de.

<sup>10</sup> Andjelu na bhuluvue atuko ke 'ngú inde adu bhú kópo gba e pí kiti na ngámá li enu-o adu nadu pí e-o. Abhomu-o, biti agba kuti-ngámá gba enu-o. Okpála atsia adu nazu 'mi o ka likabhu. <sup>11</sup> U adu asobho 'li Ebhe abhúla ka olikabhu gba o di ne ka oeka inde adu li uo-o. Engú bini, u dji bua o li osisiti 'ngú inde u adu namene e de.

<sup>12</sup> Andjelu na madhia-a atuko ke 'ngú inde adu bhú kópo gba e pí

ngade 'ngu na Efalata. Engu-o atsia a'ulu hana ngú naka kpadji pi ongámási inde ngayie ne ndjongu-o. <sup>13</sup> Abhomu-o, ma au osisiti bua bata ngakoto bhú 'bhé 'ngbé kpulu-o ne bhú 'bhe enu-o, di ne bhú 'bhe polofeta na eu-o. Osisiti bua ang-o adu maka omabianga. <sup>14</sup> A ko osisiti bua inde li djabulu atima o-o. U adu amene ongamba 'ngú . U adu nanu agba ongbengbe ongámási na doto libhomu ngú napo bhúla uo ngubula gbele na 'ngbé 'kpí gba Ebhe Apí 'Kpí-o.

<sup>15</sup> Ngámá Yesu apa me: «Tsitsia! Ma ngago maka bhulu 'zi! A ko djali pi kpála inde li zuku, inde ngalila obongo gba e li kute e ngú napa me ni anú ndumbu de, me ni asia namu de ka nakoto bhú djila okpála ndumbu-o.»

<sup>16</sup> Osisiti bua apo bhúla ongbengbe ongámási li bili inde u a'i e bhú eli gba omaYuda me Alamagedo.

<sup>17</sup> Andjelu na mananika-a atuko ke 'ngú inde adu bhú kópo gba e atu 'kpí. Kpéke eli bini atsia akoto abhú 'ngbé 'ti Ebhe. A ayie li pápá na kiti na ngámá-o. A apa me: «A amene lie amene!» <sup>18</sup> Abhomu-o, ekpi andjengene, mugbalá asula, adjigidjo na kpekpeke adhika. Ngua 'ngú bhomu-o mene nga nani lie kalanu de, nayie maka li Ebhe abho kpála píla doto lie-o! <sup>19</sup> 'Ngbé gudhu na Babilona agugumu bhusu e ne ndundundu bata. Abhomu-o, ndu ogudhu na okuti hana atuko kuto. Abhomu-o, Ebhe atsia a'o nga la 'to e 'to 'ngbé gudhu na Babilona. Aní atsia aha pi aní kópo na vino na ke 'ngú gba e na sisiti inde adu adula bhú e madula me aní ndji. <sup>20</sup> Ndu okpomu hana atsia angita, ndu oeta hana atsia angita di. <sup>21</sup> Ongbengbe itimeli na titili masakpe de kilo ndjikpa badha atsia abala pí okpála. Abhomu-o, okpála atsia asobho Ebhe ka likabhu na itimeli-o. Padhá de, anga likabhu ang-o adu kpekpeke na kuo kuo.

## 17

*Nakodho 'ngú gba okpála na Babilona*

<sup>1</sup> Abhomu-o, sùka oandjelu mananika inde i de ne okópo na ke 'ngú-o sakpa o ago apa muma me: «Gogo, ma asúno pi mu lele maka li Ebhe akodho 'ngú gba 'ngbé bhulú zabhe-e lie-o. A ko 'ngbé gúdhú inde u ayiki e lingo ongbengbe ongade 'ngu bhelé. <sup>2</sup> Ongbengbe ongámási na doto amene zabhe ne aní. Okpála na doto atsia alangba ne vino gba aní na zabhe-o.»

<sup>3</sup> Abhomu-o, Bu Bhobua abedhe ma, Andjelu-o atsia anu ne ma abhú mili bíli. Ma au elə bini inde adu pi enu na mbembe má ngua! Enu ang-o abuku kute e libhomu ne o'ili inde ngasobho Ebhe, 'ndji 'ndji adu li aní mananika di ne didi ndjikpa. <sup>4</sup> Elə ang-o adyi obongo na mbembembe na tia naali. Aní atsia adyi omagege na olo ne obhe na teme na mase naali di ne omayaka li kute e bedhe. A adu sakpa aní ne kópo na olo inde abedhe ne zibotu bhú e bedhe ka zabhe gba aní-o. <sup>5</sup> U aye pidi aní 'ili bini inde li ta e awo lie mawo. 'Ili ang-o me: «BABILONA NA NGBÉNGBÉ, 'HI OBHULU ZABHE DI NE OSISITI 'NGÚ NA DOTO-O.» <sup>6</sup> Ma au me elə ang-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au aní lie, ma angamba naali.

<sup>7</sup> Abhomu-o, andjelu-o apa muma me: «Mu ngangamba ka ni? Ngama-a, ma ambamba ta 'ngú gba elə bhomu-o ne enu inde abi aní-e pi mu, enu inde li e ne 'ndji 'ndji mananika di ne odidi ndjikpa-o. <sup>8</sup> Enu inde mo ou e bhomu-o, adu nani tété. La-a, aní matá ade. Aní akóto bhú tsu 'dú-o, aní tsia nú bhú ngita gba e-o. Okpála na doto inde u ye nani 'li o bhú bhuku na mukobho-o de nayie maka nani li Ebhe abho doto lie, angamba li nau enu-o. Padhá de, anga aní adu nani tété, la-a aní matá ade. Engú bini, aní akóto matá ne toto.

<sup>9</sup> A ayo mbia inde-e nadu ne imbilangu di ne bua nakpokpo kú 'ngú. Ondji 'ndji mananika-a, a ko oeta mananika inde li elə-o ngadu pí e-o. A ko di ongbengbe ongámási mananika-o. <sup>10</sup> Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Aní agó lie, aní améne bha nedhinga masudha. <sup>11</sup> Enu inde adu nako tété-e, inde matá tété ade bhomu-o, ngaani makpe-e, a ko 'ngbé ngamá na madjina. Aní bhú ká ongbengbe ongámási mananika-o. Aní adji bhú ngita gba e-o.

<sup>12</sup> Odidi ndjikpa inde mo ou e bhomu-o, a ko ongbengbe ongámási ndjikpa inde i 'u nga pí kiti na ngamá de-o. Engú bini, u asia angu ngú nau bhú dabili bini ne enu-o ngú saa bini. <sup>13</sup> Ndu ongámási ndjikpa bhomu-o hana bha ne koli mabhundja bini. U ne gumu naha angu di ne ngamá gba o ngú namene kulu lio pi enu-o. <sup>14</sup> U agú gbele ne Ndili Kandelə-o, la-a, Ndili Kandelə-o ahá angu uo. Padhá de, anga a ko Ngamá gba ongámási, a ko 'Ngbé Ngamá gba ongbengbe ongámási. Omaha Ndili Kandelə inde aní a'i o-o, aní atsia alo o-o, u ahá bhadi angu uo bhú dabili bini ne aní. U ngakpata Ndili Kandelə-o ne bua o bini.»

<sup>15</sup> Pipita-a, andjelu-o apa matá muma me: «Oengu inde mo ou e li bíli inde li elə na zabhe alu li e bhomu-o, a ko okpála na ndu bíli hana, a ko bhiti okpála, a ko opiga di ne okongú. <sup>16</sup> Odi 'nu ndjikpa ne enu inde mo ou e bhomu-o, ayála elə na zabhe-o. U bhá 'he li aní hana, u a'ó ká aní ndumbu, u azú mbilika aní, u tsia bú dú aní bhú djua. <sup>17</sup> Padhá de, anga Ebhe a'o li bua uo me u mene mukunda gba aní-o. U améne ne bua bini me o ha angu na ngamá gba o me o mene kulu lio nedi pi enu-o, nakolo li nedhinga li 'li Ebhe améne lie lie-o. <sup>18</sup> La di-e, elə inde mo ou e-e, a ko



'ngbé gũdhũ inde ngau pí ongámási na doto-o.»

## 18

### *Nati ka gũdhũ na Babilona*

<sup>1</sup> Pipita-a, ma au andjelu koko ayie abhúlá ngakø kuto. A adũ bhú ani ne angu na ngbéngbé. Abhomũ-o zi ani abha doto libhomu. <sup>2</sup> Ani asula kpekpeke me:

«'Ngbé Babilona ati-e ngae! 'Ngbé Babilona ati-e ngae!

A akolo ibili bili li odjabulu ngadulu li e,

bili inde li ndũ osisiti bua hana ngadulu li e.

A bhomũ-o bili li odhu ne onũ inde kala Ebhe sisiti-e ngadulu li e-o.

<sup>3</sup> Padhá de, anga ndũ okpála na doto hana andji siti zabhe gba ani-e maka okpála andjindji vino lie-o.

Ongbengbe ongámási na doto amene zabhe ne ani, obhulu natsindji 'he na píla doto atsia akpo di li angu na bhiti tia gba ani-o.»

<sup>4</sup> Pipita-a, ma adje eli koko ayie abhúlá. A adũ apa me:

«Ngayi okpála gba ma-a, yi ze bhú Babilona zeze,

amba yi améne siti 'ngú bhú dabili bini ne ani de,

ngú napa me yi asía olikabhu inde abháka ani-e bhú dabili bini ne ani de.

<sup>5</sup> Padhá de, anga osisiti 'ngú gba ani-e apo 'ta e akolo makolo abhúlá.

Ebhe atsia abhundja osisiti 'ngú gba ani-o.

<sup>6</sup> Yi mene ani maka ani amene okpála koko lie-o.

Yi gie siti 'ngú ani amene e pí ani bhũtsibhũtsi bhisi.

Yi ha pandi inde ane bhe gba ani-e ne kpéke bhũtsibhũtsi bhisi-e pí ani

bhú kópo inde ani adũ a'o pandi gba e bhú 'bhø okpála ne e ko.

<sup>7</sup> Ani adũ akpi ndjili naali bhú asasaua na tia gba e-o.

Kaka-a, yi gie di likabhu ne mulo polo pí ani li lelele.

Padhá de, anga ani ngapa li bua e me:

«Ma adũ pí kiti na ølø gba ngámá, ma ne økø ade, ma adũ galikpe bhú talia de.»

<sup>8</sup> Kaka-a, ndũ okpekpeke da 'ngú inde a'o lie pí ani-e agó galikpe atí pí ani

li koli 'kpí bini ndũndũ hana.

Okpekpeke da 'ngú ang-o ngae inde: nakpi ka okpála, talia di ne gumũ,

li djua tsia tsúlu di ani hana má kpøkøbhø!

Padhá de, anga Ngámá Ebhe inde akodho 'ngú gba ani-e, ne kpála na angu.»

<sup>9</sup> Abhomũ-o, ongbengbe ongámási na doto inde-e amene zabhe bhú dabili bini ne ani. U akpi ndjili ne ani li bhiti tia gba ani-o. Li u aú ngúwa djua atsúlu ani-e lie, u kú 'gbá, u tsia lópolo di lio ngú ani. <sup>10</sup> U alúlũ de ani tsutsu ka nakpe likabhu inde abhaka ani-o. U tsia pá me:

«A ko likabhu na ngbéngbé pí mũ, Babilona!

Mũ ne 'ngbé gũdhũ, mũ la di ne angu.

La-a, Ebhe akodho 'ngú gba mũ-o bha bhú saa bini padhá!»

<sup>11</sup> Obhulu natsindji 'he di ngaku 'gbá, uo di bhú talia li 'ngú gba ani-o. Padhá de, anga kpála bini ngakala matá ehe gba uo-o ade.

<sup>12</sup> Abana i dũ di-e olo, ne oaladja, ne oteme na mase ne omayaka, kpála bini ngakakala ade. Abana i dũ obongo na kpéke mase, ne ombe-mbe obongo na zizi, ne obongo inde u abho e li dele gba okøkó, kpála bini ngakakala ade. Abana i dũ ndũ djua ondula na babadha sese hana, abana i dũ ndũ djua øehe inde u abho e li 'te 'ya hana di ne øbhe u abho e li ondula na mase hana, ne øbhe u abho e li teme, kpála bini ngakakala ade. Abana

i dũ di-e ndũ djua kalase hana, kpála bini ngakakala ade. <sup>13</sup> Abana i dũ oehe ne okpálá koko inde u aleleke se bili abhú 'ti ne e, ne mila di ne omungotsi koko, ne bandele, kpála bini ngakakala ade. Abana i dũ pandi, ne emũ, ne fufú, kpála bini ngakakala ade. Abana i dũ obagala, ne okandələ, ne opunda, ne okpulukupulu, kpála bini ngakakala ade. Abana i dũ 'lá kpála-kuti, kpála bini ngakakala sũsũka ade.

<sup>14</sup> Obhũlũ natsindji 'he bhomũ-o apa pi gũdhũ bhomũ-o me:

«Ndũ oehe inde mo okũkũnda e hana andjia gba mũ andjia!

Ndũ otia gba mũ di ne obabadha 'he gba mũ-o andjia ka mũ andjia,

u ú matá gba mũ belegũ de bini!»

<sup>15</sup> Obhũlũ natsindji 'he inde akpo li tia na gũdhũ ango-o alũlũ de ani tsutsu ka nakpe likabhu inde abhaka ani-o. U adũ aku 'gba, u tsia lópolis di lio ngũ ani. <sup>16</sup> U adũ apa me:

«A ko likabhu na ngbéngbé pi yi, okpála na 'ngbé gũdhũ-o!

Yi adyi li kũte yi babadha bongo inde na kpéke mase.

Yi atsia adyi di li yi obongo na mase naali inde na mbembe má ngua,

inde li e ne zizi.

Yi adyi di omagege na olo bhũ dabili bini ne oteme na kpéke mase di ne omayaka.

<sup>17</sup> Ndũ 'he bhomũ-o hana angíta bha li saa bini má kpikili!»

Abhomũ-o, ndũ obhũlũ nadjele zabũ hana, bhũ dabili bini ne okpála inde u abi o, okpála nadhũkũ pí 'ngbé 'ngu bhũ dabili bini ne obhũlũ nagili tia pí 'ngbé 'ngu-o alũlũ mbo tsutsu. <sup>18</sup> U atsia adũ asũsula ka nau nguwa adũ aze ka natsi ka gũdhũ-o me: «A akpo 'ndji e li 'ngbé gũdhũ inde-e ne bhedho?» <sup>19</sup> U adũ aba embi bhũ 'ndji o, u adũ aku 'gbá, u atsia adũ alopolo lio me:

«A ko likabhu na ngbéngbé pi yi, okpála na 'ngbé gũdhũ-o!

Bhiti tia gba yi-e ngae inde li okpála inde ngamene kulu pí 'ngbé 'ngu-o

akpo ka e ko.

La-a, ndũ 'he bhomũ-o hana andjia bha li saa bini má kpikili!»

<sup>20</sup> Ngayi okpála inde abhũlũ-a, yi kpi ndjili li nakpi ka gũdhũ ango-o!

Ngayi omaha Ebhe, ne yi obhũlũ titima gba Ebhe, di ne yi opolofeta, yi kpi ndjili!

Padhá de, anga Ebhe akodho 'ngũ gba ani-e ka siti 'ngũ inde ani amene e li yi ko!

<sup>21</sup> Abhomũ-o, andjelu bini na angu aha teme bini maka 'ngbé teme nadyi ngano, ani atsia atũmba bhũ 'ngbé 'ngu ne napa me:

«U atũmba bhadi ngbé gũdhũ na Babilona ne kpéke me,

kpála bini ú matá galikpe ani de.

<sup>22</sup> Obhũlũ nabhi dũmũ bhí matá galikpe agba mũ de.

Obhũlũ na'u toti 'ú matá galikpe agba mũ de.

Obhũlũ nali 'tsi lí matá galikpe agba mũ de.

Obhũlũ ikalana dũ matá di agba mũ de.

Okpála dyí di matá ngano agba mũ de.

<sup>23</sup> Zi tala dũ matá di agba mũ de.

U djé matá di 'li okpála inde aha lio agba mũ de.

Padhá de, anga obhũlũ natsindji 'he inde adũ bhũ gũdhũ gba yi-e, adũ ongbengbe kpála na doto.

Obhũlũ kobha gba yi-e apite ndũ okpála hana.

<sup>24</sup> Okpála na Babilona abhili opolofeta,

ne okpála gba Ebhe di ne ndũ okpála hana inde u abhili o pála doto-o.»

## 19

### *Etsi ngũ nadhøge Ebhe*

<sup>1</sup> Pipita-a, ma adje eli kpekpeke ayie abhũlũ. Eli ango-o adũ mũgito

me bhiti okpála ngagama 'ngú. U adu apa me:

«Aleluya! Yi toko Ebhe, Ngámá gba ní-o!

A ko mukobho, a ko Ebhe na sangu, a ko Ebhe na angu!

<sup>2</sup> Engú ani ngakodho e hana-a, ani ngakokodho li lelele, a la bhadi ngbingbili.

Padhá de, anga ani akodho 'ngú gba 'ngbé bhulú zabhe inde adu nako

asiti 'ndji okpála na doto ne zabhe gba e ko.

Ani atsia agisila engú nabhili obalise gba e li ani.»

<sup>3</sup> U atsia apa matá me:

«Aleluya! Yi toko Ebhe, Ngámá gba ní-o!

Ngúwa inde ngakoto bhú gudhu-o nga'u abhúlá duduma ne duduma.»

<sup>4</sup> Obhelesi okpála ndjikpa bhisi ne ká badha bhú dabili bini ne okpála badha na ngangamba-a atutu lipuku o kuto, u atsia adhögö Ebhe inde ngadu pí kiti na ngámá-o. U adu apa me:

«A du moko! Aleluya! Yi toko Ebhe, Ngámá gba ní-o!»

#### *Anokomia gba Ndili Kandelo-o*

<sup>5</sup> Abhomu-o, eli bini ayie ne li pápá na kiti na ngámá-o. Eli ango-o apa me:

«Yi toko Ebhe gba ní-o, ndu yi obalise gba ani-e hana,

ngayi okpála inde ngamanga ani-o,

abana ngayi ongbengbe okpála ne yi odjedjedje!»

<sup>6</sup> Pipita-a, ma adje tolo mugito me a ngagama 'ngú ne bhiti okpála. Tolo ango-o adu mugito me a ko gili wowo 'ngu, mugito me kpéke mugbalá ngasusula ngae. A adu apa me:

«Aleluya! Yi toko Ebhe, Ngámá gba ní-o!

Padhá de, anga a ko Apí 'Kpí.

Ani ngau maka ngámá.

<sup>7</sup> Ní kpi ndjili, amba ní du di bhú djali!

Ní dhögö ani!

Padhá de, anga nedhinga na anokomia na kuva gba Ndili Kandelo-o akolo,

wala\* ani aleke lie aleke.

<sup>8</sup> U aha bongo inde na kpéke mase pi ani.

Zi bongo ango-o ngasu masu, zibotu bini tété ade.»

(Bongo na kpéke mase bhomu-o ngasuno me okpála gba Ebhe-e amene obabadha kulu lio pi ani.)

<sup>9</sup> Abhomu-o, andjelu-o apa muma me: «Ye engú inde-e me: «A ko djali pi okpála inde u a'i o bhú anokomia na kuva gba Ndili Kandelo-o!» Ani atsia apa matá muma me: «A bhomu-o okukulu eli inde ayie ka Ebhe-o.»

<sup>10</sup> Abhomu-o, ma atutu lipuku ma kuto bhú li 'dhu ani ngú nadhögö ani. Engú bini, ani apa muma me: «Mo oméne mo-o de. Ma ne bali gba Ebhe maka mu. Ma bhadi maka ondaise mu inde ngakpokpo kukulu 'ngú inde li Yesu ambamba 'ta e-o. Tutu mangbo lipuku mu kala Ebhe.»

Padhá de, anga ngbili 'ngú inde li Yesu akpokpo e ngaha angu pi opolofeta ngae.

#### *Kpála inde adu pí punda na bubu-o aha 'gú ne obhulu yala gba e*

<sup>11</sup> Pipita-a, ma au kokpi abhulu lie. Abhomu-o, punda bini na bubu akoto. Kpála inde adu pépé-e, adu 'li ani me: «Kpála inde ngamene kulu lie pi Ebhe ne bua e bini.»

Ani ngakodho 'ngú ngbingbili, ani di ngagu egú bhú ngbili 'ngú. <sup>12</sup> Djila ani adu nade maka zi djua. Adu di bhú 'ndji ani ne ondata na ngámá bhelé. U aye 'ili bini li kute ani. Ani ambila bha bini 'ta 'ili ango-o ngae.

<sup>13</sup> Ani adyi koti bini inde u azi e bhú ngute-e li kute e. Adu 'li ani me: «'Li Ebhe.» <sup>14</sup> Osudha na abhúlá adu akpata ani me u nde a'u'u

\* **19:7** 19:7 Ndili Kandelo ne wala e: Ndili Kandelo-o, a ko Kilisito, wala ani-e, a ko Piga gba Ebhe. Tsia bhú Efe. 5:25, 32.

pí opunda na bububu. U adyidyí obongo na kpéke mase. Bongo ango-o adu bubu, zibotu bini du tété de. <sup>15</sup> Mbotia inde li 'bhø e adu bebedhe-e adu akoto bhú 'bhø ani. Mbotia ango-o adu ngubula nabhili opiga ne di. Ani aú pí 'ndji uo ne angu e hana. Ani tsia pí vino bhú 'ngbé ngbøngøle na ke 'ngú gba Ebhe Ngámá Apí 'Kpí-o. Ke 'ngú ango-o adú nadula madula.† <sup>16</sup> U aye 'ili bini li koti gba ani di ne pí 'ku ani. U aye 'ili ango-o me: «'NGBÉ NGÁMÁ GBA ONGBENGBE ONGÁMÁSI, NGÁMÁ GBA ONGÁMÁSI.»

<sup>17</sup> Pipita-a, ma au andjelu bini, alu tu ela. Ani asula kpekpeke pí ndu odhu hana inde adu adholo abhúla tsutsu naali-e me: «Yi go po bhúla yi ngú 'ngbé anokomia gba Ebhe-o! <sup>18</sup> Yi go zu mbilika ongbengbe ongámási ne ongámási gba osudha di ne osudha. Yi go zu mbilika opunda di ne mbilika osudha inde adhudhuku ne di-o. Yi go zu mbilika okpála, abana i du obhende bhú bali ne obhe bhú bali ade-o, abana i du odjedjedje ne ongbengbengbe.»

<sup>19</sup> Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhúla o ngú naha 'gú pí kpála inde adu pí punda ne osudha gba e-o. <sup>20</sup> Abhomu-o, kpála inde adu me ani nde a'u pí punda aholo enu-o bhú dabili bini ne polofeta na eu inde adu nani amene ongamba 'ngú li djila ani-o. Ani adu nani amene ongamba 'ngú bhomu-o ngú nato okpála inde u aye nani tele gba ani-e li kute o bhú ngita, inde adu di adhøgø kulu ani-o. Kpála bhomu-o abhike enu-o bhú dabili bini ne polofeta na eu-o bhú dé djua na baluti. Ani abhike uo bhúbhú me u nde mu de. <sup>21</sup> Ani atsia abhili osudha gba uo ne ngise inde adu akoto bhú 'bhø ani-o. Abhomu-o, ndu odhu hana azu mbilika uo. U atsia a'u'u ne di.

## 20

### *U agbite Satana ngú kalanga koto bini*

<sup>1</sup> Pipita-a, ma au andjelu bini ayie abhúla, ani atsia akø píla doto. A adu sakpa ani ne lifungula na tsu 'du-o. A adu di sakpa ani ne 'ngbé gbíndjili na ngbéngbé. <sup>2</sup> Ani ago aholo 'ngbé kpulu na didili-o. 'Ngbé kpulu ango-o, a ko Satana inde djabulu. Andjelu ango-o agbite ani ngubula kalanga koto bini. <sup>3</sup> Ani abhike ani bhú tsu 'dú. Ani adho bhøbhø nganda ani, ani atsia aye balua pépé. Balua ani aye e adu me, ngubula kalanga koto bini-e, ani ngbingi matá 'ndji okpála de. Pipita-a, u atsé mbo 'kpa li ani ngú nedhinga bedi.

<sup>4</sup> Pipita-a, ma au okiti na ngámá. Okpála inde adulu pépé-e, u aha pí uo angu nakodho 'ngú gba okpála. Ma au di bua okpála bhende u ava nani ngulu o ka u abhuka kukulu 'ngú inde li Yesu ambamba ta e di ne 'li Ebhe lie-o. U dhøgø nani enu-o de. U dhøgø di kulu ani-e de. U ye di nani tele gba ani-e pidi uo, i du di-e li 'kpa uo de. U azuku matá, u atsia au ngámá bhú dabili bini ne Kilisito ngubula kalanga koto bini. <sup>5</sup> A bhomu-o bhutsibhutsi na bini me Ebhe zuku okpála-o. Okpála bhe koko adjéke ngaiza me kalanga koto bini-e le paká, li Ebhe tsia zuku uo. <sup>6</sup> A ko djali pí okpála inde azuku bhú ká okpála inde li Ebhe azuku o kalanu bhomu-o. A ko okpála gba Ebhe, la di-e, nakpi na bhisi-e ne angu pí uo ade. U adú odimandø gba Ebhe di ne gba Kilisito. U aú ngámá bhú dabili bini ne ani ngubula kalanga koto bini.

### *Satana ati*

<sup>7</sup> Li kalanga koto bini-e de ale-e, u gbé Satana bhú tikpu gba e-o. <sup>8</sup> Ani tsia nú napite opiga inde agbolo píla doto libhomu. A akunda napa me nayie bhú Gogo nakolo

† 19:15 19:15 Tsia bhú Ets. 2:9. \* 20:8 20:8 Gogo ne Magogo: A ko 'ili ngú nasuno obhulu yala gba omatsalaele.

bhú Magogo.\* Aní apó bhúla uo ngabula gbele. U tsia dú bhelé nane sike lingo 'ngbé 'ngu mane. <sup>9</sup> U abha doto libhomu, u atsia asa bili li omaha Ebhe apo bhúla o lie-o. U atsia asa di gúdhú gba okpála li Ebhe akúnda o-o. Engú bini, djua ayie abhúlá, atsia ago atsulu uo hana. <sup>10</sup> Abhomu-o, Ebhe atsia atumba djabulú, kpála inde adu nako napite uo, bhú dé djua na baluti nganda enu-o bhú dabili bini ne polofeta na eu-o. U adú nazú likabhu oo ngbikpi ne sukpe dudu ma ne dudu ma.

*Lele maka li Ebhe akodho 'ngú na soso-o lie-o*

<sup>11</sup> Pipita-a, ma au 'ngbé kiti na ngámá bini me kpála bini nde adu pépé. Kiti ango-o adu bubu. Kokpi ne doto akpekpe de ani tsutsu. Kpála tsia u matá uo de. <sup>12</sup> Abhomu-o, ma au okpála inde amu-o, ong-bengbengbe ne odjedjedje, alulú kala kiti na ngámá-o. U abhulu obhuku. U atsia abhulu di bhuku koko, a adu bhuku na mukobho-o. Abhomu-o, Ebhe atsia akodho 'ngú gba okpála inde amu-o nakpata lele kulu gba uo-o, nakpata engú inde u aye e bhú obhuku-o. <sup>13</sup> 'Ngbé 'ngu azie okpála inde amu inde adu bhúbhú-o. Kuo ne kuti gba okpála inde amu-o azie di okpála inde adu agba uo-o. Abhomu-o, Ebhe atsia akodho 'ngú gba kpála ne kpála nakpata lele kulu gba e-o. <sup>14</sup> Abhomu-o, Ebhe atsia atumba kuo bhú dabili bini ne kuti gba okpála inde amu-o bhú dé djua-o. Dé djua bhomu-o, a ko nakpi na bhisi. <sup>15</sup> Abhomu-o, ndu kpála hana inde u ye 'li e bhú bhuku na mukobho-o de-e, u abhike ani bhú dé djua bhomu-o.

## 21

*Ebhe abhó ndu 'he hana ne toto*

<sup>1</sup> Pipita-a, ma au kokpi na mbia ne doto na mbia, anga kokpi na kalanu ne doto na kalanu-o andjia. 'Ngbé 'ngu du matá di-i de. <sup>2</sup> Ma atsia au gúdhú na bubu-o ngayie abhúlá.

Gúdhú ango-o, a ko Yelusalema na mbia. Ebhe atima gúdhú ango-o ngae. A adu aké kuto me a nde bedhe maka elé inde aleke lie ngú nanu naké lie ne 'ko e. <sup>3</sup> Ma adje kpála bini ngatobhila kpekpeke li pápá li kiti na ngámá-a adu li e me: «Mbia inde-e dabili nadu gba Ebhe-e bhú ká okpála. Aní adú ne uo, u tsia dú omaha ani. Ebhe ngae makpe adú bhú dabili bini ne uo, ani adú Ebhe gba uo. <sup>4</sup> Aní akúo ndu ngula sa kula uo hana, okpála mú matá-a de. Engú na da kuo dú matá-a de, egba dú di-i de, likabhu dú di-i de, anga doto na kalanu-o nde andjia.»

<sup>5</sup> Abhomu-o, kpála inde adu pí kiti na ngámá-a atsia apa me: «Mbia inde-e, ma ngabho ndu 'he hana na mbia.» Pipita-a, ani apa muma me: «Ye 'ngú inde, anga eli ma ngapa e-e, a ko kukulú 'ngú, inde a ayo la di me okpála bhuka e ko.» <sup>6</sup> Aní atsia apa matá muma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. Kpála inde lie ne gumu 'ngu-o, ma ahá engu nandji mandji pi ani padhá bhú kpongu inde ngaha mukobho. <sup>7</sup> Kpála inde agbóko egú-o, ma ahá ndu 'he bhomu-o hana pi ani, ma adú ne Ebhe gba ani, ani tsia dú ndili gba ma. <sup>8</sup> La pi okpála bhende ngamene siti 'ngú-o, dá uo abhú dé djua na baluti na dudu ma ne dudu ma. A bhomu-o nakpi na bhisi. A ko okpála namene ngua siti 'ngú inde: obhulu tsulu, okpála ayala nabhuka, obhulu namene zabhe, obhulu nabhelo kpála, obambakaya, obhulu kelé, obhulu nayo oebhe na eu, ne obhulu eu.»

*Yelusalema na mbia*

<sup>9</sup> Abhomu-o, suka oandjelu mananika inde adu sakpa o ne okopo mananika, inde abedhe ne olikabhu mananika na soso-o ago apa muma me: «Gogo, ma nu suno

өлө на кұва-а пі мұ. А ко wala Ndili Kandөлө-о .»

10 Bu Bhobua ago abedhe ma, abhomu-o andjelu-o anu a'o ma pi 'ndjá 'ta. Eta ango-o adu ngebéngbé. Ani asuno gudhu na bubu-o muma. Gudhu ango-o, a ko Yelusalema li Ebhe atima e ngae-o. A ayie abhúla, a atsia adu akə kuto. 11 Zizi adu asu ka sangu gba Ebhe-o. Zi gudhu ango-o adu nasu má ngingingi mugito me a ko teme\* na mase. 12 Aga inde u asa e li kukute-e adu ngebéngbé, di ndjándjá. Bhəbhə adu tété ndjikpa ne ká bhisi, oandjelu ndjikpa ne ká bhisi atsia adu nalilila. U atsia aye 'li opiga ndjikpa ne ká bhisi na Isalaele-e tété. 13 Ne ndu pasu hana bhəbhə adu tété bata: bata ne ndjongu, bata ne kati, bata li pápá na abebe, bata li pápá na yoyoko. 14 U ayiki aga bhomu-o pi oteme ndjikpa ne ká bhisi. U atsia aye 'li obhulu titima ndjikpa ne ká bhisi gba Ndili Kandөлө-о tété.

15 Andjelu inde adu apa 'ngú muma-a, adu sakpa ani ne mbamba na olo inde ani adu napima ne e gudhu-o, ne obhəbhə, di ne aga ango-o. 16 Gudhu ango-o adu ne odjedje badha. A aviti bhú 'ndjá ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e, mbamba-a ali bhúbhú bhutsibhutsi kətə 12† ne ká bhisi ne ndu pasu hana. 17 Ani apima di aga-o, mbamba gba ani-e ali bhúbhú bhutsibhutsi kətə 144‡ bhú 'ndjá abhúla. Ani apima bha maka li okpála apipima 'he lie-o.

18 U ayiki nani aga ne teme inde u a'i e me djasepe. Gudhu-o libhomu adu ngili olo. A atsia adu má ngilili maka tsupa na bubu. 19 Oteme inde u amene 'dhu aga na gudhu-o ne e, u aye nani tele tété ne ndu djua oteme na mase hana: bhe na bini-e adu teme na djasepe, bhe na bhisi-e adu

teme na safile, bhe na bata-a adu teme na kalaseduane, bhe na badha-a adu teme na emelode, 20 bhe na bhuluvue adu teme na saladuane, bhe na madhia adu teme na kolon-aline, bhe na mananika adu teme na kilidjolute, bhe na madjina adu teme na belile, bhe na odukpabini-e adu teme na topadje, bhe na ndjikpa-a adu teme na kilidjopaladje, bhe na ndjikpa ne ká bini-e adu teme na yasete, bhe na ndjikpa ne ká bhisi-e adu teme na ametisite. 21 Obhoti ndjikpa ne ká bhisi-e adu omayaka ndjikpa ne ká bhisi. U abho nani bhoti bini ne bini li lí mayaka bini má kpikili! 'Ngbé 'hi kpadji na gudhu-o adu nani ngili olo. A atsia adu má ngilili maka tsupa na bubu.

22 Ma u belegu 'ngbé 'ti Ebhe bhú gudhu bhomu-o de, anga Ebhe Ngámá Apí 'Kpi ngae makpe bhú dabili bini ne Ndili Kandөлө-о ne 'ngbé 'ti Ebhe ango-o ngao. 23 Gudhu ango-o du ne gumu ela abana di epe ngú naha zi kpi oo de, anga sangu gba Ebhe-e ngasu zi e oo ngae, Ndili Kandөлө-о la di ne tala ango-o ngae. 24 Opiga na doto adu adhuku li zi gudhu ango-o. Ong-bengbe ongámási na doto tsia gó di ne tia gba o bhú gudhu ango-o. 25 Obhə bhoti na gudhu ango-o adu ndu nedhinga hana bábá, u ní galikpe-e de, anga ekpi bí galikpe oo de. 26 Opiga na doto adu nali bhúbhú ne sangu di ne obabadha tia gba o-o. 27 Ehe bini na sisiti lí oo de, abana okpála namene engú inde li Ebhe ayala e, abana obhulu eu. A alí bha bini oo ne okpála inde u aye 'li o bhú bhuku na mukobho-o, bhuku gba Ndili Kandөлө-о.

## 22

1 Pipita-a, andjelu-o asuno muma ngade 'ngu inde ngaha mukobho pi

\* 21:11 21:11 Teme: Bhú eli na giliki-e, u aye me «Teme na djasepe ne kilisitale.» † 21:16 21:16 Mbamba bhutsibhutsi kətə 12: Gudhu bhomu-o adu bhú 'ndjá-a masikpe de kilometele kətə bhisi ne 'he pépé ndu pasu hana. ‡ 21:17 21:17 Mbamba bhutsibhutsi kətə 144: A ko masikpe de metele ndjikpa mananika ne ká bhisi.

okpála-o. Ngade 'ngu ango-o adu má ngilili maka tsupa na bubu. A adu ayie li bili li kiti na ngámá gba Ebhe ne Ndili Kandølo-o adu li e-o. <sup>2</sup> Engu ango-o atsia adu akpe li 'ngbé 'hi kpadji na gudhu na bubu-o. Ne ndu pasu bhisi na ngade 'ngu-o hana adu tété ne ndula inde ngaha mukobho. Ndula ango-o ngali lílí bhatsibhatsi ndjikpa ne ká bhisi bhú kalanga bini. A ngali lílí bhatsibhatsi bini ndu epe bini ne bini hana. Kpákpá-a atsia adu nateteke ngubula nakobho okuo gba opiga.

<sup>3</sup> Ohe inde li Ebhe tú matá pødjø li e, lí bhú gudhu ango-o de. Kiti na ngámá gba Ebhe ne uo ne Ndili Kandølo-o adu bhú gudhu-o. Obalise gba Ebhe-e tsia dú nadhøge ani. <sup>4</sup> U aú bhúla ani, u tsia yé 'li ani pidi uo. <sup>5</sup> Sukpe dú matá-a de, u dú di matá ne gumu zi tala abana zi ela de, anga zi Ebhe Ngámá asú pi uo ngae, u tsia ú ngámá duduama ne duduama.

### *Nago ka Yesu*

<sup>6</sup> Pipita-a, andjelu-o apa muma me: «Ongú inde ma apa e, a ko kukulu 'ngú inde ayo me okpála bhuka e. Ebhe Ngámá inde ngato 'li e bhú opolofeta-a, atima andjelu gba e ngú nasuno pi obalise gba e engú inde ayo me akolo mbia inde-o.»

<sup>7</sup> Yesu apa me: «Gbo 'dje mu, Ma ngago mbia inde! A ko djali pi kpála inde ngalila ongú inde li Ebhe ambamba ta e bhú bhuku inde-o!»

<sup>8</sup> Ngama Dja, ma adje ongú bhomu-o ne 'dje ma, ma atsia au di ne djila ma. Pita nadjedje ne nauu-o, ma ati bhú li 'dhu andjelu inde asuno ongú bhomu-o muma-a ngú nadhøge ani. <sup>9</sup> Engú bini, ani apa muma me: «Mo oméne mo-o de! Ma ne bali gba Ebhe-e maka mu. Ma bhadi maka ondaise mu inde ngakpokpo kukulu 'ngú inde li Yesu ambamba ta e-o. Ma maka ndu okpála hana inde ngalila engú

inde u aye e bhú bhuku inde. A ayo mangbo me mu dhøge Ebhe!»

<sup>10</sup> Pipita-a, andjelu-o apa muma me: «Mo owó ongú inde li Ebhe ambamba ta e bhú bhuku inde-e de, anga nedhinga ngú namene lie ka ongú ango-o akolo masikpe. <sup>11</sup> A ayo me kpála bhende ngamene siti 'ngú-o nu bha nedi ne kalanu, kpála bhende ngamene engú inde li Ebhe ayala e nu bhadi nedi ne kalanu. Kpála bhende ngamene ngbili 'ngú nu bhadi nedi ne kalanu, amba kpála bhende ngamene engú inde nganga li Ebhe-e nu bhadi ne di ne kalanu.» <sup>12</sup> Yesu apa me: «Gbo 'dje mu, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o. <sup>13</sup> Ngama-a, ma ne Alafa di ne Omega, a kunda napa me ma ne kpála na kalanu, ma la di ne kpála na soso. Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.»

<sup>14</sup> A ko djali pi okpála inde ngavulu obongo gba o-o. Ebhe Ngámá ahá kpadji pi uo me, u li li obhoti na gudhu na bubu-o, amba u zu di lí 'lá inde ngaha mukobho-o. <sup>15</sup> Engú bini, ndu okpála bhe koko hana, u lí bhú gudhu-o de. Okpála ango-o ngao inde: okpála inde li Ebhe atu pødjø li o, obhulu kele, obhulu zabhe, obhulu nabhili okpála, okpála inde ngadhøge oebhe na eu, di ne ndu okpála hana inde ngakpi ndjili li eu, inde di ngapa eu-o.

<sup>16</sup> «Ngama Yesu-o, ma atima andjelu gba ma-a ngú nago nambamba ta ongú bhomu-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi. Ma ne ikupala inde asusu kekpi-o.»

<sup>17</sup> Bu Bhobua ngauo ne ølo na kuva apa me: «Gogo!»

A ayo me kpála inde adje engú inde-e pa di me: «Gogo!»

A ayo me kpála inde li e ne gũmũ 'ngu-o gógo.

A ayo me kpála inde li e ne gũmũ engu inde ngaha mukobho-o sia padhá.

*Engú na soso*

<sup>18</sup> Ngama Djaa, ma ngagbele 'dje ndũ okpála hana inde ngadje ongú inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndũ olikabhu hana inde u aye e bhú bhuku inde-e pí ani! <sup>19</sup> Li kpála bini 'e la di ehe bini bhú ká ongú inde

li Ebhe ambamba ta e bhú bhuku inde-e, Ebhe 'é makalá gba ani inde u akpokpo 'ngú e bhú bhuku ango-o. Makalá ango-o, a ko lí 'lá inde ngaha mukobho pí okpála, a ko la di nali bhú gũdhũ na bubu-o.

<sup>20</sup> Kpála inde alũ pí ndũ 'ngú inde-e hana apa me a ko kukulũ 'ngú-o apa me: «A moko, ma ngago mbia inde!»

Ngama Djaa, ma atsia apa me: «A adũ moko! Gogo, Ngámá Yesu.»

<sup>21</sup> A ayo me Ngámá Yesu suno bádha bhú 'bu gba e pí ndũ yi hana.